

山谷集诗注

黄庭坚

文硕阁

wenshuoge.com

目录

关于我们	4
提要	6
黄陈诗注原序	7
山谷内集诗注原注【年谱附】	8
山谷内集诗注卷一	37
山谷内集诗注卷二	50
山谷内集诗注卷三	61
山谷内集诗注卷四	71
山谷内集诗注卷五	81
山谷内集诗注卷六	89
山谷内集诗注卷七	102
山谷内集诗注卷八	113
山谷内集诗注卷九	123
山谷内集诗注卷十	134
山谷内集诗注卷十一	142
山谷内集诗注卷十二	153
山谷内集诗注卷十三	164
山谷内集诗注卷十四	174
山谷内集诗注卷十五	184
山谷内集诗注卷十六	194
山谷内集诗注卷十七	203
山谷内集诗注卷十八	212
山谷内集诗注卷十九	220
山谷内集诗注卷二十	230
山谷外集诗注原序	239
山谷外集诗注原目【年谱附】	240
山谷外集诗注卷一	265
山谷外集诗注卷二	277
山谷外集诗注卷三	289
山谷外集诗注卷四	302
山谷外集诗注卷五	314
山谷外集诗注卷六	325
山谷外集诗注卷七	338
山谷外集诗注卷八	351
山谷外集诗注卷九	363
山谷外集诗注卷十	376

山谷外集诗注卷十一	389
山谷外集诗注卷十二	402
山谷外集诗注卷十三	415
山谷外集诗注卷十四	429
山谷外集诗注卷十五	442
山谷外集诗注卷十六	454
山谷外集诗注卷十七	467
山谷别集诗注卷上	477
山谷别集诗注卷下	490

版权声明

本书版权保护已经过期，属于公版书！并由"文硕阁"网站的用户制作并发布于文硕阁 网站内,请大家在“合理使用”范围内使用

这本电子书可供中华人民共和国（the People's Republic of China）和世界上大多数其他地区的任何人免费使用，几乎没有任何限制。您可以根据本文件中包含的"传硕公版书许可条款"中的授权许可进行复制、赠送或改编它。

如果您不在中华人民共和国，您必须在使用本电子书之前查看您所在国家/地区的法律。

什么是公版书？

根据我国现行「著作权法」第 20、21 条的规定，除署名权、修改权、保护作品完整权外，中国公民对其著作的法定权利均于作者死亡后第五十年的 12 月 31 日截止。超过著作权法保护日期后，其作品就进入了公有领域（公共版权）

这种因作者死亡超过 50 年而丧失发行权、改编权等著作权利的书籍，就称为“公共版权书籍”，简称“公版书”。

传硕公版书保护计划

中华文明5000多年绵延不断、经久不衰，在长期演进过程中，形成了中国人看待世界、看待社会、看待人生的独特价值体系、文化内涵和精神品质，这是我们区别于其他国家和民族的根本特征，也铸就了中华民族博采众长的文化自信。

文化是一个国家、一个民族的灵魂。文化兴国运兴，文化强民族强。

所以我们发起了公版书保护计划。来帮助把中国五千年的文明硕果进行电子化并服务于大众，我们网站所有内容都是免费、自由、无版权的。对所有的读者免费！

使用 **文硕阁** 中的公版书 不需要获得许可（在中国，这属于“合理使用”）。这适用于所有用途，包括商业用途。换句话说，即使是商业盈利用途，也无需支付版税。

我们希望能有更多的用户加入到文硕阁网站中来，让我们一起来保护传承文明的硕果。

源浚者流长，根深者叶茂。文化自信是一个国家、一个民族发展中最基本、最深沉、最持久的力量。

如何联系我们？

网站：www.wenshuoge.com

邮箱：7sbook@duck.com



(扫码访问网站)



(扫码加客服微信)

提要

钦定四库全书 集部三

山谷集诗注 别集类二【宋】

提要

【臣】等谨案山谷诗内集注二十卷外集注十七卷别集注二卷宋任渊史容史季温所注黄庭坚诗也任渊所注者内集史容所注者外集其别集注则容之孙季温所补内集一称正集其又称前集者盖内集编次成书在外集前故注家相承谓为前集外集诗起嘉佑六年辛丑庭坚时年十七而内集起元丰元年戊午庭坚时年三十四故外集诸诗转在内集之前黄罈所编庭坚年谱云山谷以史事待罪陈留偶自编退听堂诗初无意尽去少作胡直孺少汲建炎初帅洪并类山谷诗文为豫章集命汝阳朱敦儒山房李彤編集而洪炎玉甫专其事遂以退听为断史容外集注序亦云山谷自言欲仿庄周分其诗文为内外篇意固有在非欲去此取彼也谱又云洪氏旧编以古风二篇为首今任渊注本亦云东坡报山谷书推重此二诗故置诸编首是渊所注内集即洪炎编次之本史季温外集注跋云细考出处岁月别行詮次不复以旧集古律诗为拘再考李彤外集跋云彤闻山谷自巴陵取道通城入黄龙山为清禅诗遍閱南昌集自有去取仍改定旧句彤後得本用以是正其言非予诗者五十余篇彤亦尝见于他人集中辄已除去又云前集内木之彬彬诸篇皆山谷晚年删去其去取据此而已然季温跋称其大父为增注考订在嘉定戊辰後又近十年则上距庭坚之歿已百有十年而外集原本卷次至是始经史容更定则所谓外集者并非庭坚自删之本矣然则是三集者皆赖注本以传耳赵与峕宾退録尝论渊注送舅氏野夫之宣城诗不得春网荐琴高出典然注本之善不在字句之细琐在于考核出处时事渊注内集容注外集其大纲皆系于目錄每条之下使读者考其岁月知其遭际因以推求作诗之本旨此断非数百年後以意编年者所能为外集有嘉平元年晋陵钱文子序而内集鄱阳许尹序世传抄本皆佚之惟刘埙水云村泯稿载其大略目錄亦多残缺此本独有尹序全文且三集目錄犁然皆具可与注相表里尤足尚也渊字子渊蜀之新津人绍兴元年乙丑以文艺类试有司第一仕至潼川宪其称天社者新津山名也容字公仪号芑室居士青衣人仕至太中大夫其孙季温字子威举进士宝佑中官秘书少监渊又尝撰山谷精华録诗赋铭赞六卷杂文二卷自序谓节其要而注之然原本已佚今所传者出明人伪托独此注则昔人所谓独为其难者与史氏二注本艺林宝传无异辞焉乾隆四十九年十月恭校上

总纂官【臣】纪昀【臣】陆锡熊【臣】孙士毅

总校官【臣】陆费墀

黄陈诗注原序

黄陈诗注原序

六经所以载道而之後世而诗者止乎礼义道之所在也周诗三百五篇有其义而亡其辞者六篇而已大而天地日星之变小而虫鸟草木之化严而君臣父子别而夫妇男女顺而兄弟羣而朋友喜不至渎怨不至乱谏不至讪怒不至絶此诗之大略也古者登歌清庙会盟诸侯季子之所观郑人之所赋与夫士大夫交接之际未有舍此而能達者孔子曰为此诗者其知道乎又曰不学诗无以言盖诗之用於世如此周衰官失学废大雅不作久矣由汉以来诗道浸微陵夷至於晋宋齐梁之间哇淫甚矣曹刘沈谢之诗非不工也如刻繒染縠可施之贵介公子而不可用之黎庶陶渊明韦苏州之诗寂寞枯槁如丛兰幽桂可宜於山林而不可置於朝廷之上李太白王摩诘之诗如乱云敷空寒月照水虽千变万化而及物之功亦少孟郊贾岛之诗酸寒俭陋如虾蟆蚬蛤一啖便了虽咀嚼终日而不能饱人惟杜少陵之诗出入古今衣被天下藹然有忠义之气後之作者未有加焉宋兴二百年文章之盛追还三代而以诗名世者豫章黄庭坚鲁直其後学黄而不至者遁山陈师道无已二公之诗皆本於老杜而不为者也其用事深密杂以儒佛虞初稗官之说隼永鸿宝之书牢笼渔猎取诸左右後生晚学此秘未覩者往往苦其难知三江任君子渊博极羣书尚友古人暇日遂以二家诗为之注解且为原本立意始末以晓学者非若世之笺训但能标题出处而已也既成以授仆欲以言冠其首予尝患二家诗兴其高远读之有不可晓者得君之解玩味累日如梦而寤如醉而醒如痿人之获起也岂不快哉虽然论画者可以形似而捧心者难言闻弦者可以数知而至音者难说天下之理涉於形名度数者可传也其出於形名度数之表者不可得而传也昔后山答秦少章云仆之诗豫章之诗也然仆所闻於豫章愿言其详豫章不以语仆仆亦不能为足下道也呜呼后山之言殆谓是耶今子渊既以所得於二公者笔之於书矣若乃精微要妙如古所谓味外者虽使黄陈复生不能以相授子渊尚得而言乎学者宜自得之可也子渊名渊尝以文艺类试有司为四川第一盖今日之国土天下士也鄱阳许尹序

黄陈诗注

山谷内集诗注原注【年谱附】

钦定四库全书

山谷内集诗注原注【年谱附】

近世所编豫章集诗凡七百余篇大抵山谷入馆後所作山谷尝仿庄子分其诗文为内外篇此盖内篇也晚年精妙之极具於此矣然詮次不伦离合失当今以事系年校其篇目各如本第其不可考者即从旧次或以类相从诗各有注离为二十卷云

第一卷

元丰元年戊午【是岁山谷在北京】

古诗二首上苏子瞻【东坡守徐州山谷教授北京初通书并以此二诗寄意东坡亦有报书及和章山谷书云今日窃食于魏会阁下开幕府在彭门又云作古风诗二章赋诸从者即此诗是也以东坡集考之盖元丰元年魏即北京彭门即徐州建炎中山谷之甥洪炎玉父编其舅文集断自退听堂始退听以前盖不复取独取古风二篇冠诗之首且云以见鲁直受知于苏公有所自也今从之退听堂在汴京酺池寺南山谷作馆职时寓笔砚于此其赠俞清老诗跋曰书于酺池寺南退听堂下然此堂名其後随所在揭之】

醇道得蛤蜊复索舜泉舜泉已酌尽官醞不敢不敢送【舜泉当是河北酒名外集有和王世弼求舜泉诗首句云寒蠶簿饭留佳客蠹简残篇作近隣张渊方回家本置此诗于北京教授时与诗意正合自此诗至未入馆前洪玉父皆不编入今豫章前集有之然亦不过数篇尔方回大父名垞山谷妹壻也】

元丰三年庚申【是岁山谷在京师盖罢北京教官後赴吏部得改官知吉州太和县其秋自汴京归江南旧有寄李公择诗序云元丰庚申岁庭坚得邑太和而外集有晓放汴州诗云秋声满山河未云又持三十日去作江南梦】

次韵王穉川客舍二首【彭山黄氏有山谷手写此诗题云王欲穉川元丰初调官京师云云当是山谷北京解官後至京师所作後篇欸乃歌有长安城中花片飞盖春晚时也】欸乃歌二章戏王穉川

咏史呈徐仲车【张方回家本置此篇于太和诗中仲车家于楚州当是山谷赴太和时舟行经途所作】

宿旧彭泽怀陶令【彭泽城在江州亦经途所作以张方回家本编次山谷过南康军祭刘凝之文云元丰三年庚申十二月辛酉其宿彭泽盖亦同时到官或在明年之春夏欵】题山谷

石牛洞【旧本有寄李公择诗序云庭坚得邑太和舅氏李公择提点淮南西道刑狱自同安来相见于皖口风雨中留十日此诗盖自时所作同安皖城皆隶舒州石牛洞在舒之三祖山谷寺鲁直尝游而乐之因自号山谷道人】

题灊峯阁【灊山亦在舒州诗有梅蘂之语盖冬末所作】

次韵公择舅【李常字公择】

元丰四年辛酉至六年癸亥【山谷在太和凡三年至元丰癸亥移监德州德平镇山谷有大孤山诗刻云是岁癸亥十有二月余自太和移德平】

赣上食莲有感【赣上即?州?与吉邻郡江西外台所在山谷或以白事至此】秋思寄子由【是时苏黄门谪监筠州盐酒税筠吉皆在江西山谷尝有与黄门书云得邑极南幸执事在旁郡又云有高安行李必问动静高安即筠州黄门名辙字子由】

赠别李次翁【以张方回家本编次】

演雅【本句云江南野水碧於天中有白鸥闲似我尝是在太和所作山房李彤季敌云此篇山谷晚年删去彤盖山谷伯舅之子】

戲和答禽语【附前篇】

赠郑交【山谷在荆州为兴上人书此诗跋云癸亥岁余解官太和过武寧闻清上人当来延恩因谒郑子通问消息题诗子通之壁草堂郑交处士隐处也云云余家所藏旧本如此老禅谓延恩长老法安安死于元丰八年山谷为之铭此诗盖六年所作】

元丰七年甲子【是岁山谷监德州德平镇尝有发愿文盖七年三月过泗州僧伽?所作到官当在夏秋也】

平阴张澄居士隐处三诗【张方回家本题云王郎求此诗王郎即世弼其详具後篇此诗山谷晚年亦删去】

留王郎【山谷在德平有与德州太守书云客宦不能以家来官舍萧然如寄而此诗有河外吹沙尘江南水无津之句又云我随简书来顾影将一身盖言身在河北家在江南】

送王郎【豫章集原次前篇今从之】

次韵刘景文登邳王台见思五首【诗有平原秋?色沙麓暮钟声之句平原即德州又云系匏两相忆极目十余城盖邳王台在相州相与德皆河北郡相去数驿】次韵吴宣义三径怀友

【以张方回家本编次】

送刘季展从军鴈门二首

题宛陵张待举曲肱亭【从豫章集旧次】

第二卷

元丰八年乙丑【春夏山谷在德平按实録是岁三月哲庙即位四月丁丑以秘书省校书郎召到京师时当六七月间】

寄裴仲谔【山谷在德平与德州太守书云某官局勉以不瘵幸亲老在都下善眠食兄弟无他而此诗有我家犂犢下薪桂炊白玉在官与影俱衣绽髮曲局天机行日月春事勤草木之句在德平过春平乙丑年尔】

寄黄几复【旧本于题下注云乙丑年德平镇作其详具元佑二年和篇下注】神宗皇帝挽词三首【据实録是岁三月戊戌神宗升遐此诗及王文?挽诗皆因崩薨岁月为次後多仿此自此以下诗皆入馆後所作】

王文?公挽词二首【王珪字禹玉相神宗哲宗按实録元丰八年五月庚戌薨諡文?】

谢送礪壑源拣芽【诗有桥山事严庀百局谓营奉神宗山陵又云右丞似是李元礼谓李清臣邦直据实録清臣以元丰六年八月拜右丞至元佑元年闰二月方迁左丞】以小龙团及半挺赠无咎并诗用前韵为戏【从旧次晁补之字无咎】

和答外舅孙莘老【旧本云莘老病起作诗寄同舍莘老名觉实録本传云元丰八年哲庙即位自秘书少监除右谏议大夫故诗中有少监岩壑姿及寄声旧僚属尚怜费谏纸之语而首句则云西风挽不来当是秋初所作】

次韵定国闻子由卧病绩溪【苏黄门栾城集有复病诗云病作日短至病消秋风初黄门时为歙州绩溪令王定国名巩】

次韵子由绩溪病起被召寄王定国【苏黄门颍滨遗老传云移知歙绩溪始至而奉神宗遗制居半年除秘书省校书郎明年至京师除右司谏此诗今岁秋冬间所作】

次韵李之纯少监惠硯【诗有我亦洗湔与清流当是初入馆时之纯名周】送舅氏野夫之宣城二首【李莘字野夫据实録元丰八年十二月屯田郎中李莘知宣州然此诗未必是时所作姑以除官之岁月为次余多仿此】

元佑元年丙寅【是岁山谷在馆中据实録十月丙戌除神宗实録院检讨官集贤校理】送范德孺知庆州【德孺名纯粹据实録元丰八年八月直龙图阁京东运使范纯粹知庆州此诗云春风旌旗拥万夫当是今年春初方作此诗尔 赵子湜家有山谷与晁尧民帖云范五诗至今未成比来几月四十日不曾道一句范五即德孺】

题黄州墨蹟後

题王仲弓兄弟巽亭【右二篇并从旧次】

寄尉氏仓官王仲弓【附前篇】

第三卷

有惠江南帐中香者戲答六言二首

子瞻继和复答二首

有闻帐中香以为熬蝎者戏用前韵二首【右六诗答东坡篇中有喜公新赴朝参之句是岁东坡自登州至京师为礼部郎中而迎燕润花皆春事】谢公择分赐茶三首【外集有以潞公所惠拣芽送公择诗即此韵而诗有国老元年密赐来及 洗一春汤饼睡亦知清夜有蚊雷之句当是元年春末所作】

便余王丞送碧香酒用子瞻韵戏赠郑彦能【以类相从附前篇子瞻诗盖守密州时所作今追用其韵】

送郑彦能宣德知福昌县【附前篇】

显圣寺庭枸?【从旧次】

次韵子瞻赠王定国【东坡诗所谓谪仙窠夜郎子美耕东屯即此韵以东坡集考之是岁春晚所作】

次韵张询斋中晚春【从旧次】

次韵答晁无咎见赠【用前篇韵】

次韵答张文潜惠寄【文潜名来据实録是岁十二月试太学録张耒为秘书省正字此诗盖夏初方到太学供减所作故诗有忽复燕哺儿及学省得佳士之句】

同钱志仲饭籍田钱孺文官舍【从旧次】

次韵曾子开舍人游籍田载荷花归【附前篇子开名肇】送刘士彦赴福建转运判官【据实録元佑元年六月朝请郎刘士彦为福建路转运判官此篇後亦删去】

次韵韩川奉祠西太乙宫四首

次韵王荆公题西太乙宫壁二首【东坡集亦有此诗以东坡集考之当在是年秋】

有怀半山老人再次韵二首【用前韵】

和答钱穆父咏猩猩毛笔

戲咏猩猩毛笔二首【右二篇栾城集有和章今略依仿以为次山谷此诗旧题云前篇奉钱穆父後篇奉子瞻是时二公皆作中书舍人又有一跋具诗注中东坡是岁九月方迁翰林学士】

第四卷

奉和文潜赠无咎篇末多见及以既见君子云胡不喜为韵【据实録元佑二年四月乙巳徐州布衣陈师道充徐州州学教授观此诗陈师道之篇以为逸民盖犹未得官也而诗又有石榴罅多子之句宜以为元年秋所作也】次韵答邢惇夫【据实録元佑元年正月起居舍人邢恕权发遣随州惇夫恕之子也侍亲以行此诗有梦不到汉东之句汉东即随州又云雨作枕簟秋盖元年秋也】

和邢惇夫秋怀十首【诗有陈师道篇如前说】

谢公定和二范秋怀五首邀予同作【诗有黄令谓黄几复也几复丁卯岁方至吏部改官见二年诗此诗盖元年所作明矣诗亦有陈师道篇如前说】送谢公定作竟陵主簿【附前篇】

奉答谢公静与荣子邕论狄元规孙少述诗长韵【公静名惓公定名惊皆师厚之子附前篇】

赠送张叔和【原在送谢公定诗後】

送顾子敦赴河东三首【子敦名临据实録元佑元年七月秘书少监顾临为河东转运使此诗有揽辔都城风露秋行台无妾护衣篝之句盖秋晚所作】

第五卷

司马文正公挽词四首【是岁九月丙辰温公薨而葬以明年二月栳城集亦有此诗当是今冬所作】

次韵子瞻武昌西山

子瞻诗句妙一世乃云效庭坚体盖退之戏效孟郊樊宗师之比以文滑稽耳恐後生不解故次韵道之【东坡集送杨孟容诗即此韵次武昌西山之後】

柳闳展如子瞻甥也其才德甚美有意于学故以桃李不言下自成蹊八字作诗赠之【附前篇】

戲咏蜡梅二首【京师初不以蜡梅为贵其得名自山谷始今寄此篇于元年之冬】蜡梅【附前篇蜀中旧本题下注云和王都尉当以为正诗有埋玉之句谓王诜晋卿尚蜀国公主时主已下世】

从张仲谋乞蜡梅【附前篇】

贾天锡惠宝薰乞诗予以兵卫森画戟燕寝凝清香十字作诗报之【附前篇山谷有此诗跋云余甚宝此香未尝与人城西张仲谋为我作寒计惠送骐驎院通薪二百因以杏二十饼报之】

次韵张仲谋过酺池寺斋【附前篇诗有夜谈霜月冷之句】

第六卷

元佑二年丁卯【是岁山谷在史局据实録正月辛未山谷为著作佐郎】

常父惠示丁卯雪十四韵谨同韵赋之【诗云春皇赋上瑞是岁春所作】

咏雪奉呈广平公【附前篇诗有连空春雪之句】

次韵宋懋宗僦居甘泉坊雪後书怀【附前篇】

和答子瞻和子由常父忆馆中故事【以东坡栳城集为次又此诗云桃李春画永】

双井茶送子瞻

和答子瞻

子瞻以子夏丘明见戏聊复戏答

省中烹茶怀子瞻用前韵【右四篇当是今岁春送新茶所作诗有翰林贻我东南句谓东坡先生据实録元年九月丁卯东坡迁翰林学士东坡集有次韵黄鲁直赤日诗即此韵而元年十月山谷迁实録院检讨官今岁又为着作故有愿载轩辕讫鼎湖之句】以双井茶送孔常父

常父答诗有煎点径须烦緑珠之句复次韵戏答戏呈孔毅父【右三篇皆用前韵第三篇有校书着作频诏除之句盖山谷今岁正月除着作佐郎】

谢黄从善司业寄惠山泉【亦用前韵山谷晚年删去】

次韵奉酬刘景文河上见寄【原在酴醾诗前诗有煮春茗之句】见诸人唱和酴醾诗辄次韵戏咏【栾城集中有次孔文仲仲舍人酴醾即此韵此後有和曾子开扈从诗见外集以栾城诗考之盖四月一二日也】

次韵秦觀过陈无已书院观鄙句之作【无已来京师寓居陈州门见於所作秋怀诗书院当作此地而此诗有墙阴老春□之句】

陈留市隐【附前篇此诗盖陈无已先作】

晁张和答秦觀五言予亦次韵【次前篇过陈无已书院之後】刘晦叔许洮河緑石砚【因後篇附见】

以团茶洮州緑石砚赠无咎文潜【次和答秦觀篇按实録元佑元年十二月试太学録张耒试太学正晁补之并为秘书省正字而此诗有道山延阁之句盖今岁所作】

谢王仲至惠洮州砺石黄玉印材【因洮砚附见】

次韵文潜同游王舍人园【次前篇文潜诗有浓緑张夏帷之诒】卧陶轩【附前篇诗云城南晁正字】

次韵寄晁以道【附前篇】

次以道韵寄范子夷子默【附前篇】

僧景宗相访寄法王航禅师【从旧次】

子韵子瞻送顾子敦河北都运二首【以东坡诗为次据实録元佑二年四月癸巳给事中顾临为河北路都转运使】

慈孝寺饯子敦席上奉同孔经父八韵【附前篇】

次韵张昌言给事喜雨【以东坡栲城诗为次栲城诗云已收蚕麦无多日盖四月间昌言名问】

第七卷

送李德素归舒城【因後篇附见】

咏李伯时摹韩干三马次子由韵简伯时兼寄李德素【东坡集有此诗在喜雨後伯时名公麟】

次韵子瞻和子由观韩干马因论伯时画天马次韵答王脊中【从旧本】

子瞻去岁春侍立迓英子由秋冬间相继入侍作诗各述所怀予亦次韵四首【东坡有此诗在韩干马俊】

再次韵四首

次韵子瞻题郭熙画秋山【以东坡诗为次东坡诗所谓玉堂画掩春日闲即此韵在入侍迓英诗後】

题郭熙山水扇

题惠崇画扇

题郑防画夹五首

戏题小雀捕飞虫画扇

题画孔雀

睡鸭

小鸭

题刘将军鴈二首

题刘将军鹅

题晁以道雪鴈图【右十诗并附前篇】

次韵子瞻题无咎所得与可竹二首 粥字韵戏嘲无咎人字韵咏竹【东坡集此诗在郭熙秋山後】

次韵文潜休沐不出二首【从旧次】

奉同子瞻韵寄定国【东坡玉堂独坐怀王定国诗即此韵在题无咎竹後】次韵王定国扬州见寄

往岁过广陵值早春尝作诗云春风十里珠帘卷髣髴三生杜牧之红药梢头初茁栗扬州风物鬢成丝今春有自淮南来者道扬州事戏以前韵寄王定国二首【右二诗附前篇】

次韵钱穆父赠松扇

戏和文潜谢穆父松扇【东坡和张耒松扇诗在怀王定国後】

谢郑闳中惠高丽画扇二首【附前篇】

第八卷

次韵王炳之惠玉版纸【附前篇】

谢王炳之惠石香鼎【附前篇】

次韵柳通叟寄王文通【通旧次】

送张天觉得登字【东坡此诗在松扇後据实録元丰二年七月开封府推官张商英提点河东路刑狱商英字天觉】

次韵徐文将至国门见寄二首【诗有槐催举子着黄花之句盖是岁秋试】

博士王扬休碾密云龙同事十三人饮之戏作答黄冕仲索煎双井并简扬休

再答冕仲

戏答陈元舆

再答元舆

次韵晁仲考进士试卷【右六篇皆武成宫试闱所作诗中自了然】王圣美三子补中广文生【附前篇】

次韵游景叔闻洮河捷报寄诸将四首【据实録元佑二年八月禽西番首领杲庄青宜结槛送阙下】

和游景叔月报三捷【与前诗同时作】

次韵崔伯易席上所赋因以赠行二首【据实録元佑二年十月将作少监崔公度知颍州又按本传公度字伯易高邮军人此诗十月後所作】

同子瞻和赵伯充团练【从旧次】

戏答赵伯充劝莫学书及为席子泽解嘲【附前篇】谢景叔惠冬笋雍酥水梨三物

再答景叔【右二篇并以时序为次】

次韵几复和答所寄【山谷旧跋此诗云丁卯岁几复至吏部改官和予乙丑在德平所寄诗也诗有夜寒同对短檠灯之句当是冬时所作】

寄上叔父夷仲三首【夷仲名廉元佑初为都大提举成都府路榷茶兼陕西路买马张方回家本前一篇题云寄上叔父夷仲後二篇题云叔父夷仲入奏近寄此诗用前韵今以蜀中题名考之廉奉使在元佑元年八月而三年正月除右司郎中则入奏盖在二年之冬也此诗第一篇因後诗同见于此】

第九卷

元佑三年戊辰【是岁山谷在史局其春东坡知贡举山谷与李公麟等皆为其属】考试局与孙元忠博士竹间对牕夜闻元忠诵书声调悲壮戏作竹枝歌三章和之

观伯时画马【东坡集有和篇题云试院中作】

题伯时画揩痒虎

题伯时画观鱼僧

题伯时画顿尘马

题伯时画严子陵钓滩

题伯时画松下渊明【右皆试院中作旧本画观鱼僧题云子瞻画枯木伯时作清江游鱼有老僧映树身观鱼而禅笔法甚妙予为名曰玄洗畏影图并题数语而顿尘马有亦思归家洗袍袴之句为试院所作无疑揩痒虎子陵滩盖从其旧次】

出礼部试院王才元惠梅花三种皆妙絶戏答三首【山谷有此诗跋甚详具诗注中】

王立之承奉诗报梅花已落尽次韵戏答【立之名直方即才元之子今附前篇】

乞姚花二首【附前篇】

效王仲至少监咏姚花用其韵四首【附前篇】

寄杜家父二首【从旧次】

王才元舍人许牡丹求诗

谢王舍人剪送状元红【右二篇从旧次】

戏答陈季常寄黄州山中连理松枝二首【山谷有太平兴国寺谷室院题名云故人陈季常林下士也寓棊簟于此苏子瞻范子功数来从之元佑三年六月丁亥书然此诗未必是时所作姑以物色附见】

次韵子瞻送李廌【李廌字方叔是岁下第而归东坡此诗在次韵黄鲁直画马後】次韵宋懋宗三月十四日到西池都人盛观翰林公出遨【翰林公谓东坡东坡有和宋肇游西池即此韵在送李方叔诗後】

韩献肃公挽词三首【韩绛字子华事神宗再为相据实録元佑三年三月薨諡献肃东坡有韩康公挽词在游西池後康公即献肃】

次韵子瞻以红带寄王宣义【东坡有庆源宣义王丈求红带诗即此韵在康公挽词後此後有送高士敦钁诗见外集】

听宋宗儒摘阮歌【从旧次】

自门下後省归卧酺池寺观卢鸿草堂图【栾城集有此图诗当同时所作据栾城集次于韩

康公挽词後】

题子瞻寺壁作小山枯木二首【寺壁即酺池寺附前篇】 题子瞻枯木【附前篇】

和子瞻戏书伯时画好头赤【东坡集此诗在红带诗後】

咏伯时画太初所获大宛虎脊天马图

咏伯时画冯奉世所获大宛象龙图

题竹石牧牛【右三诗附前诗而天马图有岁在执徐同之句盖戊辰岁也】 题伯时天育骠骑图二首【附前篇】

姨母李夫人墨竹二首【附前篇】

第十卷

次韵答曹子方杂言【曹辅字子方东坡有送曹辅赴闽漕诗在好头赤诗後据实録元佑三年九月太仆寺丞曹辅权发遣福建路转运判官山谷此诗盖辅未出使以前所作今寄于此】

次韵子瞻和王子立风雨败书屋有感【东坡此诗在送曹辅後】

嘲小德【东坡有和章次前篇】

戏答张秘监馈羊【诗有留与儿童驾小车之句今附小德诗後】

戏答王定国题门两絶句【东坡嘲小德诗德有和王定国会饮清虚堂诗时定国归自扬州】

清人怨戏效徐庾慢体三首【略从旧次元在嘲小德之後】 呈外舅孙莘老二首【诗意喜莘老得归据实録元佑三年九月御史中丞孙觉提举醴泉观本传云以疾坚请外提举舒州仙灵观此诗九月以後所作今寄于此】

以天坛灵寿杖送莘老【从旧次】

戏答俞清老道人寒夜三首【赵彦清家有山谷跋此诗其末云东坡屡哦此诗以为妙也元佑四年归自门下省书於酺池寺南退听堂上此跋四年所书而诗则三年冬所作盖四年之冬东坡在杭州也】

秘书省冬夜宿直寄怀李德素【附前篇】

岁寒知松柏【此诗效进士体元有两篇知字韵一篇见外集东坡所和乃知字韵在嘲小德诗後】

东坡读未见书

被褐怀珠玉

欵塞来享【右三篇未必同时所作然皆效进士体以教儿侄今附见东坡杂记云元佑三年十二月二十八日上御延和殿奏范镇新乐时西夏方遣使欵延州塞故进士作延和殿奏新乐赋欵塞来享诗云】

忆邢惇夫【山谷跋惇夫集有国马不及奉舆毙于阜枥之语盖元佑三年十一月庚戌也此诗宜附见于此】

次韵秦少章晁适道赠答诗【诗有阴风雪塞庐之句当是此年冬所作盖明年冬少章从东坡在杭州矣】

次韵答秦少章乞酒【附前篇诗有水饼嚼冰蔬之句亦冬时作】

第十一卷

元佑四年己巳至八年癸酉夏【四年至六年夏皆在史局据实録元佑六年三月癸亥进神宗实録为起居舍人以中书舍人韩川有言诏行秘书省着作佐郎是岁六月特封母壽康县太君为安康郡太君乞以转官恩回授也山谷在京师多与东坡唱和四年夏东坡出知杭州遂无诗伴而山谷尝苦眩冒多在史局又多侍母夫人医药至六年六月遂丁家艰故此数年间作诗絶少颐轩诗及送秦少章从东坡于杭州范蜀公挽章皆四年诗之可考者其他诸诗多不可考又于前卷无可传着姑寄寓于此以俟异时或遇其真也山谷有与王长原诗跋云相见于京师匆匆不得尽平生朋友之意长原告行会小人年来头眩不能苦思因以废诗辄以旧诗十许赠长原又有书老杜诗跋去老夫今年四十三不复能作诗他文亦懒下笔欲学诗观老杜足矣又与俞清老曹荀龙书皆云某自云年月月已不作诗山谷生于乙酉至元佑四年己巳四月有五矣陈无已作山谷母李夫人墓铭曰元佑六年卒于东都又以山谷与洪驹父书考之云六月十八日郡太弃背诸孤而洪玉父作退听堂集序云辛未岁试礼部寓舅氏僦舍後一年鲁直丁母夫人忧辛未即元佑六年其云後一年误矣山谷护丧抵家以明年正月八日具书帖中】

颐轩诗六首【张方回家本有此诗序云元佑四年正月癸酉黄某序】

寺斋睡起二首【後诗云桃李无言一再风盖春时作又有人言九十八为律之句是时东坡为台谏所攻求出补外而山谷亦不容於时故云】

记梦【附前篇】

同元明过洪福寺戏题【略从旧次原在寺斋睡起诗後】

戏答晁深道乞消梅二首

以梅馈晁深道戏赠二首【右四篇以时序为次】

次韵孙子实题少章寄寂斋【因後有送少章诗附见於此此篇後亦删去】

次韵孙子实寄少游

戏书秦少游壁

赠秦少仪

送少章从翰林苏公余杭【右四诗略从旧次据实録东坡出知杭州在四年而行以五月陈无已至南京见东坡从登後楼诗云五月池无水又送行诗云一雨五月凉】题净因壁二首

六月十七日昼寝【右三篇亦以时序为次】

北牕【从旧次】

赵子充示竹夫人诗盖凉寝竹器憩臂休膝似非夫人之职予为名曰青奴并以小诗取之二首【附前篇】

范蜀公挽词二首【东坡作蜀公墓志铭云元佑三年闰十二月薨葬以四年八月此诗盖四年夏秋间所作】

宗室公寿挽词二首

出城送客过故人东平侯赵景珍墓

黄颢州挽词三首

乐寿县君挽词二首【右八篇附前诗】

叔父给事挽词十首【据实録元佑七年五月丙申给事中黄廉卒是时山谷持母丧仅一年而葬以明年九月山谷有与洪驹父书云比经祥练又间给事叔父之卒又山谷与宇文伯修书云九月之末方毕叔父给事葬事又云欲乞一宫观时已免丧矣】

绍圣元年甲戌【四月改元据实録元佑八年七月吕大防言神宗正史欲差前实録院检讨官黄庭坚秘书省正字秦观充编修官从之山谷以疾辞乞宫观至甲戌岁授宣鄂两郡皆未赴继除宫祠据实録绍圣元年六月丁亥新知鄂州黄庭坚许管勾亳州明道宫於开封府界居住就近报国史院取会文事山谷遂寓家于太平州之芜湖与其兄元明俱来陈留止东寺之净土院舟行时与东坡相遇於江上与黄门相遇於贵池山谷跋东坡磨衲赞云绍圣元年五月甲子新宣城段守黄某书山谷与梁大夫书云伯氏越州司理相送至府畿伯氏即元明山谷有东坡真赞云绍圣之元吾见东坡於彭蠡之上其貌不尔其後山谷在荆州黄门与书云贵池相别於今八年】

寂住阁

深明阁【右二篇陈留净土院作元注云陈留宿一?堂因书为寂住阁】

第十二卷

绍圣二年乙亥【是岁山谷谪黔州先是绍圣元年章惇为相蔡卞修国史七月山谷与范龙学祖禹赵尚书彦若於开封府界居住就近应报文字卞至史院以前史官直书王安石事欲中伤以诋诬神考之罪签出千余条以为皆无证据绍圣二年正月范公安置永州赵公澧州山谷黔州事且范公家传据实録绍圣元年十二月甲午黄庭坚谪涪州别驾黔州安置而范公家传乃云二年正月盖据受命时日也山谷既被命与其兄元明出尉氏许昌由汉沔趋江陵上夔峡三月辛亥至下牢关四月二十三日黔州寓开元寺寺有摩围阁山谷与张叔和书云下处在南寺摩围阁又有怡僊堂当是山谷以知命同处为名按扬明叔草书跋尾云黔中怡僊堂丁丑二月晦】

竹枝词二首

梦李白诵竹枝词三叠【并黔南道中作前诗有跋语且云四月甲申盖十九日也】

和答元明黔明赠别【山谷书萍乡厅壁曰元明送余安置於摩围之下淹留数月不忍别而此诗有急雪惊风之语当是冬时所作】

绍兴三年丙子【是岁山谷在黔南初山谷既未能以家来二年之秋其弟知命自芜湖登舟携一妾李庆一子?小字韩十及山谷之子相小名四德小字四十并其所生母俱来知命中道生一女又与其从兄嗣直会於夔州是岁五月六日抵黔南山谷书云知命居士得三月二十八日书知庆儿以兔娠入夔州已回客吹俱无恙嗣直又适得相会何慰如之嗣直名叔向给

事之子山谷五月书云初五日宿太浩初六日可来趁叠石早饭又云今日甚思汝辈同剥粽子也】

题驴瘦岭马舖【知命】

行次巫山宋懋宗遣骑送折花厨醞【知命】

次韵懋宗送别二首【知命】

戏答刘文学【知命】

外侄李光祖往见尚垂髫今观寄嗣直小诗已可受因次韵【知命】

上南陵坡【知命】

题小猿叫驿【知命】

马上口号呈建始李令【知命 建始属施州】

次浮塘驿见张施州小诗次其韵【知命】

将次施州先寄张十九使君三首【知命】

和张仲谋送别二首【知命】

次韵答清江主簿赵彦成【知命

清江即施州治所彦成名肯堂嘉州人】宋懋宗寄夔州五十诗三首【知命 右二十诗皆知命来黔州时所作知命名叔达山谷之弟数诗附见集中殊有家法当由山谷润色因以成其弟之名今不复删去】当苏若兰回文锦诗图【原杂置知命诗中】

绍圣四年丁丑【是岁山谷在黔南其春知命往见嗣直于涪州生一子是为小牛秋冬间还黔县山谷与知命嗣直书】

次韵杨明叔四首

再次韵【杨皓字明叔眉之丹棱人官於黔南时在山谷迁谪後此诗盖黔中所作故有我已魑魅御之句黔中诗絶少姑附於今岁】

谪居黔南十首【右谪乐天诗原题云谪居黔南今附于此盖明年又迁于戎州云】

元符元年戊寅【六月改元 是岁春初山谷在黔南以避外兄张向之嫌迁戎州据实录绍圣四年三月知宗正丞张向提举夔州路常平十二月壬寅诏涪州别驾黔州安置黄庭坚移戎州安置以避使者亲嫌故也山谷三月间离黔六月初抵戎州寓居南寺作槁木寮死灰庵其後僦居城南山谷有与杨明叔大字跋尾云绍圣五年二月哉生明涪翁将迁于僊道治州开元寺江曲之间僊道即戎州戎今为叙盖是岁六月方改元故犹称五年又有与王观复书云沂流在道几三月又有泸州木龙岩题名云绍圣五年五月晦改知到戎州在六月初】

赠黔南贾使君【山谷初到黔南曹谱伯達张旼茂宗为守贰待之颇厚今贾使君盖与曹伯达为代者未知此诗何时所作姑附于离黔之岁 山谷与张叔和书云某至黔州将一月矣曹守张倅相待如骨肉又与杨明叔书云守倅皆京洛人好事尚文不易得也】

元符二年己卯【是岁山谷在戎州九月知命如成都至明年二月还戎州具山谷与知命书及答句高宗书又与范长老书云知命颠倒履足二月七日乃到戎州】

次韵雨丝云鹤二首【蜀中旧本此诗序云代史夫人和石信道 信道名谅时作泸州江安令史夫人盖山谷外兄张祺子履之妻张祺介卿之嫂録莱赞所谓维女博士史君炎玉者也此诗盖在戎州所作当是夫人与其子俱来乞子履墓铭时也雨丝云鹤皆春景物宜见於今年春 山谷有答苏大通书曰顷见外兄张子履家嫂具道才德之美又曰昨史嫂过僊道云云山谷作子履墓铭曰葬以元符己卯之四月又曰女夫人博学能文】

从斌老乞苦笋【当是今岁夏初所作元年夏初犹未至戎也此篇原在戎州诗中但詮次不伦尔山谷有苦笋赋云僊道苦笋冠冕两川僊道即戎州】

次韵黄斌老所画横竹

次韵谢斌老送墨竹十二韵

用前韵谢子舟为予作风雨竹

再用前韵咏子舟所作竹

戏咏子舟画两竹两鸛鹄

第十三卷

次韵答黄斌老病起独游东园二首

又和二首

又答斌老病愈遣闷二首

次韵黄斌老晚游池亭二首【右与黄斌老唱和诗并因苦笋篇附见当是同时所作池亭诗有黄菊拒霜殊未秋之句必今岁所作明年秋晚山谷盖在青神矣】戲答史应之三首【应之名铸眉人泸戎间山谷有应之真赞曰江安石不足江阳酒有余江安属泸州汉江阳县地也】

题也足轩【轩在简州为师范道人作山谷有与范帖云知命欲往成都看药市又云别作一篇竹轩颂似可观已付密师去可种竹于六祖印用之是岁范公自简州受成都六祖之请云范在简州时山谷有种竹颂云往在江南住竹山道人两岁三来访云云故今云别作一篇】寄题荣州祖元大师此君轩【山谷有此诗跋云元符二年闰月初吉书赠荣州琴师祖元是岁闰九月又有一篇亦此韵见於外集】

答李任道谢分豆粥【诗有豆粥能驱晚瘴寒之句似是冬时所作】

元符三年庚辰【是岁山谷在戎州正月徽考即位五月复宣德郎监鄂州在城盐税山谷既得放还以江涨未能下峡七月自戎舟行省其姑于青神十月改奉议郎签书宁国军节度判官十一月自青神复还戎十二月发戎州过江安为石信道挽留遂作岁於此山谷之姑张祉介卿之母介卿时为眉州青神尉以七月二十一日解舟八月十一日抵青神具兴张介卿书今中岩多有八九月间题字又有十一月二十日与嘉州至乐山王子厚书云到家悲苦满怀盖知命归江南死於荆州当是初闻其计时也石谅信道本眉人家于江津女嫁山谷之子相是岁十二月成亲其详具建中靖国元年注并具与杜拙翁书】

赠知命弟离戎州

侄柅随知命舟行【是岁知命自戎归江南山谷与范长老帖云知命留此两月三月十三日解舟去故其诗有燕子日长宜读书之句知命竟死荆南见山谷祭文】

次韵奉答文少激推官纪赠二首【因後篇附见少激名抗临邛人时为戎州幕官予尝见其家山谷诸诗真迹】

次韵文少激祈雨有感【此诗真本云伏承少激惠示夏日祈雨有感之诗末句云爱民天子似仁宗时徽考初即位】

次韵李任道晚饮鎖江亭【诗有西来雪浪如炰烹之句当是夏中所作】再次韵兼简屢中南玉三首【次前篇】

次韵任道食荔支有感三首【山谷有戎州鎖水磨崖留题云元符三年五月戊寅太守刘广之率宾寮来赏鎖江荔支此诗当同时所作诗有六年怊怅之句盖自绍圣二年乙亥入蜀至

元符三年庚辰凡六见荔支
山谷与侄朴书云初到戎彭道微作守甚有亲亲之意道微既去刘湓崇仪作守云云】

廖致平送绿荔支为戎州第一王公权送荔支绿酒亦为戎州第一【附前篇】

谢杨履道送银茄四首【以时序为次】

送石长卿太学秋补【诗有汉文新览天下图谓徽考初立山谷有试张通笔帖云戎州城南
僦舍中眉山石长卿观书】

次韵少激甘露降太守居桃叶上【当是秋时所作诗语皆及徽考新政】

借景亭【八月在青神尉厅作尉即张祉介卿也祉父闇雅州人娶山谷之姑卒官太常卿见
于山谷所作张子履墓志】

戏赠家安国【从旧次】

次韵杨君全送酒

次韵君全送春花

谢杨景山送酒器【君全名琳景山名岩皆青神人山谷有中岩题字云元符三年九月己巳
王元直携酒帅杨君全景山酌张子谦介卿黄鲁直于慈姥之东堂此诗盖是时所作故有秋
入园林花老眼之句彩以及酒当是重阳所送春花言其象春时之花尔】

史彦昇送春花【附杨君全送花後诗有千林摇落照秋空之句】

题石恪画尝醋翁【旧次在借景亭後似是青神作】

谢应之【即史应之也应之往岁见山谷於谷尝有诗戏之此篇当是应之自眉来青神再见
山谷叙述往事故有去年席上蛟龙语未委先生记得无之句
山谷在青神有无眉山程信孺帖云应之在馆时接从容宾主相乐也是岁来自眉山可知】

第十四卷

走笔谢王朴居士拄杖【王朴字子厚隐居嘉州至乐山此诗当是自青神回舟经途所作诗
有六年流落放归时之语】

戏答王居士送文石【次前篇】

次韵杨明叔见钱十首【序云予蒙恩东归明叔作十诗见钱据实録元符三年十一月癸亥朔黄庭坚知舒州 此诗有老作同安守之句同安即舒州】

次韵石七三六言七首【诗云老境五十六翁又云欲行水绕山围盖元符三年将出蜀所作石七三当是石信道家儿】

建中靖国元年辛巳【是岁正月解舟江安三月至峡州改知舒州四月至荆南泊家沙市又召以为吏部员外郎病痼初愈辞免恩命乞知太平州留荆待命遂南谪冬焉 山谷有泸州中坝葛氏竹林留题云江南黄某自夔道恩恩放還元符元年十二月道出江安江安?石谅信道以亲亲见留作岁建中靖国元年正月丙寅置酒中坝葛氏之竹林】

万州太守高仲本宿约游岑公洞而夜雨连明戲作二首

万州下岩二首

又戏题下岩【山谷有万州西山磨崖题名载高仲本置酒盖建中靖国元年二月辛酉】戏题巫山县用杜子美韵【诗有江陵换袂衣之句江陵即荆南山谷度自巫山至此时已初夏矣】

和王观复洪驹父谒陈无已长句【王蕃字观复沂公之裔官闾中时多以书尺至戎州从山谷问学至是自京师改官复入蜀会山谷于荆州时山谷病痼初愈陈无已元符三年冬为秘书省正字故此诗有集贤学士见一角之语
答观复简云卧病二十余日几死者数矣忽奉手诲欢喜如从天上落也】

以古铜壶送王观复【附前篇】

病起荆江亭即事十首【诗有大圣天子初元年及西风吹淚古藤州之句又是岁七月东坡卒於常州而此诗犹未及之当是秋初所作】

邹松滋寄苦竹泉橙麴莲子汤三首【松滋隶荆南诗有新牧千百秋莲药之句】

次韵答黄与迪

次前韵谢与迪惠所作竹五幅【右二篇从旧次】

第十五卷

戏简朱公武刘邦直田子平五首【朱刘田皆荆南人诗有葵苒秋之语】

次韵益修四弟【诗有霜晚菊未花之句】

以峡州酒遗益修复继前韵【附前篇】

谢益修四弟送石屏【附前篇】

戏答王观复酴醾菊二篇

戏答王子予送凌风菊二首【右四篇以时序为次子予名雱王献可补之之次子也时侨寓荆州】

谢王子予送橄榄【附前篇】

以椰子小冠送子予【附前篇】

呈杨康国

又戏呈康国【二诗皆言黄柑未熟】

次韵马荆州【诗有朱糝菊英同送秋之句】

和中玉使君晚秋开天宁节道场【徽考以十月十日降诞为天宁节开啓盖九月十日】

入穷巷谒李材叟翹叟兼简田子平三首【诗有紫冠黄细綳丝窠之句】

次韵答马中玉三首【诗有菊花过後早梅前之句】

次韵中玉早梅二首

次韵中玉水仙花二首

王充道送水仙花五十枝欣然会心为之作咏吴君送水仙花并二大本

刘邦直送早梅水仙花四首【右十诗多从旧次惟王充道送水仙花一首附见】

谢檀敦信送柑子【附前篇】

赠李辅圣【原在刘邦直诗後】

和高仲本喜相见【从旧次诗有雪满荆州喜再逢之句】

戏咏煖足餅二首【以诗序为次】

戏呈闻善二兄【诗有草上堦除雪袞风之句】

次韵闻善【谢有张罗门带雪之句】

谢答闻善二兄九絕句

戏呈闻善【右十诗附前篇】

题子瞻画竹石【旧题云题全粹所收云云全璧字天粹山谷在荆州时有与天粹帖又有字说云全璧长林人长林属荆门军此诗当附於荆州诗中】

戏赠米元章二首【米芾字元章为发运司属官在江淮间建中靖国之秋东坡北还尝有手帖与之此诗似亦当时所作盖诗有沧江书画船之句今附于荆州诗中】

第十六卷

崇宁元年壬午【是岁春初在荆南既而经岳岳路归洪州分宁遂往袁州萍蓼省其兄元明还至江州与其家相会六月赴太平州九日而罢管勾洪州玉隆观九月至鄂州寓居踰年正月与苏子由书云某三两日即拏舟下巴陵出陆至双井六日尔山谷与洪龟父书曰四十及新妇在荆南已遣十六节推弟往取船来会江州矣山谷与徐师川书曰老舅六月九日领太平事十七日奉朝旨送吏部即日解船至江口崇寧二年山谷有南楼诗寄方公悦题云某以去岁九月至鄂登南楼叹其制作之美云云】

次韵答高子勉十首【高荷字子勉荆州人而此诗有春从细草回之句当是春初所作】

赠高子勉四首【附前篇】

再用前韵赠子勉四首【附前篇诗有鸟语花中管弦之句春稍动矣】荆南签判向和卿因予六言见韵次韵奉酬四首【附前篇】

蚁蝶图【从旧次】

谢胡藏之送栗鼠尾画维摩二首【从旧次】

次韵向和卿行松滋县与邹天锡夜语南极亭二首【诗有提壶及思归乐之句当在二月间】

以上诗皆未离荆南所作】

戏答荆州王充道烹茶四首【往分宁时经日长之句】

雨中登岳阳楼望君山二首【往分寧时经途岳州所作】

自巴陵略平江临湘入通城无日不雨至黄龙奉谒清禅师继而晚晴邂逅禅客戴道纯欸语作长句呈道纯【巴陵平江临湘皆属岳州通城属鄂州黄龙山在洪州武宁李彤季敌书豫章集後云先生自巴陵取道通城入黄龙山为清禅师遍阅南昌集自有去取即此时也】题徐氏书院【徐禧德占洪州人此诗归洪州时所作】

赠石敏若【从旧次】

题胡逸老致虚庵

题莲花寺【右两篇原任逍遥观後】

冲雨向万载道中得逍遥观遂托宿戏题【此诗往萍乡时所作万载亦属袁州山谷有跋陈日休所收旧字云崇寧元年三月己卯自分寧来宿万载之广惠道场考长历己卯盖二十四日】

题竹尊者轩【从旧次当是广惠道场】

送密老住五峯【从旧次山谷有为密公作草书跋尾云元年三月壬午旅寓宜春之开元饭崇胜密公之堂即此僧也壬午盖二十七日宜春属袁州】

新喻道中寄元明用觴字韵【元明作萍乡?山谷来省覲书萍乡厅壁记曰来以崇宁四年四月乙酉而去以是月之己亥己酉盖四月朔至己亥凡十五日此诗盖别後所作新喻属临江军去萍乡未远】

第十七卷

拜刘凝之画像【刘凝之家於南康此诗当是还自萍乡往江州经途所作或云赴太和时所作】

追和东坡壶中九华【据此诗序五月二十日系舟湖口所作湖口属江州】罢姑熟寄元明用觴字韵【六月十七日罢姑苏解船至江口会洪驹父奉其大母来又为之留七日闰六月十一日分手将家到荆南谋居山谷与徐师州书云冲东风至芜湖矣驹父大母李氏山谷之从母也山谷又有太平州後园石室听杨殊弹琴题名云与郭公甫高太忠同酌桂浆实季夏

之丁未盖六月二十三日也】

次韵子瞻和李太白浔阳紫极宫感秋诗韵追怀太白子瞻【浔江今江州山谷罢太平後徘徊於江州此诗江州所作有蟹肥社醕熟之句盖八月也而蜀中双井後集有此诗跋云崇宁元年八月乙卯乙卯盖初三日也】

琼芝轩

龟壳轩

秋声轩【右三篇皆紫极宫作】

戲效禪月作远公咏【远公道场即今江州卢山东林寺是岁八月庚申山谷有东林题名此诗当是同时所作庚申盖初八日】

跋子瞻和陶诗【原在紫极宫诗前今附见】

题李亮功戴嵩牛图【从旧次】

追和东坡题李亮功归来图【当是与前篇同时作】

次韵徐仲车喜董元达访之作南郭篇四韵次韵仲车为董元达置酒四韵

次韵仲车因娄行父见寄之什【右三篇原在紫极观诗後诗有万里远归来烦公问健否之句盖晚年所作】

武昌松风阁【山谷九月至鄂此诗经途所作时张文潜再谪黄州犹未至也故诗有张侯何时到眼前之句黄与武昌隔江相望云尺牘中有跋与李德叟书云崇寧元年九月甲申系舟樊口题】

次韵文潜

和文潜舟中所题【右二诗并次前篇时文潜已到黄山谷自鄂往见之前诗有风雪牖户当塞向之句盖冬深所作】

题君子泉【泉在黄州次前篇】

宿黄州观音院钟楼上【原在次韵文潜後诗有潘何之语今迁於此为後诗张本】

谢何十三送蟹【从旧次何十三当是何颀之斯举或其弟兄颀之盖黄州人事具曾造端伯诗选】

又借答送蟹韵并戏小何

代二螯解嘲

又借前韵见意【右三诗见於修水集今附见】

次韵文潜立春日三絕句

再次前韵【考长历是岁十二月二十一日立明年春时山谷已归鄂故诗有已发黄州首更回之句】

第十八卷

崇宁二年癸未【是岁山谷在鄂州既而谪宜州十二月十九日发鄂渚至岳阳作岁初山谷在荆州作承天院塔记转运判官谋举承执政赵挺之风旨摘其间数语以为幸灾谤国遂除名编隶宜州 过湖以明年二月见於过洞庭青草湖诗】

梦中和觞字韵【序云崇宁二年正月己丑己丑盖初九日】

次韵吴可权题余干县白云亭【从旧次】

次韵廖明略同吴明府白云亭宴集【次前篇】

病来十日不举酒二首【诗有回施青春与後生之句春时所作】 题小景扇【从旧次】

鄂州南楼书事四首【诗有我亦耒追六月凉之语山谷在鄂州作夏惟此年尔】 南楼画阁观方公悦二小诗戏次韵【附前篇】

庭坚以去岁九月至鄂登南楼叹其制作之美成长句久欲寄远因循至今书呈公悦【附前篇】

养鬬鸡

顔徒贫乐斋二首【右三诗并从旧次】

和凉轩二首【以时序为次诗有西风之语】

题默轩和遵老【原在凉轩前】

次韵文安国纪梦

寄贺方回【右二篇原在画阁诗後】

文安国挽词二首【因前篇纪梦附见】

鄂州节推陈荣绪惠示沿檄崇阳道中六诗老懒不能追韵辄自取韵奉和【诗有中秋山行之篇】

陈荣绪惠示之字韵推獎过实非所敢当辄次高韵三首【附前篇】

第十九卷

德孺五丈和之字诗韵难而愈工辄复和呈可发一笑【附前篇范德孺名纯粹据实録崇寧元年十月管勾南京鸿庆宫范纯粹鄂州居住二年正月又责常州别驾鄂州安置】

次韵德孺新居病起

次韵德孺感兴二首

次韵德孺惠贶秋字之句【并从旧次】

求范子默染鸦青纸二首【从旧次子默盖德孺之子】

谢荣绪惠贶鲜鲫

谢荣绪割鱠见贻二首

吴执中有两鹅为余烹之戏赠【右四诗并从旧次】

秋冬之间鄂渚絶市无蟹今日偶得数枚吐沫相濡乃可悯笑戏成小诗三首【以题中时序为次】

甯子与追和予岳阳楼诗复次韵二首

和甯子与白鹿寺【从旧次】

谢人惠猫头荀【从旧次诗有鸚鵡洲前人未知盖未离鄂州也鞭笋当谓冬时作】短韵奉乞蜡梅【从旧次】

以酒渴爱江清作五小诗寄廖明略学士兼简初和父主簿【诗有将发沔鄂之句】

四休居士诗三首【从旧次盖在鄂州所作】

十二月十九日夜中发鄂渚晓泊汉阳亲旧携酒追送聊为短句【此以後诗赴宜州贬所时所作山谷有与人帖云某治行已有绪既嫁女别无一事移舟汉阳留数日待亲识之在旁近尔】

次韵陈荣绪同倚钟楼晚望别後明日见寄之作【诗中有青草枯松之句皆岳州事盖荣绪送山谷至岳时尚未过湖也】

崇宁三年甲申【是岁二月过洞庭经潭衡永桂等州五六月间至宜州贬所其家寓於永州山谷有跋李資深书卷云崇宁三年十一月余谪处宜州半岁矣官司谓余不当居关城中乃以是月甲戌抱被入宿于城南楼山谷与长沙崇寧平老帖云骨肉寓永州】

过洞庭青草湖【诗有乙丑越洞庭丙寅渡青草之句考长历二月二十一日乙丑之十二日丙寅】

过土山寨【张舜民南行録湖中有土山巡检司去黄陵庙十五里】

晚泊长沙示秦处度范元实用寄明略和父韵五首【长沙即潭州在洞庭之南】

次韵元实病目【从旧次】

胜业寺悦亭【从旧次南行録胜业寺在南岳庙东属潭州衡山县有柳子厚般舟和尚第二碑】

离福岩【从旧次按南行録胜岩在南岳依岩架空为之盖思公道场有三生塔亦属衡山县】花光仲仁出秦苏诗卷思二国士不可复见开卷絶叹因花光为我作梅数枝及画烟外远山追少游韵记卷末【从旧次花光寺在衡州经途所作】

题花光画

题花光画山水

所住堂

戏咏高节亭边山矾花二首【右五篇并次前诗】

第二十卷

赠惠洪【从旧次诗有眼横湘水暮之句】

戏咏零陵李宗古居士家驯鸕鶚二首【零陵即永州经途所作】

李宗古出示谢李道人苕帚杖从蒋彦回乞葬地二颂作二诗奉呈【从旧次】

书磨崖碑後

浯溪图

太平寺慈氏阁

题淡山岩二首

明远庵

玉芝园

游愚溪【右八诗皆永州三月间作诗中可见愚溪诗序云三月辛丑盖二十八日也】代书寄翠岩新禅师【从旧次虽有早梅开之句不可作时节会】

戏答欧阳诚发奉议谢余送茶歌【从旧次】

到桂州【从旧次】

答许觉之惠桂花椰子茶盂二首【因後篇附见】

以椰子茶瓶寄德孺二首【原在到桂州诗後】

寄黄龙清老三首【诗有中秋月之句秋时所作】

崇宁四年乙酉【是岁山谷在宜州九月三十日卒】

宜阳别元明用觞字韵【是岁山谷年六十一有为元明书草庵歌图跋尾曰时山谷年六十一元明自宜归湖南时而此诗有千林风雨莺求友之句盖春时作】

和范信中寓居崇宁遇雨二首【信中名寥山谷有跋范寥所收东坡诗云实崇宁四年之五月山谷老人谪居宜州二年矣山谷又有宜州游山记盖四年六月辛巳而信中挂名其间此诗亦四年夏所作欤】

乞鍾乳於曾公衮【从旧次公衮公紆曾布子宣之子时编置永州三年矣豫章後集有与公衮书云鍾乳何时再成又云岭南秋暑殊未解此诗盖秋时所作或遂絕笔于此篇欤】

山谷内集诗注原目

山谷内集诗注卷一

钦定四库全书

山谷内集诗注卷一 宋 黄庭坚 撰

任渊注

古诗二首上苏子瞻【前篇梅以属东坡後篇松以属东坡茯苓以属门下士之贤者?丝以自况东坡报山谷书云古风二首托物引类得古诗人之风其推重如此故置诸篇首云】

江梅有佳实托根桃李场【文选古诗云冉冉?生竹结根太山阿此句倣其体老杜有江梅诗又有诗云欲发照江梅吴淑事类梅赋云亦果中之佳实文选赵景真与嵇茂齐书曰北土之性难以托根场谓场圃寒山子诗昨晚何悠悠场中可怜许上为桃李迺下作兰荪渚此句并摘其字山谷诗律妙一世用意高远未易窥测然置字下语皆有所从来孙莘老云老杜诗无两字无来历刘梦得论诗亦言无来历字前辈未尝用山谷屡拈此语盖亦以自表见也第恨浅闻未能尽知其源委姑随所见笺于其下庶几因指以识月象外之意学者当自得之】桃李终不言朝露借恩光【汉书李广传赞曰桃李不言下自成蹊此借用言江梅为桃李所忌文选乐府曰入门各自媚谁肯相为言此用其意白乐天有木诗曰风烟借颜色雨露助华滋文选江淹上书曰大王惠以恩光顾以颜色此用其字下皆倣此诗意谓东坡见嫉于当世独为人主所知耳】孤芳忌皎洁冰雪空自香【退之诗异质忌处羣孤芳难寄林文选颜延年祭屈原文云物忌坚芳人讳明洁鲍明远诗艳阳桃李节皎洁不成妍乐府苏子卿梅花落曰只言花是雪不悟有香来】古来和鼎实此物升庙廊【老杜诗古来才大难为用文选潘安仁诗王生和鼎实书曰若作和羹尔惟盐梅文选古诗曰此物何足贵但感别经时慎子曰廊庙之材盖非一木之枝】岁月坐成晚烟雨青已黄【文选古诗曰思君令人老岁月忽已晚玉台新咏鲍照杂诗曰烟雨交将夕从此遂分形周处风土记云夏至前雨名黄梅雨初学记曰梅熟而雨曰梅雨江东呼为黄梅雨】得升桃李盘以远初见尝【韩退之李花诗冰盘夏荐碧实脆韩诗外传田饶曰黄鹄无五德君犹贵之以其所从来者远矣东坡盖蜀人】终然不可口掷置官道傍【选诗终然谢天伐老杜病橘诗纷然不适口岂止存其皮庄子曰粗粝橘柚皆可于口李贺诗掷置黄金解龙马官道傍用王说王戎不趣道傍苦李意诗意谓东坡弃置于外郡也】但使本根在弃捐果何伤【君子之于世视其所立何如不在遇不遇也左传曰葛藟犹能庇其本根文选古诗曰弃捐勿复道努力加餐饭左传曰一扶女庸何伤】

青松出涧壑十里闻风声【文选左太冲咏史诗鬱鬱涧底松离离山上苗颜延年诗松风遵路急宋玉高唐赋曰不见其底虚闻松声诗意谓东坡以大材而沈下僚其盖世之名则不可掩也】上有百尺丝下有千岁苓【淮南子说山训曰千岁之松下有茯苓上有兔?注云茯苓千岁松脂也兔丝生其上而无根一名女萝又按顔弃诗葛与女萝施于松柏注云女萝兔?松萝也正义则曰陆玕疏云今兔?蔓连草上生非松萝松萝自蔓松上生事或当然陶隐居注本草兔丝条亦云旧言下有茯苓上有兔丝今未必尔读山谷此句当不以词害意也】自性得

久要为人制颓龄【此句指茯苓本草木部茯苓条陶隐居注曰为药无朽蛀尝得昔人所埋计二十年而色理无异明其真全不朽矣而本经言久服安魂养神不饥延年圆觉经曰圆觉自性非性性有鲁论曰久要不忘平生之言陶渊明诗菊为制颓龄】小草有远志相依在平生【此句以下并指兔丝按兔丝在本草草部世说桓温问谢安远志又名小草何以一物而有二名郝隆曰处则为远志出则为小草此特借用以指兔丝言其不依附凡木所志远矣左传曰辅车相依平生见前注】医和不并世深根且固蒂人言可医国可用太早计【本草兔丝条掌禹锡注引抱朴子云兔丝之草下有伏兔之根无此兔则丝不生然实不属也此诗借用而本经言兔丝久服明月轻身延年诗意谓依附贤者足以自乐至其不为当世所知则亦自重难进而未尝汲汲也晋语平公有疾秦伯使医和视之文子曰医及国家乎对曰上医医国其次医人固医官也老子曰是谓深根固蒂长生久视之道史记孔子弟子传曰孔子皆後之不并世庄子曰且汝亦太早计】小大材则殊气味固相似【左传曰今譬于草木寡君在君君之?味也明皇杂录高力士咏荠诗曰夷夏虽有殊气味终不改】

醇道得蛤蜊复索舜泉舜泉已酌尽官醞不堪不敢送

青州从事难再得墙底数樽犹未眠商略督邮风味恶不堪持到蛤蜊前【世说桓公有主簿善别酒有酒辄令先尝好者谓青州从事恶者谓平原督邮注云青州有齐郡平原有鬲县从事谓到齐下督邮谓到鬲上住也汉书李夫人传曰佳人难再得张籍诗酒尽卧空瓶开元传信记曰麴生风味不可忘也此反而用之世说孙绰许询共在白亭楼共商略先往名达】

次韵王穉川客舍二首【彭山黄氏有山谷手书此诗云王猷穉川元丰初调官京师寓家鼎州亲年九十余矣尝閱贵人家歌舞醉归书其旅邸壁间云鴈外无书为客久蛩边有梦到家多画堂玉佩紫云响不及桃源欵乃歌余访穉川于邸中而和之】

五更归梦常苦短一寸客愁无奈多【孟郊诗一夕九起嗟梦短不到家文选短歌行曰来日苦短去日苦长?信愁赋曰且将一寸心能容万斛愁五更字从黄氏本而别本或作五湖】慈母每占乌鹊喜家人应赋屢屢歌【黄氏本作慈母不嗔乌鹊喜闺人应赋屢屢歌元注曰百里奚仕秦其妻歌曰百里奚五羊皮忆别时烹伏雌炊屢屨今日富贵忘我为○西京杂记陆生曰乾鹊噪而行人至老杜诗浪传乌鹊喜】

身如病鹤翅翎短心似乱丝头绪多【王介甫折翼鹤诗云每怜今日长垂翅却悔当时误剪翎退之南山有高树行曰路远翅翎短不能持汝归乐府华山畿曰腹中如乱丝老杜诗玉垒题诗心绪乱太白诗纛丝忆君头绪多】此曲朱门歌不得湖南湖北竹枝歌【老杜诗为公歌此曲欧阳公诗朱门歌舞争新态竹枝歌见後注】

欵乃歌二章戏王穉川【欵音袄乃音藹○黄氏有山谷手写旧本题云予复代稚川之妻林夫人寄稚川时稚川在都下有所顾盼留连未归也】

花上盈盈人不归枣下纂纂实已垂【黄氏本前章曰花上盈盈人不归枣下纂纂实已垂寻

师访道鱼千里盖世功名黍一炊○初学记歌门载刘敬叔异苑曰临川聂包死数年忽诣南丰相沈道袭歌笑每歌辄作花上盈盈正闻行当归不闻死复生文选潘岳笙赋歌曰枣下纂纂朱实离离宛其落矣化为枯枝人生不能行乐死何以虚謚为李善注引古咄咄歌曰枣下何攒攒荣华各有时枣欲初赤时人从四边来枣适今日赐谁能仰视之什邡张氏有山谷手书此诗与今本正同唯一二字稍异实已垂作实已稀又有跋云宋时有鬼女至人家歌花上盈盈曲声悲怨不可听潘岳闲居赋中歌曰枣下纂纂云云所援引小有抵牾盖随所记忆略举大概耳】腊雪在时听马嘶【张氏本作听嘶马】长安城中花片飞【老杜诗一片花飞减却春长安盖借言汴京】

从师学道鱼千里盖世功名黍一炊【黄氏本後章曰卧冰泣竹慰母饥天吴紫凤补儿衣腊雪在时听嘶马长安城中花片飞四句盖旧所作後方改定今附见于此庶知前辈有日新之功也○後汉李固传步行寻师不远千里晋书夏侯湛传曰古之人厥乃千里寻师汉书项羽歌曰力拔山兮气盖世庄子曰功盖天下而似不自己张氏本有山谷跋云鱼千里盖陶朱公养鱼法凡鱼远行则肥池中养鱼虑其瘦故于池中聚石作九岛鱼绕之日行千里黍炊即淳于棼梦富贵百年于蚁穴中破梦起坐舍中炊黄粱犹未?也山谷之说如此予按齐民要术载陶朱公养鱼经曰以六亩地为池池中有九洲六谷求鲤鱼内池中云云又按吴越春秋范蠡曰会稽之山有鱼池水中有三江四渎之流九溪六谷之广山谷本引用此说特以意加损尔然诗意则谓千里访道如鱼之回旋往复徒自苦耳不若归而求之有余师刘向新序邱吾子曰吾有三失少好学问周遍天下还後吾亲亡一失也山谷盖用此意又按异闻集道者吕翁经邯鄲道上邸舍中有少年卢生自叹其贫困言讫思寐时主人方炊黄粱为饌翁乃探怀中枕以授生枕两端有窍生梦中自窍入其家见其身富贵五十年老病而卒欠伸而悟顾吕翁在傍主人炊黄粱尚未熟山谷所引蚁穴梦自是一事亦见异闻集当是记忆不审耳诗意则谓功名正复盖世岂若菽水奉亲之乐耶】日日倚门人不见看尽林乌反哺儿【战国策齐王孙贾之母谓贾曰汝朝出而晚来则吾倚门而望暮出而不还则吾倚闾而望钱起诗曲终人不见文选束皙补亡陔诗曰嗷嗷林乌受哺于子李善注云纯黑而反哺者乌也老杜诗舟鷁排风影林乌反哺声】

咏史呈徐仲车【元注曰仲车以贖弃官○哲宗实録曰徐积楚州人治平四年擢进士第事母孝笃乡闾化之积字仲车山谷同年生也】

诸葛见益州释耒答三顾【蜀志诸葛亮传亮躬耕壠亩先主诣亮三往乃见上疏後主曰先帝不以臣卑鄙猥自枉屈三顾臣于草庐之中先主传曰建安十九年复领益州牧文选沈休文安陆王碑曰农夫释耒按盐铁论曰儒者释耒耜而学不验之语】川流恨未平武功原上路【诸葛亮传建兴十二年据武功五丈原与司马宣王对于渭南其年八月卒老杜武侯庙诗曰功盖三分国名成八阵图江流石不转遗恨失吞吴此借用以不得灭魏为恨】杜微对诸葛輿致但求去倾心倚经纶坐上漫书疏【蜀志杜微传微字国辅先主定蜀微尝称聋闭门不出丞相亮领益州牧选迎皆妙简旧德以微为主簿固辞举以致之亮以微不闻人语坐上与书微自乞老病求归亮又与书答曰君但以德辅时耳不责君军事拜为谏议大夫以从其志仲车病聋故以此事戏之】白鸥渺蒹葭霜鹖在指呼借问诸葛公如何迎主簿【何逊

诗可怜双白鸥朝夕水上游老杜诗白鸥没浩荡万里谁能驯蒹葭字见诗又杜诗莫作翻云鹞闻呼向禽急按通典选举门陈依梁制诸州迎主簿得未壮而仕】

宿旧彭泽怀陶令【彭泽今属江州故城在县东四十里昭明太子作渊明传谓亲朋曰聊欲弦歌以为三径之资可乎执事者以为彭泽令岁终会郡遣督邮至县渊明即日解印绶去职南史隐逸传曰陶潜字渊明或云字深明名元亮】

潜鱼愿深渺渊明无由逃彭泽当此时沈冥一世豪【庄子曰鸟兽不厌高鱼鼃不厌深夫全其形生之人藏其身也不厌深渺而已矣正月诗曰鱼在于沼亦匪克乐潜虽伏矣亦孔之炤笺云池鱼之所乐而非能乐其潜伏于渊又不足以逃甚炤炤易见以喻时贤者在朝廷道不行无所乐退而穷处又无所施也扬子曰蜀庄沈冥宋子京诗云虚负诗中一世豪】司马寒如灰礼乐卯金刀【东晋司马氏末年礼乐征伐自刘裕出范文正公作狄梁公碑云武暴如火李寒如灰汉书王莽传曰夫刘之为字卯金刀也】岁晚以字行更始号元亮凄其望诸葛肮脏犹汉相【老杜诗凄其望吕葛蜀志建安二十五年传闻汉帝见害先主发丧制服二十六年四月即皇帝位改元章武以诸葛亮为丞相後汉赵壹传曰伊优北堂上肮脏倚门边注云肮脏高亢倜傥之貌也】时无益州牧指挥用诸将【益州牧见前注老杜诗指挥若定失萧曹】平生本朝心岁月閱江浪【南史陶潜传曰自以曾祖晋世宰辅耻复屈身後代自宋武帝王业渐隆不复肯仕所着文章皆题其年月义熙以前明书晋氏年号自永初以来唯云甲子而已汉书萧望之雅意本朝文选孔文举论盛孝章书曰岁月不居时节如流】空余诗语工落笔九天上【谓非世间语也太白诗欸唾落九天随风生珠玉此句颇采其意孙子曰善攻者动于九天之上】向来非无人此友独可尚【孟子曰颂其诗读其书不知其人可乎是以论其世也是尚友也】属予刚制酒无用酌杯盎【书曰矧汝刚制于酒】欲招千载魂斯文或宜当【楚辞宋玉有招魂赋王介甫诗曰狂言岂宜当按韩退之诗吁嗟苦弩缓但惧失宜当】

题山谷石牛洞【石牛洞在舒州三祖山皇佑中王荆公通守舒州尝题诗云水泠泠而北出山靡靡以旁围欲穷源而不得竟怅望以空归故山谷亦拟作】

司命无心播物祖师有记传衣【灊山在舒州怀寧县北有九天司命真君祠山谷寺在县西有三祖僧璨大师塔汉书贾?赋曰大钧播物块北无垠传灯録达磨传以袈裟授慧可曰内传法印以契证心外付袈裟以定宗旨汝今受此衣用以表明其化无碍至吾灭後二百年衣止不传法周沙界】白云横而不度高鸟倦而犹飞【退之诗云横秦岭家何在老杜诗野留行地日江入度山云汉书韩信传曰高鸟书良弓藏渊明归去来词曰鸟倦飞而知还】

题灊峰阁【阁在舒州提刑司】

徐老海棠巢上【元注云徐佺乐道隐于药肆中家有海棠数株结巢其上时与客巢饮其间】王翁主簿峯庵【元注云王道人参禅四方归结屋于主簿峯上尝有毛人至其间问道】梅蘂破顔冰雪绿丛不见黄甘【乐天诗一放狂歌一破顔东坡和李公择梅花诗云何人慰

流落嘉礪天为种又怀公择诗云我有同舍郎官居在灊岳遗我三寸柑照坐光卓犖时公择作淮西宪使治所在舒州】

次韵公择舅

昨梦黄粱半?立谈白璧一双惊鹿要须野草鸣鸥本愿秋江【黄粱见前注史记虞卿传曰说赵孝成王一见赐黄金百镒白璧一双唐人王建六言诗曰再见封侯万户立谈赐璧一双嵇康絶交书曰禽鹿志在丰草】

赣上食莲有感

莲实大如指分甘念母慈【尔雅荷芙渠其华菡萏其实莲其根藕其中葍葍中薏注曰莲谓房也葍莲中子也南山有台诗疏引陆玕草木疏云枸树似白杨有子着树端大如指此借用其字诗意谓拇指也唐本草亦曰丹砂其次大者如拇指晋书王羲之传曰牵诸子抱弱孙有一味之甘割而分之以娱目前】共房头 更深兄弟思【王子年拾遗记曰西王母见穆天子进素莲一房百子诗曰其角 此借用】实中有么荷拳如小儿手令我忆衆雏迎门索梨枣【么荷谓小叶太白诗曰初拳几枝蕨图经本草曰菰根岁久者中心生白台如小儿臂谓之菰手此句颇采其意祢正平鹦鹉赋曰悯衆雏之无知渊明归去来辞曰稚子候门又责子诗曰通子垂九龄但觅梨与栗公诗有蕨芽已作小儿拳之句张合见之云此忍人也时合为河内推官与通判葛繁皆蔬食诵经故有此语王直方云今此亦云么荷拳如小儿手两用皆有妙处】莲心正自苦食苦何能甘甘餐恐腊毒素食则怀惭【尔雅葍中薏注曰中心苦陆玕草木疏曰里语云苦如薏是也晋书谢安传曰正自不能尔耳又国语曰厚味实腊毒伐檀诗曰不素食兮】莲生淤泥中不与泥同调【维摩经曰譬如高原陆地不生莲花卑湿淤泥乃生此花选诗曰异代可同调】食莲谁不甘知味良独少【中庸曰人莫不饮食也鲜能知味也晋书桓伊歌曰为臣良独难】吾家双井塘十里秋风香安得同袍子归制芙蓉裳【双井在洪州分寧县诗曰岂曰无衣与子同袍此借用王介甫和俞秀老诗亦曰解我葱珩脱孟劳暮年甘与子同袍离骚曰制芰荷以为衣集芙蓉以为裳】

秋思寄子由

黄落山川知晚秋小虫催女献功裘【礼记月令曰草木黄落春秋考异邮曰立秋促织鸣宋均注曰趣织蟋蟀也立秋女功急故趣之周礼司裘季秋献功裘注云人功微麤谓狐青麤裘之属】老松閱世卧云壑挽着沧江无万牛【老杜诗云壑布衣鲐背死又古相行大厦如倾要梁栋万牛回首邱山重】

赠别李次翁

利欲薰心随人翥张国好骏马尽为王良【韩退之送高闲序曰利欲鬬进有得有丧易艮之九三曰艮其限列其夤厉薰心老子曰将欲张之必固翥之尽为王良言流俗之随逐世好不

能特立独行也】不有德人俗无津梁【庄子苑风曰愿闻德人张湛注列子曰体道穷宗为世津梁江文通诗曰道丧涉千载津梁谁能了世说?亮尝入佛寺见卧佛曰此子疲于津梁于时以为名言】德人天游秋月寒江【庄子曰天之穿之日夜无降人则顾塞其窠胞有重?心有天游室无空虚则妇姑勃谿心无天游则六凿相攘寒山子诗曰吾心似秋月碧潭清皎洁】映彻万物玲珑八窗【言心之虚明如此韵书曰玲珑明貌礼记明堂位疏引孝经援神契曰明堂八窗四达】于爱欲泥如莲生塘处水超然出泥而香孔窍穿穴明水其相维乃根华其本含光【圆觉经曰爱欲为因爱命为果维摩经曰示有妻妾嫖女而常乐远离五欲淤泥超曰经曰如莲花不着水心清淨超于彼诗曰金玉其相注云相质也孔窍水相皆谓藕文选崔子玉座右铭曰在涅贵不淄暧暧内含光】大雅次翁用心不忘曰问月学旅人念乡能如斯莲汔可小康【汉书河间献王赞曰夫惟大雅卓尔不羣孟子曰必有事焉而勿正心勿忘勿助长也旅人念乡言不忘也如锺仪庄舄之类是已诗曰汔可小康此借用言仅可以居安耳】在俗行李密密堂堂【左传行李之往来供其乏困唐有密密堂堂之謡此借用传灯録坦然问慧安国师曰如何是自己意师曰当观密作用又志公颂曰丈夫运用堂堂逍遥自在无妨】观物慈哀涖民爱庄【鲁论曰临之以庄则敬又云不庄以涖之则民不敬】成功万年付之面墙草衣石质与世低昂【欲成远大事业当如少林之面壁自求已事也虽草衣木食铁石其心然未尝违世亦与之俯仰聊同其波耳唐黄檗禅师传心法要曰勤苦修行草衣木食又权德輿有草衣禅师宴坐记汉书司马迁书曰故且从俗浮沈与时俯仰楚辞曰服偃蹇以低昂】

演雅

桑蚕作茧自纏裹蛛螫结网工遮逻【乐天诗烛蛾谁救护蚕茧自纏紫吕氏春秋汤祝网曰蛛螫作网令人学之符子曰公子重耳游大泽之中见蜘蛛布网曳蝇执豸而食之顾舅犯曰此虫也德薄矣而犹役其智云云】燕无居舍经始忙蝶为风光勾引破【诗云经始勿亟老杜诗传语风光共流转又落花诗云影遭碧水潜勾引乐天柳诗勾引春风无限情】老鶺鴒衔石宿水饮樾蜂趋衙供蜜课【司马相如上林赋曰双鶺鴒下注云鶺鴒也梅圣俞诗不比西池老鶺鴒树萱録曰尝见数鸟衔山间碎石登于树杪俄复入水又衔石登树者数四处士杨存素曰是鶺鴒伏卵多入水其体冷湿还取礬石耳按博物志云鶺鴒水鸟也伏卵时卵冷则不沸取礬石用绕卵以助燥气陶隐居注本草礬石条亦引此说又按陈藏器本草云鶺鴒巢中以泥为池含水满池中养鱼及蛇以哺其子山谷以为老鶺鴒未喻埤雅曰蜂有两衙应潮唐书食货志曰主户内有课口者为课户】鵲传吉语安得闲鸡催晨兴不敢卧【陆贾新语曰乾鵲噪而行人至汉书陈汤传曰不出五日当有吉语闻炙穀子云鸡一名司晨】气陵千里蝇附骥枉过一生蚁旋磨【後汉书曰苍蝇之飞不过十步若附骥尾日驰千里晋书天文志周髀家云譬之于蚁行磨石之上磨左旋而蚁右去磨疾而蚁迟故不得不随磨而左回焉】蝻闻汤沸尚血食雀喜宫成自相贺【淮南子曰汤沐具而虬蝻相吊大厦成而燕雀相贺】晴天振羽乐蜉蝣空穴祝儿成螺贏【诗曰蜉蝣之羽衣裳楚楚注蜉蝣渠略也朝生夕死七月诗曰六月莎鸡振羽法言曰螟蛉之子殪而逢果蠃祝之曰类我类我久则肖之矣注谓螟蛉虫也果蠃蒲卢也桑虫子始生而蒲卢取之于木空中七日祝而化之以变为已子】蛞蝓转丸贱苏合飞蛾赴烛甘死祸【庄子齐物论注曰蛞蝓之智在于转丸而笑蛞蝓者乃以苏合为贵按

尔雅蛄蛸蛸蛸也南史傅亮传直宿禁中覩夜蛾赴烛作感物赋以寄意】井边蠹李蟠苦肥枝头饮露蟬常饿【孟子曰井上有李蟠食实者过半矣徐广车服杂志曰侍臣加貂蟬取其清高饮露不食】天蝼伏隙録人语射工含沙须影过【本草蝼蛄一名蝼蛄一名天蝼陶隐居注曰此物颇协神鬼昔人狱中得其力者今人夜忽见出多打杀之言为鬼所使也博物志曰江南谿水中有射工虫长一二寸口中有弩形气射人影不治则杀人春秋庄公十八年有疏谓含沙射人影】训狐啄屋真行怪蠪蛸报喜太多可【退之射训狐曰有鸟夜飞名训狐矜凶挟狡夸自呼时乘阴黑止我屋声势慷慨非常羸礼记中庸曰素隐行怪行音下孟反东山诗注曰蠪蛸长也疏云河内人谓之喜母此虫来着人衣当有亲客至有喜也嵇康絶交书曰足下旁通多可而少怪】鸬鹚密伺鱼鰕便白鹭不禁尘土浣【湼盘经曰如人有怨逐伺其便诗义疏曰鹭水鸟也好而洁白谓之白鹭退之诗愿书岩上石勿使尘泥浣老杜诗冷櫟疎枝恐不禁】络纬何尝省机织布谷未应勤种播【炙毂子曰莎鸡古今注一名促织一名络纬谓其鸣如纺绩织纬也杜诗布谷处处催春种按尔雅鳴鳩鵲鵲注曰今布谷也书曰降播种】五技鼯鼠笑鳩拙百足马蜧怜鼃跛【荀子曰鼯鼠五技而穷欧公诗衆鸟笑鸣鳩尔拙固无匹不能取巧妇以共营家室博物志曰百足一名马蜧庄子曰蜧怜蛇楚词曰驪跛鼃而上山吾固知其不能升荀子曰岂若跛鼃之与六驥足哉】老蚌胎中珠是贼醯鸡瓮里天几大【三辅决録孔融见韦元将与其父书曰不意双珠出于老蚌淮南子曰明月之琳蚌之病而我之利庄子田子方篇曰孔子见老聃告顔回曰吾之于道也其犹醯鸡与微夫子之吾覆也吾不知天地之大全也注云醯鸡者瓮中之蠅蠅比吾全于老聃犹瓮中之与天地矣谈苑刘师道诗醯鸡舞瓮天】螳螂当辙恃长臂熠燿宵行矜火照【庄子曰犹螳螂之怒臂以当车轂则必不胜任矣音义曰轂音辙诗曰熠燿宵行注云熠磷也萤火也】提壶犹能劝沽酒黄口只知贪饭颗【提壶鸟名梅圣俞四禽言曰提壶芦沽美酒风为宾树为友山花撩乱目前开劝尔今朝千万壽家语孔子见罗雀者所得皆黄口小雀曰大雀善惊而难得小雀贪食而易得摭言李白诗饭颗山头逢杜甫】伯劳饶舌世不问鸚鵡才言便关鎖【七月诗曰七月鸣鵙注云鵙伯劳也剧谈録白居易玉櫛花诗曰不缘啼鸟春饶舌青琐仙郎何得知曲礼曰鸚鵡能言不离飞鸟刘梦德和乐天鸚鵡诗曰谁遣聪明好顔色争须安置入深笼】春蛙夏蜩更嘈杂土蚓壁蟬何碎琐【七月诗曰五月鸣蜩注云蜩蟬也嘈杂疑作嘈囀文选东京赋云奏严鼓之嘈囀音才达反孟子曰夫蚓上食槁壤下饮黄泉酉阳杂俎曰张周封言壁上白瓜子化为白鱼韵书曰蟬音淫衣白鱼也韩孟联句竹影金琐碎】江南野水碧于天中有白鸥闲似我【寇莱公诗野水无人渡卢仝诗水泛碧天色老杜诗飘零何所似天地一沙鸥】

戏和答禽语

南村北村雨一犁新妇饷姑翁哺儿田中啼鸟自四时催人脱袴着新衣着新替旧亦不恶去年租重无袴着【东坡乐府曰归去归去江上一犁春雨东坡在黄州作五禽言自注曰土人谓布谷为脱却布袴晋书列女传谢安曰王郎逸少子不恶汝何恨也前汉食货志曰租挈重注曰收田租之约令也】

赠郑交【山谷有招清公诗跋云草堂郑交处士隐处小塘芙蕖盛开使鸡伏鸳鸯卵与人驯

狎不惊畏我禅师恩 长老法安师怀道遯世清公少时盖依之数年今观跋意即此诗但题不同尔郑交字子通见于山谷书尺及题跋】

高居大士是龙象草堂丈人非熊罴【大士谓灵源叟惟清清盖晦堂之法嗣山谷与欧阳元老帖云清师归所受业院武宁之高居想甚得所也武宁属洪州莲经曰文殊师利语弥勒及诸大士如我惟忖今佛世尊欲说大法传灯录达磨传曰波罗提法中龙象按智度论云龙象言其力大龙水行中力大象陆行中力大故今以负大法者者比之龙象史记齐世家曰吕尚年老以渔钓干周西伯西伯将猎卜之曰所获非龙非虬非虎非罴所获霸王之辅果遇于渭水之阳载与俱归立为师按六韬以非虎为非熊】不逢坏衲乞香饭惟见白头垂钓丝【上句谓清公未至延恩下句指郑交四分律云一切上色衣不得畜当坏作迦沙色智度论云五比丘曰佛当着何等衣佛言应着衲衣金刚经曰尔时世食时着衣持鉢入舍卫大城乞食维摩经曰化菩萨以满鉢香饭与维摩诘老杜诗江边老病虽无力强拟晴天理钓丝】鸳鸯终日爱水镜菡萏晚风雕舞衣【襄阳记曰司马德操为水镜晋书乐广传卫瓘曰此人之水镜也赵嘏诗曰红衣落尽渚莲愁书曰胤之舞衣】开径老禅来煮茗还寻密竹迳中归【江淹拟陶渊明诗云开径望三益老杜寄赞上人诗云柴荆具茶茗迳路通林邱谢灵运诗连岩觉路塞密竹使迳迷】

平阴张澄居士隐处三首

仁亭

无心经世?有道藏邱山【选诗曰世?婴我身】养生息天黥艺术印岁寒【庄子大宗师篇意而子曰庸讎知造物之不息黥而补我剡管子曰十年之计树之以木印谓验其信然必相符合也论语语岁寒然後知松柏之後凋】德人墙九仞强学窥一斑【庄子曰德人者居无思行无虑不藏是非善恶论语夫子之墙数仞书为山九仞礼记儒行曰夙夜强学以待问晋书王羲之传客曰此郎管中窥豹时见一斑】张侯大雅质结发闯儒关【大雅见前注李广传曰臣结发而与匈奴战董仲舒传曰太学贤士之关闯音丑甚反韵书注云马出门貌退之诗云闯然入其户三称天之言】奇羸或谐偶老大尝艰难【汉书食货志曰操其奇羸日游都市霍去病传曰常留落不耦左传曰险阻艰难备尝之矣诗意谓张君少年进取如射利者往往逢时遇合既老知世故之多艰遂絶意于仕进也】筑亭上云雨日月转朱栏【文选头陀寺碑曰层轩延袤上出云霓西都赋曰轶云雨于太半虹霓回带于棼楣】牀敷听万籁我家颇寛闲【宝积经偈云亦不为求天玉女及诸衣食牀敷事又云牀敷彩女资生具张拙颂云凡圣含灵共我家退之书曰耕于寛闲之野】牧牛有坦途亡羊自多端【传灯录大安禅师曰安在汾山三十年只看一头水牯牛若落路入草便牵出若犯人苗稼即鞭撻调伏既久可怜生受人言语如今变作个露地白牛常在面前终日露回回地赶亦不去也退之诗近来自说寻坦途犹上青云跨驂駟列子曰杨子之邻人亡羊既率其党又请杨子之竖追之杨子曰嘻亡一羊何追者之衆邻人曰多歧既反问获羊乎曰亡之矣曰奚亡之曰歧路之中又有歧焉吾不知所之故亡之也心都子曰大道以多歧亡羊学者以多方丧生楚词曰多端胶交庄子问臧何事则挟策读书问谷何事则博塞以游其为亡羊则一也】市声麀午枕常以此

心观【世故纷纭能乱人意以此心观之当不战而胜也汉书霍去病传曰合短兵鏖兰皋下注云世俗谓尽死杀人为鏖糟音意曹反】

复庵

春粮出求仁行李弥宇宙久客渺愁人马饥仆夫瘦【庄子曰适百里者宿春粮鲁论曰求仁而得仁行李见前注诗曰我马瘠矣我仆痛矣云何吁矣】归来一邱中万事不改旧【汉书叙传班嗣曰渔钓于一壑则万物不奸其志栖迟于一邱则天下不易其乐传灯录曰不改旧时人只改旧时行履处此诗大抵与後卷赠柳展如第八首同意】禾黍锄其骄牛羊鞭在後【甫田诗曰无田甫田维莠骄骄庄子曰养生者如牧羊视其後者而鞭之】隐几天籁寒六凿忽通透【庄子齐物论曰南郭子綦隐几而坐曰汝闻人籁而未闻地籁汝闻地籁而未闻天籁夫又外物篇胞有重?心有天游室谓虚空则妇姑勃谿心无天游则六凿相攘司马彪云谓六情攘夺】

亨泉

水德通万物?源会时亨伏坎非心愿成川且意行【易蒙卦曰山下出泉蒙子曰蒙亨以亨行时中也坎卦曰有孚唯心亨行有尚象曰唯心亨乃以刚中也东坡易传云所遇有难易然而未尝不志于通是水之心也物之窒我者有尽而是心无已则终必胜之故水之所以至柔而能胜物者惟不以力争而以心通也不以力争故柔外以心通故刚中刘禹锡诗腰斧上高山意行无旧路此借用】栖迟林邱下欲濯无尘缨【栖迟见前注老杜诗石门斜日到林邱孟子曰沧浪之水清兮可以濯我缨文选北山移文曰今见解兰缚尘缨沈休文新安江水诗曰纷吾隔泥滓岂假濯衣巾愿以潺湲水沾君衣上尘】杖藜逢载酒一瓢酌余清【庄子曰原宪杖藜而出汉书扬雄传曰时有好载酒肴从游从游学逸士传许由隐箕山以手捧水饮之人遗一瓢得以操饮选诗密林含余清】

留王郎【王纯亮字世弼山谷之妹壻见于黄氏世谱】

河外吹沙尘江南水无津【言南北相望之远文选谢灵运诗河洲多沙尘风悲黄云起书曰若涉大水其无津涯】骨肉常万里寄声何由频【角弓诗序曰骨肉相怨汉书赵广汉传曰界上亭长寄声谢我】我随简书来顾影将一身【诗曰畏此简书曹子建责躬表曰形影相吊五情愧赧资治通监晋李密言吾独立于世顾影无俦退之诗念汝将一身西来曾几年何晏行步顾影见魏志】留我左右手奉承白头亲【晋书邵续传续谏成都王颖讨长沙王又曰兄弟如左右手】小?王事略虫鸟声无人【小邦谓德平镇诗曰王事靡盐谢灵运诗虚馆絶诤讼空庭来鸟雀退之琴操曰四无人声】王甥解鞍马夜语鸡唤晨【尔雅曰姊妹之夫为甥】母慈家人肥女惠男垂绅【礼记礼运曰父子笃兄弟睦夫妇和家之肥也王介甫作鄞女墓志曰吾女生惠异甚按惠与慧同礼记玉藻曰童子之节也缁布衣锦缘锦绅又曰绅垂】有田为酒事豚酒及秋春【酒事谓麴蘖事见下茗事注礼记王制曰庶人春荐韭秋荐黍韭以卵黍以豚】生涯得如此旧学更光新【庄子曰吾生也有涯易大畜刚健笃实辉光

日新其德】索去何草草小留慰艰勤【老杜诗问君适万里取别何草草】百年才一炊六籍经几秦【百年一炊用邯郸梦事见前注文选东都赋曰盖六籍所不能谈李善注引封禅书曰六经载籍之传王介甫?州学记曰周道微不幸而有秦烧诗书杀学士然是心非独秦也当孔子之既有欲毁乡校者矣介甫又有桃源行曰天下纷纷经几秦】要知胷中有不与迹同陈【庄子曰机心存于胷中又天运篇老子曰六经先王之陈迹也岂其所以迹哉】郢人怀妙质聊欲运吾斤【庄子曰庄子过惠子之墓谓从者曰郢人垺漫其鼻端若蝇翼使匠石斲之匠石运斤成风听而斲之尽垺而鼻不伤郢人立不失容宋元君闻之召匠石曰尝试为我为之匠石曰臣则尝能斲之虽然臣之质死久矣自夫子之死也吾无以为质矣】

送王郎

酌君以蒲城桑落之酒【?信诗云蒲城桑落酒灞岸菊花秋按续古今注曰索郎酒桑落时美故因以为名齐民要术载酿桑落酒法亦以九月或云桑落河名非也杜诗坐开桑落酒】泛君以湘累秋菊之英【汉书扬雄作反骚曰钦吊楚之湘累注谓屈原赴湘死故曰湘累楚词曰夕餐秋菊之落英】赠君以黟川点漆之墨【黟音伊汉旧县今属歙州墨谱云江南黟歙之地有李廷珪墨尤佳廷珪本易水人唐末渡江居歙造墨有名萧子良答王僧?书云仲将之墨一点如漆】送君以阳关堕泪之声【王维诗劝君更尽一杯酒西出阳关无故人李商隐诗断肠声里唱阳关泪碑见晋书羊祜传】酒浇胸次之垒块【世说王逊问王忱阮籍何如司马相如忱曰阮籍胷中垒块故须以酒浇之言同相如唯有酒异庄子曰喜怒哀乐不入于胷次】菊制短世之颓龄【渊明诗菊为制颓龄班固幽通赋道修长而世短】墨以传万古文章之印歌以写一家兄弟之情【印如释氏所谓传佛心印诗曰以写我忧王仲宣诗冀写忧思情】江山千里俱头白骨肉十年终眼青【山谷此对极有妙处前辈多使之老杜诗别来头并白相对眼终青东坡云读书头欲白相对眼终青又曰身更万事已头白相对百年终眼青又曰看镜白头知我老平生青眼为君明又曰故人相见尚青眼新贵如今多白头又曰江山万里将头白骨肉十年终眼青其用青眼对白头非一而工拙各有异耳】连牀夜语鸡戒晓书囊无底谈未了【文选赵景真答嵇茂齐书曰鸡鸣戒旦则飘尔晨征颜师古注急就章曰有底曰囊无底曰橐世说卫玠与谢鲲达旦微言太白诗语笑未了风吹断】有功翰墨乃如此何恨远别音书少【选诗粲粲翰墨场】炊砂作糜终不饱【楞严经曰若不断修禅定者如蒸砂石欲成其饭经百千劫祇名热砂何以故此非饭本砂石成故世说曰宾客诣陈太邱使元方季方炊二人听客议论忘着算皆成糜佛书又云譬如说食终不能饱】镂冰文章费工巧【盐铁论曰内无其质而外学其文若画脂镂冰费日损工考工记曰工有巧】要须心地收汗马孔孟行世日杲杲【谓道义战胜胷中开明乃晓然见圣贤用心处史记晋世家文公曰矢石之难汗马之劳此复受次赏孟子曰子夏子张子游以有若似圣人欲以所事孔子事之曾子曰不可江汉以濯之秋阳以暴之皜皜乎不可尚已注曰秋阳周之秋夏之五月六月盛阳也皜皜甚白也皜音杲诗曰其雨其雨杲杲出日山谷答王雱书曰想以道义敌纷华之兵战胜久矣古人云并敌一向千里杀将要须心地收汗马之功读书乃有味】有弟有弟力持家妇能养姑供珍鲑【老杜同谷歌云有弟有弟在远方古乐府云健妇持门户南史?杲之传任昉戏曰谁谓?郎贫食鲑常有二十七种鲑音户佳反切韵曰鱼名出吴志】儿大诗礼女丝麻公但读书煮春茶【礼记曰治其麻丝】

次韵刘景文登邺王台见思五首【刘季孙字景文其父平死于赵元昊之难邺中记魏武于铜雀园立三台】

黄浊归大壑涟漪遶重城【郭璞注尔雅曰河所受渠多衆水溷淆宜其浊黄汉书谷永传黄浊四塞此借用其字列子曰勃海之东不知几亿万里有大壑焉不惟无底之谷名曰归墟八紘九野之水莫不注之诗曰河水清且涟漪】西风一横笛金气与高明【杜牧之诗深秋帘幕千家雨落日楼台一笛风汉书五行志曰金气病则木沴之老杜诗大火运金气荆扬不知秋刘禹锡秋萤引曰夜光寂寥金气静文选啸赋李善注引淮南子曰甯戚击牛角而疾商歌商金声清故以为曲王逸注楚辞九辩曰秋天高朗气清明也】归鸦度晚景落鴈带边声【老杜诗轻鸟度层阴又诗边秋一鴈声文选李陵书曰边声四起】平生知音处别离空复情【知音见後篇注老杜诗远送从此别青山空复情谢朓诗婵娟空复情】

旧时刘子政憔悴邺王城把笔已头白见书犹眼明【汉书刘向字子政用以比景文寰宇记故邺城在相州邺县东魏武帝受封于此呼为北都】平原秋树色沙麓暮钟声【用老杜寄李白诗渭北春天树江东日暮云句律平原今德州山谷是时监德州德平镇寰宇记沙麓在魏州元城县东即汉书元后传王翁儒徙居之地今为北京与相州相接】归鴈南飞尽无因寄此情【管子曰桓公曰鸿鴈春北而秋南不失其时楚辞曰鴈鹺鹺而南飞汉书苏武传天子射上林中得鴈足有系帛书老杜诗相忆无南鴈何时有报章】

系匏两相忆极目十余城【系匏见鲁论文选古诗云上有长相忆楚辞曰目极千里兮伤春心按德与相俱在河北汉书吾邱寿王传曰连十余城之守】积潦干斗极山河皆夜明【刘禹锡诗积潦搜山趾司马相如子虚赋曰上干青云杜牧诗觚棱拂斗极左传曰恒星不见夜明也】白璧按剑起【汉书邹阳传曰明月之珠夜光之璧以暗投入于道衆莫不按剑相盼者何则无因而至前也】朱弦流水声【记曰朱弦疏越一唱而三叹有遗音者矣吕氏春秋伯牙鼓琴意在山锺子期曰巍巍乎意在水子期曰汤汤乎锺期死白牙遂絶弦以世无知音】乖逢四时尔木石了无情【达人之于穷通犹木石之于寒暑初无喜愠也庄子曰古之得道者穷亦乐通亦乐所乐非穷通也道得于此则穷通为寒暑风雨之序矣乐天李夫人诗曰人非木石皆有情名士传曰阮籍了无愧色】

茗花浮曾坑【陆羽茶经云沫饽者汤之华也华之薄者曰沫厚者为饽轻细者曰花东坡和曾仲锡诗云君家新致雪坑茶自注云近得曾坑茶】酒泛酌宜城【周礼酒正泛齐注曰泛者成而滓浮泛泛然如宜城醪矣疏云宜城说以为地名故曹植酒赋曰宜城醴醪苍梧缥清刘杲以为酒名未知孰是】路寻西九曲【此篇以末句考之盖追记汴京州西旧游而此句述其经之地按宋次道东京记阊阖门门外福昌坊有九曲子巷山谷所指或当谓此】人似汉三明【後汉段颎传颎字纪明与皇甫威明张然明并知名显达京师称为凉州三明赞曰山西多猛三明俪踪】千户非无相【後汉班超诣相者相者曰燕颌虎头飞而肉食万里侯相後封定远侯景文将家子故用三明及此事】五言空有声【退之石鼎聯句序曰校书郎侯喜新有能诗声】何时郭池晚照影写间情【蜀中旧本双井前集絶句中有景文见招会宿州西郭园诗文选王仲宣诗曰日暮游西园冀写忧思情曲池扬素波列树敷丹荣陶渊

明有间情赋此借用其字】

公诗如美玉未嫁已倾城【汉书李夫人传李延年歌曰北方有佳人絶世而独立一顾倾人城再顾倾人国】嫁作荡子妇寒机泣到明【言其中年之诗多哀伤也选诗曰昔为倡家妇今为荡子妇北梦琐言徐月英送人诗云枕前泪与堦前雨隔个间窗滴到明唐人吴融作寒机晓犹织赋此引用】绿琴蛛网徧弦絶不成声【傅休奕琴赋序曰蔡邕有绿绮琴天下名器也玉台新咏徐悱赠内诗曰网虫生锦荐礼记檀弓子夏既除丧而见予之琴弹子而不成声】想见鸱夷子江湖万里情【言未逢知己也杜牧之诗西子下姑苏一舸逐鸱夷史记载范蠡佐越王既霸乃乘扁舟浮江湖自号鸱夷子】

次韵吴宣义三径怀友

佳眠未知晓屋角闻晴哢【王羲之帖云向宅上静佳眠都不知足下来门太平广记郑交谒友人于陈蔡路逢一冢有竹两杆郑为诗曰冢上两杆竹风吹常裊裊冢中人賡之曰下有百年人长眠不知晓又古诗春眠不觉晓处处闻啼鸟老杜诗红稠屋角花退之诗鸟哢正交加】万事颇忘怀犹牵故人梦【老杜梦李诗曰故人入我梦明我我常相忆又诗春渚日落梦相牵】采兰秋蓬深汲井短绠冻【香草蔽于蓬艾冽井穷于短绠言荐引之难也老杜诗君不见才士汲引难恐惧弃捐忍羁旅又诗露井冻银牀庄子绠短不可以汲深】起看冥飞鸿乃见天宇空【法言曰鸿飞冥冥弋人何慕焉选诗曰昭昭天宇濶】甚念故人寒谁省机与综【史记范睢传须贾曰范叔一寒如此哉又云云以?恋恋有故人之意韵书曰综机缕也】在者天一方日月老宾送【文选苏子卿诗曰良友远离别各在天一方书尧典曰寅宾出日寅饯纳日注云宾导也饯送也】往者不可言古柏守翁仲【水经注曰鄆南千秋亭坛庙之东枕道有两石翁仲南北相对又按魏志明帝景初元年铸铜人二号曰翁仲此引用言冢间石人也】

送刘季展从军鴈门二首【鴈门今代州】

刘郎才力耐百战苍鹰下鞬秋未晚【东观汉记曰赵勤字孟卿太守桓虞署为督邮于是贪令自责还印绶去虞叹曰善吏如使良鹰下鞬命中】千里荷戈防犬羊十年读书厌藜苳【诗曰荷戈与殳文选刘越石表曰敢肆犬羊南史沈攸之曰早知穷达有命恨不十年读书退之诗肠肚集藜苳】试寻北产汗血驹莫杀南飞寄书鴈【两句皆用鴈门事左传曰冀之北土马之所生史记苏秦传说秦惠王曰北有代马老杜诗骅骝作驹已汗血後汉书王符传有以货得鴈门太守者皇甫规问卿前在郡食鴈美乎老杜诗汝休枉杀南飞鸿史记汉使谓单于曰天子射上林中得鴈足有系帛书】人生有禄亲白头可能一日无甘饌【礼记内则曰由命士以上父子皆异宫昧爽而朝慈以旨甘谓有亲而不可无甘旨之奉也礼记云七十非囫不饱一日无甘饌之句非取此意耶】

石趺谷中玉子瘦金刚窟前药草肥【寰宇记仙人山在代州五台县东南石岩上有人坐迹山腹石上有手迹山下石上有双脚迹皆西向立张天觉清凉传曰梦游五台山金刚窟按寰

宇记五台山在代州五台县东北内经以为清凉山东坡送天觉河东提刑诗曰西登太行岭北望清凉山余光入岩石神草出茅菅能令坠指儿虬须茁水顔又有诗曰凭君说与埋轮使速寄长松作解嘲皆谓此草也】仙家耕耘成白璧道人煮掘起风痲绦囊璀璨思盈斗竹畚香甘要百围【搜神记曰阳雍伯尝设义浆以给行旅一日有人饮讫怀中取石子一斗与之曰此可生美玉遂得白璧一双痲音肥韵书曰风病也百围谓百束】到官莫道无来使日日北风鸿鴈归【老杜诗门问平安无使来礼记仲秋之月鸿鴈来】

题宛陵张待举曲肱亭

仲蔚蓬蒿宅宣城诗句中【三辅决録注曰张仲蔚平陵人所居蓬蒿没人渊明诗曰仲蔚爱穷居遶宅生蓬蒿齐书谢朓为宣城郡守善诗文选赠答诗中多有朓宣城所作宛陵即今宣州故用此事】人贤忘巷陋【论语子曰饭疏食饮水曲肱而枕之乐亦在其中矣亭名盖取之山谷此句使顔子在陋巷一簞食一瓢饮不改其乐夫子曰贤哉回也事盖用此以尽曲肱之意】境胜失途穷【晋书阮籍传率意独驾不由径路车迹所穷辄恸哭而反顔延之五君咏曰途穷能无恸此借用】寒菹书万卷零乱刚直胸【言胷中所有惟蔬饭与书相杂新序楚惠王食寒菹而得蛭因吞之】偃蹇勲业外啸歌山水重【後汉蔡邕传董卓曰我力能族人蔡邕遂偃蹇者不旋踵矣晋书谢鲲曰犹不废我啸歌啸歌字出毛诗其啸也歌】晨鸡催不起拥被听松风【姚嗣宗诗崆峒山叟笑不语静听松风春昼眠南史陶弘景特爱松风】

山谷内集诗注卷一

山谷内集诗注卷二

钦定四库全书

山谷内集诗注卷二 宋 黄庭坚 撰

任渊注

寄裴仲谔

交游二十年义等亲骨肉【礼记曰交游称其信也退之诗譬如亲骨肉宁免相可否按吕氏春秋曰父母之于子也此之谓骨肉之亲老杜诗义均骨肉地】风雨漂我巢公亦未有屋【鵲诗子室翘翘风雨所漂摇笺云巢之翘翘而危其以所杖条条弱也】寄声来问安足音到空谷【汉书赵广汉传曰寄声谢我礼记文王世子问内竖之御者曰今日安否何如庄子曰逃虚空者闻人足音跂然而喜诗曰在彼空谷】我家犂犢下薪桂炊白玉【司马迁曰侍罪犂犢下战国策苏秦曰使臣食玉炊桂张志和曰樵青□薪兰苏□竹里煎茶】在官与影俱衣绽髮曲局【曹子建上责躬诗哀曰形影相吊绽音犬茆切衣缝解也采绿诗曰予髮曲局】天机行日月春事勤草木【文选潘安仁诗曰曜灵速天机四节代逐浙注云曜灵曰也故庄子曰天其运乎地其处乎日月其争于所乎孰主张是孰维纲是孰居无事而推行是意者有机緘而不得已耶意者其运转而不能自止耶老杜诗溪边春事幽】念公驾行李野饭中道宿【说文云□马行顿迟左传曰亦不使一介行李告于寡君注云行李行人也又曰行李之往来供其乏困】惊沙卷旂旗乌尾城角谿【一作乌尾讹城角文选王子渊四子讲德论曰甲士寝而旂旗仆又魏都赋曰旂旗□茎按旂舆旂同後汉灵帝纪注云恒帝之初京都童谣曰城上乌尾毕逋仪礼士虞□曰祝入口杀注云□起也音□老杜诗城头乌尾讹】骚骚家治具夫子且归沐【言治□之勿□也礼记檀弓曰□骚□则□注谓太疾汉书灌夫传曰魏其夫妻治具注谓辨具酒食万石君传曰□五日洗沐归□□】作书寄後乘为我遣臣仆【孟子曰後车数千乘书曰我罔为臣仆】起居太夫人并问相与睦【元注云相睦儿女名○老杜诗起居八座太夫人按後汉书岑彭传曰大长称以朔望问太夫人起居汉书文帝纪注云列侯妻称夫人列侯死子复为列侯乃得称太夫人相字□然小字小□睦行第三十三後嫁舒城李□□文伯】

寄黄几复【元注云乙丑年德平镇作】

我居北海君南海寄鴈传书谢不能【山谷尝有跋云几复在广州四会子在德州□平镇皆海滨也按輿地广记四会□属广州熙宁六年割隸端州此诗元丰末所作犹云广州□欲表见南海之意尔山谷古诗亦云四会有黄今左传曰君处北海寡人处南海惟此风马牛不相及也刘禹锡诗谪在三湘最远州边鸿不到水南流按楚辞招鬼巫阳曰谢不能王逸注颇失其义若汉书项籍传陈婴谢不能则此诗所用之意】桃李春风一杯酒江湖夜雨十年灯【两句皆记忆往时游居之乐今既十年矣晋书张翰传曰使我有身後名不如即时一杯酒】

持家但有四立壁治病不蕲三折肱【汉书司马相如传曰家徒四壁立左传齐高疆曰三折肱知为良医此□用言其□諫世故不待困而後知也】想得读书头已白隔溪猿哭瘴溪藤
【东坡诗读书头欲白相对眼终青老杜诗殊方日□玄猿哭故国霜前白鴈来四会在广东故云瘴溪】

神宗皇帝挽词三首

文思昭日月神武用雷霆【尧典曰钦明文思易曰神武而不杀】制作深垂统忧勤减梦龄
【礼记曰周公制礼作乐孟子曰君子创业垂统为可继也礼记文王世子篇武王曰梦帝与我九龄文王曰我百尔九十吾与尔三马注云文王以忧勤损毒】孙谋问二圣末命对三灵
【诗曰诒厥孙谋以燕翼子二圣谓宣仁太后哲宗皇帝无结中兴颂曰二圣重欢书顾命曰导扬木命文选班固典引曰答三灵之□社李善注三灵谓天地人出春秋元命苞】今代谁班马能书汉简青
【班马谓迁固乐天行韩愈制曰立词□□有班马之风後汉吴佑传注曰杀青者以火炙简令汗取其青易书後不蠹谓之杀青亦谓之汗简】

钓筑收贤辅天人与圣能【钓筑谓起王介甫于金陵如得吕望传说杜牧华清宫诗曰□筑乘时用易曰人拙鬼谋百姓与能钓筑用太公钓□传说筑傅岩事盖言帝用人如商高宗周文王也】辉光唐六典度越汉中兴百世神宗庙千秋永裕陵【元丰三年初改官制至五年颁行上句谓官制一新有光于唐之六典下句言政事法度过于汉宣帝中兴也大典唐明皇时所撰李林甫等所注盖一代官制也书酋载明皇敕曰法以周令作为唐典取诸简易所贵易後汉书宣帝赞曰功光祖宗业垂後嗣可谓中兴侔德商宗周宣矣扬雄传赞曰则必度起诸子矣永裕神宗陵名】帝乡无马迹空望白云乘【左传曰周穆王周行天下将必有车辙马迹庄子曰千岁厌世去而上僊乘彼白雪至于帝乡】

昔在基皇极师臣论九畴【师臣亦谓王介甫以武王访箕子比之也洪范曰皇建其有极又曰天乃錫禹洪范九畴】丘陵忽为谷天地不藏舟【上句言丘山之颓人将安仰下句言大化推移有形者所不得遽然圣人未尝□其存也诗曰高岸为谷深谷为陵庄子曰藏舟于壑藏山于泽谓之固矣然而夜□有力者?子而走昧者不知也藏小大有宜犹有所遽若夫藏天下于天下而不得所遽是恒物之大□也故圣人将游于物之所不得遽而皆存】河洛功无憾幽燕策未收【神庙元丰二年四月命宋用臣导洛通汴以代河渠谓之清汴漕挽遂无留滞尝有敢复幽燕之谋既开端绪而未收功也张舜民小说云神庙于崇政殿後说二十四库以储金帛诸路分将置都作院河北设五都仓讲好高丽然功未施而上宾是天未欲幽蓟之民归中国乎】嗣皇朝万国任姒正兴周【嗣皇谓哲宗初立任姒谓宣仁太后垂帘听政思齐诗曰思齐太任文王之母思媚周姜京室之妇太如嗣徽音则百斯男】

王文?公挽词二首【王珪字□玉实录有传】

先皇凭玉几末命寄元勳【谓神庙顾托书顾命曰皇后凭玉几导扬末命後汉书陈俊传注赐□璽书曰将军元勳大着元丰八年春神庙寝疾二月珪于御榻前请建东宫三月甲午立

哲宗为皇太子戊戌珪宣遗制皇太子郎皇帝位事具实録】宾日行黄道攀髯上白云【上句谓策立哲宗下句谓未几而公亦薨也克典曰□宾出日注云宾道也晋天文志曰黄道日之所行王介甫作□□公晚诗云□扶日毂上天衢汉郊祀志曰黄帝铸鼎于荆山下既成有龙垂胡髯下迎黄帝黄帝上骑羣臣後宫後上龙七十余人小臣不得上乃思持龙髯白云见前注】四时成岁律五色补天文【上句书藏用下句言补袞庄子曰四时殊气天不私故岁成五官殊职君不私故国治此备用列子曰女娲鍊五色石以补其阙】不谓堂堂去今为马鬣坟【堂堂见鲁论薛能诗青春背我堂堂去礼记檀弓曰从若斧者焉马鬣封之谓也注云封筑土为垄】

宥密深黄阁光辉极上台【昊天有成命诗曰夙夜基命宥密注云宥寬密宁也行寬仁安静之政然前华多作机密用之沈约宋书曰朱门洞启当阳之正色三公与天子礼秩相亚故黄阁以示谦晋书天文志西近文昌三星曰上台】藏舟移夜壑华屋落泉台【舟见注曹子建诗生存华屋处零落归山丘刘禹锡酬乐天诗曰华屋坐来能几日夜台归去便千秋李台佑哭韦给事诗仁兄与思旧想尔泣泉台】雨紉谁为挽寒笳故作哀【仪礼曰吊于葬者必执引若从柩及□皆执□注云庙中曰紉在涂曰引庾中丞昭君词曰朔障裂□笳韩退之诗逾染下坂笳鼓咽老杜吹笛诗故作发声微】伤心具瞻地无复袞衣来【节南山诗赫赫师尹民其尔瞻九□诗曰是以有袞衣兮无以我公归兮注云谓成王所□来袞衣】

谢送碾壑源拣芽

霤云从龙小苍璧元丰至今人未识【西京杂记曰云外赤内青谓之霤云云二色曰霤亦瑞云也霤音以律反易曰云从龙按张舜民小说云 宁末神庙有旨下建州制密云龙其品又高于小團】壑源包贡第一春緇奩碾香供玉食【第一春谓元丰元年建州茶以北苑壑源为上沙溪为下书曰厥色橘柚锡贡洪范惟碎玉食】睿思殿东金井栏甘露荐椀天开顔【睿思盖神宗便殿有垂拱殿後太白诗络纬秋啼金井栏按载延之西征记曰太极殿上有金井栏金博山鹿庐蛟龙负山于井上陆羽顾眉山记载王智深宋録曰□□王子尚访昙济道人于八公山道人授茶茗子尚味之曰此甘露也何言茶茗曰老杜诗天顔有喜近臣知选诗开顔披心胷】桥山事严庀百局补袞诸公省中宿【史记黄帝葬桥山注曰桥山在上郡此句谓作神宗裕陵也孟子注曰事严丧事急左传曰官它其司补袞见前注老杜诗诸公袞袞登台省魏都赋曰禁台省中连閤对廊】中人传赐夜未央雨露恩光照宫烛【庭燎诗曰夜如何其夜未央蓼萧笺曰露者天所以润万物喻王者恩泽不为远则不及也老杜诗气得神仙迴恩承雨露低退之诗宫烛殢山醒按周礼官正日宫中庙中则执烛】右丞似是李元礼好事风流有涇渭【右丞谓李浦臣後汉书党锢传序学中语曰天下模楷李元礼元礼名膺事具本传留书王微之传曰似是马曹老杜诗偶坐似是商山翁好事见孟子及汉书扬雄传风流谓得前贤之流风遣俗故前汉书赵充国传赞曰风声气俗自古而然今之歌謡慷慨风流犹存耳嵇康琴赋亦曰体制风流莫不相袭而李善注引淮南子及仲长统昌言似非佳语善又注沈休文所作谢灵运传论曰在下祖习如风之散如水之流尽此两字或美或恶随所用之意何如耳任彦昇诗伊人有涇非余扬浊清按谷风谷注曰涇渭相入而清浊异】肯怜天禄校书郎亲敕家庭遣分似【汉书扬雄传校书天?阁上敕□武敕也退之诗曰写吾此

诗持送似】春风饱识大官羊不惯鹰儒汤饼肠【春风谓茶团史职官志大官令属光?寺掌膳羞割烹之事老杜诗百年麤粝腐儒餐又云老树饱经霜汉纪高祖曰腐儒几败乃公事】搜搅十年灯火读令我胷中书传香【卢仝茶歌曰三椀搜枯肠惟有文字五千卷退之诗曰炎风曰搜搅南史沈攸之传曰早知穷达有命恨不十年读书退之诗灯火稍可亲简编可卷舒北史崔?传郑伯猷叹曰?中贮千卷书使人那得不畏服史记赵奢传曰括徒能读其父书传】已戒应门老马走客来问字莫载酒【庄子曰杖藜而应门晋李密陈情表曰内无应门五尺之童文选司马迁书曰太史公牛马走李善浊曰走犹仆也言为太史公掌牛马之仆汉书扬雄传刘?尝从雄学作奇字又曰时有好事者载酒肴从游李业】以小团龙及半挺赠无咎并诗用前韵为戏【谈苑曰建州茶氏氏别令取其乳作片或别曰?挺】

我持玄圭与苍璧以暗投人渠不识【书曰禹锡玄圭周礼曰以苍璧礼天柳子原新茶诗圆方丽奇色圭璧无?瑕暗投见邹阳传具前注渠犹胷人言供芼梁陈以来语庾信时有无事教渠更相失之句老杜忆弟诗亦云吟诗正?渠】城南穷巷有佳人不索宾郎常晏食【佳人谓无咎山谷後诗有云城南晁正字南史刘穆之少贫好往妻兄江氏家乞食食卑求宾郎江氏戏之曰宾郎消食君乃常饥何忽须此穆之为丹阳令乃令厨人以金拌贮宾郎一斛以进妻兄弟战国策顔?曰晚食以当肉】赤铜茗椀雨班班银粟翎光解破顔【韩孟聯句曰茗椀纖纤捧欧阳公诗轻寒漠漠侵驼褐小雨斑斑作燕泥银粟谓茗花老杜诗将军且莫破愁顔乐天诗一放狂歌一破顔】上有龙文下碁局探囊赠君诺已宿【碁局谓团茶下隐隐有此文盖箴痕也庄子曰肱篋探囊此借用其字鲁论曰子路无宿诺】此物已是元丰春先皇圣功调玉烛【易蒙卦曰蒙以养正圣功也尔雅曰四时和谓之玉烛注云道光照】晁子胷中开典礼平生自期莘与渭【易系辞曰观其会通以行其典礼此借用言典章文物开陈于胸次也孟子曰伊尹耕于有莘之野史记齐世家西伯遇太公于渭之阳老杜诗自比稷与與】故用浇君磊隗胸莫令鬢毛雪相似【浇胷见前注老杜诗更忆鬢毛斑退之诗两鬢白趋埃尘割鬢禹锡诗今宵帝城月一望雪相似】曲几团蒲听煮汤煎成车声绕羊肠【柳子厚有斩曲几文王介甫诗独坐隐团蒲文选魏武苦寒行曰羊腸阪诘曲车轮为之摧注引吕氏春秋九山曰太行羊肠其山盘纒如羊肠在太原晋阳北乐天诗梦寻来路绕羊肠王立之诗话曰东放见山谷此句云黄九恁地怎得不穷故晁无咎复和云车声出鼎统九盘如此佳句谁能识】鷄苏胡麻留渴羌不应乱我官焙香【本草水苏一名鷄苏胡麻一名巨胜东坡云即今油麻也俗人煮茶多以此二物杂之拾遗记曰晋有羌人姚馥但言渴于酒羣辈呼为渴冕】肥瓠瓠鼻雷吼幸君饮此勿饮酒【蜀志张裔传雍闻假鬼教曰张府君如瓠壶外虽泽而内实麤退之石鼎聯句序曰道士倚墙鼻息如雷鸣元稹诗鼻息吼春雷】

和答外舅孙莘老

西风挽不来残暑推不去【晋书邓攸传吴人歌曰?如打五鼓鷄鸣天欲曙邓侯挽不留谢令推不去】出门厌鞢?税驾喜巾履【史记李斯曰吾未知所税驾方言曰仓车曰税老松诗松下丈人巾履闲偶坐似是商山翁柳子厚诗室空无侍者巾履喜挂壁】道山邻日月清樾深牖户【道山见前注邻日月谓在天上字林曰樾树阴也淮南子曰盥汗交流喘息薄喉当此之时休樾下则脱然而喜矣注云楚人树上大本上如车盖状为樾言多?也诗曰绸缪牖户

】同舍多望郎间官无窘步【汉书直不疑传误持同舍郎金去□□作康郎中志曰驾行望郎锦川星使离□日何桀纣之披褐兮夫唯捷经以窘步注云窘急也刘禹锡诗悠悠关塞内来往无间步此反而用之】少监岩壑姿宿昔廊庙具【晋书谢缙传曰或问论者以君方庾亮何如答曰端委庙堂使百僚準则缙不如亮一丘一壑自谓过之谢灵运诗岩壑?耳目阮嗣宗诗宿昔同衣裳老杜诗当今廊庙具创夏岂云缺】行趋补衮职黼黻我王度【补衮见後注谓作谏议黼黻盖衮衣之章王度亦见後注】归休饮热客觴豆愆调护【庄子许由曰归休乎君子无所用天下为此借用以言休假啓顔録程季明有嘲热客诗曰今代痴隐子触热到人家礼记曰七十觴酒豆肉汉书张良传曰烦公幸卒调护太子此亦借用】浩然养灵根勿药有神助【孟子曰我善养吾浩然之气太玄经曰藏心于渊□厥灵恨易曰无妄之疾勿药有喜老杜诗诗应有神助】寄声旧僚属训诂及七箸【如古诗上有加餐食之意汉书赵广汉传曰界上亭长寄声谢我蜀志先主传曰先主方食失匕箸】尚怜费谏纸玉唾洒新句【乐天诗月慙谏纸二百张岁愧俸钱三十万玉唾见前注】北焙碾玄璧谷帘煮甘露【北焙即建溪高品文选刘越石诗握中有玄璧乃自荆山璆张又新煎茶水记云陆羽以庐山康王谷水第一陈舜俞庐山记曰康王谷有水帘飞泉被岩而下甘露见前注】何时临书几剥芡谈至暮【韩信传大王乃肯临臣退之诗水果剥菱芡东观汉记曰尹敏舆班彪相厚每相与谈常晏暮不食昼即至冥夜彻旦世说孙安国往殷中军许共论往反精苦宾主遂至暮忘食】

次韵定国闻子由卧病绩溪

炎洲冬无水十月雷虺虺【东方朔十洲记曰炎洲在南海中此借用绩溪隶歙州盖江南之地左传襄公二十八年春无水梓慎曰今兹宋郑其饥乎终风诗曰虺虺其雷注曰暴若震雷之声虺虺然】及春疟疠行用人祭非鬼【老杜诗疟疠三秋孰可忍按周礼疾医曰四时皆有疠疾注谓气不和之疾用人盖楚俗如此左传所谓宋公使邾文公用一子于次睢之社注谓杀人而用祭也鲁论曰非其鬼而祭之谄也】巫师司民命药石不入市【退之遣疟鬼诗诅师毒口牙古作霹?飞符师弄刀笔丹墨交横挥史记扁鹊传曰其在骨髓虽司命无奈之何此借用周礼曰髀髀薛暴不入市】溪弩潜发机土风甚不美【博物志曰江南山谿水中有射工虫长一二寸口中有弩形气射人影不治则杀人传曰千钧之弩不为鼯鼠而发机左传锺仪乐操土风荀子曰人情甚不美】苏子卧江南感叹中夜起闻道病在牀食鱼不知旨【陆士衡诗中夜起叹息老杜诗中夜起坐万感集又诗身欲奋飞病在?按李令伯表曰刘夙婴疾病常在牀蓐刘子曰人之将疾者必不甘鱼肉之味学记曰虽有嘉肴弗食不知其旨也】寒暑战胷中土穷有如此【老杜诗寒热百日相交战韩非子喻老篇子夏曰两者战于胷中未知胜负故臞此借用礼记儒行曰其特立有如此者】此公天机深爵禄心已死【庄子曰嗜欲深者天机浅此反而用之列子曰黄帝与容成子居空桐之上同斋三月心死形废】养生遗形骸观妙得骨髓【庄子曰外其形骸文选何敬祖诗曰奚用遗形骸忘筌在得鱼老子曰常无欲以观其妙传灯録達磨传谓门人道育得吾骨慧可得吾髓】后皇蒔嘉橘中岁多成枳【土不变于熙丰者鲜矣楚辞橘颂曰后皇嘉树橘徕服兮受命不迁生南国兮注言橘受命于江南不可移徙种于北地则化而为枳也考工记曰橘踰淮而北为枳东京赋曰蓂莢为难蒔也故旷世而不覩】佳人何时来为天启玉齿【楚辞曰闻佳人兮召予神异经曰玉

女投壶天为之笑则电故老杜诗曰每蒙天一笑长使物皆春郭璞游仙诗曰灵妃顾我笑粲然启玉齿】湔祓瘴雾姿朝趋去天咫【战国策汗明说春申君曰今仆居鄙俗之日久矣君独无湔祓仆也退之诗才开还落瘴雾中左传曰天威不违顔咫尺唐书城南韦杜去天尺五】诸公转洪钧国器方荐砥【老杜谓八荒开寿域一气转洪钧汉书王褒颂曰贤者国家之器用也所任贤则趋舍省而功施普器用利则用力少而就效衆故工人之用钝器也劳筋苦骨终日矻矻及至巧冶铸干将之朴清水淬其锋越砥斂其锷水断蛟龙陆剗犀革忽若汜画涂】矢诗写予心庄语不加绮【诗云矢诗不多维以遂歌文选张茂先诗写心出中诚庄子曰以天下谓沈浊不可与庄语佛氏口之四业有所谓妄言绮语退之城南联句亦云绮语洗晴雪】

次韵子由绩溪病起被召寄王定国【苏子由乐城集中有答王定国问疾诗云五年甯南荒顽质不伏病即此韵也】

种萱盈九畹苏子忧国病【嵇叔夜养生论曰合欢蠲忿萱草忘忧离骚曰予既滋兰之九畹注云十二亩为畹此句言种萱虽不多足以解苏子之忧盖所忧在天下也文选江淹拟潘岳诗曰消忧非萱草永怀寧梦寐】炎蒸卧百战山立有余劲【老杜诗吾曰抱疾病家贫卧炎蒸又诗疟疔三秋孰可忍寒热百日相交战孙子曰百战百胜非善之善者也礼记玉藻曰山立时行选诗曰石梁有余劲】斯人廊庙器不合从远屏【蜀志许靖传评曰蒋济以为大较廊庙器也礼记曰屏之远方毆阳公表曰乱国之谗已蒙于远屏】江湖摇归心毛鬓侵老境【左传曰三国败诸侯之师乃摇心矣又史记苏秦传曰心摇摇然如县旌而无所终薄礼记曰六十耆指使疏引贺场云耆至也至老之境也杜诗人生五马贵莫受二毛侵】艰难喜归来如晴月生岭【春秋昭公元年书季子来归公羊传云其曰来归何喜之也初晴之月人所喜见渊明诗素月出东岭礼记日月生于西】仍怀阻归舟风水蛟鳄横【选诗天际识归舟老杜诗云蛟横出清泚又诗蛟螭深作横】补袞谏官能用儒吾道盛【诗曰袞职有阙维仲山甫补之唐垂拱二年置补袞二员掌供奉讽谏扬子曰如用真儒无敌于天下论语曰参乎吾道一以贯之】上书诋平津蠹藁初记省【汉书汲黯传面触公孙弘徒怀诈饰智以阿人主取容按弘封平津侯又息夫躬传上疏历诋公卿大臣王介甫执政领三司条例上以子由为之属介甫欲遣八使子由以书抵介甫及陈杨叔指陈其决不可者且请补外介甫大怒将加以罪阳叔止之奏除河南推官会张文定知淮阳以学官辟云事见颍滨遗老传】至今民社计非事颊舌竞【鲁论曰有民人焉有社稷焉易咸卦之上六曰咸其辅颊舌象曰滕口说也汉书张良传曰此难以口舌争】方来立本朝献纳继晨暝【易困卦曰朱紱方来注谓能招异方此用其字言自远方来也孟子曰立乎人之本朝班固两都赋序曰日月献纳】人材包新旧王度济寛猛【新旧谓欲兼用 丰人材也嘉佑治平之政近于寛熙宁元丰之政近於猛要当相济易泰卦曰包荒用冯河左传曰思我王度式如玉式如金又曰寛以济猛猛以济寛政是以和王直方诗话云先生尝有诗云人材包新旧王度济寛猛建中初又曰闭奸有要道新旧随宜收又云不须要出我门下实用人材是至公大抵言朝廷用人也】必开曲突谋满慰倾耳听【汉书霍光传人为徐生上书曰客有过主人者见其竈直突傍有积薪客谓主人更为曲突远徙其薪不者且有火患汉书伍被传曰天下引领而望倾耳而听】斯文吕与张泉下亦苏醒【吕谓中丞吕海献可张谓监察御史里行张戡天祺按实録王安石传吕

海刘述刘琦钱颢孙昌龄范纯仁吕公着孙觉李常胡宗愈张戢王子韶陈襄程颢皆论列变法非是以次罢去山谷诗意谓元佑初召用诸人而献可天祺皆前死矣然朝廷选用谏官时政一新亦可伸其愤懣之气于泉下也献可熙宁四年五月卒天祺亦相继亡老杜诗斯文崔魏徒以我似班扬淮南子注云泉下有黄垆山退之作王适墓志曰栲垢爬痒民获苏醒】天聪四门辟国势九鼎定【书说命曰惟天聪明惟圣时宪舜典曰辟四门達四聪史记周纪太史公曰武王营洛邑成王使召公卜居居九鼎焉左传曰武王定鼎于洛邑】身得遭太平分甘守闲冷【山谷自记也退之诗太平时节身难遇孟子曰分定故也晋书谢道韞曰为天分有恨耶分字盖如此】天津十年面想见顾而整【谓子由也剧谈錄裴晋公度微时羈寓洛中尝乘蹇驴入皇城方上天津桥时淮西不庭已数年矣有二老人傍桥柱而立云适忧蔡州未平须待此人为将仆者闻之具述其事裴公曰见我龙锺相戏耳其後竟平淮西诗曰猗嗟昌兮顾而长兮注云顾长貌整谓秀整见後注】何时及国门休暇过茗【屈原九章哀郢曰出国门而轸怀其字本出周礼元结醉歌序曰因休暇则载酒于湖上】烧灯留夜语鸿鴈看对影【对影谓东坡老杜诗鸿鴈影来连峡内太白诗对影成三人此借用】但恐张罗地颇复多造请【汉书郑当时传曰先是下邳翟公为廷尉宾客亦填门及废门外可设雀罗张汤传造请诸公不避寒暑】维此礼部公寒泉整旧井谪去久羸瓶召还汲修绠【东坡元丰八年秋召为礼部郎中易井卦曰汔至亦未繙井羸其瓶凶初六曰井泥不食旧井无禽九五曰井冽寒泉食太史公屈原传亦引此说退之诗曰汲古得修绠】太任决斋宫陛下天统庆【太任谓宣仁思齐诗曰思齐太任文王之母汉书刑法志曰宣帝常幸宣室斋居而决事陛下谓哲庙汉书高帝纪赞曰协于火德自然之应得天统矣蔡邕曰羣臣与天子言不敢指斥呼陛下者言因卑達尊之息也】日月进亨衢经纬寒耿耿【日月以言二圣易曰何天之衢亨老杜诗曰日月继高衢单襄公曰经纬不爽文之象也选诗云秋河曙耿耿】西走已和戎南迁无哀郢【和戎谓不用兵于西夏左传魏绛曰和戎有五利无哀郢谓迁客皆还也楚辞屈原九章有哀郢曰去故乡而孰远兮遵江夏以流亡又曰楫齐扬以容与兮哀见君而不再得郢盖楚所都也】谁言两逐臣朝簪天街并【文选君子行曰逐臣尚何有字本出法言晋书天文志曰昴畢之间为天街按实錄元丰八年子由自绩溪召还为右司谏而东坡亦以是时被召此句盖喜二年得还朝】王子窜炎洲万死保躯命【王子谓定国炎洲谓岭表东方朔十洲记曰炎洲在南海中此借用言定国尝谪宾州柳子厚诗万死投荒十二年】还家颊故红信亦抱渊静【东坡与定国书曰君实尝云王定国瘴烟窟里五年面如红玉不知道能如此乎山谷後诗有遥怜鬢綠之句亦同此意文选谢灵运诗曰兼抱济物性庄子曰抱神以静形将自正又曰其居也渊而静】税屋待车音扫门亲帚柄【文选曹子建应诏书曰爰暨帝室税此西墉李善注曰税犹舍也孟子曰百姓闻王车马之音扫门用汉书魏勃事淮南子曰慧出而授殷人其柄】行当怀书传载酒求是正【载酒见前注後汉安帝纪诏五经博士是正文字】端如尝橄榄苦过味方永【毆阳公诗又如食橄榄真味久愈在王立之诗话曰毆阳公谓梅圣俞诗始读之则叹莫能及後数日乃渐有味何止橄榄回味久方觉永按陆羽茶经注曰味长谓之隽永隽味也永长也】

次韵李之纯少监惠砚

黄公山下黄鸡秋持节恤刑会少休【寰宇记曰汝州叶县有黄公山太白诗黄鸡啄黍秋正

肥书曰惟刑之恤哉】小人负弩得开道扫叶张飲林岩幽【山谷熙寧间尝为叶县尉汉书司马相如传县令负弩矢先驱又曹参传曰乃取酒张坐饮】相传有石非地产列仙持来自罗浮【周礼曰以地产作陰德此借用汉书司马相如传曰列仙之儒罗浮山记曰罗浮二山合体在增盛博罗二县之境茅君内传曰罗浮山之洞周回五里名曰朱明曜真天】酒酣步出云雨上南抚方城西嵩丘【史记蔺相如传秦王饮酒酒酣孟郊游终南龙池寺诗曰步出白日上坐依清溪边列子曰化人之宫出云雨之上而不知下之?寰宇记叶县有山城山左传所谓楚国方城以为城即此也嵩山在西京与汝州西北之境相连】林端乃见石空洞猛兽鼯鼯踞上头【晋书周顗传曰此中空洞无物吴都赋曰巨鳌鼯鼯首冠灵山此借用以言石之状古乐府陌上桑曰东方千余骑夫婿居上头老杜诗云东山气蒙鸿宫殿居上头】鸟道兔迹谋挽致万牛不动五丁愁【南中八志云交趾郡治龙编县自兴古鸟道四百里李白蜀道难日西当太白有鸟道尔雅曰兔子蹏其迹迹迹音罔兔迹也万牛见前注蜀王本纪曰秦王欲伐蜀以路不通乃刻五石牛置金其後蜀人以为便金使五丁力士拖牛成道】道家蓬莱见仙伯我亦洗湔与清流【蓬莱见前注仙伯谓之钝老杜诗诸公乃仙伯汉书昌邑王贺传曰以湔洒大王退之诗惧终莫洗湔吴志贺邵传曰遂使清流变浊北梦琐言朱全忠赐裴枢等自尽李振曰此辈自谓清流宜投黄河永为浊流】探囊赠研颇宜墨近出黄山非远求乃知此山自才美物欲致用当穷搜【鲁论曰如有周公之才之美易曰备物致用立成器以为天下利莫大乎圣人】迷邦故令成器晚不?元非匠石羞【鲁论曰怀其宝而迷其邦老子曰大?晚成庄子曰匠石之齐至乎曲转】

送舅氏野夫之宣城二首

藉甚宣城郡风流数贡老【寰宇记曰宣城本汉旧县汉顺帝立宣城郡即今宣州汉书陆贾传名声藉甚注云狼藉甚盛左传芊尹无宇曰食土之毛谓非君臣】霜林收鸭脚春网荐琴高【毆阳公有谢梅圣俞寄银杏诗曰鸭脚虽百个得之城可珍又云霜野摘林实京师寄时新圣俞即宣州人琴高鲤鱼也列山传琴高为宋舍人後乘出鲤见其弟子毆阳公亦有琴高鱼诗後山尝有句云霜林堆鸭脚春味荐猫头今山谷乃有此句虽各极其妙岂非效此耶】其理须良守今年辍省曹【汉书循吏传宣帝曰庶民所以安其田里而亡叹息愁恨之心者政平讼理也与我共此者其唯良二千石乎後汉志曰世祖分尚书凡六曹】平生割鸡手聊试发劘刀【鲁论曰割鸡焉用牛刀庄子曰刀刃若新发于劘】

试说宣城郡亭盃且细听晚楼明宛水春骑簇昭亭【寰宇记宣州汉为宛陵县按地理今有宛溪水】 稴丰圩户桁杨卧讼庭【杜牧之诗罢亚百顷稻西风吹半黄自注云罢亚稻名按切韵两字皆从禾东坡録奏单鶚吴中水利状曰诸县高原陆野之乡皆有塘?或三百亩五百亩为一?盖古人停蓄水以灌民田按今宣州有化或惠民?等人户庄子曰桁杨接榘音义云械夹颈及胫者谢灵运诗虚馆絶谄讼空庭来鸟雀谢朓诗高阁常昼掩荒堦少谄词按朓尝守宣城故山谷用此事】谢公歌舞处时对换鹅经【言以燕处易荣观之乐齐书谢朓为宣城郡太守太白庐山谣曰谢公行处苍苔没老杜诗回首可怜歌舞地秦中自古帝王州按文选鲍照燕城赋曰歌堂舞阁之基晋书王羲之传山陰有道士好养鹅云为写道德经当举羣相赠耳】

送范德孺知庆州

乃翁知国如知兵塞垣草木识威名【乃翁见汉书顷羽传谓文正公仲淹仁庙时赵元昊反公自请守鄜延徙知庆州又为环庆路经略安抚使决策取横山彼灵武而元昊称臣请和庆历中为参知政事杨子法言曰使知国如知葬则吾以樗里疾为蓍龟汉书陈胜传曰今假王骄不知兵权老杜诗一寄塞垣深唐书张万福传德宗曰朕谓江淹草木亦知尔威名】敌人开户玩处女掩耳不及雷惊霆【孙子曰始如处女敌人开户後如脱兔敌不及拒唐书李靖传兵机事以速为神雷霆不及掩耳】平生端有活国计百不一试薶九京【文选孙楚与孙皓书曰爱民活国俗作多作治国非是又按南史王广之子珍国为南谯太守高宗手敕云卿爱人活国甚副吾意柳子原作吕衡州诔曰万不试而一出焉犹为当世甚重礼记晋献文子曰从先大夫于九京注谓晋卿大夫之墓地在九京京盖字之误】阿兄两持庆州节十年骐驎地上行【阿兄谓文正仲子宣忠公也忠宣名纯仁字尧夫神宗熙宁七年十月知庆州元丰八年哲宗即位又自河中徙庆州事具实録及会子开所作公墓志南史张融哭张绪曰阿兄风流顿尽老杜诗近闻下诏喧都邑肯使麒麟地上行】潭潭大度如卧虎边头耕桑长儿女【後汉书邓禹传沈深有度退之诗潭潭府中居此借用卧虎言不动声色为敌人所畏如此北史王黑传所为老黑当道卧貂子安得过者也後汉书董宣传曰京师号为卧虎此借用老杜诗边头公卿仍独骄尺诗别家长儿女前汉书艺文志曰劝耕桑以足衣食食货志曰为吏者长子孙高帝纪吕公曰此非儿女子所知】折冲千里虽有余论道经邦正要渠【晏子春秋范昭谓晋平公曰齐未可并吾欲试其君晏子知之吾欲犯其乐太师知之於是辍伐齐谋孔子闻之曰不出樽俎之间而折冲千里之外晏子之谓也书曰兹惟三公论道经邦老杜忆弟诗吟诗正忆渠】妙年出?父兄处公自才力应时须【後汉朱穆传更选海内清淳之士明达国体者以补其处文选曹植求自试表曰终军以妙年使越楞严经弥勒菩萨言今得授记次补佛处汉书司马迁传曰愿竭其不肖之才力老杜诗窦氏检察应时须】春风旂旗拥万夫幕下诸将思草枯【旂与旌同文选王子渊四子讲德论曰甲士寝而冷旗仆文选李陵书曰凉秋九月塞外草衰王维诗草枯鹰眼疾按礼记月令孟夏行冬令则草木早枯】智名勇功不入眼可用折箠笞羌胡【孙子曰善战者无智名无勇功世说谢安问殷浩眼往属万形万形入眼否後汉书邓禹传光武曰赤眉来东吾折箠笞之窦融传曰河西斗絶在羌胡中】

题王黄州墨蹟後【王禹偁字元之咸平中自西掖谪知黄州】

掘地与断木智不如机春圣人怀余巧故为万物宗【易系词曰断木为杵掘地为臼臼杵之利万民以济傳暢晋诸公赞曰杜预作连机水碓由此洛中谷米丰贱孟郊城南联句曰机春潺湲力考工记曰智者创物巧者述之老子曰渊乎以万物之宗】世有斲泥手或不待郢工【言匠手虽巧亦必待能受之质也庄子曰庄子过惠子之墓谓从者曰郢人垺漫其鼻端若蝇翼使匠石斲之匠石运斤成风听而斲之尽垺而伤郢人立不失容宋元君闻之召匠石匠石曰尝试为我为之匠石曰臣则尝能斲之虽然臣之质死久矣自夫子之死也吾无以为质矣吾无与言之矣此篇上六句盖言黄州锋颖太甚惜其不能藏用也郢人汉书音义作儻人服?云儻人占之善涂暨者】往时王黄州谋国极匪躬朝闻不及夕百壬避其锋【汉书昭帝

纪诏曰往时令民共出焉礼记四郊多垒注曰辱其谋人之国不能安也易曰王臣蹇蹇匪躬之故晋书傅休奕天性峻急每有奏劾或值日暮捧白简整带竦踊不寐坐而待旦于是贵游慑气台阁生风此句颇采其意书曰何畏乎巧言令色孔壬注谓甚佞也汉书王商传张匡曰百奸之路塞梅福传曰莫敢触其锋】九鼎定盘石一身转孤蓬【谓国安而身危九鼎见前注荀子富国篇曰国安于盘石壽于箕翼注云盘石盘薄大石也文选曹子建诗转蓬离本根飘飘随长风又鲍照芜城赋曰孤蓬自振元之尝作三黜赋谓贬商滁黄也在黄州作竹楼记曰四年之间奔走不暇未知明年又在何处东坡作元之丰像赞亦曰元之以雄文直道独立当世方是时朝廷清明无大奸慝然公犹不容于中耿然如秋霜夏日不可玩狎至于三黜以死盖元之初为司谏知制诰疏雪徐铉贬商州副团召归为翰林学士孝章后崩不成服元之以为非坐讪谤出守滁州召还知制诰撰太祖徽号玉册语涉轻诋时相不悦奏黜黄州未几徙□州遂卒】浮云当日月白髮昭秋空【淮南子曰日月欲明而浮云盖之兰芝欲修而秋风败之文选古诗浮云蔽日日游子不顾反】诸君发蒙耳汲直与臣同【汉书汲黯传淮南王谋反惮黯曰黯好直谏守节死义至说公孙弘等如发蒙耳贾捐之传曰置之争臣则汲直注云汲黯方直故世谓之汲直东坡画赞亦引汲黯公孙弘事太宗尝面戒元之曰卿文章不下韩柳但刚不容物人多沮卿使朕难茆】

题王仲弓兄弟巽亭

大隗七圣迷【庄子曰黄帝将见大隗乎具茨之山方明为御昌寓骖乘张若謠朋前马昆闾滑稽後车至于襄城之野七圣皆迷无所问途疏云大隗至人也按寰宇记隗山在许州长社县具茨山在许州阳翟县北仲弓盖许州】许田连城皇【春秋郑伯以璧假许田文选魏文帝与钟大理送玉珎书曰价越万金贵重连城寰宇记鲁城在许州长社县郑伯请以太山之祊易许田即此城也】里中多佳树与世作梁栋【汉书陈平传曰里中社平为宰左传曰季孙氏有嘉树老杜古柏行大厦如倾要梁栋】市门行清渠渙水可抱瓮【史记货殖传刺绣文不如倚市门老杜诗清渠一邑传按文选蜀都赋曰曄曄清渠水经曰渙水出河南密县大隗山东南入于颍说文注渙音与职反玉篇渙音夷记反庄子曰汉陰丈人抱瓮灌畦】翬飞城东南隐几抚羣动【斯干诗如翬斯飞庄子曰南郭子綦隐几而坐又曰俛仰之间而再抚宇宙渊明诗曰入羣动息】人境要俱尔我乃得大用【传灯録涿州?衣和尚问临济如何是人境俱不夺曰王登宝殿野老唱歌师曰如何是人境俱夺曰井□已信独处一方师于言下领旨深入三玄三要之门又仰山云百文得大用黄蘗得大机】乌衣之云孙昆弟不好弄【世说王导曰元规若来鲁角巾还乌衣注引丹阳记曰乌衣之起吴时乌衣营处所也江左初立琅邪诸王所住按寰宇记乌衣巷在今建康上元县尔雅宇曰仍孙之子为云孙注云言轻远如浮云左传曰夷吾弱不好弄】木末风雨来卷箔醉宾从【离骚曰塞芙蓉于木末王勃滕王阁序珠帘暮卷两山而】事常超然观乐与贤者共【老子曰虽有荣观燕处超然南有嘉鱼诗序曰太平之君子至诚乐与贤者共之此借用】人登断龙求我自归鸿送【孟子曰有贱大夫焉必求龙断而登之以左右望而罔市利注云龙断谓堞断而高者也文选嵇康诗曰目送归鸿手挥五弦】溪毛乱锦纈候虫响机综【左传曰涧溪沼沚之毛退之诗风蝉碎锦纈鲍照白紵曲曰寒光潇条候虫急刘禹锡秋声赋曰夜虫鸣兮机杼促韵书曰综机缕也】世纷甚峥嵘胸次欲空洞【文选顔延年作陶渊明诔云遂乃解体世纷结志区外李善注

引嵇康诗曰世务纷纭广雅曰崢嶸高貌楚词曰下崢嶸兮无地庄子曰喜怒哀乐不入于胷次晋书周顗传王导尝枕顗膝而指其腹曰卿此中何所有也答曰此中空洞无物然足容卿辈数百人】读书开万卷谋国妙百中【老杜诗读书破万卷史记养由基射杨叶百发百中】恍无斲鼻工聊付曲肱梦【斲鼻工见前注鲁论曰曲肱而枕之乐亦在其中矣】

寄尉氏仓官王仲弓

啸台有佳人玄髮监笄珥【寰宇记阮籍台在开封陈留县东南籍每追名贤携酌长啸登此左传曰昔有仍氏女生鬢黑而甚美光可以监名曰玄妻乐正后夔取之列子曰正蛾眉设笄珥】登高歌一曲听者倾城市【汉书李夫人传李延年歌北方有佳人絶世而独立一顾倾人城再顾倾人国】门无行媒迹草木倚憔悴【礼曰男女非有行媒不相知名老杜诗絶代有佳人幽居在空谷自云良家子零落依草木又云天寒翠薄曰暮倚修竹史记屈原传顔色憔悴】人物方眇然谁能委圭币【王羲之帖云蔡公遂委笃深可忧当今人物眇然而艰疾若此令人短气左传曰郑徐吾犯之妹美公孙楚聘之矣公孙黑又使强委禽焉晋礼志太康八年有司奏大婚古者以皮马为庭实天子加以穀圭诸侯加大璋汉书文帝诏曰朕获执牺牲圭币此借用其字】

山谷内集诗注卷二

山谷内集诗注卷三

钦定四库全书

山谷内集诗注卷三 宋 黄庭坚 撰

任渊注

有惠江南帐中香者戏答六言二首【洪驹父香谱有江南李王帐中香法以鹯利汁蒸沈香用之】

百链香螺沉水宝薰近出江南一稷黄云绕几深禅想对同参【选诗岂意百链刚化作绕指柔此借用香螺谓螺甲见下篇注唐本草注曰沈水香出天竺单于二国木似榉柳重实黑色沈水者是传灯录第二十二祖摩诃罗至西印土焚香而月氏国王忽覩异香成穗按韵书穗亦作稷法华经曰皆得深妙禅定传灯录又曰马祖同参九人】

螺甲割崑仑耳香材屑鹧鸪斑欲雨鸣鸠日永下帷睡鸭春闲【唐本草曰蠹类生云南者大如掌青黄色取薰烧灰用之今合香多用谓能发香复来香烟按韵书蠹亦作螺韩鄂四时纂要载修甲香方曰取大甲香如崑仑耳者酒煮密熬入诸香等用倦游录云高窠等州产生结香山民见香木曲干斜枝以刀斫成坎经年得两水渍复锯取之刮去白木其香结为斑点亦名鹧鸪斑礼记月令鸣鸠拂其羽李商隐诗睡鸭香炉换夕薰】

子瞻继和复答二首

置酒未容虚左论诗时要指南迎笑天香满袖喜公新赴朝参【史记滑稽传曰齐威王置酒後宫史记魏公子无忌传曰无忌从车骑虚左自迎侯生东京赋曰幸见指南于吾子李善注引桓谭上便宜曰管仲桓公之指南老杜诗颇怪朝参懒乐天诗时暑放朝参】

迎燕温风旖旎润花小雨斑斑一炷烟中得意九衢尘里偷闲【礼记月令季夏之月温风始至此借用韵书曰旖旎旌旗从风貌亦借用欧阳公诗轻寒漠漠侵驼褐小雨斑斑作燕泥乐天诗马入九衢尘又诗口健偷闲且勤饮】

有闻帐中香以为熬蝎者戏用前韵二首

海上有人逐臭天生鼻孔司南【吕氏春秋曰人有大臭者其亲戚兄弟妻妾无能与居者自苦而居海上人有悦其臭者昼夜随而不去曹子建与杨德祖书曰海畔有逐臭之夫列子曰海上有人好鸥鸟者传灯录南泉云父母已生了鼻孔在什麼处韩非子曰先王立司南车以端朝夕注云指南车也】但印香严本寂不必丛林徧参【楞严经香严童子曰佛言见诸比丘烧沉水香香气寂然来入鼻中我观此气非木非空非烟非火去无所着来无所从由是意

销发明无漏如来印我得香严号尘气倏灭妙香密圆我从香严得阿罗汉祖庭事苑曰梵语贫婆此云丛林大论云譬如大柱丛聚是名为林诸比丘和合故僧聚处得名丛林传灯录玄沙传雪峯召曰备头陀何不徧参去师曰達磨不来西土二祖不往西天雪峯肯之】

我读蔚宗香传文章不减二班误以甲为浅俗卻知麝要防闲【南史范蔚宗撰和香方序曰麝本多忌过分必害况实易和盈斤无伤枣膏昏钝甲煎浅俗非惟无助馨烈乃弥增于尤疾也诗意谓蔚宗之论失于甲而得于麝二班谓彪固後汉书班彪传赞曰二班怀文裁成帝坟诗序曰鲁庄公不能防闲文姜】

谢公择舅分赐茶三首

外家新赐苍龙璧北焙风烟天上来明日蓬山破寒月先甘和梦听春雷【外家谓母家史记吕氏纪曰吕氏皆以外家恶而几危宗庙北焙谓建溪北苑官焙後汉书窦章传学者称东观为老氏藏室道家蓬莱山卢仝茶歌曰手閱月团三百片退之诗新月怜半破又石鼎联句序云道士倚墙睡鼻息如雷鸣元稹诗鼻息吼春雷】

文书满案惟生睡梦里鸣鸠唤雨来乞与降魔大圆镜真成破柱作惊雷【汉书刑法志曰文书盈于几□文选嵇康书曰人间多事堆案盈几魔以言睡镜以比茶降魔见佛书如楞严经优波离言亲见如来降伏诸魔制诸外道是也楞严经又曰立大圆镜空如来藏世说曰夏侯太初尝倚柱读书时暴雨霹雳破所倚柱太初色无变楚辞曰凌惊雷轶骇电梁元帝金楼子有人读书握卷即睡梁人谓书为黄嬪言其怡神养性如乳媪也东坡诗引睡文书信手翻】细题叶字包青箬割取丘郎春信来拚洗一春汤饼睡亦知清夜有蛟雷【隋萧大圜竹花赋曰缥枝承露细箬来风说文注曰楚谓竹皮曰箬音而勺反玉篇云竹叶也柳子厚诗青箬里盐归洞客秦少游作李公择行状曰次女适郊祀斋郎丘楫诗言此茶本欲留遗其壻今乃见分也退之诗割取乖龙左耳来选诗清夜游西园汉书中山靖王传曰聚蠹成雷】便榼王丞送碧香酒用子瞻韵戏赠郑彦能【王诜晋卿尚蜀国公主其家酒名碧香彦能名仅】

食贫好酒尝自嘲日给上尊无骨相【诗曰三岁食贫汉赐丞相上尊酒糯米二斗酒一斗为上尊骨相见前注】大农部丞送新酒碧香窃比主家酿【汉书食货志曰桑弘羊请置大农部丞数十人分部主郡国东坡诗碧香近出帝子家汉书卫青传曰季与主家僮卫媼通老杜诗主家陰洞细烟雾晋书何充传云令人欲倾家酿】应怜坐客竟无毡更遭官长颇讥谤【老杜戏简郑广文诗广文到文舍系马堂堦下醉则骑马归颇遭官长骂才名四十年坐客寒无毡赖有苏司业时时与酒钱文选孔文举书今之少年喜谤前辈或能讥评孝章】银杯同色试一倾排遣春寒出帷帟【晋书王衍传每作玉柄麈尾与手同色此借用其字老杜诗乾愁要排遣汉书文帝赞曰帷帟无文绣】浮蛆翁翁杯底滑坐想康成论泛盎【周礼洒正辨五齐之名一曰泛齐二曰醴齐三曰盎齐郑康成注云泛者成而宰浮泛泛然如今宜城醪盎犹翁也成而翁翁然葱白色如今酇白翁音乌动反】重门着关不为君但备恶客来仇餉【易曰重门击柝以待暴客汉书陈遵传曰每大饮宾客满堂辄关门元次山集以不饮者为恶客孟子曰葛伯率其民要其有酒食黍稻者夺之不授者杀之有童子以黍肉餉杀而夺之书

曰葛伯仇饷此之谓也】

送郑彦能宣德知福昌县

往时河北盗横行白昼驱人取城郭【往时见前注横行见孟子汉书贾宜曰白昼大都之中剽吏而夺之金】唯闻不犯郑冠氏犬卧不惊民气乐【冠氏县属大名府後汉岑熙迁魏郡太守人歌曰狗吠不惊足下生鼈汉书贾谊传曰德教洽而民气乐】祇今化民作锄耰田舍老翁百不忧【老杜诗祇今年才十六七贾谊过秦论曰锄耰棘矜师古注云耰摩田器也音忧南史宋武帝纪孝武曰田舍翁得此已为过矣老杜诗吾知徐卿百不忧】铜章去作福昌县山中读书民有秋【汉官仪曰县令秩六百石铜章墨绶福昌县属西京书曰乃亦有秋诗意谓使民安于田里无饥寒之戚必非文俗吏所能也退之诗曰出宰山水县读书松桂林】福昌爱民如父母当官不扰万事举【诗曰岂弟君子民之父母左传曰当官而行何强之有】用才之地要得人眼中虚席十四五不知诸公用心许鲁恭卓茂可人否【退之诗侍从近臣有虚位公今此去何时归後汉鲁恭为中牟令专以德化为理後至侍中司徒卓茂为密令走人亲爱而不忍欺光武以茂为太传】

显圣寺庭枸杞

仙苗壽日月佛界承雨露谁为万年计乞此一抔土【管子曰百年之计树之以木汉书张释之传曰假令愚民取长陵一抔土何以加其法乎注云抔音步侯反谓手掬之也乞字去声读本草枸杞一名地仙】扶疎上翠盖磊落缀丹乳【汉书刘向传曰梓树生枝叶扶疎上出屋蜀志先主传曰桑树童童如小车盖陆玕诗疏云枸杞子秋熟正赤文选宋玉风赋枳句来巢李善注引司马彪曰桐子似乳着其叶而生此借用】去家尚不食出家何用许【本草枸杞条陶隐居注曰俗谚云去家千里勿食萝摩枸杞言其强盛陰道也】正恐落人间采剥四时苦【言在僧坊则不用食此故免采剥之害东坡先生後?菊赋而吾方以?为粮以菊为糗春食苗夏食叶秋食花实而冬食根庶几手西河南阳之壽】养成九节杖持献西王母【本草枸杞一名仙人杖一名西王母杖老杜诗安得仙人九节杖挂到玉女洗头盆按真诰杨羲梦蓬莱仙翁挂赤九节杖而视白龙】

次韵子瞻赠王定国

远志作小草鼃衣生陵屯但为居移气其实何足言【远志小草见前注列子曰若鼃为鶡得水土之际则为鼃蟪之衣生于陵屯则为陵舄注云随所生之处而变者也孟子曰居移气养移体诗意谓士当特立独行不以穷達所居之异而易其操定国本贵公子尝坐东坡累迁谪宾州颇能自处云】名下难为人丑好随手翻【言名士未必有其实往往随世俯仰乍贤乍佞也史记范蠡曰大名之下难以久居国史纂异阎立本见张僧繇旧昼曰名下定无虚士列子曰贤愚好丑成败是非无不消灭老杜诗时来展材才先後无丑好又诗翻手作云覆手雨汉书韩信传曰公随手亡矣】百年炊未熟【用异闻集邯郸枕中梦事见前注】一垤蚁追奔【异闻集载南柯太守淳于棼事云棼沈醉致疾梦见二使者扶生入宅南古槐穴中前行

数十里有大城门楼题曰大槐安国其王以女瑶芳妻生使为南柯郡守在郡二十年有檀萝国来伐王命生征之败绩生妻病死王谓生可暂归生上车行俄出一穴见本里间巷入其门见身已卧堂庑下发悟如初梦中倏忽若度一世矣遂呼二客寻古槐下穴见大穴洞然明朗有积土壤以为城郭台殿之状有蚁数斛隐聚其中中有小台二大蚁处之即槐安国都邑也又穷一穴直上有枝亦有土城小楼即南柯郡也宅东一里涧侧有大檀树藤萝拥织傍有蚁穴檀萝之国岂非此耶山谷喜用此事故具载之东山诗注曰垤蚁冢也追莽用庄子蜗角蛮触相战伏尸逐北之意文选李陵书曰追莽逐北】夏日蓬山永戎葵茂墙藩【後汉书窦章传学者称东观为老氏藏室道家蓬莱山尔雅葍葵注云今蜀葵也似葵华如本槿华欧阳詹诗云芭蕉一叶妖茂葵一花妍异无材实资手植堦墀前汉书扬雄甘泉赋曰电倏忽于墙藩注云藩篱也】王子吐佳句如茧丝出盆【晋书胡毋辅之传王澄曰彦国吐佳言如锯木屑又孙绰传作天台山赋示范荣期每至佳句辄云应是我辈语欧阳公诗问其别後学初若茧抽绪礼记曰夫人纁三盆手】风?极洒落云气画罍樽【晋书王衍传风姿详雅江淹拟许?君诗曰五难既洒落周礼司尊彝注曰山尊山罍也亦刻而画之为山云之形】属有补袞章自当宠频频【司马温公尝荐定国句或指此属音之欲反近也左传曰属有宗祧之事于武城诗曰袞职有阙维仲山甫补之杜诗三顾频频天下计按汉书王莽传注曰郑重犹频频也】鄙夫无他能上车问寒温【老杜诗鄙夫行衰谢字出鲁论史记孟尝君传代舍客冯驩无他技能通典曰秘书郎自齐梁之末多以贵游子弟为之无其才实当时谚曰上车不落则著作体中何如即秘书事本出颜氏家训山谷时在馆中故用此事】惟思穷山去抱犊长儿孙【汉书严安传曰穷山通谷又文选王康琚反招隐诗曰放神青云外絶迹穷山里唐王摩诘归山歌曰入云中兮养鸡上山头兮抱犊媿不才兮妨贤嫌既老兮贪禄山谷盖采此意按神仙传王烈入河东抱犊山中见一石室有索书两卷与嵇康共往读之而寰宇记潞州壶关县有抱犊山道书福地记云抱犊山在上党东南乙地有石城高十丈有草名玉照取其叶服之二三日不饥又按山水志云抱犊山北岳佐命之山也後汉葛荣乱百姓抱犊于山上因名寒山子诗曰丈夫莫守困无钱即经纪养得一牯牛生得五犊子犊子又生儿积数无穷已寄语陶朱公富与君相似陆龟蒙诗曰五年重到旧山村树有交柯犊有孙老杜诗自从盛酒长儿孙】

次韵张询斋中晚春【询字仲谋】

学古编简残怀人江湖永非无车马客心远境亦静【书曰学古入官汉书刘歆传曰经或脱简传或间编诗曰嗟我怀人寘彼周行选诗门有车马客渊明诗心远地自偏】挽蔬夜雨畦煮茗寒泉井【老杜诗夜雨剪春韭易曰井列寒泉食】春去不窥园黄鹂颇三请【汉书董仲舒传三年不窥园老杜诗隔叶黄鹂空好音周礼司仪曰及出车送三请三进再拜】立朝无物望补外傥天幸【孟子曰立乎人之本朝後汉第五伦传曰有损事望物云望物望也唐书马周传曰或京官不称职始虫补外庄子渔父篇孔子曰今也吾得遇也若天幸然汉书伍被传曰傥可以侥幸】想乘沧浪船濯髮曦翠岭【楚辞渔父鼓枻而去歌曰沧浪之水清兮可以濯我缨沧浪之水浊兮可以濯我足又远游曰朝濯髮于阳谷兮夕曦全身手九阳文选张平子思玄赋曰旦余沐于清源兮曦余发于朝阳李善注云曦乾也山东曰朝阳老子新沐曦发于庭】

次韵答晁无咎见赠

翕翕一日炎【谓权门炙手可热曾不几时世说谢安在东山兄弟已有富贵者隼翕家门倾动物物韩退之作郑羣志日不为翕翕热】耿耿万年永【言守正而寡欲可为不朽计也易颐之六四曰虎视眈眈其欲逐逐无咎注谓观其自养则履正察其所养则养阳颐爻之贵斯为盛矣】四海仰首观【一作荣名响六合】顷复归根静【荣华之不可恃如此老子曰万物并作吾以观其复夫物芸芸各归其根归根曰静静曰复命】时雨泻玉除潢流涨天井【周礼小祝逆时雨礼记孔子曰天降时雨山川出云老杜诗雨泻暮檐竹除谓殿阶选诗曰凝霜依玉除陆士衡诗曰丰注溢修溜黄潦浸阶除左传曰潢污行潦之水退之诗曰是时新晴天井溢谁杞长劔倚大行天井盖水名乃水经注所谓经尧城西流入汾水也此盖借用】性不耐衣冠人门疎造请【世说王丞相性不耐酒南史张敷曰臣性不耐杂造请见前注】煮饼卧北窗保此已徼幸【陶渊明与子疏曰常言五月中北窗下卧遇凉风暂至自谓是羲皇上人意识浅罕谓斯言可保日月逝往机巧遂疎緬求在昔眇然如何世说刘真长为丹阳尹许玄度就刘宿牀帷新丽饮食丰甘许曰若此保全殊胜东山刘曰卿若知吉凶由人吾安得保此此诗兼采其意崔实四民月令曰立秋无食煮饼及水溲饼礼记问丧曰徼幸复反也】空余见贤心忍渴望梅岭【蜀志诸葛亮传亮答先主曰将军总揽英雄思贤如渴世说曰魏武行失道三军皆渴帝令曰前有大梅林饶子甘酸可以解渴士卒闻之口皆水出後汉书鍾离意传曰孔子忍渴于盗泉之水白氏六□曰大庾岭上梅南枝落北枝开老杜诗短日行梅岭】

次韵答张文潜惠寄【文潜集有初到都下供职寄黄九诗即此韵文潜名来】

短褐不磷缁【甯戚饭牛歌曰短褐单衣适至骭列子力命篇北宫子曰朕衣则短褐世说注蔡洪与周俊书曰张畅居磨涅之中无绪磷之扰其字本出鲁论老杜诗亦云但取不磷缁】文章近楚诗【老杜诗纵使卢王操翰墨劣于汉魏近风骚史记屈原传曰原既死之後楚有宋玉唐勒景差之徒皆好诗以赋见称汉书地理志曰故世传楚词】未识想风采别去令人思【退之诗吾未识子时已览赠予篇寤寐想风采于今已三年按汉书霍光传天下想闻其风采世说谢太传云安比见之乃不使人厌然出户去不复使人思安比坦之也此反其意而用之老子五色令人目盲】斯文已战胜凯歌偃旂旗【谓文潜杖中学官鲁论曰天之未丧斯文也韦应物诗曰决胜文场战已酣周礼大司马若师有功则左执律右秉钺以先恺乐献于社注谓兵乐曰凯司马法曰得意则恺乐恺歌示喜也按字书恺与凯同旂与旌同见前注晋书石勒载记曰偃藏旗帜寂若无人】君得鱼上冰忽复燕哺儿【月命孟春鱼上冰文选潘安仁诗我来冰未泮□暑忽隆炽】学省得佳士催来费符移【文潜元佑初为太学博士文选沈休文有学省愁卧诗注云学省国学也晋书任恺传孙伦以淑行致称为清平佳士王猛传郡县已被符管摄汉书刘歆传移书太常博士】方观追金玉如许遽言归【械朴诗追琢其章金玉其相此引用以言学省作成人材也後汉左慈传曰老羝人立而言曰遽如许诗云言旋言归文潜元韵曰五日长安尘故山梦中归故此句广其意】南山有君子握兰怀令姿【此句当以属二苏文潜盖其门下士也小雅曰南山有台北山有莱乐只君子邦家之基汉官仪尚书郎怀香握兰东坡元佑幼为礼部郎中故山谷用此事谢灵运诗云想见山阿人

薜萝若在眼握兰勤徒结折麻心莫展李善注曰握兰以相赠问也末句盖终此意选诗云煌煌发令姿】但应洁斋俟勿咏无生诗【宋玉登徒子好色赋秦章华大夫曰从容郑卫溱洧之间羣女出桑臣观其丽者因称诗曰遵大路兮揽子祛赠以芳芳词甚妙于是处子含喜微笑窃视流眄复称诗曰寤春风兮发鲜荣洁斋俟兮惠音声赠我如此兮不如无生因迁延而辞避李善注谓赠以芍药欲结恩情而女不受诗曰知我如此不如无生恨之辞也山谷引用意谓兰草之芳馨非芍药凡草之比知我者必以是为好姑修洁以俟之可也士之于世正如女之从夫不可自献故山谷以此为况龙居士颂大家团圞头共说无生话】

同钱志仲饭籍田钱孺文官舍

帝籍开千亩农功先九州【礼记月令曰藏帝籍之收于神仓国语曰宣王即位不籍千亩五经要义曰天子籍田千亩率公卿亲耕所以先百姓而致孝敬左传曰政如农功】王孙守耒耜吏隐极风流【钱氏盖吴越王钱鏐之后汉书韩信传曰吾哀王孙而进食礼记月令孟春之月天子亲载耒耜躬耕帝籍汝南先贤传曰郑钦吏隐于蚁陂之阳老杜诗吏隐适情性兹焉其窟宅风流见前注】永夏丰草木五云卫郊丘【书曰日永星火以正仲夏屈原怀沙曰陶陶孟夏兮草木莽莽孝经援神契曰德至山陵则景云出景云五色云也郊丘谓南郊之圆丘文选石阙铭曰兴建庠序启设郊丘】牛羊卧篱落宾客解衣裘汲井羞热啜挽溪供甘柔【退之诗欲将层级压篱落谢灵运诗激涧代汲开史记张仪传赵襄子与代王饮阴告厨人曰即酒酣乐进热啜国语曰公父文伯饮南宫敬叔酒羞鼈马左传曰涧溪沼沚之毛退之诗野蔬拾新柔又祭女挈文曰饮食柔耳】倒靱收莲的剖蚌煮鸿头【韵书靱鞣弓箭室也音又尔雅曰荷笑蕖其寔 其中的注云的子也欧阳公诗鸡头诗云剖蚌得珠从海底按蜀志秦宓奏记曰剖蚌求珠周礼注芡鸡头一名鴈头退之联句云鸿头排刺芡】野日草光合水风荷气浮【老杜诗野日荒荒白选诗风光草际浮韦应物诗雨微荷气凉】稻畦下白鹭林樾应鸣鸪【王维诗曰漠漠水田飞白鹭阴阴夏木转黄鹂林樾见前注】主人发清赏况复佳同游归扇障小雨真成一赐休【障字作平声读南史刘祥传褚彦回以腰扇鄣日退之诗天街小雨润如酥汉律有赐告有予告见汉书冯野王传又薛宣出教曰日至吏以令休所由来又老杜诗真成浪出游】

次韵曾子开舍人游籍田载荷花归

维王调玉烛时夏雨我田【尔雅曰四时和谓之玉烛注云道光照诗曰雨我公田遂及我私】壁挂苍龙骨溜渠故溅溅【龙骨谓水车王介甫诗曰龙骨长乾挂梁栢李商隐诗伊水溅溅相背流】三推劝根本百谷收早坚【礼记月令孟春之月天子亲载耒耜躬耕帝籍天子三推汉书文帝诏曰农天下之本也其开籍田朕亲率耕大田诗曰既方既早既坚既好注实未坚者日阜】官司极斋明崇丘见升烟【左传曰分之官司彝器礼记曰斋明盛服又月令孟春以元日祈谷于上帝注谓以上辛郊祭天也甘泉赋崇崇圆丘隆隐天兮周礼大宗伯注曰燔燎而升烟所以报阳也】系马西门柳忆听去夏蝉【文选刘琨诗系马山下松陆机诗寒蝉鸣高柳】剥芡珠走盘钓鱼柳贯鲜【退之诗水果剥菱芡博物志曰鲛人泣而成珠满盘杜牧注孙子序曰犹丸之走盘石鼓文曰其鱼维何维𩚰与鲤何以贯之维杨与柳】扫堂

延枕簟公子气翩翩自尔欲继往阻心如壅泉【礼记内则云歛枕簟席退之诗水纹浮枕簟史记太史公曰平原君翩翩浊世之佳公子也】紫微乐暇日披襟咏风涟【唐开元五年改中书为紫微省元佑初子开为中书舍人孟子壮者以暇日修其孝弟忠信宋玉风赋曰有风飒然而至王乃披襟而当之诗曰河水清且涟猗注曰风行水上成文曰连】红妆倚荷盖水镜写明蠲【文选古诗曰娥娥红粉妆玉台新咏梁武捣衣诗曰弱翠低红妆青箱杂记曹修已诗荷叶军芙蓉圆青映嫩红佳人南陌上翠盖立春风退之诗曲江千顷秋波净平铺红蕖盖明镜水镜见前注梁元帝从军行曰山虚和铙管水净写楼船】美物亦有实剪房助加笾【国语曰三女为粢夫粢美物也衆以美物归汝而何德以堪之周礼笾人曰加笾之实菱芡?脯此借用】珠宫紫贝阙足此水府仙【楚辞九歌曰紫贝阙兮珠宫文选木华海赋曰水府之内极深之庭乐府解题伯牙作水仙操】郁郁冠盖宅追奔易雕年【文选古诗曰洛中何郁郁冠带自相索长衢罗夹巷王侯多第宅又左太冲诗曰冠盖?四术朱轮竞长衢追奔见前注鲍照舞鹤赋曰急景雕年】能从物外赏真是区中贤【文选张平子归田赋曰苟纵心于物外又焉知荣辱之所如退之诗穷探极览颇恣横物外日月本不忙汉书司马相如大人赋曰迫区中之隘狭兮舒节出乎北垠】仍闻载後乘笼烛照婵娟【孟子曰後车数十乘李商隐诗蜡照半笼金翡翠文选西京赋曰增婵娟以?豸注云姿态妖蛊也王立之诗话载此诗一本云令君诚重客食前颇加笾西汉足臚仕东观多臞仙何时载尊俎入观少年及此归沐早少休从事贤传觞定可醉下箔出婵娟】

送刘士彦赴福建转运

秋叶雨堕来冥鸿天资高【乐天诗业声落如雨孟郊诗商叶堕乾雨扬子曰鸿飞冥冥弋人何慕焉零陵先贤传诸葛亮谓刘巴曰足下天资高亮】车马气成雾九衢行滔滔【此以下四句大率用文选左太冲咏史诗意所谓济济京城内赫赫王侯居冠盖?四术朱轮竞长衢寂寂扬子宅门无卿相舆是也史记天官书曰车气乍高乍下骑气卑而布汉官典职曰正旦作乐漱水成雾乐天诗马入九衢尘滔滔见鲁论】中有寂寞人灵府局鎖牢【文选郭景乐游仙诗曰青溪千余仞中有一道士汉书扬雄传京师为之语曰惟寂寞自投阁庄子曰不可入于灵府注云灵府者精神之宅渊明诗曰形迹凭化往灵府长独闲淮南子曰中局外闭何事之不节欧阳公诗始知文景基局牢】西风持汉节骑从严弓刀【汉书苏武传曰杖汉节牧羊唐人诗曰太雪满弓刀单于夜遁逃】惟闻七聚落 独困吏饕【周礼职方氏掌七闽之人民庄子曰九洛之事疏云九州聚落之事书曰无虐茆独而畏高明按 与茆同左传曰缙云氏有不才子天下之民以比四凶谓之饕餮注曰贪财为饕贪食为餐】土弊禾黍恶水烦鳞介劳【汉书沟洫志曰且溉且粪长我禾黍退之祭文曰觐鳞介之惊透按周礼大司徒曰川泽宜鳞物坟衍宜介物汝坟诗注曰鱼劳则尾赤乐记土敝则万木不长水烦则鱼鳖不大山谷此两句盖本诸此】南驱将仁气百城共一陶【礼乡饮酒曰天地温厚之气始于西北而盛于东南此天地之仁气後汉书贾琮传曰为冀州刺史百城闻风自然震竦崔駰达旨坏冶一□】察人极泾渭问俗及豚羔【文选任彦升哭范仆射诗云伊人有泾渭非余扬浊清李善注引孙绰曰泾渭殊流雅郑异调礼记入境而问俗周礼庖人曰春行羔豚膳膏香末句谓求民疾苦委曲详尽】官闲得胜日杖屨之林皋【晋书卫玠传曰遇有胜日亲友时请一言曲礼曰君子欠伸撰杖屨庄子曰山林坎皐壤坎使我欣欣然而乐此坎】人间閱忠厚【

一作功名付簪绂】物外访英豪【英豪之士往往隐约于山林】次韵韩川奉祠西太乙宫四首【春明退朝录曰天圣中建西太乙宫】

万灵未对甘泉五福间祀迎年旂旗三旂半偃风马云车闯然【汉书郊祀志曰黄帝接万灵于明廷明延者甘泉也又曰武帝定郊祀之礼祠太乙于甘泉就阳位也诗意谓皇家未接万灵而特祀五福以为民祈年之故尔五福谓五福太乙盖十神之一太乙金镜经具载其详郊祀志又曰立泰时壇秋及腊间祠又曰黄帝为五城十二楼以候神人名曰迎年注谓若云祈年也又曰为伐南越告祷泰一以牡荆画幡象泰一三星为泰一绛旗命曰灵旗颜氏家训曰接说文勿者州里所建之旗象其柄及三旂之形礼乐志郊祀歌曰灵之车结玄云灵之下若风马退之诗闯然入其户三称天之言字出公羊哀六年传】

白髦下金神节青祝携御炉香百礼尽修毫祀九歌不取沈湘【晋语曰虢公梦在庙有神人面白毛虎爪执钺立于西阿公觉召史瞿占之对曰如君之言则蓐收也注云西方白虎金正之官青祝谓内出青词以香熏之乃授祠官使祭告也诗曰以洽百礼汉书郊祀志曰亳人缪忌奏祠泰一方曰天神贵者泰一泰一佐曰五帝于是天子令太祝立其祠长安城东南郊王逸楚辞章句曰九歌者屈原所作沅湘之间俗信鬼而好祠歌舞之乐其词鄙陋因为作九歌之曲文选运命论曰屈原以之沈湘楚辞九歌者东皇太乙有湘君湘夫人岂独取东皇太乙耶】

紫府侍臣鸣玉霜台御史生风官烛论诗未了知秋自属梧桐【抱朴子曰项曼都自言到天上过紫府金牀几晃晃昱昱礼记曰行则鸣佩玉崔篆御史箴曰简上霜凝笔端风起後汉巴只与客暗坐不然官□末句意谓论诗得趣不觉其为秋夕也世说郑康成语服子慎曰吾久欲注春秋传尚未了王介甫诗只听虫声已无梦五更桐叶强知秋】

泰坛下瑞云黄雨师洒道尘香【礼记曰燔柴于泰坛祭天也下瑞论降瑞也退之诗生祥下瑞无时期汉书郊祀志武帝迎鼎至甘泉至中山晏温有黄云焉东都赋曰雨师泛洒风伯清尘唐书天子之行风伯清尘雨师洒道】便面犹承坠露金钲半吐东墙【便面谓扇见汉书张敞传西都赋曰抗仙掌以承露离骚曰朝饮木兰之坠露东坡诗树头初日挂铜钲老杜诗初日□复吐】

次韵王荆公题西太乙宫壁二首

风急啼乌未了雨来战蚁方酣【杨大年诗风来玉宇乌先觉按淮南子曰乌鵲识岁之多风去乔木而巢扶枝老杜诗啼乌争引子太白诗语笑未了风吹断钱昭度诗白蚁战酣山雨来按焦贛易林曰蚁封穴户大雨将至韩非子曰楚晋战于鄢陵酣战之时子反渴而求饮】真是真非安在人间北看成南【庄子曰彼方一是非此亦一是非果且有彼是乎哉果且无彼是手哉楞严经曰如人以表表为中时东看则西南观成北表体既混心应杂乱在熙丰则荆公为是在元佑则荆公为非爱憎之论特未定也】

晚风池莲香度晓日宫槐影西白下长干梦到青门紫曲尘迷【言荆公厌京洛风尘而思金陵山水公诗荅云三十六陂烟水白头想见江南法华经曰如清净池莲花庄严涅槃经如日垂没山陵堆阜影现东移理无西逝此诗采其意反而用之王摩诘辋川有宫槐陌寰宇记白下县故城在金陵上元县城西本江乘县白石垒斋武帝移琅邪居之文选吴都赋曰长干延属李善注云江东谓山水间为干建业之南有山其间平地吏民居之故号为干按今金陵城南门外有长干寺荆公诗有白下长干何可见风尘愁杀庾兰成之句故此诗引用唐人乐府云紫陌青门三十六宫春昼永三辅黄图曰长安城东出南头第一门曰霸城门民见门色青名曰青城门】

有怀半山老人再次韵二首【荆公所居在锺山之半故号半山】

短世风惊雨过成功梦迷酒酣【追念熙寧间一时建立之事今已堕渺茫如醉乡梦境至其所可传则有不朽者在後两句终此意班固幽通赋曰道修长而世短文选运命论曰风惊尘起散而不止老杜诗村晚惊风度庭幽过雨沾左太冲诗酒酣气益振】草玄不妨准易论诗终近周南【上句谓其经学下句谓其诗汉书扬雄传曰雄方草创太玄有以自守赞曰以为经莫大于易故作太玄文选左太冲诗曰寂寂揚子宅门无卿相輿言论准仲尼词赋拟相如鲁论曰人而不为周南召南犹正牆面而立也欬】

啜羹不如放麇乐羊终愧巴西【韩非子曰乐羊为魏将而攻中山中山之君烹其子而遗之羹乐羊坐于幕下而啜之尽一杯文侯谓堵师赞曰乐羊以我故而食其子之肉答曰其子而食之且谁不食乐羊罢中山文侯赏其功而疑其心韩非子又曰孟孙猎得麇使秦西巴载之持归其母随之而啼秦西巴弗忍而与之孟孙大怒逐之居三月复召以为子传曰夫不忍于麇又且忍吾子乎故曰巧诈不如拙诚乐羊以有功见疑秦西巴以有罪益信按吕惠卿叛荆公发其私书有勿使上知之语山谷意谓惠卿之忍正如乐羊荆公之过当与西巴同科也苏子由弹惠卿章盖云放麇违命也推其仁则可以托国食子徇君也推其忍则至于弑君西巴他书或作巴西非是】欲问老翁归处帝乡无路云迷【庄子曰千岁厌世去而上仙乘彼白云至于帝乡神考春遇荆公始终不衰升遐之一一年而公亦薨诗意谓神考威灵在天公当从之非谗邪所能间也】

和答钱穆父咏猩猩毛笔【鸡林志云高丽笔芦管黄毫健而易乏旧云猩猩毛或言是物四足长尾善缘木盖猓毛或鼠须之类尔】

爱酒醉魂在能言机事疎【猩猩事通典于哀牢国言之甚详盖出于华阳国志及水经注唐文粹载裴炎猩猩说大率本此其略云阮研使封溪见邑人云猩猩在山谷间数百为羣人以酒设于路侧又爱着屐里人织草为屐更相连给猩猩见酒及屐知里人设张则知张者祖先姓字乃呼名骂云奴欲张我舍之而去复自再三相谓曰试共尝酒及饮其味逮乎醉因取屐而着之乃满人所擒获刺其血染毳罽随鞭箠输人至于一斗退之诗愁猓酸骨死?花醉魂馨曲礼曰猩猩能言不离禽兽易曰机事不密则害成】平生几两屐身後五车书【上句已具前注晋书阮孚传曰未知一生能着几两屐下句谓作笔写书晋书张翰传曰使我有身後名

不如即时一杯酒庄子曰惠施多方其书五车】物色看王会勲劳在石渠【列仙传曰阍令尹知老子当过物色而留之昭明太子集文选诸赋有物色门若雷月之类是也汲冢周书有王会篇郑康成曰王城既成大会诸侯及四夷也唐书黠戛斯传李德裕上言贞观时顔师古请如周史臣集四夷朝事为王会篇今黠戛斯大通中国宜为王会图以示後世以松扇诗考之猩猩笔盖穆父使高丽所得礼记曰昔者周公旦有勲劳于天下班固西都赋曰天禄石渠典籍之府】拔毛能济世端为谢杨朱【孟子曰杨子为我拔一毛而利天下不为也列子杨朱篇禽子问杨朱曰去子体之一毛以济一世汝为之乎杨子曰世固非一毛之所济选诗端为谁苦辛】咏猩猩毛笔二首【山谷有此诗跋云钱穆父奉使高丽得猩猩毛笔甚珍之惠予要作诗苏子瞻爱其柔健可人意每过予书案下笔不能休此时二公俱直紫微阁故予作二诗前篇奉穆父後篇奉子瞻】

桃榔叶暗宾郎红朋友相呼堕酒中【花间集欧阳炯南乡子词曰词入南中桃榔叶暗蓼花红本草桃榔生岭南山谷宾郎生南海堕酒中见前注】正以多知巧言语失身来作管城公【老杜鹦鹉诗红觜漫多知退之诗惜哉此子巧言语又毛颖传曰封诸管城号管城子易曰臣不密则失身按刘梦得和乐天鹦鹉诗曰谁遣聪明好顔色争须安置入深笼与此诗意同而山谷语尤工】

明窻脱?见蒙茸醉着青鞋在眼中【谓去其管弢覩蒙茸之状如见其飲酒着屐时老杜诗脱?露顶王公前此借用如退之毛颖传所谓免冠谢也史记晋世家狐裘蒙茸着鞋见前注老杜诗青鞋布袜从此始选诗薛萝若在眼老杜诗武帝旌旗在眼中】束缚归来傥无辱逢时犹作墨头公【意谓东坡起自谪籍也鲍叔牙曰使管仲无忘束缚于鲁时毛颖传曰聚其族而加束缚焉晋书诸葛恢名亚王导庾亮谓曰朋府当作黑头三公又王珣传桓温曰王掾当作黑头公按北史古弼传弼头失帝常名之曰笔头时人呼为笔公故山谷于笔诗参用此事】

山谷内集诗注卷三

山谷内集诗注卷四

<集部,别集类,北宋建隆至靖康,山谷内集诗注>

钦定四库全书

山谷内集诗注卷四 宋 黄庭坚 撰

任渊注

奉和文潜赠无咎篇末多见及以既见君子云胡不喜为韵【山谷尝写答邢居实诗及此诗与徐师川曰後八诗颇得意者故漫録往或与潘洪诸友读之】

龟以灵故焦雉以文故翳【老杜诗漆有用而割膏以明自煎此用其意周礼天龟曰灵属左传曰卫侯将如五氏卜过之龟焦尔雅素质五采皆备成章曰翳注云翳亦雉属潘安仁射雉赋序曰习媒翳之事李善注曰医者所隐以射者也】本心如日月利欲食之既【孟子曰此之谓失其本心寒山子诗吾心似秋月碧潭清皎洁退之送高□序曰利欲鬬进有得有丧春秋桓公四年襄公二十四年皆书日有食之既杜预注云既尽也刘原父请观欧阳永叔五代史诗曰仲尼日月也薄食为之既论语曰君子之过也如日月之食焉东坡谓本心者道心也】後生玩华藻照影终没世【鲁论曰後生可畏扬子曰今之学也非独为之华藻也又从而绣其□悦文选潘正叔诗云玩尔清藻味尔芳风博物志曰山鸡有美毛自爱其色终日映水目眩则溺死汉书司马迁书曰鄙没世而文采不裘于後没世字本出鲁论】安得八紘?以道猎衆智【文选张平子思立赋曰结典籍而为罟兮畋儒墨以为禽此用其子曹子建与杨德祖书曰吾王设天网以该之顿八紘以掩之扬子曰猎德而得德盖学道者恶衆志之为害故欲猎而去之】

谈经用燕说束弃诸儒传【此句指熙寧经学穿凿之弊韩非子曰先王有郢书而後世多燕说又曰郢人有遗燕相国书者夜书火不明因谓持烛者曰举烛已而过书举烛举烛非书意也燕相受书而说之曰举烛者尚明也尚明者举贤而用之燕相白王大说国以治治则治矣非书意也今世学者多此类退之诗春秋五传束高阁】滥觞虽有罪未派弥九县【言非特荆公之罪诸儒穿凿遂至失其本原明皇孝经序曰滥觞于汉按家语曰夫江始出于岷山其源可以滥觞及其至江津不舫舟不避风不可以涉非惟下流多故耶退之诗东都渐弥漫派别百川导後汉书光武赞曰九县颺回三精雾塞】张侯真理窟坚壁不与战【晋书刘惔传简文帝曰张凭勃率为理窟汉书项羽传汉王坚壁不与战】难以口舌争水清石自见【汉书张良传曰此难以口舌争也古乐府艳歌行曰夫婿从门来斜倚西北昞语卿且勿昞水清石自见】

野性友麋鹿君非我同羣【潘岳关中记曰辛孟年七十与麋鹿同羣游世谓之鹿仙唐人陆畅诗曰野性从来偏爱月刘孝标絶交论欢与麋鹿同羣】文明近日月我亦不如君【言张

侯文采可以入侍易曰文明以止人文也汉书萧曹赞曰依日月之末光蜀志龐统传曰陶冶世俗甄综人物吾不及卿论帝王之秘策揽倚伏之要最吾似有一日之长此颇采其意】十载长相望逝川水沄沄【逝川见鲁论退之诗浪波沄沄去松柏在高冈】何当谈絕倒茗椀对炉薰【乐府解题曰何当大刀头破镜飞上天晋书卫玠传王澄每闻玠言辄叹息絕倒语曰卫玠谈道平子絕倒韩孟聯句曰茗椀纖纖捧应劭汉官仪曰尚书郎入直女侍史二人执香炉烧薰以从】北寺锁斋房尘钥时一启晁张趯然来连璧照书几【北寺谓汴京醕池寺山谷寓几研于此醕池见下注金滕曰启钥见书庄子曰夫逃虚空者□藿柱乎黼黻之径踉位其空闻人足音趯然而喜矣又况乎昆弟亲戚之磬欬其侧者乎晋史夏侯湛传湛与潘岳同輿接茵时谓连璧】庭柏郁葱葱红榴罅多子【後汉光武纪曰气佳哉郁郁葱葱蜀都赋曰榛栗罅发此借用其字北史魏收传曰石榴房中多子】时蒙吐佳句幽处万?起【吐佳句见前注唐人常建诗竹径通幽处庄子齐物论子游曰敢问天籁子綦曰夫吹万不同而使其自已也咸其自取怒者其谁耶老杜诗万籁真笙竽】

先皇元丰末极厌士浅闻【实録吕公着传曰时科举专用王安石经义士无自得学而朝廷文词之官渐艰其选神宗以答高丽书不称旨盖尝以为言又东坡答张文潜书亦曰近见章子厚言先帝晚年甚患文字之陋欲稍变取士法特未暇尔汉书儒林传序曰小吏浅闻弟能究宣】只今举秀孝天未丧斯文【元佑元年四月诏执政大臣各举文学政事行之臣可充馆阁之选者三人于是毕仲游及晁补之张耒等皆召试学士院晋书孔坦传曰秀孝到不策试普加除署秀孝谓秀才孝廉也此借用鲁论曰天之未丧斯文也】晁张班马首崔蔡不足云【班马谓迁固崔蔡谓瑗邕刘禹锡作柳子厚集序云韩退之曰雄深雅健似司马子长崔蔡不足多也文选沈休文恩幸传论曰西京许史盖不足云】当令横笔阵一战静楚氛【法书卫夫人有笔阵图老杜诗笔阵独扫千人军左传曰一战而霸又曰楚氛甚恶】

张侯窘炊玉僦屋得空垆【战国策曰苏秦之楚三日乃得见王曰楚国之食贵于玉薪贵于桂今使臣食玉炊桂汉书司马相如传注曰卖酒之处累土为垆以居酒器形如锻垆据张文潜集有初到都下供职寄黄九诗曰僦舍酒家楼椎垆卷其旗鼠壤败晨炊守翁噪羣儿】但见索酒郎不见酒家胡【此句以献文潜老杜诗马上谁家白面郎临街下马坐人牀不通姓字羸豪甚指点银瓶索酒尝玉台新咏载辛延年羽林郎诗曰昔有霍家姝姓冯名子都依倚将军势谓笑酒家胡胡姬年十五春日独当垆】虽肥如瓠壶胷中殊不羸【汉书张苍传曰身长太肥白如瓠蜀志张裔传雍□假鬼教曰张府君如瓠壶外虽泽而内实羸不足杀令缚与吴晋史王湛传王济曰臣叔殊不痴】何用知如此文彩似於菟【谷梁曰何用见其是齐侯也又後汉邓晨传光武曰何用知非仆耶汉书司马迁传曰鄙没世而文彩不表于後左传曰楚人谓虎於菟】

荆公六艺学妙处端不朽【王安石字介甫元丰三年封荆国公初熙宁六年三月命知制诰吕惠卿修撰经义以安石提举子雱同修撰八年所撰诗书周礼义成送国子监镂板颁行之元丰二年八月安石又上改定误字焉世说司马太傅问谢车骑惠子五车何以无一言入玄谢曰当是妙处不传左传叔孙豹曰其次立言虽久而不废此之谓不朽】诸生用其短颇复凿户牖【世说曰周宏叔巧于用短杜方叔拙于用长此借用其字孔安国注鲁论曰吾党之

小子于大道妄作穿凿以成文章明皇孝经序曰希陞堂者必自□户牖注云言穿凿也】譬如学捧心初不悟己丑【庄子师金曰西施病心而瞶其里其里之丑人见而美之归亦捧心而瞶其里其里之富人见之坚闭门而不出贫人见之挈妻子而去之】玉石恐俱焚公为区别不【书曰火炎崑冈玉石俱焚鲁论曰譬诸草木区以别矣】

吾友陈师道抱独门扫轨【陈师道字履常一字无已徐州人文行甚高来京师枢密章惇欲一见之而不可退之诗曰吾友柳子厚其人艺且贤渊明诗曰顾我抱兹独僂俛四十年後汉书杜密传曰刘胜闭门扫轨无所干及】晁张作荐书射雉用一矢【易旅之六五曰射雉一矢亡终以誉命王弼注曰射雉以一矢而复亡之明虽有雉终不可得矣此云用一矢言为国之有人材犹射雉之有矢也世说注引虞预晋书陆机荐戴渊于赵王伦曰盖闻繁弱登御然後高墉之功显孤竹在肆然後降神之栞成按易曰公用射隼于高墉之上获之无不利繁弱弓名也山谷盖用此意但改射隼为射雉繁弱为一矢耳】吾闻举逸民故得天下喜【鲁论曰举逸民天下之民归心焉云汉诗序天下喜于王化复行】两公阵堂堂此士可摩垒【两公谓晁张孙子曰勿击堂堂之阵左传曰致师者御靡旌摩垒而还注云摩近也老杜诗气摩屈贾垒目短曹刘墙】

次韵答邢惇夫【惇夫名居实邢恕和叔之子少能文诸公多称之】

为山不能山过在一簣止【鲁论曰譬如为山未成一簣止吾止也注云簣土笼也】渥洼骐驎儿堕地志千里【汉书元鼎四年马生渥洼水中韵书曰骐驎白马黑脊傅休奕豫章行曰男儿当门户堕地自生神此借用东坡作王大年哀词云骥堕地走虎生而班魏武帝歌曰老骥伏枥志在千里】岷江初滥觞入楚乃无底【书禹贡曰岷山导江滥觞见前注列子曰渤海之东有大壑焉实惟无底之谷】将陞圣人堂道固有廉陞【鲁论曰由也陞堂矣未入于室也汉书贾?传曰陞九级上廉远地则堂高意谓学者不当躐等而陞进道必以渐也邢惇夫好大略小幼日便为涂远之计山谷书其文卷论之详矣】邢子好少年如世有源水【南史何妃传曰杨郎好年少此借用孟子曰原泉混混不舍昼夜盈科而後进放乎四海有本者如是注云有原本也】方求无津涯不作蛙井喜【书曰若涉大水其无津涯庄子秋水篇公子牟曰子独不闻夫埵井之蛙乎谓东海之鳖曰擅一壑之水而跨时埵井之乐此亦至矣】儿中兀老苍趣造甚奇异【退之诗田巴兀老苍怜汝矜瓜觜晋史向秀传曰发明奇趣】过闕王公门袖中有漫刺【汉书邹阳传何王之门不可曳长裾後汉祢衡传陰怀一刺既无所之适至于刺字漫灭】别来阻河山望远每障?【渊明诗情通万里外形迹滞江山宋玉高唐赋曰其少进也若姣姬揚?障目而望所思】斯文向千载有志常寡遂【陶渊明诗曰道丧向千载魏文帝与吴质书曰德琰才学足以着书美志不遂良可痛惜汉书武帝策董仲舒曰羣生寡遂】後生文楚楚照影若孔翠【言玩末而忘本诗曰蜉蝣之羽衣裳楚楚照影见前注楚辞曰孔盖兮翠旌注云孔雀之羽为车盖】不应太玄草曦价咸阳市【汉着扬雄传曰雄方草太玄有以自守泊如也史记吕不韦传着吕氏春秋布咸阳市门悬千金其上有能增损一字者予千金】雨作枕簟秋官闲省中睡梦不到汉东茗椀乃为?【柳子厚诗清冷集浓露枕簟凄已知文选沈休文有学省愁卧诗此借用左传汉东之国随为大时和叔谪随州惇夫侍焉左传楚昭王有疾卜之曰河为祟】闻君肺渴减颇复佳食寐读书得新功来鴈寄一字【

东坡诗一哦肺渴减惇夫病肺呕血山谷尝有诗云肺热今好否微凉生井桐乐府伊州歌曰征人去曰殷勤嘱归鴈来时早寄书老杜诗亲朋无一字】

和邢惇夫秋怀十首

残暑已倏装好风方来归【张平子思玄赋曰简元辰而倏装李善注云倏始也春秋闵公元年书季子来归左传曰嘉之也】未能疎团扇且复制秋衣【班婕妤怨歌行曰裁为合欢扇团团似明月常恐秋节至凉风夺炎热弃捐篋箠中恩情中道絶】幽诗曰七月流火九月授衣楚辞曰制芰荷以为衣】高蝉遽如许长吟送落晖【後汉左慈传老羝人语曰遽如许文选陆士衡拟古诗曰大耋嗟落晖】相戒趣女功莎虫能表微【春秋考异邮曰立秋促织鸣宋均曰趣织蟋蟀也立秋女功急故趣之幽诗曰五月斯螽动股六月莎鸡振羽十月蟋蟀入我牀下笺云言此三物之如此者将寒有渐非猝来也檀弓曰季武子寝疾螭固不说齐衰而入见曰斯道也将亡矣士唯公门说齐衰武子曰不亦善乎君子表微注云表犹明也此诗借用言莎虫戒寒如履霜之辨早】曩时高唐客暮雨朝行云【宋玉高唐赋曰先王尝游高唐梦见一妇人曰妾巫山之女也为高唐之客闻君游高唐愿荐枕席王因幸之去而辞曰妾在巫山之阳高丘之阻旦为朝云暮为行雨朝朝暮暮阳台之下】陰居怀天匹楚观梦纷纭【文选洛神赋曰虽潜处于太陰长寄心于君王李善注曰太陰衆神之所居赋又云叹匏瓜之无匹兮咏牵牛之独处谢惠连诗云汉有灵匹弥年阙相从高唐赋曰楚襄王与宋玉游于云梦之台又曰上至观侧地盖底平本草人参条注药性论云患人虚而多梦纷纭】我欲覩光仪斋明炷炉薰【选诗曰脉脉阻光仪礼中庸曰斋明盛服剧谈録曰唐昌观有女子折玉蕊花腾空而去严休复有诗曰终日斋心祷玉宸魂销眼冷未逢真】天高万物肃谁为帝子魂【文选张景阳杂诗曰龙蛰暄气凝天高万物肃楚辞湘夫人曰帝子降兮北渚目眇眇兮愁予李善注高唐赋引襄阳耆旧传赤帝女曰姚姬未行而卒葬于巫山之阳山谷此诗意若思古人而不得见故托兴于此】

七均师无声五和常主淡【唐志祖孝孙定律一宫二商三角四变徵五徵六羽七变宫其声由浊至清为一均淮南子曰无音者声之大宗也又曰无声而五音鸣焉无味而五味和焉礼记王制曰五味异和和音胡卧反扬推解嘲曰大味必淡】芸芸观此归一德贯真滥【老子曰夫物芸芸各归其根又曰万物并作吾以观其复鲁论曰一以贯之退之诗古声久埋没无由见真滥】梦临秋江水鱼鰕避窥瞰明月本无心谁令作寒监【言本无意于当世世人忌其照见之也如明月之监物岂其心哉退之镜潭诗鱼鰕不用避只是照蛟龙又寄卢仝诗每骑屋山下窥瞰浑舍惊怕走折东东坡晚年诗亦曰明月本自明无心孰为境挂空如水监写此山河影】王度无畦畛包荒用冯河【王度见前注汉书韩安国传曰圣人以天下为度庄子曰彼且无町畦亦与之无町畦又曰泛泛乎其若四海之无穷其无所畛域退之诗丈夫终莫生畦畛易泰卦之九二包荒用冯河不遐遗朋亡得尚于中行注谓包荒秽受纳冯河者也用心宏大无所遐弃故曰不遐遗也】秦收郑渠成晋得楚材多【亦前诗人材包新旧之意汉书沟洫志韩闻秦之好兴事欲罢之无令东伐使水工郑国间说秦令凿泾水以溉田中作而觉秦欲杀郑国郑国曰始臣为间然渠成亦秦之利也秦以为然卒使就渠左传声子使于晋选如楚令尹子木与之语问晋大夫与楚孰贤对曰虽楚有材晋实用之子木曰夫独

无族姻乎对曰虽有而用楚材实多】用人当其物不但轴与蒟【庄子曰言而当物则终日言而尽道此借用考盘诗曰考盘在阿硕人之迈注云迈寛大貌一云饥意又曰考盘在陆硕人之轴注云轴进也一云病也】六通而四辟玉烛四时和【庄子曰六通四辟于帝王之德此借用以言当如舜之辟四门广致衆贤也玉烛见前注汉书刘向传曰衆贤和于朝则万物和于野】

相如用全赵留侯开有汉【史记蔺相如传曰事赵惠文王留侯世家曰汉六年封张良为留侯】名登太山重功略天下半【史记蔺相如传太史公曰蔺相如名重太山其处智勇可谓兼之矣留侯世家高帝曰运筹帷幄中决胜千里外此子房功也吴都赋曰灌注乎天下之半此借用】让颇封韩彭事成羣疑泮【相如传曰相如为上卿位在廉颇之右廉颇宣言曰我见相如必辱之相如闻不肯与会每朝时常称病不欲与廉颇争列相如出望见廉颇引车避匿曰吾所以为此者以先国家之急而後私讎也留侯世家曰汉王问良吾欲捐关以东弃之谁可与共功者良曰黥布彭越此两人可急使韩信可属大事即欲捐之捐之此三人则楚可破卒破楚者此三人力也易曰遇雨之吉羣疑亡也北史儒林传序曰积滞羣疑溘然冰释诗曰迨冰未泮】天道当曲全小智警後患【老子曰曲则全枉则直庄子曰小智间间又曰不忍一时之伤而警万世之患此诗与前篇皆救朋党之渐】

庆州名父子忠勇横八区【庆州谓范德孺见前注汉书萧育传以育名父子着村能文选辨亡论曰忠勇伯世又左太冲咏史诗曰英名擅八区老杜诗直气横乾坤】许身如稷契初不学孙吴【老杜诗许身一何愚自比稷与契晋书山涛传不学孙吴而闇与之合】荷戈去防秋面皱鬓欲疎【荷戈见前注老杜寄董嘉荣诗曰闻道君牙帐防秋近赤霄楞严经波斯匿王曰迫于衰耄发白面皱】虽折千里冲岂若秉事枢【折冲见前注退之南海庙碑诗曰胡不均宏俾执事枢范文正公笃于忠亮虽喜功名而不为朋党早岁排吕申公勇于立事其徒因之矫厉遇直公不喜也自睦州还朝出领西事恐申公不为之地无以成功乃为书自咎解仇而去其後以参知政事安抚陕西申公既老居郑相遇于涂文正身历中书知事之难有悔过之语于是申公欣然相与语终日申公问何为函去朝廷文正言欲经略西事耳申公曰终制西事莫如在朝廷之为便文正?然事见苏黄门龙川志知此然後知山谷之诗有味也】

谢公蘊风流诗作鲍照语【谢公当是师厚师厚名景初南阳人南史鲍照字明远文辞赡逸尝为乐府文甚莲丽】丝虫萦草纸笔力挟风雨【言遗藁虽为蛛丝所萦而韩墨英特之气终不可掩西京杂记淮南王着鸿烈白云字中皆挟风霜老杜诗笔落惊风雨】万里投谏书石交化豺虎世方用贤髦先成泉下土【师厚为成都路提刑坐燕饮事为言者所攻 宁五年遂以罪废观此诗语似有所因苏秦传曰此所谓弃仇讎而得石交者也班固如还书张耳陈余述曰张陈之交游如父子据国争权汉豺虎文选张孟阳七哀诗曰昔为万乘君今为丘山土】

今日吕虢州堂堂古遗直【虢州未详左传孔子曰叔向古之遗直也】许国输九死补天链五色【晋书周札传王导议札与臣等便以身许国死而後已文选曹子建表曰输能于明君楚辞曰虽九死其犹未悔列子曰天地亦物也物有不足故昔者女娲链五色石以补其阙】

颇修谏员缺人壽无金石【文还古诗曰人生非金石岂能长壽考】西风壮夫泪多为程顥滴【韩绛作明道程先生墓志曰伯淳讳顥元丰八年六月卒自元丰以来论贤士大夫宜在天子左右者君必豫焉实録曰御史中丞吕公着荐顥授太子中允权监察御史里行後谪监汝州酒税哲宗即位召为宗正丞未行疾卒顥深有经济之意不幸早死士大夫识与不识莫不哀伤按实録顥与李常孙觉熙宁中尝言青苗不便皆外任云】

吾友陈师道抱瑟不吹竽【选之诗曰吾友柳子厚其人艺且贤又答陈商书曰齐王好竽有求仕于齐者据瑟而往立王之门三年不得入客骂之曰王好竽而子鼓瑟瑟虽工如王不好何】文章似扬马歔唾落明珠【谓扬雄司马相如後汉赵壹歌曰势家多所宜歔唾自成珠】固穷有胆气风壑啸於菟【固穷见前注退之送张道士诗曰臣有胆与气不忍死茅茨老杜诗将军胆气雄欧阳公病暑赋云陰壑惨惨多悲风】秋来入诗律陶谢不枝梧【老杜诗曰诗律羣公问儒门旧长史又曰陶谢不枝梧风骚共准激陶谓渊明谢谓灵运】

邢子卧北窗吟秋意少惊【卧北窗见前注汉书庾陵厉王胥传歌曰出人无惊为乐函注云惊亦乐也】读书用意苦呕血惊乃翁【老杜诗更觉陰何苦用心左传曰伏弢呕血汉书项籍传高祖曰必欲烹乃翁幸分我一杯羹】安得和扁辈为浣学古胷【医和见左传扁鹊见史记扁鹊传曰上古俞跗湔浣肠胃涤洗五藏书曰学古入官】肺热今好否微凉生井桐【鲍照诗时危各奔命终然肺肝热老杜诗高秋苏肺气魏明帝诗双桐生空井】

谢公定和二范秋怀五首邀予同作

西风一叶脱迹亦不可扫【淮南子曰见一叶落而知岁之将暮谢庄月赋曰洞庭始波木叶微脱文选北山移文曰或飞柯以折轮乍低枝而扫迹此引用言秋叶之变哀不复可扫迹也】巷有白马生朝回焚谏草【後汉书张湛传湛常乘白马光武每见湛辄言白马生且复谏矣老杜诗朝回日日典春衣又诗避人焚谏草骑马欲鸡栖唐书马周焚章表曰管晏暴君之过取身後名吾不为也魏志陈羣传注曰前後密陈得失每上封事辄削其草袁子曰夫仁者爱人施于君谓之忠施于亲谓之孝其本一也故君亲有过谏而不入求之反覆不得已而言不忍宣也君子谓陈羣于是乎长者矣】谁云事君难是亦父子间所要功补袞不言能犯顔【意已见前注语曰为君难为臣不易礼记儒行曰事君难进而易退补袞见前注礼记檀弓注无犯谓不犯顔而谏】四会有黄令学古着勲多【谓有功于此道也四会县隶端州黄令名介字几复山谷为作墓志铭说命曰学于古训乃有获曹子建书曰岂徒以翰墨为勲绩此反其意而申之风俗通曰盖严杨惲勲着王室】白头对红叶奈此摇落何【宋玉九辩曰悲哉秋之为气也萧索兮草木摇落而变衰】虽怀斲鼻巧有斧且无柯【斲鼻见前注伐柯诗注曰柯斧柄也】安得五十弦奏此寒士歌【言其声之悲也汉书郊祀志曰黄帝命素女鼓瑟帝悲不止故破五十弦为二十五弦庄子曰曾子居卫捉衿而肘见纳屨而踵决曳屨而歌商颂声满天地若出金石南史刘祥传褚彦回曰寒士不逊】

采莲涉江湖采菊度林藪【言用心之苦也古乐府诗曰江南可采莲选诗曰涉江采芙蓉渊明诗曰采菊东篱下班固典引曰肴核仁义之林藪】插鬓不成妍谁怜飞蓬首【言无知已

也老杜佳人诗曰摘花不插髻采柏动盈掬选诗曰皎洁不成妍诗曰自伯之束首如飞蓬岂无膏沐谁适为容山谷受知于谢师厚从之学诗作此诗时师厚已死】平生耦耕地风雨深粮莠【耦耕字见鲁论南史陶渊明传夫耕于前妻锄于後山谷前娶师厚之女先死矣诗云不稂不莠刘向封事粮莠与蓬蒿并兴】谢公遂如此永袖絶弦手【王羲之帖云蔡公遂委笃晋书王廙字世将廙卒明帝曰世将复至于此退之祭子厚文曰大匠旁观缩手?间吕氏春秋曰锺期死伯牙遂絶弦以世无知音】

往日孙阳翟才可任遗补【张方回家本有山谷自注云孙贲字公素阳翟县属许州唐书百官志武后置左右补阙拾遗掌供奉讽谏温造传舒元褒曰遗补虽卑侍臣也】击强如摧枯食檠不知苦【後汉庞参传曰拔薤欲吾击强宗汉书异姓侯王表曰摧枯朽者易为力乐天诗三年为刺史饮冰复食檠】属者缺谏垣时论或未许【汉书李寻传曰属者颇有变改注云属者谓近时也音之欲反旧唐书元稹传既居谏垣不欲碌碌自滞退之会合联句曰君才诚倜傥时论方?溶】倜可假一邦使民作邹鲁【一邦见鲁论秘阁法帖有李斯篆曰使父子为邹鲁按修水集有山谷跋孙阳翟公素十诗云世笑予诗论公素不实曰公素能击强则请闻命至于使民作邹鲁则不知也予告之曰公素之击强亦以其害善良夺长吏之柄耶将不及问皐白并击无罪尔然则以今之偷一切以规自免万事决于老吏之口者为能使斯民作邹鲁耶】

用智常恨耄用决常恨早【用人要当及其壮时元佑之用诸老熙宁之用新进皆不免有遗憾也左传刘子曰谚所谓老将知而耄及之者其赵孟之谓乎十二国史曰齐子奇年十八齐君任为东阿既行矣而君悔焉使人追之使者不追还曰臣见子奇所与同载者白首矣夫老者之智少者之决此必能理东阿】推轂天下士诚心要倾倒【汉书郑当时传曰其推轂士及官属丞史诚有味其言也世说庾公谓孙兴公曰卫永风韵虽不及卿诸人倾倒处亦不近】海宇日清明庙堂勤洒扫【书曰永济四海诗曰会朝清明又曰子有廷内弗洒弗埽此借用语曰洒扫进退抑末也】何为陈师道白发三径草【陈师道已见前注嵇康高士传曰蒋元卿还杜陵荆棘塞门舍中有三径不出按三辅决录蒋诩字元卿】

送谢公定作竟陵主簿【竟陵县隶後州】

谢公文章如虎豹至今斑斑在儿孙【谢公谓师厚公定盖其子也东坡作王大年哀词曰骥堕地走虎生而斑视其父子以考我言文选七命曰拉虎摧斑李善注云斑虎文也上林赋曰被斑文老杜诗终老无儿孙】竟陵主簿极多闻万事不理专讨论【多闻见鲁论後汉书胡广传万事不理问伯始鲁论曰世叔讨论之此借用以言专意学问】涧松无心古须鬣天球不琢中粹温【文选张景阳诗鬱鬱涧底松酉阳杂俎曰松言五粒者粒当言鬣自有一种名鬣皮无鳞甲而结实多书曰天球河图在东序礼记曰大圭不琢琢音篆刻也文选顔延年陶徵士诔曰贞夷粹温】落笔尘沙百马奔剧谈风霆九河翻【老杜诗观我落笔中书堂又诗尘沙立?途又诗奔腾献荔支百马死山谷文选七发曰沌沌浑浑壮如奔马汉书扬雄传曰口吃不能剧谈晋书郭象传王衍每云听象语如悬河瀉水注而不竭退之诗泪如九河翻】曾中恢疎无怨恩当官持廉庭不烦【老子曰天网恢恢疎而不失此摘其字用之史记范雎传

一饭之德必偿睚眦之怨必报退之听琴诗昵昵儿女语恩怨相尔汝左传曰当官而行何强之有退之卢丞志铭曰能持廉名汉书翟方进传居官不烦苛】吏民斯公亦可忍慎勿惊鱼使水浑【汉书曹参传属其後相曰以齐狱市为寄慎勿扰也淮南子曰使叶落者风摇之使水浊者鱼挠之老杜诗汲多井水浑】汉滨耆旧今谁存驷马高盖徒纷纷安知四海习凿齿拄笏看度南山云【襄阳在汉上习凿齿作襄阳耆旧传云汉末尝有四郡守七都尉二卿两侍中朱轩高盖会山下因名冠盖山里曰冠盖里汉书于公曰少高大门闾令容四马高盖车老杜诗世上儿子徒纷纷晋书习凿齿襄阳人为恒温主簿温曰徒三十年读书不如一诣习主簿桑门释道安与凿齿初相见道安曰弥天释道安凿齿曰四海习凿齿人谓佳对又王徽之传以手板拄颊云西山朝来致有爽气此借用】

奉答谢公静与荣子邕论狄元规孙少述诗长韵

谢公遂如此宰木已三霜【谢公谓谢师厚已见前注公羊传曰若尔之年者宰上之木拱矣注云宰豕也老杜诗十暑岷山葛三霜楚户砧】无人知句法秋月自澄江【老杜诗佳句法如何山谷作黄氏二室墓志云庭坚之诗卒从谢公得句法按谢朓诗云澄江静如练故用以属师厚卢全诗曰谢朓澄江今夜月也应忆着此山夫】二子学迈俗窥杜见牖窻【二子谓狄孙文选石李伦思归引序曰余少有大志夸迈流俗元桢作杜子美墓铭曰李白尚不能历其藩翰况堂与手鲁论曰窥见室家之好舒元与悲剡藤文曰今九牧士人自言能见文章户牖者其数与麻多相多】试斲郢人鼻未免伤手创【言二子犹未及其妙手也斲鼻见前注退之祭子厚文曰不善为斲颜指汗颜老子曰代大匠斲者希不伤其手矣】蟹胥与竹萌乃不美羊腔【言二子尚好奇之病如嗜异馔而弃常珍也周礼庖人共祭祀之好羞注曰谓若荆州之鱼青州之蟹胥按说文曰胥蟹醢也尔雅曰笋竹萌退之诗酒壶缀羊腔】自往见谢公论诗得濠梁【往谓往曰得濠梁言有所悟入也晋书王坦之传谢安曰常谓君粗得鄙趣者犹未悟之濠上耶按庄子与惠子游于濠梁之上庄子曰儵鱼出游从容是鱼乐也惠子曰子非鱼安知鱼之乐庄子曰子非我安知我不知鱼之乐惠子曰我非子固不知子矣子固非鱼也子之不知鱼之乐全矣庄子曰请循其本子曰汝安知鱼乐云者既已知吾知之而问我我知之濠上也杜诗谷口旧相得濠梁同见招】世方尊两耳未敢筑受降【张平子东京赋曰客所谓未学肤受贵耳而贱目者也李善注引桓子新论曰世咸尊古卑今贵所闻贱所见汉书曰武帝遣公孙敖筑塞外受降城又按唐书张仁愿筑三受降城】丹穴凤凰羽风林虎豹章【言文章有种性也蜀志秦宓曰虎生而文炳凤生而五色岂以五采自饰画哉山海经曰丹穴之山有鸟名凤凰老杜诗风林纖月落易曰云从龙风从虎】小谢有家法闻此不听冰【後汉书儒林传序曰各以家法教授不听冰言其不疑也述征记曰河冰合须狐听而行汉书文帝纪注曰狐之为兽其性多疑每渡冰河且听且渡故言疑者称狐疑冰字韵与章字韵不协盖诗人旁用他韵如退之此日足可惜诗是也又按玉台新咏徐翰杂诗曰沈陰结愁忧愁忧为谁兴念兴君生别各在天一方良会未有期中心摧且伤不聊忧餐食慊慊常饥空端坐而无为髣髴君容光此诗兴与方空皆不同韵盖古诗多如此】相思北风恶归鴈落斜行【言无因寄书也文选古诗客从远方来遗我一书札上言长相思下言久离别唐人王建诗就中一夜东风恶老杜诗落鴈浮寒水张祜诗万人齐指处一鴈落寒空】

赠送张叔和【坝字叔和洛中人张焘龙图之後娶山谷季妹】

张侯温如邹子律能令陰谷黍生春【刘向别錄曰燕有谷地爽而寒不生五谷邹衍吹律而温至黍生今名黍谷】有齐先君之季女十年择对无可人【山谷父名度字亚夫终于大理寺丞有四女嫁叔和者其季也采苹诗有齐季女注云齐敬也左传曰则犹有先君之适若而人後汉书梁鸿传孟光择对不嫁礼记孔子曰管仲遇盗取二人焉上以为公臣曰其所与游避也可人也又见蜀费禕晋桓温传】箕帚扫公堂上尘家风孝友故相亲【汉高帝纪吕公曰臣有息女愿为箕帚妾後汉曹世叔妻传遗令曰执箕帚于曹氏注云言主贱役事舅姑诗曰张仲孝友】庙中时荐南涧苹儿女衣袴得补纫【召南采苹序曰大夫妻能循法度也诗曰于以采苹南涧之滨又曰于以奠之宗室牖下注云宗室大宗之庙也左传曰苹蘩蕓藻之菜可荐于鬼神礼记内则曰衣裳绽裂纫箴请补缀】两家俱为白头计察公与人意甚真【言以岁寒相期汉书邹阳传有曰白头如新倾盖如故老杜诗甚知文人真退之诗与人常不欸】吏能束缚老奸手要使鰥寡无顰呻【退之上李实书曰老奸宿赃消缩摧沮顰呻谓蹙额愁叹退之韩宏碑曰察其顰呻】但回此光还照已平生倦学皆日新【世出世间本无二致能束缚老奸者竟是谁耶传灯錄云居义能曰回光返照看身心是何物书曰德日新】我提养生之四印君家所有更赠君【宗门补三印谓印空印水印泥山谷作云峯悦禅师语錄序云不受然灯记别自提三印正宗今日四印亦犹此意谓忍默平直也黄庭经曰子能守一万事毕子自有之持勿失此云君家所有亦此意也先德万云是汝屋里事】百战百胜不如一忍【孙子曰百战百胜非事之善者也晋书朱伺传曰两敌共对惟当忍之彼不能忍我能忍是以胜耳老苏先生权书曰一忍可以支百勇书曰必有忍其乃有济】万言万当不如一默【史记龟策传云十言十当十战十胜传十语九中不如一默】无可简择眼界平【三祖信心铭曰至道无难惟嫌简择但莫憎爱洞然明白心经曰无眼界乃至无意识界圆觉经云譬如眼光照了前境其光圆满得无憎爱】不藏秋毫心地直【秋毫见孟子楞严经曰十方如来同一道故出离生死皆以直心心言直故如是乃至终始地位中间永无委曲诸相传灯錄十七祖偈曰心地本无生】我肱三折得此医自觉两踵生光辉【言涉世既久始信此理自觉入道有渐也左传曰三折肱为良医华严经夜摩天宫偈赞品曰尔时世尊从两足跌上放百千亿光明李长者论曰十信足下轮中放光十住足指端放光此十行之中足跌上明次第随位昇进一本踵作种或引乾峯示衆云法身有三作病二种光须是一一透得始解稳坐殊失此诗本意文选范彦龙诗传瑞生光辉庄子真人之息以踵东坡诗八部犹光辉】团蒲日静鸟吟时炉薰一炷试观之【欲其清心以观此四印之妙用团蒲见前注传灯錄宗永禅师颂曰南台静坐一炉香亘日凝然万虑忘欧公诗宴坐忘言一炷香】

送顾子敦赴河东三首

头白书林二十年印章令领晋山川【後汉儒林传序曰孝和亦数幸东观覽閱书林河东古晋地也】紫参可掘宜包贡青铁无多莫铸钱【本草云人参主补五藏安精神定魂魄生上党山谷注云潞州太行山所出谓之紫团参按潞州即上党属河东又按河东大通监西冶岁链青铁十余万事见韩魏公家传紫参按本草别载一条功用极少前注乃言人参故指为潞州所产又紫团参乃牧蒙之一名也】劝课农桑诚有道折冲樽俎不临边【後汉张堪为渔

阳守劝农桑折冲樽俎见晏子春秋具前注文仲子曰折冲樽俎可也不必临边也】要知使者功多少看取春郊处处田【欲其务本业以厚民】

家在江东不系怀爱民忧国有从来月叙汾沁催驿马雪暗岢岚传酒杯【左传曰有自来矣水经曰汾水出太原汾阳县北管涔山又曰沁水出上党洹县竭戾山按輿地广记管涔山在今宪州沁水县在今泽州汉书文帝纪诏太仆见马遗财足余皆给传置注云传置驿也退之诗翻翻走驿马輿地广记河东有岢岚军盖因岢岚山水为名老杜诗旧日重阳日传杯不放杯】塞上金汤惟粟粒胷中水镜是人材【汉书食货志晁错言神农之教曰有石城十仞汤池百步带甲万万而亡粟弗能守也後汉书光武赞曰金汤失险杜牧之阿房宫赋曰钉头磷磷多于在庾之粟粒水镜见前注】遥知便解青牛句一寸功名心已灰【言学道有得志怀于功名也老子曰功成名遂身退天之道按关内传曰尹喜尝登楼望东极有紫气曰应有圣人过京邑果见老君乘青牛车来过张文潜感遇诗亦曰我师青牛书不争忌处先灰心见庄子老杜诗丹心一寸灰】

揽辔都城风露秋行台无妾护衣篝【後汉范滂传滂为清诏使登车揽辔慨然有澄清天下之志应劭汉官仪曰尚书郎入直台中女侍史二人执香炉烧薰以从入台中给使护衣服说文曰篝落也可薰衣北魏有竹台尚书谓在外不在朝廷也】虎头妙墨能频寄马乳蒲萄不待求【老杜诗何年顾虎头满壁画沧洲按欧阳询艺文类聚引世说顾恺之为虎头将军然今世说不载而历代名画说云恺之小字虎头未知孰是晋书恺之传云善丹青江文通别赋云渊云之墨妙严乐之笔精退之蒲萄诗若欲满盘堆马乳莫辞添竹引龙须按本草蒲萄注蜀本图经云子有似马乳者白乐天云燕姬酌蒲萄谓太原出蒲萄酒也】上党地寒应强饮两河民病要分忧【上党今潞州周礼考工记曰强饮强食两河谓河东河北】犹闻昔在军兴日一马人间费十牛【元丰四年陕西用兵河东困于征调故十耕牛之费仅给一战马淮南子曰杀罢牛可以赎良马之死莫之为也杀牛必亡之数山谷略采此意亦欲子孰爱惜民力】

山谷内集诗注卷四

山谷内集诗注卷五

钦定四库全书

山谷内集诗注卷五 宋 黄庭坚 撰

任渊注

司马文正公挽词四首

元佑开皇极功归用老成【诗曰虽无老成人尚有典刑】惟深万物表不令四时行【魏志曹爽传注引魏氏春秋何晏尝曰惟深也故能通天下之志夏侯太初有马按此语本出易系辞孟郊诗迥出万物表文选北山移文曰亭亭物表鲁论曰其身正不令而行又曰天何言哉四时行焉晋书褚裒传谢安曰裒虽不言而四时之气亦备】日者倾三接天乎奠两楹【言入对未及遽尔薨谢为可哀也左传曰日卫不睦注云往日也汉书高帝纪立吴王诏曰日者荆王兼有其地易晋卦曰晋画日三按左传姜氏哭而过市曰天乎仲为不道礼记檀弓子夏曰天乎予之无罪也檀弓又载孔子曰予梦坐奠两楹之间子殆将死也】堂堂宁复有埋玉恸佳城【东坡祭韩魏公文曰巍巍堂堂宁复有之晋书庾亮传将葬何充叹曰埋玉树于土中使人情何能已西京杂记滕公驾至东都门马不能前以足跑地滕公使掘地得石椁有铭曰佳城郁郁三千里见白日吁嗟滕公居此室】国在多艰日人如大雅诗【访落诗曰未堪家多难汉书赞曰夫惟大雅卓尔不羣河间献王近之矣注谓明哲保身此引用盖以仲山甫比公非特取明哲保身而已】忠清俱没世孝友是生知【没世言至死不改哲庙题温公碑首曰清忠粹德之碑】加璧延诸老?弓抚四夷【公为宰相招聘诸儒如程颐等自布衣为讲读又戒敕西鄙息事汉书申公传上使使束帛加璧迎申公诗曰载橐弓矢汉书陈平传曰宰相外镇抚四夷诸侯内亲附百姓】公身与宗社同作太平基【谓宗庙社稷之灵相之于幽而公助之于明也南山有台诗序曰得贤则能为邦家立太平之基】

献纳无虚日居然迹已陈【班固两都赋序曰日月献纳左传曰府无虚月三都赋曰居然而辨八方文子曰形之与名居然别矣王羲之兰亭序曰俯仰之间已为陈迹】清班区玉石宝历顺星辰【上言流品不杂下言燮理有方书曰玉石俱焚鲁论曰区以别矣尧典曰历象日月星辰】更化思鸣鵙遗书似获麟【汉书董仲书曰更化则可善治豳诗曰七月鸣鵙此引用言以农寻为王业根本遣书谓资治通鉴言可配春秋也春秋左传序曰余以为感麟而作起获麟则文止于所起】易名无异论今代两三人【易名谓作謚檀弓曰请所以易其名者本朝謚文正惟王曾范仲淹及公尔温公尝駁夏竦謚云文正謚之至美无以复加虽以周公之才不敢兼取况如竦者岂易充当】

毁誉盖棺了於今名实尊【言人死则毁誉亦随而泯独公死後其名尤重老杜诗文夫盖棺事始定孟子曰先名实者为人也】哀荣有王命终始酌民言【朝廷用公于久外恤公于既歿皆取天下之公论也鲁论曰其生也荣其死也哀礼记曰上酌民言】蝉冕三公府深衣独

乐园公心两无累忧国爱元元【言公无穷达之异其心一于忧国爱民而已选诗曰咄此蝉冕客汉时仪文侍中冠惠文冠加金貂附蝉为文貂尾为饰谓之貂蝉公依礼记作深衣每出朝服乘马用皮篋贮深衣随其後入独乐园则衣之事具邵氏闻见録公有独乐园记曰熙宁四年迁叟始家洛六年买田二十亩于尊贤坊北辟以为围命之曰独乐战国策苏秦曰制海内子元元】次韵子瞻武昌西山【东坡集此诗序云元佑元年十一月二十九日与翰林承旨邹圣求会宿玉堂偶话旧事圣求尝作元次山洼樽铭刻之岩石因为此诗请圣求同赋】

漫郎江南酒隐处古木参天应手栽【元次山自释曰始自称猗珂子将家灊滨乃自称浪士及有官时人以为浪者亦漫为官乎蒙呼为漫郎及家樊上漫遂显焉又自注曰言郎者为作尚书郎樊在武昌县西五里按寰宇记武昌今属鄂州孟郊诗隐士多隐酒此言信难刊文选曹子建诗荆棘上参天】石?为尊酌花鸟自许作鼎调盐梅【元次山杯樽铭曰郎亭西乳有丛石石临樊水漫叟构石颠以为亭石有窠颠者因修之以藏酒命为杯樽作铭云云老杜诗春来花鸟莫深愁书曰若作和羹尔惟盐梅】平生四海苏太史酒浇不下胸崔嵬【东坡尝为直史馆故云太史晋书习凿齿传曰四海习凿齿酒浇见前注】黄州副使坐闲散谏疏无路通银台【东坡尝责受黄州副团退之进学解曰投闲置散乃分之宜国朝会要云银台司掌受天下奏状东京记云淳化四年八月置知银台通进司】鸛鵚洲前弄明月江妃起舞袜生埃【寰宇记鸛鵚洲在鄂州江夏县大江之东南黄州与鄂州相望小说载鬼诗曰城市多嚣尘还山弄明月文选蜀都赋曰娉江妃与神游史记项庄拔劔起舞曹植洛神赋曰凌波微步罗襪生尘】次山醉魂招髣髴步入寒溪金碧堆【退之诗怪花醉魂馨楚辞有宋玉招魂寰宇记云樊山在鄂州西山东十步有冈冈下有寒溪文选陆机连珠曰金碧之岩必辱凤举之使卢仝诗青空凿出黄金堆】洗湔尘痕饮嘉客笑倚武昌江作壘谁知文章照今古野老争席渔争隈【庄子曰含者与之争席尔雅隩隈郭璞注云今江东呼为浦淮南子曰渔者不争隈】邓公勒铭留刻画剜剔银钩洗绿苔【邓润甫字圣求後更名温伯嘉佑中为武昌令乐天诗题诗此岩壁云覆莓苔封退之石鼓歌剜剔藓露节角】琢磨十年烟雨晦摸索一读心眼开【?磨谓圣求所刻铭晋贤书曹娥碑後云汉议郎蔡邕闻之来观夜闇手摸其文而读之国史纂异许敬宗曰若遇曹刘沈谢暗中摸索亦可识後汉书王常传曰闻陛下即位河北心开目明欧阳公石篆诗曰见之但觉心眼开】谪去长沙忧鵬入归来杞国痛天摧【东坡谪黄州凡七年元丰八年召还时裕陵已成汉书贾谊为长沙传三年有鵬飞入谊舍不祥鸟也谊既已谪居自伤悼乃为赋以自广列子曰?国有人忧天地崩墮】玉堂却对邓公直北门唤仗听风雷【翰林志凡当直之法着为条例题于北厅之西门唐书百官志曰乾封以後始号北门学士五代史李琪传曰唐故事御紫宸殿乃自正衙唤仗由合门而入百官随以入见谓之入合风雷以言号令见周易】山川悠远莫浪许富贵峥嵘今鼎来【穆天子传西王母为天子谣曰白云在天山陵自出道里悠远山川间之将子无死尚能复来天子答之曰予归东土和治诸夏万民平均吾顾见汝比及三年将复而野此句颇采其意朝野僉载唐咸亨中谣曰莫浪语阿婆瞋老杜亦云将诗莫浪传汉书匡衡传曰无说诗匡鼎来注云鼎方也又贾捐之传曰石显鼎贵】万壑松声如在耳意不及此文生哀【万壑松声何豫富贵者事情因文生自尔感慨言东坡诗语之妙足以动荡如此也盖东坡首章曰请公作诗寄父老往和万壑松声哀左传曰言犹在耳又曰孤始愿不及此世说孙楚除服作诗示王武子王曰未知文于情生情于文生览之凄然增伉俪之重此用其意谓情于文生也】

子瞻诗句妙一世乃云效庭坚体盖退之戏效孟郊樊宗师之比以文滑稽耳恐後生不解故次韵道之【子瞻送杨孟容诗云我家峩眉阴与子同一邦即此韵】

我诗如曹鄴浅陋不成邦【郑氏诗谱云周武王封叔振铎于曹今济陰定陶是也桧国居浹洧之间祝融氏名黎其後八姓惟妘姓桧者处其地焉左传季子观乐自鄴以下无讥焉注曰季子闻鄴曹二国歌不复讥之以其微也周礼大宗伯注云子男不执圭者未成国衡门诗注曰言浅陋也】公如大国楚吞五湖三江【周礼职方氏扬州其川其江其浸五湖左冲冲吴都赋曰或吞江而纳汉伽蓝记王肃曰羊比齐鲁大邦鱼比邾莒小国此诗略用其意】赤壁风月笛玉堂云雾窗【谓东坡无穷达之异东坡谪黄州凡五年尝游赤壁有前後赋按鄂州蒲圻县有赤壁山黄州亦有之杜牧之诗何人教我吹长笛兴倚春风弄月明元佑元年东坡自中书舍人迁翰林学士玉堂见前注太白诗归来桃花岩得憩云窗眼退之诗云窗雾阁事恍惚山谷题东坡赞曰东坡之酒赤壁之笛又东坡赤壁赋曰客有吹洞箫者赤壁之笛意取此乎】句法提一律坚城受我降【老杜诗覓句亲知律退之樊宗师铭曰由汉迄今用一律此借用其字言自提一家之军律也受降城见前注】枯松倒涧壑波涛所舂撞万牛挽不前公乃独力扛【枯松以自况太白蜀道难曰枯松倒挂倚絶壁退之诗洪涛舂撞禹穴幽按礼记学记注曰舂容谓重撞击也老杜古柏行曰大厦如倾要梁栋万牛回首丘山重汉书邹阳传曰使有自悔不前之心退之诗龙文百斛鼎笔力可独扛】诸人方嗤点渠非晁张双【老杜戏为絶句曰今人嗤点流传赋不觉前贤畏後生按干宝晋纪总论曰盖共嗤点以为?尘而相诟病矣晁无咎张文潜皆苏公门下士】但怀相识察牀下拜老龐【选诗一心抱区区惧君不识察蜀志龐统传注引襄阳记曰诸葛孔明为卧龙龐士元为凤邹司马德操为水镜盖皆龐德公题品之语也德公襄阳人孔明每至其家独拜牀下】小儿未可知客或许敦龐堪壻阿巽买红纒酒缸【终上句相知之意且欲为其子求婚于苏氏抑东坡或尝以此许之也山谷在黔中与王泸州帖云小子相今年十四骨气差龐厚以此帖观之在京师时三四岁矣阿巽盖苏迈伯达之女东坡之孙山谷虽有此言其後契濶竟不成婚嫁范子功之孙湜湜字冥叟敷文学士苏符仲虎伯达之子也其言云尔左氏成十六年传曰民生敦龐汉书匈奴传曰愿壻汉氏以自亲说文曰缸瓶也老杜诗茗饮蔗浆携所有瓷罌无谢玉为缸今人定壻者多以红彩纒酒壶云】

柳閔展如子瞻甥也其才德甚美有意于学故以桃李不言下自成蹊八字作诗赠之

柳君文武甚睨视万人豪【谷梁传子胥挟弓扶矢而干闾庐闾庐曰文之甚武之甚左传楚子西曰光又甚文】老气鼓不作卷旗解弓刀【老杜诗老气横九州左传曰一鼓作气退之送郑尚书序曰府帅必左握刀右属弓矢】上为朝阳桐下为涧溪毛【言必为世用随所遇何如耳朝阳桐谓可作琴瑟以荐清庙卷阿诗曰梧桐生矣于彼朝阳注曰梧桐本生山冈太平而後生朝阳左传曰涧溪沼沚之毛可荐于鬼神可羞于王公】囊中有美实期子种蟠桃【期之以远大不欲其汲汲于人知也东坡和山谷诗盖云期君蟠桃枝千岁终一尝山海经曰东海有度索山上有大桃树屈蟠三千里曰蟠桃汉武帝故事西王母以桃七枚献帝帝欲留核种之王母笑曰此桃三千年生华三千年结实】

浮阳愧嘉鱼【荀子曰鱼?者浮阳之鱼也肱于沙而思水则无逮矣注云谓此鱼好浮于水上就阳也说苑宓子贱为单父宰阳画谓之曰夫扱纶错饵迎而吸之者阳桥也其为鱼薄而不美若存若亡若食若不食者魴也其为鱼也博而厚味子贱曰善于是未至单父冠盖迎之者交接于道子贱曰车驱之车驱之夫阳画之所谓阳桥者至矣诗曰南有嘉鱼烝然罩罩】道傍多苦李【晋书王戎传戎与羣儿戏于道侧见李树多实等辈竞取戎独不往曰树在道边而多子必苦李也世说以道边为道傍】古来贤达人不争咸阳市【老杜诗古来贤达士宁受外物牵咸阳市用秦吕不韦着吕氏春秋事见前注】吾子富春秋【仪礼冠礼曰愿吾子之教之也注云吾子相亲之辞子男子之美称汉书齐襄王传曰皇帝春秋富注云比之於财方未匱竭】日月东趋水【言年少当惜日也孔文举论盛孝章书曰岁月不居时节如流尚书大传曰百川趋于东海一本作东逝水接老杜诗不见堂前东逝波盖用鲁论逝川意】潜圣有玉音闻道而已矣【潜圣谓孔子易曰潜龙勿用下也王弼注云龙潜而勿用必穷处于下也文王明夷则主可知矣仲尼旅人则国可知矣正义亦曰言圣人于此潜龙之时在卑下也孟子曰孔子之谓集大成金声而玉振之司马相如长门赋曰得尚君之玉音鲁论曰朝闻道夕死可矣诗曰无金玉尔音而有遐心】

霜威能折肱风力欲冰酒【太白诗天霜下严威医书谓大寒惟酒不冰西京杂记曰汉天子以酒为书滴取其不冰此诗用绵可折而酒可冰霜风之惨可知也】勤子来访道枵然我何有【勤谓劳烦左传曰子母勤姑归惠子谓庄子曰剖之以为瓢则瓠落无所客非不鸣然大也吾为其无用而剖之】寝兴与时俱由我屈伸肘【诗曰载寝载兴传灯录大寂禅师曰只如今行住坐卧应机接物尽是道又法眼禅师曰出家人但随时及节便得寒即寒热即热欲知佛性义当观时节因缘又僧问枣山请师间直师乃垂足曰舒缩一任老僧此诗皆采其意】饭羹自知味如此是道不【中庸曰人莫不饮食也鲜能知味也传灯录道明禅师曰如人饮水冷暖自知】任世万钧重载言以为轩【鲁论曰任重而道远汉书司马传传子曰吾欲载之空言不如见之行事之深切着明也扬子曰天之道不在仲尼乎仲尼驾说者也左传注曰轩大夫车】空文误来世圣达欲无言【左传圣达节鲁论子曰予欲无言】咸池浴日月深宅养灵根【淮南子曰日出于阳谷浴于咸池黄庭曰後有蜜户前生门出入月呼吸存灌溉玉华植灵根七液洞流冲庐间】胸中浩然气一家同化元【浩然气见孟子张拙悟道于石霜作颂曰光明寂照遍河沙凡圣含灵共我家庄子曰同与大通此谓坐忘注云与变化为体而无不通也太白诗心将元化并卢仝诗盘礴化元搜万类按楞严经曰研究化元】

陆沈百世师寄食鲁柳下【庄子曰方且与世违而心不屑与之俱是陆沈者也注云人中隐者是无水而沈也孟子曰圣人百世之师也伯夷柳下惠是也唐书宰相世系表曰柳氏出自姬姓鲁孝公子夷伯展无骇生禽字季为鲁士师諡曰惠食采于柳下遂姓柳氏】我今见诸孙风味窥大雅【老杜诗且复寻诸孙谷梁僖元年传注江熙曰风味之所期古犹今也又世说注高逸沙门传曰支遁居会稽晋哀帝钦其风味大雅见前注】大雅久不作图王忽成霸【太白诗大雅久不作吾衰竟谁陈王风委蔓草战国多荆榛桓谭新论曰图王不成亦可以霸】伟哉居移气兰鲍在所化【庄子曰伟哉夫造物者将以子为此拘拘也居移气见孟子家语子曰与善人居如入芝兰之室久而不闻其香即与之化矣与不善人居如入鲍鱼之肆久而不闻其臭亦与之化矣】圣学鲁东家恭惟同出自【邴原别传曰原游学诣孙崧崧曰

君舍郑君所谓以郑为东家丘也原曰君谓仆以郑为东家丘必以为西家愚夫耶左传曰则我周之自出老杜赠卢五丈诗恭惟同自出妙选异高标此借用】乘流去本远遂有作书肆【贾谊鵬鸟赋曰乘流则逝庄子曰悲夫百家往而不反必不合矣扬子曰好书而不要诸仲尼书肆也】日中驾肩来薄晚常掉臂【记史孟尝君传冯灌曰朝趋市者平旦侧肩争门而入日暮之後掉臂而不顾所期物忘其中文选鲍照芜城赋曰车挂鞶人驾肩】徒器终无赢归矣求已事【後句言奔走势利之途终无所得不如讲求为已之学也左传曰贾而欲赢而恶器乎孟子曰子归而求之有余师传大士十劝曰生死已事须汲汲传灯録僧问道吾已事未明乞尚尚指示师良久曰不且且各合尸免相累及】清润玉泉冰【选诗清如玉壶冰晋书卫玠传曰妇翁冰清女壻玉润十洲记瀛洲有玉膏山出泉如酒味】高明秋景晴【宋玉九辩曰沅寥兮天高而气清李善注云秋天高朗体清明也】妙年勤翰墨银钩烂纵横【晋书索靖草书状曰草书之为状也婉若银钩漂若惊鸾】蓝田生美璞未琢价连城思为万乘器柱下贵晚成【京兆记曰蓝田由美玉如蓝田曰蓝田江表传孙灌见诸葛恪奇之谓其父瑾曰蓝田生玉真不虚也连城见前注汉书邹阳传曰蟠木根只轮困离奇而为万乘器者以左右先为之容也老子曰大器晚成按神仙传老子周武王时为柱下史】

八方去求道渺渺困多蹊【淮南子曰天地之间九州八极注云八方之极也列子曰大道以多歧亡羊学者以多方丧生】归来坐虚室夕阳在吾西【庄子曰虚室生白此借用其字法赧禅师金刚经四时般若颂曰理极忘情谓如何有喻其到头霜夜月任运落前溪果熟兼猿重山长似路迷举头残照在原是住居西此用其意谓道在迩而求之远也】君今秣高马夙驾先鸣鸡【汉广诗言秣其马退之盘谷序曰膏吾车兮秣吾马老杜诗高马勿捶面定之方中诗星言夙驾笺云夙早也】慎勿取我语亲行乃不迷【赵州语曰自作活计莫取我语陶渊明诗曰愿君取我言此反而言之欲其躬行而允蹈也退之祭田横文曰苟余行之不迷】

戏咏蜡梅二首【山谷书此诗後云京洛间有一种花香气似梅花亦五出而不能晶明类女功捻蜡所成京洛人因谓蜡梅本身与叶乃类蒴藿窰高州家有灌丛能杏一园也王立之诗话云蜡梅山谷初见之戏作二絶缘此盛于京师】

金蓓锁春寒恼人香未展虽无桃李顔风味极不浅【集韵曰蓓蕾始华也蓓音倍蕾音磊乐天诗愁锁乡心掣不开老杜诗韦曲华无赖家家恼杀人桃李顔本作桃杏红後改之太白诗松柏本孤直难为桃李顔风味见前注晋书庾亮曰老子于此处兴复不浅】

体薰山麝脐色染蔷薇露披拂不满襟时有暗香度【林逋梅诗小围烟景正凄迷阵阵寒香压麝脐陶隐居注本草云麝形似鼈食柏叶或有夏食蛇虫多至寒香满入春患急痛自以脚剔出人有得之者此香絶胜雷公云用蹄尖弹脐此香价与明珠同杨文公谈苑云金陵宫中人按薔?水染生帛一夕忘收为浓露所渍色倍鲜翠按今岭南蔷薇露染衣辄黄庄子曰风起北方一西一东孰居无事而披拂是文选陆士衡诗循形不盈衿林逋梅花诗暗香浮动月黄昏披拂不满?一本作不盈怀文选古诗云馨香盈怀袖路远莫致之】

蜡梅

天工戏剪百花房夺尽人工更有香埋玉地中成故物折枝镜里忆新妆【剪花房谓其作蜡乐天诗点缀花房小树头未句盖有所寄驸马都尉王洸晋卿尚蜀国公主主已下世故有埋玉之句新妆用壽阳公主梅花妆之意风俗通云张伯偕仲偕兄弟形貌相类仲偕妻新妆镜中忽见伯偕问曰今日妆饰好否此略采其意】

从张仲谋乞蜡梅

闻君寺後野梅发香蜜染成宫樣黄不拟折来遮老眼欲知春色到池塘【寺未官寺老杜诗江路野梅香传灯录僧问药山为什麼看经师曰我只图遮眼老杜诗皇天无老眼谢灵运诗池塘生春草此引用言仲谋当有诗兴】

贾天锡惠宝薰乞诗予以兵卫森画戟燕寝凝清香十字作诗报之【十字盖韦应物诗山谷云天锡作意和香自然有富贵气觉诸人家香殊寒乞也】

险心游万仞躁玉生五兵隐几香一炷灵台湛空明【庄子曰人心险于山川陆士衡文赋曰精骛八极心游万仞诗意谓躁欲之害攻伐正性故曰生五兵周礼夏官司兵掌五兵五盾注谓戈殳戟酋矛夷矛庄子曰南郭子綦隐几而坐又曰不可内于灵台注云心也陶渊明诗云夜景湛虚明退之祭文云航北湖之空明】

昼食鸟窥台晏坐日过砌俗氛无因来烟霏作輿卫【鸟窥台谓作生台以施食日过砌谓僧律过中即不食也文选谢灵运诗兼抱济物性而不纓垢氛李善注谓世事皆恶不相纓绕不杂尘雾刘孝标广絶交论曰烟霏雨散注引陆机赋腾烟雾之霏霏易大畜之九三曰閑輿卫利有攸往山谷意谓香烟隔去俗氛便足以当兵卫耳輿犹衆也不用古易师说】

石蜜化螺甲榲櫨煮水沈博山孤烟起对此作森森【山谷有此十诗跋云贾天锡意和香其法研沈水如小搏投取榲櫨液渍之三日乃煮去其液温水浴之螺甲磨去齟齬以胡麻膏熬之色正黄则以蜜汤剧洗又屑紫檀青木香稍入婆律膏及麝以枣肉合之作摹如龙涎香状按本草石蜜条陶隐居注云即崖蜜也唐本草云蠹类生云南者大如掌青黄色取爇烧灰用之今合香多用谓能?香复来香烟须酒蜜渍方可用本草木瓜条陶隐居注曰榲櫨大而黄可进酒图经云道家生压汁和甘松等作诗香唐本草注曰沈水香出天竺单于二国与青桂鸡骨馥香同是一树叶似橘经霜不凋木似榉柳重实黑色沈水者是汉故事曰诸王出合则赐博山香炉吕大临考古图云炉象海中博山下盘贮易使润气蒸香以象海之四镶古诗云博山炉中百合香鬱金苏合与都梁对此作森森谓博山百合之香与此宝薰对烧有森然畏敬之意欧阳公诗孤烟起晴岚文选怀旧赋柏森森以攢植】

轮囷香事已郁郁著书画谁能入吾室脱汝世俗械【汉书天文志曰若烟非烟若云非云郁郁芬芬萧索轮囷是谓庆云此借用以言香之烟庄子大宗师篇子桑户死孔子曰彼又乌能愤愤然为世俗之礼以观衆人之耳目哉子贡曰然则夫子何方之依孔子曰吾天之戮民也注云以方内为桎梏韵书云械桎梏也】

贾侯怀六韬家有十二戟天资喜文事如我有香癖【贾侯当是将家子按太公兵法有六韬凡戟天子二十四诸侯十二唐制三品已上门列戟戟史记商君赞曰天资刻薄人也谷梁曰有文事者必有武备晋杜预有左传癖】

林花飞片片香归衔泥燕闭合和春风还寻蔚宗传【老杜诗林花着雨燕支落又诗风吹花片片郑谷燕诗间几砚中窥水浅落花径里得泥香选诗曰思为双飞燕衔泥巢君室山谷书小宗香云南阳宗茂深闭合焚香蔚宗传见前注】

公虚采苹宫行乐在小寝香光当发闻色败不可稔【上句言其悼亡采苹诗序曰大夫妻能循法度也礼记玉藻曰大夫退然後适小寝释服注云小寝燕寝也公羊注亦云诸侯皆有三寝一曰高寝二曰路寝三曰小寝汉书杨惲传曰人生行乐耳楞严经大势至法王子云如染香人身有香气此则名曰香光庄严我本因地发闻字见书吕刑左传是昆吾稔之日也注云稔熟也恶积与桀同诛此备用以言声色之祸】

牀帷夜气馥衣桁晚烟凝瓦沟鸣急雪睡鸭照华灯【孙子曰夜气归此借用老杜诗翡翠鸣衣桁乐天诗倏如瓦沟霜李商隐诗睡鸭香炉换夕薰楚辞华灯错些】雉尾暎鞭声金炉拂太清班近闻香早归来学得成【退之元日朝回诗曰金炉香动螭头暗玉佩声来雉尾高古今注曰殷高宗有雉雉之徵服饰多用翟尾故有雉尾扇鞭声谓警蹕道家有三清太清其一也老杜诗朝罢香烟满乐天诗十三学得琵琶成】

衣篝丽紈绮有待乃芬芳当念真富贵自薰知见香【说文曰篝客也可薰衣乐府梁王简行路难曰已缲一茧催夜缕复捣百和薰衣香汉书班固自叙曰在于绮襦紈袴之间丽谓香气附着之庄子曰列子御风此虽免乎行犹有所待者也选诗云言笑吐芬芳乐天诗为报高盖车恐非真富贵圆觉经曰自薰成种佛书有解脱知见香】

次韵张仲谋过酺池寺斋

十年醉锦幄醑醺照金沙敲眠春风底不去留君家【王介甫诗云醑醺一架最先来夹水金沙次第裁浓绿扶疎云对起醑红撩乱雪中开】是时应门儿紫兰茁其芽只今将弟妹嬉戏牵羊车【应门儿见前注退之马少监志曰幼子娟好静秀瑶环瑜珥兰茁其芽退之诗少长聚嬉戏不殊同队鱼书卫玠传总角乘羊车入市】忽书满窗纸整整复斜斜【刘禹锡诗小儿弄笔不能嗔浣壁书窗且赏勤卢仝添丁诗闻来案上翻墨汁抹诗书如老鸱杜牧之台城曲云整整复斜斜随旗簇晚沙】平生悲欢事头绪乱如麻【太白诗缫丝忆君头绪多汉书天文志死人如乱麻】苟禄无补报几成来食嗟【荀子曰偷合苟容以持禄养交汉书贡禹传曰非复能有补益所谓素餐尸禄之臣也礼记檀弓曰齐大饥黔敖为食于路以待饿者而食之有饿者蒙辑屡贸贸然来黔敖左奉食右执饮曰嗟来食扬其目而祝之曰予惟不食嗟来之食以至于斯也从而谢马终不食而死】喜君崇名节青云似有涯【汉书楼护传谕议常依名节又後汉书许劭传少峻名节选诗努力崇明德史记范睢传须贾曰贾不欲君能自致于青云之上庄子曰吾生也有涯】我梦江湖去钓鱼刺芦花【庄子曰渔刺钓船而去延

缘苇间】江滨开园宅畦蔗蒔梨柎【周礼载师曰以场圃任园地以宅田任近郊之地张平子南都赋曰其园圃则有薯蔗姜?庄子曰柎梨橘柚皆可于口】梦惊如昨日炊玉困京华【文选潘安仁诗念此如昨日郭璞诗京华游侠窟炊玉见前注】公来或藜羹爱我不疵瑕【庄子曰孔子穷于陈蔡之间藜羹不糝左传曰予取予求不汝疵瑕】深念烦乡里忍穷禁贷賒【言不欲称贷以治具退之诗枚皋即召穷且忍周礼泉府曰凡賒者祭祀无过旬日丧纪无过三月凡民之贷者以国服为之息】夜谈帘幕冷霜月动金蛇【东坡诗夜谈空说劒张璠汉纪曰永昌太守铸黄金为蛇献梁冀此借用以形容帘之筛月也】即是桃李月春虫语交加【言谈笑之欢温然似春选诗艳阳桃李节退之送郑校理诗曰鸟哢正交加杨花共纷泊】我亦无酒饮一室可盘蜗【魏志邴原传注魏略曰焦先自作一瓜牛庐净扫其中营木为牀布草蓐其上裴松之云瓜当作蜗蜗牛螺虫之有角者也俗或呼为黄犢】要公共文字朱墨勘舛差【退之诗不如覩文字丹铅事点勘按北史苏绰制文案程式朱出墨入之法此借用文选蜀都赋舛错纵横】非复少年旧声名取嫖娉【汉书韩安国传嫖鄙小县注曰嫖娉媼也】诸阮有二妙能诗定自嘉何时来煮饼蟹眼试官茶【晋书阮咸传曰诸阮居道北此诗用其字二妙谓阮浑阮咸以比仲谋子侄也按阮籍之子浑少慕通达籍曰仲容以豫此流汝不得复尔咸子仲容称之兄子也又卫瓘传云与索靖俱善草书时号一台二妙此借用世说王含作庐江王教曰家兄在郡定嘉又谢太傅举酒谢景景重曰故自佳故自佳东坡煎茶诗蟹眼已过鱼眼生】

山谷内集诗注卷五

山谷内集诗注卷六

钦定四库全书

山谷内集诗注卷六 宋 黄庭坚 撰

任渊注

常父惠示丁卯雪十四韵谨同韵赋之

春皇赋上瑞来宁黄屋忧【王子年拾遗记曰伏羲以木德称王故曰春皇是谓太昊文选谢惠连雪赋曰盈尺则呈瑞于丰年汉书高帝纪曰纪信乘王车黄屋左纛注谓天子车以黄繒为盖里文选范蔚宗诗黄屋非尧心又汉书尧以天下为忧】下令走百神大云庇九丘【史记管仲传曰下令如流水之原周颂曰怀柔百神佛经曰慈意妙大云又京房易飞侯曰视西方有大云五色其下贤人隐也书序曰九州之志谓之九丘丘聚也】风声将仁气艷艷生瓦沟【仁气见礼记退之诗威风挟惠气又诗屋角月艷艷乐天诗富贵来不久倏如瓦沟霜】寒花舞零乱表里照皇州【韩诗外传曰凡草木花多五出雪花独六出宋书曰大明中元日雪花降殿庭上以为嘉瑞太白诗我舞影零乱选诗曰春色满皇州】千门委圭璧晓日不肯收【文选谢惠连雪赋曰既因方而为圭亦遇圆而成璧】元年冬无泽穴处长螟螽【後汉明帝诏曰冬无宿雪春不燥沐桓帝诏曰顷两泽不沾汉书五行志曰辟不思想利兹谓无泽此借用其字翼奉传曰巢居知风穴处知雨尔雅释虫曰食心曰螟食根曰螽食叶曰□食节曰□】两宫初旰食补袞献良筹【雨宫谓宣仁太后及哲庙汉书灌夫传曰辟晚两宫间左传伍员曰楚君大夫其旰食乎诗曰袞职有阙维仲山甫补之】有道四夷守无征万邦休【左传曰天子有道守在四夷书曰万邦咸休】耆年秉国论泾渭极分流【书文侯之命曰罔或耆寿俊在厥服子则冈克文选王元长曲水序曰耆年阨市井之游此借用汉书薛宣传曰谋王体断国论元佑初宰辅多老成故云尔泾渭分流言流品不杂也已见前注老杜诗浊泾清渭何当分】辍耒入班品逸民尽归周【辍耒谓起自田里如莘野之事楚辞九辩曰农夫辍耒而容与皇甫湜祭柳子厚文云骤閱班品按通典自魏以下官有九品而染又更定十八班归周用伯夷太公事见孟子】股肱共一体间不容戈矛【文选王褒四子讲德论曰君为元首臣为股肱明其一体相须而成汉枚乘书曰间不容发晋书闰諝传曰一日不朝其间容刀书费誓曰鍛乃戈矛】人材如金玉同美异刚柔【金柔玉刚要皆美材当兼收而并用也】正须衆贤和乃可疎共毆【汉书刘白曰衆贤和于朝则万物和于野共谓共工毆谓驩兜古文驩作□兜作毆书舜典曰流共工于幽州放驩兜于崇山】改弦张敝法病十九已瘳【汉书董仲舒曰琴瑟不调甚者必解而更张之乃可鼓也为政而不行甚者必变而更化之乃可理也退之诗疢疫忽潜遘十家无一瘳】王指要不匿蚀非日月差【盘庚曰王播告之修不匿厥指孟子曰古之君子其过也如日月之食民皆见之及其更也民皆仰之】桑林请六事河水问九畴【吕氏春秋曰昔殷汤剋夏而大旱汤乃身祷于桑林剪其发鬻其手自以为牺用求福于上帝淮南子注曰桑山之林能兴云致雨故祝之後汉书周举传曰成汤遭灾以六事剋已注引帝王纪曰汤伐桀後大旱七年使人持三足鼎祝于山川曰政不节?使人疾耶

苞苴行耶谗夫昌耶官室营耶女谒盛耶何不雨之极也书洪范王访于箕子箕子乃言曰我闻在背鲧湮洪水泊陈其五行鲧则□死禹乃嗣兴天乃锡禹洪范九畴】天意果然得玄功与吾谋【汉书息天躬传曰民心悦而天意得矣吴融雪诗曰自怜曾未至聊复赋玄功】此物有嘉德占年在麦秋【左传曰谓其上下皆有嘉德无羊诗曰大人占之衆维鱼矣实维丰年月今孟夏麦秋至】近臣知天喜玉色动冕旒儒馆无他事作诗配崇丘【老杜诗天顔有喜近臣知玉色见礼记玉藻诗小雅曰崇丘万物得极其高大也有其义而亡其辞文选束皙有补亡崇丘诗】

咏雪奉呈广平公【宋盈祖】

连空春雪明如洗忽忆江清水见沙【上句旧作春空晴碧来飞雪沙以喻雪刘禹锡浪淘沙词曰卷起沙堆似雪堆退之诗山浄江空水见沙】夜听疎疎还密密晓看整整复斜斜【渊明诗密密堂前柳杜牧之栽竹诗历历羽林影疎疎烟露姿又台城曲云整整复斜斜随旗簇晚沙】风回共作婆娑舞天巧能开顷刻花【共字旧作解又作乍曹子建洛神赋曰飘飏兮若流风之回雪老杜诗急雪舞回风诗东门之枌注云婆娑舞也本事诗陆畅雪诗曰天人宁巧翦水作飞花沈玢续仙传殷七七诗云解醞逡巡酒能开顷刻花】正使尽情寒至骨不妨姚李用年华【退之诗无心花里鸟更与尽情啼又诗感谢情至骨毆阳公诗应怜鉄甲冷彻骨四十余万屯边兵】

次韵宋懋宗僦居甘泉坊雪後书怀

汉家太史宋公孙漫逐班行谒帝阍【扬雄甘泉赋曰选巫咸兮叫帝阍】燕颌封侯空有相蛾眉倾国自难昏【後汉班超传相者曰生燕颌虎颈飞而食?万里侯相也离骚曰衆女嫉余之蛾眉兮谣诼谓余以善淫汉书李延年歌曰北方有佳人絶世而独立一顾倾人城再顾倾人国】家徒四壁书侵坐马瘦三山叶拥门【汉书司马相如传曰家徒四壁立元稹望云骓歌曰胯耸三山尾株直山谷此句用官清马骨高之意僧无可诗开门落叶深刘禹锡诗风驱叶拥堵】安得风帆随雪水江南石上对洼尊【老杜诗一日过海收风帆云浪见前雪水注元结有洼尊铭今在武昌其详具前注】

和答子瞻和子由常父忆馆中故事【东坡诗序大抵谓近岁馆中同舍不复饮酒赋诗之乐诗用古字韵】

二苏上连璧三孔立分鼎【二苏时分掌内外制连璧见前注三孔谓文仲经父武仲常父平仲毅父元佑间俱进用三孔新淦人兄弟皆有名当世汉书蒯通传曰三分天下鼎足而立此借用东坡诗盖云自君兄弟还鼎立知有补柳子厚文叔仲鼎列天下】少小看飞腾中年嗟远屏【选诗曰少小婴忧患老杜诗飞腾无那故人何远屏见前注】风撼?鶺鴒枝波寒鸿鴈影【常棣诗曰鶺鴒在原兄弟急难礼记兄弟之齿鴈行老杜诗鸿鴈影连来峡内?鶺鴒声急到沙头】天不慳斯文俱来集台省【鲁论曰天之未丧斯文也正月诗曰天天是掬注谓掬破之老杜诗诸公衮衮登台省】日月黄道明桃李春昼永【晋天文志云黄道日之所行老杜诗

诗闾阖开黄道衣冠拜紫宸】时平少犴狱地禁絶鼃鼃【晋书张载榷论曰时平则才伏韩诗外传曰乡亭之狱曰犴朝廷之狱曰狱退之释言曰职亲而地禁国语范蠡对王孙曰吾鼃鼃之与同渚周礼蝓氏掌去鼃鼃】颇怀修故事文会陈果茗【汉书魏相传曰好观汉故事鲁论曰以文会友晋书陆纳传谢安诣纳纳所设惟茶果而已】当时羣玉府人物殊秀整【穆天子传曰羣玉山先王之所谓策府柳子厚丈森然炳然若开羣玉之府世说曰李元礼风格秀整高自标持】下直马闐闐杯盘具俄顷【下直见後注蜀都赋曰车马雷骇轰轰闐闐老杜送王评事诗曰家贫无供给客位但箕帚俄顷羞颇珍寂寥人散後】共醉凌波袜谁窥投辖井【凌波袜见前注汉书陈遵传每大饮宾客满堂辄开门取客辖投井中】天纲极恢疎道山非簿领何曾归闭门灯火生寒冷【老子曰天纲恢恢疎而不失文选刘公翰诗曰沉迷簿领书回回自昏乱蓬萊道山天帝图书之府也】欲观太平象复古望公等【唐书牛僧孺传曰太平无象诗曰车攻宣王复古也史记平原君传曰公等录录老杜诗致君尧舜付公等】贱子托後车当烦煮汤饼【汉书楼护传王邑称贱子上壽文选魏文帝与吴质书曰文学托乘于後车】

双井茶送子瞻【双井在洪州分宁县山谷所居也】

人间风日不到处天上玉堂森宝书【梁四公记曰罗子春为梁武帝入龙洞求珠得食如花药膏饴食之香美齎食至京师得人间风日乃坚如石不可食此句全用其字龙济颂云日月不到处特地好乾坤玉堂见前注文选江淹拟休上人诗曰宝书为君掩李善注引道学传曰夏禹撰真灵之玄要集天官之宝书】想见东坡旧居士挥毫百斛泻明珠【苏公元丰二年时谪黄州筑室于东坡自号东坡居士老杜八仙歌曰挥毫落纸如云烟卢綝晋八王故事曰张方劫晋帝西迁辈真珠百余斛】我家江南摘云腴落磴霏霏雪不如【神仙传太真夫人曰九转丹四名朱光云碧之腴文选苦寒行雪落何霏霏李善注引诗曰雨雪霏霏老杜诗新诗锦不如】为君唤起黄州梦独载扁舟向五湖【老杜诗衆雏烂漫睡唤起沾盘餐杜牧诗三年一觉扬州梦赢得青楼薄幸名越语曰范蠡乘轻舟以浮于五湖此云独载言不与西子俱也】

和答子瞻

一月空回长者车报人问疾遣儿书【文选陶渊明诗穷巷隔深辙颇回故人车顔延年诗林间时晏开亟回长者辙按汉书陈平传曰门多长者车辙山谷以病目不出故云维摩经曰佛告文殊师利汝行诣维摩问疾老杜诗爱竹遣儿书】翰林贻我东南句窻闲默坐得玄珠【静女诗云贻我彤管玄珠以比东坡之诗东坡谢山谷馈双井茶诗末句云明年多欲东南去画舸何时宿太湖庄子曰黄帝游乎赤水之北还归遗其玄珠使知索之而不得使离朱一诟索之而不得也乃使象罔象罔得之】故园溪友脰腹腴远包春茗问何如【礼记少仪曰濡鱼者进尾冬右腴注曰腴腹下也老杜设脰歌曰偏劝腹腴愧年少】玉堂下直长廊静为君满意说江湖【翰林志曰每下值出门相谗谓之小三昧出银台乘马谓之大三昧西京赋曰长廊广庑退之书云敢避其烦瀆怀不满之意于受恩之地哉】

子瞻以子夏丘明见戏聊复戏答【于瞻诗云诵诗得非子夏学紬史正作丘明书天公戏人亦薄相故遣幻医生明珠】

化功见弹太早计端为失明能着书【史记贾谊传曰造化为工庄子曰且汝亦太早计见卵而求时夜见弹而求鶚炙汉书司马?书曰左氏失明厥有国语史记曰虞卿非穷愁亦不能着书】迩来似天会时发泪睫见光能陨珠【卢仝月蚀诗曰虾蟆敢将天眼瞎又云当时常星没星雨如迸浆似天会事发叱喝诛奸强桓子新论曰孟尝君泪不承睫博物志曰鲛人泣而成珠老杜诗目眩陨杂花】喜公新赐紫琳腴上清虚皇对久如【真诰诗曰漱此紫琼?又曰玉华饒琳腴黄庭内景经曰上清紫霞虚皇前太上大道玉晨君务成子注云虚皇者紫清太素高虚洞曜三光元道君内号也对久如谓奏对久之南有嘉鱼诗笺曰烝然犹言久如也维摩经曰舍利弗言天止此室其已久如王介甫诗看云坐久如】请天还我读书眼愿载轩辕乞鼎湖【云溪友议载王梵志诗曰还尔天公我还我未生时东坡诗读书眼如月罅隙靡不照轩辕谓神宗时山谷修实录史记封禅书曰黄帝铸鼎于荆山之上鼎既成有龙垂胡髯下迎黄帝後代因名其处曰鼎湖汉书司马迁传赞曰接其後事讫于大汉扬雄传曰太史公记六国历楚汉讫麟止】

省中烹茶怀子瞻用前韵

合门井不落第二竟陵谷帘定误书【旧本云合门井似谷帘水可怜不载竟陵书东京记曰文德殿两挟有东西上合门予尝闻故老云东上合门之东有井絶佳传灯录为山曰思而知之落在第二头唐书陆羽传羽字鸿渐复州竟陵人羽嗜茶着经三篇陈舜俞庐山记曰康王谷有水帘飞泉被岩而下者二三十????其高不可计其广七十余尺陆鸿渐茶经尝第其水为天下第一按张又新煎茶水记载为李季卿论水次第有二十种以庐山康王谷水第一欧阳公作大明水记颇疑其与羽经相反】思公煮茗共汤鼎蚯蚓窍生鱼眼珠【退之集弥明石鼎辞句曰时于蚯蚓窍微作苍蝇鸣茶经候汤有三沸如鱼目微有声为一沸选诗鱼目笑明月李善注引雒书曰秦失金镜鱼目混珠】置身九州之上腴争名焰中沃焚如【上腴谓京师班固西都赋曰华实之毛则九州之上腴法华经曰澍甘露法两灭除烦恼焰夫朝市争名之士肝肺内热何异为烈焰焚炙哉易离卦之九四曰突如其来如焚如】但恐次山胷垒块终便酒舫石鱼湖【元注云元次山石鱼湖歌曰石鱼湖似洞庭夏水欲满君山青疾风三日作大浪不能废人运酒舫诗意谓东坡无争名之病不用饮茶而胷中垒块正须酒以浇之耳垒块用阮籍事见前注便字作平声读】

以双井茶送孔常父

校经同省并同居无日不闻公读书故持茗椀浇舌本要听六经如贯珠【按实录元佑元年五月以秘书省正字孔武仲为校书郎古乐府东飞伯劳歌曰谁家女儿对门居晋书殷仲堪传曰三日不读道德经便觉舌本间强乐记曰歌者累累乎端如贯珠】心知韵胜舌知腴何似宝云与真如【史记吕不韦传曰子楚心知所谓文选头陀寺碑曰道胜之韵虚往实归欧阳公双井茶诗曰宝云日注非不精争新弃旧世人情柳文脱细故于胷中味道?于舌端】汤

饼作魔应午寝尉公渴梦吞江湖【作魔谓睡魔也传灯录降魔藏禅师传秀师曰此无山精木怪汝翻作魔耶唐文粹有何讽梦渴赋曰奔九江走五湖末句曰以吾此夕之一梦见自古不足者之心左太冲吴都赋曰或吞江而纳汉】

常父答诗有煎点径须烦绿珠之句复次韵戏答

小鬟虽丑巧妆梳埽地如镜能检书【老杜诗检书烧烛短】欲买娉婷供煮茗我无一斛明月珠【老杜诗唤人看骀褭不嫁惜娉婷岭表录异曰昔梁氏女有容貌石季伦为交趾采访使以真珠三斛买之即绿珠也此句以答绿珠之戏用韵极工】知公家亦阙扫除但有文君对相如【扫除谓箕帚妾汉书司马迁书曰为扫除之隶乐府题解云司马相如将聘茂陵人女为妾文君作白头吟以自绝相如乃止】正当为公乞如愿作牋远寄宫亭湖【戏谓当求之于神录异传庐陵欧阳明从贾客道经彭蠡湖每以船中所有投湖中後忽见一人来候明云是青洪君明甚怖使曰无可怖青洪君感君前後有礼故要君必有重遗君勿取独求如愿尔明既见青洪君乃求如愿使逐明去如愿者青洪君婢也明将归所愿辄得数十年大富荆州记曰宫亭即彭蠡泽也谓之彭泽湖初学记载查道元与天公牋言其奴高安云云此借用秘阁王献之帖云正当随事豁之】

戏呈孔毅父

管城子无肉食相孔方兄有绝交书【退之毛颖传曰秦皇帝使蒙恬赐之汤沐而封诸管城号管城子後汉班超传相者曰飞而食肉万里侯相晋书鲁褒钱神论曰亲之如兄字曰孔方文选有嵇康与山涛绝交书】文章功用不经世何异丝窠缀露珠【文选应璩百一诗曰文章不经国史记伯夷传曰功用既兴然後授政庄子曰其不可与经于世亦远矣退之联句云丝窠扫还成文选别赋曰秋露如珠】校书著作频诏除犹能上车问何如忽忆僧牀同野饭梦随秋鴈到东湖【按实录山谷元丰八年四月为校书郎元佑二年正月为著作佐郎汉书谷永传曰免不正之诏除上车何如见前注曾子固徐孺子祠堂记曰按豫章图记章水北历南塘其东为东湖豫章盖山谷乡里】

谢黄从善司业寄惠山泉【从善名降一名隐】

锡谷寒泉掬石俱并得新诗蛭尾书【张又新煎茶水记载刘伯刍较水之与茶宜者凡七等以无锡惠山寺石泉为第二法书苑索靖草书绝代名曰银钩蛭尾掬音妥圆而长曰掬掬石所以澄水也山谷有从人乞杨华店井水帖云取井傍十数石置瓶中令水不浊】急呼烹鼎供茗事晴江急雨看跳珠【晋书孔羣曰今年田得七百石米不足了麴糵事此云茗事亦其比也东坡诗曰白雨跳珠乱入船】是功与世涤羶腴令我屡空常晏如【唐常景使西蕃烹茶帐中谓蕃人曰涤烦疗渴所谓茶也屡空见鲁论汉书扬雄传无儋石之储晏如也】安得左轡清颍尾风炉煮茗卧西湖【汉书景帝纪长吏千石至六百石朱左轡注云轡车之蔽也灌夫传颍水清灌氏宁左传楚子次于颍尾杜预注云颍水之尾按今颍州有西湖陆羽茶经曰风炉以铜铸之如古鼎形凡四窻以备通飏漏炆之所】

次韵奉酬刘景文河上见寄

省中岑寂坐云窗忽有归鸿拂建章【省中谓秘书退之诗云窗雾阁事恍惚建章汉宫名选诗曰玉绳低建章】珍重多情惟石友琢磨佳句问潜郎【杜诗领客珍重意文选潘岳诗投分寄石友淇澳诗注云如玉石之见琢磨张平子思玄赋曰尉廔眉而郎潜】遥怜部曲风沙里不废平生翰墨场【部曲翰墨场并见後注杜诗缟素漠漠开风沙】相见哦诗煮春茗向人怀抱絶关防【晋书刘惔传曰今日作叱面向人耶刘禹锡诗曰心术去机关老杜诗延州秦北户关防犹未已】

见诸人唱和酴醾诗辄次韵戏咏

梅残红药迟此物共春归【谢朓诗红药当阶翻】名字因壶酒风流付枕帏【王立之诗话云酴醾本酒名也世所开花本以其颜色似之故取其名按唐书百官志良醖署令进御则供酴醾桑落之酒韵书曰帏囊也今人或取落花以为枕囊】坠钿香径草飘雪净垣衣【玉台新咏吴均采莲诗锦带杂花钿西阳杂俎辨瓦松曰博雅云在屋曰昔耶在垣曰垣衣】玉气晴虹发沉材锯屑霏【虹气及沈香皆见前注晋书胡毋辅之传曰彦国吐佳言如锯木屑霏霏不?】直知多不厌何忍摘令稀【老杜诗不厌伤多酒入唇又诗可忍醒时雨打稀唐书承天皇帝倓传曰种瓜黄台下瓜熟子离离一摘使瓜好再摘令瓜稀摘稀字取此也】常恨金沙学顰时正可挥【谓金沙俗恶如里人效西施之顰也王介甫诗故作酴醾架金沙祇漫栽似矜颜色好飞度雪前开扬子曰?门墙则麾之挥与麾同】

次韵秦觏过陈无已书院观鄙句之作【觏字少章即少游之弟无已盖陈後山旧字】

陈侯大雅姿四壁不治第【汉书司马相如传曰家徒四壁立霍去病传曰上为治第令视之大雅见前注】碌碌盆盎中见此古罍洗【东坡诗碌碌盆盎间仪礼士冠礼注水洗承盥洗者弃水器也水器尊界皆用金罍及大小异】薄饭不能羹墙阴老春荠【王介甫诗薄饭午不羹空炉夜无炭又诗独饭墙阴转本草荠味甘陶隐居注曰叶作菹羹亦佳诗云谁谓荼苦其甘如荠是也】惟有文字性万古抱根柢【维摩经曰文字性离此借用言其天资能文盖自夙世也汉书邹阳传曰蟠木根柢轮囷离奇】我学少师承坎井可窥底【後汉书儒林传序曰若师资所承宜标名为证者乃着之云圭峯禅师作禪门师资承袭图亦云若要辨诸宗师承须知有傍有正庄子曰子独不闻夫埳井之蛙乎音义云埳音坎】何因蒙赏味相享当牲醴【言秦君赏味其诗如赏之以牲醴也南史谢览传武帝目送良久自此仍被赏味左传曰王享有体荐又曰王享晋侯醴】试问求志君文章自有体【无已有求志齐文选魏文帝与论曰文以气为主气之清浊有体不可以力强而致後汉书伏湛侯霸传论曰诚知宰相自有体】玄钥鎖灵台渠当为君启【文选头陀寺碑曰玄关幽捷感而遂通庄子曰不可内于灵台注云灵台者心也书金縢曰启籥见书刘禹锡赠会禅师诗曰静见玄关启欣然与心会】

陈留市隐【并序】

陈留江端礼季共曰陈留市上有刀镊工年四十余无室家子姓惟一女年七岁矣日以刀镊所得钱与女子醉饱醉则簪花吹长笛肩女而归无一朝之忧而有终身之乐疑以为有道者也陈无已为赋诗庭坚亦拟作

市井怀珠玉往来人未逢乘肩娇小女邂逅此生同【怀珠玉见後注往来一本作贾胡按後汉书马援传曰伏波类西域贾胡谈苑曰江南掘得石记有诗云东邻娇小女骑虎踏河冰】养性霜刀在閤人清镜空时时能举酒弹镊送飞鸿【汉书梅福传常读书养性为事又盖寛饶传仰视屋而叹曰此如传舍所閤多矣陆士衡叹逝赋曰世閤人而为世又演连珠曰镜无畜影故触形则照清镜见前注嵇康诗曰目送归鸿手挥五弦】

晁张和答觀觀五言予亦次韵

山林与心违日月使鬓换【文选沈休文诗江海事多违嵇叔夜幽愤诗事与愿违邁兹淹留】儒衣相诟病文字奉娱玩【礼记儒行篇鲁哀公问孔子曰天子之服其儒服欤云云孔子曰衆之命儒也妄常以儒相诟病汉书司马迁书曰文史星历近乎卜祝之间主上所戏弄俳优畜之】自古非一秦六籍盖多难【见前六籍经几秦注汉书陈胜传曰秦未亡而诛赵王将相家属此生一秦左传司马侯曰或多难以固其国】诗书或发冢熟念令人惋【庄子曰儒以诗礼发冢晋书王羲之传遗殷浩书曰此可熟念後汉书冯衍传曰愁令人不赖生王羲之帖亦云令人短气韩非子曰外内悲惋老杜诗感时抚事增惋伤】秦君銳本学骥子已血汗【山谷有答少章帖云学问之本以自见其性为难老杜诗别养骥子怜神俊又诗骅骝作驹已汗血按顔延平天马状曰降灵冀子又按汉书大宛国多善马汗血言其先天马子也】相期骖天衢伯乐尝一盼【易曰何天之衢亨春秋後语曰苏代欲见齐王谓淳于髡曰有骏马欲卖者见伯乐曰比三旦立于市人莫与言愿子还而视之去而顾之臣请献一朝之价伯乐如其言一旦而马价十倍今臣欲以骏马见于王莫臣先後足下有意为臣伯乐乎】士为慾心缚寸勇辄尺懦【鲁论曰枵也慾焉得刚老子曰不敢进寸而退只】要当观此心日照云雾散扶疎万物影宇宙同璀璨【楞严曰不知色身外洎山河虚空大地咸是妙明中所现物而圆觉经亦有六尘缘影之说司马相如传曰云布雾散又曰垂条扶疎文选琦树璀璨】置规岂惟君亦自警弛慢【楚语曰其以规为璜也又曰吾慙寘之于耳文选嵇叔夜书曰吾自以不如嗣宗之贤而有慢弛之阙】

刘晦叔许洮河緑石砚【晦叔名昱洮州唐临洮郡後陷吐蕃 宁中收复】

久闻岷石鸭头緑可磨桂溪龙文刀莫嫌文吏不知武要试饱霜秋兔毫【岷州本临洮县地太白诗遥看汉水鸭头緑桂溪在闻越境上曹毗魏都赋曰劒则龟文龙藻汉书曰可谓文吏老杜鵬赋曰至如千年孽狐三窟狡兔恃古冢之荆棘饱荒城之霜露法书苑曰毆阳通以象牙犀角为笔管狸毫为心覆以秋兔翰鲍照飞白书铭曰秋毫精劲霜素凝鲜法书苑王羲之题笔阵图後曰纸者阵也笔者刀稍也故此诗暗用以足上句之意】

以团茶洮州緑石砚赠无咎文潜

晁子智囊可以括四海张子笔端可以回万牛【汉书晁错号智囊贾谊过秦论曰囊括四海韩诗外传避文士之笔端老杜古柏行曰万牛回首丘山重】自我得二士意气倾九州【言足以强人意毆阳公诗自吾得二生粲粲?双珙史记晏婴传曰意气扬扬甚自得也此借用其字】道山廷阁委竹帛清都太微望冕旒【道山见前注刘歆七略曰武帝广献书之路百年之间书积如丘山故外有太常博士之藏内则延阁广内秘室之府列子曰穆王以为清都紫微钧天广乐帝王之居史记天官书曰太微三光之廷其内五星五帝座】贝宫胎寒弄明月天网下罩一日收【楚辞九歌曰贝阙兮珠宫左思吴都赋曰蚌蛤珠胎与月亏全太平广记鬼诗还山弄明月文选曹子建与杨德祖书曰人人自谓握灵蛇之珠家家自谓抱荆山之玉又曰吾王设天网以该之顿八弦以掩之老子曰天网恢恢疎而不失诗曰蒸然??】此地要须无不有紫皇访问富春秋【此地谓馆阁晋书杜预传朝野称美号曰杜武库言其无所不有也紫皇谓哲庙晋书天文志曰紫微宫鈎陈口中一星曰天皇大帝汉书齐襄王传曰皇帝春秋富注云比之于财方未匮竭】晁无咎赠君越侯所贡苍玉璧可烹玉尘试春色浇君胷中过秦论斟酌古今来活国【越侯谓建州守臣建州即闽越之地苍璧谓团茶周礼春官曰以苍璧礼天乐天诗曰新茶碾玉尘浇君胷中见前注过秦论见贾谊新书诗序酌先祖之道以养天下周语曰而後王斟酌焉班固典引曰斟酌道德之渊源活国见前注】张文潜赠君洮州碌石含风猗能淬笔锋利如锥请书元佑开皇极第入思齐访落诗【退之簞诗曰卷送八只含风漪此借用言洮研之温润乐天诗曰紫毫笔尖如锥兮利如刀晋书祖纳传曰汝颖之士利如锥山谷作温公挽词云元佑开皇极功归用老成思齐以比宣仁太后访落以比哲宗按思齐诗曰思齐太任文王之母访落序曰嗣王谋于庙也笺谓成王始即政故于庙中与羣臣谋政事班固西都赋曰第从臣之嘉颂】

谢王仲至惠洮州砺石黄玉印材【仲至名钦臣】

洮砺发劒虹贯日印章不琢色蒸栗【庄子曰刀刃若新发于硎汉书邹阳传曰荆轲慕燕丹之义白虹贯日礼记曰大圭不琢魏文帝与锺繇书曰玉书称美玉黄侔蒸栗】磨砢顽钝印此心佳人持赠意坚密【汉书梅福传曰爵禄者天下之?石高帝所以厉世磨钝也此借用观佛三昧海经曰住念佛者心印不怀传灯录曰马祖密受心印汉书晁错传曰甲不坚密与裼同】佳人鬓雕文字工藏书万卷胷次同日临天闲豢真龙新诗得意挟雷风【毆阳公表曰风霜所迫鬓髮雕残刘禹锡诗会书团扇上知君文字工周礼校人天子有十二闲马六种国语史墨曰古有豢龙氏此借用以言羣牧老杜驄马行曰天厩真龙此其亚西京杂记淮南王着鸿烈传自云字中皆挟风霜】我贫无句当二物看公倒海取明月【太白诗回山倒海不作难退之诗婆娑海水南簸弄明月珠】

次韵文潜同游王舍人园【王舍人名穉字才元】

移竹淇园下买花洛水阳【汉书沟洫志曰下淇园之竹以为楫按淇澳诗曰緑竹猗猗说诗者以为王刍非今竹苏子田作诗传从汉书说毆阳公有洛阳风俗记载牡丹事甚详】风烟二十年花竹可迷藏【乐天诗等闲栽树木随分占风烟老杜诗山扉花竹幽乐天又有诗云十三行坐事调品不肯迷头白地藏玉溪生有美一人赋曰岂不美于羞澁恐致恨于迷藏】

九衢流车马相值各匆忙【乐天诗舟乱三峡雨马入九衢尘後汉马后传曰车如流水马如游龙老杜诗无乃太匆忙】岂有道边宅静居如宝坊【後汉曹褒传明帝曰谚言作舍道边三年不成楞严经曰譬如人静居华严合论云大集经在于欲界上色界下安立宝坊集诸人天】幅巾延客酒妙歌小红裳【後汉符融传幅巾奋褱谈辞如云】主人有班缀衣拂御炉香【班缀犹班列谓升朝官也贾至诗衣冠身惹御炉香】堂恐鸚鵡鸣百草为不芳【离骚曰使鸚鵡之先鸣兮百草为之不芳】故作龟曳尾颇深漆园方【庄子曰庄子钓于濮水楚王使大夫二人往先焉曰愿以境内累子矣庄子曰楚有神龟死已三千岁矣王巾笥而藏之庙堂之上此龟者宁其死为留骨而贵乎宁其生而曳尾于涂中二大夫曰宁生而曳尾涂中庄子曰往矣吾将曳尾于涂中按史记庄子传尝为蒙漆园吏庄子杂篇曰天下之治方术者多矣】初开蜗牛庐中置师子牀【蜗牛庐用焦先事智度论云佛为人中师子凡佛所坐若牀若地皆名师子座楞严经曰即时如来将罢法座于师子牀?七宝几维摩经云其室广博悉皆包容三万二千师子座舍利佛言如是小室乃容受此高广之座】买田宛丘间江汉起濫觴【宛丘今陈州濫觴见前注言为归老之渐也】今此百亩宫冬温夏清凉【记曰儒有一亩之宫东坡超然台记夏凉而冬温】身闲閱世故宇静发天光【汉书盖寬饶仰视□叹曰此如传舍所閱多矣文选潘正叔迎大驾诗云世故尚未夷庄子曰宇泰定者发乎天光】安肯声利场牵黄臂老苍【言不猎取其利也文选鲍明远诗五都矜财雄三川养声利南史张充方出猎左臂鷹右牵?遇张绪船至便放绁脱鞵东坡乐府老夫聊发少年狂左牵黄右擎苍史记李斯谓子曰牵黄犬出上蔡东门】张侯笔瑞世三秀丽斋房作诗盛推赏明珠计斛量扫花坐晚吹妙语益难忘【楚辞九歌曰采三秀于山间注云芝也汉志芝房歌曰斋房产草九茎连叶王立之诗话云张文潜先与李公择辈来予家作长句後数日再同东坡来东坡读其诗叹息云此不是吃烟火食人道底言语盖其间有汲井消午醉扫花坐晚凉衆綠结夏帐老红驻春妆之句也故山谷内韵亦云扫花坐晚吹妙语益难忘立之名直方槭之子也文选刘公干诗投翰长叹息绮丽不可忘玉台新咏相逢狭路问易知复难忘】重游樊素病捧心不能妆【晁无咎谢王立之送蜡梅诗芳菲意浅姿容淡忆得素貌如此梅自注王立之家小鬟云溪友议云白居易有妓樊素善歌小蠻善舞为诗曰櫻桃樊素口杨柳小蛮腰此借用以比素貌捧心见前注曾端伯诗选载李商老云王直方高赉有□在城南事诸名流具杯盘出声妓以娱客故山谷诗云重来樊素病捧心不能妆张文潜云执板歌一声坐客无留觴皆为皓齿蛾眉设】来日犹可追听我歌楚狂【楚狂接輿歌曰往者不可谏来者犹可追此特借用其语】

卧陶轩【元注云为晁无咎作】

陶公白头卧宇宙一北窻但闻窻风雨平陆漫成江【渊明与子俨等疏曰吾年过五十少而穷苦又曰五六月中北窻下卧遇凉风暂至自谓是羲皇上人平陆成江谓陵谷变迁当晋宋之际乎渊明停云诗曰八表同昏平陆成江】卯金扛九鼎把菊醉胡牀【刘裕盗晋之神器故曰扛九鼎左传楚子问鼎大小轻重汉书曰项羽力能扛鼎昭明太子作渊明传曰尝九月九日出宅边菊丛中坐久之满手把菊忽值王弘送酒至即便就酌醉而归晋书桓伊传下车踞胡牀】城南晁正字国器无等双【汉书韩安国传曰天子以为国器史游急就章曰襍饰刻画无等双】日月丽宸极大明朝万邦【易曰日月丽乎天文选刘越石劝进表曰宸极失

御礼记曰大明生于东书曰协和万邦】假版未通班晓严梦逢逢【晋书华谭传曰谨奉还所假左丞相军谿祭酒版文选陆机有谢内史表李善注云凡王封拜谓之板官又按隋百官志陈有板谿议参军板长史之类假板盖班品之卑者隋志又言梁武帝定九品十八班此诗言禾通班盖列于隔品也老杜诗通籍微班忝刘知几史通忤时篇曰仆少小从仕早蹶通班晓严谓戒晓严警之鼓乐天诗曰阊门晓严旗鼓出退之诗不踏晓鼓朝安眠听逢逢】万卷曲肱里胸中湛秋霜【文选袁阳源诗云义分明于霜李善注引仲长子昌言曰洁若清冰严若秋霜】亦有好事人叩门提酒缸【用扬雄事见前注】欲眠不遣客佳处更难忘【南史渊明曰我醉欲眠卿可去东坡作醉眠亭诗曰醉中有客眠何害须信渊明苦未贤】

次韵寄晁以道【以道名说之济北人】

河汉牛与女咫尺不得语欢然共秋盘以兹不忘故【文选古诗云迢迢牵牛星皎皎河汉女又云盈盈一水间脉脉不得语左传天威不违颜咫尺前汉董仲舒传驩然有恩以相爱北史杨椿传曰吾兄弟同盘而食】我友在天末问天许见否云雨隔九关日月不我与【上八句言以道流落于外相望不啻牛女之远安得见之也文选陆士衡诗曰借问叹何为佳人眇天末楚辞招魂曰虎豹九关啄害下人些卢仝茶歌曰天上羣仙司下土地位清高隔风雨鲁论阳虎曰日月逝矣岁不我与注谓年老岁月已往】念公坐臞禅守心如缚虎【此以下言以道从事禅学未能超脱也魏志吕布传缚虎不得不急老杜诗身犹缚禅寂遗教经心之可畏甚于恶兽】颇思携法喜举案饁南亩【维摩经曰有菩萨问维摩诘言居士父母妻子亲戚眷属为谁维摩诘以偈答曰智度菩萨母方便以为父一切众导师无不由是生法喜以为要慈悲心为女善心成寔男毕竟空寂舍肇法师注云法喜谓见法生内喜也世人以妻色为悦菩萨以法喜为悦後汉梁鸿传妻子为具食不敢仰视举案齐眉左传曰冀缺耨其妻饁之相敬如宾诗曰同我妇子饁彼南亩】不闻犯斋收犹闻画眉诮【後汉周泽字稚都为太常卧疾斋宫其妻哀泽老病闚问所苦泽大怒以为于犯斋禁收送诏狱汉书张敞传为妇画眉长安中传张京兆眉妩孟康注云妩音诮北方人谓媚好为诮】良为鼻祖来渠伊为伴侣【汉书扬雄传反离骚曰有周氏之蝉妸兮或鼻祖于汾隅注云鼻始也此句借用言心为万法之祖而以道于法喜爱着之深若曰与心俱生不可弃去然不知为法所缚则有人有法二见未忘未免于封执之病故末句为破除之使超然独立不与万法为侣也□玠唐宋遗史曰张崇帅庐州计口率渠伊钱楞伽经偈曰心如工技儿意如和技者五识为伴侣妄想观技众按寒山子诗云我贵天然物独一无二伴侣覓他不可见出入无门户故学道者要当不存一法乃可】我有桂溪刀聊凭东风去【断其法执故以刀为喻婆娑论曰佛言我圣弟子能以慧刀断诸结缚文选李陵书曰时因北风复惠德音乐天枯树诗幸有西风易凭仗】

次以道韵寄范子夷子默【正平正思二范盖文正公诸孙】

鼓缶多秦声琵琶作胡语是中非神奇根器如此故【言范君根器不同有所从来也史记蔺相如传曰赵王闻秦王善为秦声请奉盆缶秦王以相娱乐又汉书杨惲传曰家本秦也能为秦声仰天拊缶而歌呜呜刘熙释名曰琵琶本胡中马上所鼓老杜古迹诗曰千岁琵琶作胡语分明怨恨曲中论庄子曰神奇化为臭腐臭腐复化为神奇根器字出释氏书如守护国界

主陟罗尼经云如来悉知彼衆生種種根器】范公秉文德断国极可否【范公谓文正公诗曰济济多士秉文之德汉书薛宣传曰谋王体断国论极可否谓献可替否不诡随也】至令筦枢机大度而少与【此句当属忠宣公按寔録元祐元年二月范纯仁同知密院少与言其不党汉书盖寛饶传曰多仇少与】蟬嫣世有人风壑啸两虎【两虎谓二范君蟬嫣见前篇注应劭曰蟬嫣连也楚辞曰虎啸而谷风至欧阳公避暑赋陰壑惨惨多悲风史记陈轸传两虎方且食牛】小心学忠孝鄙事能壠亩【鲁论曰吾少也□故多能鄙事】持论不籋籊奉身谢夸诩【汉书严助传曰朔臯持论不根新台诗笺云籋籊口柔常观人顔色而为之词故不能俯左传曰臣之禄君寔有之义则进否则奉身而退汉书扬雄传曰尚奉奢丽夸诩】颇知城南园文会英俊侶何当休沐归怀茗就煎去【鲁论曰以文会友汉书枚臯传曰与英俊并游又张安世传曰休沐未尝出老杜诗强饭尊添滑端居茗续煎】

僧景宗相访寄法王航禅师【景宗盖法王化主】

抱牒稍退鳬鸞行倦禅时作橐驼坐【退之蓝田丞厅壁记曰文书行吏抱成案诣丞鴈鸞行以进东阳夜怪録曰王洙避雪佛庙见一老僧着皂裘背及肋有搭白补处明日视之乃橐驼也】忽忆头陀云外人闭门作夏与僧过【文选王简栖有头陀寺碑李善注云头陀斗薨也言斗薨烦恼也前人诗云头陀云外僧气多圆觉经曰若经夏者三月安居】一丝不挂鱼脱渊万古同归蚁旋磨【传灯録南泉问陆亘十二时中作麼生陆云寸丝不挂师云犹是阶下淇老子曰鱼不可脱于渊此特借用其语以言航游戏自在如鱼之脱于钓丝也晋书天文志周髀家云天傍转如推磨而左行故日月实东行而天牵之从西没譬之于蚁行磨石之上磨左旋而蚁右去磨疾而蚁迟故不得不随磨以左回焉山谷借用意谓沈迷世故随物所牵如蚁之旋磨今古皆然视云外超脱之人良可叹也】山中雨熟瓜芋田唤取小僧休乞钱【张方回家本山谷自注云智航道人住嵩山法王寺数遣小僧景宗到都城因宗还寄之○蜀都赋瓜畴芋区杜诗径转山田熟又诗杨枝晨在手豆子雨已熟言赞公道力深妙杨枝挥酒便能致雨以熟豆田山谷意谓法王亦当如是不必遣化也】

次韵子瞻送顾子敦河北都运二首

儒者给事中顾公甚魁伟【汉书百官表曰给事中亦加宦所加或大夫博士议郎掌顾问应对史记张良世家太史公曰予以为其人计魁梧奇伟】经明往行河商略颇应史【汉书平当传曰以经明禹贡使行河又薛宣传曰湛自知罪臧皆应记世说孙绰许询共商略先往名达】劳人又费乏国计安能已【元丰中河决大吴神宗知故道不可复因道之北流水性已顺至元祐初文潞公吕汲公回河之议劳民费财竟无益也事具苏子由颍滨遗老传荀子富国篇曰上下俱富交无所藏之是知国计之极也】成功渠有命得人斯可喜【孟子曰若夫成功则天也】似闻阻饥余恶少惊邑里【书曰黎民阻饥汉书尹赏传曰举杂长安中轻薄少年恶子退之诗隔墙恶少恶难似南史陈方泰与诸恶少年羣聚游逸无度云】启钥采珠金夺怀取姝美【启钥见前注庄子曰将为肱筐探囊发匱之盗而为守备则必摄絨膝固扃鐃谷梁传云犹曰取之其母之怀中而杀之云尔诗曰静女其姝注云姝美色也】部中十盗发一二书奏纸【汉书咸宣传曰盗发觉而弗捕吏恐不能得坐课累府府亦使不言】西连

魏三河东尽齐四履【史记货殖传曰昔唐人都河东殷人都河内周人都河南夫三河在天下之中若鼎足王者所更居也文选宣德皇后令曰地狭乎四履李善注引左传管仲曰赐我先君履东至于海西至于河南至于穆陵北至于无棣】此岂小事哉何但行治水使民皆农桑乃是真儒耳【魏志荀彧传注引献帝春秋太祖曰此岂小事而吾忘之前汉书地理志曰豳诗言农桑衣食之本甚备扬子曰用真儒无敌于天下】

今代顾虎头骨相自雄伟【顾虎头见前注退之诗自叹虞翻骨相屯】不令长天官亦合丞御史【唐光宅元年改吏部为天官汉书百官表曰御史有雨丞秩千石一曰中丞】能贫安四壁无愠可三已【左传曰贵而能贫四壁见前注鲁论曰令尹子文三仕为令尹无喜色三已之无愠色】昨来立清班国士相顾喜【乐之诗早接清班登玉陛左传曰国士在且厚不可当也】何因将使节风日按千里【周礼掌节曰凡邦国之使节老杜诗六月风日冷汉书魏相传曰按治郡国】汲黯不居中似非朝廷美【汉书汲黯传曰以数直谏不得久留内又曰臣愿为中郎出入禁闕补过拾遗臣之愿也】太任録万事御坐留谏纸【太任见前注舜典曰纳于大麓注云麓録也纳舜使大録万几之政乐天诗谏纸忽盈箱对之终自愧】发政恐伤民天步薄冰履【孟子曰今王发政施仁又曰文王视民如伤天步履冰并见毛诗】苍生忧其鱼南亩多被水【左传曰微禹吾其鱼乎诗曰饁彼南亩】公行图安集信目勿信耳【鸿鴈诗序曰万民离散不安其居而能劳来还定安集之高士传孔子曰吾之信顔回非独今日所信者目日犹不可信汉书赵充国传曰百闻不如一见】

慈孝寺餞子敦席上奉同孔经父八韵

日永知槐夏云黄喜麦秋【欧阳公诗话载赵师民诗云麦天晨气润槐夏午陰清王介甫诗绿成白雪桑重绿割尽黄云稻正青礼托月令麦秋至】同朝国士集赐沐吏功休【孟子曰得侍同朝甚喜汉书薛宣传曰日至吏以令休】只园冠盖地清与耳目谋【梵云只园此言胜氏梵云僧伽蓝摩此云衆园由只陀太子园造佛精舍因以为名柳子厚小丘记曰清冷之状与目谋潏潏之声与耳谋】晴云浮茗椀飞霰落文楸【陆羽茶经曰沫饽者汤之华也如晴天爽朗有浮云鳞鳞然茗椀见前注飞霰谓碁声文楸谓碁局北梦言日本国王子入贡出本国如楸玉局冷暖碁子盖王之苍者如楸木色】一客衆主人醉此顾虎头虎头持龙节排河使东流【体记曾子问曰衆主人卿大夫士房中皆哭不踊此借用其字周礼掌节曰澤国用龙节孟子曰排淮泗而注之江】厥田惟上上桑麻十数州计功不汗马可致万户侯【禹贡雍州厥田惟上上左传曰诸侯言时计功汉书萧何传曰上以何功最盛先封为酈侯食邑八千户功臣皆曰萧何未有汗马之劳顾居臣等上何也李广传曰令当高祖世万户侯岂足道哉】

次韵张昌言给事喜雨

三雨全清六合尘诗翁喜雨句凌云【尔雅注曰雨三日已上为霖文选潘岳闲居赋曰微雨新晴六合清郎东都赋曰雨师泛洒风伯清尘司马相如赋飘飘然有凌云之气】埳漂战蚁余追北柱击乖龙有裂文【学记曰蛾子时术之注云蛾蚍蜉也微虫尔时术其功乃成大埳】

也东观汉记曰沛献王辅善易永平五年少雨上以易林占之其繇曰蚁穴封户大雨将至上以问辅云云古今五行记曰後魏显宗天安元年兗州有黑赤蚁鬪赤蚁断头而死时齐明帝自立大为魏军所破贾谊过秦论曰追亡逐北世说夏侯太初倚柱作书霹雳破柱神色无变退之树鸡诗云割取乖龙左耳来北梦琐言曰世言乖龙苦于行雨而多窜匿为雷神捕之或在古木及檐楹之内孟郊诗厚冰无裂文】減去鮮肥忧玉食徧宗河岳起炉薰【上句谓朝廷以旱故減常饕孟郊诗豪人饫鮮肥书曰惟辟王食下句谓徧走羣望以禱雨云汉诗曰靡神不宗】圣功惠我丰年食未有涓埃可报君【老杜诗未有涓埃答圣朝】

山谷内集诗注卷六

山谷内集诗注卷七

钦定四库全书

山谷内集诗注卷七 宋 黄庭坚 撰

任渊注

送李德素归舒城【李谿字德素隐舒州龙眠山】

僧夏莫问途麦秋宜煮饼【僧夏他本或作魏夏非是韦应物诗曰安居同僧夏清夜讽道言庄子曰七圣皆迷无所问途】北寺旬休归长廊六月冷簟翻寒江浪茶破苍壁影【北寺即酃池寺退之簟诗曰卷送八尺舍风漪坡词簟纹如水怅如烟山谷谢送碾壑源芽诗云从龙小苍壁】李侯为我来遽以归期请青衿废诗书白髮违定省荒畦当鉏灌蠹简要籤整挽衣不可留决去事幽屏【此数句太抵用退之送张道士诗意退之又有诗云胡为久无成便以归期告子衿诗注云青衿青领也学子之所服礼父母在衣纯以青曲礼曰昏定而晨省庄子曰汉阴丈人方将为圃畦凿隧而入井抱瓮而出灌穆天子传曰暴蠹书子羽陵老杜诗书籤药裹封蛛网】天恢猎德网日饴养贤鼎【老子曰天网恢恢擣子曰猎德而得德此借用言网罗贤俊也易鼎卦曰圣人大亨以养圣贤洞酌诗曰可以饴饴注云饴酒食也音炽】此士落江湖熟思令人瘦【南史刘之遴传曰之遴时落侯景所孟郊诗长安日下影又落江湖中汉书赵充国传曰但思惟兵利害至熟悉也魏志贾逵传注曰逵与典农校尉争公事不得理乃发愤生瘦】胷中吉祥宅膜外荣辱境【庄子曰瞻彼阕者虚室生白吉祥止止又曰辨乎荣辱之境又德充符注夫至足者不以忧患惊神若皮外而过去医书曰膈膜自心肺之下与脊腹相着以遮蔽浊气膜外一本作券外庄子曰券内者行乎无名券外者志乎明费注云卷分也华严经云瞻仰吉祥宅】婆娑万物表藏刃避肯綮【万物表见前注庄子庖丁为惠文君解牛曰批大却导大窾因其固然技经肯綮之未尝而况大觚乎又曰提刀而立为之四顾为之踌躇满志善力而藏之音义曰肯綮犹结处也綮音苦挺反】人生要当学安宴不彻警【左传曰宴安鸩毒不可怀也又曰军卫不彻警】古来惟深地相待汲修绠【易系辞曰夫易圣人之所以极深而研几也惟深也故能通天下之志修绠见前注】

咏李伯时摹韩干三马次子由韵简伯时兼寄李德素

太史琐牕云雨垂试开三马拂蛛丝【太史当谓子由作起居郎居左史之任文选鲍照诗玉钩隔琐牕老杜赵公堂诗落架垂云雨此引用言其在天上也文选江淹拟张华诗云玉台生网丝李善注引论衡曰蜘蛛结丝以网飞虫】李侯写影韩干墨自有笔如沙画锥【书诀墨藪褚河南曰用笔当如印印泥如锥画沙欲其藏锋画乃沈着当其用锋常欲透过背】絶尘超日精爽紧若失其一望路驰【西京杂记文帝有良马九匹一名絶尘王子年拾遗记曰周穆王八龙之骏四名越影逐日而行老杜诗魏侯骨耸精爽紧庄子徐无鬼曰天下马有成材若恤若失若丧其一若是者超轶絶尘不知其所选诗四牡向路驰】马官不语臂指挥乃知

伏下非新羈【言其驯伏如此必非新自西极来者老杜诗马官廐养森成列臂指挥即无羊诗所谓麾之以肱庄子徐无鬼曰吾相马直者中绳曲者中钩方者中矩圆者中规是国马也而未若天下马也山谷盖用此意唐书李林甫传曰不见立仗马乎终日无声而饫三品刍豆新羈之马见文选】吾尝覽观在垧马駟駟成无权奇列【史记封禅书曰後有君子得以覽观马駟诗曰駟駟牡马在垧之野汉书天马歌曰志倏傥精权奇籥浮云晻上驰】缅怀胡沙英妙质一雄可将千万雌【汉书天马歌曰天马来从西极步流沙九夷服文选西征赋曰终军山东之英妙此借用老杜天育骠骑歌曰当时四十万匹马张公叹其材尽下故独写真传示人见之座右久更新】决非阜枥所成就天驥生驹人得之【元次山诗曰岂欲阜枥中争食矰与贅汉书元鼎四年马生渥洼水中作天马之歌顏延之赭白马赋汉道亨而天驥呈才汉书西域传曰大宛国多善马马汗血言其先天马子也孟康注曰言大宛国有高山其上有马不可得因取五色母马置其下与集生驹皆汗血因号曰天马子云家语孔子曰人遗弓人得之此借用诗意若曰老于中朝之士与来自钓筑者其英杰之气故自不同如仗下马与渥洼之驥也】千金市骨今何有【?国策郭隗谓燕昭王曰古之人君遣使者斋千金市千里马于他国未至马已死买其骨五百金以归天下知君之好也于是朞年而千里之马至者三焉王诚欲致士先从隗始隗且见事况贤于隗者乎文选孔文举书曰燕君市骏马骨乃欲以招絶足也】士或不价五羖皮【史记秦本纪曰繆公闻百里奚贤欲重赎之恐楚人不与乃请以五羖羊皮赎之楚人遂与之】李侯画隼百僚底初不自期人误知【老杜诗有才无命百僚底王维诗夙世繆词客前身应书师不能舍余习偶被时人知】戏弄丹青聊卒岁身如閱世老禅师【谓其得游戏三时文选谢惠连诗丹青翫雕焕李善注引张网集曰图形丹青诗曰优哉游哉聊以卒岁汉书盖寛饶传曰此如传舍所闻多矣老杜诗势閱人代速代即世也避讳故云】

次韵子瞻和子由观韩干马因论伯时画天马

于阗花骢龙八尺看云不受络头丝西河驄作蒲萄锦双瞳夹镜耳卓锥【东坡三马图赞引云元佑初熙河游师雄擒獯羌大首领果庄青宜结以献时西域贡马首高八尺龙顧而凤膺虎?而豹章出东华门入天驷监振鬣长鸣万马皆瘖明年羌温锡沁有良马愿以馈太师潞国公诏许之蒋之奇为熙河帅西蕃有贡骏马汗血者之奇为请乞不以时入事下礼部轼时为宗伯判其状云朝廷方郤走马以粪正复汗血亦何所用事遂寝轼尝私请于承议郎李公麟画当时三骏马之状而使果庄青宜结效之藏于家伯时公麟字也按汉书西域传于阗国王治西域通典云在葱岭之北二百余里西河当谓熙河之地周礼曰马八尺以上为龙老杜高都护驄马行曰青丝络头为君老何由郤出横门道谢庄马舞赋曰养雄神于綺文西京杂记曰霍光妻遗淳于衍蒲萄锦顏延之赭白马赋曰双瞳夹镜两权协月传灯录仰山传香严曰去岁羌卓锥之地】长楸落日试天步知有四极无由驰【选诗走马长楸间诗曰天步艰难尔雅四极注曰四方极远之国老杜天育骠骑歌曰呜呼健步无由骋】电行山立气深稳可耐珠鞞白玉羈【崔豹古今注曰秦始皇有名马蹶景追电顏延之赭白马赋曰异体峯生朱相连发山立字见礼记玉藻老杜画马图引曰顾视清高气清稳谈苑曰刘鋹自结真珠鞍勒为戏龙之状】李侯一顾叹絶足领略古法生新奇【春秋後语苏代曰人有骏马欲卖之见伯乐曰比三旦立于市人莫与言愿子还而视之去而顾之臣请献一朝之价伯乐如其言一

旦而马价十倍魏文帝与孙权书曰中国虽多马其知名絶足亦少世说康僧渊忽往殷渊源许遂及义理语言词旨自若领略粗举一往参诣又曰支道林才藻新奇花烂映发】一日真龙入图画在垆羣雄望风雌【老杜丹青引赠曹霸云诏谓将军拂绢素意匠惨澹经营中斯须九重真龙出一洗万古凡马空真龙盖用新序叶公事】曹霸弟子沙苑丞喜作肥马人笑之【丹青引云弟子韩干早入室亦能画马穷殊相干惟画肉不画骨忍使骅骝气凋丧张彦远画记曰韩干官至太府丞尤工鞍马初师曹霸後自独擅此云沙苑丞未详】李侯论干独不尔妙画骨相遗毛皮【晋书王献之传谢安问君书何如君家尊客曰故当不同安曰外论不尔答曰人那得知高僧支遁传谢安曰九方歟之相马略其骀黄而取其骏逸退之诗自叹虞翻骨相屯又诗未能去毛皮】翰林评书乃如此贱肥贵瘦渠未知【杜诗书贵瘦硬方通神而东坡诗有曰杜陵评书贵瘦硬此论未公吾不凭】况我平生赏神骏僧中云是道林师【高僧传支遁字道林尝养马人有讥之者曰爱其神骏聊复畜尔亦见世说】

次韵答王育中

有身犹缚律【传灯录志公歌曰律师持律自缚老杜诗身犹缚禅寂】无梦到行云【宋玉高唐赋曰昔者先王尝游高唐画寝梦见妇人曰妾在巫山之阳高丘之阻旦为朝云暮为行雨朝朝暮暮阳台之下】俗里光尘合胷中泾渭分【老子曰和其光同其尘退之与崔羣书曰惧足下以为吾不致黑白于胸中泾渭见前注老杜诗浊泾清渭何当分】我拏江南秀一见空马羣【离骚曰朝搴之木兰注云拏取也退之送温造序云伯乐一过冀北之野而马羣遂空】夸士慕鍾鼎寒儒守典坟【言所见之偏也汉书贾谊鵬鸟赋曰夸者死权文选刘孝标广絶交论曰书玉牒而刻钟鼎左传臧武仲曰作彝器以铭其功烈注谓鍾鼎为宗庙之常器此句引用言夸士徇功名也文选江文通拟鲍照诗曰竖儒守一经左传曰左史倚相能读三坟五典】吾欲超万古乃如负山蚊【庄子曰犹涉海凿河而使蚊负山也】能来商略此趺坐对炉芬【商略见前注莲经云结加趺坐文选江文通拟古诗云膏炉絶沈燎注云炉薰炉也取其芬香故加之膏】子瞻去岁春侍立迓英子由秋冬间相继入侍作诗各述所怀予亦次韵四首【仁宗乾兴初日御殿之西庑诏孙奭冯元等劝讲祖宗故事以双日延见儒臣至此虽只日亦令执经入侍景佑二年正月癸丑诏置迓英延义二阁书无逸篇于屏迓英在迎阳门之下东向东京记曰崇政殿西有迓英阁东有延义阁讲讽之所又按国朝春二月至端午秋八月至冬至遇只日迓英阁轮官讲读】

赤壁归来入紫清堂堂心在鬓雕零【太白春日行曰深宫高楼入紫清按上皇玉帝吟玉清之隐书曰上景发晨晖金霄鬱紫清翰林志云时以居翰苑者谓凌玉清遡紫霄汉书萧望之赞曰望之堂堂折而不挠欧公表曰风霜所迫须髮凋残】江沙踏破青鞋底卻结丝絢侍禁庭【寒山子诗浪行朱雀门踏破麻鞋底杜诗青鞋布襪从此始周礼屡人注曰屨有絢有纁有纯者饰也絢谓之拘着舄屨之头以为行戒按经筵中皆系丝鞋故云】

胷蟠万卷夜光寒笔倒三江砚滴乾【言笔力有余倾倒三江之水不足以供其翰墨如汉书朱安世所谓南山之竹不定受我词也禹贡曰三江既入西京杂记云以玉为研以酒为滴隋书郑絳传上令李德林立作诏书高颀戏谓译曰笔乾刘禹锡诗莫怪诗成无泪滴尽倾东海】

也须乾】大似不蒙稽古力只今犹作侍臣冠【言其犹未大用後汉桓荣为太子少傅大会诸生陈其车马印绶曰今日所蒙稽古之力也】

对掌丝纶罢记言职亲黄屋傍尧轩【丝纶谓中书舍人翰林学士取礼记王言如丝其出如纶之意记言谓起居郎及舍人即古之左右史礼记曰动则左史书之言则右史书之又曰左史记言右史记事东坡自右史迁中书舍人翰林学士相继子由自左史为舍人唐昭宗时封舜乡从子渭对掌内外制文选范蔚宗诗黄屋非尧心杜牧之诗几席延尧舜轩墀立禹汤】雁行飞上犹回首不受青云富贵吞【刘禹锡寄杨给事诗曰青云直上无多地卻要斜飞取势回卢仝月蚀诗奈何万里光受此吞吐厄】

乐天名位聊相似卻是初无富贵心只欠小蛮樊素在我知造物爱公深【东坡诗云定似香山老居士世缘终浅道根深自注曰出处老少大略似乐天云溪友议载乐天诗曰樱桃樊素口楊柳小蛮腰盖其家二姬也】

再次韵四首

隆儒殿阁对横经咫尺清都雨露零【春明退朝录曰隆儒殿在迓英阁後丛竹中谢承後汉书曰董春横经捧手李白上裴长史书曰横经藉书左传曰天威不违顔咫尺列子曰穆王及化人之宫以为清都紫微钧天广乐帝之所居雨露见前注诗曰零雨其?又曰零露泥泥】见说文星环北极人间无路仰天庭【老杜诗南斗避文星史记天官书曰中宫天极星环之匡卫十二星藩臣皆曰紫宫曹子建诗衆星环北辰汉书揚雄解嘲曰未仰天庭又法言曰仰天庭而知天下之居卑也哉】

风棂倒影日光寒尧日当中露正乾【退之诗暑夕眠风棂揚雄甘泉赋曰历倒影而絶飞梁注云在日月之上日月返从下照故具影倒史记尧纪曰就之如日诗曰湛湛露斯匪阳不曦注云曦乾也诸侯唯天子赐爵肃敬承命有似露见日而曦】殿上给扶鸣汉履螭头簪笔见秦冠【两句皆纪述经筵事给扶谓当时元老簪笔谓左右史退之作韩宏碑曰进见上殿拜跪给扶赞汉书郑崇传每见曳革履哀帝笑曰我识郑尚书履声唐百官志云起居郎及舍人若仗在紫宸内阁则夹香案分立殿下直第二螭首和墨濡笔即?处时号螭头汉书赵充国传曰张安世持橐簪笔秦冠见柱後惠文注後汉志法冠一曰柱後执法者服之或谓之?豸冠此借用耳】

万国归心天不言诸儒争席异?轩【鲁论曰天何言哉四时行焉百物生焉又曰天下之民归心焉後汉戴凭传光武正旦朝会毕令羣臣说经者更相难诘有不通者辄夺其席以益通者凭遂重坐五十余席庄子曰舍者与之争席矣异?轩言讲道雍容非若轩陛之严分也汉书史丹传曰天子自?轩檻上墮铜丸以撻鼓又晋书輿服志曰?轩大会则陈乘輿车辇于殿庭】圣功典学形歌颂更觉曹刘不足吞【书说命念终始典于学歌颂指二苏诗曹植刘桢皆魏文帝时文士元稹作老杜墓铭序曰言夺苏李气吞曹刘】

延和西路古槐陰不隔朝宗夙夜心【东京记曰崇政殿南有延和殿东坡作延和殿奏新乐赋曰迺英傍瞻念故老之不来又谢赐御书诗注云迺英阁前有双槐樛枝属地如龙形书曰江汉朝宗于海诗云夙夜匪懈以事一人诗意谓讲筵亲近可倾尽忠赤之心也】公有胸中五色线平生补衮用功深【杜牧之郡斋独酌诗曰平生五色线愿补舜衣裳退之诗曰用功深者其收名也远】

次韵子瞻题郭熙画秋山【郭若虚图画见闻志曰郭熙河阳温人熙宁初为御书院艺学工画山水寒林】

黄州逐客未赐环江南江北饱看山【元丰二年东坡责受黄州团练副使本州安置史记李斯传曰乃除逐客之令荀子曰聘人以珪问士以璧召人以瑗絕人以玦反絕以环陶渊明诗饥寒饱所更】玉堂卧对郭熙画发兴已在青林间【金坡遗事淳化二年十月太宗飞白书玉堂之署赐学士承旨苏易简按翰林志时以居翰苑者谓凌玉清遡紫霄亦曰登王署玉堂焉元佑元年秋东坡迁翰林学士老杜诗云山已发兴玉佩仍当歌欧公诗行歌招野叟共步青云间】郭熙官画但荒远短纸曲折开秋晚江村烟外雨脚明归雁行边余叠巘【山谷有跋惠崇九尘图云得意于荒寒平远亦翰墨之秀也短纸言所画但小景未画江南之胜故下句云云汉书李广传欲上书报天子曲折老杜诗锦里烟尘外江村八九家又诗雨脚如麻未断絕选诗连嶂叠巘崿公刘诗注曰巘小山别于大山也】坐思黄柑洞庭霜恨身不如雁随阳【米芾书史曰唐人摸王右军一帖云奉橘三百颗霜未降未可多得韦应物诗云书後欲题三百颗洞亭更待满林霜盖谓此也老杜诗君看随阳雁亦有稻粱谋按书禹贡注曰随阳之鸟鸿雁之属】熙今头白有眼力尚能弄笔映窗光【孟郊诗倾盖眼中力抄诗过与人欧公诗眼力虽已疲心意殊未倦退之寄卢仝诗往年弄笔嘲同异谤词惊衆怪不已韩偓诗窗里日光飞野马】画取江南好风日慰此将老镜中髮【江南盖山谷乡里乐天诗春城好风日退之诗白髮忽满镜】但熙肯画寬作程十日五日一水石【老杜戏题山水图歌曰十日画一水五日画一石能事不受相促迫王宰始肯留真迹】

题郭熙山水扇

郭熙虽老眼犹明便面江山取意成【汉书张敞传以便面拊马注云若今沙弥所持竹扇】一段风烟且千里解如明月逐人行【言扇虽小而画有风烟千里之势扇中江山常与人俱如月在天处处皆逢也老杜诗烟如一段清冰出万壑又诗风烟含越鸟西都赋閭阎且干苏味道诗曰明月逐人来】

题惠崇画扇【郭若虚图画见闻志云僧惠崇建阳人工画鹅雁鹭丝尤工小景善为寒汀烟渚潇洒虚旷之象】

惠崇笔下开江面万里晴波向落晖梅影横斜人不见鸳鸯相对浴红衣【老杜丹青引曰将军下笔开生面向落晖谓曰将暮林逋梅诗曰疎影横斜水清浅暗香浮动月黄昏钱起诗曲终人不见杜牧之齐安後池絕句曰鸳鸯相对浴红衣山谷意谓此清絕之境人所不到双鸳

擅而有之】

题郑防画夹五首

惠崇烟雨归雁坐我潇湘洞庭欲唤扁舟归去故人言是丹青【王介甫诗画史纷纷何足数惠崇晚出吾最许旱云六月涨林莽移我修然堕洲渚老杜山水障歌白悄然坐我天姥下耳边已似闻春猿柳恽诗曰汀洲采白苹日落江南春洞庭有归客潇湘逢故人丹青见前注】

能作山川远势白苹惟有郭熙欲写李成骤雨惜无六幅鹅溪【南史竟陵王子良之孙贲扇上图山水咫尺之内便觉万里为遥郭熙见前注名画评曰李成营丘人世业儒能画山水林木当时称第一有于曹武惠王第见成山水图爱之不已作诗曰六幅冰绡挂翠屏危峯叠嶂鬬峥嵘山谷跋郭熙山水曰熙因为苏才翁家摹六幅李成骤雨从此笔墨大进鹅溪在今潼川画绢所出】

徐生脱水双鱼吹沫相看晚图【庄子曰鱼不可脱于渊又曰泉涸鱼相与处于陆相煦以湿相濡以沫不若相忘于江湖】老矣个中得计作书远寄江湖【山谷记以自况庄子曰于鱼得计古乐府曰枯鱼过河泣何时复还入作书与魴鱖相教慎出入】

折苇枯荷共晚红榴苦竹同时睡鸭不知飘雪寒雀四顾风枝【老杜诗菱荷枯折堕风涛庄子曰为之四顾退之竹诗风枝未飘吹露粉先含泪又柳子厚诗风枝散陈叶】

子母猿号榭叶山南山北危机【世说曰桓公入蜀至三峡中部伍有得猿子者其母缘岸哀号集韵曰榭 木名音穀後汉法真传曰将在北山之北南山之南矣文选赵景真书曰常恐风波潜骇危机密发萧大圜云北山之北弃絶人间南山之南超踰世网】世故谁能樗里毂中皆是由基【世故见後注史记樗里子传滑稽多智秦人号曰智囊淮南子说山训曰楚王有白猿王自射之则抔矢而熙使养由基射之始调弓矫矢未发而猿拥柱号矣庄子曰游于羿之毂中中央者中地也然而不中者命也】

戏题十雀捕飞虫画扇

小虫心在一啄间得失与世同轻重【庄子曰泽雉十步一啄百步一饮】丹青妙处不可传轮扁斲轮如此用【世说司马太传问谢车骑惠子五车何以无一言入玄谢曰当是妙处不传庄子曰桓公读书于堂上轮扁斲轮于堂下曰以臣之事观之斲轮徐则甘而不固疾则苦而不入不徐不疾得之于手而应之于心口不能言有数存焉于其间古之人与其不可传也死矣然则君之所读者古人之糟粕已矣】

题画孔雀

桄榔暗天蕉叶长终露文章婴世网【欧阳炯南乡子曲曰路入南中桄榔叶暗蓼花红老杜

古柏行不露文章世已惊选诗世网婴我身】故山桂子落秋风无因雌雄青云上【文选谢灵运诗故山曰已远风波岂还时乐天诗注曰杭州天竺寺每岁中秋月中有桂子堕玉台新咏吴迈远乐府曰可怜双白鹤双双絶尘氛连翩弄光景交颈游青云逢罗复逢缴?雄一旦分又按李太白白紵词曰愿为天池双鸳鸯一朝飞去青云上】

睡鸭

山鸡照影空自爱孤鸾舞镜不作双【博物志曰山鸡有美毛自爱其色终日映水自眩则溺死王介甫诗山鸡照绿水自爱一何愚异苑曰罽宾国王得一鸾三年不鸣夫人悬镜照之覩影悲鸣宵中一奋而絶言孤鸾见影以谓其雌乃歌舞庾信诗曰青田树上一黄鹤相思树下两鸳鸯无事教渠更相失不及从来莫作双】天下真成长会合两凫相倚睡秋江【徐陵鸳鸯赋曰山鸡映水那相得孤鸾照影不成双天下真成长会合无胜比翼两鸳鸯山谷非蹈袭者以徐语弱故为点窜以示学者尔至其末语用意尤深非徐所及唐人吴融池上双凫诗曰可怜翡翠归云髻莫羡鸳鸯入画图幸是羽毛无取处一生安稳老菰蒲意虽佳而语陋山谷兼用二人之长正如?淮王用郭汾阳部曲一经号令气色益精明云】

小鸭

小鸭看从笔下生幻法生机全得妙【王维画水墨诀曰春夏秋冬生于笔下乐天书竹诗曰不根而生从意生不笋而成由笔成?严偁曰非幻成幻法列子曰万物皆出于机皆入于机注云生于此者或死于彼死于彼者或生于此楞严经曰生机全破此借用其字】自知力小畏沧波睡起晴沙依晚照【老杜小鸭诗翅开遭宿雨力小困沧波又诗前轩?晚照】

题刘将军雁二首

滕王蛱蝶双穿花东丹胡马歃胡沙【名画记曰嗣滕王湛然善画蝴蝶王建宫词云内中数日无呼唤写得滕王蛱蝶图老杜诗穿花蛱蝶深深见刘道醇圣朝名画评曰古今为蕃马者亦数胡环得其肉东丹得其骨注云东丹王赞华契丹人郭若虚图画见闻志曰东丹王善画本国人物鞞马然而马尚丰肥笔乏壮气五代史四夷附录曰契丹安巴坚攻渤海取其扶余一城以为东丹国以其长子托云为东丹王後奔于唐明宗赐其姓为东丹更其名曰慕华後赐姓李名替华工画颇知书穆天子传时人歌曰黄之池其马歃沙皇人威仪○案安巴坚旧作阿保机托云旧作突欲今竝依辽史改】祁连将军一笔雁生不并世俱名家【汉书匈奴传有祁连将军田广明又按霍去病传注曰祁连山即天山也匈奴呼天为祁连今引用以比刘君退之诗曰吾与东野生并世如何复蹶二子踪按史记孔子弟子传曰孔子皆後之不并世汉书艺文志云传齐论者唯王阳名家】

将军一矢万人看雪洒晴空碎羽翰乞与失羣沙宿雁笔间千顷暮江寒【言刘君悔其射雁有慈哀不忍之心寓于丹青以见意焉乞字作去声读张祜诗万人齐指处一雁落塞空班固西都赋曰风毛雨血洒野蔽天战国策曰雁从东方来更羸以虚发而下之曰飞徐者故疮痛

也鸣悲者久失羣也老杜诗宿雁聚圆沙又诗波涛万顷堆琉璃】

题刘将军鹅

箭羽不沾春水籀文时印平沙想见山陰书罢举羣驱向王家【乐天放雁诗云拔汝翅翎为箭羽大篆盖周宜王时史籀所作谈薺吴均诗雁足印黄沙老杜诗平沙列万幕晋书王羲之传山陰道士好养鹅羲之求市之道士云为写道德经举羣相赠尔羲之欣然写毕笼鹅而归】

题晁以道雪雁图

飞雪洒芦如银箭前雁惊飞後回眄凭谁说与谢玄晖莫道澄湖静如练【李太白诗乌栖曲银箭金壶漏水多此借用又诗解道澄江静如练令人长忆谢玄晖此反而用之言不若于此景物中道出一句也】

次韵子瞻题无咎所得与可竹二首粥字韵戏嘲无咎人字韵咏竹

十字供笼饼一水试茗粥【晋书何曾传蒸饼上不坼作十字不食朝野僉载曰侯思止食笼饼必令缩葱如肉笼饼即馒头蔡君谟茶录曰建安鬪茶以水痕没先者为负耐久者为胜故较胜负之说相去一水两水又云茶古不闻晋宋已降吴人采叶煮之名茗粥】忽忆故人来壁间风动竹【唐李益竹窗闻风诗开帘风动竹疑是故人来】舍前粲戎葵舍後荒苜蓿【戎葵见前注汉西域传汉使采蒲萄苜蓿种归闽川名士传薛令之诗曰初日上团团照见先生盘盘中何所有苜蓿长阑干】此郎如竹瘦十饭九不肉【晋书王献之传此郎管中窥豹东坡诗可使食无肉不可使居无竹无肉令人瘦无竹令人俗】

地下文夫子风流絶此人能和晚烟色幻出岁寒身【文同字与可妙于墨笔老杜诗地下苏司业又哭李峰诗一代风流尽修文地下深传灯录七佛偈曰身从无相中受生犹如幻出诸形像】马鬣松成拱鹅溪墨尚新【礼记檀弓子夏曰昔者夫子言之曰吾见封之若堂者矣见若坊者矣覆夏屋者矣见若斧者矣从若斧者焉马鬣封之谓也左传曰尔墓之木拱矣与可尝有诗曰拟将一段鵞溪绢扫取寒梢万尺长鵞溪见前注】应怀斲泥手去作主林神【斲泥见前注华严经世主妙严品有十主林神所谓布华如云生林神及擢干舒光生芽发耀吉祥净业垂布焰藏清净光明可意雷音光香普遍妙光回曜华果光味主林神论曰主林神是法王子住主力波罗密明说法如林广多覆?故是法师位也】

次韵文潜休沐不出二首

风尘车马逐得失两关心惟有张仲蔚门前蓬蒿深【仲蔚见前注庄子曰夫逃虚空者藜藿挂乎甕鼯之径藿音徒吊反】自公及归沐毕愿诗书林【诗退食自公晋书魏舒传叔父衡叹曰舒堪数百户长我愿毕矣揚雄长扬赋曰并苞书林】墙东作瘦马万里气駸駸【张方

回家本有山谷自注云文潜喜画马周生列子曰伯乐相马采之于瘦圣人相士取之于疎诗曰载骤駉駉】

与世自少味闭关非有心【退之诗吾老世味薄後汉马援传曰过是欲少味矣丈选顔延年五君咏曰刘伶善闭关怀情灭闻见文中子或问陶元亮子曰放人也归去来有避地之心焉五柳先生传则几于闭关矣注谓闭关以喻藏身也】戎葵一笑粲露井百尺深【上句并见前注古诗曰桃生露井上卢仝诗辘轳无绳井百尺】着书洒风雨枯笔束如林【老杜诗笔落惊风雨又诗世乱戟如林】苏公叹妙墨逼人太駉駉【法帖卫夫人书云卫有弟子王逸少甚能学卫真书咄咄逼人笔势洞精字体道媚南史王僧虔传子敬谓中令云弟书如骑骡駉駉常欲度骅骝前】

奉同子瞻韵寄定国

风云开古镜淮海熨冰纨【退之诗长安雨洗新秋出极目古镜开尘函言天宇开明也书曰淮海惟扬州定国时为扬倅谢朓诗澄江静如练乐天繚绫诗曰金斗熨波刀剪纹汉书地理志曰齐地织作冰纨】王孙醉短舞罗袜步微澜【楚辞曰王孙游兮不归陶岳零陵记曰长沙定王入朝于上前自为短舞曰臣国小地狭不足回旋曹子建洛神赋曰凌波微步罗袜生尘】老骥心虽在白鸥盟已寒【魏武帝歌曰老骥伏枥志在千里烈士暮年壮心不已文选谢朓诗翻浪扬白鸥列子曰海上有人好鸥鸟者旦而之海上从鸥鸟游鸥鸟至者百数其父曰吾闻鸥从汝游试取来吾从玩之曰诺明旦之海上鸥鸟舞而不下文选江文通杂体诗曰亹亹玄思清胷中去机巧物我俱忘怀可以狎鸥鸟而李白鸣臯歌曰白鸥兮飞来长与君兮相亲山谷诗诸多用此意左传曰盟若可寻亦可寒也】斯人气金玉视世一鼠肝【汉书天文志曰下有积泉金宝上皆有气不可不察地镜图曰黄金气赤黄千万斤以上光大若镜盘礼记曰君子于玉比德焉气如白虹天也庄子曰伟哉造化将以汝为鼠肝乎以汝为虫臂乎】南归脱虫蛊入对随孔鸾【退之永贞行曰蛊虫羣飞夜扑灯又和张十一忆昨行曰践蛇茹蛊不择死忽有飞诏从天来又诗明庭集孔鸾曷取于鳬鹭按司马相如上林赋曰道孔鸾促鵷仪又按山海大荒南经曰南方有鸾鸟有翠鸟有孔鸟注云孔雀也】忽以口语去鼓船下惊湍【东坡以十科荐定国其後言者谓定国谄事东坡遂自宗正丞出倅扬州事具东坡奏议汉书司马迁传曰仆以口语遇遭此祸文选褚渊碑曰鼓棹则沧波振荡潘安仁诗惊湍激岩阿】收身薄冰释置枕泰山安【退之诗收身归关东期不到死迷诗曰如履薄冰老子曰涣若冰将释楚辞曰故高枕而自适汉书枚乘傳曰易于反掌安于泰山】后土花药丽海门天水寛【王禹偁琼花诗序云扬州后土庙有花一株洁白可爱俗谓之琼花东坡乐府云后土祠中玉蘂蓬莱殿後鞞红渊明时运诗云花药分列此借用张舜民南迁录云润州甘露寺东眺海门北见扬州退之诗天水滢相围】伐木思我友知人良独难【伐木诗见小雅知人见臯陶谟晋书桓伊传抚箏歌怨诗曰为君既不易为臣良独难盖曹子建所作】遥怜须鬓绿犹复耐悲欢【孟郊诗酒人皆倚春鬓绿病叟独藏秋髮白文选任彦昇诗悲欢不自持】

次韵王定国扬州见寄

清洛思君昼夜流北归何日片帆收未生白髮犹堪酒垂上青云却佐州【神庙元丰中导洛水入汴河谓之清汴扬州水所过之地也诗意谓相思之心与水无极卢仝闻贬韩职方有感诗曰力小垂垂上天高又不登】飞雪堆盘鱠鱼腹明珠论斗煮鸡头【老杜设鱠歌曰无声细下飞碎雪有骨已剝觜春葱徧劝腹腴愧年少软炊香饭缘老翁落碁何曾白纸湿放筯未觉金盘空退之诗火齐磊落堆金盘本草鸡头寔一名茈图经曰其形类鸡头故以名之刘梦得泰娘歌曰斗量明珠鸟传意乐天诗夜船论铺赁】平生行乐自不恶岂有竹西歌吹愁【行乐不恶皆见前注杜牧之诗斜阳竹西路歌吹是扬州】往岁过广陵值早春尝作诗云春风十里珠帘卷髯髯三生杜牧之红药梢头初茁栗扬州风物鬢成丝今春有自淮南来者道扬州事戏以前韵寄王定国二首【杜牧之赠别诗娉娉嫋嫋十三余荳蔻梢头二月初春风十里扬州过卷上珠帘总不如又有诗云觥船一棹百分空十载青春不负公今日丝禅榻畔茶烟悠扬落花中红药谓扬州芍药礼记王制曰祭天地之牛负苽栗此借用以言花苞之小末句谓风物如此惜其身之老也】

淮南二十四桥月马上时时梦见之【扬州属淮南杜牧之寄扬州韩判官诗曰二十四桥明月夜玉人何处教吹箫文选乐府曰远道不可思夙昔梦何之】想得扬州醉年少正围红?写乌丝【醉年少谓定国开元天宝遗事曰申王冬月令宫女密围而坐谓之妓围异闻集霍小玉传云取朱络缝绣囊中出越姬乌丝栏素段三尺以授李生素多才思援笔成章】日边置论诚深矣圣处时中乃得之【言不必求入帝城第曰饮无何可也刘昭幼童传曰晋明帝绍元帝子元帝问长安何如日远答曰日远不闻人从日边来只闻人从长安来居然可知帝异之明日又以日为近帝问何故答曰举头不见长安只见日以是知近置论谓置而不论庄子曰言之浅矣不言深矣魏志徐邈传赵达问以曹事邈曰中圣人达言之太祖太祖甚怒鲜于辅进曰平日醉客谓清者为圣人浊者为贤人邈性修慎偶醉言耳後文帝幸许昌问邈曰颇复中圣人否邈对曰时复中之帝大笑退之诗不到圣处宁非痴孟子曰以意逆志是为得之】莫作秋虫促机杼贫家能有几絢丝【欲其缓于追科也王介甫促织诗只向贫家促机杼几家能有一絢丝】

次韵钱穆父赠松扇【穆父名勰按本传元丰七年使高丽松扇盖奉使时所得王云鷄林志云高丽松扇揭松肤柔者缉成文如?心亦染红间之或言水柳皮也】

银钩玉唾明蠶纸松箑轻凉并送似【银钩见前注太白诗欬唾落九天随风生珠玉法书要录王羲之兰亭序用蚕茧纸鼠?笔扬雄方言曰扇自关而东谓之箑退之谁氏子诗曰写吾此诗持送似】可怜远度幘沟娄【魏志东夷传曰高句丽汉时赐鼓吹伎人常从玄菟郡受朝服衣幘高句丽令主其名籍後稍骄恣不复诣郡子东界筑小城置朝服衣幘其中岁时来取之今犹名此城为幘沟娄沟娄者句丽名城也】适堪今时褊褊子【初学记载程晓伏曰诗云今世褊褊子触热到人家摇扇臂中疼流汗正滂沱李白赠玉屋山人魏万诗亦云五方遗我语知非僂僂人按僂僂谓痴人而褊褊谓不晓事人褊音耐褊音戴见集韵此句山谷以自通】文人玉立气高寒【文选桓温荐谯元彦表曰抗节王立誓不降辱退之作刘统军墓铭曰仍世北边乐其高寒】三韩持节见神山【使高丽必从海道通典曰马韩後汉时通焉有三种一曰马韩二曰辰韩三曰弁韩其後皆为百济新罗所并史记封禅书曰自威宣燕昭使

人入焉求蓬萊方丈瀛洲此三神山者其傳在海中諸仙人及不死之藥皆在焉】合得安期不死藥使我蟬蛻塵埃間【薛能曰賴有詩情合得嘗封禪書又云李少言君上曰臣嘗游海上見安期生後漢書逸民傳曰蟬蛻埃之中按史記屈原傳曰蟬蛻于濁穢退之詩未免捶楚塵埃間】

戲和文潛謝穆父松扇

猩毛束筆魚網紙松桱織扇清相似【山谷有猩毛筆詩蓋亦穆父高麗所得雞林志云高麗楮紙光白可愛號曰白硯紙博物志曰漢桓帝時蔡倫始搗魚網造紙此借用桱當作柿說文削木札扑者也音芳廢反】動搖懷袖風雨來想見僧前落松子【文選班婕妤怨歌行曰出入君懷動搖微風發老杜雙松圖歌曰葉里松子僧前落】張侯哦詩松韻寒六月火云蒸肉山【謂詩雖清寒如松風之韻而體則肥熱如肉山之蒸退之藍田丞廳壁記曰對樹兩松曰哦其問此因松扇故及之初學記載盧思道納涼賦曰火云赫而四舉楞嚴經曰為綻為爛為大肉山有百千眼無量啞食文潛頗肥故山谷詩有雖肥如瓠壺陳后山詩有詩人要瘦君則肥之句傳燈錄載一通判禮一僧問宗旨僧曰不要你肉山倒地】持贈小君聊一笑不須射雉穀黃間【戲謂文潛之肥如賈大夫之陋漢書東方朔傳歸遺細君注曰朔自比于諸侯謂其妻曰小君左傳曰昔賈大夫惡取妻三年不言不笑御以如臯射雉獲之其妻始笑文選潘安仁射雉賦曰捧黃間以密穀注云黃間弩名】

謝鄭閔中惠高麗畫扇二首【閔中名穆雞林志云高麗疊紙為扇銅兽鑰環加以銀飾亦有畫人物者】

會稽內史三韓扇分送黃門畫省中【晉書王述王羲之皆為會稽內史按職官志諸王國內史掌太守之任此引用以屬閔中閔中元豐三年守越州告老元祐初入為國子祭酒事具寔錄本傳越州即會稽也三韓見前注晉志曰給事黃門侍郎與侍中俱管門下衆事或謂之門下省蔡質漢官典職曰尚書省中皆以胡粉塗壁畫古賢烈女此借用按寔錄元祐五年十月詔移秘書省國史案就現今置局處專掌國史寔錄編修曰以國史院為名隸門下省山谷時為史官故云】海外人烟來眼界全勝博物注魚虫【文選曹子建詩千里無人烟心經曰乃至無眼界退之詩爾雅注虫魚定非磊落人】

苹汀游女能騎馬傳道蛾眉畫不如【咏扇中所畫如此柳惲詩汀洲采白苹碩人詩曰螭首蛾眉王介甫詩眉目分明畫不如】寶扇真成集陳隼史臣今得殺青書【陳隼見前注劉向戰國策叙曰皆定以殺青書可繕寫應劭風俗通按劉向別錄曰殺青者直用青竹簡書耳】

山谷內集詩注卷七

山谷内集诗注卷八

<集部,别集类,北宋建隆至靖康,山谷内集诗注>

钦定四库全书

山谷内集诗注卷八 宋 黄庭坚 撰

任渊注

次韵王炳之惠玉版纸

王侯须若缘坡竹哦诗清风起空谷【王褒髯奴词曰离离若绿坡之竹鬱鬱若春田之苗王立之诗话曰潘十云口之得此诗大以为憾】古田小纸惠我百信知溪翁能解玉【古田隶福州晋书何曾传人有小纸为书者敕记室勿报唐舒元舆悲剡藤文曰剡溪上多古藤溪中多纸工刀斧斩伐无时】鸣碓千杵动秋山裹粮万里来犂犢【裹粮一作裹囊碓与砧同捣缢石也诗曰乃裹餼粮于橐于囊司马迁书曰待罪犂犢下】儒林丈人有苏公相如子云再生蜀【晋书王沈传裴秀为儒林丈人苏公谓东坡汉书司马相如扬雄皆蜀郡成都人】往时翰墨颇横流此公归来有边幅【南史庾肩吾传曰文章横流一至于此李阳冰作李白集序曰卢黄门云陈拾遗横制颓波天下质文翕然一变左传曰富如布帛之有幅後汉隗嚣传论曰坐饰边幅】小楷多传乐毅论【法书苑云右军乐毅论智永以为正书第一梁世摹出天下珍之】高词欲奏云门曲【退之诗高词媲皇坟周礼大司乐注曰云门黄帝之乐庄子曰黄帝张乐于洞庭之野其卒无尾其始无首变化齐一不主故常天机不张而五官皆备此之谓天乐】不持去扫苏公门乃令小人今拜辱【汉书高五王传魏勃常独早扫齐相舍人门外舍人怪之勃曰欲以求见相君曲礼注云自外来而拜拜见也自内来而拜拜辱也】去骚甚远文气卑画虎不成书势俗【老杜诗纵使卢王操翰墨劣于汉魏近风骚魏文帝典论曰文以气为主又曰孔融体气高妙此反而用之後汉马援传曰画虎不成反类于狗晋书卫恒传为四体书势退之石鼓歌曰羲之俗书趋姿媚】董狐南史一笔无误掌杀青司记录【左传太史书赵盾弑其君孔子曰董狐古之良史也书法不隐又崔杼弑庄公太史书曰崔杼弑其君崔子杀之其弟嗣书而死者二人南史氏闻太史尽死执简以往闻既书矣乃还一笔无犹摭言载皇甫湜书所谓诗未有骆宾王一句也风俗通曰杀青作简书之新竹有汗後皆蠹故作简者于火上炙乾之山谷时为史官故云】虽然此中有公议或辱五鼎荣半菽【言史之所书富贵者或辱而贫贱者反荣汉书主父偃传曰丈夫生不五鼎食死则五鼎烹耳注谓牛羊豕鱼麋项羽传曰卒食半菽】愿公进德使见书不敢求公米千斛【退之答元稹书曰足下年尚强嗣德有继将大书特书不一书而已也易曰君子以进德修业文选张景阳诗君绅宜见书晋书陈寿谓丁仪丁廙子曰可觅千斛米当为尊公作佳传】

谢王炳之惠石香鼎

薰炉宜小寝鼎制琢晴岚香润云生础烟明虹贯岩【江文通拟休上人诗曰膏炉絶沈燎李善注云炉熏炉也欧公诗曰孤烟起晴岚淮南子曰山云蒸柱础润传灯录慧忠国师化去有白虹贯于岩壑吕温诗空岩起白虹】法从空处起人向鼻头参【宗镜录曰若离此真空之门无有一法建立楞严经香严童子言见诸比丘烧沈水香香气寂然来入鼻中我观此气非水非空非烟非火去无所着来无所从由是意销发明无漏如来印我得香严号又孙陀罗难陀言世尊教我观鼻端白此借用】一炷听秋雨何时许对谈【维摩经曰今二大士文殊师利维摩诘共谈必说妙法雪窦颂前三三话曰谁谓文殊是对谈按传灯录僧问法眼禅师云维摩与文殊对谈何事】

次韵柳通叟寄王文通

故人昔有凌云赋何意陆沈黄绶间【凌云赋见前注後汉景丹传曰何意二郡良为我来庄子则阳篇仲尼曰是陆沈者也注曰人中隐者譬无水而沈也汉书朱博传注曰丞尉职卑皆黄绶云】头白眼花行作吏儿婚女嫁望还山【老杜诗头白眼暗坐有胝肉黄皮皱命如綫又诗眠花落井水底眠嵇康絶交书曰一行作吏此事便废後汉书向长字子平男女婚嫁毕遂恣意游五岳名山】心犹未死杯中物春不能朱镜里颜【上句言饮兴未衰也渊明诗曰天运苟如此且进杯中物乐天诗白髮逐流落朱颜辞镜去又云独有病眼花春风吹不落此用其意】寄语诸公肯湔祓割鸡今得近乡关【文选广絶交论曰翦拂使其长鸣李善注云与湔祓同割鸡字见鲁论谓为令宰北史庾信传常有多乡关之思】

送张天觉得登字

张侯起巴渝翼若垂天鹏【古乐府有巴渝舞巴渝蜀地也天觉盖蜀人庄子曰鹏之背不知其几千里也怒而飞其翼若垂天之云】历诋汉诸公霜风拂觚棱【汉书伍被传上疏历诋公卿大臣霜风谓天觉熙宁中尝为监察御史里行崔篆御史箴曰简上霜凝笔端风起西都赋曰设璧门之凤阙上觚棱而栖金爵】去国行万里淡如云水僧【天觉自御史得罪监荆南商税周易流演题曰云水僧仁英撰又僧问鹫岭如何是境中人师云大殿毗卢佛堂中云水僧】归来头亦白小试不尽心【天觉除闲封推官议役法不合乞外任乃除河东路提刑史记孙武传曰可以小试勒兵乎】湖海尚豪气有人议陈登【魏志张邈传曰陈登字元龙刘表与刘备共论天下人许汜曰陈元龙湖海之士豪气不除】持节三晋邦典刑寄哀矜【三晋谓韩魏赵河东盖晋之故地书曰象以典刑注谓法用常刑鲁论曰如得其情则哀矜而勿喜】公家有闲日禅窟问香灯【左传曰公家之利知无不为法笔经经行禅窟】因来叙行李斩寄老崖藤【肇法师答刘遗民书曰君与法师当数有文集因来何少又曰冀行李数有承问舒元舆悲剡溪古藤文曰剡溪多古藤溪中多纸工刀斧斩伐无时】

次韵徐文将至国门见寄二首

槐催举子着花黄来食邯郸道上梁【秦中岁时记云进士下第当年七月复献新文求解故语曰槐花黄举子忙邯郸事见前注汉书文帝指视慎夫人新丰道曰此走邯郸道也】便欲

扫牀悬麈尾正愁喘月似灯光【上句谓拂榻以待共谈故悬麈尾也世说满奋畏风在晋武帝坐上有琉璃屏实密似踈奋有寒色帝笑奋答曰臣如吴牛见月而喘谓吴牛畏热见月疑是日所以喘也老杜诗今夕复何夕共此灯烛光世说殷中军为庾公长史下都王丞相自起解帐带麈尾语殷曰身今自当与君共谈析理既其清言遂达三更丞相叹曰正始之音正当尔耳山谷意谓欲与文将夜语恐其触暑而来畏见灯光如见月而喘也】

千头剖蚌明珠熟百尺垂丝鱠缕长【欧阳公食鸡头诗云剖蚌得珠从海底千头借用襄阳记李衡千头柑橘事潘岳西征赋曰华鲂跃鳞素鱖扬□□人缕切鸾刀若飞应刃落俎霍霍菲菲】柳下石门君有此可能冲雪厌清凉【意谓徐君何苦舍林泉之乐奔走于名利之途孟子曰不贤者虽有此不乐也此用其字】

博士王扬休碾密云龙同事十三人饮之戏作

齏云苍璧小盘龙贡包新样出元丰【并见前第二卷谢送碾壑源拣芽注】王郎坦腹饭牀东大官分物来妇翁【晋书王羲之传郗鉴使门生求女婿于王导导令就东厢徧观子弟门生归曰一人在东牀坦腹食独若不闻鉴曰正此佳婿耶访之乃羲之也遂妻之国史职官志翰林司掌供果实茶茗属大官令】棘围深锁武成宫谈天进士雕虚空【国朝试进士多在武成王庙熙丰间进士高谈性命溺于虚无元佑初其习犹在史记荀卿传曰骀衍之术迂大而閎辩驹爽文具难施故齐人颂曰谈天衍雕龙爽佛氏婆娑论曰欲画虚空令成五色只益自劳】鸣鸠欲雨唤雌雄南岭北岭宫徵同【言程文声调一律也欧阳公诗曰天将雨鸠逐妇鸣中林鸠妇怒啼无好音】午牕欲眠视蒙蒙喜君开包碾春风注汤官焙香出笼【官焙即建溪北焙】非君灌顶甘露碗几为谈天乾舌本【莲经偈云世尊慧灯明我闻受记音心欢喜充满如甘露见灌华严经颂云则蒙十方一切佛手以甘露灌其顶甘露及舌本并见前注晋书蔡谟传谢尚曰卿读尔雅不熟几为勤学死】

答黄冕仲索煎双井并简扬休【冕仲名裳】

江夏无双乃吾宗同舍颇似王安丰【後汉黄香传博学能文章京师号曰天下无双江夏黄童老杜诗吾宗老孙子李邕诗亦云吾宗固神秀汉书直不疑传曰其同舍有告归晋书王戎封安丰侯善发谈端赏其要会此引用以属王扬休】能浇茗碗湔袂我风袂欲挹浮丘翁【湔袂见前注文选郭璞游仙诗云左挹浮丘袖右拍洪崖肩李善注引列仙传曰浮丘公接王子乔以上嵩高山】吾宗落笔赏幽事秋月下照澄江空【落笔见前注老杜诗幽事颇相关又云幽事亦可悦秋月澄江言诗之清绝如此】家山鹰爪是小草敢与好赐云龙同【山谷家于双井欧阳公双井茶诗云西江水清江石老石上生茶如凤爪此云鹰爪亦其比也小草见前注周礼天官玉府曰凡王之好赐共其货贿注谓有所善则赐予之】不嫌水厄幸来辱寒泉汤鼎听松风夜堂朱墨小灯笼【伽蓝记曰王蒙好茶人至辄饮之士大夫甚以为苦每欲候蒙必云今日有水厄东坡试院煎茶诗蟹眼已过鱼眼生飕飕欲作松风鸣北史苏绰传始制文案程式朱出墨入之法此借用南史宋武帝纪壁上挂葛灯笼】惜无纤纤来捧碗惟倚新诗可传本【韩孟联句云茗碗纤纤捧】

再答冕仲

丘壑诗书虽数穷田园芋栗颇时丰【老子曰多言数穷此借用老杜诗锦里先生乌角巾园收芋栗不全贫】小桃源口雨繁红春溪蒲稗没鳧翁【小桃源在双井山谷所居之地李贺诗曰桃花乱落如红雨选诗云蒲稗相因依史游急就章云春草鸡翘鳧翁濯顔师古注曰鳧者水中之鸟翁颈上毛也东坡诗新苗未没鹤】投身世网梦归去摘山鼓声雷隐空【选诗曰世?婴我身】秋堂一笑共灯火与公草木臭味同【左传曰今譬于草木寡君在君君之臭味也】安用茗浇垒块胷他日过饭随家风买鱼贯柳鸡着笼【垒块胷见前注汉书鲍宣传曰俱过宣一饭去晋书夏侯湛传潘岳作家风诗老杜诗称家随丰俭鱼贯柳见前注】更当力贫开酒椀走谒邻翁称子本【力贫犹言力疾魏志曹爽传注司马宣王谓李胜曰今当与君别因欲自力设薄主人退之祭李使君文曰虽掾俸之酸寒要拔贫而为富世说江卢奴直唤人取酒自饮一椀老杜诗边酒排金盃称子本谓称贷于邻家以治具孟子曰又称贷而益之汉书货殖传曰齎货子钱家退之作柳子厚墓志曰其俗以男女质钱约不时赎子本相侔则没为奴婢】

戏答陈元舆【宝録元佑二年八月陈轩为主客郎中轩字元舆】

平生所闻陈汀州蝗不入境年屡丰【汉书高帝纪曰平生所闻刘季奇怪当贵後汉鲁恭公沙穆皆蝗虫避境周颂桓诗曰屡丰年】东门拜书始识面鬢髮幸未成老翁【退之送石洪序曰拜受书礼于门内此借用当是拜诰于东上合门魏文帝与吴质书曰志意何时复类昔日已成老翁但未白头耳】官饗同盘厌腥膩茶瓿破睡秋堂空【周礼天官外饗掌宾客殮饗之事】自言不复娥眉梦枯淡颇与小人同【诗曰螭首蛾眉退之诗旅宿梦婉婉药山云一切处放教枯淡去】但忧迎笑花枝红夜牕冷雨打斜风秋衣沈水换薰笼【太白诗妾似井底花开向君笑乐天诗萧萧暗雨打牕声顔师古注急就章曰篝一名客亦以为薰笼】银屏宛转复宛转意根难拔如薤本【乐天长恨歌曰珠箔银屏迤邐开释氏有六根之说意根其一也後汉龐参传曰拔大本薤者欲吾击强宗也】

再答元舆

君不能入身帝城结子公又不能击强有如诸葛丰【汉书陈咸传与陈汤书曰幸蒙子公力得入帝城死不惧击强见前注诸葛丰传为司隶校尉刺举无所避】法当顛顛百僚底五十天涯一秃翁【晋书石勒载记勒尝闻郗食其劝立六国後大惊曰此法当失何得遂成天下老杜诗冠盖满京华斯人独顛顛百僚底见前注汉书灌夫传与长孺共一秃翁注谓无官立版授】问君何自今为郎便殿作赋声摩空【汉书冯唐传文帝曰父老何自为郎李贺高轩过曰殿前作赋声摩空】偶然樽酒相劳苦牛铎调与黄钟同【汉书张敖传曰劳苦如平生欢晋书荀勗传及掌乐乃曰得赵之牛铎则谐矣北史长孙绍远传曰闻浮屠上铎鸣雅合黄钟牛铎山谷以自况黄钟以比元舆谓贵贱虽异调韵别同】安得朱轡各凭熊江南楼阁白苹风劝归啼鸟晓牕笼【朱轡见前注後汉舆服志曰公列侯安车朱斑轮倚鹿较伏熊式柳惲诗汀洲采白苹曰落江南春宋玉风赋风起于青苹之末古乐府前溪歌曰当曙与未曙白

鸟啼牕前】男儿邂逅功补袞鸟倦归巢叶归本【意谓功名之会时来则偶为之初不必经意至于税驾之地则不可不早计也诗曰邂逅相遇适我愿兮陶渊明归去来辞曰鸟倦飞而知还韩诗外传曰诗云代马依北风飞鸟栖故巢皆不忘本之谓也文选鲍明远诗别叶早辞风李善注引翼氏风角曰木落归本水流向东】

次韵冕仲考进士试卷

少年迷翰墨无异虫蠹木【智度论云佛言善说无失无过佛语诸外道中设有好语如虫蚀木偶然成文】诸生程艺文承诏当品目【文选韦宏嗣博奕论曰设程试之科李善注引说文曰程品也前汉书有艺文志文选沈休文恩幸传论曰品目少多随事俯仰】牀敷设箱篚赋纳忽数束【牀敷见前注书曰敷纳以言左氏僖二十七年传作赋纳以言注云赋犹取也退之诗止携一东书】变名混甲乙誊写失句读【谓糊名誊录莫知某甲某乙也史记任少卿曰某子甲何为不来乎汉书艺文志曰俗师失其读公羊序亦曰失其句读】书牕过白驹夜几跋红烛【庄子曰人生天地之间如白驹之过郤忽然而已郤亦作隙曲礼曰烛不见跋刘禹锡诗最宜红烛下】钩深思嘉鱼攻璞愿良玉【易曰钩深致远诗曰南有嘉鱼又曰他山之石可以攻玉汉书董仲舒传曰良玉不琢】谈天用一律呻讯厌重复【一作占毕厌重复谈天见前注退之樊宗师铭曰由汉迄今用一律学记曰今之教者呻其占毕多其讯注谓今之师自不晓经之义但吟其所视简之文多其难问也】丝布涩难缝快意忽破竹【乐府绿珠懊恼歌曰丝布涩难缝令依十指穿史记李斯传快意当前适观而已矣晋书杜预传曰譬如破竹数节之后皆迎刃而解】圣言裨曲学割袞缀邪幅【汉书辕固传曰无曲学以阿世菜菽诗曰赤芾在股邪幅在下南史陆厥传沈约曰以洛神比陈思他赋有似异手之作士衡虽云焕若缙锦宁有濯色江波其中复有一片是卫文之服此句用有意】注金无全巧窃发或中鹄【庄子曰以金注者昏考工记梓人注曰鹄所射也以皮为之射义曰射者各射己之鹄射中则得为诸侯】翟公辟庖老薪樵茂械朴【械朴诗序曰械朴文王能官人也诗曰芄芃械朴薪之樵之注谓山林茂盛万民得而薪之贤人众多国家得用蕃兴】御史威降霜行私不容粟【崔御史箴曰简上霜严笔端风起汉书孙宝谓侯文曰今鹰隼始击以成严霜之威】吏部提英鉴片善蒙采录【唐书高季辅为吏部侍郎帝赐金背镜一以况其清鉴退之进学解曰占小善者率以录】博士利其楚铨量颇三复【汉广诗言利其楚注谓以喻取女之尤高洁者三复见鲁论】因人享成事贱子真碌碌【史记平原君传毛遂曰公等碌碌所谓因人成事者也汉书楼护传王邑称贱子上寿】

王圣美三子补中广文生【圣美名子韵】

王家人物从来远今见诸孙总好贤【王氏最盛于江左】三级定知鱼尾进一鸣已作鴈行连【三秦纪河津一名龙门两傍有山水陆不通江海大鱼薄集龙门上下则为龙不得上点额暴腮雪窦颂三级浪高鱼化龙痴人犹辱野塘水魏志邓艾传将士鱼贯而进北里志名妓菜儿呼赵光远为一鸣先辈按史记滑稽传齐威王曰此鸟不飞一飞冲天此鸟不鸣一鸣惊人礼记曰兄弟之齿鴈行】愧无藻监能推轂愿卷囊书当赠钱【老杜诗持衡留藻监按晋太康制云□监铨衡汉书郑当时传曰其推轂士诚有味其言也】归去雄夸向儿侄舍中悵

子贍狂颠【老杜诗忆年十五心尚孩健如黄犊走复来晋书石季龙载记少时数弹人石勒将白母王杀之王曰快牛为犊子时多能破车汝当小忍之青箱杂记张师锡老儿诗曰长思当弱冠悔不贍狂颠】

次韵游景叔闻洮河捷报寄诸将四首【景叔名师雄张舜民作种谊墓志云初王师拓土至枹罕始建州县嘉勒氏余种独栋戡尚存退保青唐其首领果庄诱杀知河州景思立栋戡遂复其国王师亦不复西神宗命李宪致果庄十余年不能得竟以汉爵縻之岁有廩赐元佑初果庄有窥觊故土之心与夏国陰相结连约分其地自引兵城洮州结属羌为内应知岷州种谊刺得其情条具攻取十利闻于朝朝廷遣将作监丞游师雄就商利害师雄议与谊合帅臣刘舜卿不得已从之乃遣总管姚兕统熙河军趋讲朱城谊出哥龙峴败贼于邦令谷追奔至洮州贼入城拒守晨雾蔽野谊亲鼓之果庄坐佛寺拱手就执捷报至遣近侍奏告裕陵命以果庄檻车送京师

案嘉勒氏旧作唘氏陈戡旧作董璫果庄旧作鬼章今并依续通监纲目校改】

千仞溪中石转雷汉家万骑捣虚回【孙子曰如转圆石于千仞之山者势也吕氏春秋决积水于千仞之溪太白蜀道难曰崩崖转石万壑雷史记卫青传曰去病将万骑出陇西有功孙武传孙臆曰批亢捣虚】定知献马胡雏入看即称觞都护来【礼记曰献车马者执策绥晋书石勒载记王衍日向者胡雏吾观其声视有奇志後汉书班超传上疏曰臣超窃冀西域平定陛下举万年之觴其後超为都护】

中原日月九夷知不用禽胡衅鼓旗【书曰遂通道于九夷八蛮老杜诗势成禽胡月左传知罃曰二国治戎臣不胜其任以为俘馘执事不以衅鼓使归即戮君之惠也】更向天阶舞干羽降书剩破一年迟【果庄虽就禽其子孙部族犹足以陆梁于边阿里库及温溪心皆未臣顺恐诸将狃胜徼功故欲以文德来之也东坡奏议述其事甚详书曰舞干羽于两阶七旬有苗格楚辞曰攀天阶而下视乐天诗此中来较十年迟

案阿里库栋戡养子旧作阿里骨今依续通监纲目校改】

汉得洮州箭有神斩关禽敌不逡巡【後汉书耿恭传以毒药傅矢虏中矢者疮皆沸大惊曰汉兵神真可畏也孙子曰小敌之坚大敌之禽也贾谊过秦论曰秦人开关延敌九国之师逡巡而不敢进】将军快上屯田计要纳降胡十万人【汉书赵充国传为蒲类将军先零反充国愿驰至金城图上方略上屯田奏曰万人留田顺天时因地利以待可胜之势此坐支解羌人之具也明年充国奏言羌本可五万人军凡斩首七千六百级降者三万一千二百人请罢屯兵振旅而还後汉书皇甫规传曰高可以涤患下可以纳降】

遥知一炬絕河津生缚青宜不动尘【张舜氏作游师雄墓志云分兵为两道姚兕将而左攻讲朱城断黄河飞桥青唐十万之衆不得度种谊将而右破洮州禽果庄及大首领九人此诗所云青宜即果庄青宜缚也晋书王濬传吴人以钱鎖絕江濬作火炬烧之融液断絕船无所碍汉书曹参等传皆有絕河津之语老杜诗黄门飞鞚不动尘】付与山河印如斗忍为鼠子腹心人【言果庄尝受爵命乃与夏国相结有窥故土之意晋书周顗传曰取金印如斗大系

肘吴志孙权传注魏文帝诏曰此鼠子自知不能保尔许地也後汉书寇恂传曰隗嚣将高峻遣皇甫文出降恂斩之曰文峻之腹心杀之则峻亡其胆】

和游景叔月报三捷

汉家飞将用庙谋复我匹夫匹妇讐【汉书李广传匈奴号为飞将军孟子曰汤居亳与葛为邻葛伯仇饷为其杀是童子而征之四海之内皆曰非富天下也为匹夫匹妇复讐也】真成折箠禽胡月不是黄榆牧马秋【折箠见前卷注贾谊过秦论曰胡人不敢南下而牧马史记云秦郤匈奴树榆为塞】幄中已断匈奴臂军前可饮月氏头【汉书张良传曰运筹帷幄之中西域赞曰通西域以断匈奴右臂张骞传匈奴破月氏王以其头为饮器】愿见呼韩朝渭上诸将不用万户侯【汉宣帝甘露二年呼韩单于来朝上登渭桥咸称万岁李广传文帝曰令广当高祖世万户侯岂足道哉老杜诗愿见北地傅介子老儒不用尚书郎】

次韵崔伯易席上所赋因以赠行二首【别本云次韵颖守崔伯易席上赠别诸同舍】

迎新与送故渠已不胜勤【别本云倾城迎五马财力已三勤汉书黄霸传曰数易长吏送故迎新之弊及奸吏缘絶簿书盗财物所易新吏又未必贤三勤见穀梁谓民勤于力勤于财勤于食法言曰民有三勤此借用其字】民卖腰间劔公寛柱後文【汉书龚遂传为勃海太守民有带持刀劔者使卖劔买牛卖刀买犊曰何为带牛佩犊又张敞传弟武曰吏民雕敞且当以柱後惠文治之耳秦时狱法吏冠柱後惠文武意欲以刑法治梁】诸郎投赐沐高会惜临分【别本云同僚欣赐沐张饮惜临分汉书石奋传曰长子建为郎中令少子庆为内史每五日洗沐归谒亲入子舍高会见前注谢承後汉书曰王奂为汉阳太守范丹于道侯别之奂曰可共到前亭宿息以叙分隔退之诗临分不汝诳有路即归田】去国虽千里分忧即近君【别本云看即追严助逯疑借寇君能为天子分忧即与在朝廷无异老杜同元使君春陵诗序曰当天子分忧之地刘禹锡诗受谴时方久分忧政未成】

老惜交情别追随车马勤【老杜诗惜别到文场汉书郑当时传翟公曰一死一生乃见交情追随见前注】临朝思共理治郡复斯文【汉书成帝纪曰临朝渊默黄霸传功名损于治郡时共理见前注斯文谓以儒雅饰吏】讼息常休吏民贫更劝分【汉书薛宣传曰及日至休吏左传曰振?劝分】西湖十顷月自比汉封君【欧阳公自扬迁颖有诗曰都将二十四桥月换得西湖十顷秋史记货殖传曰齐鲁千亩桑麻渭川千亩竹此其人皆与千户侯等又曰今有无秩禄之奉爵邑之入而乐与之比者命曰素封汉书货殖传曰秦汉之列侯封君食租税千户之君则二十万】

同子瞻和赵伯充团练

金玉堂中寂寞人仙班时得共朝真【言伯充宗室子居富贵而自处如寒素也老子曰金玉满堂英之能守富贵而骄自遗其咎】两宫无事安磐石万国归心有老臣【两宫谓宣仁哲庙汉书窦婴传曰有如两宫爽将军老臣谓文吕诸公万国归心用孟子二大老意磐石见前

注】家酿可供开口笑侍儿工作捧心顰【晋书何充传刘惔云见次道饮令人欲倾家酿庄子盗跖曰其中开口而笑者一月之中不过四五日而已矣捧心顰见前注】醉乡乃是安身处付与升平作幸民【醉乡见前注左传曰善人在上则国无幸民此借用乐天咏兴诗序曰颓然自适盖河洛间一幸人也】

戏答赵伯充劝莫学书及为席子泽解嘲【叔盎延赏】

平生饮酒不尽味五鼎馈肉如嚼蜡【选诗宾饮不尽觴孟子曰繆公之于子思也亟问亟馈鼎肉子思不悦楞严经曰当横陈时味如嚼蜡】我醉欲眠便遣客三年窥墙亦面壁【南史陶潜传曰潜若先醉便语客云我醉欲眠卿可去宋玉登徒子好色赋曰此女登墙窥臣三年至今未许也传灯录達磨寓正嵩山少林寺面壁而坐终日默然此借用】空余小来翰墨场松烟兔颖傍明牕【选诗粲粲翰墨场鲍照飞白书铭曰沾此瑶液染彼松烟兔颖见韩退之毛颖传】偶随儿戏洒墨汁衆人许在崔杜行【汉书周亚夫传文帝曰乡者霸上棘门如儿戏耳卢仝示添丁云忽来案上翻墨汁涂抹诗书如老鸱按王子年拾遗记曰浮提国献神通善书二人出肘间金壶壶中有墨汁如淳漆洒地及石皆成篆颖科斗之字罗叔景赵元嗣者与张伯英并时见称于西州而矜巧自与衆颇惑之故伯英自称上比崔杜不足下方罗赵有余崔谓崔瑗杜谓杜度晋书王羲之传自称我书比鍾繇当坑行比张芝草犹当鴈行也老杜诗沈鲍得同行】晚学长沙小三昧幻出万物真成狂【国史补曰长沙僧怀素自言得草圣三昧传灯录毗婆尸佛偈曰身从无相中受生犹如幻出诸形像】龙蛇起陆雷破柱自喜奇观绕绳牀【陰符经曰地发杀机龙蛇起陆世说曰夏侯太初尝倚柱读书时暴雨霹雳破所倚柱衣服焦然神色不变读书如故此并借用以言草书之变熊墨薺云蔡邕得用笔法大叫欢喜晋书刘毅传尝聚樗蒲掷雉大喜褰衣才牀叫太白作怀素草书歌曰吾师醉後倚绳牀須臾扫尽数千行】家人骂笑宁有道污染黄素败粉墙【书断曰张芝字伯英性好书凡家之衣帛皆书而後练北史卢同传勲簿对奏案若相应者即于黄素楷书大字任华怀素草书歌曰粉壁摇晴光素屏凝晓霜待师挥洒兮不可忘】诚不如南邻席明府蛛网鎖砚蜗书梁【席君盖京师医者与山谷寓舍相邻山谷书帖中所谓席三即其人也文选左太冲诗南邻击钟磬汉书龚遂传曰明府且止愿有所白文选张景阳诗曰蜘蛛网四屋杜牧之诗蜗涎蠹画梁老杜诗虫书玉佩鲜】怀中探丸起九死才术颇似汉太仓【汉尹赏传曰相与探丸为弹此借用楚辞曰虽九死其犹未悔史记扁鹊传曰越人非能生死人也此自当生者越人能使之起尔太仓公淳于意受公乘阳庆禁方为人治病决死生多验】感君诗句唤梦觉邯鄲初未熟黄粱【唤梦觉熟黄粱并见前注】身如朝露无牢强翫此白驹过隙光【汉书苏武传曰人生如朝露何久自苦如此维摩经曰是身如芭蕉中无有坚遗教经曰世实危脆无牢强者柳子厚书曰前过三十七年与瞬息无异後所得者其不足把翫亦已审矣】从此永明书百卷自公退食一炉香【传灯录杭州永明寺知觉禅师延壽着宗镜录一百卷其序曰举一心为宗照万法如镜编联古制之深义撮略宝藏之圆铨云云羔羊诗曰自公退食传灯录守安禅师颂曰南台静坐一炉香亘日凝然万虑忘】

谢景叔惠冬笋雍酥水梨三物

玉人怜我长蔬食走送厨珍自不尝【晋书卫玠传见者以为玉人老杜诗鸣鞭走送烦渔父又诗御厨丝络送八珍此借用鲁论曰不敢尝】秦牛肥膩酥胜雪汉苑甘泉梨得霜【秦牛谓旄牛也见汉书西南夷传三秦记曰汉武帝御宿园有大梨如五升瓶落地则破名含消梨老杜诗红梨迴得霜】冰底斲春生笋束豹文解箨饌寒玉【退之咏笋诗看皮虎豹存选诗云初篁包绿箨乐天诗声声丽曲敲寒玉老杜诗分明饌玉恩左思吴都赋云矜其宴居则珠服玉饌】见他桃李忆故园嚙獠应残遶牕竹【古今诗话唐人诗曰见他桃李树思忆故园春山谷此诗旧本云惠文绿箨包一束园丁破冻取寒玉坚冰封节春未回不怕南风吹作竹盖用乐天食笋诗且食勿踟蹰南风吹作竹之意】

再答景叔

女三为粢当献王三珍同盘乃得尝【国语周语曰三女奔密康公公母曰必致之王夫粢美物也衆以美物归女而何德以堪之周礼曰献贤能之书于王世说桓公曰同盘时尚不相助况复危难此借用其字薛能诗赖有诗情合得尝】甘泉下浇藜苳肠今我诗句挟风霜【并见前注】小人食珍敢取足都城一万炊白玉【左传曰愿以小人之心属餽而已礼记曰庶人无故不食珍前汉食货志曰钱金以钅万计皆取足大农退之答元稹书曰勤已取足炊玉见前注】赐钱千万民犹饥雪後排檐冻银竹【实録元佑二年十二月乙酉以大雪寒出钱百万令开封府赐贫民亦见苏子由奏议大白诗白雨映寒山森森似银竹】

次韵几复和答所寄

海南海北梦不到会合乃非人力能【退之送李正字序曰虽十年幸而集处得燕而举一觴此天也非人力也孟子曰非人之所能为也】地褊未堪长袖舞夜寒空对短檠灯【汉书长沙定王传注曰景帝後二年诸王来朝有诏史前称壽歌舞定王但张褰小举手左右笑其拙上怪问之对曰臣国小地狭不足回旋史记范雎传赞曰长袖善舞退之有短檠歌言书生寒苦之状也】相看鬓髮时窥镜曾共诗书更曲肱作个生涯终未是故山松长到天藤【言其未能归隐文选谢灵运诗故山日已远】

寄上叔父夷仲三首

少年有功翰墨林中岁作吏几陆沉【选诗寄词翰墨林陆沉见前注】庖丁解牛妙世故监市履豨知民心【解牛言其游刃有余地也见庄子晋书桓石秀传谢安访以世务嘿然不答或问之石秀曰世事此公所谓吾尚何言哉文选潘正叔迎大驾诗曰世故尚未夷庄子曰正获之问于监市履豨也每下愈况注云豨大豕也监市之履豕以知其肥瘦者愈履其难肥之处愈知豕肥之要此借用言知民之肥脊也】万里书来儿女瘦十月山行冰雪深梦魂和月绕秦陇汉节落毛何处寻【扬文公谈苑载菩萨蛮词有月和残梦园之句汉书苏武传杖汉节牧羊卧起操持节旄尽落蔡琰胡笳曰生死不相知兮何处寻】艰难闻道有归音部曲霜行璧月沉【汉书李广传曰无部曲行陈南史张贵妃传璧月夜夜满】王春正月调玉烛使星万里朝天心【春秋书春王正月杜预注曰周王之正月也玉烛见前注後汉李合传和帝

遣二使到益部投候馆吏李合舍合问二君发京师时知朝廷二使耶问何以知之合指星云前有二星向并州分野】颇令山海藏国用乃见县官恤民深【汉书吴王濞赞曰擅山海之利韩诗外传曰王者藏于天下按汉昭帝时贤良文学愿罢盐铁无与民争利桑弘羊以为家人有宝器尚犹柙而藏之况天地之山海乎文学曰人庶藏于家诸侯藏于国天子藏于海内是以王者不蓄下藏于人礼记曰冢宰制国用县官谓天子见汉书霍光传注】经心陇蜀封疆守必有人材备访寻【晋书谢道韞传尝讥谢玄学殖不进曰为尘雾经心为天分有限耶又退之书曰前古之兴亡未尝不经于心史记天官书曰中国山川其维首在陇蜀】

关寒塞雪欲嗣音燕鴈拂天河鲤沉【老杜诗天寒关塞深诗曰子宁不嗣音燕鴈用苏武事见前注老杜诗长歌燕鴈灯前落东都赋曰旌旗拂天河鲤用文选古诗呼童烹鲤鱼中有尺素书之意诗曰岂其食鱼必河之鲤】百书不如一见面几日归来两慰心【终上句之意汉书赵充国传曰百闻不如一见世传退之与大颠帖曰所示广大深迥如此读来一百遍不如亲面而对之诗曰以慰我心】弓刀陌上望行色儿女灯前语夜深【退之送郑尚书序曰府帅必戎服左握刀右属弓矢帕首袴鞬迎于郊古乐府有陌上桑庄子曰车马有行色老杜诗厨人语夜阑退之诗悄悄深夜语】更怀父子东归得手种江头柳十寻【汉书疏广传谓兄子受曰岂如父子相随出关归老故乡晋书桓温传见少时所种柳皆已十围慨然曰木犹如此人何以堪沈怀远南越志曰宋昌县有棘竹长十寻】

山谷内集诗注卷八

山谷内集诗注卷九

钦定四库全书

山谷内集诗注卷九 宋 黄庭坚 撰

任渊注

考试局与孙元忠博士竹间对?夜闻元忠诵书声调悲壮戏作竹枝歌三章和之【刘禹锡竹枝词引曰余来建平里中儿联歌竹枝吹笛击鼓以赴节含思宛转有淇濮之艳昔屈原居沅湘其民迎神词多鄙陋乃为作九歌故余亦作竹枝词九篇】

南?读书声吾伊北?见月歌竹枝【古乐府东飞伯劳歌曰南?北牖挂月光乐录曰诸调曲皆有词有声词者其歌诗也声者若羊吾夷伊那何之类也近世郭茂倩编乐府于相和歌词叙引中亦载此语】我家白髮问乌鹊他家红妆占蛛丝【山谷太夫人于时无恙故东坡试院中诗有云美君怀中双橘红西京杂记陆生云乾鹊噪而行人至蜘蛛结而百事喜老杜诗浪传乌鹊喜深负脊令诗】

屋山啼鸟儿当归玉钗冒蛛郎马嘶去时灯火正月半阶前雪消萱草齐【退之寄卢仝诗每骑屋山下窥瞰蜀志姜维传注孙盛杂记曰维得母书令求当归老杜诗萤监丝帷彻蛛丝冒髮长丽情集鷽鷽诗杨巨源诗曰清润潘郎玉不如中庭蕙草雪消初】勃姑夫妇喜相唤街头雪泥即渐乾已放游丝高百尺不应桃李尚春寒【欧阳公诗病识陰晴似勃姑又曰天雨止鳩呼妇还鸣且喜老杜诗街头酒债常苦贵庾信燕歌行曰洛阳游丝百丈连黄河春冰千片穿又云数尺游丝即横路】

观伯时画马

仪鸾供帐饗蝨行翰林湿薪爆竹声风帘官烛泪纵横【上三句言供拟之寒陋也供帐敝坏卒徒以为卧供故有贪饗之蝨行于其间国朝会要曰仪鸾司在拱宸门外嘉平坊掌奉供帐之事翰林司在大宁门内掌供御酒茗汤果及游幸宴会内外筵设神异经曰山燥畏爆竹声後汉巴祗与客暗坐不然官烛李商隐诗曰风帘残烛隔霜清老杜诗曰四座泪纵横】木穿石盘未渠透坐?不邀令人瘦贫马百饗逢一豆【言锁宿甚久出院未有期鬱鬱自苦如贫马之得瘦真诰曰太极老君与傅先生木鑽使穿一石盘厚五尺许积四十七年而石穿遂得神丹庭燎诗注曰夜未央犹言夜未渠央也音义曰渠音其遽反元次山诗曰岂欲阜枥中争食糒与饗自注云糒糠中可食者下没反牛马食余草节曰饗下諫反按集韵饗音何间反莖余草也又侯欄反】眼明见此玉花骢径思着鞭随诗翁城西野桃寻小红【老杜诗吾与汝曹俱眼明又丹青引曰先帝天马玉花骢画工如山貌不同一本作五花骢按老杜高都护骢马行曰五花散作云满身晋书刘琨传曰常恐祖生先吾着鞭诗翁谓东坡老杜诗点注桃花舒小红】

题伯时画揩痒虎

猛虎肉醉初醒时揩磨苛痒风助威【俗言虎食狗则醉礼记内则曰疾痛苛痒注云苛疥也退之画记马有痒磨树者】枯楠未觉草先低木末应有行人知【老杜有枯楠诗乐府敕勒歌曰风吹草低见牛羊老杜诗我行已水滨我仆犹木末此诗谓行人居高见风生草低因觉其有虎也】

题伯时画观鱼僧

横波一网腥城市日暮江空烟水寒【退之诗长网横江遮紫鳞欧阳公作苏子美墓志载御史刘元瑜语曰为相公一网打尽】当时万事心已死犹恐鱼作故时看【列子曰同斋三月心死形废山谷旧跋此画为玄沙畏影图按传灯录玄沙宗一大师姓谢氏幼好垂钓年甫三十忽慕出尘乃弃钓舟落髮後得法于雪峰】

题伯时画顿尘马

竹头抢地风不举文书堆案睡自语【战国策秦王谓唐且曰布衣之怒免冠徒跣以头抢地耳司马迁书亦曰见狱吏则头抢地元稹诗满眼文章堆案遶眼昏偷得暂时眠元次山寝论曰寐中寐言非所知也韵书云寐睡语也】忽看高马顿风尘亦思归家洗袍袴【老杜诗高马勿捶面韦应物诗乱髮思一栉垢来思一换时山谷在试院中故有思归之语】题伯时画严子陵钓滩【後汉书逸民传严光字子陵少与光武同游学及光武即位使聘之三反而後至除为谏议不屈乃耕于富春山後人名其钓处为严陵滩焉】

平生久要刘文叔不肯为渠作三公【鲁论曰久要不忘平生之言亦可以为成人矣注云久要旧约也後汉帝纪光武讳秀字文叔】能令汉家重九鼎桐江波上一丝风【汲黯曰夫以大将军有揖客反不重耶此句盖用此意汉书宣帝曰汉家自有制度史记平原君传曰毛遂使赵重于九鼎大吕严光传注曰桐庐县南有严子陵渔钓处按桐庐今属严州东汉多名节之士赖以久存迹其本原正在子陵钓竿上来耳】

题伯时画松下渊明【此篇与上卷卧陶轩诗大抵同意洪州本无山字一韵而以弹字为第二韵疑脱误也】

南渡诚草草长沙慰艰难【南渡谓晋元帝渡江太白金陵诗曰晋家南渡日此地旧长安退之桃源行曰羣马南渡开新主晋书陶侃传苏峻平改封长沙郡公薨後成帝下诏曰作藩于外八州肃清勤王于内皇家以宁昭明太子作陶渊明传曰曾祖侃晋大司马又云自以曾祖晋世宰辅耻复屈身後代自宋武帝王业渐着不复肯仕】终风霾八表半夜失前山【张渊方回家本有此两句盖言晋宋市朝之变也诗曰终风且霾注谓终日风为终风霾土雨也渊明诗曰八表同昏平陆成江庄子曰藏山子泽夜半有力者负之而走蜀中旧本元作平生梦管葛采菊见南山言渊明初名元亮本慕诸葛孔明有当世志晚年耻屈身异代始自放于山

林也蜀志诸葛亮传曰自比管仲乐毅渊明诗曰采菊东篱下悠然见南山】远公香火社遗民文字禅【高僧传曰彭城刘遗民豫章雷次宗等依远游山远乃于精舍无量寿像前远斋立社共期西方乃令遗民着其文又陈舜俞庐山记曰遗民与什肇二师好扬?经论文章之华一时所挹乐天诗本结菩提香火社维摩经曰有以音声语言文字而作佛事传灯録達磨传道副曰如我所见不执文字不离文字而为道用东坡寄辩才诗有台阁山林况无异故应文字不离禅之句】虽非老翁事幽尚亦可观【下句蜀中旧本作幽沉亦可观今本当是後來所改诗意谓陶虽不入社然常往来其间以诸人志尚幽远亦有可观故也庾阜杂记曰远师结白莲社以书招陶渊明陶曰弟子性嗜酒若许饮即往矣远许之遂造焉因勉令入社陶攒眉而去庐山记曰陶元亮居栗里山阿陆修静亦有道之士远师尝送此二人与语道合不觉过虎溪渊明传又曰时周续之入庐山事释惠远彭城刘遗民亦遁迹匡山渊明又不应徵命谓之浔阳三隐退之诗岂敢尚幽独与世实参差鲁论曰虽小道必有可观者焉】松风自度曲我琴不须弹【用左太冲招隐诗何必丝与竹山水有清音之意文选顔延年诗松风遵路急汉书元帝赞曰自度曲被歌声渊明传曰不解音律而蓄无弦素琴一张每酒酣适趣抚弄以寄意】客来欲开说觴至不得言【汉书曹参传曰度客欲有言复饮酒终不得开说梁孝王传曰有所开说于帝】

出礼部试院王才元惠梅花三种皆妙絶戏答三首【邵氏辨诬云王棫京师人有口辩与邢恕共谋诬造诸人废立事其子直方不以父为然每与士大夫言父晚年病心云棫字才元直方字立之】

城南名士遣春来三月乃见腊前梅定知锁着江南客故放緑陰春晚回【山谷有此诗跋云州南王才元舍人家有百叶黄梅妙絶礼部锁院不复得见开院之明日才元遗送数枝盖是岁大雨雪寒甚故梅亦晚开耳又一跋云元佑初锁试礼部阻春雪还家已三月王才元舍人送红黄多叶梅数种为作三诗付王家素素歌之宗室赵子湜家有此録本惜其翰墨不可复见因附于此郑谷诗曰坐中亦有江南客莫向春风唱鷓鴣】

舍人梅坞无关锁携酒俗人来未曾【用韩退之竹涧诗意严维诗柳塘春水漫花坞夕阳迟元稹崔微歌曰吏感徽心关锁开文选嵇康书曰不喜俗人】旧时爱菊陶彭泽今作梅花树下僧【此句山谷自道言其持律不饮无复把菊待酒之意元稹诗禅僧偶向花前定满树狂风满树花】

病夫中岁屏杯杓百叶缃梅触拨人拂杀官黄春有思满城桃李不能春【史记项籍纪曰沛公不胜杯杓不能辞说文缃字注云帛浅黄色也触拨字一本作料理王立之诗话曰触拨字初作故恼其後改焉按乐天榴花诗香尘拟触坐禅人又诗撑拨诗人兴勾牵酒客欢官黄谓黄本官书退之诗杏花两株能白红又曰廉纖晚雨不能晴】

王立之承奉诗报梅花已落尽次韵戏答

南枝北枝春事休榆钱可穿柳带柔【白氏六帖云大庾岭头梅南枝落北枝开汉书食货志

注应劭曰汉铸荚钱今民间榆荚钱是也】定是沈郎作诗瘦不应春能生许愁【南史沈约传谢朓善为诗任昉工于笔约兼而有之约以书陈情于徐勉言已老病百日数旬革带常应移孔以手握臂率计月小半分欲谢事求归老之秩本事诗李白戏杜甫曰借问别来太瘦生总为从前作诗苦庾信愁赋云攻许愁城终不破荡许愁门终不开】

乞姚花二首【欧阳公牡丹释名曰姚黄者千叶黄花出于民姚氏家】

正是风光嬾困时姚黄开晚落应迟【老杜诗春光嬾困倚微风东坡梅诗曰也知早落坐先开此句反其意用之】欲雕好句乞春色日历如山不到诗【言方修史未暇苦思雕刻诗语也文选任彦昇作王文宪集序曰岂直雕章縟采而已哉唐贞元之末朝廷政令着于日历国史职官志云着作郎及着作佐郎掌修撰日历凡宰执时政记左右史起居注所尝会集修纂以为一代之典按实录章惇言先帝日历自熙宁二年正月至三年终系元佑中秘书省官孔武仲黄庭坚司马康修纂刘歆七略曰武帝广献书之路百年之间书积如邱山】

青春日月鸟飞过汗简文书山叠重【乐天诗百年青天过鸟翼下句意见前篇注後汉吴佑传注曰杀青者以火炙简令汗取其青易书复不蠹谓之杀青亦谓之汗简文选沈休文诗山嶂远重叠笛赋曰密栳叠重】乞取好花天上看宫衣黄带御炉烘【天上谓史局李贺诗宫衣水溅黄贾至诗衣冠身惹御炉香烘音呼公反说文燎也】

效王仲至少监咏姚花用其韵四首

映日低风整复斜绿玉眉心黄袖遮【古乐府王僧孺朱鹭曲曰映日上金堤又敕勒歌曰风吹草低见牛羊杜牧之诗云整整复斜斜随旗簇晚沙庾信武媚娘诗云眉心浓黛直点额角轻黄细安】大梁城里虽罕见心知不是牛家花【大梁即汴京史记吕不韦传子楚心知所谓欧阳公牡丹释名曰牛黄亦千叶出于民牛氏家比姚黄差小】

九疑山中萼绿华黄云承轡到羊家真釜虫蚀诗句断犹托余情开此花【真诰曰萼绿华降羊权家云是九疑山得道女罗郁也黄云非本事止以形容此花如前诗黄袖後诗黄鹄尔文选谢灵运拟阮瑀诗曰风悲黄云起李善注引淮南子曰黄泉之埃上为黄云】

仙衣襞积驾黄鹄草木无光一笑开【司马相如子虚赋曰郑女曼姬被阿緗揄紵縞襞积褰约郁挠谿谷注谓即今之裙襖汉书乌孙公主歌曰愿为黄鹄兮归故乡乐天长恨歌曰回眸一笑百媚生六宫粉黛无颜色】人间风日不可奈故待成阴叶下来【人间风日见前注杜牧之诗绿叶成阴子满枝】

汤沐冰肌照春色海牛压帘风不开【後汉百官志公主所食汤沐曰国县庄子曰肌肤若冰雪郭璞尔雅注曰冰雪脂膏也长恨歌曰春寒赐浴华清池温泉水滑洗凝脂杜牧之诗金盘犀镇帷】直言红尘无路入犹傍蜂须蝶翅来【盖以戏仲至老杜诗花蘂上蜂须又诗尘沙傍蜂蛭】

寄杜家父二首

红紫争春触处开九衢终日犍车雷【言看花者之多车声如雷汉书隼不疑传曰有一男子乘黄犍车司马相如长门赋曰雷隐隐而响起声象君之车音】闲情欲被春将去鸟唤花惊只麽回【渊明有闲情赋退之诗鸟唤昏不醒传灯录永嘉证道歌曰不可得中只麽得】

风尘点污青春面自汲寒泉洗醉红径欲题诗嫌浪许杜郎觅句有新功【上两句谓插花水中老杜诗画图省识春风面又示宗武诗觅句新知律山谷答洪驹父书曰想钩深索隐有日新之功】

王才元舍人许牡丹求诗

闻道潜溪千叶紫主人不剪要题诗欲搜佳句恐春老试遣七言賒一枝【欧阳公牡丹释名曰潜溪绯以地着又云左花千叶紫花出民左氏家末句言诗成仓卒未足以当此花之价李涉诗冥搜得诗窟】

谢王舍人剪状元红【状元红亦牡丹名】

清香拂?剪来红似绕名园晓露丛欲作短章凭阿素缓歌夸与落花风【老杜诗名园依绿水王立之诗话曰山谷与余诗云欲作短歌凭阿素丁宁夸与落花风其後改歌字作章字丁宁字作缓歌字按顔延之五君咏曰颂酒虽短章深衷自此见阿素谓王立之家小鬟素素也已见前注退之诗清歌缓送感行人乐府隋丁六娘十索诗曰寄语落花风莫吹花落尽】

戏答陈季常寄黄州山中连理松枝二首【龙邱子陈慥季常本眉山人家于黄州岐亭】

故人折松寄千里想听万壑松泉音谁言五鬣苍烟面犹作人间儿女心【老杜诗万壑树声满千崖秋气高文选头陀寺碑曰崖谷共清风泉相唤酉阳杂俎曰世言松五粒者粒当言鬣自有一种名鬣皮如鳞甲而结实多新罗多此种史记吕公谓吕媪曰非儿女所知】

老松连枝亦偶然红紫事退独参天【退之诗黄黄芡菁花桃李事已退老杜诗古柏行曰黛色参天二千尺】金沙滩头锁子骨不妨随俗暂婵娟【传灯录僧问风穴如何是佛穴曰金沙滩头马郎妇世言观音化身未见所出按续玄怪录昔延州有妇人颇有姿貌少年子悉与之狎昵数岁而殁人共葬之道左大历中有胡僧敬礼其墓曰斯乃大慈悲喜舍世俗之欲无不徇焉此即锁骨菩萨顺缘已尽尔衆人开墓以视其骨钩结皆如锁状为起塔焉马郎妇事大率如此】次韵子瞻送李廌【李廌字方叔阳翟人素为东坡所知元佑三年东坡知贡举得程文异之谓必方叔擢置第一既开榜非是东坡怅然作诗送方叔有与君相从非一日笔势翩翩疑可识之句】

骥子堕地追风日未试千里谁能识【东坡作王大年哀词曰骥堕地走虎生而斑崔豹古今

注曰秦始皇七马有追风蹶景】习之实录葬皇祖斯文如女有正色【李翱字习之作皇祖楚金实录乞铭于韩退之其文瑰奇具见于集中山谷引李氏事以比方叔法言曰女有色书亦有色乎曰有女恶华丹之乱窈窕也书恶淫辞之渥法度也庄子曰孰知天下之正色哉】今年持橐佐春官遂失此人难塞责【汉书赵充国传曰张安世本持橐簪笔唐书王勃传武后见骆宾王檄曰宰相安得失此人汉书公孙弘传曰终无以报德塞责】虽然一闋有奇偶博悬于投不在德【射利于市得失有命如六博之投胜负偶然初不预人之贤否也法言曰一闋之市必立之平汉书李广传大将军阴受上指以为李广数奇注云言命只不耦合也史记蔡泽曰博者或欲大投或欲分功注引班固奕指云博悬于投不必在行】君看巨浸朝百川此岂有意潢潦前【庄子曰大浸稽天而不溺书曰江汉朝宗于海退之诗潢潦无根源朝满夕已除老杜诗此岂有意仍腾骧】愿为雾豹怀文隐莫爱风蝉蜕骨仙【言无以速化为事列女传陶答子妻曰南山有玄豹雾雨七日不下食者何也欲以泽其毛衣而成其文章故藏以远害选诗萧瑟含风蝉夏侯湛东方朔画赞曰蝉蜕龙变弃俗登仙】

次韵宋懋宗三月十四日到西池都人盛观翰林公出遨【翰林公谓东坡东坡诗中有和宋肇游西池即此韵】

金猊系马晓莺边不比春江上水船【金猊谓猊毛金色国朝禁从皆跨猊鞍老杜诗曰百丈谁家上水船义按摭言朱梁时姚洎为学士一日梁祖问及裴延裕曰颇知其人敏思洎曰向在翰林号下水船梁祖曰卿便是上水船也洎甚惭此诗颇用其意】人语车声喧法曲花光楼影倒晴天【唐书礼乐志初隋有法曲其声清而近雅明皇酷爱法曲选坐部伎子弟三百教于梨园文选天台赋序曰或倒影于重溟李善注谓山临水而影倒老杜渼陂台诗曰颠倒白阁影宋子京诗栖影压池天】人间化鹤三千岁海上看羊十九年【神仙传苏仙公者桂阳人育数十白鹤降于门遂昇云汉而去後有白鹤来止郡城东北栖上人挟或弹弹之鹤以爪攫楼板似漆书云城郭是人民非三百甲子一来归吾是苏君弹我何为按洞仙传仙公即苏耽此引用以言东坡盖神仙中人汉书苏武传匈奴徙武北海无人牧放苏武牧羊留匈奴凡十九岁此引用以言东坡黄州之谪老杜诗苏武看羊陷贼庭】还作遨头惊俗眼风流文物属苏仙【蜀人喜游乐谓成都师为遨头此借用东坡乐府云身闲谁有酒试问遨头老杜诗文采风流今尚存左传曰文物以纪之苏仙见前注今柳州之东有苏仙山】

韩献肃公挽词三首【献肃其先真定人其祖鲁公葬于许父忠献公始居太庙之通衢事具李清臣所作韩太保墓表】

郁郁高阳里生才世不孤【後汉书光武纪曰气佳哉郁郁葱葱又荀淑传有八子时人谓之八龙苑康改其里曰高阳里谓高阳氏有才子八人也献肃盖忠献公亿之子忠献八子曰纲综绹绎维缜纬多为闻人绹缜皆为宰相维为门下侍郎鲁论曰德不孤必有邻晋书辕门之德不孤】八龙归月旦三凤继天衢【八龙见首句注後汉书许邵传曰与从兄靖共核论乡党人物每月辄更其品题汝南俗有月旦评焉三凤谓绹缜维也唐书薛收传元敬收德音号河东三凤易曰何天之衢亨】梁坏吾安仰人亡道固癯【檀弓子贡曰太山其颓则吾将安仰梁木其坏哲人其萎则吾将安放夫子殆将病也盖寝疾七日而歿下旬谓老成云亡後生

无所师法利欲战于胸中而道不胜故如子夏之癯也韩非子曰子夏见曾子曾子曰何肥也对曰战胜故肥也吾入见先王之义则荣之出见富贵之乐又荣之两者战于胸中未知胜负故癯今先王之义胜故肥】空令湖海士愁絶奠生刍【湖海士山谷自谓魏志徐邈传曰陈元龙湖海之士豪气不除老杜诗放歌颇愁絶後汉书徐穉传林宗母死穉往吊之置生刍一束于庐前而去林宗曰诗不云乎生刍一束其人如玉吾无德以堪之】物产原希世风流更折冲决疑京兆尹富国大司农【文选魏都赋曰草木之卓诡物产之魁殊灵光殿赋曰邈希世而特出折冲见前注汉书隗不疑为京兆尹有一男子自谓卫太子不疑曰昔蒯聩违命出奔辄距而不纳春秋是之卫太子得罪先帝此罪人也遂送诏狱献肃英宗朝权知开封府浹日除三司使按范纯仁所作公墓志云公任开封府推官有男子冷清自称皇太子言其母常得幸掖庭有娠出而生清都人聚观汹汹吏收捕不敢急一府惊疑莫知所决清竟止流近郡公上疏引方遂诈称戾太子事论奏甚切天子遣中使独以问公追清伏诛】远业终三事仁声達九宗【後汉书伏湛等赞曰中兴以後名相以任职取名者岂非先远业後小数哉三事谓三公诗曰三事大夫献肃哲宗即位检校太傅进封康国公仁声见孟子左传曰怀姓九宗注云怀姓唐之余民九宗一姓为九族太玄经聚首亦曰九宗之好此引用盖取庄子泽及三族之意又按拾遗记汉王传积粟十庾九族宗亲皆仰其衣食】方析酌周斗何意辍秦春【行苇诗酌以大斗以祈黄耆史记商鞅传赵良曰五穀大夫死秦国春者不相杵选诗任昉哭范云曰辍春哀国钧後汉书景丹传曰何意二郡良为吾来】

泪尽才难日斯人遽陨倾冰枝忧木稼食昴恨长庚【汉书五行志春秋成公十六年雨木冰或曰今之长老名木冰为木介旧唐书宁王卧疾引谚语曰木稼達官怕必大臣当之吾其死矣已而果然春秋佐命期曰萧何稟昴星而生汉书邹阳传曰卫先生为赵画长平之事太白食昴韩魏公将薨京师木稼陕西道中山崩覆居民数十家今于上有翻山大王祠是也故荆公作魏公挽诗有曰木稼惟闻達官怕山颓果见哲人萎最为絶唱今公诗亦曰冰枝忧木稼同记此事也惟梁坏吾安仰亦必有记特人不知耳】名与具茨重心如颍水清【具茨山及颍水皆在今许州具茨见前注太白郎官湖诗曰风流若未減名与此中俱汉书灌夫传曰颍水清灌氏宁又郑崇传曰臣心如水】堂堂万夫表直作闭佳城【并见前注老杜诗直作鸟窺龙】

次韵子瞻以红带寄王宣义【王淮奇字庆源眉之青神人东坡叔丈人也晚以累举恩得官】

参军但有四立壁初无临江千木奴【四壁见前注襄阳记李衡于武陵龙阳洲上种甘千树临死敕儿曰吾州里有千头木奴不责汝衣食岁止一匹绢亦足用矣】白头不是折腰具桐?棕鞵称老夫【老杜诗黄?映青袍非供折腰具郭若虚图画见闻志曰隋朝用桐木黑漆为巾子里于幞头之内曲礼曰自称曰老夫尝见山谷答蜀人杨明叔简云桐?本蜀人作以桐木作而漆之如今之?三十年前犹见之棕鞵本出蜀中今南方丛林亦作盖野夫黄冠之意明叔写此诗质于山谷故其言云尔按苏叔党所作王元直墓表云季父庆源官于雅州以论事不合取官长怒忧以罪去谋于公公笑曰古人不肯束带见督邮彼何人哉庆源服其语即谢病去】沧江鸥鹭野心性陰壑虎豹雄牙须【言山林之遂性不受制于人也文选任彦昇诗沧江

路穷此老杜诗盘涡鹭浴底心性又诗云陰壑生虚籁月林散清影退之诗又尝疑龙虾果谁雄牙须】鷓鴣作裘初服在猩血染带邻翁无【西京杂记司马相如以鷓鴣裘贲酒说文云鷓鴣西方神鸟也骚曰进不入以离尤兮退将复修吾初服唐文粹裴炎猩猩说云刺其血染毳罽随鞭箠输之至于一斗其说出于华阳国志】昨来杜鹃劝归去更待把酒听提壶【梅圣俞四禽言子规云不如归去春山云暮万木兮参天蜀天兮何处人言有翼可归飞安用空啼向高树又提壶云提壶芦沽美酒风为宾树为反山花撩乱目前开劝尔今朝千万寿】当今人材不乏使天上二老须人扶【时文潞公吕申公皆以大老平章军国重事左传曰日君乏使使臣斯司马老杜诗云此生已愧须人扶韩洪碑进见上殿拜跪给扶】儿无饱饭尚勤书妇无复襦且着襦【退之诗云诗书勤乃有世说韩康以绢与范宣云人宁可使妇无襦晋书韩伯传伯数岁母为作襦令捉熨斗而谓之曰且着襦一当作复襦伯曰不复须火在斗中而柄尚热今既着襦下亦当煖】社瓮可漉溪可渔更问黄鷄肥与羸【杜牧之诗社瓮尔来尝昭明太子陶渊明传曰取头上葛巾漉酒太白诗白酒初熟山中归黄鷄啄黍秋正肥】林间醉着人伐木犹梦官下闻追呼【闻伐木喧噪之声犹以为追呼也唐人诗云渔翁醉着无人唤史记郅都传曰身固当奉职死节官下】万钉围腰莫爱渠富贵安能润黄垆【随书杨素传赐万钉宝带列子曰死後余名岂足润枯骨淮南子曰上际九天下契黄垆高诱注云泉下有垆山】听宋宗儒摘阮歌【唐书元行冲传有人破古冢得铜器似琵琶身正圆行冲曰此阮咸所作器也命易以木弦之其声清亮乐家遂谓之阮咸】

翰林尚书宋公子文采风流今尚尔【翰林尚书当是宋景文公老杜丹青引曰文采风流今尚存】自疑耆域是前身囊丸探中起人死【高僧传耆域天竺人周流华竺靡有常所神奇任性迹行不常汝南滕永文两脚挛屈不能起行域取净水一杯杨柳一枝拂水举手向永文而呪如此者三因以手搦永文膝令起即行如故老杜诗囊中药未冻余见前注】貌如千岁枯松枝落魄酒中无定止【卢仝与马异诗曰此骨纵横奇又奇千岁万岁枯松枝乐天诗曰貌将松共瘦心与竹俱空汉书酈食其传家贫落魄无衣食业】得钱百万送酒家一笑不问今余几【昭明太子作陶渊明传曰顔延之留二万钱与渊明渊明悉遣送酒家稍就取酒汉书疏广传问其家金余尚有几所趣卖以供食】手挥琵琶送飞鸿促弦聒醉惊客起【嵇康诗曰目送归鸿手挥五弦】寒虫催织月笼秋独鴈叫羣天拍水【此以下四韵皆形容曲声尔雅蟋蟀蛭注云今促织也杜牧之诗曰烟笼寒水月笼沙退之诗一一叫羣猿又云海气昏昏水拍天】楚国霸臣放十年汉宫佳人嫁千里【史记屈原传曰令尹子兰短屈原顷襄王怒而迁之楚辞大招序曰屈原放流九年汉书匈奴传曰元帝以後宫良家子王嬙字昭君赐单于按琴曲有沈湘及昭君云】深闺洞房语恩怨紫燕黄鹂韵桃李【文选江文通别赋云慙幽闺之琴瑟楚辞曰娉容修态亘洞房退之听颖师琴诗昵昵儿女语恩怨相尔汝乐天琵琶引曰间关莺语花底滑幽间泉流水下滩】楚狂行歌惊市人渔父拏舟在葭苇【鲁论曰楚狂接舆歌而过孔子庄子曰渔父杖拏而引其船又曰刺船而去延缘苇间孔子待水波定不闻拏音而後敢乘】问君枯木着朱绳何能道人意中事【乐天琵琶引曰低眉信手续续弹说尽心中无限事後汉祢衡传黄祖曰处士此正得祖意如祖腹中之所欲言也】君言数物传数姓玄璧庚庚有横理【文选刘越石诗握中有玄璧本自荆州璆横理谓若琴之断文汉书文帝纪曰代王卜之兆得大横占曰大横庚庚予为天王注云庚庚横貌】闭门三月传国工身今亲见阮仲容【周礼考工记轮人曰可规可万谓之国工注云国之名工此借用谓

传于教坊乐工也晋书阮咸字仲容】我有江南一邱壑安得与君醉其中曲肱听君写松风
【一邱壑见前注按琴曲有风入松】

自门下後省归卧酺池寺观卢鸿草堂图【元丰八年以门下中书外省为後省唐书隐逸传
卢鸿字颢然为嵩山明皇备礼徵之辞还山赐隐居服官营草堂】

黄尘逆?马辟易归来下帘卧书空不知绣鞍万人立何如卢郎驾飞鸿【逆谓迎也汉书项籍
传曰人马俱惊辟易数里注云开张而易其本处王吉传叙曰严君平得百钱足自养则闭肆
下帘而授老子晋书殷浩传虽被放黜口无怨言但终日书空作咄咄怪事四字而已谈苑曰
宰相使相赐绣宝相花鞞参政副枢绣盘凤杂花鞞文选陆士衡诗曰思驾归鸿羽郭璞游仙
诗曰赤松临上游驾虹乘紫烟】

题子瞻寺壁小山枯木二首【张方回家本云题子瞻酺池寺予书齐旁画木石壁两首】

烂肠五斗对狱吏白发千丈濯沧浪【金楼子殷洪远云周旦腹中有三斗烂肠此云五斗未
详或字误耳汉书周勃传曰安知狱吏之贵对狱吏谓东坡元丰间下御史狱太白诗白发三
千丈缘愁似个长濯沧浪见前注谓谪黄州时】卻来献纳云台表小山桂枝不相忘【文选
谢朓诗献纳云台表功名良可收李善注引後汉书肃宗诏贾逵入讲尚书南宫云台楚辞淮
南王刘安有招隐士序曰淮南小山之所作也其辞曰攀援桂枝兮聊淹留】

海内文章非画师能回笔力作枯枝豫章从小有梁栋也似郑公双鬓丝【老杜诗海内文章
伯又诗溟涨与笔力唐书阎立本传阎外传呼画师阎立本文选曹顔远诗曰栖鸟去枯枝南
史王俭传袁粲见之曰枯柏豫章虽小有梁栋气矣老杜赠郑?诗郑公櫟散鬓成丝酒後犹
称老画师诗意谓东坡豫章梁栋之林亦效郑公櫟之散木游戏于小笔也】

题子瞻枯木

折冲儒墨阵堂堂书入顔杨鸿鴈行【折冲见前注荀子礼论曰儒者使人两得之也墨者使
人两丧之也是儒墨之分也孙子勿击堂堂之阵顔谓鲁公杨谓凝式晋书王羲之传自称我
书比鍾繇当抗行比张芝草犹当鴈行也第一句元作文章日月与争光後改焉】胸中元自
有邱壑故作老木蟠风霜【此两句元作笔端放浪有江海临深枯木饱风霜晋书谢鲲传曰
或问论者以君方庾亮何如答曰端委庙堂使百寮準则鲲不如亮一邱一壑自谓过之汉书
邹阳传曰蟠木根柢轮囷离奇世说注引支氏赵遥论曰至人乘天正而高兴游无穷于放浪
】

和子瞻戏书伯时画好头赤

李侯画骨不画肉笔下马生如破竹【老杜丹青引曰干惟画肉不画骨此反而用之破竹言
其神速晋书杜预传曰今兵威已振譬如破竹数节之後迎刃而解】秦驹虽入天仗图犹恐

真龙在空谷【立仗马见前注岑参诗云晓随天仗入暮惹御香归老杜丹青引云斯须九重真龙出一洗万古凡马空白驹诗曰皎皎白驹在彼空谷】精神权奇汗沟赤有头赤乌能逐日【後汉马援传注铜马相法曰汗沟欲深长前汉书渥洼马歌曰沾赤汗沫流赭志倂倪精权奇薛综赤乌颂曰赫赫赤乌惟日之精此借用言马头赤如日中乌故能逐日也王子年拾遗记曰周穆王八骏四名越景逐日而行东坡诗序言御马好头赤】安得身为汉都护三十六城看历历【後汉西域传曰武帝时西域内属有三十六国汉置使者校尉领护之宣帝改曰都护退之诗历历想行居历字韵东坡莫教优孟卜葬地厚衣薪樵入铜历黄门黄金络头依圉人俛听北风怀所历山谷诗又如此兴寄各异而奇】

咏伯时画太初所获大宛虎脊天马图【汉书礼乐志天马歌曰天马徕出泉水虎?两化若鬼】

笔端那有此千里在胸中四蹄雷电去一顾马羣空【老杜画马赞曰四蹄雷电一日天地崔豹古今注曰秦始皇有马名追电退之送温造序曰伯乐一过冀北之野而马羣遂空】谁能乘此物超俗驾长风【世说注魏氏春秋曰时谓王戎才能超俗也南史宗慤曰愿乘长风破万里浪】逸材归轡勒岁在执徐同【汉武帝太初三年贰师将军李广利伐宛得其善马四年春还京师按是岁庚辰尔雅岁在辰曰执徐故天马歌云天马徕执徐时伯时画此马盖在元佑三年戊辰】

咏伯时画冯奉世所获大宛象龙图

上党良家子挽强如屈肘三十学春秋岂为莎车首【汉书冯奉世上党良家子选为郎年三十余学春秋本始中击莎车莎车王自杀传其首长安得其名马象龙而还周勃传注曰如今挽强司马左传戟手注曰屈手如戟形】谁言冯光禄不如甘延寿虽无千户封乃得六龙友【宣帝议封奉世萧望之独以其矫制违命不宜受封上以奉世为光禄大夫奉世死後甘延寿以诛郅支单于封为列侯于是杜钦上疏追讼奉世前功上以先帝时事不复録汉书渥洼马歌曰今安匹龙为友易乾卦曰时乘六龙以御天也】

题竹石牧牛【并引】

子瞻画丛竹怪石伯时增前坡牧儿骑牛甚有意态戏咏

野次小峥嵘幽篁相倚绿阿童三尺箠御此老觝觥【楚辞曰命处幽篁兮晋书羊祜传阿童复阿童此借用庄子曰一尺之捶日取其半万世不竭觝觥见孟子】石吾甚爱之勿遣牛砺角牛砺角尚可牛鬪残我竹【左传子皮曰愿吾爱之不吾叛也此用其语律退之石鼓歌曰牧童敲火牛砺角唐人李涉诗云无奈牧童何放牛吃我竹】

题伯时天育骠骑图二首【老杜有天育骠骑歌天育唐廐名也】

玉花照夜今无种枥上追风亦不传【明皇别传曰上乘照夜白玉花驄老杜丹青引曰先帝天马玉花驄画工如山貌不同又观画马图引曰曾貌先帝照夜白又徒步归行曰须公枥上追风驃】想见真龙如此笔蒺藜沙晚草迷川【丹青引曰斯须九重真龙出一洗万古凡马空末句叹此物埋没于沙草荒凉之地蒺藜盖同州沙苑监所出本草所谓生冯翊平泽或道傍冯翊即今同州老杜诗沙晚?鶺鴒寒】

明窗盘礴万物表写出人间真乘黄邂逅今生犹姓李可非前世江都王【画史盘礴见前注老杜观画马图引曰国初己来画鞍马神妙独数江都王将军得名三十载人间又见真乘黄按名画记江都王绪霍王元执之子伯时与王皆李姓王维诗曰夙世谬词客前生应画师】

姨母李夫人墨竹二首【米芾画史云朝议大夫王之才妻南昌县君李氏尚书公择之妹能临松竹木石等画见本即为之卒难辨山谷盖公择甥也】

深闺静几试笔墨白头晚中百斛力【老杜诗三尺角弓两斛力】荣荣枯枯皆本色悬之高堂风动壁【文选魏都赋曰英辩荣枯又顔延年诗俛仰见荣枯唐书柳仲郢传曰医有本色官老杜山水图歌曰挂君高堂之素壁张彦远画记言僧宗偃画树石曰重质隐地清飈满堂此言风动壁亦兼用李益竹窗闻风诗开门风动竹之句文选阮嗣宗诗迴风吟四壁】小竹扶疎大竹枯笔端真有造化炉【汉书司马相如赋曰垂条扶疎後汉五行志桓帝初童謡曰小麦青青大麦枯此用其语律韩诗外传曰避文士之笔端老杜诗胜决风尘际功安造化炉按庄子曰今一以天地为大炉造化为大冶】人间俗气一点无健妇果胜大丈夫【退之王仲舒墓志曰公所为文章无世俗气僧贯休东林寺诗曰田地更无尘一点右乐府陇西行曰健妇持门户胜一大丈夫老杜诗纵有健妇把锄犁】

山谷内集诗注卷九

山谷内集诗注卷十

钦定四库全书

山谷内集诗注卷十 宋 黄庭坚 撰

任渊注

次韵答曹子方杂言

酺池寺汤饼一斋孟曲肱懒着书【寰宇记曰酺池在开封府浚仪县西北古大梁城内梁孝王作按浚仪後更名祥符束皙饼赋曰充虚解战汤饼为最时山谷持戒律甚严故有斋孟之句曲肱用边韶昼眠意史记虞卿传曰非穷愁亦不能着书论语饭蔬食饮水曲肱而枕之乐亦在其中矣】骑马天津看逝水满船风月忆江湖【按东京记崇济坊西有天汉桥桥南朱雀门与宣德门相直此诗云天津盖唐之洛都有天津桥因偕用尔传灯录船子和尚诗云满船空载月明归】往时尽醉冷卿酒侍儿琵琶春风手【冷卿如因话录以祠部为水厅老杜以广文为冷官之类以下句考之谓光禄卿也按实录元佑三年七月文及为光禄少卿及盖潞公之子此诗所指岂其人耶汉书袁盎传注曰侍儿婢也王介甫明妃曲曰黄金扞拨春风手豫章外集又有和子方杂言亦及此事或云冷姓也】竹间一夜鸟声春明朝醉起雪塞门【鸟声春谓琵琶啄木声也录异传曰大雪丈余洛阳令至袁安门无有行路退之诗蓝田十月雪塞关】当年闻说冷卿客黄须邺下曹将军【魏志任城威王彰太祖之子大破乌丸归功诸将太祖喜持彰鬢曰黄须儿竟大奇也老杜有观曹将军画马图引此借用曹植居邺下一时从其游者名邺下之学】挽弓石八不好武读书卧看三峯云【唐书张弘靖传士挽两石弓左传颜高之弓六钧注云六钧百八十斤老杜诗挽弓当挽强又诗将军不好武稚子总能文苏子美诗卧看青天行白云华山记云其三峯直上晴霁可观】谁怜相逢十载後釜中生鱼甑生尘【退之诗尊酒相逢十载後我为壮夫君白首後汉书范丹字史云为莱芜长所止单陋有时絶粒穷居自若闻里歌之曰甑中生尘范史云釜中生鱼范莱芜】冷卿白首大官寺樽前不复如花人【通典大官掌百官之饌属光禄卿大白诗金屏笑坐如花人】曹将军江湖之上可相忘春鉏对立鸳鸯双无机与游不乱行何时解纓濯沧浪【庄子曰鱼相忘于江湖尔雅曰鹭春鉏文选江淹拟张绰诗曰亹亹玄思清胷中去机巧物我俱忘怀可以狎鸥鸟盖用列子事庄子山木篇曰孔子逃于大泽入兽不乱羣入鸟不乱行濯纓见前注】唤取张侯来平章烹茶煮饼坐僧房【张侯似是张仲谋言欲与之共往僧房商略归计也按外集有送曹子方兼简张仲谋诗唐书郭正一传曰平章事自正一等始此借用其字老杜诗随意宿僧房】

次韵子瞻和王子立风雨败书屋有感【王适字子立苏子由之壻从其妇翁学】

妇翁不可捫王郎非娇客【後汉第五伦传光武戏谓伦曰闻君为吏笏妇公宁有之耶魏志武帝纪令曰第五伯鱼三娶孤女谓之捫妇翁按今俗间以壻为娇客】十年为从学苦淡共

陉厄【汉书叔孙通传曰吕后与陛下攻苦食淡左传曰困穷陉厄】燕雀啗鸿渐犬羊睨麟获【此以下指子由汉书陈胜传曰燕雀焉知鸿鹄之志易曰鸿渐于木春秋哀公十四年西狩?麟】遇逢泾渭分昨梦春冰释【泾渭春冰并见前注】平生五车书才吐二三策【庄子曰惠施多方其书五车二三策见孟子】已作谤薰天金朱果何益【子由在台谏数论事不为当世所喜老杜诗北里富薰天按扬雄甘泉赋曰燎薰皇天此借用其字法言曰纡朱怀金之乐不如颜氏子之乐】君穷一牕下风雨更削迹【此以下述子立庄子山木篇孔子曰吾再逐于鲁伐木于宋削迹于卫又见盗跖篇】诗工知学进词苦见意迫【庾信哀江南赋序曰不无危苦之词惟以哀悲为主】俗情傲秦赘妇舍不煖席【汉书贾谊传曰秦人家贫子壮则出赘老杜诗倚着如秦赘淮南子曰墨突不暇黔孔席不及煖】南冶从东家不闻被嘲剧【鲁论南容三复白圭孔子以其兄之子妻之又曰子谓公冶长可妻也以其子妻之东家见前注蜀都赋曰剧谈戏论南兄谢灵运传轻薄少年凡人士并为题目皆加苦言剧句】师儒并世难日月过箭疾【周礼天官曰师以贤得民儒以道得民史记仲尼弟子列传曰孔子数称臧文仲柳下惠然皆後之不并世乐天诗年光同激箭老杜诗破敌过箭疾】公今未有田把笔耕六籍【後汉班超传注曰安能久事笔耕乎】

嘲小德

中年举儿子漫种老生涯【晋书王羲之传谢安曰中年以来伤于哀乐史记孟尝君传曰君所以不举五月子者何庄子曰吾生也有涯】学语啖春鸟涂牕行暮鷗【一作学语春虫聒书牕秋鴈斜老杜诗骥子好男儿前年学语时乐府柳顾言阳春歌曰春鸟一啖有千声按周礼罗氏仲春罗春鸟刘禹锡传小儿弄笔不能噀浣壁书牕且赏勤卢仝示添丁云忽然案上翻墨汁涂抹诗书如老鷗行音胡刚反】欲噀王母惜稍慧女兄夸【一作待渠能小艇伴我钓烟沙尔雅父之妣为王母时山谷母夫人无恙】解着潜夫论不妨无外家【後汉王符传曰安定俗鄙庶孽而符无外家为乡人所贱隐居着书以讥当世失得不欲章显其名故号曰潜夫论】

戏答张秘监馈羊

细肋柔毛饱卧沙烦公遣骑送寒家【同州沙苑监有桂羊俗谓之细肋卧沙曲礼羊曰柔毛老杜诗大官喜我来遣骑问所须按文选魏文帝书曰今遣骑到邳世说王经母曰汝本寒家子】忍令无罪充庖宰留与儿童驾小车【孟子曰若无罪而就死地则牛羊何择焉韩孟鬪鸡联句曰义肉耻庖宰晋书卫玠传总角乘羊车入市见者以为玉人汉书车千秋传朝见得乘小车】

戏答王定国题门两絶句

非复三五少年日把酒偿春颊生红【摭言薛逢语新进士曰老婆三五少年时也曾东涂西抹来退之嘲少年曰直把春偿酒都将命乞花又华山女云白咽红颊长眉青】白鸥入羣颇相委不谓惊起来宾鸿【庄子曰入兽不乱羣委谓谄识也世说司马徽人有委认徽猪者退

之与柳中丞书亦曰与贼不相谐委礼记月令季秋鸿鴈来宾此句当是山谷往见定国不遇而姪妾有避之者来宾或是其名字】

颇知歌舞无窍凿我心块然如帝江【山海经曰天山有神状如黄囊赤如丹火六足四翼浑沌无面目是识歌舞实惟帝江或作鸿江也庄子曰日凿一窍而浑沌死又曰雕琢复朴块然独以其形立】花里雄蜂雌蛱蝶同时本自不作双【李义山柳枝词曰花房与蜜脾蜂雄蛱蝶雌同时不同?那复更相思老杜诗并蒂芙蓉本自双此反其意不作双见前注】

清人怨戏效徐庾慢体三首

秋水无言度荷花称意红【选诗曰涉江采芙蓉王介甫诗荷花称意红按汉书儿寛传奏事称意】主人敬爱客催唤出房笼【选诗云公子敬爱客终宴不知疲老杜诗遣人向市賒香粳唤妇出房亲自饌梁元帝巫山诗无因谢神女一为出房笼】一斛明珠曲何时落塞鸿【一斛珠见前注礼记曰歌者累累乎端如贾珠鲍照京洛篇霜歌落塞鸿】莫藏春笋手且为剥莲蓬【杜牧之微吟曰骰子逡巡裹手拈无因得见玉纤纤东坡乐府曰指尖露春笋纤长】

翡翠钗梁碧石榴裙摺红【庾信荡子赋佩朱翠的钗梁粟钿乐府黄门歌曰点黛方初月缝裙学石榴】隙光斜斗帐香字冷薰笼【乐府魏收永世乐曰绮牕斜影入上客酒须添又吴融秋闺怨曰斜光隐西壁暮雀上南枝又长乐佳曰红罗复斗帐四角垂明璫香字谓香篆薰笼见前注王建宫词曰红颜未老恩先断斜倚薰笼坐到明】闻道西飞燕将随北固鸿【古乐府曰东飞伯劳西飞燕黄姑阿母时相见江总歌南飞鸟鹊北飞鸿弄玉兰香时会同按寰宇记北固山在润州丹徒县北此云北固鸿未详恐字误今按月令鴈北乡乡与向通恐当作北向鸿固盖向字之误】鸳鸯会独宿风雨打船篷【终上句之意杜诗鸳鸯不独宿又雨来沾席上风急打船头杜牧之诗春半平江两圆文破蜀罗声眠篷底客寒过钓来蓑】

障羞罗袂薄承汗领巾红【南史刘瑀传曰羞面见人扇障何益玉台新咏杂诗曰举袖且障羞迴梳理乱髮文选洛神赋曰抗罗袂以掩涕方言曰席褰谓之被巾注云妇人领巾退之诗白布长衫紫领巾】晚风斜亸髮逸艳照牕笼【都人士诗曰卷髮如蛭注蛭螫虫也尾抹撻然似妇人髮末曲上卷然文选鲍照诗蛾眉□珠裘玉钩隔琐牕】胡琴抱明月宝瑟阵归鸿【刘禹锡泰娘歌曰低鬟颺视抱明月纤指破拨生胡风言其善琵琶也此借用文选沈休文诗曰象筵鸣宝瑟刘禹锡伤秦妹行言善其箏曰玫瑰宝柱秋鴈行按瑟亦有柱扬子所谓胶柱调瑟是也】倚壁生蛛网年光如转蓬【言琴瑟久不御也文选江淹拟张司空诗曰兰径少行迹玉台生网丝淮南子曰圣人观转蓬而为车此借用以言年运而往如车毂之转伤美人之迟暮也】

呈外舅孙莘老二首

九陌黄尘乌?底五湖春水白鸥前【三转旧事曰长安城中八街九陌退之诗子云祗自守奚

事九衢尘又诗虽有九衢无尘埃乐府读曲歌曰不知乌?郎是谁越语曰范蠡遂乘轻舟以浮于五湖老杜诗时危兵甲黄尘里日短江湖白髮前此颇用其语律】扁舟不为鲈鱼去收取声名四十年【晋书张翰传齐王冏辟为掾因见秋风起乃思吴中菰菜蓴羹鲈鱼膾曰人生贵得适意何能羈官数千里以要名爵乎遂命驾而归俄而冏败人谓见机老杜诗夫子独声名又赠郑?诗才名四十年】

璧社湖中有明月淮南草木借光辉【沈存中笔谈曰嘉佑中扬州有一珠甚大天晦多见初出于天长县陂泽中後转入璧社湖後又在新开湖中九十余年居民行人常常见之珠大如拳烂然不可正视十余里间林木皆有影如日初升此诗引用以比莘老按莘老高邮军人高邮本属扬州云汉书邹阳传曰明月之珠夜光之璧】故应剖蚌登王府不若行沙弄夕霏【用庄子龟宁曳尾之意蜀志秦宓奏记曰剖蚌求珠周礼乡大夫曰登于天府又玉府掌共王之佩玉珠玉书曰王府则有欧公鸚鵡螺诗曰红螺行沙夜生光又曰一螺千金价谁量岂若泥下追含浆文选谢灵运诗云霞收夕霏李善注霏日气也】

以天坛灵寿杖送莘老

王屋千霜老紫藤扶公休沐对亲朋异时驷马安车去挂到天坛愿力能【王屋山在绛州垣曲县千霜谓经千岁之墨霜老杜诗三霜楚户砧礼记大夫七十而致事适四方乘安车自称曰老夫老杜诗云安得仙人九节杖挂到玉女洗头盆太白寄王屋山人孟大融诗曰愿随夫子天坛上闲与仙人扫落花圆觉经曰皆依无始清净愿力李通玄华严论曰地前菩萨是凡夫故有地前成佛者推为誓愿力能非本法故诗言老而益健能为方外之游盖由愿力所致】戏答俞清老道人寒夜三首【王立之诗话山谷云金华俞清老字子中二十年前与子共学于淮南元丰甲子相见於广陵自云荆公欲使之脱缝掖着僧伽黎奉香火于半山寺予之僧名紫琳字清老清老无妻子之累云去作半山道人似不为难事然生龟脱筒亦难堪思後数年见之传冠自若也因尝戏和清老诗云云按山谷跋此诗云子瞻屡哦此诗以为妙也】

索索叶自雨月寒遥夜阑【乐天诗乾叶不待黄索索飞下来又云叶声落如雨月色白似霜楚辞曰靚杪秋之遥夜老杜诗夜阑更秉烛雨当如春秋雨螽之雨从去声非叶声落如雨故前辈论深院无人杏花雨非四雨数】马嘶车铎鸣羣动不遑安【晋书荀勗传逢赵贾人牛铎识其声渊明诗曰日入羣动息文选东哲补南陔诗曰心不遑安】有人梦超俗去髮脱儒冠平明视清镜正尔良独难【言其未能忘形也超俗见前注退之诗犹思脱儒冠又诗脱冠剪头髮项羽传平明汉军乃觉之乐天诗晨兴照清镜形影两寂寞曹子建集怨歌行曰为臣良独难】

闻道一稊米出身缚簪纓【庄子河伯曰闻道百以为莫已若者我之谓也又北海若曰计四海之在天地不似稊米之在太仓乎音义曰小米也一曰稊草也文选诗出身蒙汉思北山移文曰今见解兰缚尘纓】怀我伐木友寒衾梦丁丁【代木丁丁见诗大雅】富贵但如此百年半曲肱【退之诗人生但如此朱紫安足僭下句用邯郸梦事见前注曲肱见鲁论】早晚相随去松根有茯苓【唐赵嘏诗早晚粗酬身事了水边归去一闲人老杜诗知子松根长茯苓】

苓迟暮有意来同煮】

牧羊金华山早通玉帝籍【神仙传曰皇初平年十五家使牧羊有道士将至金华四十余年其兄初起见之问羊何在初平叱白石皆起成羊数万头皇字他书或作黄山谷先世居金华故云汉元帝纪令从官给事宫司马中者得为大父母父母兄弟通籍乐天诗但恐长生须有籍仙台试为检名看汉书通籍金门】至今风低草 见白石【乐府敕勒歌曰天苍苍野茫茫风吹草低见牛羊无羊诗曰尔羊来思其角 注曰聚其角而息 然字书曰 音阻立反角坚貌亦作澱】金华风烟下亦有君履迹何为红尘里颌须欲雪白【金华属婺州清老亦金华人班婕妤赋曰思君兮履綦注云綦履迹也西都赋曰红尘四合乐天诗满颌白髭须】秘书省冬夜宿直寄怀李德素【山谷有题薛醇老家李西台书云德素舒城李粲也浮沈于俗操行如古人往时隐龙眠山驾青牛往来皖公三祖自烧古松作墨云云故此诗末句有占少微之语】

曲肱惊梦寒皎皎入牖下【文选古诗明月何皎皎又诗安寝北堂下明月入我牖】出门问何祥岑寂省中夜【左氏僖十六年传陨石于宋五六鵠退飞过宋都宋襄公曰是何祥也吉凶焉在文选舞鹤赋去帝乡之岑寂汉书昭帝纪共养省中注引蔡邕云本为禁中孝元皇后父名禁改曰省中】姮娥携青女一笑粲万瓦【李商隐诗青女素娥俱耐冷月中霜里鬪婵娟王充论衡曰羿请不死之药于西王母羿妻姮娥窃以奔月托身于月是为蟾蜍淮南子曰至秋三月青女乃出降以雪霜注曰青女天神青嫫玉女主霜雪也谷梁传曰军人粲然皆笑注云粲然盛笑貌宋景文笔记云粲明也知万衆皆后齿齿既白以粲义包之】指我金玉人幽独秉大雅【晋书王戎传戎目山涛如璞玉浑金人皆钦其宝莫知名其器楚辞曰幽独处乎山中大雅见前注】古来絶朱弦盖为知音者【见前主】同牀有不察而况子在野【文选张华女史箴曰苟违斯义则同衾以疑此句略采其意言世无知音虽在傍近犹不识察况远外乎山谷作罗汉赞又曰我观阎浮提衆生同牀猜忌若冰炭史记田叔传曰田仁与任安二人同牀卧书曰君子在野】独立占少微长怀何由写【鲁论曰他日又独立隋书天文志少微四星在太微西士大夫之位也一名处士明大而黄则贤士举楚辞曰情慨慨而长怀文选张茂先诗写心出中诚】

岁寒知松柏【鲁论曰岁寒然後知松柏之後彫也】

羣阴彫品物松柏尚桓桓【易曰品物流形书曰勗哉夫子尚桓桓注云桓桓武貌】老去惟心在相依到岁寒【文选陆机演连珠曰劲阴杀节不彫寒木之心欧阳公诗老去自怜心尚在】霜严御史府雨立大夫官【汉书朱博为御史大夫其府列柏树崔?御史箴曰箴上霜凝笔端风起文选啸赋曰骋羽则严霜夏彫应劭汉官仪秦始皇封泰山遇暴雨赖得抱树因封其树为五大夫松史记滑稽传优旃曰陛楯郎汝虽长何益幸雨立】牺象沟中断徽弦爨下残【庄子曰百年之木破为牺尊青黄而文之其断在沟中美恶有间矣其于失性一也左传曰牺象不出门谓牺尊象尊也後汉蔡邕传吴人有烧桐以炊者邕闻火烈之声知其良木请而为琴时号焦尾琴晋书陶潜传畜素琴一张弦徽不具庄子曰纯朴不残孰为牺尊退之木居士诗为神詎比沟中断遇赏还同炊下余】光阴一鸟过翦伐万牛难【文选别赋曰明月

白露光阴往来杜牧之诗长空碧日杳万古一飞鸟选诗人生之海内忽如鸟过目老杜身轻一鸟过甘棠诗曰勿翦勿伐万牛见前注】春日辉桃李苍颜亦预观【言老成坐见新进也太白诗松柏本孤直难为桃李颜欧公醉翁亭记曰苍颜白髮颓然乎其间】

东观读未见书【後汉黄香传京师号曰天下无双江夏黄童肃宗诏香诣东观读所未尝见书】

汉规羣玉府东观近宸居【汉书东方朔传曰今规以为苑穆天子传曰羣玉山先王之所谓策府通典曰後汉图书在东观按和帝纪永元十三年幸东观见书林閱篇籍文逸曰景属宸居】诏许无双士来观未见书【见题注】皇文开万卷家学陋三余【魏略曰董遇字季真善左氏传从学者云苦渴无日逸言当以三余或问三余之意遇言冬者岁之余夜者日之余阴雨者时之余】竹帛森延阁星辰绕直庐【文选曹子建求自试表曰名称书于竹帛李善注字出墨子汉书艺文志注引七略曰内则有延阁广内秘室之府外则有太常太史博士之中老杜诗听履上星辰又云乾坤绕汉宫西都赋曰周庐于列室注直宿曰庐】诸生起孤贱天子自吹嘘【後汉班超传相者曰祭酒布衣诸生耳而当封侯万里之外黄香上疏曰江淮孤贱愚蒙小生老杜诗惟待吹嘘送上天按魏志郑泽曰孔公绪能清谈高论嘘枯吹生韩退之诗云风相吹嘘】愿以多闻力论思补帝裾【说命曰王人求多闻时惟建事班固两都赋序曰朝以论思日月献纳补帝裾用补袞意魏志辛毗传言冀州民不可徙帝不答起入内毗随而引其裾此借用其字】被褐怀珠玉【文选阮籍诗怀诗曰被褐怀珠玉颜闵相与期按家语子路问孔子曰有人于此被褐而怀玉何如孔子曰国无道可也国有道则袞冕而执玉】

国士怀珠玉通津不易扛【国士见史记豫让传不易扛言其重慎之至也礼记曰执玉不趋又曰受珠玉者以掬渊明诗弹冠乘通津但惧时我遗】櫝藏心有待褐短义难降【子贡曰有美玉于斯韞櫝而藏诸求善价而沽诸子曰沽之哉沽之哉我待价者也义难降言不可屈孟子虽褐寬博吾不憊焉甯戚歌短布单衣长止骭】宝唾归青简晴虹贯夜窻【韩孟城南联句曰宝唾恰未尽後汉赵壹传曰咳唾自成珠又吴佑传父恢守南海欲杀青简以写经书礼记曰君子于玉比德气如白虹天也】直言方按剑岂是故迷邦【按劔见前注鲁论阳货谓孔子曰怀其宝而迷其邦可谓仁乎】弹雀轻千仞连城贯一双【庄子曰以隋侯之珠弹千仞之雀世必笑之选诗连城既伪往荆玉亦真还谓秦以十五都易赵璧也史记虞卿说赵孝成王一见赐白璧一双】安知蓝缕底明月弄寒江【左传曰莫敖筭路蓝缕以启山林明月珠见前注魏志曰日月如合璧庄子曰藏珠于渊左传曰子犯投其璧于河】

款塞来享【元佑三年夏人遣使谢封册故以命题汉宣帝纪曰款塞来享】

前朝夏州守来款塞门西【五代史李仁福传唐僖宗时有拓跋思敬者为夏州偏将後以预破黄巢功赐姓李氏拜夏州节度使思敬卒弟思谏立思谏卒子彝昌立彝昌为其将所杀军中迎仁福立之不知其于思谏为亲疎也其子彝超彝兴继立世有夏银绥宥静等五州之地至元佑元年夏国主秉常卒于乾顺承袭】圣主敷文德降书付狄鞬【书曰帝乃诞敷文德】

舞干羽于两阶七旬有苗格礼记王制曰西方曰狄韞北方曰译注曰狄之言知也】毡裘瞻日月斲面带金犀【史记苏秦传云燕必致旃裘狗马之地後汉耿秉传匈奴闻秉卒举国号哭或至黎面流血注云黎即斲字斲割也音力私反此借用以言祈哀请命汉书匈奴传文帝遗单于黄金犀毗一注云要中大带也法言被我纯纁带我金犀不亦享乎】殿陛闲干羽边亭息鼓鼙【干羽见前注汉书云祭彤传论曰卧鼓边亭乐记曰君子听鼓鼙之声则思将帅之臣】永输量谷马不作触藩羝【史记货殖传曰至用谷量牛马此借用以言夏人入贡易大壮卦曰羝羊触藩羸其角此借用以言不犯塞】声势常相倚今闻定五溪【退之平淮西碑曰凡叛有数声势相倚吾强不支汝弱奚恃定五溪谓南夷底定也後汉马援传刘尚击武陵五溪蛮夷注云武陵有五溪谓雄溪西溪西溪瀟溪辰溪】

忆邢惇夫【惇夫本末具前注有呻吟集行于世东坡云惇夫自为童子所与交皆诸公长者百不一见遂与草木共尽】

诗到随州更老成江山为助笔纵横【惇夫父恕为起居舍人坐教高公绘为书忤太后意元佑元年正月谪知随州惇夫侍焉老杜诗毫髮无遗恨波澜独老成唐书张说传谪岳州而诗益凄惋人谓得江山助云老杜诗凌云健笔意纵横】眼看白璧埋黄壤何况人间父子情【晋书亮传将葬何充叹曰埋玉树于土中使人情何能已世说注王愷期谓陶侃曰贤子越骑酷没天下为公痛心况慈父情耶汉书张禹传曰不胜父子私情】

次韵秦少章晁适道赠答诗

二子论文地阴风雪塞庐【後汉书袁安传雪积地洛阳令至袁安门无有行路退之诗蓝田十月雪塞关】宁穿东郭履不遗子公书【史记滑稽传东郭先生贫困饥寒行雪中履有上无下足尽践地庄子曰衣敝履穿汉书陈万年传子咸予陈汤书曰即蒙子公力得入帝城死不恨也】土固难推挽时闻有诏除【上句用郑当时推轂士之意退之志云无相知有气力得位者推挽汉书谷永曰免不正之诏条刘禹锡诗金门通籍真多士黄纸除书每日闻左传襄十四年臧武仲见卫侯曰二子者或挽之或推之欲无入得乎又晋书邓侯挽不来谢令推不去盖参而用之】负暄真计得献御恐成疎【列子曰宋有田父暨春东作自曝于日顾谓其妻曰负日之暄人莫知者以献吾君将有重赏庄子曰于鱼得计退之诗食芹虽云美献御固已痴】

次韵答秦少章乞酒

朝事鞍马早吏曹文墨拘【文选鲍明远诗曰日晏罢朝归鞍马塞衢路刘公干诗曰职事相填委文墨纷消散汉书司马相如传曰岂特委琐齷齪拘文牵俗】终无尺寸补但于朋友疎【汉书李广传曰终无尺寸功诸葛丰传曰独恐未有云补鲁论曰朋友数斯疎矣此借用】岂如簞瓢子卧起一牀书【簞瓢见鲁论汉书苏武传曰杖汉节牧羊卧起操持寒山子诗曰家中何所有惟见一牀书】炙背道尧舜雪屋相与娱【文选嵇康絶交书曰野人有快炙背而美芹子者欲献之至尊注引列子曰宋有田父负日之暄云云孟子道性善言必称尧舜】

步出城东门野鸟吟废墟【梁甫吟曰步出齐东门遥望荡阴里里中有三坟累累正相似】
颇知富贵事势穷心亦舒【因见废墟知富贵之不可常故虽处穷而其心休然也退之王承福传曰吾操镬以入于富贵之家有年矣有一至者焉又往过之则为墟矣又曰虽劳无媿吾心安焉楚辞哀郢曰聊以舒吾忧心老杜诗坦然心神舒】诗来献穷状水饼嚼冰蔬【本传曰晋文公使曹人献状南史何戢传高帝好水引饼戢每设上焉】斗酒得醉否枵腹如瓠壶
【汉书杨惲传曰烹羊炰羔斗酒自劳老杜诗百年浑得醉庄子曰魏王大瓠之种非不呬然大也音义曰虚大曰呬瓠壶见前注】亦可召西舍侯嬴非博徒【史记魏公子无忌传魏有隐士曰侯嬴年七十家贫为大梁夷门监者公子从车骑虚左自迎侯生又曰公子闻赵有处士毛公藏于博徒薛公藏于卖浆家公子乃闻步往从此两人游甚欢】

山谷内集诗注卷十

山谷内集诗注卷十一

钦定四库全书

山谷内集诗注卷十一 宋 黄廷坚 撰

任渊注

颐轩诗六首【并序】

高君素作颐轩请予赋诗予为说其义曰在易之颐观颐自求口实其传曰观颐观其所养也自求口实观其自养也单豹岩栖谷饮有孺子之色而虎攻其外张毅擎跽曲拳养人间之誉而疾攻其内养虎者不以全物与之牧羊者去其败羣视其後者而鞭之养鹰者饥之是谓观其所养尽物之性也庖丁不以肯綮婴其解牛之刀痾癭丈人不以万物易蜩之翼匹夫之志不可夺于三军之帅是谓观其自养尽已之性也诗云如切如磋如琢如磨求尽性而已君素乐善能贫将求学问日新之功故作颐轩以养其正吉乃以观颐自求口实六字作诗以劝戒之

金石不随波松竹知岁寒冥此芸芸境回向自心观【王充论衡曰湍濑之回沙转石而大石不动者是石重而沙轻大儒俗吏并在世俗有似于此鲁论曰?寒然後知松柏之後雕也老子曰夫物芸芸各归其根华严经有十回向老杜诗回向心地初四十二章经曰断去欲爱识自心源】

知足是灵龟无厌乃朵颐虚心万物表寒暑自四时【老子曰知足不辱易颐之初九日舍尔灵龟观我朵颐凶注云朵颐者嚼也居养贤之世不能贞其所履以全其德而舍其灵龟之明兆美我朵颐而躁求凶莫甚焉老子又曰虚其心实其腹鲁论曰天何言哉四时行焉百物生焉】

无外一精明六合同出自公能知本原佛亦不相似【楞严偈曰诸幻成无性六根亦如是原依一精明分成六和合一处成休复六用皆不成传灯录永嘉证道歌曰本原自性天真佛又云居禅师曰若是思大佛亦不作又南阳忠国师广语云僧问既无织毫可得名为何物师曰本无名字曰还有相似者否师曰无相似者世号无比独尊】

辱莫辱多欲乐莫乐无求人生强学耳万古一东流【楚辞曰悲莫悲兮生别离乐莫乐兮新相知此用其律礼记儒行曰夙夜强学以待问老杜诗不废江河万古流此特借用其字言逝川之速如此不可不惜日也杜牧之诗万古一飞鸟乐天诗年光东流水】

枢机要发迟饮食戒味厚渔人溺于波君子溺于口【易曰言行君子之枢机枢机之发荣辱之主也国语曰厚味实腊毒颐卦之大象曰君子以慎言语节饮食故此句及之礼记曰小人

溺于水君子溺于口大人溺于民皆在其所褻也此诗旧本云小人溺于水君子溺于口古来犯时机惟此没梁斗按秦再思纪异錄曰高骈命酒佐薛涛改一字令骈曰口有似没梁斗涛曰川有似三条椽】

泾流不浊渭种桃无李实养去心尘缘光明生虚室【谷风诗曰泾以渭浊湜湜其沚传云泾渭相入而清浊异笺云泾水以有渭水清故见泾水浊湜湜持正貌俗谚曰种李不成桃种禾不生豆近世圓悟禅师克勤尝以此两语作颂孟子曰养心莫善于寡欲圆觉经曰妄诞四大为自身相六尘缘影为自心相又曰此虚妄心若无六尘则不能有四大分解无尘可得于中缘尘各归散灭毕竟无有缘心可见庄子曰虚室生白】

寺斋睡起二首

小黠大痴螳捕蝉有余不足夔怜蚘【退之送穷文曰驱我令去小?大痴庄子曰庄子覩异鹊执弹而留之覩一蝉方得美?而忘其身螳螂执翳而搏之见得而忘其形异鹊从而利之见利而忘其真又曰夔怜蚘蚘怜蛇蛇怜风风怜目目怜心音义云夔一足兽蚘马蚘虫多足诗意谓巧诈之相倾智愚之相角与此数虫何异得失竟安在哉】退食归来北窗梦一江风月趁渔船【羔羊诗曰自公退食北窗梦见前注林逋秋江写望诗曰最爱梨花经雨後一篷烟火饭渔船】桃李无言一再风黄鹂惟见绿葱葱【桃李一再经风无复颜色红紫事退遽成绿陰意谓卒卒京尘中未尝得细见春物也汉书李广赞曰桃李不言下自成蹊汉书司马相如传曰为鼓一再行】人言九事八为律倘有江船吾欲东【汉书主父偃传曰所言九事其八为律又韩信传高祖曰吾亦欲东耳安能郁郁久居此乎此皆借用谓世途狭隘动触法令宁自放于江海也退之诗法更多少年磨淬出角圭将举汝愆尤以为身阶梯收身归关东期不到死迷】

记梦【洪驹父诗话曰予尝闻山谷云此篇记一段事也尝从一贵宗室携妓女游某寺酒阑诸妓皆散入僧房中主人不怪也故有晓然梦之非纷纭之语僧惠洪冷斋夜话以为山谷元佑初画卧酺池寺梦与一道士游蓬莱觉而作此诗夜与余同宿湘江舟中亲为言之两说未知孰是】

衆真絶妙拥灵君晓然梦之非纷纭【真诰真胄世谱云兴宁三年衆真降杨羲家汉书公孙弘传曰愚心晓然见治道之可以行也梦纷纭见前注】窗中远山是眉黛席上榴花皆舞裙【文选谢朓诗曰窗中列远岫西京杂记曰文君姣好眉色如望远山乐府黄门倡曰佳人俱絶世握手上春楼点黛方初月缝裙学石榴】借问琵琶得闻否灵君色庄妓摇手【文选曹子建乐府云借问谁家子色庄见鲁论汉书许后传曰且使妾摇手不得僧惠洪冷斋夜话曰山谷梦有两玉人导升殿主者衣绛衣仙女拥侍中有一女方整琵琶山谷极爱其风韵顾之忘揖主者主者色庄故其诗有曰借问琵琶可闻否灵君色庄妓摇手今山谷集语不同盖复更易之耳】两客争碁烂斧柯一儿坏局君不呵【述异记晋王质诣信安石室山伐木见数童奕碁而歌俄顷谓质曰何不去质起视斧柯烂尽既归无复时人矣亦见水经渐江水注魏志王粲传粲观人围碁局坏即为覆之汉书李广传霸陵尉醉呵止广】杏梁归燕语空多奈

此云窻雾阁何【司马相如长门赋曰饰文杏以为梁乐天诗翩翩两玄鸟本是双飞燕彼矜店梁贵此嗟茅栋贱退之华山女诗云云窻雾阁事恍惚重重翠慢深金屏】

同元明过洪福寺戏题

洪福僧园拂绀纱旧题尘壁似昏鸦【洪福在汴京东坡诗曰玉仙洪福花如海摭言王播诗曰三十年前尘扑面如今始得碧纱笼法书苑曰邬彤善草书如寒林栖鸦老杜诗有待至昏鸦】春残已是风和雨更着游人撼落花【乐天诗飒飒风和雨○旧本有山谷序云三月中同吕元明毕公叔至洪福寺见元明壁间旧题云与晋之醉後使骑升木撼花以为笑乐戏题】

戏答晁深道乞消梅二首【王立之诗话云消梅京师有之不以贵因余摘遗山谷山谷作数絶遂名振于长安晁深之字深道後改名咏之字知道】

青莎径里香未乾黄鸟陰中实已团【惊物化之速也唐刘沧诗莎径晚烟凝竹坞欧阳公诗緑陰黄鸟春归後】蒸豆作乌盐作白属闻丹杏荐牙盘【齐民要术有作白梅与作乌梅法此用其字今人作糖梅杂以蒸豆取其色黑图经本草梅实条曰以盐杀白梅入药用汉书谷永传曰属闻以特进领城门兵注云属近也音之欲反退之李花诗曰冰盘夏荐碧实脆卢氏杂说曰御厨进饌用九釘食以牙盘九枚装食味于其间诗意谓当梅实槁悴失性之时丹杏方蒙献御之宠与老成屏弃而新进见用何异哉】

北客未尝眉自顰南人夸说齿生津【笔谈载沈存中茶论诗云谁把嫩香名雀舌定知北客未曾尝按唐独孤及有招北客文世说曰南人学问如牖中见日顰眉谓梅酸使人顰眉也世说又载魏武帝行失道三军皆渴帝令曰前有大梅林饶子甘酸可以解渴士卒闻之口皆水出】磨钱和蜜谁能许去蒂供盐亦可人【今人清蜜梅法磨一二铜钱置其下顔色益鲜谁能许谓寒家不办此也汉书食货志曰或盗摩钱质而取鋁蜀志费祚传曰君信可人必能办贼者也字出礼记此借用谓悦可人意】

以梅馈晁深道戏赠二首

带叶连枝摘未残依依茶坞竹篱间【陆羽顾渚山记曰漫石坞巨石中生紫茗赭石坞生卷茶】相如病渴应须此莫与文君蹙远山【相如远山及魏武事并见前注蹙远山即前诗顰眉之意】

渴梦吞江起解顔诗成有味齿牙间【唐文粹有何讽梦渴赋曰奔九江走五湖手不暇于幹运心不息于踌躇吴都赋曰或吞江而纳汉列子曰老商始一解顔而笑汉书郑当时传曰诚有味乎其言也叔孙通传曰何足置齿牙间哉】前身邺下刘公干今日江南庾子山【以终上句诗成之意文选谢灵运拟魏太子邺中集有刘贞诗按魏志王粲传刘贞字公干魏文帝与吴质书曰公干五言诗妙絶当时梁江淹杂体诗序曰关西邺下既已罕同河外江南颇为

异法北史文苑传庾信字子山事梁与徐陵并为抄撰学士文并绮艳故世号徐庾体後留长安作哀江南赋】

次韵孙子实题少章寄寂斋

虚名误壮夫今古可笑悯【文选古诗曰虚名复何益老杜诗从来御魑魅多为才名误法言曰壮夫不为也退之答崔立之书曰君子小人之所悯笑】尸裹万里归书载五车糶安知衡门下身与天地準【後汉马援传曰要当以马革裹尸还葬尔庄子曰惠施多方其书五车齐语曰垂橐而往糶载而归注言重而归也糶綦也陈诗曰衡门之下可以栖迟注谓横木为门言浅陋也系词曰易与天地準】秦晁两美士内行颇修谨【汉书郑当时传曰内行修石奋传曰驯行孝谨】余欲造之深抽琴去其轸【退之诗吾欲盈其气不令见麾幢此用其律孟子曰君子深造之以道韩诗外传曰孔子南游适楚至于阿谷之隧有处子佩璜而浣者孔子抽琴去其轸以授子贡曰善为之词以观其语此借用以明寄寂之意】寄寂喧哄间此道有汲引【庄子曰冥冥之中独见晓焉无声之中独闻和焉故深之又深而能物焉注云视听而不寄之于寂则有闇昧而不和穷其原而後能物物山谷盖用此意老杜诗无生有汲引】狱户闻答榜市声杂嘲𨔵【文选江淹上书曰含愤狱户汉书张敖传曰吏榜笞数千榜音彭魏文帝典论曰孔融理不胜词至乎杂以嘲戏退之诗亦云初喧或纷争中静杂嘲戏庄子曰齐桓公𨔵然而笑𨔵音敕忍反】二生对曲肱圭玉发石蕴【文选王褒四子讲德论曰美玉蕴于碕砢凡人视之佚焉良工砥之然後知其和宝也】大小穷鹏鷃短长见椿槿【庄子曰冥海有鸟焉其名为鹏背若太山翼若垂天之云抟扶摇羊角而上者九万里絶云气负青天然後图南且适南冥也斥鷃笑之曰彼且奚适也我腾跃而上不过数仞而下翱翔蓬蒿之间此亦飞之至而彼且奚适也此小大之辨也又曰朝菌不知晦朔蛄蟋不知春秋上古有大椿者以八千岁为春以八千岁为秋音义曰菌朝生暮落潘尼云木槿也】欲闻寂时声黄钟在龙笋【钟虽未击声音历然楞严经曰佛语阿难声销无响汝说无闻若实无闻闻性已灭同于枯木钟声更击汝云何知知有知无自是声尘或无或有岂彼闻性为汝有无闻实云无谁知无者陆机文赋曰叩寂寞以求音吕氏春秋曰黄钟宫律之本也礼记曰夏后氏之龙箎箎韵书箎亦作笋东坡法云寺钟铭曰鸣寂寂时鸣】

次韵孙子实寄少游【一本云用寄寂斋韵秦观字少游高邮军人】

薛宣欲吏云季氏或招闵【汉书朱云传薛宣为丞相云往见之宣谓曰在田野亡事且留我东合可以观四方奇士云曰小生乃欲相吏耶宣不敢复言东坡诗薛宣真欲吏朱云鲁论曰季氏使闵子骞为费宰闵子骞曰善为我辞焉如有复我者则吾必在汶上矣注谓重来召我】此公曾中秋万物欲收糶【此公指少游庄子曰正得秋而万宝成】卖药偶知名草玄非近准【後汉逸民传韩康字伯休卖药安市时有女子从康买药康守价不移女子怒曰公是韩伯休耶乃不二价乎康叹曰我本欲避名今小女子皆知有我何用药为下句见前注】才难不易得志大略细谨【才难及下不易得皆见鲁论史记酈食其传曰举大事略细谨少游尝教授蔡州顾官妓委婉及陶心儿者词中往往寄意王立之诗话秦少游云少游极怨山谷此句谓言蔡州事少人知者鲁直诗语重人既见此语遂使吹毛耳】士生要弘毅天地为

盖軫【鲁论曰士不可以不弘毅任重而道远考工记曰盖之圆也以象天也軫之方也以象地也】驥来盐车驂井下短细引【言贤才难识拔而深远者未易汲引也战国策汗明见春申君曰夫驥之齿至矣服盐车上太行中坂迁延负轅不能上伯乐遭之下车攀而哭之解紵衣而羈之于是俯而喷仰而鸣声造于天欣伯乐之知己也庄子曰楮小者不可以怀大细短者不可以汲深】难甘呼尔食聊寄粲然赧【孟子曰噉尔而与之行道之人弗受注云噉尔犹呼尔咄啐之貌也粲然见前注】谁能借前筹还妇用束縲【汉书张良传曰臣请借前箸以筹之退之诗兹道诚可尚谁能借前筹蒯通传客谓通曰先生知梁石君东郭先生何不进之于相国乎通曰里母非谈说之士也束縲乞火非还妇之道也然物有相感事有适可臣请乞火于曹相国韩非子人有亡其脉肩者意其妇而逐之邻媪闻之束苇而诣之曰昨夜狗争骨须火以烛之主母悟乃还其妇】吾闻调羹鼎异味及粉堇【左传郑子家曰他日我如此必尝异味礼记内则曰堇苳粉榆免槁修飴以滑之注云苳堇类也冬用苳夏用苳榆白曰粉堇音谨】岂其供王羞而弃会稽笋【退之诗幸当择珉玉宁有弃珪瑁此用其意诗曰岂其食鱼必河之鲂周礼膳夫掌王之食饮膳羞醯人曰加豆之实笋菹鱼醢尔雅曰笋竹萌又曰东南之美者有会稽之竹箭焉】

戏书秦少游壁【观此诗意当是少游过南京有所盼主翁待少游厚欲令从归而其家难之也此篇因有秦氏乌故事遂皆寄言衆禽以为戏丁令威以指少游鸛鹄以指所盼者秦氏庭乌以指少游之细君雅乌之兄言其所生子已长矣宋都今南京宋父指南京主翁末句戏谓少游异时富贵虽有姬妾何伤以开广细君之意也】

丁令威化作辽东白鹤归朱颜未改故人非【续搜神记辽东华表柱有鹤歌曰有鸟有鸟丁令威去家千年今来归城郭虽是人民非何不学仙冢累累】微服过宋风退飞宋父拥篲待来归谁馈百牢鸛鹄妃【孟子曰孔子微服而过宋春秋僖公十六年六鸛退飞过宋都左传曰风也昭公二十五年鸛鹄来巢师已曰异哉吾闻文成之世童謡曰鸛鹄之巢远哉遥遥稠父丧劳宋父以骄注谓稠父昭公死外故丧劳宋父定公代立故以骄此诗皆用宋事但摘取宋父鸛鹄及百牢字用之不取其意也史记孟轲传曰驹子如燕昭王拥篲先驱请列弟子之坐而受业来归见前注左传哀公七年吴人曰宋百牢我鲁不可以後宋注云吴过宋得百牢此诗引用谓南京主翁以所盼者代百牢而馈之也盖老杜尝有诗云有鸟名鸛鹄肉味不足充鼎俎故用以戏之妃匹也退之猛虎行曰朝怒杀其子暮还餐其妃】秦氏乌生八九子雅乌之兄毕逋尾【古乐府云乌生八九子端坐秦氏桂树间尔雅曰鸛斯鸛鹄注云雅乌也小而多羣後汉灵帝纪注童謡曰城上乌尾毕逋】忆炊门牡烹伏雌未肯增巢令汝栖【顔氏家训云乐府载百里奚妻词曰百里奚五羊皮忆别时烹伏雌炊扃扃今日富贵忘我为按蔡邕月令章句曰键关牡也所以止扉或谓之剡移此诗引用言少游细君亦必怨望不肯增乌巢以容鸛鹄也】莫愁野雉疎家鸡但愿主人印累累【恐以新闻旧也法书苑云庾翼字稚恭善草隶在荊州与都下书云小儿辈乃轻家鸡爱野雉皆学逸少汉书石显传民歌之曰牢耶石耶五鹿客耶印何累累綬若若耶注云累累重积也主人谓少游】

赠秦少仪【少仪名覲少游之弟】

汝南许文休马磨自衣食但闻郡功曹满世名籍籍【蜀志许靖字文休汝南平舆人少与从弟劭俱知名而?情不协劭为郡功曹排摈靖不得齿叙以马磨自给汉书陆贾传名声籍甚又刘屈氂传曰事籍籍如此何谓秘也此借用】渠命有显晦非人作通塞【文选有宁显宁悔之语易曰知通塞也】秦氏多英俊少游眉最白【蜀志马良字季常兄弟五人并有才名乡里为谚曰马氏五常白眉最良良眉中有白毛故称之】颇闻鸿鴈行笔皆万人敌【礼记兄之齿鴈行项羽传剑一人敌不足学学万人敌耳】吾早知有覲而不知有覲少仪袖诗来剖蚌珠的皪【覲字少章剖蚌见前注文选舞赋曰珠翠的皪而照耀李善注引说文曰的皪珠光也】乃能持一镞与我箭锋直【文选射雉赋曰擎牙低镞列子曰纪昌学射于飞卫既尽卫之术乃谋杀卫相遇于野二人交射中路矢锋相触而坠于地而尘不扬于是二子泣而投弓相拜于途请为父子其後丛林有箭锋相直之语盖出于此洪觉范僧宝传载曹山宝镜三昧曰羿以巧力射中百步箭锋相直巧力何预】自吾得此诗三日卧向壁【世说王东亭转卧向壁叹曰人固不可以无年此借用自恨知少仪之晚向壁愧叹也】挽土不能寸推去辄数尺【左传曰夫二子者或挽之或推之此句止用其字老子曰不敢寸进而退尺孟子曰贤不肖之相去其间不能以寸】才难不其然有亦未易识【鲁论曰才难不其然乎史记范雎传曰人固不易知知人亦未易也】

送少章从翰林苏公余杭

东南淮海惟扬州国土无双秦少游【周礼职方氏东南曰扬州禹贡曰淮海惟扬州高邮军属淮南路汉书韩信传萧何曰诸将易得至如韩信国土无双】欲攀天关守九虎但有笔力回万牛【楚辞曰攀天阶而下视招魂曰虎豹九关啄害下人些注谓天门九重使虎豹执其开闭啄啮欲上之人也欧阳公诗曰兴来笔力千钧重万牛见前注】文学纵横乃如此故应当家有季子【後汉周举传曰五经纵横周宣光老杜诗凌云健笔意纵横乐天诗当家美事堆身上何意林宗与细侯当音去声】时来谁能力作难鸿鴈行飞入道山【南史膺时来之运乐府孙绰碧玉歌曰感郎不作难又太白诗曰回山倒海不作难老杜诗麒麟阁画鸿鴈行道山见前注】斑衣儿啼真自乐从师学道也不恶【事亲从师皆有可乐者列女传曰老莱子孝养二亲行年七十婴儿自娱着五色彩衣尝取浆上堂跌仆因卧地为小儿啼史记循吏传曰老人儿啼晋书谢道韞传谢安曰王郎逸少子不恶汝何恨也】但使新年胜故年即如常在郎罢前【言少章偁从苏公问学日新即所谓以志养志者何必以不远其亲为孝哉王立之诗话谓山谷此句盖有深意玉台新咏丘迟杂诗曰惟见君行久新年非故年唐人顾况有囷哀闽曰郎罢别囷吾悔生汝囷别郎罢心摧血下隔地絶天及至黄泉不得在郎罢前青箱杂记云闽人谓父为郎罢谓子为囷】

题净因壁二首

暝倚蒲团挂鉢囊【旧作昼梦长】半窗疎箔度微凉【传灯录云门传曰高挂鉢囊拗折拄杖】蕉心不展待时雨葵叶为谁倾太阳【唐余録路德延芭蕉诗云心似倒抽书退之诗升堂坐阶新雨足芭蕉叶大梔子肥唐诗芭蕉不展丁香结时雨见前注曹子建表曰若葵藿之倾叶太阳虽不为之回光然终向之者诚也盖用淮南子意文选鲍明远诗端为谁苦辛】门

外黄尘不见山此中草木亦常闲履声如度薄冰过催粥华鲸吼夜阑【刘禹锡诗门外黄尘人自走瓮头清酒我初开庄子曰北面而不见冥山履声见汉书郑崇传诗曰如履薄冰华鲸谓斋鱼之藻饰者释氏要览曰今寺院木鱼或取鲸鱼一击蒲牢为之大鸣也按文选东都赋曰发鲸鱼铿华钟又潘岳西征赋曰华鲂跃鳞老杜诗夜阑更秉烛】

六月十七日昼寝

红尘席?乌鞞里想见沧洲白鸟双【选诗曰复协沧洲趣老杜诗河间双白鸥】马鬣枯萸喧午枕梦成风雨浪翻江【闻马鬣草声遂成此梦也楞严经曰如重睡人眠熟牀枕其家有人于彼睡时捣练舂米其人梦中闻舂捣声别作他物或为击鼓或为撞钟此诗略采其意以言江湖之念深兼想与因遂成此梦文选马汧督谏曰箕秆空虚】

北窗

生物趋功日夜流园林才夏麦先秋【庄子曰主物之以息相吹文选孔文举论盛孝章书曰岁月不居时节如流礼记月令孟夏麦秋至】緑陰黄鸟北窗簟付与来禽安石榴【末句盖有所寄言物化各用事于一时姑听其自然欧阳公诗緑陰黄鸟春归後尚书故实曰王内史书帖有与蜀郡太守书求樱桃来禽日给藤子来禽言味甘来衆禽俗作林禽博物志云张骞使西域还得安石榴苏子美诗别院深深夏簟清石榴花发透帘明】

赵子充示竹夫人诗盖凉寝竹器憩臂休膝似非夫人之职予为名曰青奴并以小诗取之二首

青奴元不解梳妆合在禅斋梦蝶牀公自有人同枕簟肌肤冰雪助清凉【文选嵇康琴赋序曰似元不解声音梦蝶见前注山谷鼓盆已久故用庄子梦蝶事退之诗水文浮枕簟庄子曰藐姑射之山有神人焉肌肤若冰雪东坡乐府曰冰肌玉骨自清凉无汗】

浓李四弦风拂席昭华三弄月侵牀我无红袖堪娱夜正要青奴一味凉【元注云冬夏青青竹之所长故命曰清奴穠李昭华贵人家两女妓也昭华盖王晋卿驸马家吹笛妓杜诗红袖泣前鱼欧阳公诗欲将何物招嘉客唯有新秋一味凉】范蜀公挽词二首【蜀公讳镇字景仁东坡为作墓志今采掇以证此诗】

信道虽常尔知人乃独亨【言公笃于信道盖其常德至于知人之明独心通意晓乃得之于天也易曰有孚维心亨公事神宗复为翰林学士知通进银台司王介甫为政欲改常平为青苗法公三上疏争之其後议论益不合年六十三即致仕此诗所谓知人盖指介甫】书林身老大谏纸字敲倾【公在英宗朝已为学士书林见前注退之诗莫道官闲身老大乐天与元稹书曰身是谏官月请谏纸老杜诗作诗呻吟内墨淡字敲倾】鳌去三山动人危五鼎烹【言公既去国本自此摇矣方公请致仕时介甫自草制极口诋公闻者皆为公惧列子曰归墟中有五山帝使巨鳌十五戴之五山始峙而不动龙伯国之大人一钓连六鳌于是一山流于

北极汉书主父偃传曰大丈夫生不五鼎食死则五鼎烹耳】保全天子圣几杖送余生【言神宗终覆护之使得终其壽考老杜诗浅把涓涓酒深凭送死生选诗余生幸已多】

公在昭陵日文章近赤墀空嗟伏生老不侍迺英帷【永昭仁宗陵名公事仁宗已掌内外制盖先朝旧臣独不见容于当世此诗所叹也汉书梅福传曰涉赤墀之涂又儒林传伏生故为秦博士孝文时求能治尚书者欲召之时伏生年九十余老不能行迺英阁经筵所在公在神宗时兼侍读已而致仕】去国几三虎闻韶待一夔谁言盖棺了新乐鎖蛛丝【韩子曰庞共与太子质于邯郸谓魏王曰夫市无虎明矣然而三人言成市虎今夫邯郸去魏远于市议臣者过三人愿王察之公与刘几论乐不合既而请太府铜自为新乐比李照乐下一律有奇二圣御延和殿召执政同观赐诏嘉獎乐奏三日而公薨闻韶见鲁论吕氏春秋鲁哀公问于孔子曰乐正夔一足矣老杜诗书籤药裹封蛛网盖棺了见前注诗意谓公以新乐卒不见用为恨也】

宗室公壽挽词二首【山谷尝有赠宗室景道字跋云余与宗室越宫有葭苕故曩时与宣州院公壽景珍尝共文酒之乐】

昔在熙宁日葭苕接贵游【汉书中山靖王传曰葭苕之亲注云葭芦叶也苕者其箬中白皮至薄者也喻相着周礼师氏曰凡国之贵游子弟学焉注云王公之子弟】题诗奉先寺横笛宝津楼【东京记曰奉先资福禅院在明义坊宝津楼在天苑坊与金明池心亭榭相直】天网恢中夏宾筵禁列侯但闻刘子政头白更清修【言禁网虽云疎阔至宗室独加严密故宾客不复往来如向时但闻其白首清修之贤而已老子天网恢恢疎而不失文选任彦昇表曰值齐网之宏弛宾客之禁李善注引後汉书建武中禁网尚寬诸王既长各招引宾客汉书高帝纪注云通侯旧曰彻侯後改曰列侯刘向字子政汉宗室也年七十二卒魏志陈矫传陈登曰清修疾恶有识有义吾敬赵元达】

昧旦鸣珂路春朝禁殿班【书曰先王昧爽丕显坐以待旦唐书车服志曰三品以上珂九子四品七子五品六子又张嘉佑传弟嘉贞为相嘉佑任金吾将军时号所居坊曰鸣珂里周礼春见曰朝】方看分宝玉何意作丘山【书旅?曰分宝玉于伯叔之国时庸展亲文选张孟阳七哀诗曰昔为万乘君今为丘山士】燕入风荣舞花开日笑颜【选诗曰风帘入双燕仪礼注曰荣屋翼也太白诗妾似井底花花开向君笑】空余杜陵泪一为汉中漕【老杜集中多有与汉中王瑀往还诗瑀盖唐宗室】

出城送客过故人东平侯赵景珍墓

朱顏苦留不肯住白髮正尔欺得人【乐天诗镜里朱顏看已失又云留春不肯住薛能诗青春背我堂堂去白髮欺人故故生王直方诗话云鲁直尝言少时诵薛能诗云青春背我堂堂去白髮欺人故故生孙莘老问曰此何人诗公曰老杜莘老云杜诗不如此後公云庭坚因莘老之言遂晓老杜诗高雅大体此句乃所以鍼薛能之膏肓尔】婣娟去作谁家妾意气都成一聚尘【文选西京赋曰增婣娟以跣豸注云姿态妖蛊也乐天诗歌舞妆成心力尽一朝身

去不相随史记晏子传意气扬扬甚是得也寒山子诗云始忆八尺汉俄成一聚尘黄泉无晓日青草自知春】今日牛羊上丘垄当时近前左右嗔【古乐府曰绣幕园香风年节朱绦桐不如理何事浅立经管中护惜加穷袴堤防托守宫今日牛羊上丘垄当时近前面发红老杜丽人行云慎莫近前丞相嗔】花开鸟啼荆棘里谁与平章作好春【乐天劝令公开宴诗曰宜须数数谋欢会好作开成第二春】

黄颍州挽词三首

恭惟同自出累世复通家【老杜赠卢五丈诗曰恭惟同自出妙选累高标此借用言族姓同出也後汉孔融传谓李膺曰与君累世通家】惠沫沾枯涸忠规补过差【庄子曰泉涸鱼相与处于陆相响以湿相濡以沫文选左太冲诗曰块若枯池鱼陆士衡辨亡论曰忠?武节宋玉登徒子好色赋曰扬诗守礼终不过差】胷中明玉石仕路困风沙尚有平生酒秋原洒菊花【玉石见前注】

临民次公老论事长舆通【鲁论曰居敬而行简以临其民汉书黄霸字次公为颍州守晋书和峤字长舆潘安仁闲居赋序曰昔通人知长舆之论予也固谓拙于用多】袖有投虚刃时无斲鼻工【文选天台山赋曰投刃皆虚按庄子庖丁解牛注曰游刃于空斲鼻见前注】风流前辈近名实後人公【晋书孙绰风流为一时之冠文选孔融论盛孝章书曰今之少年喜谤前辈欧阳公诗後世苟不公至今无圣贤】不谓三日别今成万事空【吴志吕蒙传曰士别三日即刮目相待乐天诗百年随手过万事转头空】

公与汝阳守人间孝友稀脊令鸣夜雨常棣倚春晖【脊令见前注常棣诗曰常棣之华鄂不韡韡凡今之人莫如兄弟】粉省双飞入泉台相与归【蔡质汉官典职曰尚书即奏事明光殿省省中皆以胡粉涂壁画古贤列女老杜哭李峰诗云青琐陪双入泉台见前注礼记曰死者如可作也吾谁与归】哀笳宛丘道衰涕不胜挥【老杜诗哀挽青门道宛丘今陈州家语公父文伯卒敬姜曰二三子无挥涕王肃曰挥涕者泪以手挥之选诗泪下不可挥】

乐壽县君吕氏挽词二首

归装衣楚楚家世印累累【诗曰蜉蝣之羽衣裳楚楚汉书石显传曰印何累累绶若若耶刘滋未第时梦人持印满匣令吞之至十四枚正见印累累出于腹上】来作箕帚妇不忘苹藻诗【汉书高帝纪吕公曰臣有息女愿为箕帚妾采苹诗序曰大夫妻能循法度也其诗曰于以采苹南涧之滨于以采藻于彼行潦】居然成万古何啻谒三医【列子曰李梁得疾七日大渐其子谒三医一曰矫氏二曰俞氏三曰卢氏】骑省还秋直霜侵鬓脚衰【文选潘岳秋兴赋序曰余春秋三十有二始见二毛以太尉掾兼虎贲中郎将?直于散骑之省岳又有悼亡诗三首】

剪髻宾筵盛齐眉妇礼闲【老杜送王评事诗云自陈剪髻鬢鬻市充杯酒谓王珪母也盖用晋书陶侃母事退之祭裴太常文曰方丈之食每盛于宾筵後汉书梁鸿传曰孟光举案齐眉

闲谓闲习也】谓宜俱白发忽去作青山【诗曰君子偕老选诗今为丘山土】大梦惊蝴蝶何时识佩环【庄子曰且有大觉而後有大梦蝴蝶见前注列女传齐孝孟姬曰妾闻妃后踰闕必乘安车辎辂下堂必从傅母保阿进退则鸣玉佩环後汉书皇后纪论曰动有环佩之响此诗引用盖古之妇容皆如此不特后妃也】哀歌行欲絶丹旌雨斑斑【老杜诗丹旌飞飞日初传发阆州雨斑斑见前注】

叔父给事挽词十首【给事名廉字夷仲实录有传】

元佑宗臣考十科公居八九未为多功名身後无瑕点孝友生知不琢磨【宗臣为温公汉书萧曹赞曰为一代之宗臣温公为相乞以十科举士一曰行义纯固可为师表二曰节操方正可备献纳三曰智勇过人可备将帅四曰公正聪明可备监司五曰经术精通可备讲读六曰学问该博可备顾问七曰文章典丽可备著述八曰善听狱讼尽公得实九曰善治财赋公私俱便十曰练习法令能断情谏论语生而知之诗云如切如磋如琢如磨】

平生治狱有陰功忠孝临民父母同赣上樵夫谈卓令宣城老吏识于公【赣上今?州宣城今宣州据廉传中进士第调宣州司理参军移?州会昌令後汉卓茂传茂为密令吏人亲爱而不忍欺之汉书于定国传于公曰我治狱多陰德未尝有所冤子孙必有兴者】

三晋山河数十州频年水旱不能秋我公出把司农节粟麦还于地上流【王安石荐廉为司农寺句当公事神宗召见称旨遂命体量河东河北灾伤除本寺丞推行荒政十二事汉书地理志曰晋为韩魏赵所灭三家自立为诸侯是为三晋唐书刘晏传曰自言如见钱流地上】

更生苦讼石中书宰掾非人欲引裾两猾论兵几败国同时御史更谁如【廉尝为监察御史里行此诗中事传所不载杜牧之作李给事诗曰可怜刘校尉会讼石中书按汉书刘向本名更生中书宦官恭显弄权更生使其外亲上变事又上封事云云魏志辛毗传文帝欲徙冀州土豪十万户实河南毗以为非帝不答起入内毗随而引其裾帝遂徙其半汉书张良传汉王骂曰竖儒几败乃公事老杜诗论兵远壑静王介甫作王侍御墓碣曰其言多同时御史所不能言者】曾发公家钜万钱沟中襁褓却生全三齐水後皆禾稼不杀耕牛更可传【河决曹村廉充京东体量安抚活饥民二十五万人汉书食货志曰京师之钱累百钜万又田儼传曰田荣尽并三齐之地注谓齐及济北胶东可传见孟子】

晋地无戎卧贼曹民兵赐笏解弓刀六年讲武儒冠在不踏金门着战袍【元丰三年团教三路民兵廉以提点河东刑狱兼提举明年秋上亲召閱泽州保甲补官者五十八人进秩一等七年十月罢提刑转领保甲元佑初诏为户部郎中左传曰无戎而城雖必保焉通典曰两汉有决曹贼曹掾主刑法历代或谓之贼曹或为法曹墨曹汉书扬雄传曰历金门上玉堂有日矣古乐府木兰诗曰脱我战时袍着我旧时裳】

军容百万转风雷独料王师不战摧三篋飞书公对狱元丰天子照奸回【王师伐夏国命廉兼河东转运判官王中正将兵调发仓卒廉上言师必无功既而中正军溃以转运乖方归罪

于廉奏之上遣中贵人就诘状廉谢不辩乃下潞狱月余上察其情止夺一官中正宦官故用鱼朝恩观军容事史记甘茂传乐羊返而论功文侯示之谤书一篋汉书张安世传曰亡书三篋後汉书广陵思王荆传曰作飞书封以方底汉书刘向传曰?显白令萧望之诣狱置对泰誓曰崇信奸回注云回邪也】

陇上千山汉节回扫除民贼不为灾蜀茶总入诸蕃市胡马常从万里来【廉为吏部郎中会御史论陆师闵榷茶六害请通商复券马如旧制遣廉按其实廉请熙河秦凤泾原如故勿改以制蕃市而许东路通商禁南茶无侵陕西以利蜀贾定拨马岁以万八千为额所奏皆可即拜都大提举茶马公事汉节见前注诗曰为鬼为蜮左传曰有蜚不为灾】廊庙从来不在边黄扉青琐庆登贤除书未试回天笔何意佳城到马前【元佑六年十一月廉自陕西都转运召拜给事中论议引大体朝廷称焉左传曰五大不在边五细不在廷唐郭承嘏为给事中文宗为宰臣曰承嘏久在黄扉汉书故事黄门郎日暮入对青琐门故谓之夕郎注云刻为连琐文而青涂也白乐天诗黄纸除书无我名唐书张玄素传魏徵曰张公论事有回天之力後汉书马后传曰何意老志复不从哉佳城见前注】

荣禄常思泽九宗山摧梁坏併成空百年遗恨谁昭洗他日诸郎有父风【庄子曰郑人缓为儒河濶九里泽及三族九宗见前注礼记泰山其颓乎梁木其坏乎谢朓诗中区咸已泰轻生谅昭洒按洒与洗同廉四子叔豹叔向叔夏叔敖】

寂住阁【元注云陈留宿一?堂因书为寂住阁】

庄周梦为蝴蝶蝴蝶不知庄周【庄子曰昔者庄周梦为蝴蝶栩栩然蝴蝶也俄然觉则蘧蘧然周也不知周之梦为蝴蝶欤蝴蝶之梦为周欤】当处出生随意急流水上不流【楞严经曰一切浮尘诸幻化相当处出生随处灭尽文选头陀寺碑李善注曰意生身谓菩萨言能变化生死随意住生文选古诗曰淮泗驰急流?法师物不迁论云仲尼曰回也见新交臂非故如此则物不相往来明矣既无往返之微睽有何物而可动乎然则旋岚偃岳而常静江河竞注而不流复何怪哉】

深明阁

象踏恒河彻底日行阎浮破冥若问深明宗旨风花时度窻棂【上两句言深与明涅槃经云声闻缘觉及大菩萨同在佛前闍佛说一味之法然其所证各有浅深譬象马兔三兽渡河兔渡则浮马渡及半唯大象彻底截流华言经曰譬如日出于阎浮提先照一切须弥山等然後普照一切大地如来亦尔大智日光无所分别又颂曰譬如日出阎浮提光明破暗悉无余传灯録壽禅师曰欲识永明旨门前一湖水日照光明生风来波浪起又达磨传曰外付袈裟以定宗旨说文曰棂楯间子也】

山谷内集诗注卷十一

山谷内集诗注卷十二

钦定四库全书

山谷内集诗注卷十二 宋 黄庭坚 撰

任渊注

竹枝词二首【并跋】

撑崖拄谷蝮蛇愁入箐攀天猿掉头【言山路险绝如此即後诗所谓蛇倒退胡孙愁也郭璞注尔雅云蝮蛇细颈大头焦尾一名返鼻楚辞曰攀天阶而下视元稹乐府有梦上天诗曰攀天上天攀未得太白蜀道难曰黄鹤之飞尚不得过猿猱欲度愁攀缘老杜诗巢父掉头不肯住】鬼门关外莫言远五十三驿是皇州【鬼门关在峡州路寰宇记曰黔州东北至东京三千八百六十五里杜牧之诗故乡七十五长亭谢朓诗春色满皇州】

浮云一百八盘萦落日四十八渡明【一百八盘及四十八渡皆自峡中行黔中路名山谷书萍乡县厅亦曰略江陵上夔峡过一百八盘涉四十八渡诗本或作四十九渡非是】鬼门关外莫言远四海一家皆弟兄【子夏曰君子敬而无失与人恭而有礼四海之内皆兄弟也荀子四海之内若一家】

古乐府有巴东三峡巫峡长猿鸣三声泪沾裳但以抑怨之音和为数叠惜其声今不传予自荆州上峡入黔中备尝山川险要因作二叠与巴娘令以竹枝歌之前一叠可和云鬼门关外莫言远五十三驿是皇州後一叠可和云鬼门关外莫言远四海一家皆弟兄或各用四句入阳关小秦王亦可歌也【绍圣二年四月甲申】

梦李白诵竹枝词三叠

余既作竹枝词夜宿歌罗驿梦李白相见於山间曰予往谪夜郎於此闻杜鹃作竹枝词三叠世传之不予细忆集中无有请三诵乃得之

一声望帝花片飞万里明妃雪打围【蜀记曰昔人有姓杜名字号曰望帝宇死俗说云化为子规子规鸟名也又谓之杜鹃李商隐诗庄生晓梦迷胡蝶望帝春心托杜鹃楚骚曰恐鸕鶒之先鸣兮使百草为之不芳顔师古注扬雄反离骚云一名子规一名杜鹃花片飞见前注明妃即王昭君避晋氏讳後人因改焉亦见前注五代史四夷附录耶律德光言我在上国以打围食肉为乐接北人以游猎为打围】马上征人那解听琵琶应道不如归【刘熙释名云琵琶北方马上之所鼓推手前曰琵引手却曰琶因以为名也傅奕琵琶赋序曰故老云汉乌孙公主念其行道思慕使知音者于马上奏琵琶以慰之此诗以琵琶为明妃事盖承前人之误子规声若云不如归去此引用以终上句之意】

竹竿坡面蛇倒退摩围山腰胡孙愁【蛇倒退胡孙愁皆峡路地名摩围山属黔中】杜鹃无血可续泪何日金鸡赦九州【老杜杜鹃行曰其声哀痛口流血所诉何事常区区李贺诗亦曰杜鹃口血老夫泪韩非子曰卞和泣尽继之以血太白诗我愁远谪夜郎去何日金鸡放赦回谈苑曰杜镐言肆赦树金鸡不知起于何代关东风俗传云司马膺之曰接海中星占天鸡星动为有赦盖王者以天鸡为度隋书刑法志北齐肆赦日令武军设金鸡及鼓于阙门或云起于西凉吕光未知孰是究其旨西方主兑兑为泽鸡者巽之神巽为号令故合是二物制其形揭于长竿使衆人覩之也】

命轻人鮓瓮头船日瘦鬼门关外天北人堕泪南人笑青壁无梯闻杜鹃【人鮓瓮在归州岸下老杜无家别云久行见空巷日瘦气惨凄文选琴赋曰青壁万寻张湛列子注曰班输为梯可以凌虚】

和答元明黔南赠别【山谷书萍乡县厅曰初元明自陈留出尉氏许昌渡汉沔略江陵上夔峡过一百八盘涉四十八渡送余安置于摩围山之下淹留数月不忍别士大夫共慰勉之乃肯行掩泪握手为万里无相见期之别】

万里相看忘逆旅三声清泪落离觞【老杜诗相看俱衰年左氏僖二年传曰保于逆旅注云客舍也古乐府曰巴东三峡巫峡长猿鸣三声泪沾裳】朝云往日攀天梦夜雨何时对榻凉【上句谓与元明同来巫峡也朝云梦见前注元稹乐府有梦上天词曰攀天上天攀未得韦应物诗宁知风雨夜复此对牀眠东坡诗夜雨何时听萧瑟】急雪脊令相并影惊风鸿鴈不成行【上句谓元明同忧患下句言其别去诗曰脊令在原兄弟急难老杜诗急雪舞回风又诗沙晚脊令寒选诗云惊风扶轮毂又沈休文咏湖中鴈诗曰乱起未成行唐宋遗史有女子作诗送兄云所嗟人异鴈不作一行归】归舟天际常回首从此频书慰断肠【谢朓诗天际识归舟王仲宣诗回首望长安蔡琰胡笳曰日东月西兮徒相望不得相随兮空断肠文选魏文帝燕歌行曰念君客游思断肠】

题驴瘦岭马铺【知命 此下十九诗皆黄知命作附录卷内知命山谷之弟详具目录注】

老马饥嘶驴瘦岭病人生入鬼门关【後汉书班超传上疏曰但愿生入玉门关此借用】病人甘作五溪卧老马犹思十二闲【五溪见前注魏武帝歌曰老骥伏枥志在千里同礼校人曰天子有十二闲马六种】

行次巫山宋懋宗遣骑送折花厨醕【知命】

攻许愁城终不开青州从事斩关来【庾信愁赋曰攻许愁城终不破荡许愁门终不开青州从事见前注左传曰犯门斩关】唤得巫山强项令插花倾酒对阳台【後汉董宣传曰敕强项令出宋玉高唐赋曰朝朝暮暮阳台之下谓巫山神女也】

次韵懋宗送别二首【知命】

一百八盘天上路去年明日送流人小诗话别堪垂泪却道情亲不得亲【一百八盘见前注卢全寄外兄诗云何处堪惆怅情亲不得亲】别驾柴门闭一春艰难颠沛不忘君何时幽谷回天日教保余生出瘴云【山谷谪涪州别驾唐书杜甫传当寇乱挺节无所污为歌诗伤时挠弱情不忘君鲁论曰颠沛必于是易曰入于幽谷老杜诗愿枉长安日光耀照北原文选嵇康书欲离事自全以保余年老杜诗瘴云红不灭】

戏答刘文学【知命】

人鮓瓮中危万死鬼门关外更千岑【人鮓瓮鬼门关见前注汉书赵后传曰今儿安在危杀之矣注云犹今人言险不杀尔】问君底事向前去要试平生铁石心【顔师古匡谬正俗云问曰谓何物为底丁儿反底义何训答曰此本言何等物其後遂省促言直云等物尔音都礼反又转音丁儿反应璩百一诗云用等称才学以是知去何而称等其来已久今人不详根本乃作底字非也老杜诗生死向前去魏武帝令长史王必曰忠能勤事心如铁石国之良吏也】外侄李光祖往见尚垂髫今观寄嗣直小诗已可爱因次韵【知命】

昔别长安未裹头如今诗句可消愁【老杜诗昔别君未婚又诗去时里正与裹头又诗云更有澄江消客愁】外家未觉风流远他日相期到益州【李公择终于益州帅言异时当造益州之阆域老杜诗习池未觉风流尽】

上南陵坡【知命】

风飡水宿六十里蛇退猿啼百八盘【选诗风餐委松柏又诗水宿淹晨昏】上得坡来总欢喜摩围依约见峯峦【摩围山在黔州老杜诗青惜峯峦过】

题小猿叫驿【知命】

大猿叫罢小猿啼箐里行人白昼迷恶藤牵头石啮足奴牵儿随泪録续我亦下行莫啼哭【退之琴操曰涉其浅兮石啮我足元稹连昌宫词曰色管龟兹轰录续】

马上口号呈建始李令【知命】

驿亭新似眼波明箐路开如掌様平谁与长官歌美政风摇松竹是欢声【老杜诗今日明人眼临池好驿亭宋玉招魂曰娛光眇视目曾波些王逸注云目采盼然若水波而重华老杜诗秦川对酒平如掌】

次浮塘驿见张施州小诗次其韵【知命】

叹息施州成老丑当年玉雪莹相照【退之马少监墓志曰姆抱幼子立侧肌肉玉雪可念】旧时去天一尺五今日万里听猿叫【老杜诗自注云城南韦杜去天尺五】

将次施州先寄张十九使君三首【知命】

书来日日觉情亲今信施州是故人许我投名重入社放狂作恼未应嗔【老杜诗情亲独有君东坡诗投名入社有新诗】

收拾从来古锦囊今知老将敌难当【唐书李贺传从小奚奴背古锦囊遇所得投书囊中汉书韩信传曰其锋不可当】囊中尚有毛锥子花底樽前作战场【五代史弘肇传恨苏逢吉等因曰安朝廷定祸乱直须长枪大剑若毛锥子安足用哉史记平原君传曰贤之处世譬若锥之处囊中其末立见老杜诗花?山蜂远趁人又诗下马古战场丁晋公有诗战诗云物华如阵笔如锋沈谢曹刘是七雄】

一别施州向十霜传闻佳句望风降空穹不易当坚敌振臂犹思起病创【老杜诗十暑岷山?三霜楚户砧汉书李陵传矢尽道穷士张空穹注云弓弩穹也又匈奴传曰真中国之坚敌按孙子曰小敌之坚大敌之禽也李陵书振臂一呼创病皆起】

和张仲谋送别二首【知命】

夜郎自古流迁客圣世初投第一人不是施州肯回首五溪三峡更谁亲【唐书李白传长流夜郎夜郎即今之珍州其地与黔中相接江淹恨赋曰迁客海上流戍陇阴五溪见前注峡程记曰三峡者即明月峡巫山峡广泽峡其瞿唐滟滪燕子屏风之类皆不系三峡数】

五溪三峡漫经春百病千愁逢故人何处看君岁寒後欲将儿女更论亲【肯与党锢连姻其气节亦可尚矣】

次韵答清江主簿赵彦成【知命】

日转溪山几百遭厌闻虎啸与猿号【刘禹锡诗百匝千遭绕郡城此用其字老杜诗熊黑咆我东虎豹号我西淮南子虎啸而谷风至又曰白猿拥树而号】笙歌忽抱二天酒风雨犹惊三峡涛【後汉苏章传迁冀州刺史故人为清河太守为设酒肴甚欢太守喜曰人皆有一天我独有二天】已作齐民寻要术安能痛饮读离骚【後魏贾思勰作齐民要术言田家种植之事世说王孝伯言痛饮读离骚自可称名士】看君自是青田质清泪犹堪彻九皋【永嘉郡记沐溪去青田九里中有一双白鹤多云神所养晋书陆机传曰华亭鹤唳岂可复闻乎诗云鹤鸣于九皋】

宋懋宗寄夔州五十诗三首【知命】

五十清诗是碎金试教掷地有余音方今台阁称多士且傍江山好处吟【老杜诗云清诗近道要晋书谢安传桓温以安所作简文谥议示坐宾曰此谢安石碎金也又孙绰传作天台山赋以示范荣期云卿试掷地当作金石声通典曰後汉事归台阁史记屈原传曰行吟泽畔】

五十清诗一段冰持来却得慰愁生自张壁间行坐看更教儿诵醉时听【老杜诗炯如一段清冰出万壑又诗江草日日唤愁生又诗行坐白头吟又有醉时歌】

碑同岷首千年石诗到英州十絶歌他日巴人怀叔子时时解着手摩挲【晋书羊祜传祜字叔子襄阳百姓于岷建此碑望者草不流涕杜预因名为堕泪碑老杜有夔州歌十絶句退之石鼓歌曰谁复着手为摩挲】

题苏若兰回文锦诗图

千诗织就回文锦如此阳台暮雨何亦有英灵苏蕙手只无悔过窦连波【晋书窦滔妻苏氏名蕙字若兰滔苻坚时为秦州刺史被徙流沙苏氏思之织锦为回文旋图诗以赠滔宛转循环以读词甚凄惋】

次韵杨明叔四首【并序】

杨明叔惠诗格律词意皆薰沐去其旧习予为之喜而不寐文章者道之器也言者行之枝叶也故次韵作四诗报之耕礼义之田而深其耒明叔言行有法当官又敏于事而恤民故予期之以远者大者

鱼去游濠上鶚来止坐隅【濠梁见前注汉书贾谊传曰谊为长沙傅三年有鶚飞入谊舍止于坐隅鶚似鴞不祥鸟也谊乃为赋以自广】吉凶终我在忧乐与生俱【上句终鶚来之意下句终鱼乐之意鶚赋曰祸兮福所倚福兮祸所伏忧喜聚门吉凶同域书曰惟吉凶不???在人庄子至乐篇曰人之生也与忧俱生壽者惛惛久忧不死何之苦也涅槃经摩那临终佛至其所慰谕曰身所经处与苦乐俱当修涅槃永离苦乐诗意谓吉凶忧乐皆因我有苟能无我彼何从生山谷与王子飞书曰人固与忧乐俱生者也于其中有简择取舍以至于六凿相攘日寻干戈古之学道者深探其本以无诤三昧治之所以万事随缘是安乐法】决定不是物方名大丈夫【圆觉经曰生决定信传灯录南泉广语云大德莫认心认佛设得认是境被他唤作所知愚故江西大师云不是心不是佛不是物且教你後人恁麼行履孟子曰此之谓大丈夫同安禅师十玄谈曰丈夫皆有冲天气不向如来行处行】今观由也果老子欲乘桴【并见鲁论由也以比明叔老子山谷自谓言明叔志趣勇决必能相从浮于东海也後汉马援传云颇哀老子使得遨游山谷和杨明叔隅字韵七诗皆谓之颂今彭山黄氏有此真蹟二颂此集所无当是晚年删去】

道常无一物学要反三隅【老子曰道常无名传灯录六祖偈曰菩提本非树明镜亦非台本来无一物何假拂尘埃反三隅见鲁论】喜与嗔同本嗔时喜自俱【嗔喜虽殊本同一性衆狙喜怒即可见矣传灯录龙树偈曰于法心不澄无嗔亦无喜】心随物作宰人谓我非夫【心随物转物反为主非大丈夫事也楞严曰一切衆生从无始来迷已为物失于本心为物所转传灯录第二十一祖付法偈曰心随万境转转处实能幽随流认得性无喜亦无忧圆觉经曰由有无始本起无明为已主宰传灯录元沙广语曰如许多田地教谁作主宰左传彘子曰

命为军帅而卒以非夫注云非丈夫也】利用兼精义还成到岸桴【易曰精义入神以致用也利用安身以崇德也佛书以波罗密为到彼岸】

全德备万物大方无四隅【庄子曰而况全德之人也孟子曰万物皆备于我矣反身而诚乐莫大焉老子曰大方无隅淮南子曰经营四隅高诱注云隅方也】身随腐草化名与太山俱【谓闻道而死虽与草木俱腐固有不亡者存谢灵运诗一随往化灭安用空名扬此反而用之礼记月令季夏腐草为萤此借用史记蔺相如传太史公曰相如名重太山选诗曰名与天壤俱】道学归吾子言诗起老夫【礼记中庸曰尊德性而道问学注云道犹由也问学学诚者也鲁论曰起予者商也始可与言诗已矣】无为蹈东海留作济川桴【史记鲁连传曰则连有蹈东海而死尔此借用言不必乘此桴以浮于海留为济川之具可也书说命曰若济巨川用汝作舟楫】匹士能光国三孱不满隅【彭山黄氏本此诗盖再次韵之第二章礼记曰匹士大牢而祭谓之攘文选辨亡论曰风雅则诸葛瑾张承步隲以名声光国晏子春秋曰五子不满隅一子满朝按黄氏本有山谷自注亦引此语但以五为三尔诗意谓豪杰之士虽少足以为邦家之光孱儒之夫虽衆曾不足充满一隅也】窃观今日事君与古人俱【黄氏本作今者事此云今日当是晚年所改言士之可以光国者今世未见独明叔可期以古人也左传曰今日之事我为政此借用老杜诗生还今日事庄子曰成而上比者与古为徒】气类鸛求友精诚石望夫【文选任彦昇作王文宪集序曰许与气类伐木诗曰嚶其鸣矣求其友声诗人相承以嚶为鸛庄子曰真者精诚之至也不精不诚不能动人又注曰郑人缓精诚之至故死为秋柏之实刘义庆幽明录曰武昌北山上有望夫石状若人立古传云昔有贞妇其夫从役携弱于钱送此立山望夫而化为石因以名焉】雷门震惊手待汝一援桴【黄氏本山谷自注曰礼运云蕢桴而土鼓说者曰桴鼓椎也然则枹亦通于桴望其振发声名于当时也荀子曰声名之剖发于天地之间岂不如日月雷霆然哉汉书王尊传曰母持布鼓过雷门注云雷门会稽城门也有大鼓越击此鼓声闻洛阳易曰震惊百里史记司马穰苴传曰援枹鼓之急则忘其身枹亦作桴按礼运疏引皇氏云桴谓击鼓之物左传曰右援枹而鼓音义云枹鼓椎也】

再次韵【并序】

庭坚老懒衰惰多年不作诗已忘其体律因明叔有意于斯文试举一纲而张万目盖以俗为雅以故为新百战百胜如孙吴之兵棘端可以破镞如甘蝇飞卫之射此诗人之奇也明叔当自得之公眉人乡先生之妙语震耀一世我昔从公得之为多故今以此事相付

穷奇投有北鸿鹄止丘隅我已魑魅御君方燕雀俱【穷奇魑魅之语山谷以自况鸿鹄燕雀之语以属明叔退之诗我来御魑魅自宜味南烹按左传太史克曰少皞氏有不才子谓之穷奇舜臣尧流四凶族浑敦穷奇捣机饕餮投诸四裔以御魑魅巷伯诗曰取彼谮人投畀豺虎豺虎不食投畀有北緜蛮诗曰緜蛮黄鸟止于丘隅注云緜蛮小鸟貌此借用言丘隅非鸿鹄所宜止也汉书陈胜传曰燕雀焉知鸿鹄之志】道应无蒂芥学要尽工夫【汉书贾谊鵬鸟赋曰德人无累知命不忧细故蒂芥何足以疑子虚赋注曰蒂芥刺鲠也南史王僧虔云宋文帝书天然胜羊欣工夫少于欣此并借用孔毅甫杂录曰工夫或作功夫魏志王肃传泰极已前

工夫尚大】莫斩猿狙杙明堂待栋桴【黄氏本山谷自注曰灵光殿赋曰荷栋桴而高骧诗言当养成其材勿小用之也庄子曰宋有荆氏者宜楸柏桑其拱把而上者求狙猴之杙者斩之音义云杙音以职反欲以栖戏狙猴也班固西都赋曰列桴橑以布翼荷栋桴而高骧注引尔雅栋谓之桴山谷以西都为灵光误】

谪居黔南十首【摘乐天句○近世曾慥端伯作诗选载潘邠老事云张文潜晚喜乐天诗邠老闻其称美辄不乐尝诵山谷十绝句以为不可跂及其一云老色日上面欢惊日去心今既不如昔後当不如今文潜一日召邠老饮预设乐天诗一帙置书室牀枕间邠老少焉假榻翻阅良久才悟山谷十绝诗盖用乐天大篇裁为绝句盖乐天长于敷衍而山谷巧于翦裁自是不敢复言端伯所载如此必有依据然敷衍翦裁之说非是盖山谷谪居黔南是取乐天江州忠州等诗偶有会于心者摘其数语写置斋阁或尝为人书世因传以为山谷自作然亦非有意与乐天较工拙也诗中改易数字可为作诗之法故因附见于此前五篇今豫章集有之後五篇得之修水集】

相望六千里天地隔江山十书九不到何用一开颜【此乐天集第十卷中寄行简诗原作相去六千里地绝天邈然十书九不达何以开忧颜】

霜降水反壑风落木归山冉冉岁华晚昆虫皆闭关【此十一卷中岁晚诗後两句原作冉冉岁将晏物皆复本源】

冷淡病心情暄和好时节故园音信断远郡亲宾绝【此十一卷中花下对酒诗】

山郭灯火稀峡天星汉少年光东流水生计南枝鸟【此十一卷中西楼夜诗】

冥怀齐远近委顺随南北归去诚可怜天涯住亦得【此十一卷中委顺诗】

老色日上面欢惊日去心今既不如昔後当不如今【此十一卷中东城寻春诗欢惊原作懽情】

啧啧雀引雏稍稍笋成竹时物感人情忆我故乡曲【此第十卷中孟夏思渭村旧居诗】

苦雨初入梅瘴云稍含毒泥秧水畦稻灰种畚田粟【与前篇同】

轻纱一幅巾小簟六尺牀无客尽日静有风终夜凉【此十一卷中竹窗诗】

病人多梦医囚人多梦赦如何春来梦合眼在乡社【一本作秋来何所梦合眼见乡社乐天集第十卷寄行简诗原作渴人多梦饮饥人多梦餐春梦梦何处合眼到东川】

赠黔南贾使君

绿发将军领百蛮横戈得句一开颜【孟郊诗酒人皆倚春发绿病叟独藏秋髮白通典曰後汉有领乌桓校尉诗曰因时百蛮南史垣荣祖传曰曹操曹丕上马横槊下马谈论元稹作老杜墓铭叙曰曹操父子往往横槊赋诗战国策曰卫行人烛过免胄横戈而进老杜诗今代横戈矛谢灵运诗开颜披心胸】少年圯下传书客老去空同问道山【别本注云信臣家世有北园在崆峒山下气象雄壮花木茂密○汉书张良传游下邳圯上有一老父出一编书曰读是则为王者师旦日视其书迺太公兵法庄子曰黄帝问广成子在于空同之上往见之曰敢问至道之精按寰宇记云禹迹之内山名空同者三其一在临洮其一在安定其一在汝州黄帝问道之山专指汝州然此诗所用未必汝州也】春入莺花空自笑秋成梨枣为谁攀【两句皆言故园无主之意老杜诗莺花随世界又诗庭前八月梨枣熟文选谢灵运诗攀林摘叶倦鲍明远诗端为谁辛苦】何时定作风光主待得征西鼓吹还【言使君平定西夏功名已立始归故园也老杜诗传语风光共流转暂时相赏莫相违退之诗山公自是园林主魏志注曹公令曰欲望封侯作征西将军南史曹景宗传破魏师振旅凯入赋诗曰去时儿女悲归来笳鼓竞借问行人何如霍去病吴志诸葛恪传孙权令恪备威仪作鼓吹导从归来】

次韵雨丝云鹤二首【晋张协诗腾空似涌烟密雨如散丝】

烟云杳蔼合中稀雾雨空蒙密更微【旧作隔云朝日看余辉六合空蒙密更微欧阳公岷山亭记草水云烟之杳霭出没于空旷有无之间退之诗杳霭深谷攒青枫宋词曰雾雨淫淫选诗空蒙如薄雾】园客茧丝抽万绪蛛螫网面罩羣飞【茧丝旧作茧盆神仙传曰园客者种五色香草忽有五色蛾集其上有一女自来助客养茧得茧大如瓮纈乞此女子与客俱仙去文选张茂先诗将抽厥绪列子曰扰扰万绪起矣蛛螫见演雅注论衡曰蜘蛛细丝以网飞虫退之祭柳子厚文曰羣飞刺天罩字如诗所谓烝然罩罩】风光错综天经纬草木文章帝杼机【谢朓诗风光草际浮错综见易系词又左传序曰进不成为错综经文以尽其变国语曰经纬不爽文之象也北史祖莹传曰文章须自出机杼成一家风骨文选郭泰机诗曰不得乘杼机】愿染朝霞成五色为君王补坐朝衣【杜牧之诗曰平生五色线愿补舜衣裳诗曰袞职有阙维仲山甫补之】

几片云如薛公鹤精神状态不曾齐【老杜诗洮云片片黄又诗薛公十二鹤皆写青田真低昂各有意磊落如长人按张彦远名画记薛稷字嗣通善花鸟人物杂画画鹤知名孟子曰物之不齐物之情也】安知陇鸟樊笼密便觉南鹏羽翼低【祢衡鹦鹉赋曰闭以雕笼注云陇坻出此鸟渊明诗久在樊笼里复得反自然庄子曰鹏翼若垂天之云海运则将徙于南冥】风散又成千里去夜寒应上九天栖【相鹤经曰飞则一举千里唐摭言杨衡诗一一鹤声飞上天孙子曰善攻者动于九天之上广雅有九天名亦曰九野】坐来改变如苍狗试欲挥毫意自迷【老杜诗天上浮云似白衣须臾改变如苍狗又曰危时暂相见衰白意都迷按列子曰穆王意迷心丧】

从斌老乞苦笋【黄斌老文湖州之妻侄见于山谷题跋】

南园苦笋味胜肉箴龙称冤莫采录【卢仝寄男诗曰箴龙正称冤莫杀入汝口丁宁嘱托汝

汝活箨龙不】烦君更致苍玉束明日风雨皆成竹【礼记玉藻曰大夫佩水苍玉乐天食笋诗且食勿踟蹰南风吹作竹】

吹韵黄斌老所画横竹

酒浇胸次不能平吐出苍竹岁峥嵘【酒浇胷中见前注退之送高闲序曰酣醉无聊不平有动于心于草书发之鲍明远舞鹤赋曰岁峥嵘而愁暮注云岁之将暮犹物之高此引用以言岁寒】卧龙偃蹇雷不惊石与此君俱忘形【蜀志诸葛亮传徐庶谓先主曰孔明卧龙也此引用以比竹偃蹇见前注庄子曰疾雷破山风振海而不能惊晋露王徽之传居空宅便令种竹曰何可一日无此君耶老杜诗忘形到尔汝痛饮真吾师按庄子曰养志者忘形】晴?影落石泓处松煤浅染饱霜兔【退之毛颖传以瓦砚为恒农陶泓此云石泓即石砚可知欧阳公诗谷泉含石泓饱霜兔见前注】中安三石使屈蟠亦恐形全便飞去【名画记云张僧繇于金陵安乐寺画四龙不点眼睛每云点之即飞去人以为诞妄因请点之须臾雷霆破壁二龙上天二龙不点睛者见在此借用以终卧龙之意南史卞彬传曰我诗须大才迕之不尔便飞去此云三石即用大材之意杜诗沈吟屈蟠树庄子曰形全精复与天为一】

次韵谢黄斌老送墨竹十二韵

古今作生竹能者未十辈【东坡先生作文与可画偃竹记曰竹之始生一寸之萌耳而节叶具焉自蜩腹蛇蚶以至于剑拔十寻者生而有之也今画者乃节节而为之叶叶而累之岂复有竹乎汉书娄敬传曰使者十辈来】吴生勒枝叶筌杳远不逮【山谷有道臻师画墨竹序曰墨竹出于近世不知其所师承吴道子作画其运笔作筌不加丹青已极形似故世之精识博物之士多藏吴生墨本至俗子乃銜丹青耳意墨竹之师近出于此山谷又跋臻师墨竹云嫩篁翠筱极为工能妙者惟吴生耳所以文与可多作老竹枯木霜风寒雀挟带烟雨以助其笔势江南李氏勒圈作竹叶其画与褚柳正书同法刘道醇名画评曰黄筌字要叔蜀中人善丹青尤好花竹翎毛凡所操笔皆迫于真与其子居采从孟昶归朝居采字伯鸾亦善画竹有父风苏易简得筌墨竹图李宗谔作贺其序曰工丹青花竹者必用五色惟筌以墨染竹独得意于寂寞间鲁论曰耻躬之不逮也】江南铁钩锁最许诚悬会【山谷自注曰世传江南李主作竹自根至梢极小者二钩勒成谓之铁钩锁自云惟柳公权有此笔法按唐书公权字诚悬刘道醇名画评曰南唐後主李煜好金索书有唐希雅者尝学之乘兴纵奇因其战掣之势以为竹树与山谷之说小异今因附见】燕公洒墨成落落与时背【国朝燕肃侍郎雅善墨竹米芾画史曰肃字穆之师李成後汉耿弇传光武曰将军前在南阳建此大策尝以为落落难合班固答宾戏曰功不得背时而独彰乐天诗性将时共背】譬如剜心松中有岁寒在【寒山子诗曰有树先林生计年逾一倍根遭陵谷变叶为风霜改咸笑外凋残不怜内文彩皮肤既脱落惟有真心在盖用涅槃经语也此句颇采其意岁寒见鲁论】湖州三百年笔与前哲配【文同字与可元丰二年出守湖州未至而卒诗言与可追配柳诚悬于三百年也退之感二鸟赋曰盍求配于古人】规模转银钩幽赏非俗爱【言与可以褚柳正书之法变而作竹银钩见前注】披图风雨入咫尺莽苍外【汉志芝房歌曰披图按谍南史齐竟陵王子良孙贲常于扇上图山水咫尺之内便觉万里为遥老杜诗咫尺应须论万里庄子音义曰莽

苍草野色也上莫浪反下七荡反】吾宗学湖州师逸功已倍【李邕诗吾宗固神秀礼记学记曰善学者师逸而功倍】有来竹四幅冬夏生变态【雒诗曰有来雒雒司马相如子虚赋曰殫观衆物之变态张衡西京赋曰命般尔之巧匠尽变态乎其中李善注曰变奇也态巧也】须知更入神後出遂无对【画品曰吴道子才通思远下笔如有神助易曰精义入神世说习凿齿曰乐令无对于晋世】吾诗被压倒物固不两大【摭言曰杨汝士于杨嗣复坐上诗後成而最佳元白叹服汝士醉归语其子弟曰吾今日压倒元白左传周史曰物莫能两大】

用前韵谢子舟为予作风雨竹

子舟诗书客画手晚前辈【退之诗借问读书客胡为在京师老杜诗画手看前辈吴生远擅场】挹袂拍其肩余力左右逮【山谷自注引郭璞诗云左挹浮丘袖右拍洪崖肩○论语行有余力汉志民有余力】摩拂造化炉经营鬼神会【造化炉见前注谢赫画品谓画有六法五曰经营位置老杜诗意匠惨淡经营中老杜阆山歌曰那知根无鬼神会已觉气与嵩华敌】光煤叠乱叶世与作者背【谓俗工如此】看君回腕笔犹喜汉仪在【言得前辈笔法也墨数载笔髓云须手腕轻虚索靖叙草书曰命杜度运其指使伯英回其腕後汉光武纪曰不图今日复见汉官威仪】岁寒十三本与可可追配【东坡王元之画像赞引曰足以追配此六君子者】小山苍苔面突兀谢憎爱【小山谓竹下山石也卢仝石请客诗曰竹弟虽让客不敢当客思自慙埋没久满面苍苔痕又石答竹曰苍蘚印我面雨露 我皮此故不嫌我突兀蒙相知文选嵇康养生论曰爱憎不施于情】风斜兼雨重意出笔墨外【谓絶去翰墨畦迳也老杜诗曰轻燕受风斜又雨诗晓看红湿处花重锦官城画断曰王宰画山水树石出于象外】吾闻絶一源战胜自十倍【此句以下言胷中高胜则游戏笔墨自当不凡阴符经曰絶利一源用师十倍说者谓至静之极不为死生所乱故战则必胜也】荣枯转时机生死付交态【选诗曰俯仰见荣枯山谷此句言转时机谓视穷达若物之荣枯各随时盛衰任天机自运尔汉书郑当时传翟公曰一死一生乃知交情一贫一富乃知交态山谷此句言处死生之变我初无心从彼世情自作异见】狙公倒七芋勿用嗔喜对【庄子狙公赋芋曰朝三而暮四衆狙皆怒曰然则朝四而暮三衆狙皆悦名实未亏而喜怒为用亦因是也嗔喜见前注高僧支遁传喻道论曰道林识清体顺而不对于物】此物当更工请以小喻大【汉书司马相如上书谏猎云鄙谚曰家有千金坐不垂堂此言虽小可以喻大】

再用前韵咏子舟所作竹

森蓊一山竹壮士十三辈【元次山讼木魅曰见榛梗之森梢楚辞曰一蓊樛樛之可哀集韵蓊音宵蓊樛草木茂貌壮士用杜牧之十万丈夫意熟观此诗子舟所作竹必十三枝故前篇有岁寒十三本今又有壮士十三辈之语】自干云天去草芥肯下逮【司马相如子虚赋曰交错纠纷上干青云樛木诗注曰木枝以下垂故葛藟得累而蔓之喻后妃能以恩下逮衆妾】虚心听造物颠沛风雨会【诗意谓竹君无心但听命于造物虽风雨之变颠沛偃仆亦任其自然尔庄子子舆曰其心闲而无事跼???而监于井曰嗟乎造物者又将以予为此拘拘也诗曰颠沛之揭班固答宾戏曰彼皆蹶风塵之会履颠沛之势文选季重賸曰值风云之会又选诗曰蔼蔼风云会此并借用】荣枯偶同时终不相弃背【荣枯见前注岷诗序曰华落色

衰复相弃背】谁云湖州没笔力今尚在【老杜诗溟涨与笔力】阿筌虽墨妙好以桃李配【黄筌多作夹竹桃李文选别赋曰渊云之墨妙】国工裁主意冷淡恐不爱【黄筌盖孟蜀时待诏国工见前注裁谓量度摭言曰裴度夜宴联句白乐天曰笙歌鼎沸勿作此冷淡生活】子舟落心画荣观不在外【落谓落笔法言曰书心画也老子曰虽有荣观燕处超然】耆年道机熟增胜当倍倍【维摩经天女答舍利佛曰我止此室如耆年解脱柳子厚诗老僧道机熟李通玄华严论多有倍倍增广之语】祖述今百家小纸弄姿态【礼记曰仲尼祖述尧舜小纸见何曾传具前注後汉李固传曰固独胡粉饰貌搔头弄姿盘旋偃仰从容冶步宋玉神女赋曰瑰姿玮态世说注文士传曰张华为人少威仪多姿态】虽云出湖州卷置懒开对【谓失与可本意】非公笔如椽孰能为之大【晋书王恂传曰梦人以大笔如椽与之既觉语人云此当有大手笔事鲁语曰赤也为之小孰能为之大此借用】

戏咏子舟画两竹两鸚鵡

风晴日暖摇双竹竹间相语两鸚鵡鸚鵡之肉不可肴人生不材果为福【老杜冬狩行有鸟名鸚鵡力不能高飞逐走蓬肉味不足登鼎俎胡为见羈虞罗中庄子山木篇弟子问于庄子曰昨日山中之木以不材得终其天年淮南子曰塞上之人马无故亡而入胡人皆吊之其父曰此何遽不为福乎】子舟之笔利如锥千变万化皆天机【乐天诗曰紫毫笔尖如锥兮利如刀晋书祖纳传曰汝颖之士利如锥列子千变万化老杜歌曰刘侯天机精爱画入骨髓】未知笔下鸚鵡语何似梦中胡蝶飞【真假梦觉为一为二达者必能辨之庄子曰昔者庄周梦为胡蝶栩栩然胡蝶也俄然觉则蘧蘧然周也不知周之梦为胡蝶与胡蝶之梦为周与】

山谷内集诗注卷十二

山谷内集诗注卷十三

钦定四库全书

山谷内集诗注卷十三 宋 黄庭坚 撰

任渊注

次韵答斌老病起独游东园二首

万事同一机多虑乃禅病【楞严曰虽见诸根动要以一机抽传灯录僧亡名息心铭曰无多虑无多知多知多事不如息意多虑多失不如守一圆觉经曰大悲世尊快说禅病】排闷有新诗忘蹄出兔径【老杜诗云排闷强裁诗庄子曰蹄者所以在兔得兔而忘蹄言者所以在意得意而忘言僧肇注维摩经曰曷谓回龙象于兔径又传灯录永嘉证道歌曰大象不游于兔径】莲花生淤泥可见嗔喜性【维摩经曰譬如高原陆地不生此花卑湿淤泥乃生此花山谷此句意谓花与泥俱出於一池非泥外有花喜与嗔俱出于一性非嗔外有喜因所见以示人盖得夫观物之妙也】小立近幽香心与晚色静【王立之诗话曰山谷诗云小立伫幽香依家能有几絢丝韵联与荆公颇相同当时暗合耳按介夫诗云月映林塘淡空涵笑语凉俯窥怜绿净小立伫幽香然亦本于老杜稀疎小红翠驻屐近微香之句老杜诗又曰水花晚色静庶足充淹留】

主人心安乐花竹有和气时从物外赏自益酒中味【国语晋文公曰人生安乐孰知其他张平子归田赋曰苟纵心于外物渊明诗酒中固多味】斲枯蚁改穴扫箨笋迸地【斲音株玉切斲也老杜诗药任邻人斲乐天笋诗曰穿墙迸路不依行】万籁寂中生乃知风雨至【万籁见前注】

又和二首

西风麤残暑如用霍去病【汉书霍去病传曰合短兵麤臯兰下】疏沟满莲塘扫叶明竹迳【魏都赋曰疏通沟以滨路疏云疏通也】中有寂寞人自知圆觉性【圆觉经曰无上法王有大陀罗尼门名为圆觉】心猿方睡起一笑六?静【高僧求那跋摩传曰知彼所依处从心猿猴起业及业报果依缘念念灭按遗教经曰此五根者心为其主譬如猿猴得树难可禁制传灯录中邑禅师传仰山问如何见得性师云譬如有屋屋有六窻内有一猕猴东边唤山山山山应如是六牕俱唤俱应仰山云只如内猕猴困睡外猕猴欲与相见如何师即下绳牀执仰山手作舞云山山与汝相见了】

外物攻伐人钟鼓作声气【庄子曰外物不可必刘子曰目爱彩色命曰伐性之斤耳乐淫声命曰攻心之鼓左传曰凡师有钟鼓曰伐无曰侵又曰金鼓以声气也又曰一鼓作气】待渠弓箭尽我自味无味【传灯录僧问岩头弓折箭尽如何师曰去老子曰为无为事无事味无

味】宴安衽席间蛟鳄垂涎地【左传曰宴安酖毒不可怀也庄子曰夫畏途者十杀一人则父子兄弟相戒也人之所取畏者衽席之上饮食之间而不知为之戒者过也欧阳公乞致仕表曰不虞暗祸?臣于风波必死之渊上赖至仁脱臣于蛟鳄垂涎之口文选枚叔七发曰往来游宴纵姿乎曲房隐间之中此甘餐毒药戏猛兽之爪牙也】君子履微霜即知坚冰至【言外物之当辨于早也东方朔七谏曰微霜下而夜降易坤卦曰履霜坚冰至】

又答斌老病愈遣闷二首

百病从中来悟罢本谁病【黄庭经曰百病所种存无英说文曰痾病也文选短歌曰忧从中来不可断絶维摩经曰维摩诘言今我此病皆从前世妄想颠倒诸烦恼生无有实法谁受病者所以者何四大合故假名为身四大无主身亦无我】西风将小雨凉入居士径苦竹遶莲堂自悦鱼鸟性【唐人常建诗曰山光悦鸟性潭影空人心】红荷倚翠盖不点禅心静【青箱杂记曹修古诗云荷叶罩芙蓉圆青映嫩绿佳人南陌上翠盖立春风太白诗花将色不染心与水俱闲】

风生高竹凉雨送新荷气【老杜诗旁舍连高竹韦应物诗雨微荷气凉】鱼游悟世网鸟语入禅味【柳子厚诗云世网难婴每自珍南史虞寄云鱼游拂鼎选诗曰世网婴我身阿弥陀经云水鸟树林及与诸佛所出音声皆演妙法与十二部经合维摩经曰虽复饮食而以禅悦为味又按涅槃经有出家味读诵味坐禅味】一挥四百病智刃有余地病来每厌客今乃思客至【退之诗清桀试一挥维摩经曰是身为灾百一病恼肇僧注曰一大增损则百一病生四大增损则四百四病同时俱作经又曰以智慧剑破烦恼贼文选头陀寺碑曰智刃所游日新月异故庄子曰恢恢乎其于游刃必有余地矣】

次韵黄斌老晚游池亭二首

路入东园无俗驾忽逢佳士喜同游绿荷菡萏稍觉晚黄菊拒霜殊未秋【文选北山移文曰请回俗士驾为君谢逋客山有扶苏诗注曰荷华扶渠也其花菡萏陶岳零陵记曰拒霜花树丛生叶大而岐花甚红九月霜降时开故谓之拒霜文选江文通诗曰佳人殊未来】客位正须悬榻下主人自爱小塘幽【礼记冠义曰醺于客位後汉书徐穉传曰太守陈蕃不接宾客惟穉来特设一榻去则悬之文选沈休文诗宾至下尘榻老杜诗主人为卜林塘幽】老夫多病蛮江上颇忆平生马少游【後汉马援传曰吾从弟少游常哀吾慷慨多大志曰致求盈余但自苦耳当吾在浪泊西里间毒气薰蒸仰视飞鸢跼蹐堕水中卧念少游平生时语何可得也】

岑寂东园可散愁胶胶扰扰梦神游【岑寂见前注老杜诗暄和散旅愁庄子天道篇尧曰胶胶扰扰乎注云自嫌有事列子曰黄帝梦游於华胥氏之国非舟车足力之所及神游而已】万竿苦竹旌旗卷一部鸣蛙鼓吹休【南史孔珪传门庭内草莱不剪中有蛙鸣曰我以此当两部鼓吹】雨後月前天欲冷身闲心远地常幽【渊明诗心远地自偏】杜门谢客恐生谤且作人间鹏鷖游【汉书申公传终身不出门复谢宾客又按唐书陆贄传既放荒远常阖户

人不识其面又避谤不着书此诗反其意世说注向子期郭子玄逍遥议曰夫大鹏之上九万尺鷃之起枋榆小大虽殊各顺其性苟当其分逍遥一也而山谷作庄子内篇解则曰鷃鹏之大鷃鷃之细均为有累于物而不能逍遥惟体道者乃能逍遥耳然此诗用向郭意】

戏答史应之三首

先生早擅屠龙学袖有新硎不试刀岁晚亦无鸡可割庖蛙煎鱠荐松醪【尝闻长老云应之眉山落魄无检喜作鄙语人以屠僧目之故此诗多用屠家事庄子曰朱泚漫学屠龙于支离益单千金之家三年技成而无所用其巧新硎割鸡皆见前注前辈诗曰来朝为送先生饭一夜沿溪捉鱠鱼应之受馆于人为童子师故云尔旧本煎鱠作燂蜚盖眉之野人或食蚝蜚故乡谚因以为戏唐人郭受诗松醪酒熟旁看醉又傳奇曰郑德邻居江上遇一卖菱叟每以佳酒松醪春与之】

老莱有妇怀高义不厌夫家苜蓿盘【列女传老莱子逃世耕于蒙山之阳楚王驾至其门曰守国之孤愿变先生老莱曰诺妻曰妾闻之居乱世为人所制能免于患乎妾不能为人所制者委畚而去老莱乃随而隐闽川名士传薛令之开元中为右庶子时官僚清冷令之为诗曰朝日上团团照见先生盘盘中无所有苜蓿长阑干】收得千金不龟药短裙漂紈暮江寒【庄子曰宋人有不龟手之药者世世以泔泔紈为事客闻之请买其方百金与越人水战大败越人吴王裂地而封之注云其药能令手不拘拆故尝漂紈于水中也】

甌有轻尘釜有鱼汉庭日日召严徐【後汉范丹传所止单陋有时絶粒闾里歌之曰甌中有尘范史云釜中生鱼范莱芜汉书主父偃传曰是时徐乐严安亦俱上书言世务上召见三人谓曰公皆安在何相见之晚也田叔传曰汉庭臣无能出其右者】不嫌藜藿来同饭更展芭蕉看学书【藜藿见前注法书苑陆羽作怀素传曰贫无纸可书常于故里种芭蕉万余以供挥洒】

题也足轩【并序】

简州景德寺觉范道人种竹于所居之东轩使君杨梦觐题其轩曰也足取古人所谓但有岁寒心两三竿也足者也仍为之赋诗余辄次韵【此诗以石本校遏正种爱若昙四字】

道人手种两三竹使君忽来唾珠玉【手种误作手挿太白诗咳唾落九天随风生珠玉】不须客赋千首诗若是赏音一夔足【杜牧之诗何人得似张公子千首诗轻万户侯吴志周瑜传注江表传瑜谓蒋干曰吾虽不及夔旷闻弦赏音足知雅曲吕氏春秋鲁哀公问于孔子曰乐正夔一足矣此借用以属杨使君】世人爱处但同流一丝不挂似太俗【爱处误作同处传灯録石头和尚草庵歌曰世人住处我不住世人爱处我不爱又丰干告寒山子曰汝与我游五台即我同流若不与我去非我同流曰我不去丰干曰汝不是我同流又南泉问陆亘十二时中作麼生陆曰寸丝不挂师云犹是阶下汉又南泉坐次一僧叉手而立南泉白太俗生僧合掌南泉曰太僧生诗意谓爱竹开轩聊同世好于佛法初无相妨也】客来若问有何好

道人优昙远山绿【若问误作问我优昙误作优波晋书孟嘉传桓温问酒有何好而卿嗜之贯休诗夜雨山草滋爽籁杂枯木闲吟竺仙偈清绝过于玉蟋蟀鸣坏墙苟免悲局促道人优昙华迢迢远山绿按法华经曰佛告舍利弗如是妙法诸佛如来时乃说之如优昙钵华时一现耳又偈曰是人甚稀有过于优昙华疏云优昙钵名现应三千年一现现则金轮王出此诗引用言竹之所以可爱正由道人难得耳山谷与周元翁书曰范上坐是简州人浣山喆老门久也其人闻道已久多见前辈道机纯熟知虑深远于士大夫中求之未易得】

寄题荣州祖元大师此君轩

王师学琴三十年响如清夜落涧泉【琴曲有幽涧泉老杜诗蓝水远从千涧落】满堂洗尽箏琶耳请师停手恐断弦【东坡诗归家且觅千斛水净洗从前箏笛耳张籍诗为出二侍女合弹琵琶箏退之听颖师琴诗曰推手据止之湿衣泪滂滂又诗杯行到君莫停手琴家有弹欲断弦下指浅按欲入木力不见之语】神人传书道人命生死贵贱如看镜【道读如乐道人之善之道史记龟策传曰卜者虚高人禄命以说人志退之作李墟中志曰最深于五行书以人之死生年月日所直日辰支干相生胜衰死王相斟酌推人寿命贵贱利不利辄先处其年时百不失一二】晚知直语触憎嫌深藏幽寺听钟磬【言不复以谈天为事汉书谷永传曰警言触忌讳退之诗僻寺境还幽】有酒如渑客满门不可一日无此君【左传曰有酒如渑有肉如陵此君见前注】当时手栽数寸碧声挟风雨今连云【韩孟城南联句云遥岑出寸碧此借用挟风雨见前注文选藩岳秋兴赋曰高阁连云】此君倾盖如故旧骨相奇怪清且秀【汉书邹阳传语曰有白头如新倾盖如故按家语孔子遇程子倾盖而语终日甚相悦顾谓子路取束帛以赠之鲁论曰故旧不遗则民不偷骨相见前注】程婴杵臼立孤难伯夷叔齐采薇瘦【言竹之劲且秀如此史记赵世家屠岸贾杀赵朔朔妻成公姊有遗腹走公宫匿赵朔客曰公孙杵臼谓朔友人程婴曰立孤与死孰难程婴曰死易立孤难耳杵臼曰子强为其难者吾为其易者请先死伯夷传曰伯夷叔齐义不食周粟隐于首阳山采薇而食之遂饿死于首阳】霜钟堂上弄秋月微风入弦此君悦【霜钟盖蔡邕秋思琴曲之一也此僧因以名其堂】公家周彦笔如椽此君语意当能传【王庠字周彦荣州人东坡尝称之笔如椽见前注】

答李任道谢分豆粥

豆粥能驱晚瘴寒与公同味更同餐安知天上养贤鼎且作山中煮菜看【後汉冯异传光武曰昨得公孙豆粥饥寒俱解世说孙长乐作王长史诔云同此玄味易鼎卦曰圣人大烹以养圣贤】

赠知命弟离戎州

道人终岁学陶朱西子同舟泛五湖船窗卧读书万卷还有新诗来起予【知命颇落魄不羈此诗盖遗识之也山谷尝有书与人云知命不乐静居数出又答宋子茂书云知命将一妾一子拒同来史记货殖传范蠡适齐为鸱夷子皮之陶为朱公国记曰范蠡遂乘轻舟以浮于五

湖杜牧之诗云西子下姑苏一舸逐鸱夷起予见鲁语】

侄?随知命舟行【?字维深小字韩十知命第二子】

莫去沙边学钓鱼莫将百丈作辘轳清江濯足窻下坐燕子日长宜读书【老杜诗百丈牵江色卢仝诗辘轳无绳井百尺老杜又有燕子来舟中诗云湖南为客动经春燕子衔泥两渡新暂语船檣还起去穿花落水益沾巾】

次韵奉答文少激推官纪赠二首

请来清吹拂衣巾句法词锋觉有神【诗云吉甫作诵穆如清风庐山记载王乔之诗曰常闻清吹空文选沈休文诗岂假濯衣巾晋书潘岳赞曰词锋景绚老杜诗云诗成觉有神】今日相看清眼旧他年肯作白头新【青箱杂记范讽诗惟有南山与君眼相逢不改旧时青汉书邹阳传曰白头如新倾盖如故】文如雾豹容窥管气似灵犀可避尘【雾豹见前注晋书王献之传门生曰此郎管中窥豹时见一斑李商隐诗心有灵犀一点通述异记曰却尘西海兽也其角辟尘】慙愧相期在台省无心枯木岂能春【老杜诗诸公衮衮登台省刘禹锡诗病树前头万木春】

文章藻监随时去人物权衡逐势低【少激登元佑三年进士第时东坡知举山谷为其属故于此诗寄一叹之意藻监见前注後汉许劭传核论乡党人物】扬子墨池春草遍武侯祠庙晓莺啼【扬子云墨池诸葛忠武庙皆在今成都老杜蜀相祠堂诗云映阶碧草自春色隔叶黄鹂空好音山谷意谓东坡窜谪岷峨凄惶无复振起前人象气也】书帷寂寞知音少幕府留连要路迷【汉书董仲舒传下帷讲诵知音少见前注汉书李广传曰幕府省文书注云幕府者以军幕为义选诗云何不策高足先据要路津】顾我何人敢推挽看君桃李合成蹊【并有前注】

次韵文少激祈雨有感【少激名抗临邛人时在戎州诸本或作少微误予尝见其家藏此诗真本有序云窃闻太守斋洁奉祠当获嘉应】

穷儒忧乐与民同何况朱轮职劝农终日蠶盐供一饭几时肤寸冒千峯【文氏真本民作人按晋书谢安传简文帝曰安石既与人同乐必不得与人同忧退之送穷文曰太学四年朝蠶暮盐公羊曰触石而出肤寸而合不崇朝而雨徧乎天下者唯泰山耳注云侧手为肤按指为寸文选潘安仁诗川气冒山岭诗意谓少激之穷如此安能泽加于民】未须丘垤占鸣鸛只要朝廷起卧龙【言调燮阴阳在得人也东山诗鸛鸣于垤注云鸛水鸟也将阴雨则鸣丘垤见孟子蜀志诸葛亮传徐庶谓先主曰诸葛孔明者卧龙也将军岂愿见之乎苏黄门诗雷雨连年起卧龙】从此滂沱徧枯槁爱民天子似仁宗【文氏真本上句作从此滂沱三十六後改此字按春秋说题词曰一岁三十六雨天地之气宣十日小雨应天文十五日大雨以斗运也又按京房易候云太平之时十日一雨凡岁三十六雨此休徵时若之应】

次韵李任道晚饮锁江亭【此诗前有赠惠洪一篇编次不伦前辈以为非山谷所作曾慥诗选记俞秀老事亦尝及之今删去锁江亭在戎州之东戎今为叙州山谷与王观复书云有李仔任道本梓人而寓江津二十余年其人言行有物参道得其要老成人也】

西来雪浪如烹烹两涯一苇乃可横【东坡乐府曰江汉西来犹自带岷峨雪浪锦江春色退之诗具此煎烹烹庄子秋水篇曰两涘渚涯之间诗曰谁谓河广一苇杭之楚辞曰横大江兮杨?】忽思鍾陵江十里白苹风起縠纹生【刘禹锡诗令人忽忆潇湘相渚舆地广记唐改豫章曰鍾陵又改曰南昌今属洪州山谷乡里也白苹见前注宋玉风赋曰风起于青苹之末刘禹锡竹枝歌曰灩西春水縠纹生】酒杯未觉浮蚁滑茶鼎已作苍蝇鸣【张平子南都赋曰酒则甘醴十旬兼清醪敷经寸浮蚁若萍退之集载弥明石鼎联句曰时于蚯蚓窍微作苍蝇鸣】归时共须落日尽亦嫌持盖仆屡更【老杜诗落尽高天日幽人未遣回又云清江白日落欲尽礼记儒行曰遽数之不能终其物悉数之乃留更仆未可终也】

再次韵兼简履中南玉三首

李侯诗律严且清诸生赓载笔纵横【礼记缁衣篇曰昔吾有先正其言明且清东坡诗敢将诗律鬪清严书臯陶乃赓载歌注云赓续载成也续歌以成其义】句中稍觉道战胜胸次不使俗尘生【渊明诗贫富常交战道胜无戚颜按韩非子子夏曰今先王之义胜故肥其详具前注楚辞屈平渔父曰安能以皓皓之白蒙世俗之尘埃乎】山绕楼台钟鼓晚江触石矶砢砢杵鸣【退之诗青春白日映楼台退之诗寒江触石暄寰宇记曰鄂州江夏县有惊矶山俯临大江下有石矶波涛?急商旅惊骇因以为名此用其字乐天诗月苦风清砢砢悲】锁江主人能致酒愿渠久住莫终更【李贺有致酒行曰零落栖迟一杯酒主人奉觞称客壽汉书段会宗传曰终更亟还亦足以复雁门之骑注云边吏三岁更】

江津道人心源清不系虚舟尽日横【四十二章经曰佛言沙门者断去爱欲识自心源庄子曰泛乎若不系之舟虚而遨游者也寇莱公诗野水无人渡孤舟尽日横江津属渝州渝今为恭】道机禅观转万物文采风流被诸生【柳子厚赠江华长老诗老僧道机熟默语心皆寂圭峯禅源序曰至于念佛求生净土亦须修三十六观禅楞严曰若能转佛即同如来杜诗文采风流今尚存前汉朱云传曰时出乘牛车从诸生】与世浮沉惟酒可随人忧乐以诗鸣【老杜诗浊醪有妙理庶用慰沉浮史记游侠传序曰岂若卑论俗与世浮沉而取荣名哉晋书顾荣传曰惟酒可以忘忧蔡琰胡笳十八拍曰丝竹微妙兮均造化之功哀乐各遂人心兮有变则通退之送孟东野序曰东野始以其诗鸣引用之言随其心之所感或忧或乐皆于诗焉发之】江头一醉岂易得事如浮云多变更【老杜诗每日江头尽醉归又诗天上浮云似白衣须臾改变如苍狗】

锁江亭上一樽酒山自白云江自横【文选沈休文诗勿言一樽酒明日难重持】李侯短褐有长处不与俗物同条生【左传卢蒲嫫髮短而心甚长此句颇采其意短褐见前注汉书丙吉传曰人各有所长浮杯和尚语曰别有长处不妨拈出晋书王戎传阮籍曰俗物已复来败人意传灯録岩头曰雪峯虽与我同条生不与我同条死要识末後句只这是】经术貂蝉续

狗尾文章瓦釜作雷鸣【此句指当世之士晋书赵王伦传每朝会貂蝉盈坐时人谚曰貂不足狗尾续史记屈原传曰黄钟毁弃瓦釜雷鸣】古来寒士但守节夜夜抱关听五更【汉书汲黯传曰守节死义又萧望之传署小苑东门候王仲翁顾谓望之曰不肯録録反抱关谓望之曰各从其志注云门候谓主候时而开门也孟子曰抱关击柝夏竦诗卧听元戎报五更】

次韵任道食荔枝有感三首

一钱不直程卫尉万事称好司马公【两句皆山谷自道汉书灌夫传夫罵灌贤曰平生毁程不识不直一钱今乃效女曹儿咕嗫耳语田蚡曰程李俱东西宫卫尉今衆辱程将军仲孺独不为李将军地乎世说载司马徽别传曰徽字德操括囊畏慎人有以人物问徽者初不辩其高下每辄言佳其妇諫之徽曰如君所言亦复佳】白发永无怀橘日六年怊怅荔枝红【吴志陆绩年六岁于九江见袁术术出橘绩怀三枚去拜辞堕地术谓曰陆郎作宾客而怀橘乎绩跪答曰欲遗母术大奇之按山谷入蜀凡六见荔支宋玉高堂赋曰怊怅自失怊耻骄反】

今年荔枝熟南风莫愁留滞太史公【汉书司马迁传曰太史公留滞周南注云司马谈为太史令迁尊其父故谓之为公山谷尝为神宗实录院检讨官云】五月照江鸭头绿六月连山栢枝红【太白诗遥看汉水鸭头绿老杜诗连山晚照红山谷与王观复书云今年戎州荔支盛登一种栢枝头出于遏腊平大如鸡卵味极美】

舞女荔枝熟虽晚临江照影自恼公天与蹙罗装宝髻更揜猩血染殷红【舞女亦谓栢枝乐府杂録曰栢枝舞因曲为名用二女儿?施金铃拚转有声後汉书宦者传论曰歌童舞女之翫李贺诗有恼公篇盖艳体也其首章曰宋玉愁空断娇娆粉自红歌声春草露门掩杏花丛腥血见前注老杜诗象牀玉手乱殷红殷音乌闲反】

廖致平送绿荔枝为戎州第一王公权荔枝绿酒亦为戎州第一

王公权家荔枝绿廖致平家绿荔枝试倾一杯重碧色快剥千颗轻红肌【老杜宴戎州东楼诗曰重碧拈春酒轻红擘荔支】拨醅蒲萄未足数堆盘马乳不同时【太白诗遥看汉水鸭头绿有似蒲萄新拨醅退之蒲萄诗曰若欲满盘堆马乳莫辞添竹引龙须汉武帝曰恨不得与此人同时】谁能同此胜絶味唯有老杜东楼诗【世说孙长乐作王长史诔曰予与夫子交非势利心犹澄水同此玄味老杜东楼诗首联曰胜絶惊身老情忘发兴奇】

谢杨履道送银茄四首

藜藿盘中生精神珍蔬长蒂色胜银朝来盐醯饱滋味已觉瓜瓠漫轮囷【家语子路曰由也事二亲之时尝食藜藿之食老杜诗顔色白胜雪礼记月令曰薄滋味毋致和汉书邹杨传曰蟠木根柢轮囷离奇注云委曲盘戾也此借用】

君家水茄白银色殊胜埧里紫彭亨蜀人生疎不下箸吾与北人眼俱明【玉篇云蜀人谓平

川曰埧音必驾反弥明石鼎联句曰豕腹胀膨脝黄庭经曰五岳之云气彭亨生疎盖用俗语晋书何曾传曰日食万钱犹曰无下箸处老杜诗吾与汝曹俱眼明】白金作颗非堆成中有万粟嚼轻水戎州夏畦少蔬供感君来饭在家僧【後汉韩棱传肃宗赐三人以宝剑自手署其名曰韩棱楚龙渊郅毒蜀汉文陈宠济南椎成以宠敦朴善不见外故得椎成此借用孟子曰病於夏畦集福德三昧经曰若有菩萨作是三昧虽在家当说是人名为出家山谷持律颇严故自谓在家僧东坡和食笋诗云一饭在家僧】畦丁收尽垂露实叶底犹藏十二三待得银包已成谷更当乞种过江南【老杜摘苍耳诗曰畦丁告劳苦庄子马蹄篇曰马之死者十二三矣茄子老者其子坚黑如谷北人谓之谷子茄】

送石长卿太学秋补

长卿家亦但四壁文君窥之介如石【借用司马长卿事四壁见前注易豫卦之六二曰介于石不终日贞吉系词曰介如石焉寧用终日断可识矣】胸中已无少年事骨气乃有老松格【晋书阮裕传曰人云裕骨气不及逸少而兼有诸人之美卢仝诗曰此骨纵横奇又奇千岁万岁枯松枝】汉文新览天下图诏山采玉渊献珠【徽宗时初即位东都赋曰天子受四海之图籍膺万国之贡珍】再三可陈治安策第一莫上登封书【汉书贾谊传曰因陈治安之策试详择焉司马相如传长卿为一卷书言封禅事南史陈後主从隋文帝东巡赋诗曰太平无以报愿上东封书乐天诗鴈鴈汝飞向何处第一莫飞西北去】

次韵少激甘露降太守居桃叶上

金茎甘露荐斋房润及边城草木香【汉武故事作承露盘以取云表之露班固西都赋曰抗仙掌以承露擢双立之金茎汉志郊庙歌曰斋房产草东坡诗十里南风草木香】蕝实叶间天与味成蹊枝上月翻光【蜀都赋曰蕝实时味王公差焉按桃夭诗注云蕝实貌汉书李广赞曰桃李不言下自成蹊刘禹锡筓丝瀑诗曰翻光破夕薰】羣心爱戴葵倾日万事驱除叶陨霜【国语蔡公谋夫曰庶人不忍欣戴武王葵倾日见前注汉书王莽传曰帝王之驱除云尔春秋僖公三十三年书陨霜不杀草公羊注曰阴假阳威之应山谷意谓徽宗践祚羣心欣戴如日之方升奸回屏斥如霜之肃杀也】玉烛时和君会否旧臣重叠起南荒【时放臣皆得北还尔雅四时和谓之玉烛选诗庆泰欲重叠陆机辨亡论曰輶轩聘于南荒】

借景亭【并序】

清神县尉廳葺城头旧屋作借景亭下瞰史家水竹终日寂然了无人迹又当大木綠阴之间戏作长句奉呈长孺明府介卿少府

青神县中得两张爱民财力惟恐伤【汉书贾山传曰君有余财民有余力而颂声作】二公身安民乃乐劝葺城头五月凉【用孟子贤者而後乐此之意亭在县墙上故曰城头也】竹铺不涸吴绫袜东西开轩荫清樾【淮南子曰武王荫暍人于樾下退之诗守县坐深樾】当官借景不伤民却似凿池取明月【月影分身何伤本体杜牧之盆池诗云凿破苍苔地留他

一片天此用其意】

戏赠家安国【安国眉山人字复礼】

家侯口吃善着书常愿执戈王前驱【史记韩非传非为人口吃不能道说而善着书诗曰伯也执殳为王前驱山谷此诗皆举实事按复礼上相府书云予不佞後长卿子云生千有五百年着书明道摘词立论才得其绪余而口吃之病同之复礼初以武进士後入左选故东坡赠之诗云夜谈空说剑春梦犹横经又云初闻编简香稍觉锋镝腥而复礼谢改官啓云三陪筹幄笑谈当十万戎行两席师筵排闥应三千门弟皆此意也】朱绂蹉跎晚监郡吟弄风月思天衢【易困卦曰朱绂方来利用享祀老杜寄高适诗闻君已朱绂且得慰蹉跎汉书百官表曰监御史秦官掌监郡乐天与元九书曰梁陈间率不过嘲风雪弄花草而已天衢见前注】二苏平生亲且旧少年笔砚老杯酒【二苏谓东坡黄门亦眉人汉书张安世小男彭祖又小与上同席研书司马迁书曰未尝衔杯酒接殷勤之欢东坡赠之曰吾侪便归老亦足慰余龄黄门则曰白髮弟兄惊我在喜君游宦亦天伦清且旧之意概可见矣】但使一气转洪钧此老矍铄还冠军【老杜诗一气转洪钧按选诗洪钧陶万类後汉马援传曰矍铄哉是翁也汉书项羽传宋义号卿子冠军】

次韵杨君全送酒

扶衰却老世无方惟有君家酒未尝【汉书食货志曰酒所以扶衰养疾史记汉武帝纪李少君以却老方见上退之诗断送一生惟有酒左传颖谷封人曰未尝君之羹】秋入园林花老眼茗搜文字响枯肠【圆觉经曰譬彼病目见空中花老眼见前注卢仝茶歌云三碗搜枯腸惟有文字五千卷】醅头夜雨排檐滴盃面春风绕鼻香不待澄清遣分送定知佳客对空觞【玉篇醅与同侧射反切韵云压酒具也欧阳公诗寒醅美新醅老杜诗檐雨细随风卢仝诗一片新茶破鼻香】

次韵君全送春花

化工能幹大钧回不得东君花不开谁道纖纖绿窗手磨刀剪彩唤春来【汉书贾谊赋曰造化为工又曰大钧播物诗云摻摻汝手注云纖纖也景龙文馆记曰景龙四年立春内出彩花树人赐一枝杜牧之诗骰子逡巡裏手拈无因得见玉纖纖又乐天诗绿窻贫家女寂寞二十余隋炀帝在江都宫时冬月翦彩为花唐人吴融尝为作翦彩赋云此皆参而用之唤春来字亦老杜江云日日唤愁生意也】

谢杨景山送酒器

杨君喜我梨花盞却念初无注酒魁耀矮金壶肯持送按莎残菊更传杯【蜀之酒魁盖诗人所谓酌以大斗之遗制象北斗有魁柄也许慎说文曰匱似羹魁柄中有道可以注水玉篇耀音蒲楷切短也矮音於解反不长也曲礼共饭不泽手注曰泽谓按莎也老杜诗传杯不放杯

】

史彦昇送春花【彦昇名会清神人乃绍封之子山谷有书柏学士山居诗跋云史绍封之子会与余外甥张協于苏氏为友婿也】

千林摇落照秋空忽散穠花在眼中蝶绕蜂随俱入座君家女手化春风【宋玉九辩曰悲哉秋之为气也萧瑟兮草木摇落而变衰女手见前注又礼记曰执女手之卷然】

题石恪画尝醋翁【名画评曰石恪成都郫人性轻率尝为嘲谑之句学张南本画数年已出张右多为古僻人物诡形殊状以蔑辱豪右】

石媪忍酸喙三尺石皤尝味面百摺【洪觉范僧宝传载宝峰洪英禅师偈曰阿家尝酸三尺喙新妇洗面摸着鼻按庄子徐无鬼篇仲尼曰吾愿有喙三尺宋景文笔记曰蜀人谓老曰皤取皤皤黄髮义皤音波百摺言其面皱切韵云摺叠也音之涉反东坡外集记梦中见宫人裙带闻有六言诗云百叠漪漪縠皱】谁知耸膊寒至骨图画不减吴生笔【国朝杂记长孙无忌嘲欧阳询曰耸膊成山字埋肩不出头王介甫诗北风萧萧寒到骨老杜诗画手看前辈吴生远擅场吴生谓道子也顷尝见此图益知此诗得游戏三昧曲尽其情状云】

谢应之

昨夜风雷震海隅天心急拟活焦枯去年席上蛟龙语未委先生记得无【当是应之往在戎州谓山谷必非池中物至是复官有进用之渐其言颇有证也老杜诗未委适谁门】

山谷内集诗注卷十三

山谷内集诗注卷十四

<集部,别集类,北宋建隆至靖康,山谷内集诗注>

钦定四库全书

山谷内集诗注卷十四 宋 黄庭坚 撰

任渊注

走笔谢王朴居士拄杖

投我木瓜霜雪枝六年流落放归时千岩万壑须重到脚底危时幸见持【诗曰投我以木瓜晋书顾恺之传曰千岩竞秀万壑争流鲁论曰危而不持颠而不扶则将焉用彼相矣退之赤藤杖歌曰性命造次蒙扶持老杜诗气味浓香幸见分陶隐居云俗人拄木瓜枝云利筋胫】

戏答王居士送文石

南极一星天九秋自埋光景落江流是公至乐山中物乞与衰翁似暗投【老杜诗南极一星朝北斗按晋书天文志曰老人一星在弧南一日南极常以秋分之旦见于丙春分之夕而没于丁此借用以言星陨为石也文选谢灵运诗心契九秋千李善注引古乐府有历九秋妾薄命行庄子曰是自埋于民谢灵运诗日月垂光景至乐山在嘉州凌云之侧柳子厚诗看成古木对衰翁暗投见前注】

次韵杨明叔见钱十首【并序】

杨明叔从予学问甚有成当路无知音求为泸州从事而不能得予蒙恩东归用蛟龙得云雨?鸢在秋天作十诗见钱因用其

韵以别【山谷辞免吏部员外郎状云元符三年十二月发戎州贬所建中靖国元年三月至峡又改知舒州四月至荆南又召以为吏部员外郎此诗未出蜀所作已有同安守吏部铨之语当是据邸报也山谷将发戎州时十二月癸卯有书梁甫吟跋语亦云时闻复朝奉郎知舒州而未被受】

平津善牧豕攸飞能斩蛟【汉书公孙弘家贫收豕海上年四十余乃学春秋杂说武帝以贤良徵後封平津侯宣帝纪发攸飞射士注引吕氏春秋曰荆有攸飞者得宝剑还涉江蛟夹绕其船攸飞拔剑赴江斩蛟杀之荆王闻之仕以执珪武帝改秦左弋官曰攸飞官盖取古勇力人以名官也】终藉一汲黯淮南解兵交【平津之鄙攸飞之勇皆无益于汉家所可赖者汲黯辈尔汉书汲黯传淮南王谋反惮黯曰黯好直谏守节死义至说公孙弘等如发蒙耳左传

注曰兵交使在其间】杨子有直气未忍死草茅【退之送张道士诗曰臣有胆与气不忍死茅茨汉书晁错传曰昧死上狂感草茅之愚臣言云云】引之入汉朝谁为续弦胶【东方朔十洲记曰凤麟洲仙家煮凤喙及麟角合煎作胶名之为续弦胶或一名连金泥此胶属弓弩已断之弦连刀劔断折之金山谷引用谓疎远之于朝廷其合甚难必为之固结于其间者】

杨君清渭水自流浊泾中【泾渭见前注】今年贫到骨毫气似元龙【老杜诗已欣徵求贫到骨元龙见前注】男儿生世间笔端吐白虹【言文章有光焰也鲍照行路难曰丈夫生世能几时退之诗是夕吐焰如长虹礼记曰君子于玉比德焉气如白虹天也】何事与秋萤争光蒲苇丛【维摩经曰无以日光等彼萤火史记屈原传曰虽与日月争光可也】

事随世滔滔心欲自得得【鲁论曰滔滔者天下皆是也注云滔滔周流之貌孟子曰君子深造之以道欲其自得之也庄子曰吾所谓聪者非谓其闻彼也自闻而已矣吾所谓明者非谓其见彼也自见而已矣夫不自见而见彼不自得而得彼者是得人之得而不自得其得者也】杨君为己学度越流辈百【鲁论曰古之学者为己退之与崔羣书曰况足下度越此等百千辈按汉书扬雄传曰必度越诸子矣老杜诗清峻流辈百】坐扞故衣蝨垢袜春汗黑【晋书前秦载记王猛诣桓温面谈当世之事扞蝨而言旁若无人老杜诗垢膩脚不袜摭言高逢休书云顾云树将一尺三寸汗脚踏他烧残龙尾道尝闻长老云山谷此句盖讥明叔垢汗不濯足】睥睨纨袴儿可饮三斗墨【汉书灌夫传注曰睥睨旁视也班固叙传曰班伯在于绮襦纨袴之间非其好也通典曰北齐策秀才书有滥劣者饮墨水一升此云三斗盖甚言之犹唐诗谓宁食三斗葱宁食三斗艾尔】清静草玄学西京有子云【汉书扬雄传解嘲曰爰清爰静游神之廷惟寂惟寞守德之宅草玄见前注】太尉死宗社太鸟泣其坟【後汉杨震传为樊丰等所谮策收震太尉印绶遣归本郡行至城西慷慨谓诸子曰疾奸臣狡猾而不能诛恶嬖女倾乱而不能禁何面目复见日月遂饮酖而卒先葬十余日有大鸟高丈余集震丧前俯仰悲鸣泪下沾地葬毕乃飞去】寂寞向千载风流被仍昆【尔雅曰来孙之子为罍孙罍孙之子为仍孙】富贵何足道圣处要策勲【退之诗屈原离骚二十五不肯哺啜糟与醯惜哉此子巧言语不到圣处宁非痴左传曰反行饮至舍爵策勲焉礼也注云书勲劳于册言速纪有功也】

桑輿金石交既别十日雨子輿裹饭来一笑相告语【庄子日子輿与子桑友淋雨十日子輿裹饭而往食之至子桑之门则若歌若哭子輿入日子之歌诗何故若是曰吾思夫使我至此极者而弗得也汉书韩信传武涉曰足下自以为与汉王为金石交注云取其坚固】扬子困箠瓢诸公不能举【箠瓢见鲁论又臧文仲知柳下惠之贤而不与立注谓知贤而不能举按孟子曰悦贤不能举】傥可从我归沙头驻鸣橈【用乘桴之意明叔家真本作沙头其家云山谷元约明叔同住荆南之沙头故云尔今本作江头非是韵书云橈所以进舟也】山围少天日狐鬼能作妖睒闪载一车猎人用鸣梟【刘禹锡诗山围故国周遭在杜牧阿房宫赋覆压三百余里隔离天日说文曰狐妖兽鬼所乘退之诗狐鸣梟噪争署置跳狼睒闪相妩媚易睽卦曰见豕负涂载鬼一车梟亦妖鸟猎狐者当用鹰隼今乃用梟以言小知浅陋】小智窘流俗蹇浅不能超【庄子曰大智闲闲小智间间贾谊曰小智自私贱彼贵我孟子曰同乎俗】

流合乎污世庄子又曰敝精神于蹇浅世说注曰时谓王戎未能超俗也】安得万里沙晴天看射鵰【史记汉武帝纪乃祷万里沙注曰沙径三百余里汉书李广传曰见匈奴三人与战广曰是必射鵰者也注云鵰大鸷鸟故使善射者射之又北史斛律光传邢子高曰此射鵰手也此借用以言所见广远】

元之如砥柱大年若霜鹗【王禹偁字元之见前注杨亿字大年建安人年十一举神童事真宗为内翰立朝蹇谔刘禹锡诗世道剧颓波我心如砥柱山谷为杨明叔书魏郑公砥柱铭尝引此语又有一跋遗王观复曰余观砥柱之峙中流閱颓波之东注有似乎君子士火夫立于世道之风波可以托六尺之孤寄百里之命不以千乘之利而夺其人节则可以不为此石羞矣按书禹贡注曰砥柱山名河水分流包山而过山见水中若柱然後汉孔融荐祢衡曰鸷鸟累百不如一鹗使衡立朝必有可观其语本出于史记赵简子朝野金载苏味道高爽张元一曰苏如九月得霜鹗】王杨立本朝与世作郭郭【孟子曰立乎人之本朝法言曰虐政虐世然後知圣人之为郭郭此借用言其忠义为世大闲隐然如城郭也】观公有胆气自可继前作【退之送张道士诗曰臣有胆与气又云自笑平生夸胆气】丈夫存远大胸次要落落【左传曰君子务知远者大者庄子曰喜怒哀乐不入于胸次後汉耿弇传注曰落落犹疏阔也】

虚心观万物险易极变态【非笃实之士鲜不以夷险而易操虚心者观之真伪了然老子曰虚其心实其腹又曰万物并作吾以观其後系辞曰卦有小大辞有险易变态见前注】皮毛剥落尽惟有真实在【马祖问药山子近日见处作麼生药云皮肤脱落尽惟有一真实按涅槃经云如大村外有娑罗林中有一树先林而生足一百年是时林主灌之以水随时修治其树陈朽皮肤枝叶悉皆脱落惟真实在山谷与王子飞书亦云老来枝叶皮肤枯朽剥落惟有心如铁石益厌俗文密而意疎也】侍中乃珥貂御史则冠豸【应劭汉官仪云侍中冠武弁大冠加金璫附蝉为文貂尾为饰谓之貂蝉选诗云七叶珥汉貂胡广汉官仪云御史四人持书皆法冠一名柱後一名獬豸冠】照影或可羞短蓑钓寒濑【不称其服则顾影自羞宁蓑笠而无愧也退之诗峩峩进贤冠耿耿水苍佩服章岂不好不与德相对顾影听其声頽顔汗渐背太白诗三事或可羞匈奴晒千秋严陵濑见前注】私柏生涧壑坐閱草木秋【选诗曰郁郁涧底私礼记季秋之月草木黄落】金石在波中仰看万物流【金石见前注】抗脏自抗脏伊优自伊优【後汉赵壹歌曰伊优北堂上抗脏倚门边注云伊优屈曲佞媚之貌抗脏高亢婞直之貌言佞媚者见亲婞直者见弃】但观百岁後传者非公侯【夷齐景公是也】

老作同安守蹇足信所便【同安郡即舒州山谷以足疾故便于外郡有辞免吏部员外郎状曰重以累年脚疾拜起艰难全不堪事文选谢宣远诗四達虽平直蹇步愧无良李善注引左传曰孟縶之足不良于行又谢灵运诗曰拙疾相倚薄还得静者便老杜诗遭乱到蜀江卧痾遣所便】胸中无水镜敢当吏部铨【东坡诗道人胸中水镜清按蜀志龐绕传注司马德操为水镜晋书乐广传卫瓘曰此人之水镜也见之莹然唐书百官志曰吏部尚书以三铨之法官天下之材时山谷以疾辞吏部郎之召】恨此虚名在未脱世糾纏【文选古诗曰虚名复何益贾谊鵬赋曰祸之与福何异糾纏注云如纠绞绳索用附会也纏索也音墨此云糾纏特用其意耳】梦作白鸥去江南水如天【庄子曰且汝梦为鸟而厉乎天梦为鱼而没于渊南

史梁忠烈世子方等传尝着论曰吾尝梦为鱼因化为鸟方其梦也何乐如之反其觉也何忧斯类柳子厚诗洞庭春尽水如天山谷旧有和谢师厚诗云梦作白鸥去江南水黏天又作演雅云江南春尽水如天中有白鸥间似我亦此意也】

次韵石七三六言七首

从来不似一物妄欲贯穿九流【传灯录南岳怀禅师传六祖曰什麼物恁麼来师曰说似一物即不中後汉班彪传曰司马迁贯穿经传至广博也班固传曰博贯载籍九流百家之言无不穷究汉书艺文志曰诸子十家其可观者九家而已盖不数小说家也谓儒道陰阳法名墨纵横杂农凡九家谷梁序曰九流分而微言隐】骨硬非黄合相眼青见白苹洲【骨硬谓如虞翻骨体不媚也退之诗岂是虞翻骨相屯王介甫松诗天骨老硬无皮肤卫宏汉仪丞相听事合曰黄阁柳惲诗汀洲采白苹日落江南春柳子厚寄卢衡州诗非是白苹洲畔客还将远意问潇湘】

生涯一九节筇老境五十六翁不堪上补黼黻但可归教儿童【真诰曰杨羲梦蓬莱仙人拄赤九节校而视白龙元符三年山谷年五十六王羲之传犹欲教子孙以敦厚退让】

万里草荒先垄六年虫蠹羣经【柳子厚谪永州与许孟容书曰先墓在城南无异子弟为主惧便毁伤松柏刍牧不禁以成大戾家有赐书三千卷尚在善和里旧宅宅今已三易主存亡不可知者】老喜寬恩放去心似惊波不停【言归心如流也西京赋曰散似惊波刘禹锡诗流水淘沙不暂停前波未灭後波生】

为君试讲古学此事可賤天公君看花梢朝露何如松上霜风【鲁论曰学之不讲是吾忧也又曰古之学者为己苏子美爱爱歌曰此乐亦可賤天公賤天公见前注谓可质诸天地下两句言古学之有根本如经霜之松与浥露之花固自不同也谢灵运诗花上露犹泫】

幽州已投斧柯崇山更用忧何【言大姦已诛余党不足忧时宰相章惇安置潭州书曰流共工于幽州放驩兜于崇山又曰何忧乎驩兜按後汉冯勤传帝赐侯霸玺书曰崇山幽都何可偶黄钺一下无处所注云钺斧也所以戮人魏都赋曰萧斧戢柯以柙刃盖言不用也】且喜龚邹冠豸又闻张董上坡【实录元符三年三月龚夬为殿中侍御史邹浩为右正言四月张舜民为右谏议大夫董敦逸为左谏议大夫夬字彦和浩字志完舜民字耘叟皆着直声冠豸见前注李宗谔先公谈录云唐谏议大夫班在给舍上一迁为给事再迁为中书舍人有自他官为谏议者班给舍上故班中戏语曰饶他上坡却须下坡言迁给舍班复在下也】

看着庄周枯槁化为胡蝶翩轻人见穿花入柳谁知有体无情【此篇山谷自道老杜诗穿花蛺蝶深深见韵书云翩翩小飞也荀子曰喜则轻而翩庄子曰有人之形无人之情有人之形故羣于人无人之情故是非不得于身】

欲行水遶山围但闻鲲化鹏飞【上句言未即出蜀下句言迁除者衆孟郊诗山水千万遶中

有君子行刘禹锡诗山围故?周遭在】女忧鬓髮尽白兄叹江船未归【山谷女嫁李德素之子去华文伯时在淮南舒州兄谓元明退之书曰两鬓半白头髮五分亦白其一老杜诗独立见江船】

万州太守高仲本宿约游岑公洞而夜雨连明戏作二首

肩輿欲到岑公洞正怯冲泥傍险行【老杜诗虚疑皓首冲泥怯】定是岑公闕清境春江一夜雨连明【柳子厚石潭记曰以其境过清不可久居乃记之而去刘禹锡含辉洞述曰先是斯境翳于榛薄闕其清光有待而发】

蓬葱高卧雨如绳恰似糟牀压酒声【老杜诗赖知禾黍收已觉糟牀注】今日岑公不能饮吾侪闻健且频倾【乐天诗闻健偷闲且勤饮又云园林亦要闻闲置其义犹今人言闻早也】

万州下岩二首【并序】

万州之下岩唐末有刘道者定州无极人闻道于云居膺禅师为开岩第一祖法号道微自凿石龕曰死便藏龕中不用日時門人奉其命二百年矣来游者题诗不可胜读莫能起此开岩者故予作二篇表见之其一用杨子安韵共一用王定国韵

空岩静发钟磬响古木倒挂藤萝昏【老杜诗翠木苍藤日月昏】莫道苍崖锁灵骨时应持鉢到诸村【言至人隐显不可测传灯录渐原在石霜覓先师灵骨金刚经曰世尊食时着衣持鉢入舍卫大城乞食】

寺古松楠老岩虚塔庙开【法华经曰各起塔庙高千由旬】僧缘蚕麦去官数荔支来【上句言僧徒趁熟乞食下句言寺有荔支为官所榷汉书昭帝纪诏曰往年灾害多今年蚕麦伤】石室无心骨金铺称意苔【司马相如长门赋曰挤玉户以撼金铺注云以金为门之铺首王介甫诗荷花称意红】若为刘道者拽得鼻头回【传灯录石巩禅师传一日在?作务次马祖问曰作什麼曰牧牛祖曰作麼生牧曰一回入草去便把鼻孔拽来祖曰子真牧牛师便休去山谷借用意谓山野残僧不遵轨辙安得道者复生鞭绳之也若为犹言如何古乐府隔谷歌曰食粮乏尽若为活】

又戏题下岩

往往携家来托宿裙襦参错佛衣巾未嫌满院油头臭蹋破苔钱最恼人【言儿女子混杂污此净坊也庄子曰未解裙襦文选谢灵运诗临圻阻参错东坡记□公诗云满院秋光浓欲滴老僧倚杖青松侧只怪高声问不膺嗔余踏破苍苔色文选沈休文诗宾阶绿钱满客位紫苔生按崔豹古今注苔藓一名绿钱】

戏题巫山县用杜子美韵【老杜有巫山题壁诗即此韵所谓卧病巴东久今年强作归是也】

巴俗深留客吴依但忆归直知难共语不是故相违【老杜诗翠栢深留景类篇曰依我也吴语东坡乐府曰语音犹自带吴依难其语谓夷俗之陋老杜亦有夔州戏作云异俗可吁怪斯人难并居鲁论曰互乡难与言老杜诗杖藜妨跃马不是故离羣又诗请公临深莫相违按左传曰非相违也而相从也按巫山石刻巴俗深留客作殊亲我吴依但忆归但作暂字】东县闻铜臭江陵换袷衣【旧见山谷跋云铜臭乃退之照壁喜见蝎之意盖过巫山用铜钱也按巫山江上有二石俗谓之铜钱铁钱堆盖与归州巴东县相接荆夔自此分界後汉崔寔传曰从见烈入钱五百万得为司徒其子钩曰论者嫌其铜臭江陵即荆南山谷度至此时已初夏矣潘岳秋兴赋曰藉莞蒻御袷衣注云袷衣无絮也音古洽反】丁宁巫峡雨慎莫暗朝晖【汉书谷永传注云丁宁谓再三告示巫峡雨见前注老杜诗久雨巫山暗朝晖谓神女宋玉神女赋曰其始来也耀乎若白日初出照屋梁文选日出东南隅行曰扶桑升朝晖】

和王观复洪驹父谒陈无已长句【王蕃字观复沂公之裔官阆中时多以书从山谷问学至是自京师来会山谷于荆州洪驹父字驹父山谷之甥也陈无已元符三年冬为秘书正字】

陈君今古焉不学清渭无心映泾浊【鲁论子贡曰夫子焉不学而亦何常师之有泾渭见前注退之诗清沟映污渠】汉官旧仪重九鼎集贤学士见一角【上句并见前注意谓无已有前辈典刑足为士林之重下句言无已人中之瑞世所罕有老杜诗集贤学士如堵墙观我落笔中书堂北史文苑传序曰学者如牛毛成者如麟角春秋感精符曰麟一角明海内共一主也】王侯文采似於菟洪甥人间汗血驹【并见前注】相将问道城南隅无屋正借船官居【老杜诗仙老暂相将庄子黄帝见广成子曰敢问至道之精南史张融传武帝问融住在何处答曰陆处无屋舟居无水後融从兄绪言融未有居止权牵小船于岸上住帝大笑汉书地理志京兆有船司空注曰本主船之官遂以为县世说陶公作荊州时敕船官悉录锯木屑【有书万卷绕四壁樵苏不爨谈至夕【文选应休琰书曰幸有远生时步玉趾樵苏不爨清谈而已谈至夕见前谈至暮注】主人自是文章伯邻里颇怪有此客【老杜诗海内文章伯湖边意绪多晋书谢安传桓温问左右颇尝见我有如此客不】食贫各仕天一方佳人可思不可忘【诗曰三岁食贫选诗曰各在天一方按汉书西域传乌孙公主歌曰吾家嫁我兮天一方世说谢太傅云安比见之乃不使人厌然出户去不复使人思此反而用之诗曰有匪君子终不可谖兮注云谖忘也】河从天来砥柱立爱莫助之涕淋浪【言无已独立于颓波之间惜其不能助之也汉张骞寻河源与银河相连属故曰河从天来王介甫诗老工取河天上落砥柱见前注烝民诗曰维仲山甫举之爱莫助之楚词曰攀茹蕙以掩涕兮沾余襟之浪浪稽叔夜琴赋曰纷淋浪以流离】

以古铜壺送王观复

随俗是汨没从公常纠纷【子虚赋曰交错纠纷】我观王隆化入菰不改薰【隆化隶南平军左传曰一薰一菰十年尚犹有臭注云薰香草菰臭草此引用言观复不为从俗及作吏所

移】未见蛇起陆已看豹成文【陰符经曰龙蛇起陆豹成文见前注】爱君古人风古壶投赠君【魏志毛玠传太祖以素屏风素凭几赐玠曰君有古人之风故赐君古人之服】酌酒时在傍可用弭楚氛【楚氛喻俗恶之气左传曰楚氛甚恶周礼小祝弥裁兵注云弥读日救救安也按弭与弥同】问君何以报直谅与多闻【文选四愁诗曰美人赠我金错刀何以报之英琼瑶鲁论曰益者三友友直友谅友多闻】

病起荆江亭即事十首

翰墨场中老伏波【选诗云粲粲翰墨场後汉刘尚击五溪蛮伏波将军马援年六十二据鞍顾盼以示可用乐天诗曰政事堂中真宰相制科场里旧将军柳子厚献弘农公诗锋摇翰墨场】菩提坊里病维摩【华岩经佛在菩提道场始成正觉涅槃经云造僧坊招提则生不动国维摩经曰毗耶离城中有长者名维摩诘其以方便现身有病两句皆山谷自道】近人积水无鸥鹭时有归牛浮鼻过【文选魏都赋曰回渊濯积水深老杜诗年衰鸥鹭羣北梦琐言陈咏诗曰隔岸水牛浮鼻渡傍溪沙鸟点头行此本陋句一经妙手神彩顿异山谷此句当有所指或云运判陈举颇以为憾其後遂有宜州之行】

维摩老子五十七【山谷生于庆历五年乙酉逮建中靖国元年辛巳五十有七】大圣天子初元年【退之序天子大圣是岁正月徽考初改元建中靖国宋庠纪年通谱于汉文帝後元元年注曰班固追书後字以别初元老杜诗云扈跸上元初亦谓肃宗之初元年也】传闻有意用幽侧病着不能朝日边【文选沈约思幸论曰明扬幽侧唯才是与注引尚书曰明明扬侧陋老杜诗朝覲从容问幽侧勿云江汉有垂纶又云明光起草人所羨肺病几时朝日边日边用幼童传中晋明帝语晋书亦载其事具前注山谷辞免吏部员外郎状曰臣到荆南即苦痲疽发于背胁今方少溃欲乞除臣江淮一合入差遣】

禁中夜半定天下【元符三年正月己卯哲庙上昇黎明钦圣太后石徽考自端邸入立大策先定于禁中矣後汉安帝纪曰太后定策禁中其夜使邓骘迎帝苏子由作宣仁謚册文策自中定与天为谋大抵亦此类也】仁风义气彻修门【後汉肃宗诏曰仁风翔于海表威霆行乎鬼区礼记乡饮酒曰此天地之义气也宋玉招魂曰魂兮归来八修门些注修门谓郢城门也按今江陵县故楚郢都之地山谷适寓此邦因以寄意迁客客皆得归无复屈原沈湘之叹也】十分整顿乾坤了【老杜洗兵马行整顿乾坤济时了】复辟归来道更尊【元符三年正月钦圣权同处分军国事七月归政下书曰皇帝圣智日跻万几益习况山陵营奉就绪引发有期或不知止则岂不蹈古人所戒而失复子明辟之义哉老子曰道之尊德之贵莫之爵而常自然】

成王小心似文武【诗曰维此文王小心翼翼老杜洗兵马行成王功大心转小盖指唐之成王非周成王山谷此句语同而意异专以成周比徽庙也】周召何妨略不同【汉书孙宝传曰周公上圣召公大贤犹有不相说着于经典两不相损今每有一事羣臣同声得无非其美者】不须要出我门下实用人材即至公【意欲调停党人也韩退之作柳子厚志曰诸公贵人争欲令出我门下退之诗曰得就闲官即至公】

司马丞相昔登庸诏用元老超羣公【哲庙初温公以知陈州过阙拜门下侍郎遂为右仆射书曰畴咨若时登庸诗曰羣公先正】杨绶当朝天下喜【唐书肃宗相杨绶制下士相贺于朝】断碑零落卧秋风【温公在政府一年而薨归葬陕府夏县赐碑额曰清忠粹德绍圣初以监察御史周秩言追所赠官及所赐神道碑额仍磨毁碑文事实录】

死者已死黄雾中【绍圣窜谪诸人如吕大防刘摯梁焘范祖禹皆前死于瘴雾之乡矣老杜诗死者长已矣东汉马后传曰黄雾四塞】三事不数两苏公【微考初政相韩忠彦又相曾布于时苏东坡归自昌化子由归自循州诗曰三事大夫注谓三公】岂谓高才难驾御空归万里白头翁【魏志刘表传注零陵先贤传曰周不疑有异才魏太祖心忌不疑欲除之文帝諫以为不可太祖曰此人非汝所能驾御也汉书车千秋传曰臣尝梦见一白头翁】

文章韩杜无遗恨【此篇属东坡杜牧之诗曰杜诗韩集愁来读似倩麻姑痒处?谓子美退之也老杜诗毫髮无遗憾波澜独老成】草诏陆贄倾诸公【唐书陆贄为德宗学士从狩奉天书诏日数百他学士笔阁不得下而贄沛然有余】玉堂端要真学士【一本作直学士】须得儋州秃鬓翁【昌化即汉儋耳郡唐尝立儋州东坡旧有诗曰张颠醉素两秃翁特用灌夫传中语耳东坡归自岭海鬓髮尽脱】

闭门觅句陈无已对客挥毫秦少游【二君实录也无已名师道少游名观老杜诗云觅句新知律又云挥毫落纸如云烟】正字不知温饱未西风吹泪古藤州【无已坐党废锢既而自棣学除秘书省正字少游自雷州贬所北归至藤州卒于光化亭上初少游梦中作长短句有醉卧古藤陰下之语殆若讖云後汉皇甫规传曰退不得温饱以全命】

张子耽酒语蹇吃闻道颍州又陈州【张文潜素嗜酒晚有末疾建中靖国元年除秘书少监兼史职以御史陈次升言其疾病出知扬州寻改陈州又改颍州老杜诗平生老耽酒世说载头责秦子羽云此数子者或蹇吃无宫商或阉陋希言语唐人薛能诗曰何处避烦忧徐州又许州】形模弥勒一布袋【文潜素肥晚益甚弥明联句诗形模妇女笑传灯录明州布袋和尚形栽腰腮蹇额蟠腹盖弥勒化身也】文字江河万古流【老杜诗云王杨卢骆当时体轻薄为文哂未休尔曹身与名俱灭不废江河万古流】

鲁中狂士邢尚书【吏部尚书邢恕也孟子曰孔子在陈何思鲁之狂士恕为人喜进取故云】本意扶日上天衢【王介甫作韩魏公挽诗曰亲扶日毂上天衢言援立英庙恕附离蔡确妄以策立之功自任诬谤宣仁太后起党锢祸至是以左正言陈瓘论列罢知荆南分司西京均州居住此意用取日虞渊洗光咸池】惇夫若在鑪此老不令平地生崎岖【恕于无事中造出许事可谓平地生崎岖矣恕之子居实字惇夫少有俊声知所慕向计其人必不?父于不义死时才二十七薛宣传曰故使掾平鑪令注谓琢凿也孟郊诗小人智虑险平地生太行文选张平子南都赋曰上平衍而旷荡下蒙笼而崎岖李善注引广雅曰崎岖倾侧也】

邹松滋寄苦竹泉橙麴莲子汤三首【邹永年字天锡其名姓见于山谷所作江陵承天院浮图记松滋县隶江陵府】

松滋县西竹林寺苦竹林中甘井泉巴人漫说虾蟆培试裹春芽来就煎【张又新水记曰扇子峡石中突而泄水独清冷石状如鲈头俗谓之虾蟆石其水煎茶为第一东坡诗忽忆寻蟆培方冬脱鹿裘】

天将金阙真黄色借与洞庭霜後橙【史记曰燕昭王使人求蓬莱方丈瀛洲此三山黄金白银为宫阙洞庭霜见前注老杜诗霜橙压香橘】松滋解作逡巡麴压倒江南好事僧【续仙传殷七七诗曰解醞逡巡酒能开顷刻花江南僧当是山谷自谓压倒见前注】

新收千百秋莲药剥尽红衣捣玉霜【莲药见前注唐人赵嘏诗曰红衣落尽渚莲愁裴铏传奇载樊夫人诗曰一饮琼浆百感生玄霜杵尽见云英黄庭内景经云子丹进饌肴正黄乃曰琅膏及玉霜】不假参同成气味跳珠碗里绿荷香【後汉魏伯阳有周易参同契演丹经之奥旨此借周言不杂以他物乐天诗露荷珠自倾风竹玉相忧晏元献公雨後诗曰裊泪疑疎槿跳珠乱碧荷】

次韵荅黄与迪

和氏有尺璧楚国无人知青山抱国器岁月忽如遗但使玉非石果有遭逢时【韩非子曰楚人卞和得玉璞于楚山献厉王使玉人相之曰石也王以和为谩刖右足及武王即位又献之复相曰石也刖左足及文王即位和乃抱其璞而哭于楚山三日三夜泪尽继之以血王使玉人治之得宝玉焉名曰和氏之璧汉书韩安国传曰唯天子以为国器谷风诗弃予如遗笺云如人行道遗忘物忽然不省存否】吾宗固神秀天乃晚成之【李邕历下亭诗曰吾宗固神秀体物写谋长老子曰大器晚成】兰芳深九畹露味挹三危【家语曰芝兰生于深林不以无人而不芳楚辞曰予既滋兰之九畹注云十二亩为畹吕氏春秋伊尹说汤曰水之美者有三危之露涧酌诗云挹彼注兹】流俗不顾省古人可前追【孟子曰同乎流俗退之韩府君墓志曰崔圆狎爱州民丁某至顾省其家蜀志吕凯传曰古人不难追】胷中凌云赋自贵知音希【汉书司马相如传曰相如既奏大人赋天子大悦飘飘有凌云气游天地之间意文选古诗曰不惜歌者苦但伤知音希】渊源学未浅孝友家正肥【汉书董仲舒赞曰考其师友渊源所渐犹未及乎游夏礼记礼运曰父子笃兄弟睦夫妇和家之肥也】与世殊轨辙三黜理亦宜【吴都赋曰兹乃颠覆之轨辙三黜见鲁论退之诗杀却理亦宜】吴溪浣纱女不用朱粉施【寰宇记载越州会稽县事曰按会稽记县东六里有土城山勾践索美女献吴王得诸暨卖薪女郑旦先习礼于土城山山边有石是西施浣纱石宋玉登徒子好色赋曰东家之子着粉则太白施朱则太赤】岂伊风尘子市门自夸毗【史记货殖传曰刺绣文不如倚市门板诗曰天之方憊无为僂毗注云夸毗以体柔人也】我作僂道囚三年始放归【夸道郎戎州戎今为叙】邂逅终日语贻我五字诗【诗曰邂逅相遇适我愿兮】句如秋雨晴远峯抹修眉【言其高秀选诗曰远峯隐半规退之南山诗天宇浮修眉按西京杂记文君眉色如望远山曹子建洛神赋曰云髻峨峨修眉连娟】老马甘伏枥坐看天骥驰【魏武帝歌曰老骥伏枥志在千里顔延之赭白马赋曰汉道亨而天骥呈才】洒扫清樾下当为果茗期【并见前注】光陰去易失日月转两仪【文选江文通别赋曰明月白露光陰往来汉书韩信传曰时者难得而易失系辞曰易有太极是生两仪疏云不言天地而言两仪指其物体】仲氏

有东园花竹深可依寸步不往来千里常梦思【诗曰仲氏吹簫退之诗寸步难往始知命老杜诗云雨荒台岂梦思太白诗君留洛北方梦思】几时开后户扶策方自兹【刘禹锡诗见拟移居作邻里不论时节请开开又连州谢表曰扶策在道不敢停留文选任彦昇诗湍险方自兹】

次前韵谢与迪惠所作竹五幅

吾宗墨修竹心手不自知【枚乘兔园赋曰修竹檀栾夹池水庄子轮扁曰得之于手而应于心口不能言有数存焉于其间】天公造化炉揽取如拾遗【造化炉见前注汉书梅福传曰举秦如鸿毛取楚若拾遗】风雪烟雾雨荣悴各一时此物抱晚节君又润色之【渊明诗草木有常理霜露荣悴之乐天栽松诗曰爱君抱晚节怜君含直文鲁论曰东里子产润色之】抽萌或发石悬笔有陆危【尔雅曰笋竹萌明弥石鼎联句曰冻芋强抽萌悬箠谓引鞭也前汉食货志贾谊曰安有为天下陆危者若是而上不惊者注云陆音阎欲坠之意】林梢一片雨造次以笔追【鲁论注云造次急遽也东坡作文与可画竹记曰振笔直遂以追其所见】猛吹万籁作微凉大音希【老子曰大音希声柳公权诗殿阁生微凉】霜兔束毫健松烟泛砚肥【法书苑鲍照飞白书铭曰秋毫精劲霜素凝鲜沾此瑶液染彼松烟】盘桓未落笔落笔必中宜【盘桓盖用庄子画史解衣盘礴羸之意易比卦曰盘桓利居贞】今代捧心学取笑如东施【捧心见前注云溪友议朱择嘲郭素诗曰借问东邻效西子何如郭素拟王轩按寰宇记越州诸暨县有西施家东施家】或可遗巾幅选奕如辛毗【汉书杜钦曰恐议者选奕复守和解注云选奕怯懦不前之意晋书宣帝纪帝与诸葛亮对垒朝廷命帝持重以候其变亮遗帝巾幅妇人之饰帝怒表请决战天子不许乃遣辛毗仗节为军师以制之】生枝不应节乱叶无所归【东坡作文与可画偃竹记曰竹之始生一寸之萌耳而节叶具也自蜩腹蛇蚶以至于劒拔十寻者生而有之也今画者乃节节而为之叶叶而累之岂复有竹哉】非君一起予衰病岂能诗【起予见前注老杜诗汤休起我病微笑索题诗】忆君初解鞦新月挂弯眉夜来上金镜坐叹光景驰【鲍明远翫月诗始见西南楼纤纖似玉鉤未映东北墀娟娟似蛾眉李贺诗长眉对月鬬弯环太白诗月上飞天镜曹子建箜篌行曰光景驰西流】我有好东绢晴明要会期【老杜双松图歌曰我有一匹好东绢重之不减锦绣段已令拂拭光凌乱请公放笔为直干乐天诗曰晴明好天气後汉书蔡琰诗曰念别无会期按战国策魏文侯曰岂可不一会期哉】猗猗淇园姿此君有威仪【淇澳诗曰瞻彼淇澳绿竹猗猗又曰瑟兮僮兮赫兮咺兮注云咺威仪宣着也淇园见前注】愿作数百竿水石相因依【选诗云蒲稗相因依】他年风动壁洗我别後思【唐人李益竹窻闻风寄司空曙诗开门风动竹疑是故人来此用其意文选阮嗣宗诗回风吹四壁渊明送龐参军诗注曰且为别後相思之资退之诗勉率作歌诗慰子别後覽又云宁怀别时苦勿作别後思】开图慰满眼何时遂臻兹【老杜诗君来慰眼前汉书霍去病传曰遂臻月氏司马相如传曰符瑞臻兹】

山谷内集诗注卷十四

山谷内集诗注卷十五

钦定四库全书

山谷内集诗注卷十五 宋 黄庭坚 撰

任渊注

戏简朱公武刘邦直田子平五首

不趋吏部曹中版且鱸高沙湖里鱼【山谷辞吏部郎之命故不持手版以趋省曹渚宫旧事曰王琳为鲋表以刺时有曰高沙老女非有意于罗绮白鲋女儿岂期心于珠翠注云江陵西二十里有高沙湖其中多鱼】虽无季子六国印要读田郎万卷书【史记苏秦传秦过洛阳其嫂谢曰见季子位高金多也秦喟然叹曰使我有洛阳负郭田二顷吾岂能佩六国相印乎譙周注秦字季子三辅决录注曰田凤为尚书郎容仪端正灵帝目送之回题柱曰堂堂乎张京兆田郎此借用以属子平】

欢伯可解藜藿嘲孔方定非金石交【欢伯藜藿皆见前注汉书扬雄有解嘲此借用晋书鲁褒钱神论曰亲之如兄字曰孔方金石交亦见前注】君看刘郎最多智昨者火事几焚巢【言祸患之来非智虑所及况贫富有定数安可以智力求之耶刘郎谓邦直刘禹锡诗曰前度刘郎今又来此借用魏志武帝纪注魏书曰曹公非有四目两口但多智耳维摩经曰火事如故而不为害易旅卦之上九鸟焚其巢旅人先笑後号咷】

刘郎好诗又能文方我奔窜义甚敦【奔窜谓赴黔中时取道荆南此诗盖追记往事也文选曹子建诗曰亲交义在敦退之江汉答孟郊诗云嗟我与夫子此义每所敦】为亲未葬走人门闭门却扫不足论【为亲之故未免俯仰世间此外皆不足道闭门却扫可也文选江文通恨赋曰至乃敬通见抵罢归田里闭关却扫塞门不仕李善注引司马彪续汉书曰赵壹闭门却扫非德不交】

朱家坝簾好兄弟陋巷六经葵苋秋【诗曰伯氏吹埙仲氏吹篪】我卜荆州三亩宅读田家书从之游【楚词屈原有卜居篇东坡诗?我试寻三亩宅从公已恨十年迟王介甫作杜甫画像诗云愿起公死从之游按文选沈休文诗所愿从之游寸心于此足退之送诸葛觉诗云今子从之游学问得所欲】

朱公趋朝瘦至骨归来豪健踞胡牀日看省曹阁者面何如田家侍儿妆【列子曰子贡七日不食以至骨立晋书桓伊传下车踞胡牀作三调田家侍见盖纪实事见下水仙花注】

次韵益修四弟【黄友益字益修侍御史昭之第三子也】

霜晚菊未花节物亦可嘉【文选陆士衡古诗踟蹰感节物我行已永久】欣欣登高侣畏雨占暮霞【山谷自注谚云朝霞不出门暮霞行千里○汉书登高能赋可为大夫费长房九日登高饮】楚人醖菘豆轻碧自相夸【山谷时在荆州荆州即楚地故後诗有渚宫之句谓以菘豆为麴而酿酒也其色清碧今人谓之竹光酒云】老夫不举酒咽咽鸣两车【黄庭经曰口为玉池太和官咽灵液灾不干两车谓颊车也左传曰辅车相依】良辰与美景客至但成嗟【文选诗灵运拟魏太子邺中集诗序曰天下良辰美景赏心乐事四者难并渊明九日闲居诗序云余闲居爱重九之名秋菊盈园而特醪靡由空服九华寄怀于言】

以峡州酒遗益修复继前韵

令节不把酒新诗徒拜嘉【退之聽弹琴诗序曰肇置三令节诏羣有司饮酒以乐按旧唐书贞元四年诏正月晦日三月三日九月九日三节日任百僚追赏为乐退之诗把酒对南山左传曰敢不拜嘉】颇忆宋玉赋登高气成霞【宋玉有高唐神女赋登高见前注气成霞言文章之气蔚然如此荆州盖楚地而宋玉楚人固因九日登高遂及此事曹子建七啓曰慷慨则气成虹蜺蜀都赋曰舒丹气而为霞】渚宫但衰柳朝云为谁夸【杜佑通典曰江陵县有楚渚宫朝云见宋玉高唐赋已具前注云】吾宗怀古恨流涎过麴车一壶浇往事聊送解愁嗟【解一作耐李邕诗吾宗固神秀东京赋曰望先帝之旧墟慨长思而怀古老杜歌曰道逢麴车口流涎又诗吟诗解叹嗟谢灵运诗三江事多往】

谢益修四弟送石屏

石似沧江落日明鸛鵒乌鵒满沙汀小儿骨相能文字乞与班班作硯屏【文选任彦昇诗沧江路穷此老杜诗山头落日半轮明又诗鸛鵒西日照○麴满鱼梁尝见山谷在荆州与檀敦札帖乞硯山欲与同惜试睟且云同惜知命幼子小字也此诗所指岂此郎耶骨相见前注】

戏答王观复醖醖菊二首

谁将陶令黄金菊幻作醖醖白玉花小草真成有风味东园添我老生涯【小草见前注】

吕园未肯轻沽我且寄田家砌下栽他日秋花媚重九清香知自故人来【山谷在荆州与欧阳元老帖曰城东吕氏园竹木已老又寬敞有经行之地甚欲得之然托人往问语辄再三难共语也又有与人帖云檀敦礼惠兰数本皆煜煜成丛但不花耳方送田子平家培植之○鲁论曰求善贾而沽诸注云沽卖也】

戏答王子予送凌风菊二首

病来孤负鸛鵒杓禅板蒲团入眼中【太白诗鸛鵒杓鸛鵒杯传灯録龙牙禅师传师在翠微时问如何是祖师意翠微曰与我过禅板来师遂过禅板翠微接得便遂又问临济如何是祖师意临济曰与我过蒲团来师送过蒲团临济接得便打老杜诗江村野堂争入眼】浪说闲

居爱重九黄花应笑白头翁【闲居重九见前注下句大似东坡诗人老簪花不自羞花应羞上老人头之意】

王郎颇病金瓢酒不耐寒花晚更芳瘦尽腰围怯风景故来归我一枝香【晋书王导传周顗曰风景不殊举目有河山之异春秋书郑伯使宛来归祊又书齐人归我济西田】

谢王子予送橄榄

方怀味谏轩中果忽见金盘橄榄来【元注云戎州蔡次律家轩外有余甘余名之曰味谏轩味谏言余甘初苦而终有味南史刘穆之传以金柈贮槟榔一斛橄榄见下注】想共余甘有瓜葛苦中真味晚方回【陈藏器本草曰庵摩勒人食其子先苦後甘故曰余甘晋书王说传导之子也导与奕棋争道笑曰相与有瓜葛那得为尔耶欧阳公诗又如食?橄真味久愈在东坡橄?诗云待得微甘回齿颊已输崖蜜十分甜】

以椰子小冠送子予

浆成乳酒醺人醉肉截鹅肪上客盘有核如匏可雕琢道装宜作玉人冠【交州记曰椰子中有浆饮之得醉图经本草曰椰子出岭南州郡实大如瓠殼圆而坚里有肤至白如猪肪厚半寸许味亦似胡桃肤里有浆如乳饮之冷而气醺老杜诗小瓶乳酒下青云退之诗鹅肪截佩璜】

呈杨康国

君家秋实罗浮种已作累累半拂墙莫遣儿童酸打尽要看霜後十分黄【韩诗外传云秋得食其实刘桢书曰忘家丞之秋实唐卢氏杂说云明皇德宗僖宗幸蜀年浙西奏罗浮山柑子皆不结子此甚异也按太湖中亦有罗浮山老杜诗儿童莫信打慈鴟】

又戏呈康国

整冠行客莫先尝杨子家无数仞墙假借肃霜令弄色句添寒日与争黄【古乐府曰君子防未然不处嫌疑闲瓜田不纳履李下不整冠幽诗曰九月肃霜老杜诗柳条弄色不忍见句添盖黄冶家语云】

次韵马荆州【马城字中玉】

六年絶域梦刀头判得南还万事休【山谷谪黔戎凡六年汉书耿育上书讼陈汤曰讨絶域不羁之君古乐府云何当大刀头破镜飞上天吴兢解题云刀头有环问何时当还也梦刀头借用王濬梦三刀事柳子厚诗曰一生判却归休谓着南冠到头刘禹锡诗黄髮相看万事休】谁谓石渠刘校尉来依绦帐马荆州【汉书刘向传经论五经于石渠元帝时废十余年成

帝以向为中垒校尉山谷自馆阁?贬故用以自况後汉书马融传曰桓帝时为南郡太守又曰常坐高堂施绛帐前授生徒後列女乐按南郡即今荆南】霜髭雪鬓共看镜茱糝菊英同送秋他日江梅腊前破还从天际望归舟【老杜有江梅诗云梅糝腊前破梅花年後多谢朶诗中办江树天际识归舟中玉维揚人官当满明年之冬道出当涂于时山谷已赴太平州矣故有望归舟之语山谷绍圣初跋关中雪景图曰维揚马中玉观于上蓝寺】

和中玉使君晚秋开天宁节道场

江南江北尽云沙车骑东来风旆斜倒影楼台开紫府得霜篱落賸黄花【文选谢灵运诗江南倦历览江北旷周旋汉书司马相如传曰时从车骑雍容闲雅倒影见前注退之诗青春白日映楼台荆南有紫府观抱朴子曰项曼都自言到天上过紫府乐府卢思道神仙篇曰云轩游紫府风飏立丹梯礼记月令季秋之月菊有黄华渊明诗采菊东篱下抱朴子曰葛洪篱落顿缺】钓溪筑野收多士航海梯山共一家【尚书中候曰吕望即磻溪水钓其涯得玉环书曰说筑传岩之野诗曰济济多士後汉书梯山栈谷望风弭从文选顔延年曲水诗序曰栈山航海踰沙?幕之贡礼记曰圣人耐以天下为一家】想见星坛祝尧寿步虚声里静无譁【孟郊诗囚怪星宿坛按南斗经曰修设两极二斗同醺一坛各象斗星庄子曰尧观于华封华封人曰嘻圣人请祝圣人使圣人寿本事诗许浑诗曰天风吹下步虚声按吴兢乐府解题曰步虚词道观所唱备言衆仙缥缈轻举之美书曰嗟人无譁】

入穷巷谒李材叟翹叟戏赠兼简田子平三首

紫冠黄钿网丝窠蝶绕蜂围奈晚何【元注云紫冠鸡冠黄钿黄菊○集韵元钿金花饰也音田又音电退之城南联句云丝窠扫还成】二叟家居如避世开门自少俗人过【用退之竹洞诗意】

只可阒中安止止谁能铁里鬪铮铮田多谷少无人会譬似无田过一生【庄子曰瞻彼阒者虚室生白吉祥止止後汉书刘盆子传徐宣等叩头曰今日得降犹去虎口归慈母光武曰卿所谓铁中铮铮庸中佼佼者也北梦琐言冯藻应二十五举姻亲劝令罢举求官藻曰譬如一生无成更应五举乐天诗譬如原是九江人】

田郎杞菊荒三径文字时追二叟游万卷藏书多未见老夫端拟乞荆州【陆龟蒙有杞菊赋田子平荆南人其家多书未见书具前注南史王僧孺聚书至三万卷】

次韵答马中玉三首

雨入纱窗风簸船菊花過後早梅前锦江春色熏人醉也到壶中小隐天【老杜诗浪簸船应折杯乾瓮即空又云锦江春色来天地壶中见前注文选王康琚诗曰小隐隐陵薮大隐隐朝市太白诗壶中别有日月天山谷时旅寓沙市故有小隐之句】卷沙成浪北风颠衔尾千艘不敢前匝岸水居皆有酒行人得意买江天【刘禹锡诗卷起沙滩似雪堆老杜诗晓来急雨

春风颠汉书武帝纪曰舳舻千里注云言其船多前後相衔东坡乐府曰船尾冻相衔文选王仲宣诗连舫踰万艘西京杂记滕公马不肯前老杜诗藩篱无限景恣意买江天】

仁气已蒸全楚尽同云欲合暮江前争春梅柳无三月对雪樽罍属二天【上句以指中玉仁气见礼记乡饮酒孟浩然洞庭诗气蒸云梦泽波撼岳阳城诗曰上天同云雨雪雰雰老杜诗天边梅柳树相见几回新二天见前注】

次韵中玉早梅二首

梅蕊争先公不嗔知公家有似梅人何时各得自由去相逐扬州作好春【庄子曰见似人者而喜老杜诗东阁官梅动诗兴还如何逊在扬州此时对雪还相忆送客逢花可自由乐天诗好作开成第二春】

折得寒香不露机小窗斜日两三枝罗帏翠幕深调护已被游蜂圣得知【此诗亦似戏中玉之歌舞者李贺将进酒曰罗帐绣幕围春风汉书张汤传调护之尤厚退之盆池诗夜半青蛙圣得知】

次韵中玉水仙花二首

借水开花自一奇水沈为骨玉为肌暗香已压酴醾倒只此寒梅无好枝【汉书吴王濞传曰亦一奇也老杜诗秋水为神玉为骨退之马少监墓志曰肌肉玉雪可怜压倒见前注水仙丛生故云无好枝】

淤泥解作白莲藕粪壤能开黄玉花可惜国香天不管随缘流落小民家【元注云时闻民间事如此○柳子厚诗粪壤擢珠树莓苔插琼英左传曰兰有国香人服媚之秦少游乐府亦有恼杀人天不管之句○此诗盖山谷借以寓意也按高子勉所作国香诗序云国香荆渚田氏侍儿名也黄太史自南溪召为吏部副郎留荆州乞守当涂待报所居即此女子隣也太史偶见之以为幽闲姝美目所未覩後其家以嫁下俚贫民因赋此诗以寓意俾予和之後数年太史卒於岭表当时宾客云散此女既生二子矣会荆南岁荒其夫鬻之田氏家田氏一日邀予置酒出之掩抑困悴无复故态坐间话当时事相与感叹予请田氏名曰国香以成太史之志政和三年春京师会表弟汝阴王性之问太史诗中本意因道其详乃为赋之诗曰南溪太史还朝晚息驾江陵颇从欸彩毫曾咏水仙花可惜国香天不管将花托意为罗敷十七未有十五余宋王门墙纒贵从蓝桥庭户怪贫居十年目色遥成处公更不来天上去已嫁邻姬窈窕姿空传墨客殷懃句闻道离鸾别鹤悲藁砧无赖鬻蛾眉桃花结子风吹後巫峡行云梦足时田郎好事知渠久酬赠明珠同石友憔悴犹疑洛浦妃风流固可章台柳宝髻犀梳金凤翘樽前初识董娇饶来迟杜牧应须恨愁杀苏州也合销却把水仙花说似猛省西家黄学士乃能知妾妾当时悔不书空作黄字王子初闻话此详索诗裁与漫凄凉只今驱豆无方法徒使田郎号国香此诗和者甚衆故并録之】王充道送水仙花五十枝欣然会心为之作咏

凌波仙子生尘袜水上轻盈步微月【洛神赋曰凌波微步罗袜生尘此云微月盖言袜如新月之状诗曰彼月而微】是谁招此断肠魂种作寒花寄愁绝【招魂见前注陶渊明九日闲居诗寒华徒自荣老杜北风诗愁绝付摧枯】含香体素欲倾城山矾是弟梅是兄【应劭汉官仪尚书郎含鸡舌香此借用渊明诗曰君其爱体素倾城见汉书李延年歌已具前注山矾即?花山谷律诗叙述颇详】坐对真成被花恼出门一笑大江横【老杜诗江上被花恼不彻无处告诉只颠狂山谷在荆州与李端叔帖云数日来骤暖瑞香水仙红梅皆开明窗静室花气撩人似少年都卜梦也但多病之余嬾作诗尔山谷时寓荆渚沙市故有大江横之句老杜诗鸡虫得失无了时注目寒江倚秋阁山谷句意类此】

吴君送水仙花并二大本

折送南园栗玉花并移香本到寒家何时持上玉宸殿乞与宫梅定等差【魏文帝与钟繇玉诀书曰黄伴烝栗唐书礼乐志康崑仑奏琵琶于玉宸殿按宋次道东京记後苑有玉宸殿山谷所指当谓此宋书曰武帝女寿阳公主人日卧于含章檐下梅花落额上成五出之花自後有梅花状诗人用宫梅事盖取此也退之李花诗长姬香御四罗列缟裙练帨无等差此反其意按汉书游侠传序曰卿大夫以至于庶人各有等差】

刘邦直送早梅水仙花四首

簸船綈?北风嗔霜落干林憔悴人欲问江南近消息喜君贻我一枝春【簸船见前注綈音争仪礼士丧礼注曰綈读为?屈也江沔之间谓萦收绳索为?荆州记陆凯与范蔚宗相善自江南寄梅花一枝诣长安与范并赠诗曰折梅逢驿使寄与陇头人江南无所有聊赠一枝春】

探请东皇第一机水边风日笑横枝鸳鸯浮弄婣娟影白鹭窥鱼凝不知【探请盖俗语犹言预借东坡尝有六言诗探支八月凉风又有乐府曰探借今年三月暖楚词有东皇太一云门问卧龙长连牀上学得是第几机龙曰第二机门云作麼生是第一机龙曰紧峭草鞋林逋梅诗雪後园林才半树水边篱落忽横枝集韵凝音牛孕反止水也又结固也又蒸勺】得水能仙天与奇寒香寂寞动冰肌仙风道骨今谁有淡扫蛾眉簪一枝【太白大鹏赋序曰余昔于江陵见天台司马子微谓余有仙风道骨可与神游八极之表今借用老杜诗却嫌脂粉污颜色淡扫蛾眉朝至尊乐府沈约江南曲曰堕马碧玉簪集韵簪音作紺切缀也】

钱唐昔闻水仙庙荆州今见水仙花暗香静色撩诗句宜在林逋处士家【元注云钱塘有水仙王庙林和靖祠堂近之东坡先生以为和靖清节映世遂移神像配食水仙王云○处士名逋字君复居钱塘西湖孤山有诗名于咸平景德间既死謚和靖先生所作梅诗有疎影横斜水清浅暗香浮动月黄昏之句为世传诵王介甫诗云物华撩我有新诗】

谢檀敦信送柑子

色深林表风霜下香着尊前指爪间书後合题三百颗频随驿使未应慳【文选谢朓诗林表

吴岫微老杜诗破甘霜落爪米芾书史载石军一帖云奉橘三百颗霜未降未可多得韦应物诗云书後欲题三百颗洞庭更待满林霜谓此也驿使见前注老杜诗玉粒未吾慳】

赠李辅圣

交盖相逢水急流八年今复会荆州【言卒然相遇不容少停如流波之急也文选乐府诗日中市朝满车马若川流楞严经曰如急流水望如恬静流急不见非是无流也】已回青眼追鸿翼肯使黄尘没马头【上句用稽康诗日送归鸿之意文选陆士衡诗愿假归鸿翼翻飞曲江汜下句谓不复浮沈京洛风尘间也乐天诗舟辞三峡雨马入九衢尘老杜诗马寒防失道雪没锦鞍鞵古乐府日出东南隅行曰黄金络马头】旧管新收几妆镜流行坎止一虚舟【旧管新收本吏文书中语山谷取用所谓以俗为雅也贾谊鹏赋曰乘流则逝得坎则止庄子曰泛若不系之舟虚而遨游者也易曰乘木舟虚刘子虚舟触人人不知怨】相看絶叹女博士笔研管弦成古丘【元注云女博士谓辅圣後房孔君也于文艺无所不能皆妙絶○世说殷中军问刘尹云云一时絶叹以为名通又云袁虎作露布手不辍笔王东亭絶叹其才魏志甄后传后年九岁喜书辄用诸兄笔研兄言当作女博士邪太白诗晋代衣冠成古丘】

和高仲本喜相见

雨昏南浦曾相对雪满荆州喜再逢有子才如不羁马知君心是後凋松【山谷自蜀放还过万州时仲本为太守有约游岑公洞诗万州即唐南浦郡汉书司马迁书曰少负不羁之才论语岁寒然後知松相之後凋】闲寻书册应多味老傍人门似更慵【退之送石洪序曰戒行李载书册班固叙传曰味道之腴乐天诗好是老身消日处谁能骑马傍人家近世卢秉诗云但得有钱留客醉也胜骑马傍人门盖出于此】何日晴轩观笔砚一樽相属要从容【汉书灌夫传夫起舞属田蚡注云属付也音之欲反退之诗一杯相属君当歌战国策曰犀首从容谈三国之相怨】

戏咏煖足瓶二首

小姬煖足卧或能起心兵千金买脚婆夜夜睡天明【邪念忽起甚于用兵不戢之祸退之诗诘曲避语弄冥茫触心兵俗以煖足餅为铁婆老杜诗客睡何曾着秋天不肯明此反而用之又诗天明登前途】

脚婆原不食纒里一衲足天明更倾泻頰面有余燠【书顾命注曰洮盥頰面】

戏呈闻善二兄【黄友闻字闻善侍御史昭之第二子】

匏悬篱落鸦窥井草上堦除雪袞风想得尊前欹醉?浑家儿女笑山公【北史独孤信因猎日暮驰马入城其?微侧诘旦吏人慕信而侧?焉晋书山简传童儿歌曰山公出何许往至高阳池日夕倒载归酩酊无所知时时能骑焉倒着白接?举鞭向葛强何如并州儿南唐近事史虚

诗曰风雨揭却屋浑家醉不知】

次韵闻善

扶醉三竿日题诗一研埃【杜牧之诗醉头扶不起三丈日还高刘禹锡竹枝歌日出三竿春雾消按南齐书永明五年十一月丁亥日出三竿朱色黄色赤晕东坡密州谢上表曰尘埃笔砚惭忘旧学之渊源】张罗门带雪投辖井生苔【汉书郑当时传曰翟公门外可设爵罗门带雪用袁安事见前注汉书陈遵传每大饮宾客满堂辄关门取客车辖投井中老杜诗君不见两时秋井塌古人白骨生青苔如何不饮令心衰东坡诗亦云我如废井久不食古甃缺落生阴苔】待得成丘陇谁能把酒盃【东方朔七谏封比干之丘陇李贺将进酒日劝君莫惜酩酊醉酒不到刘伶坟上土】常应黄菊畔怅望白衣来【檀道鸾续晋阳秋日陶潜九月九日无酒于宅畔菊丛中摘盈把坐其侧久望见白衣人乃王弘送酒即便就酌而後归】

谢答闻善二兄九絶句【此篇大槩以闻善与柳氏兄弟杯酒相失因为开广之闻善盖山谷族人山谷有与闻善帖云久闻?甫伯父负天下大名常恨不见其子孙今乃得识面又与黄顔徒帖云?甫自闽漕以侍御史召按黄氏世谱?甫名昭】

身入醉乡无畔岸心与欢伯为友朋【唐书王绩传曰绩着醉乡记诗曰淇则有岸隰则有泮笺云泮读为畔焦贛易林坎卦之兑曰酒为欢伯除忧来乐】更阑骂坐客星散午过未苏髮鬢髻【蔡琰胡笳曰更深夜阑兮梦汝来思汉书灌夫传曰有诏劾夫骂坐不敬蜀志姜维传曰星散流离死者甚衆切韵曰鬢髻被髮也朋僧二音广灯録僧问祠山守初曰不昧宗乘请师举唱师云头鬢髻耳□腮】

未尝顷刻可去酒无有一日不吟诗诗狂克念作酒圣意态忽如少年时【皇甫湜韩文公神道碑曰未尝一日不对客书曰惟狂克念作圣乐天诗曰不知老将至犹自放诗狂酒诸曰李白每醉为文未尝差误人目为醉圣】

羣猪过饮尚可醉疥手輟瓮庸何伤【晋书阮咸传诸阮皆能饮酒咸至宗人家共集以大盆盛酒时有羣猪来饮其酒咸直接去其上便共饮之曾慥集仙传曰张开光尝与母及弟出游独留姬守舍俄有道士敝衣冠疥癬被体直入裸浴酒瓮中姬不能拒既暮出游归渴甚闻酒芳烈亟就盆中饮姬心恶道士不敢白而但不饮居数日开光与母及弟拔宅而去此事与葛洪神仙传李八百事略问汉书楚元王传曰嫂厌叔与客来阳为羹尽輟釜注云輟音劳輟辄也左传一扶女庸何伤】柳家兄弟太迫窄狂药不容人发狂【文选西京赋增九筵之迫胁五臣注曰迫胁迫窄也晋书裴楷传孙季舒与石崇酣燕慢仿过度崇欲表免之楷曰足下饮人狂药责人正礼不亦乘乎乃止老子曰驰骋田猎令人心发狂】

莫作叫号惊四邻瓮中有地可藏真【荡诗曰式号式呼俾昼作夜北山诗曰或不知叫号此借用乐天诗今宵醉有兴狂咏惊四邻陆羽作怀素传曰饮酒以养性草书以畅志酒酣兴发靡不书之按怀素字藏真此借用言全其天真于酒中高僧传醋头和尚颂揭起醋瓮见天下

天下原来在瓮中瓮中原来有天下】渊明醉握远公手大笑絶倒人不嗔【庐山记远公与陶元亮陆修静谈道不觉过虎溪因相与大笑故作三笑图】

阮籍醉睡不论昏刘伶鸡肋避尊拳【晋书阮籍传文帝欲为武帝求昏于籍籍醉六十日不得言而止刘伶传尝醉与俗人相忤其人攘袂奋拳伶曰鸡肋不足以安尊拳其人笑而止】至今凛凛有生气饮酒真成不愧天【世说庾道季曰廉颇蔺相如虽千载尚凛凛有生气太白诗曰天地既爱酒饮酒不愧天】

公择醉面桃花红人百忤之无愠容【李常字公择南康军建昌人元佑间为户部尚书御史中丞山谷之舅也乐府高阳乐人歌曰何处?觞来两颊色如火自有桃花容莫言人劝我朝野金载张元一嘲武懿宗曰未见桃花面皮谩作杏子眼孔崔护诗人面桃花相映红鲁论曰三已之无愠色】莘老夜阑倾数斗焚香默坐日生东【孙觉字莘老高邮人元佑初为谏议迁给事吏侍擢御史中丞山谷之妇翁也抱朴子曰管辂顿倾三斗而清辩绮粲贯休诗静只焚香坐咏怀悲岁阑退之诗默坐念语笑义诗杲杲寒日生东】

椎牀破面枵触人作无义语怒四邻【玉台新咏焦仲卿妻诗阿母得闻之槌牀便大怒东坡跋老苏送石昌言北使引云彭任闻彦国当使不测之域愤愤椎酒牀拳皮裂南史沈昭略以瓠投徐孝嗣面曰使为破面鬼朝野金载杨廷玉回波词曰阿姑婆见作天子旁人不得枵触陆龟蒙蠹化曰人或枵触之辄奋角而怒维摩经香积品曰是无义语是无义语报】尊中欢伯笑尔辈【西阳杂俎酒日欢伯】我本和气如三春【乐天家醪诗曰饮似阳和满腹春】

陶令舍中有名酒无日不为父老倾四座欢欣观酒德一灯明暗又诗成【渊明饮酒诗序曰偶有名酒无夕不饮顾影独尽忽焉复醉既醉之後辄题数句自娱乐天诗对雪尽寒灰残灯明复灭晋书刘伶作酒德颂】

阮籍刘伶智如海人间有道作糟丘【晋书阮籍传本有济世志属魏晋之际天下多故名士少有全者遂不与世事酣饮为常刘伶见前注本传又云常以细宇宙齐万物为心张彦远名画记云董伯仁乡里号为智海按华严经颂云不动如山智如海南史陈暄传复兄子书曰速营糟丘吾将老焉按纣为酒池糟丘此借用】酒中无诤真三昧便觉稽康输一筹【金刚经曰佛说我得无诤三昧人中最为第一亦见维摩经柳子厚诗共倾三昧酒晋书嵇康传锺会造康康不为之礼会谓文帝曰嵇康卧龙也不可起公无夏天下顾以康为虑耳遂遇害御史台记曰杨纂怨尹君不同已判遽命笔复沈吟少选乃判曰纂输一筹】

戏呈闻善

堆豗病鹤怯鸡羣见酒特地生精神【欧阳公诗云三日不出门堆豗类寒鸦晋书嵇康传或曰昨于稠人中始见嵇康昂然若野鹤之在鸡羣退之诗春半边城特地愁】坐中索起时被肘亦任旁人嫌我真【老杜遭田父泥饮诗高声索果栗欲起时被肘又诗不爱入州府畏人

嫌我真】

题子瞻画竹石【赵子湜家本云题全天粹东坡竹】

风枝雨叶?土竹龙蹲虎踞苍藓石东坡老人翰林公醉时吐出胸中墨【东坡诗雨叶风枝晓自匀李太白永王东巡歌曰龙蟠虎踞帝王州胸中墨谓其藻翰之余退之代张籍书曰一吐出胸中之奇】

戏赠米元章二首【米芾字元章以能书知名喜蓄书画有米氏书画史行于世】

万里风帆水着天麝煤鼠尾过年年沧江静夜虹贯月定是米家书画船【谢灵运诗苕苕万里帆老杜诗一日过海收风帆退之诗海气昏昏水拍天又祭张署文曰洞庭汗漫粘天无壁李西台题杨少师大字壁後云枯杉倒桧霜天老松烟麝煤风雨寒鼠尾谓栗鼠尾可为笔杜牧之诗广文遗韵留樗散鸡犬图书共一船自说江湖不归去阻风中酒过年年诗舍神雾曰瑶光如虹蜺贯月正白感女枢生颞颥此借用言船中有宝气崇寧间元章为江淮发运揭牌于行舸之上曰米家书画船云】

我有玄晖古印章印刳不忍与诸郎虎儿笔力能扛鼎教字玄晖继阿章【玄晖谓谢朓也汉书艺文志曰摹印章书幡信汉旧仪曰银印龟钮其文曰章汉书韩信传曰项王刻印刳忍不能予虎儿即元章之子名友仁近岁擢工部侍郎退之诗曰龙文百斛鼎笔力可独扛两章字义不同故得重用以元章为阿章犹晋人以王平子为阿平】

山谷内集卷十五

山谷内集诗注卷十六

钦定四库全书

山谷内集诗注卷十六 宋 黄庭坚 撰

任渊注

次韵高子勉十首【高荷字子勉江陵人上山谷长篇警句云蜀天何处尽巴月几回弯因此得名後知涿州而死自号还还先生事见曾慥诗选】

雪尽虚檐滴春从细草回【文选王元长曲水诗序曰虚檐云架按檐字俗作檐老杜诗更觉春从沙际归文选谢朓诗风光草际浮丘希范诗细草藉龙骑】德人泉下梦俗物眼中埃【德人当谓东坡少游庄子曰德人者居无思行无虑不藏是非善恶此借用其字老杜诗眼前无俗物多病也身轻】久立我有待长吟君不来【曾慥集仙传载吕洞宾题汴都峨眉院法堂屋山云明月斜秋风冷今夜故人来不来教人立尽梧桐影老杜诗有待至昏雅退之诗长吟慰我思按洛神赋曰超长吟以永慕卢仝诗鸂花烂漫君不来】重玄鎖关龠要待玉匙开【言高君可发古人之秘也文选陆机功臣颂曰重玄非奥头陀寺碑曰玄关幽键感而遂通同安和尚十玄谈曰金鎖玄关留不住行于异类且轮回黄庭经曰玉匙金龠常完坚】

扫雪我三日御风君过旬【上句用袁安事又至仁俗每大雪则自所居至坊巷口埽雪开径迎接宾客至所居处饮宴谓之煖寒会退之诗闭门长安三日雪庄子曰列子御风旬有五日而後反易曰过旬灾也】言诗今有数下笔不无神【鲁论曰始可与言诗已矣老杜诗神仙才有数又诗曰下笔如有神又诗乐罢不无悲】行布佺期近飞扬子建亲【行布字本出释氏而山谷论书画数用之按释氏言华严之旨曰行布则教相施说圆融乃理性即用楞伽经曰名身与句身及字身差别解者曰名者是次第行别句者是次第安布唐诗宋之问传曰魏建安後诗律屡变及之问沈佺期加靡丽学者宗之号为沈宋老杜赠李白诗飞扬跋扈为谁雄盖借用北史齐神武纪中语老杜诗又曰诗看子建亲为曹植也】可怜金石友去不待斯人【金石友见前注亦谓东坡少游于时已死恨不见子勉】

岷南羈旅井灞上猎归亭日绕分鱼市风回落鴈汀【老杜诗应同王粲宅留井岷山前按魏志王粲传山阳人以西京扰乱乃之荆州依刘表汉书李广传屏居蓝田南山中射猎尝夜从人田间饮还至亭霸陵尉醉呵止广】笔由诗客把笛为故人聽【上句言久不作诗因高君可与论此事故复援笔下句谓追怀东坡晋书向秀传作思旧赋序云经稽康吕安旧庐邻人有吹笛者发声寥亮追想曩昔宴游之好感音而叹故作赋云】但恐苏耽鹤归时或姓丁【终上句之意亦指东坡言其不可测识也苏耽丁令威见前注】

君不居郎省还应上谏坡【蔡质汉官典职曰尚书郎省中皆以胡粉涂壁谏坡见李宗谔先公谈录具前注】才高殊未识岁晚喜无它【说文曰上古草居患它故相问无它乎音托何

切徐铉注云今俗作蛇音食遮反】枥马羸难出邻鸡冻不歌【老杜诗曰盍簪喧枥马退之
书曰泥水马弱不敢出邻鸡见孟子东坡杂说曰予来黄州闻黄人羣聚讴歌宛转其声往返
高下如鸡唱尔汉官仪汝南出长鸣鸡卫士候朱雀门外专传鸡鸣应劭曰今鸡鸣歌也余今
所闻岂亦鸡鸣之遗声乎老杜诗林莺遂不歌】寒炉余几火灰里拨陰何【言作诗当深思
苦求方与古人相见也传灯录百丈谓洸山曰汝拨炉中有火否师拨云无火百丈躬起身拨
得火举以示之云此不是火师发悟礼谢吕蒙正诗拨尽寒炉一夜灰老杜诗试学陰何苦用
心谓陰铿何逊】

荆渚楼中赋南阳壠底吟谁言小隐处频屈故人临【上两句皆述荆州渚宫见前注文选王
粲有登楼赋李善注引盛弘之荆州记曰当阳县城楼王仲宣登之而作赋蜀志诸葛亮传躬
耕壠亩好为梁父吟注引汉晋春秋曰亮家于南阳之隆中按後汉志南阳属荆州文选王康
琚诗曰小隐隐陵薮大隐隐朝市汉书灌夫传曰将军旦日蚤临】经笥难窥底词源幸汲深
思君眠竹屋雪月冰寒衾【後汉边韶传腹便便五经笥老杜诗词源倒流三峡水庄子曰夔
短者不可以汲深刘禹锡涵碧图诗序曰碧流贯于庭中冰澈射人自注云冰音去声集韵冰
音逋孕反冷迫也】

惊人得佳句或以傲王公【用杜牧之千首诗轻万户侯之意老杜诗为人性僻耽佳句语不
惊人死不休又诗故人得佳句独赠白头翁荀子曰道义重则轻王公】处世要清节滑稽安
足雄【言当慕伯夷之清不当如东方朔之陆沈也法言或问东方朔曰非夷尚容依隐玩世
其滑稽之雄乎又曰古者高饿显下禄隐】深沈似康乐简远到安丰【晋书谢玄封康乐县
公为叔父安所器重有经国才略王戎封安丰县侯裴楷传锺会曰裴楷清通王戎简要汉书
王嘉传曰计谋深沈元稹作老杜墓铭序曰苏李五言词意简远谢灵运虽袭封康乐公然此
诗以深沉言之必非指灵运也】一点无俗气相期林下同【僧贯休题东林寺诗田地更无
尘一点退之王仲舒墓志曰公所为文章无世俗气晋书王戎传与阮籍为竹林之游戎尝後
至籍曰俗物已复来败人意又王凝之妻谢氏传曰王夫人神情散朗故有林下风】

志士难推轂将如高子何心期诚不浅余论或相多【志士见鲁论推轂见前注文选任彦昇
诗曰中道遇心期王介甫作韩魏公挽诗曰心期自与衆人殊骨相知非浅丈夫南史谢朓传
曰士子声名未立应共獎成无惜齿牙余论战国策或说张相国曰君安能少赵人而令赵人
多君汉书何武传注曰多重也】欲向沧州去还能小艇摩鸬鷀西照处相并晒渔蓑【言欲
与之同往江海也选诗复協沧州趣老杜诗闲引老妻乘小艇又云鸬鷀西日照晒趺满渔梁
东坡乐府曰仍传语江南父老时与晒渔蓑】

凿开混沌窍窥见伏羲心【言伏羲发太极之蘊也庄子曰儻与忽谋报混沌之德曰凿一窍
七日而死易曰复其见天地之心乎】有物先天地含生尽陆沈【老子曰有物混成先天地
生雪窦颂曰曹溪波浪如相似无恨平人被陆沈诗意谓大道坦然人自迷谬平地上没溺而
不自知也陆沈见庄子已具前注此借用】伐山成大厦鼓橐铸祥金【上句欲其积学以成
广大之规模下句欲其鍛炼以尽精微之极致汉书地理志曰楚地以渔猎山伐为业注云山
伐谓伐山取竹木文选四子讲德论曰大厦之材非一丘之木淮南子曰鼓橐吹捶注云橐冶

鑪排橐也庄子曰今大冶铸金金踊跃曰我且必为镆铘大冶必以为不祥之金此反而用之
【三尺无弦木期君发至音【无弦琴用渊明事见前注刘禹锡与柳子厚书曰嗟夫箏郭师与不可传者死矣弦张柱差枵然貌存中有至音含糊弗闻噫人亡而器存布方册者是已】

少年基一簣长岁足三余【一簣三余并见前注】忽作飞黄去顿超同队鱼【退之诗少长聚嬉戏不殊同队鱼又云飞黄腾踏去不能顾蟾蜍飞黄古良马名】尊前八采句窻下十年书【北史卢思道传朝士各作文宣帝挽歌十首择其善者用之魏收阳休之等不过得一二篇唯卢思道得八篇故时号八采卢郎此借用十年书见南史沈攸之传见前注】定作牛腰束传抄聽小胥【太白诗云诗秃千兔毫书载两牛腰老杜诗云抄诗聽小胥】沙上步微暖思君剩欲招菱蒿穿雪动杨柳索春饶【高适诗谈经剩欲翻陆龟蒙诗乱和残照纷纷舞应索阳乌次第饶】枉驾时逢出新诗若见撩【若一作苦退之诗猿鸟莫相撩王介甫诗物华撩我有新诗】樽前远湖树来饮莫辞遥【老杜诗水有远湖树人今何处船盖指江陵府而言山谷时寓居于此老杜又有诗他乡惟表弟还往莫辞遥】

赠高子勉四首

文章瑞世惊人学行剗心润身【老杜诗语不惊人死不休庄子曰夫道覆载万物者也洋洋乎大哉君子不可以不剗心焉礼记曰富润屋德润身】沅江求九肋鼈荆州见一角麟【摭言曰卢肇袁州人初赴举先達曰袁州出举人耶答曰袁州举人亦犹沅江出鼈甲九肋者稀一角麟见前注又传灯录清原行思传希迁曰衆角虽多一麟足矣】

张侯海内长句晁子庙中雅歌【元注云无咎乐府于今第一】高郎少加笔力我知三杰同科【张侯谓文潜退之潮州谢表曰作为歌诗荐之郊庙後汉祭遵投壶雅歌干宝晋纪曰顾荣与陆机兄弟同入洛时号三杰鲁论曰为力不同科山谷与李端叔帖曰此得荆州一诗人高荷极有笔力使之凌厉中州恐不减晁张尝闻之长老云文潜见此句殊不乐】

妙在和光同尘事须鉤深入神【上句欲其韬晦涵养与世同波下句欲其学之精微即事观理老子曰和其光同其尘易曰探賾索隐钓深致远又曰精义入神以致用也】聽他下虎口着我不为牛後人【上句谓无若世人行险侥幸如弈碁而置子于虎口下句欲其特立独行不落人後也史记苏秦传曰寧为鸡口无为牛後】

拾遗句中有眼彭泽意在无弦【谓老杜之诗眼在句中如彭泽之琴意在弦外也老杜以上元二年拜右拾遗事具唐书本传】顾我今六十老付公以二百年【南史谢朓传长五言诗沈约云二百年无此诗也晋书陈壽传张华谓曰当以晋书相付此借用言以一代之诗付之也】

再用前韵赠子勉四首

胷中有度择人事上无心活身【上句欲口不臧否人物而胷中自有准则也退之书曰惧足

下以吾不致黑白于胷中礼记曰进退有度左传吴公子札见叔孙穆子曰子好善而不能择人传灯录德山语曰汝但无事于心无心于事则虚而灵空而妙乐天诗勿信人虚语君当事上看庄子曰烈士为天下见善矣未足以活身】只麽情亲鱼鸟恍然图画麒麟【言本志在于山林恐或不免富贵也传灯录证道歌曰不可得中只麽得世说简文帝在华林园谓左右曰会心处不必在远翛然林水便有濠濮间之趣觉鸟兽禽鱼自来相亲庄子曰恍然立于四虚之道汉书苏武传宣帝甘露三年思股肱之美乃图画霍光等十一人于麒麟阁】

行要争光日月诗须皆可弦歌【史记屈原传曰虽与日月争光可也又按孔子世家曰诗三百五篇孔子皆弦歌之以求合韶武雅颂之音柳子厚简吴武陵诗惜无协律者窃眇弦吾诗老杜诗谢朓每篇堪讽咏东坡山谷尝论诗可弦歌者米芾曰某明月堂赋便可坡未应山谷曰可谓落大石调也见王定国闻见录云】着鞭莫落人後百年风转蓬科【言当汲汲追逐古人恐年岁之不与吾也着鞭用刘琨事见前注太白诗风流肯落他人後转蓬见前注太白诗又曰蓬科马鬣皆已平】

句法俊逸清新词源广大精神【老杜诗清新庾开府俊逸鲍参军又云词源倒流三峡水礼记曰致广大而尽精微】建安才六七子开元数两三人【文选谢灵运拟魏太子邺中集诗有魏太子王粲陈琳徐干刘桢应璩阮瑀平原侯植八人序曰建安末予时任邺宫云云又魏文帝典论曰今之文人孔融陈琳王粲徐干阮瑀应璩刘?斯七子者于学无所遗于词无所假韩文公诗建安能者七卓犖变风操唐书文艺传曰明皇好经术羣臣稍厌雕琢索理致则燕许擅其宗六七人见鲁论老杜诗野航恰受两三人】

醉乡闲处日月鸟语花中管弦【醉乡见前注唐人皇甫嵩所着小说号醉乡日月乐天诗闲中日月长刘禹锡诗萝密鸟韵如簧言汉书曰钟鼓管弦之音未衰】有兴勤来把酒与君端欲忘年【文士传祢衡与孔融作尔汝交衡年二十余融年五十敬衡秀才而忘年也又南史江总传张缵等雅相推重为忘年友】

荆南签判向和卿用予六言见惠次韵奉酬四首

仕宦初不因人富贵方来逼身【上句言其自树立刘禹锡连州谢表曰出身入仕并不因人下句用谢安恐不免富贵之意僧贯休与钱鏐诗曰贵逼身来不自由】要是出羣拔萃乃成威凤祥麟【孟子公孙丑篇有若曰麒麟之於走兽凤凰之於飞鸟类也圣人之於民亦类也出於其类拔乎其萃自生民以来未有盛於孔子也汉书宣帝纪诏曰威凤为宝注云凤之有威仪者左传哀公十四年注曰麟者仁兽王者之嘉瑞退之获麟解曰麟之为灵?妇人小子皆知其为祥也】向候赋我菁莪何敢当不类歌【向以教育之意望于山谷诗曰菁菁者莪乐育材也左传晋侯曰歌诗必类齐高厚之诗不类】顾我乃山林士看君取将相科【汉书王吉传赞曰山林之士往而不能反王沂公言行录云公为参政或议以进士登科择堂吏公曰我朝设此科为之将相科岂当屈以趋走吏耶衆皆叹服而止】

覆却万方无准安排一字有神【言不为物役诗思乃凝于神也庄子曰视舟之覆犹其车却

也覆却万方陈乎前而不得入其舍文选陆佐公漏刻铭曰盈缩之度无准前辈诗曰吟安一个字老杜诗下笔如有神】更能识诗家病方是我眼中人【李淑诗苑类格云梁沈约曰诗病有八一平头二上尾三蜂腰四鹤膝五大韵六小韵七旁纽八正纽此借用文选陆士龙答张士然云感念桑梓域髣髴眼中人老杜王司直短歌行曰青眼高歌望吾子眼中之人吾老矣丁晋公曰水底日为天上日杨公应口曰眼中人是面前人】

覓句真成小技知音定须絶弦【覓句见前注老杜诗文章一小技于道未为尊絶弦见前注】景公有马千驷伯夷垂名万年【事见鲁论盖期之以远者大者】

蚁蝶图

胡蝶双飞得意偶然毕命网罗羣蚁争收坠翼策勲归去南柯【此篇盖有所属陆龟蒙蠹化曰橘之蠹蛻为胡蝶翩旋轩虚曳扬粉拂甚可爱也须臾犯螽网而胶之引丝环纒人?甚怜不可解而纵矣文选七启曰公叔毕命于西秦策勲及南柯并见前注】

谢胡藏之送栗鼠尾画维摩二首

貂尾珍材可笔虎头墨妙疑神【後汉书舆服志曰武冠貂尾为饰注引应劭汉官仪曰貂内劲悍而外温润老杜诗虎头金粟影神妙独难忘谓顾恺之所画维摩也庄子曰用志不分乃凝于神东坡尝言古本凝作疑】颇知君尘外物真是我眼中人【分属前两句选诗肃此尘外軫晋书王戎传曰王衍如瑶林琼树自然是风尘表物眼中人见前注】

丹青貌金粟影毛物宜管城公【扬子丹青初则炳久则渝老杜有丹青引又诗画工如山貌不同金粟影见前注文选头陀寺碑李善注发迹经曰净名大士是往古金粟如来又按祖庭事苑曰十门辨惑论云维摩是金粟如来吉藏法师谓出思惟三昧经自云未见其本今据诸经目錄无此经名周礼曰其动物宜毛物管城公见前注】只今为君落笔他日聽我谈空【亦分属上两句文选北山移文云谈空空于释部刘梦得诗与师相见便谈空】

次韵向和卿行松滋县与邹天锡夜语南极亭二首

雪泥滑滑到山郭提壶劝沽亦不恶林中解道不如归家人应念思归乐【梅圣俞四禽言曰泥滑滑苦竹冈雨潇潇马上郎提壶子规并见前注乐天诗曰山中不栖鸟半夜声嚶嚶似道思归乐行人掩泣聽陶岳零陵记曰思归乐状如鳩而惨色三月则鸣其音云不如归去】

冲风冲雨走七县唯有白鸥盟未寒【退之诗不冲风雨即冲埃寒盟见前注】坐中更得江南客开尽南窗借月看【郑谷诗坐中亦有江南客莫向春风唱鷓鴣孟郊诗徵文北山外借月南楼中】

戏荅荊州王充道烹茶四首【旧本云居士酒徒不喜茗饮故多戏句】

三径虽锄客自稀醉乡安稳更何之老翁更把春风碗灵府清寒要作诗【老杜诗草茅无径欲教锄又诗幕下郎官安稳无又诗舍此复何之灵府谓心也见前注退之李花诗曰清寒莹骨肝胆醒一生思虑无由邪】

茗碗难加酒碗醇暂时扶起藉糟人何须忍垢不濯足苦学梁州陰子春【茗碗见前注世说江卢奴直唤人取酒自饮一碗老杜诗间道暂时人晋书刘伶传酒德颂曰枕麴藉糟充道不喜茗饮无从洗濯尘昏故以阴子春戏之按南史阴子春传身服垢污脚数年一洗言每洗则失财败事云在梁州以洗足致梁州败曹子建责躬诗表曰忍垢苟全则犯诗人胡颜之讥】

香从灵坚垄上发味自白石源中生为公唤觉荆州梦可待南柯一梦成【黄庭内景经曰鼻神玉垄字灵坚又曰呼吸元气以求仙朱鸟吐缩白石源盖言舌与齿也杜牧之诗三年一觉扬州梦赢得青楼薄幸名南柯见前注】

龙焙东风鱼眼汤个中即是白云乡更煎双井苍鹰爪始耐落花春日长【赵飞燕外传成帝曰不能做武皇帝求白云乡也春昼多睡故末句云尔王随诗一声啼鸟禁门静满池落花春日长】

雨中登岳阳楼望君山二首【岳阳楼即岳州城西门据图志经始于张燕公庆历中滕宗谅谪守始加增饰规制宏敞】

投荒万死鬓毛斑生出瞿塘滟滪关未到江南先一笑岳阳楼上对君山【柳子厚诗曰万死投荒十二年老杜诗更忆鬓毛斑後汉斑超传上疏曰臣不敢望到酒泉郡但愿生入玉门关瞿塘峡滟滪堆在今夔州滟滪即水经注所谓淫预石也冬出水二十余丈夏则没水经注又曰峡中有瞿塘黄龛二滩夏水洄洑沿泝所忌又曰洞庭湖中有君山湘君之所游处曰君山】

满川风雨独凭栏绾结湘娥十二鬟可惜不当湖水面银山堆里看青山【山海经曰洞庭之山帝之二女居焉王逸注九歌曰尧二女娥皇女英随舜不及没于湘水之渚因为夫人按君山状如十二螺髻北梦琐言曰湘江北流至岳阳逴蜀江夏潦後蜀江涨势高遏住湘江让而退溢为洞庭湖凡数百里而君山宛在水中秋水归壑此山复居于陆惟一条湘川而已刘禹锡诗遥望洞庭山翠色白银盘里一青螺贯休诗五湖大浪如银山】

自巴陵略平江临湘入通城无日不雨至黄龙奉谒清禅师继而晚晴邂逅禅客戴道纯欸语作长句呈道纯

山行十日雨沾衣幕阜峯前对落晖【史记禹本纪曰山行乘撵礼记曰雨沾服失容则废说苑曰孺子不觉露之沾衣幕阜即黄龙山之别峯輿地广记曰在洪州武宁县东坡诗放鹤亭前送落晖】野水自添田水满晴鸠却唤雨鸠归【欧阳公诗陂田遶郭白水满又诗天雨止鸠呼妇归鸣且喜】灵源大士人天眼双塔老师诸佛机【惟清禅师自号灵源叟即双塔之

法嗣已具赠郑交诗注初晦堂祖心禅师得法于黄龙山惠南南死塔于山中其後心亦葬南公塔东号双塔事具洪觉范僧宝传山谷常参问晦堂为之塔铭其于灵源待以师友常与徐师川书曰平生所见士大夫人品未有出此公之右者传灯録灵树如敏禅师书一帖云人天眼目堂中上座盖谓云门文偃和尚也佛偈曰若人生百岁不善诸佛机未若生一日而得决了之】白髮苍顏重到此问君还是昔人非【欧阳公醉翁亭记曰苍顏白髮頽然其间者太守醉也肇法师物不迁论云梵志出家白首而归邻人见之曰昔人尚存乎梵志曰吾犹昔人非昔人也邻人皆愕然所谓有力者负之而趋昧者不觉其斯人之谓欤】

题徐氏书院【元注云德占羨鱼亭故基也徐禧字德占洪州分宁人娶山谷从妹】

学书但学溪老鹅读书可观樵父歌【言不必作功名之想也山谷旧有诗云驾鹅引颈回似我胷中字右军数能来不为口腹事樵父歌谓负薪能谈王道老杜诗夷歌是处起渔樵】紫髯将军不复见空余岩桂緑婆娑【紫髯借用孙权事岩桂用淮南小山招隐事并见前注晋书殷仲文传顾大司马府中老槐树而叹曰此树婆娑无复生意按实録元丰五年禧以直龙图阁节制西师与沈括等城永乐夏人来攻城禧与内侍李舜举转运使李稷皆死】

赠石敏若【石懋字敏若】

才似谪仙惟欠酒情如宋玉更逢秋相看领会一谈胜注目长江天际流【文选向秀思旧赋曰托运遇于领会注云领会?理相会也老杜诗注目寒江依秋阁】

题胡逸老致虚庵

藏书万卷可教子遗金满籝常作灾【汉书韦贤传曰贤为丞相少子玄成以明经历位至丞相故邹鲁谚曰遗子黄金满籝不如教子一经老子曰金玉满堂莫之能守富贵而骄自遗其咎】能与贫人共年谷必有明月生蚌胎【东观汉记梁商因年谷贵多有馁者辄令苍头以牛车致米盐菜钱于四城门外乞贫民不告主姓名庄子曰使物不疵疠而年谷熟蚌胎用韦诞事见前注】山随宴坐图画出水作夜窗风雨来观水观山皆得妙更将何物污灵台【一作莫将世事侵两鬓小庵观静鎖灵台太白诗丹青画出是君山老杜诗飞阁卷帘图画里王介甫诗芭蕉一枕西窗雨复似当年水遶?老子曰常无欲以观其妙灵台见前注】

题莲华寺

狂卒猝起金坑西胁从数百马百蹄【汉书谷永传曰将有骄臣悍妾醉酒狂悖卒起之败注卒读曰猝书曰胁从罔治史记货殖传曰牧马二百蹄】所过州县不敢谁肩輿掳载三十妻【贾谊过秦论曰陈利兵而谁过注云问之为谁】伍生有胆无智略谓河可冯虎可捋【退之诗臣有胆与气史记田叔传褚先生曰今取富人子又无智略鲁论曰暴虎冯河死而无悔者吾不与也孟子曰冯妇善搏虎】身膏白刃浮屠前此乡父老至今怜【文选潘安仁关中诗曰周殉师令身膏氏斧老杜诗到今耆旧悲按汉书项籍传曰楚人怜之至今】

冲雨向万载道中得逍遥观托宿遂戏题

逍遥近道边憩息慰惫懣晴晖时晦明谑语谐说论【道边见前注老杜诗平生憩息地韵书懣与闷同东都赋曰说言宏说李善注引字林曰说美言也音党】草莱荒蒙茏室屋壅尘坳【汉书晁错传曰草木蒙茏枝叶茂按韵书云坳尘也蒲闷反法华经云粪土尘坳秽污不净】仆僮侍偈侧泾渭清浊混【子虚赋曰偈侧泌瀦注云相迫也老杜诗有偈仄行又诗浊泾清渭何当分】

题竹尊者轩

平生脊骨硬如铁听风听雨随宜说【传灯录岩头云德山老人一条脊骨硬如铁拗不折于唱教门中犹较些子法华经曰诸佛随宜说法意趣难解王建宫词曰听风听雨作霓裳】百尺竿头放步行更向脚跟参一节【传灯录长沙景岑禅师偈曰百丈竿头不动人?然得入未为真百丈竿头须进步十方世界是全身玄沙传曰老和尚脚跟犹未点地丛林举前人一段语谓之一则一节与一则同竹尊者当是竹根形状如此】

送密老住五峯【密老盖法昌之嗣】

我穿高安过萍乡七十二渡遶羊肠【一本此下有二句云去时撷茗春风香归来秧稻春日长高安属筠川萍乡属袁州羊肠见前注山谷书萍乡县廳壁曰庭坚杭荆江略洞庭涉修水径七十二渡出万载来宜春省伯氏元明于萍乡按元明时为萍乡令】水边林下逢衲子南北东西古道场【苏子由筠州圣壽院法堂记曰洞山有价黄檗有运真如有愚九峯有?五峯有观高安虽小邦而五道场在焉前汉书南粤传曰南北东西数千里】五峯秀出云雨上中有宝坊如侧掌【文选张景阳七命曰嶢榭迎风秀出中天李善注引国语曰秀出于衆列子曰化人之宫出云雨之上宝坊见前注老杜诗秦川对酒平如掌此变其语用之】去与青山作主人不负法昌老禅将【倚遇禅师三十年单丁住法昌山法昌在洪州分宁之北事具洪觉范僧宝传法华经曰佛赐战魔贤圣诸将以禅定解脱无漏根力诸佛之财】栽松种竹是家风莫嫌斗絶无来往【僧宝传又载南禅师至止遇方栽松南公曰小院子栽许多松作麼遇曰临济道底南公指石曰这里何不栽遇曰功不浪施南公曰也知无下手处遇却指石上松曰从甚麽处得来南公大笑曰苍天苍天汉书匈奴传曰匈奴有斗入汉地直张掖郡注云斗絶也後汉书窦融传曰河西斗絶在羌胡中五峯高峻故云尔】但得螺螄吞大象从来美酒无深巷【法昌有法身颂云螺螄吞大象石虎咬蕃马惊起段家龙踏落云屋瓦古语曰美酒无曲巷言酒之美者虽在深僻之地人必就沽五峯虽险絶但解法昌宗旨何患不为人之所知哉】

新喻道中寄元明用觴字韵

中年畏病不举酒孤负东来数百觴唤客煎茶山店远看人秧稻午风凉【晋书顾荣传曰惟酒可以忘忧但无如作病何文选李陵书曰孤负陵心区区之意欧阳公诗快哉天下乐一酹

宜百觴杜詩野店引山泉樂天詩泥秧水畦稻】但知家里俱無恙不用書來細作行【別本云不用書來細作行想李炳文極相肯也○風俗通曰恙毒蟲也喜傷人古人草居露宿故相勞問必曰無恙老杜詩來書細作行按後漢書循吏傳序曰光武以手迹賜方國皆一札十行細書成文】一百八盤携手上至今猶夢遶羊腸【一百八盤路謂元明相送黔中時樂天詩夢尋來路遶羊腸羊腸見前注】

山谷內集詩注卷十六

山谷内集诗注卷十七

钦定四库全书

山谷内集诗注卷十七 宋 黄庭坚 撰

任渊注

拜刘凝之画像

弃官清潁尾买田落星湾【陈舜俞庐山记云刘涣字凝之筠州人天圣八年擢进士第居官有直气不屑辄弃去卜居落星渚尝乘黄犊往来庐山中张文潜水玉堂记云凝之年五十余为潁上令即致仕归隐于庐山年八十一卒清潁尾见前注寰宇记云落星石在江州庐山东周迴一百五步高丈许图经云昔有星坠水化为石当彭蠡湾中俗呼为落星湾】身在菰蒲中名满天地间【建康宝录云殷礼与张温使蜀诸葛亮见而叹曰江东菰芦中生此奇才谢灵运诗菰蒲冒清浅老杜诗诗卷长留天地间】谁能四十年保此清静退【老子曰保此道者不欲盈汉书扬雄解嘲曰爰清爰静游神之庭文选卢子谅序曰用安静退】往来涧谷中神光射牛背【见首句注晋书王衍引王导共载而去曰吾目光乃在牛背上矣】

追和东坡壶中九华【并序】

湖口人李正臣蓄异石九峯东坡先生名曰壶中九华并为作诗後八年自海外归湖口石已为好事者所取乃和前篇以为笑寔建中靖国元年四月十六日明年当崇宁之元五月二十日庭坚系舟湖口李正臣持此诗来石既不可复见东坡亦下世矣感叹不足因次前韵

有人夜半持山去顿觉浮岚暖翠空【庄子曰藏舟于壑藏山于泽谓之固矣然而夜半有力者负之而走昧者不知也下句谓失此石之清寒遂觉瘴岚暖气浮动于太虚耳揆苍曰岚山风也摭言载赵嘏诗云何必青楼倚翠空】试问安排华屋处何如零落乱云中【曹子建诗曰生存华屋处零落归山邱此借用其字】能回赵璧人安在已入南柯梦不通【史记蔺相如传度秦王负约不偿城使从者怀其璧从间道亡归璧于赵南柯见前注谓东坡已死此段陈迹遂成幻境不可复追寻也】赖有霜钟难席卷袖椎来听响玲珑【晋书石勒载记曰赖有此耳霜钟谓石镗山也水经曰彭蠡之口有石钟山焉东坡作石钟山记唐李渤记曰得双石于潭上扣而聆之南声函胡北音清越□止响腾余韵自歇山海经曰丰山有钟九耳霜降则鸣此用其字汉书贾谊过秦论曰有席卷天下之心史记信陵君传朱?袖四十斤铁椎扬雄甘泉赋曰何氏玲珑】

罢姑熟寄元明用觞字韵【通典曰当涂县即晋姑熟城按当涂今为太平州】

追随富贵劳牵尾准拟田园略滥觞【上句言世人用力于富贵之地如曳牛尾徒自苦也文

选曹子建诗冠盖相迫随俗本劳或作荣非是太玄经勤首曰劳牵不于其鼻于尾弊范望注曰牵牛不于鼻而于尾故劳弊老杜诗春来准拟开怀久汉书汲黯传隐于田圃滥觞见前注】本与江鸥成保社聊随海燕度炎凉【南越志曰江鸥一名海鸥保社谓保伍同社传灯录典化存獎禅师传克宾曰我不入汝保社海燕以言去来无定梁吴均咏燕诗曰一燕海上来一燕高堂息老杜双燕诗应同避燥湿且复过炎凉】未栽姑熟桃李径郤入江西鸿鴈行别後常同千里月书来莫寄九回肠【江西谓洪州山谷乡里谢庄月赋隔千里兮共明月司马迁书曰肠一日而九回】

次苏子瞻和李太白浔阳紫极宫感秋诗韵追怀太白子瞻【元丰二年东坡自黄移汝往筠州见子由过江州道士胡洞微示以太白诗石本盖其师卓玘之所刻因和其韵且云玉芝一名琼田草洞微种之七八年矣】

不见两谪仙长怀倚修竹【唐书李白传贺知章叹曰子谪仙人也两谪仙谓苏李老杜诗曰暮倚修竹南史云会稽山有人姓蔡不知名时人谓之谪仙】行遶紫极宫明珠得盈掬【老杜诗道州手札适复至纸长要自三过读盈把那须沧海珠入怀本倚崑山玉礼记曰受珠玉者以掬诗曰不盈一掬】平生人欲杀耿介受命独【老杜无李白消息诗曰世人皆欲杀吾意独怜才离骚曰彼尧舜之耿介兮既遵道而得路庄子曰爱命于地惟松柏独也在冬夏青青受命于天惟舜独也正山谷跋东坡和陶诗云子瞻谪岭南时宰欲杀之亦此意也】往者如可作抱被来同宿【礼记檀弓赵文子曰死者如可作也吾谁与归注云作起也退之送殷侑序曰抱被入直乐天诗官曹冷似水谁肯来同宿】砥柱閼颓波不疑更何卜【刘禹锡诗世道剧颓波我心如砥柱其详见前注诗意谓苏李介持自信也按楚辞屈原卜居曰往见太卜郑詹尹曰余有所疑愿因先生决之寧昂昂若千里之驹乎将泛泛若水中之鳧乎与波上下偷以全吾躯乎詹尹谢曰用君之意龟策诚不能知事此诗用其意左传□廉云卜以决疑不疑何卜此诗用其语王维归山歌亦云聊解印兮相从何詹尹兮可卜】但观草木秋叶落根自复【草木秋见前注老子曰万物并行吾以观其复夫物芸芸各归其根归根曰静静曰复命唐人诗梧桐叶落满庭陰古诗云一叶落知天下秋】我病二十年大斗久不复【山谷作发愿文戒酒肉盖元丰甲子岁至崇寧壬午几二十年行苇诗曰曾孙维主酒醴维醕酌以大斗以祈黄耆注云大斗长三尺正义谓从大麓挹之于尊用此勺隋书天文志曰天市垣斗五星在宦者南仰则天下斗斛不平覆则嵐穰此借用以言挹酒而注之则当覆斗久不饮故斗不覆也】因之酌苏李蟹肥社醕熟【别本注云予以病不能食暂开酒肉故云○文选江文通拟休上人云桂水日千里因之平生怀林逋诗水痕初落蟹螯肥李商隐诗旗高社酒香按世说毕茂世云一手持蟹螯一手持酒杯拍浮酒池中便足了一生山谷此诗原有跋云子瞻诗所记胡道士玉芝一名琼田草者俗号其叶为唐婆镜叶底开花故号羞天花以予考之其实本草之鬼臼也岁生一臼如黄精而坚痠满十二岁可为药就土中生根取一臼勿令大本知也煮麪如饅餠皮里一臼吞之数日不饥啗三臼可辟穀也黄龙山老僧多采而断食令人体臞而神王今方家所用鬼臼乃鬼灯檠耳如蜀人用鬼箭但用一草根不知何物也镇阳赵州间道旁丛生三羽者真鬼箭俗医川药如此而青古方不治病可胜叹哉因论玉芝故并记之以遗胡道士道士胡君洞□卓君□之弟子卓君之时欲崇饰宫观而俗绿薄规模甚远而不成就反胡君而官殿崇成便斋曲房松竹荟蔚观其轩窗开塞宜冬而愜夏智虑通物者

也又好文多艺能治宾客具至者忘归此东坡先生所以每至而留连者欤】

琼芝轩

卓僊在时养琼芝深根固蒂活人命憧憧来问此何草但告渠是唐婆镜【老子云深根固蒂易成卦之九四曰憧憧往来朋从尔思王弼云憧憧往来不絕貌诗意谓俗人闻此草能使人长生未必信之但以凡草告之可也】

龟殼轩

紫极宫中三百楹道人独藏一神屋开轩纳息星月明时有白云来侔宿【本草龟殼一名神屋史记龟策传曰龟能行气导引太白紫极官诗曰白云南山来就我檐下宿退之诗月明侔宿玉堂空】

秋声轩

谁居空闲扇橐龠情与无情并时作【庄子曰风起地方一西一东有上傍徨就嘘吸是孰居无事而披拂是老子曰天地之间其犹橐龠乎又曰万物并作吾以观其复法界观颂曰情与无情共一体】是声皆自根极来更莫辛勤问南郭【传灯錄镜清问僧门外什麼声曰雨滴声师曰衆生颠倒建己逐物此诗用其意庄子缮性篇曰不当时命而大穷乎天下则深根宁极而待大宗师篇真人之息以踵郭象注曰乃在根本中来齐物论曰南郭子綦隐几而坐顔成子游立侍乎前子綦曰汝闻人籁而未闻地籁汝闻地籁而未闻天籁夫子游曰敢问其方云云】

戏效禪月作远公咏【并序】

远法师居卢山下持律精苦过中不受蜜汤而作诗换酒饮陶彭泽送客无贵贱不过虎溪而与陆道士行过虎溪数百步大笑而别故禪月作诗云爱陶长官醉兀兀送陆道士行迟迟买酒过溪皆破戒斯何人斯师如斯故效之【禪目师名贯休其诗见于集中陈舜俞庐山记曰远师送陶元亮陆偕静不觉过虎溪因相与大笑今世传三笑图盖起于此】

邀陶渊明把酒椀送陆修静送虎溪曾次九流清似镜人间万事醉如泥【陈舜俞庐山记曰简寂观宋陆先生之隐居也隐居名修静明帝召至阙设崇卢馆通仙堂以待之仍会儒释之士讲道于庄严佛寺九流见前注东坡诗曰道人胷中水镜清後汉周泽时人语曰一日不斋醉如泥】

跋子瞻和陶诗【东坡和陶渊明诗凡一百有九篇追和古人自东坡始】

子瞻谪岭南时宰欲杀之饱吃惠州饭细和渊明诗【东坡知扬州初和渊明饮酒诗二十首

归田□居以下皆谪□州後所作东坡以绍圣元年安置惠州时章惇为宰相老杜歌曰但使残年饱吃饭只愿无事长相见】彭泽千载人东坡百世士出处虽不同风味乃相似【唐人张旭有帖云贺八清鉴风流千载人也孟子曰伯夷柳下□奋乎百世之上百世之下闻者莫不兴起山谷作王持字说曰世无千岁之人安得千岁之士盖其德可以经盛衰云耳易曰君子之道或出或处或默或语二人同心其利断金同心之言其臭如兰子由作和陶集序亦曰区区之迹盖未足以论士也】

题李亮功戴嵩牛图【张彦远名画记载戴嵩事曰韩晋公滉之镇浙右署为巡官师晋公之画不及他物惟善水牛而已田家川原亦有意思李亮功名公寅】

韩生画肥马立仗有辉光【老杜丹青引云弟子韩干早入室亦能画马穷殊相干惟画肉不画骨忍使骅骝气雕丧立仗马见前注文选阮嗣宗诗灼灼有辉光】戴老作瘦牛平生千顷荒【韩生作富贵想戴老作田野观言胷怀异趣也】馵觮告主人实已尽筋力【孟子注曰馵觮牛当到死地处恐貌老杜病马诗庭中老尽力盖用田子方事筋力见曲礼】乞我一牧童林间听横笛【南史陶弘景传梁武帝屡加礼聘并不出唯画作两牛一牛散放水草之间一牛着金笼头有人以杖驱之武帝笑曰此人岂有可致之理此诗颇采其意山谷于时正以轩冕为累也】

追和东坡题李亮功归来图

今人常恨古人少今得见之谁谓无【南史张融传常叹云不恨我不见古人所恨古人又不见我晋书王衍传王戎曰当从古人中求耳汉书刘平传尝闻烈士乃今见之】欲学渊明归作赋先烦摩诘画成图【陶渊明集有归去来辞序云彭泽去家百里公田之利是为酒故便求之及少日眷然有归欤之情唐书王维传维字摩诘别墅在辋川地奇胜画断曰王维画辋川图山谷盘鬱云山飞动】小池已筑鱼千里隙地仍栽芋百区【齐民要术载陶朱公养鱼经曰以六亩地为池池中有九州求怀子鲤鱼二十头牡鲤鱼四头内池中鱼在池中周遶九州无穷自谓江湖也其详已见前注左思蜀都赋曰瓜畴芋区泛胜之书曰种芋区方?皆三尺】朝市山林俱有累不居京洛不江湖【世传退之与大颠书云着山林与着城郭无异】

次韵徐仲车喜董元达访之作南郭篇四韵【徐积字仲车见前注元达名达】

董侯从军来意望名不朽【王粲诗从军有苦乐不朽见前注】款门拜徐公在德不在酒【魏志徐邈传虚钦着书称邈曰世人无常而徐公有常退之诗何人有酒身无事谁家有竹门可饮左传王孙满曰在德不在鼎此用其语律】徐公虽避俗对客辄粲然耳不闻世事时诵陶令篇【老杜诗陶潜避俗翁诗褒如充耳郑氏注曰人之耳聋恒多笑而已仲车有此疾故以为戏粲然见前注】

次韵仲车为元达置酒四韵

射阳三万家莫贵徐公门【楚州山阳县本汉射阳县地仲车家于楚故云】谁能拜牀前泥乃共酒尊【襄阳记曰诸葛孔明每至龐德公家独拜牀下】惟此酒中趣难为醒者论【晋书孟嘉传桓温问酒有何好而卿嗜之嘉曰公未得酒中趣耳汉书司马迁传曰事未易一二为俗人言也陶渊明诗但得酒中趣勿与醒者传山谷岂体此耶】盜卧月皎皎鸡鸣雨昏昏【明月皎然盜所畏忌此古人所以自晦于酒世间万事付之一醉而胷中了了自有常度如鸡鸣之不为风雨所废也然虽鸣雨中其声往往难辨亦因以戏仲车之声东坡和仲车诗盖云苍蝇莫乱远鸡声世上谁如公觉早文选潘安仁诗皎皎窗中月郑诗云风雨如晦鸡鸣不已退之诗海气昏昏水拍天】

次韵仲车因娄行父见寄之什

前朝老诸生大半正邱首【仲车与山谷同登治平四年第于时同年生零落大半矣檀弓曰孤死正邱首仁也】投荒万里归烦公问健否【柳子厚诗一身去□六千里万死投荒十二年】往时望江宰今为夏津吏【望江属舒州夏津属北京乐天有立碑诗曰我闻望江县麴令抚惇嫠在官有仁政名不闻京师当是借用此事以言娄君之循良或尝为此县也】他日可教之玉音尚无弃【谓娄君有受道之质欲仲车教之也司马相如长门赋曰愿赐问而进兮得尚君之玉音注引诗曰无金玉尔音而有遐心老子曰常善救人故无弃人】

武昌松风阁【武昌今鄂州县】

依山筑阁见平川夜阑箕斗插屋椽我来名之意适然老松魁梧数百年斧斤所赦今参天风鸣娲皇五十弦洗耳不须菩萨泉【魁梧参天并见前注礼图曰庖牺氏作瑟五十弦此云娲皇未详东坡听琴诗曰归家且覓于斛水净洗从前箏笛耳又菩萨泉铭序曰寒溪少西数百步别为西山寺有泉出于嵌窞间色白而甘号曰菩萨泉建昌李常谓余岂昔阿育王所铸文殊金像之所在乎全像之见陈舜俞庐山记】嘉二三子甚好贤力贫买酒醉此筵夜雨鸣廊到晓悬相看不归卧僧毡泉枯石燥复潺湲山川光辉为我妍野僧早饥不能饘晓见寒谿有炊烟【二三子见鲁论东坡诗嘉我二三子楚辞曰观流水兮潺湲寰宇记曰樊山在鄂州武昌县西山东十步有冈冈中有寒溪张舜民南迁錄曰寒溪即元次山故居王介甫诗暝烟孤起隔林炊】东坡道人已沈泉张侯何时到眼前【东坡谪黄州时多往来武昌溪山间建中靖国元年还自海外七月歿于常州东都赋曰沈珠于泉此借用张侯谓文潜崇寧元年七月言者谓文潜知颍州曰闻苏轼卒饭僧缟素而哭遂自管勾亳州明道宫责授房州别驾黄州安置老杜诗多病秋风落君来慰眼前】钓台惊涛可画眠怡亭看篆蛟龙缠【元次山樊上漫歌曰丛石横大江人言是钓台按水经樊山北背大江江上有钓台孙权尝极饮其上欧公集古錄跋曰怡亭铭李阳水象裴虬撰铭在武昌江水中有小岛亭在其上铭刻于岛石老杜观薛稷书画壁诗曰郁鬱三大字蛟龙岌相缠】安得此身脱拘挛舟载诸友长周旋【汉书邹阳上书曰能越拘挛之见超域外之议退之诗挛拘屈吾身魏晋间多以交游为周旋又蜀志後主传注诸葛亮曰吾周旋陈元方郑康成间又世说曰郗嘉宾开库得钱一日乞与亲友周旋略尽】

次韵文潜

武昌赤壁吊周郎寒溪西山寻漫浪【吴志周瑜传吴中皆呼为周郎建安十三年九月曹公入荆州孙权遣瑜等与刘备并力逆曹公遇于赤壁黄盖放诸船同时发火曹公军马烧溺死者甚衆军遂大败按赤壁山在今鄂州蒲圻县而山谷所引盖指黄州赤壁与武昌对岸者东坡题赤壁赋後所谓黄州少西山麓斗入江石色如丹即此地也元次山自释曰将家灊滨乃自称浪士及有官时人以为浪者亦漫为官乎蒙呼为漫郎及家樊上漫遂显焉又曰以近文多漫浪之称故设之以自释】忽闻天上故人来呼船凌江不待饷【老杜诗天上张公子官中汉客星退之诗遂凌大江极东陬按孔稚圭大□举帆诗云凌江及涛涌挂帆追风翻】我瞻高明少吐气君亦欢喜失微恙【後汉孔融传李膺曰高明祖父与仆有旧乎东都赋曰咸含和而吐气老杜春陵行序曰万姓吐气又诗苏侯得数过观喜每倾倒文潜时有末疾故云微恙】年来鬼祟覆三豪词林根柢颇摇荡【三豪当是东坡先生及范淳夫秦少游于时皆死矣苏与秦山谷之师友范盖修史时同僚老杜八哀诗曰忆昔李公存词林有根柢庄子曰摇荡人心】天生大材竟何用只与千古拜图像【太白诗天生我材必有用此反而言之老杜诗古来材大难为用文选王元长策秀才文曰敷化一时余烈千古退之孔子庙碑曰像图孔肖】张侯文章殊不病历险心胆原自壮【言其文章无衰茶之气家语曰历险致远马力尽矣魏武帝乐府歌曰烈士暮年壮心不已老杜诗天河原自白】汀洲鸿鴈未安集风雪牖户当塞向有人出手办兹事正可隐几穷诸妄【鸿鴈诗序曰万民离散不安其居而能劳来还定安集之孟子曰国家闲暇明其政刑虽大国必畏之矣诗云迨天之未阴雨彻彼桑土绸缪綯户今此下民或敢侮予孔子曰为此诗者其知道乎能治其国家谁敢侮之诗意谓徽庙躬挽之初安民修政自有庙堂诸人身任此责吾曹但当学道山林尔七月诗云塞向墐户传灯录云岩签药山曰与和尚共出只手圆觉经曰于诸妄心亦不息灭】经行东坡眠食地拂拭宝墨生楚怆【法华经曰经行林中勤求佛道晋书郗超传曰大损眠食文选谢灵运拟邨中诗序曰撰文怀人感往增怆世说注妇人集载阮氏与许允书词甚酸楚元丰二年东坡诵居黄州放浪溪山间凡所游览见于赋咏人皆刻之石东坡集中俱载之今不复録出山谷作是诗时文潜亦谪于此故有经行东坡眠食地之句文潜闻东坡之丧编素而哭拂拭宝墨得无生楚怆耶此两句非独尽文潜之方寸又见其师友恋慕片言只字不敢顷刻忘也】水清石见君所知此是吾家秘密藏【水清石见具前注圆觉经曰为诸菩萨开秘密藏诗意谓贤愚邪正久而自明自古皆然非世俗所知也涅槃经曰愚人不解谓之秘藏智者了達则不名藏西清诗话载杜少陵诗云作诗用事要如释语水中着盐饮水万知?味此说诗家秘密藏也】和文潜舟中所题【旧本题云乘武昌小舟过黄冈木门间观张文潜次韵和李文举诗是日冒大风刺舟对赤鼻矶而渡江亦次文举韵】

云横疑有路天远欲无门【谓文潜初在朝路疑若自致青云然竟流落望君门而不可入也老杜诗云横雉尾高文选沈休文诗惟使云路通楚辞九歌曰广开兮天门纷吾乘兮玄云招魂曰虎豹九关啄害下人注谓天门九重虎豹啄啗天下欲上之人而杀之也】信矣江山美怀哉谴逐魂【王粲登楼赋曰虽信美而非吾土谴逐魂借用屈原事以言东坡旧谪黄州王逸楚辞章句曰宋玉怜屈原忠而斥弃魂魄放佚故作招魂诗曰怀哉怀哉曷月予旋归哉】长波空淮记佳句洗眊昏谁奈离愁得村醪或可尊【汉书扬雄传反离骚曰因江潭而淮记

兮欽吊楚之湘累注云????往也音于放反退之詩皇甫作詩止睡昏又詩兩目眊昏頭雪白玉篇眊音充支切目傷背也】

題君子泉

云夢澤南君子泉水無名字托人賢兩蘇翰墨相為重未刻他山世已傳【云夢澤南謂黃州杜牧之詩曰平生睡足處云夢澤南州黃州通判孟震亨之朝中謂為孟君子公字中有泉出甚清東坡因以名泉子由為之記東坡在常州有詩曰忽見東平孟君子夢中相對說黃州詩曰他山之石可以攻玉】

宿黃州觀音院鐘樓上

鐘鳴山川曉露下星斗濕老夫梳白頭潘何損箴集【老杜詩老夫清晨梳白頭玄都道士來相訪張文潛集中有同潘何小酌詩潘當是邠老邠老名大臨本閩人後家于黃文潛嘗為集序何當是斯舉斯舉名額之黃閩人山谷嘗與書取色矣舉矣為之字事見曾慥詩選詩曰伯氏吹塤仲氏吹箴】

謝何十三送蟹【山谷出峽後以病故頗開葷酒之戒】

形模雖入婦女笑風味可解壯士顏【彌明石鼎聯句曰形模婦女笑列子曰老商始一解顏而笑】寒蒲束縛十六輩已覺酒興生江山【退之毛□傳曰聚其族而加束縛焉羅研論蜀亂束縛之使自有二三老杜詩云山已發興玉佩仍當歌】

又借答送蟹韻并戲小何【三首皆見俗水集今附于此】

草泥本自行郭索玉人為開桃李顏【林逋詩草泥行郭索云木叫鉤輶按太玄經銳首曰蟹之郭索後蚰黃泉測曰蟹之郭索心不一也范望注云郭索多足貌李太白詩松柏本孤直難為桃李顏】恐似曹瞞說雞肋不比東阿舉肉山【魏志武帝紀云帝小字阿瞞後漢楊修傳曹操平漢中出教惟曰雞肋而已外曹莫能曉修獨曰夫雞肋食之則無所得棄之則如可惜公曰計決矣文選曹植子建與吳季重書曰願舉太山以為傾東海以為酒按魏志植傳徙封東阿王】

代二螯解嘲

仙儒昔日卷龜殼蛤蜊自可洗愁顏【淮南子曰盧敖游乎北海至蒙穀之上見處士者方卷龜殼而食蛤蜊敖與之語處士噤然笑曰子中州之人不疑而遠至此漢史司馬相如曰列仙之儒居山澤之間形容甚】不比二螯風味好那堪把酒對西山【荀子曰蟹六跪而二螯退之詩我來無一事把酒對南山此言西山謂武昌】

又借前韵见意

招潮庾恶无永味海镜纤毫只强颜想见霜脐当大嚼梦回雪压摩围山【海物异名记曰蟹之小者每潮欲来出穴举螯迎之名招潮子文选郭景纯江赋曰玉跳海月土?石华注引海水土物志曰海月大如镜白色正圆常死海边其柱如搔头大中食曹子建书曰过屠门而大嚼虽不得肉贵且快意此诗末句谓往在黔南雪中县□时尝作霜螯之想如昔人思尊鲈也】

次韵文潜立春日三绝句

眇然今日望欧梅已发黄州首更回试问淮南风月主新年桃李为谁开【王羲之帖云当今人物眇然山谷此诗在黄州所作盖东坡旧谪之地东坡举进士时欧阳文忠公梅圣俞爱其文置之异等後在黄州尝有帖云江山风月本无常主问者便是主人此引用以属文潜老杜诗西江首独回乐天诗村杏野桃繁似雪行人不醉为谁开】

谁怜旧日青钱选不立春风玉笋班【唐书张荐传祖鸢能文员半千称鸢文词犹青铜钱万选万中时号青钱学士文潜旧为起居舍人郑谷九日寄张超居诗曰浑无酒泛金英菊谩道官居玉笋班按北梦琐言曰唐末朝士中有人物者时号玉笋班又外郎班清紧不杂亦号玉笋班者也】传得黄州新句法老夫端欲把降幡【黄州句法亦谓东坡老杜诗佳句法如何长安薛氏有皇甫湜手帖云郾堂时高古风敢树降旗谓退之谿堂诗也又孙樵与王霜书曰诚谓足下怪于文方举降旗且大夸朋从间退之元和圣德颂曰降幡夜竖柱牧之诗拟把一麾江海去】

江山也似随春动花柳真成触眼新清浊尽须归瓮蚁吉凶更莫问波臣【老杜诗天边梅柳树相见几回新清浊酒用徐邈事见前注屈原卜居曰往见太卜詹尹詹尹乃端策拂龟屈原曰此孰吉孰凶何去何从庄子曰周顾视车辙中有鲋鱼焉周问之对曰我东海之波臣也此借用以言龟盖庄子又载宋元君梦□为清江使故尔】

再次前韵

春工调物似盐梅一一根中生意回风日安排催岁换丹青次第与花开【盐梅见书说命晋书殷仲文传曰此树婆娑生意尽矣乐天诗曰果参杂种千枝次第开】

久狎渔樵作往还晓风宫殿梦催班邻娃似与春争道酥滴花枝彩剪幡【老杜诗万里狎渔樵又诗他乡惟表弟还往莫辞□文选颜延年诗万古陈往还史记荆轲传鲁勾践与荆轲博争道又汉书吴王濞传吴太子侍皇太子饮博争道不恭此借用犹言争胜也元绦春帖子词曰幡字玲珑玉花房点滴酥续翰林志立春赐镂银饰彩胜之物】

酒有全功笔有神可将心付白头新春盘一任人争席莫道前衔是近臣【乐天诗曰湛湛樽中酒有功不自代文选阮元瑜书曰喜得全功老杜诗下笔如有神又诗春日春盘细生菜争

席见前注乐天诗十年不改旧官衙老杜诗宜居汉近臣】

山谷内集诗注卷十七

山谷内集诗注卷十八

<集部,别集类,北宋建隆至靖康,山谷内集诗注>

钦定四库全书

山谷内集诗注卷十八 宋 黄庭坚 撰

任渊注

梦中和觴字韵【并序】

崇寧二年正月己丑梦东坡先生于寒溪西山之间予诵寄元明觴字韵诗数篇东坡笑曰公诗更进于曩时因和予一篇语意清奇予击节赏叹东坡亦自喜于九曲岭道中连诵数过遂得之

天教兄弟各异方不使新年对举觴【退之送李正字序曰得燕而举一觴此天也非人力也文选李陵答苏武书曰异方之乐祇令人悲又刘琨书云时复相与举觴对膝】作云作雨手翻覆得马失马心清凉【老杜诗翻手作云覆手雨纷纷轻薄何须数淮南子曰近塞上之人有善术者马无故亡而入胡人皆吊之其父曰此何遽不为福乎居数月其马将胡骏马而归人皆贺之其父曰何遽不能为祸乎豕富良马其子好骑堕而折其髀人皆吊之其父曰何遽不为福乎居一年胡人入塞丁壮死者十九此独以跛之故父子相保仙人遏末曲曰独来勿与竞事过心清凉】何处胡椒八百斛谁家金钗十二行【唐书元载传籍其家胡椒至八百石乐府梁武帝河中之水歌曰河中之水向东流洛阳女儿名莫愁头上金钗十二行足下丝履五文章盖言其首饰之盛尔而白乐天酬牛思黯戏赠诗有钟乳三千两金钗十二行之句注言思黯之妓颇多与乐府意异云】一丘一壑可曳尾三沐三盥取刳肠【晋书谢鲲传或问论者以君方庾亮何如答曰端委庙堂使百僚准则鲲不如亮一丘一壑自谓过之曳尾见前注齐语曰庄公束縛管仲以予齐使齐使受之而退比至三盥三浴之桓公亲迎之于郊注云以香涂身曰盥亦或谓薰此借用以言堕于世网也按史记龟策传宋元王二年江使神龟使于河渔者豫且得之元王刑白雉骊羊以血灌龟于坛中史以刀剥之横其腹庄子曰神龟知能七十二钻而无遗策而不能避刳肠之患】

次韵吴可权题余干县白云亭【余干今隶饶州】

曩谁筑孤亭胜日有感遇永怀刘随州因榜白云句遗老不能谈岁月忽成屡绿阴斤斧尽华屋风雨仆【胜日见卫玠传其前注文选江淹拟卢谌诗曰羁旅去旧乡感遇喻琴瑟唐书陈子昂传为感遇诗三十八章文选陆机辨亡论曰招揽遗老唐人刘长卿字文房尝为随州刺史其集有云同姜濬题裴式微余干东齐亭诗八韵其首章四句云世事终成梦生涯欲半过白云心已矣沧海意如何曹子建诗生存华屋处零落归山丘】吴侯七闽英宰县有真趣【

七闽见前注谓福建也退之诗出宰山水县选诗悠悠蘊真趣】弦歌解民愠根节去吏蠹【鲁论曰子之武城闻弦歌之声注云子游为武城宰帝王世纪曰舜弹五弦琴歌南风诗曰南风之薰兮可以解吾民之愠兮退之郢州溪堂诗曰孰为邦螫节根之螟又祭马总文曰去其螟蠹】材收佛宫余工有子来助【灵台诗曰经始勿亟庶民子来】厦成燕雀贺水满鳧鴈翥【淮南子曰大厦成而燕雀相贺文选沈休文诗曰白水满春塘旅雁每回翔刘公干诗曰方塘含白水中有鳧与雁曹子建七啓曰翔尔鸿翥潏然鳧没】四海名士来一笑佳客聚【老杜宴历下亭诗曰海右此亭古济南名士多】云兴碧山留雨散清江去斯须成苍狗皆道不如故【云之或留或去其状如山与江也老杜诗天上浮云似白衣斯须改变如苍狗古乐府曰持缣来比素新人不如故】至人观万物谁有安立处【万物虚幻皆如浮云之无根也传灯録天台语曰至人以是独照能为万物之主圆觉经曰见闻觉知无处安立】寄语吴令君但遣糟牀注【老杜诗赖知禾黍收已觉糟牀注】

次韵廖明略同吴明府白云亭宴集【廖正一字明略安陆人元佑中召试馆职东坡大奇之俄除正字绍圣初贬信州玉山监税有诗文号曰白云集白云亭在饶州余于县】

江静明花竹山空响管弦【谢朓诗澄江净如练老杜诗山扉花竹幽後汉书皇甫规等赞曰谷静山空古乐府孔稚圭白紵歌曰山虚弓响彻汉书曰钟鼓管弦之音未衰】风生学士尘云绕令君筵【学士谓廖明略令君谓吴明府太白诗山闲明镜转云绕画屏移又云作诗掉我惊逸兴白云绕笔牕前飞】百越余生聚三吴远接连【輿地记曰饶州余干县即干越之地汉书贾谊过秦论南取百越之地地理志臣瓚注曰自交趾至会稽七八千里百越杂处各有种姓通典曰吴郡与吴兴丹阳为三吴左传伍员曰越十年生聚而十年教训退之诗周楚仍连接老杜诗野水春来更接连】庖霜刀落绘执玉酒明船【上句旧作鱠鲂刀落雪韩孟城南联句曰庖霜鱠鲜鲫曲礼曰执玉不趋船谓玉酒船老杜诗月朗自明船此借用】叶县飞来舄壶公谪处天【上句以属吴下句以属廖选诗王乔飞舄按後汉王乔传显宗世为叶令每月朔尝自县诣台帝令太史伺望之言其临至辄有双舄从东南飞来于是候舄至举罗张之但得一只履焉则所赐尚书官属履也又费长房传曰市中有老翁卖药悬一壶于肆翁乃与长房俱入壶中惟见玉堂严丽旨酒甘肴盈衍其中太白诗壶中别有日月天】酌时多暴谑舞短更成妍【汉书盖宽饶曰毋多酌我左太冲吴都赋云鄱阳暴谑盖取诗所谓善戏谑兮不为虐兮之意鄱阳今饶州陶岳零陵记曰长沙王发于上前自为短舞人笑其拙选诗曰皎洁不成妍】惟我孤登览观诗未究宣空余五字赏文似两京然【谓观明略诗未能究景物之详然叹赏其五字律如两汉苏李曹刘之作也汉书儒林传序曰小吏浅闻未能究宣後汉书张衡传拟班固两都作二京赋孟子曰夫道若大路然】医是肱三折官当岁九迁【肱三折见前注言经忧患之多退之上张仆射书曰一岁九迁其官】老夫看镜罢衰白敢争先【老杜诗勲业频看镜又诗衰白已光辉】

病来十日不举酒二首

病来十日不举酒回施青春与後生满袖东风惬人意见君诗与字俱清【王羲之帖云官奴小女玉润病来十余日了不令民知回施盖用佛家语杨凝式诗无限欢娱荣乐事一时回施

少年人刘禹锡诗分付莺花与後生老杜诗幽意忽不惬】病来十日不举酒独卧南牀春草生承君折送袁家紫令我兴发郎官清【南史谢惠连族兄灵运尝于永嘉西堂思诗忽梦见惠连即得池塘生春草袁家紫当是牡丹名郎官清盖酒名国史补云酒则京城之郎官清】

题小景扇

草色青青柳色黄桃花零落杏花香春风不解吹愁却春日偏能惹恨长【文选古诗青青河畔草太白诗柳色黄金嫩】

鄂州南楼书事四首

四顾山光接水光凭栏十里芰荷香清风明月无人管并作南楼一味凉【庄子曰为之四顾为之踌躇常建诗山光悦鸟性退之诗曲江荷花盖十里太平广记鬼诗明月清风良宵会同欧阳公诗惟有清秋一味凉】

画阁传觞容十客透风透月两明轩南楼盘礴三百尺天上云居不足言【文选郭璞江赋曰荆门闳竦而盘礴李善注曰广大貌退之诗火烧水转扫地空突兀便高三百尺江南谚曰天上云居地上归宗盖云居在山之絶顶旧属洪州今属南康军】势压湖南可长雄胸吞云梦略从容北船未尝覩巨丽复阁重楼天际逢【前汉鲍宣传曰上党少豪俊易长雄退之祭鳄鱼文亦曰争为长雄胸吞云梦见前注子虚赋曰君未覩夫巨丽也文选景福殿赋曰复阁重闱谢朓诗天际识归舟】

武昌参佐幕中画我亦来追六月凉老子平生殊不浅诸君少住对胡牀【武昌盖用庾亮事见前注世说注刘弘谓陶侃曰吾昔为羊太傅参佐文选谢宣远诗曰婉婉幕中画後汉仲长统传曰濯清水追凉风老杜诗忆昔好追凉故遶池边树】

南楼画阁观方公悦二小诗戏次韵

十年华屋网蛛尘大旆重来一日新五凤楼前修造手个中余刃亦精神【华屋见前注张协杂诗曰蜘蛛网四屋杨文公谈苑曰韩浦韩洎咸有词学洎意尝轻浦谓人曰吾兄为文譬绳枢草舍吾之为文是造五凤楼手庄子曰恢恢然其于游刃必有余地者矣】

重山复水绕深幽不见高贤独倚楼手拂壁间留恨句凌波微步有人愁【老杜诗不见高人王右丞又诗行藏独倚楼洛神赋曰凌波微步罗袜生尘李太白乐府云有人楼上愁】

庭坚以去岁九月至鄂登南楼叹其制作之美成长句久欲寄远因循至今书呈公悦

江东湖北行画图鄂州南楼天下无【老杜诗阆州城南天下稀】高明广深势抱合表里江山来画阁【左传曰表里山河必无害也笔谈载卢宗回慈恩塔诗曰百二山河表里观】雪

筵披襟夏簟寒胸吞云梦何足言【言冬暖而夏凉也雪筵用文选谢惠连雪赋意宋玉风赋曰有风飒然而至王乃披襟而当之曰快哉此风江文通别赋曰夏簟清兮尽不暮汉书司马相如传曰吞若云梦者八九于其胸中曾不蒂芥】庾公风流冷似铁谁其继之方公悦【晋书庾亮传在武昌诸佐史乘秋夜共登南楼亮至诸人将起避之亮曰诸君少住老子在此处兴复不浅更据胡牀谈咏老杜诗布衾多年冷似铁左传曰子产而死谁其嗣之公悦名泽】

养鬪鸡

峥嵘已介季氏甲更以黄金饰两戈【左传曰季郈之鸡鬪季氏介其鸡郈氏为之金距注云捣芥子播其羽也或曰以胶沙播之为介鸡韩孟鬪鸡联句曰峥嵘颠盛气洗刷凝鲜彩既取冠为胄复以距为镢】虽有英心甘鬪死其如纪渚木鸡何【韩孟鬪鸡联句曰英心甘鬪死义肉耻庖宰列子曰纪渚子为周宣王养鬪鸡十日而问鸡可鬪乎曰未也方虚骄而恃气十日又问之曰未也犹疾视而盛气卞日又问之曰几矣鸡虽有鸣者已无变矣望之似木鸡矣异鸡无敢应者反走耳】

顏徒贫乐斋二首【顏徒姓黄名友顏侍御史昭之第三子山谷有手帖叙宗盟之好】

衡门低首过环堵容膝坐【诗云衡门之下可以栖迟注云衡门横木为门言浅陋也礼记曰儒有一亩之宫环堵之室韩诗外传北郭先生妻曰结驷列骑所安不过容膝渊明归去来词审容膝之易安】四旁无给侍百纳自纏裹【考工记曰夏后氏世室四旁两夹窻维摩经曰文殊师利言居士此室何以空无侍者维摩诘言诸佛国土亦复皆空涅槃经佛告文殊汝已朽迈当须使人云何方欲为我给侍乐天诗百纳头陀任运僧】论事直如弦观书曲肱卧【後汉五行志顺帝之末京都童謡曰直如弦死道边曲如鉤反封侯曲肱见鲁论】饥来或乞食有道无不可【饥而乞食如陶渊明之徒不害其真也渊明有乞食诗曰饥来驱我去不知竟何之列子曰子列子穷容貌有饥色客有言之郑子阳者曰列御寇盖有道之士也子阳遗之粟子列子再拜而辞孔子曰我则异于是无可无不可】

小山作友朋义重子舆桑【卢仝诗草石是亲情此句颇采其意庄子曰子舆与子桑友而淋雨十日子舆曰子桑殆病矣裹饭而往食之】香草当姬妾不须珠翠妆【王逸离骚序曰善鸟香草以配忠贞乐天诗綠桂为佳客红蕉当美人曹子建七啓曰山鷓斥鷃珠翠之珍】鸟乌窥冻砚星月入幽房【左传曰鸟乌之声乐郑谷燕诗曰闲凡砚中窥水浅落花径里得泥香文选陆机诗安寝北堂下明月入我牖潘安仁哀永逝文曰抚灵櫟兮诀幽房退之诗幽房无人感蜉蝣此借用】儿报无炊米浩歌绕屋梁【旧唐书韩愈传虽晨炊不给怡然不介意老杜诗长歌激屋梁按列子曰韩娥东之齐匱粮过雍门鬻歌假食既去而余音绕梁欂三日不絶此借用以言能傲贫贱也楚词九歌曰临风愧兮浩歌宋玉神女赋曰耀乎若白日初出照屋梁】

和凉轩二首

打荷看急雨吞月任行云夜半蚊雷起西风为解纷【梁元帝与武陵书曰聚蚊成雷史记滑稽传曰谈言微中可以解纷】

茗椀梦中觉荷花镜里香凉生只当处暑退亦无方【退之诗平铺红渠盖明镜楞严经曰当处出生随处灭尽雄摩经曰来者无所从来去者无所至易曰神无方易无体】

题默轩和遵老

平生三业净在俗亦超然佛事一盂饭横眠不学禅【摄论云菩萨戒以身口意三业为体老子曰虽有荣观燕处超然传灯录大安禅师传曰安在汾山三十年吃汾山饭不学汾山禅慈明和尚因事颂曰时来开鉢展巾单饭了收盂困即眠】松风佳客共茶梦小僧圆【传灯录汾山谓仰山曰我适来得一梦汝试为我原看仰山取一盆水与师洗面少顷香严乃点一椀茶来师云二子见解过于鶩子原梦或作圆梦按南唐近事冯僊举进士时有徐文幼能圆梦云云】漫续山家颂非诗莫浪传【老杜诗将诗莫浪传】

次韵文安国纪梦【苏子由栳城後集第一卷亦载此诗但更其题云赠姚道人当细考之】

道人偶许俗人知法喜非妻解养儿【法喜见前注】夜久金茎添沆瀣室虚壁月映琉璃【班固西都赋曰抗仙掌以承露擢双筩之金茎楚辞曰餐六气而饮沆瀣兮正阳而食朝霞大人赋注云北方夜半气也室虚及壁月并见前注楞严经曰反流全一六用不行十方国土皎然清净譬如琉璃内悬明月身心快然妙圆平等】远来醉侠忽忽去近出诗仙句句奇独怪区区践绳墨相逢未省角巾敲【醉侠诗仙似指吕洞宾後汉郭泰传尝行遇雨巾一角垫老杜诗数语敲纱?】

寄贺方回【贺铸字方回少为武吏换文资善长短句】

少游醉卧古藤下谁与愁眉唱一盃解作江南断肠句只今惟有贺方回【秦少游好事近曲曰醉卧古藤阴下了不知南北贺方回青玉案曲曰彩笔新题断肠句两曲皆知名于世时少游已死矣】

文安国挽词二首【文勋字安国】

七闽家举子百粤海还珠【七闽百粤皆见前注魏志郑浑传迁邵陵令民生子率皆不举浑重去子之法民畏罪无不举赡所育男女多以郑为字後汉书孟尝传迁合浦太守海出珠宝先时宰守贪秽珠遂潜徙交趾尝到官草易前弊曾未踰岁去珠复还】往日推忠厚穷年领转输【庄子曰所以穷年也此备用汉书主父偃传曰天下飞鸟挽粟转输北河】一牀遗杖屨万事委锱铢【遗杖屨言其但有虚座曲礼曰君子欠伸撰杖屨委锱铢言轻视之也礼记儒行曰虽分国如锱铢注曰言君分国以禄之视之轻如锱铢矣八两曰锱十锱曰铢案说文锱六铢也宜以为正】岂有苍茫恨归巢未拮据【退之孤独申叔哀词曰衆万之生谁非天

耶胡喜厚其所薄而常不足于贤耶柳苍茫无端而暂寓于其间耶此引用以言安国乐天委命不复恨造物之渺茫所遗憾者独未有家为终焉之计尔鸛鵒诗曰予手拮据予所捋荼予所蓄租予口卒瘁曰予未有室家注云拮据擻局也言作之至苦故能攻坚】

平生翰墨学空走使臣车【安国善小篆诗曰皇皇者华君遣使臣也】瞿令能苍史归公好古书【元次山阳华严铭序曰江华县大夫瞿令问艺兼篆籀并依石经刊之法书苑曰古文篆者黄帝史苍颉所作退之科斗书後记曰愈为四门博士识归公归公好古书能通之按归公名登唐书有传】秦山刊日月周鼓颂畋渔【按史记秦始皇纪二十八年刻石泰山及琅邪台二十八年刻石之罘三十七年刻石会稽皆李斯篆石鼓旧在凤翔府孔子庙世传以为周宣王鼓其词曰我车既攻我马既同又云其鱼为何维𩚰与鲤何以贯之维杨与柳易系词曰以佃以渔】不见龙蛇笔新乾研滴蜎【龙蛇笔见前注西京杂记广川王去疾发袁盎冢得玉蟾蜍一枚腹空容五合水王取以盛书滴】

鄂州节推陈荣绪惠示沿檄崇阳道中六诗老懒不能追韵辄自取韵奉和

头陀寺

头陀全盛时宫殿梯空级【头陀义见前注退之诗梯空上秋旻】城中望金碧云外僧【鲁宗道诗殿古寒炉空流尘暗金碧前人诗云头陀云外僧气多 见前注】人亡经禅尽屋破龙象泣【荀子曰其器存其人亡文选陆机演连珠云道系于神人亡则?圭峯禅师禅原集序曰经是佛语禅是佛意退之诗破屋数间而已矣智度论曰龙象言其力大龙水行中力大象陆行中力大维摩经曰龙象蹴踏非驴所堪今以负荷大法者比之龙象传灯録達磨传曰波罗提法中龙象老杜山寺诗如闻龙象泣足今信者衰】惟有简栖碑文字岿然立【文选有王简栖头陀寺碑注引姓氏英贤録曰王?字简栖碑在鄂州题云齐国録事参军琅邪王?制文选王文考灵光殿赋序曰自西京未央建章之殿皆见隳壤而灵光岿然独存李善注云岿然高大坚固貌音期轨切】

道中闻松声

蟠空作风雨发地鸣鼓吹【老杜四松诗曰勿矜千载後惨澹蟠穹苍後汉公孙瓚传曰梯冲舞吾楼上鼓角鸣于地中东坡残腊独出诗云风松独不静送我作鼓吹以松声作鼓吹非得幽隐之趣者果能道此耶】日晴四无人声在高林际【退之履霜操曰四无人声谁与儿语欧阳公秋声赋四无人声在树间意盖类此】伊优儿女语蹇浅市井议【言二者皆不足听伊优见前注退之诗昵昵儿女语庄子曰弊精神于蹇浅杨子曰市井相与言则以财与利张平子西京赋曰街谈巷议】我欲抱七弦写此以卒岁【琴有风入松曲文选嵇康书抱琴行吟弋钓草野欧阳公诗携琴写幽泉诗曰优哉游哉聊以卒岁】

中秋山行怀子兴节判

俗物常堦塞令人眼生白【俗物见前注退之南山诗曰堦塞生恂愁晋书阮籍传能为青白眼见礼俗之士以白眼对之庄子曰虚室生白此借用】永怀洛阳人谈诗论画壁【洛阳当是荣绪乡里贾谊传曰洛阳之人年少初学】青山吐秋月阻作南楼客【老杜诗四更山吐月残夜水明楼鄂州有南楼盖因瘦亮故事】但歌靡盬诗赏此无瑕璧【北山诗序曰已劳于从事不得养其父母诗曰王事靡盬忧我父母南史陈後主沈后附传曰其玉树後庭花等其略云璧月夜夜满琼枝朝朝新史记蔺相如传曰璧有瑕请指示王此反而用之以言月也】

再登莲落岭怀君泽知録

邑下羹不和幕中往调护【左传曰和如羹焉宰夫和之齐之以味济其不及以泄其过汉书张良传曰烦公幸卒调护太子】纷争非士则各使捐细故【退之诗初喧或纷争中静杂嘲戏郭有道作陈太丘碑曰言为世范行为士则老杜诗深衷见士则又云记忆细故非高贤按汉书匈奴传文帝诏曰皆捐细故俱蹈大道】颇忆郗参军能令公喜怒【晋书郗超传桓温辟王珣为主簿超为参军荆人语曰髯参军短主簿能令公喜能令公怒此引用以指君泽】应知鞅掌车历尽崔嵬路【北山诗曰或栖迟偃仰或王事鞅掌传曰鞅掌失容也笺云鞅犹荷也掌谓捧之也负荷捧持以趋走言促遽也卷耳诗曰陟彼崔嵬我马虺隤】

崇阳道中【崇阳县隶鄂州】

张公少为令愍俗有遗书【张咏字复之尝为崇阳令梁书司马相如传家无遗书】左贩洞庭橘右担彭蠡鱼【左传曰三苗氏之国左洞庭右彭蠡】歌奔中夜女归抱十年雏【元注云借一韵】近岁多儒学仁风似有初【言风俗之美自张公始也檀弓曰夫鲁有初】

晚发咸寧行松径至芦子

咸寧走芦子终日乔木阴太丘心洒落古松韵清深聊持不俗耳静听无弦琴【後汉陈实为太邱长此引用以比荣绪文选江文通杂体诗曰五难既洒落超迹絶尘网无弦琴见前注】非今胡部律而独可人心【唐书乐志开元二十四年升胡部于堂上又诏道调法曲与胡部新声合作大方便报恩经曰善友太子善巧禅琴其音和雅悦可衆心悉得充足退之王适墓志曰惟此翁可人意】

陈荣绪惠示之字韵诗推獎过实非所敢当辄次高韵三首

纷纷不可耐君子有忧之【老杜诗纷纷轻薄何须数梁武帝评书曰王子敬书如河朔少年举体?拖而不可耐孟子曰圣人犹忧之按山谷前和荣绪诗有云邑下羹不和幕中往调护纷争非士则各使捐细故此诗亦指其事】鞅掌诚庄语贤劳似怨诗【北山诗曰或王事鞅掌其详见前注又曰大夫不均我从事独贤注云贤劳也庄子曰以天下为沉浊不可与庄语鲁论曰诗可以怨晋书桓伊传抚箏而歌怨诗】颓波閼砥柱浊水得摩尼【元注曰杜子美云

唯有摩尼珠可照浊水源砥柱见前注上句言独立不改下句言心地圆明】知我无枝叶剥心只有皮【见前次韵杨明叔古诗注但其意微异退之枯树诗曰老树无枝叶风霜不复侵腹穿人可过皮剥蚁还寻】

太丘胸量濶一苇莫杭之【後汉陈寔传曰天下服其德後除太丘长许劭传曰太丘道广广则难周诗曰谁谓河广一苇杭之此借用盖取黄叔度汪汪如千顷陂之意】万事不挂眼四愁犹有诗【退之诗吾老嗜读书余事不挂眼文选张衡四愁诗序曰阳嘉中出为河间相天下渐弊鬱鬱不得志为四愁诗】状闲聊闾葺心洁似毗尼【原注云僧律也汉司马迁书曰在闾葺之中注云闾下也葺细毛也言非豪楚也佛氏以修多罗为经毗尼为律阿比昙为论皆梵语也】早晚同舟去烟波学子皮【唐书张志和自号为烟波钓徒史记货殖传曰范蠡乘扁舟浮于江湖变名易姓适齐为夷子皮】

十家有忠信江夏可无之【鲁论曰十室之邑必有忠信如丘者焉江夏即鄂州荣绪时为幕官】政苦寄卖友忽闻衡说诗【汉书赞曰天下以酈寄为卖友又匡衡传诸儒语曰匡说诗解人颐】饥蒙青粃饭寒赠紫袍尼【原注曰蕃褐粃当作饥按道藏青虚真人王君记载太极真人青精乾石饥饭上仙灵方云服之使人颜童聪明延年无病按道藏经音义云粃音信又音峻亦作饥字】酬报矜难巧深慙陵与皮【原注云再和之字非以作难得巧为工亦欲见诗之无穷尔退之诗发难得巧意气麤北梦琐言皮曰休与陆龟蒙为文友按二人皆能诗有松陵唱和集】

山谷内集诗注卷十八

山谷内集诗注卷十九

钦定四库全书

山谷内集诗注卷十九 宋 黄庭坚 撰

任渊注

德孺五丈和之字诗韵难而愈工辄复和成可发一笑【范德孺见前注】

且然聊尔耳得也自知之【诗意谓唱酬之作聊且遣兴不必甚工至其自得之妙盖未易与俗人言也老杜所谓文章千古事得失寸心知又云同调嗟谁惜论文笑自知山谷盖用此意庄子曰且然无问谓之命晋书阮咸曰未能免俗聊复尔耳老子曰自知之谓明此并借用】独笑真成梦狂歌或似诗【狂歌谓如楚接舆之流语言过差恐其似诗为人据拾不可不戒亦终上句之意按实录元佑四年四月吴处厚言蔡确昨谪安州作车盖亭十绝句皆涉讥讪其诗有云纸屏石枕竹方牀手倦抛书午梦长睡起莞然成独笑数声渔笛在沧浪今朝廷政事清明上下和乐不知蔡确独笑何事诏确责授英州别驾新州安置范忠宣公纯仁时为右相乞薄确之罪不从遂出知颖昌府忠宣即德孺之兄也故此诗及之其事逮今已十余年故云成梦唐人刘长卿诗世事终成梦老杜诗狂歌托圣朝】照滩禽郭索烧野得伊尼【原注云鹿名出佛书○郭索谓蟹见前注般若经曰世尊三十二相第八相名双腩纖圆如伊尼延鹿王】早晚来同醉僧窗卧虎皮【老杜诗遥闻出巡守早晚遍遐荒礼曰虎豹之皮示服猛也左传卢蒲癸曰譬之如禽兽吾寝处之矣注云能杀而席其皮】

次韵德孺新居病起

潭潭经略府寂寂闭门居【退之诗一为公与相潭潭府中居南史王融传曰为尔寂寂邓禹笑人德孺长为西帅今乃迁谪言无穷达之异观】京洛圣贤宅江湖鱼鼃窟【选诗京洛多风尘京洛盖古帝都书洛诰曰召公既相宅德孺家在颖昌本西洛王畿之地今与鱼鼃同居言无遐迹之异观也越语范蠡曰吾先君改滨于东海之陂鼃鼃鱼鼃之与处而鼃鼃之与同渚尚书禹贡曰大野既鼃】官如一梦觉话胜十年书【上句用邯郸梦事退之祭柳子厚文云人之生世如梦一觉下句用前辈诗共君一夜话胜读十年书之意】稍喜过从近扶筇不驾车【刘禹锡诗官班高後少过从】

次韵德孺感兴二首

于此吾忘我从谁尺直寻【庄子齐物篇南郭子綦曰今者吾丧我汝知之乎注云我自忘矣天下有何物足识哉孟子曰枉尺而直寻者以利言也注谓陈代欲使孟子屈已伸道】事来千万种人有两三心【世变无常而人心亦异当元佑绍圣崇宁之间士全其守者鲜矣文选南都赋曰百种千名法华经偈曰施佛及僧千万亿种史记田叔传褚先生曰武帝以任安坐

观成败有两心孔丛子谓孔子不见晏子曰晏子事三君而得顺焉是有三心所以不见也【自守藩篱小犹能井臼任】贾谊过秦论曰使蒙恬北筑长城而守藩篱此借用文选宋玉对楚王问曰夫藩篱之鷦岂能与之料天地之高哉又顔延年作陶渊明诔曰少而贫病居无仆妾井臼弗任藜藿不给李善注引列女传周南大夫之妻谓其夫曰亲操井臼不择妻而娶【过时虽不采吾与菊花斟】此语盖有所寄文选古诗曰伤彼蕙兰花含英扬光辉过时而不采将随秋草萎此借用渊明诗酒能驱百虑菊为制颓龄老杜诗坐开桑落酒来把菊花枝】

眼前尝废忘事往更追寻【言目前事犹不记忆往事可复寻绎耶往事谓绍圣党祸法华经曰而寻废忘不知不觉乐天诗旧游多废忘文选阮嗣宗诗曰高蔡相追寻王羲之帖曰追寻伤悼但有痛心】爱酒陶元亮着书王仲任【昭明太子作渊明传曰性嗜酒或置酒招之造饮辄尽後汉书王充字仲任闭门潜思着论衡】寒蒲虽有节枯木已无心【言有自守之节而无向荣之心老杜诗风断青蒲节文选陆机连珠曰劲陰杀节不雕寒木之心此反其意】客至还须饮逢欢起自斟【渊明诗酒熟吾自斟】

次韵德孺惠贶秋字之句

少日才华接贵游老来忠义气横秋【周礼师氏曰凡?之贵游子弟学焉文选北山移文云霜气横秋】未应白髮如霜草不见丹砂似箭头【言未应髮髮遽白岂不见有却老之丹砂耶本草图经曰丹砂生石上状若芙蓉头箭簇连牀者紫黯若铁色而光明莹彻真辰砂也老杜诗本无丹竈术那免白头翁此反而用之】顾我今成丧家狗期君早作济川舟【史记孔子世家曰孔子适郑与弟子相失独立郭门郑人谓子贡曰东门有人累累然若丧家之狗书说命曰若济巨川用汝作舟楫】汉家宗庙英灵在定是寒儒浪自愁【言区区忧国之心徒过计耳】

求范子默染鸦青纸二首

学似贫家老破除古今迷忘失三余极知鹄白非新得漫染鸦青袭旧书【魏志文帝纪评注曰人少好学则思专长则善忘退之诗破除万事无过酒三余见前注庄子曰鹄不日浴而白乌不日黔而黑此引用言天真本性非因学而有得然旧书亦不可弃也阌子曰革匱十重缁巾十袭】

深如女髮兰膏罢明似山光夜月余【女髮山光皆取其青色楚辞曰兰膏明烛】为染溪藤三百个待渠湔拂一牀书【唐舒元舆有吊剡藤文谓剡溪以藤为纸语林云王右军为会稽库中有牋纸九万枚枚即个也李善注文选广絶交论云翦拂与湔拔同】

谢荣绪惠贶鲜鲫

偶思煖老庖玄鲫公遣霜鳞贯柳来【老杜诗煖老思燕玉退之城南聯句云庖霜鱸玄鲫石鼓文曰其鱼维何维鰾维鲤何以贯之维扬与柳】鼈臼方看金作屑鱸盘已见雪成堆【蔡

邕题邯郸淳所作曹娥碑後曰黄绢幼妇外孙藿白谓絶妙好辞也藿白受辛受辛即辞字金屑谓以橙为藿也隋唐嘉话有金藿玉鱠此借用老杜设鲤歌曰无声细下飞碎雪又云放筴未觉金盘空退之雪诗凸处遂成堆】

谢荣绪割鼈见贻二首【旧本云荣绪见酬割鲜诗有要见无拘碍之句戏答】

何处惊麋触祸机烦君遣骑割鲜肥【文选沈休文诗曰惊麋去不息李善注云江东人呼鹿曰麋班彪王命论曰探祸福之机文选陈琳檄豫州曰动足触机陷老杜诗大官喜我来遣骑问所须班固西都赋曰割鲜野食孟郊诗豪人饫鲜肥】秋来多病新开肉粝饭寒菹得解围【乐天诗月中斋满谁开素老杜诗百年粗粝腐儒餐寒菹见前注解围言有所救助也晋书谢道韞传曰为小郎解围】

二十余年枯淡过病来筴下剧甘肥果然口腹为灾怪梦去呼鹰雪打围【枯淡见前注孟子曰肥甘不足於口与襄阳耆旧传刘表任荆州刺史筑台名呼鹰打围见前注】

吴执中有两鹅为余烹之戏赠

学书池上一双鹅宛颈相迫笔意多皆为涪翁赴汤鼎主人言汝不能歌【上两句用王羲之事曾子固作墨池记曰临川新城之上有池洼然而方以长曰王羲之之墨池者荀伯子临川记云也羲之尝慕张芝临池学书池水尽黑此为其故迹换鹅见晋书本传西京杂记鹤赋曰宛修颈而顾步下句盖用庄子烹鴈意以戏之世以婢子为鸭谓吴贵鸭而贱鹅也山谷尝有乐府其略云闻道君家有翠娥施朱施粉总嫌多为君写就黄庭了不要山陰道士鹅山谷亦号涪翁】秋冬之间鄂渚絶市无蟹今日偶得数枚吐沫相濡乃可悯笑戏成小诗三首

怒目横行与虎争寒沙奔火祸胎成【晋书刘伶酒德颂曰怒目切齿文选丘希范诗析析寒沙涨奔火如退之叉鱼诗所谓迷火逃翻近是也汉书枚乘传曰福生有基祸生有胎】虽为天上三辰次未免人间五鼎烹【陰阳家以井鬼之分为巨蟹宫左传曰三辰旗旗昭其明也次谓日月之会汉书律历志曰凡十二次又主父偃传曰死则五鼎烹】

勃率髴跚烝涉波草泥出没尚横戈也知馘觫元无罪奈此尊前风味何【汉书司马相如子虚赋曰馘觫勃率而上金堤注云匍匐上也髴音盘跚音先安切率音先忽切诗曰有豕白蹢烝涉波矣横戈见前注孟子曰吾不忍其觫又曰无罪而就死地此借用风味见前注】

解缚华堂一座倾忍堪支解见姜橙东归却为鲈鱼鱠未敢知言许季鹰【老杜缚鸡行曰吾叱奴人解其缚文选嵇康琴赋曰华堂曲宴汉书司马相如传曰一座尽倾赵充国传曰此坐支解羌虏之具晋书张翰字季鹰见秋风起思吴中菰菜蓴羹鲈鱼鱠遂命驾而归孟子曰我知言】

甯子与追和予岳阳楼诗复次韵二首

去年新霁独凭栏山似樊姬拥髻鬟个里宛然多事在世间遥望但云山【文选高唐赋曰遇天雨之新霁赵飞燕外传序曰伶玄买妾樊通德有才色颇能言赵飞燕姊弟故事顾视独影以手拥髻凄然泣下此诗末句自扫除幼妄之想言世之无知者但见山是山水是水反无心外之念殊觉省事也盖山谷前诗有绾结湘娥十二鬟之语蔡琰胡笳曰云山万重兮归路遐】

轩皇乐罢拱朝班天地为家不闭关惟有金炉紫烟起至今留作御前山【庄子曰黄帝张乐于洞庭之野君山在洞庭中故引用此事礼记曰圣人能以天下为一家此诗末句以君山比薰炉贾至诗衣冠身惹御炉香选诗驾鸿乘紫烟蜀道有御爱山】

和甯子与白鹿寺【寺在潭州】

谷郎岩开见佛灯云遮雾掩碧层层青山得意看流水白鹿归来失旧僧【白鹿盖寺中故事未详】

谢人惠猫头笋

长沙一月煨鞭笋鸚鵡洲前人未知走送烦公助汤饼猫头突兀想穿篱【长沙即潭州鸚鵡洲在武昌退之诗蔷薇蘸水笋穿篱】

短韵奉乞腊梅

卧云庄上残花笑香似早梅开不迟浅色春衫弄风日遣来当为作新诗【老杜诗花残步履迟退之送郑校理诗云归骑春衫薄】

以酒渴爱江清作五小诗寄廖明略学士兼简初和父主簿【老杜诗酒渴爱江清余酣漱晚汀】

将发沔鄂间尽醉竹林酒【汉水入江处谓之沔口在今汉阳军汉阳与鄂隔江相望廖明略安陆人自号竹林居士初虞世字和父】二三石友辈未肯弃老朽【文选潘安仁诗曰投分寄石友白首同所归南史沈庆之诗曰朽老筋力尽徒步还南冈】借问坐客谁卢溪紫髯叟【文选郭景纯诗曰借问此何谁云是鬼谷子卢溪盖初和父所居山谷有卢泉诗吴志孙权传注献帝春秋曰张辽问吴降人向有紫髯将军是谁答曰是孙会稽】此翁今惜醉旧不论升斗【老杜遭田父泥饮歌曰月出遮我留仍嗔问升斗】

平生思故人江汉不解渴【蜀志诸葛亮传曰思贤如渴老杜诗矇目踰十旬大江不止渴】谁言放逐地烧烛饮至跋【退之诗孤臣昔放逐曲礼曰烛不见跋注云跋本也烛尽则去之嫌若烬多有厌倦】忧予先狗马劝以爱肤髮【扬雄美新文曰臣常有颠眊病恐一旦先狗马填沟壑髮肤见孝经】有罪当窜流但惧不得活【退之诗潮州?处所有罪乃窜流又黄陵】

庙碑曰惧不得脱死庄子曰先生不得饱弟子虽饥不忘天下日夜不休曰我必得活哉山谷时有宜州之行故云】

廖侯劝我酒此亦雅所爱【退之诗人皆劝我酒我若耳不闻】中年刚制之常惧作灾怪【酒诰曰矧汝刚制于酒北史齐文宣帝纪曰惟数饮酒麴蘖成灾因而致毙】连台盘拗倒故人不相贷【唐书五行志龙朔中时人酒令曰子母相去离连台拗倒裕为盃盘为子母又名盘为台老杜诗共指西日不相贷】谁能知许事痛饮且一快【南书王融传沈昭略云不知许事且食蛤蜊世说王孝伯曰痛饮读离骚便足称名士又庾冰卒曰常患不得快饮酒曹子建书曰虽不得肉贵且快意东坡海外诗焰火生薪聊一快】

竹林文章伯国士无与双比来少制作非以弱故降【老杜诗每语见许文章伯按吴志张紘传曰此间率少文章易为雄伯】景阳机中锦犹衣被丘江【南史江淹传淹梦一人自称张景阳谓曰前以一匹锦相寄今可见还掩探怀中得数尺与之此人大恚曰那得割截都尽顾见丘迟曰余此数尺既无所用以遗君自尔淹文章蹶矣按晋书张载字景阳】时时能度曲秀句入新腔【汉书元帝纪曰自度曲被歌声注谓自隐度作新曲以为歌诗声也音大各反一说谓歌终更授其次谓之度曲老杜诗最传秀句寰区满】

斯人絕少可白眼视公聊每与俗物逢三沐取洁清【斯人谓明略白眼俗物并见前注三沐取洁清谓其浼我也韩文三沐而三熏之】我亦漫浪者君何许同盟【漫浪用元次山事见前注孟子曰桓公葵丘之会束牲载书而不訾血曰凡我同盟之人既盟之後言归於好】试问卢溪叟犹得多可名【言和父尤耿介尚以明略为多可也嵇康与山涛絕交书曰足下旁通多可而少怪】

四休居士诗三首【并序】

太医孙君昉字景初为士大夫发药多不受谢自号四休居士山谷问其说四休笑曰粗茶淡饭饱即休补破遮寒煖即休三平二满过即休不贪不妒老即休山谷曰此安乐法也夫少欲者不伐之家也知足者极乐之国也四休家有三畎园花木郁郁客来煮茗传酒谈上都贵游人间可喜事或茗寒酒冷宾主皆忘其居与予相望暇则步草径相寻故作小诗遗家僮歌之以侑酒茗其诗曰

富贵何时润髑髅守钱奴与拘官囚【列子曰死後荣名岂足润枯骨又曰子列子适卫食于道从者见百岁髑髅後汉马援传曰凡殖财贵能赈施否则守钱虏耳又古今五行记估客谓邓彪曰终不如临沮邓生平生不用为守钱奴耳退之诗守官类拘囚】太医诊得人间病安乐延年万事休【礼记文王世子注曰文王以忧勤损寿武王以安乐延年此借用卢仝诗但有樽中物从他万事休】

无求不着看人面有酒可以留人嬉欲知四休安乐法听取山谷老人诗【乐天诗曰不看人面免低眉传灯録兴化见魏府大觉禅师曰愿与存獎个安乐法门】

一病能恼安乐性四病长作一生愁【一病谓疾苦四病谓反上所陈法华经问讯言世尊少病少恼安乐行不涅槃经出家之人有四种病此效其语司马池诗画成应遣一生愁】借问四休何所好不令一点上眉头【文选乐府云借问女安居晋书孟嘉传桓温问嘉酒有何好而卿嗜之庾信愁赋云歌眠眼睫未尝掺强戏眉头那得伸又抒情集李延璧愁诗曰潘岳愁丝生鬓里婕妤悲色上眉头】

十二月十九日夜中发鄂渚晓泊汉阳亲旧携酒追送卿为短句【陈绎汉阳军凤栖山藏经记曰汉水东南合大江夹江而城左武昌右汉阳按武昌即鄂渚】

接浙报官府敢违王事程宵征江夏县睡起汉阳城【孟子曰孔子之去齐接淅而行注云淅渍米也不及炊避恶亟也诗曰王事靡盬刘禹锡诗万里王程三峡外又诗园蜂速去恐违程小星诗曰肃肃宵征谢灵运诗宵济渔浦潭旦及富春郭江夏县即鄂州治所卢纶晚次鄂州诗云开远见汉阳城】邻里烦追送杯盘浮浊清祇应瘴乡老难答故人情【谢灵运有邻里相送至方山诗文选孙子荆诗倾城远追送钱我千里道清浊谓酒见魏志徐邈传老杜诗倾榼浊复清瘴乡谓宜州】

次韵陈荣绪同倚钟楼晚望别後明日见寄之作

天外僧伽塔斜辉极照临凭栏随处好残雪向来深【泗州僧伽大师见传灯录张舜民南迁录曰洞庭湖中有扁山上有小塔望之岿然曰哑女塔昔有士人女生数岁不能言一日涉湖见塔辄语其父母书曰若日月之照临】青草无风浪枯松半死心【原注云所谓城南老树精○张舜民南迁录曰洞庭湖西岸有沙州堆阜隆起即青草庙下一湖之内中有此洲南名青草北名洞庭所谓重湖也又曰岳阳楼有碑极大乃前知州李观所纪吕洞宾事迹言吕憩于岳州白鹤寺前松下有老人自松梢冉冉而下致恭于吕问之为何乃曰某松之精也见先生过礼当候见吕因书二绝句于寺门壁间其一云独自行兮独自坐无限世人不识我惟有城南老树精分明知道神仙过郡人松下创亭亭名曰吕仙乐天诗未夜黑岩昏无风白浪起文选枚乘七发曰龙门之桐其根半死半生】衡阳有回鴈他日更传音【衡山有回鴈峰】

过洞庭青草湖

乙丑越洞庭丙寅度青草似为神所怜雪上日杲杲【青草湖一名洞庭湖荆州记云因青草山为名诗曰其雨其雨杲杲出日乐天诗杲杲冬日出照我屋南隅】我虽贫至骨犹胜杜陵老忆昔上岳阳一饭从人讨【杜陵老谓子美也尝有诗云杜陵有布衣老大意转拙又云少陵野老吞声哭大历四年子美自公安上岳阳有泊岳阳楼下等诗其上水遣还诗云驱驰四海内童稚入餬口但遇新少年少逢旧知友史记范睢传一饭之恩必报】行矣勿迟留蕉林追獠獠【时山谷赴宜州贬所岭南多蕉林其地与夷獠相接前汉外戚传曰行矣强饭勉之选诗迟留法岂轻五祖谓六祖曰汝广南獠獠有甚佛性近世本和尚作白雲端真赞云假饶亲见杨岐也是湖南獠獠】

过土山寨

南风日日纵篙撑时喜北风将我行【张籍祭退之诗曰移船入南溪东西纵篙根蔡琰胡笳曰将我行兮向天涯】汤饼一杯银线乱菱蒿数筴玉簪横【汤饼见前注汉书项籍传曰幸分我一杯羹老杜诗鲜鲫银丝脍此效其语菱蒿菜状如玉簪乐天诗秋风一筴鲈鱼脍西京杂记曰武帝过李大人就取玉簪搔头】

晚泊长沙示秦处度【湛】范元实【温】用寄明略和父韵五首【处度少游之子也当时护少游丧留长沙而元实来会于此山谷在宜州有答长沙平老帖云秦处度遂不成归淮南得安居否】

昔在秦少游许我同门友掘狱无张雷剑气在牛斗【文选古诗曰昔我同门友高举振六翻按郑康成注鲁论曰同门曰朋晋史张华传曰斗牛之间常有紫气雷焕曰此实劔之精上彻于天当在豫章丰城华即补焕为丰城令焕到县掘狱屋基得一石函中有双劔一曰龙泉一曰太阿】今来见令子文似前哲有何用相浇泼清江绿如酒【退之祭文曰幸随令子诗曰维其有之是以似之浇泼用阮籍事见前注王介甫诗白髮望东南春江绿如酒按太白诗遥看汉水鸭头绿恰似蒲桃新拨醅东坡诗清江绿涨蒲萄醅】

范公太史僚山立乃先达【范祖禹字淳夫元佑初为著作佐郎充神宗实录检讨官兼修撰知国史院与山谷同僚得罪本末已具前注礼记玉藻曰山立时行注云不动摇也此借用以言其正色立朝屹然如山先达见世说】发挥百代史管以六经辖【淳夫登第後从司马温公修通鉴凡十五年元佑初进唐监易曰六爻发挥旁通情也赵岐孟子题词曰论语者五经之鎡鍤音义曰鎡音管车釭也鍤音?车鍤也此引用言以经义是非褒贬】投身转岭海就木乃京洛【绍圣二年淳夫坐史事安置永州三年移贺州四年移宾州元符元年九月再移化州十月病卒三年徽考即位有旨许归葬西京退之潮州谢表曰经涉岭海水陆万里左传季隗曰我二十五年矣又如是而嫁则就木焉注言将死人木京洛见前注】仲子见长沙且用慰饥渴【元实盖范公仲子长沙今潭州文选潘正叔赠陆机诗云醪澄莫飧孰慰饥渴李善注引孔丛子子思谓穆公曰君若饥渴待贤】秦郎水江汉范郎器鼎鼐逝者不可寻犹喜二子在相逢唾珠玉贫病问薪菜【王介甫赠曾子固诗曰曾子文章世无有水之江汉星之斗诗曰鼐鼎及鼐唾珠玉见前注贫病山谷自道老杜诗吾老日贫病列子伯乐曰臣有所与共担纆薪菜者汉书淮南厉王传曰给薪菜盐炊】豫愁帆风船目极别所爱【退之诗严程迫风帆楚辞曰目及千里兮伤春心淫乐经曰爱别离若渊明诗曰老夫有所爱思与尔为邻】

往时高交友宰木已枌枌【高交友言其不下交也老杜诗徐庶高交友宰木见前注退之诗扶机导之言曲节初枌枌东坡乐府曰枌枌疏雨过风林舞破烟盖云幢】今我二三子事业在灯窗【二三子见鲁论孙樵集曰晓窗夜灯】秦范波澜濶笑陆海潘江【老杜诗文章曹植波澜润晋书潘岳传赞曰机文喻海岳藻如江机谓陆机也按锺嵘诗品云予尝言陆才如海潘才如江】愿兹秉经术出仕荣家邦【退之诗勉哉戒徒御家国迟子荣书曰邦之用怀诗曰以御于家邦】

少游五十策其言明且清笔墨深关键开阖见日星【少游初应制科有进卷五十篇礼记缙衣篇诗云昔吾有先正其言明且清文选张茂先诗周仲有遗规其言明且清退之诗金石出声音宫室发关键礼记曰天秉阳垂日星山谷答洪驹父书有曰凡作一文皆须有宗有趣始终关键有开有阖】陈友评斯文如钟磬鼓笙【陈友谓无已下句谓八音克谐无相夺伦】谁能续凤鸣洗耳听两甥【元注云秦范相谓为甥○汉书律历志曰黄帝使伶伦制十二箛以听凤之鸣其雄鸣为六雌鸣亦六比黄钟之宫而皆可以生之是为律本曹子建七启曰敬条耳以听玉音皇甫谧高士传曰巢父临池而洗耳此借用元宝盖少游之壻尔雅曰妻之舅弟为甥又注云谓我舅者吾谓之甥然则亦宜呼壻为甥】

次韵元实病目

道人尝恨未灰心儒士苦爱读书眼【言为学者与为道者异庄子曰形固可使如槁木而心固可使如死灰乎东坡诗读书眼如月罅隙靡不照】要须玄览照镜空莫作白鱼钻蠹简【老子曰涤除玄览能无疵手韵书曰蟬衣白鱼也退之诗岂殊书蠹虫生死文字间传灯录古灵禅师传云其师一日在窗下看经蜂子投窗纸求出师覩之曰世界如许广阔不肯出钻他故纸】閱人朦胧似有味看字昏涩尤宜懒【陆士衡叹逝赋曰世閱人而为世朦胧谓不甚了了所见多俗人不若不见之愈也按韵书朦胧月将入】范侯年少百夫雄言行一一无可束【文选王仲宣咏史诗曰生为百夫雄死作壮士规按黄鸟诗注曰百夫之中最雄俊也无可束孝经所谓口无择言身无择行退之诗云吾爱其风骨粹美无可?】看君眸子当了然乃称曾次常坦坦【孟子曰曾中正则眸子了焉易曰履道坦坦鲁论曰君子坦荡荡】如何有物食明月泪睫陨珠衣?满【卢仝月蚀诗曰此时怪事发有物吞食来轮中】金篦刮膜会有时汤熨取快术诚短【老杜诗金篦刮眼膜价重百车渠按涅槃经曰有盲人为治目故造诣良医是时良医即以金篦刮其眼膜又按法苑珠林曰後周张元其祖失明元读经然灯梦一翁一金篦疗之後三日果差史记扁鹊传曰疾之在腠理也汤熨之所及也目恶点濯故云术短矣】君不见岳头懒瓚一生禅鼻涕垂颐渠不管【潭州南岳福岩寺有懒残岩按唐高僧号懒瓚隐居衡山之顶石窟中德宗遣使诏之寒涕垂膺未尝答使者笑之且劝拭涕瓚曰我岂有功夫为俗人拭涕?竟不能致而去山谷时在潭州故引用衡山事言当遗外形骸不必以病目戚戚且终首句之意】

胜业寺悦亭

苦雨已解严诸峯来献状不见白头禅空倚紫藤杖【左传曰秋无苦雨解严言人喜雨止如罢兵也魏志赵俨传曰曹仁解严左传晋侯入曹数之以其不用僖负羁而乘轩者三百人也且曰献状注云积其功状此借用王介甫诗木落冈峦因自献白头禅谓文政禅师师盖雪窦法嗣也有题悦亭诗云山鸟无俗声山云无俗状引得白头翁时时来倚杖山谷此诗乃和其韵退之有赤藤杖歌】

离福严【寺在衡山张舜民南还录云旧名般若寺陈太建中思公道场唐怀公磨壩之地】

山下三日晴山上三日雨不见祝融峯还泝瀟湘去【南岳有七十二峯祝融其一也南岳记及荆州记云南岳衡山赤帝馆其岭祝融托其阳退之谒衡岳庙诗须臾静扫衆峯出仰见突兀撑青空紫盖连延接天柱石廩腾掷堆祝融此退之南还得归之祥也山谷意谓不见祝融峯归期未可卜耳】

花光仲仁出秦苏诗卷思二国士不可复见开卷絶叹因花光为我作梅数枝及画烟外远山追少游韵记卷末【仲仁盖衡州花光山长老山谷为作天保松铭云】

梦蝶真人貌黄槁篱落逢花须醉倒【梦蝶真人谓庄子今以属秦少游取游戏花间之意梦蝶见前注庄子列御寇篇曹商曰夫处穷间巷槁项黄馘者商之所短者也篱落逢花用陶潜把菊事见前注】雅闻花光能画梅更乞一枝洗烦恼扶持爱梅说道理自许牛头参已早【卢仝诗石公说道理句句出凡格传灯録法融禅师入牛头山幽栖寺北岩之石室有百鸟衔花之异】长眠橘洲风雨寒今日梅开向谁好【少游北归至藤州卒于江上其子处度护丧藁殡于潭故有长眠橘洲之语张舜民南迁録记潭州事云橘洲在湘江中南北与州城等老杜诗所谓橘洲田土能稟腹者也华严经曰一切衆生随业所系长眠生死太平广记载冢中人对郑生诗云长眠不知晓】何况东坡成古丘不复龙蛇看挥扫【太白诗吴宫花草埋幽径晋代衣冠成古丘老杜诗龙蛇动篋蟠银钩】我向湖南更岭南系船来近花光老叹息斯人不可见喜我未学霜前草【山谷自言其未死文选阮嗣宗诗凝霜被野草岁暮亦云已】写尽南枝与北枝更作千峯倚晴昊【白氏六帖云大庾岭上海南枝落北枝开老杜诗雷声急送千峯雨又诗乱插繁花向晴昊】

题花光画

湖北山无地湖南水彻天云沙真富贵翰墨小神仙【元注云平沙远水笔意超凡入圣法也每率此意而为之当冠四海而名後世○楚辞曰下峥嵘而无地上寥廓而无天晋书张华传雷焕曰宝剑之精上彻于天唐张谓长沙土风碑曰遁甲所谓沙土之地云阳之虚可以长往可以隐居者焉老杜湘夫人祠南夕望诗云兴来犹杖履日断更云沙真富贵见前注魏野诗有名闲富贵无事小神仙】

题花光画山水

花光寺下对云沙欲把轻舟小钓车更看道人烟雨笔乱峯深处是吾家【云沙见前注元次山诗醉里长歌挥钓车】

所住堂

此山花光佛所住今日花光还放光天女来修散花供道人自有本来香【法华经曰佛告舍利弗汝于未来世当得作弗号曰华光传灯録古灵禅师传受业师因澡身命师去垢师乃拊背曰好所佛堂而佛不圣其师回首视之师曰佛虽不圣且能放光第二句花光谓仲仁老按

维摩经曰有一天女以天花散诸菩萨大弟子上而为供养又曰若入此室但闻佛功德之香不乐闻声闻僻支佛功德香也楞严经大势至法王子云此则名曰香光庄严我本因地其祥见前注】戏咏高节亭边山矾花二首【并序 亭在花光寺】

江湖南野中有一种小白花木高数尺春开极香野人号为郑花王荆公尝欲求此花栽欲作诗而陋其名予请名曰山矾野人采郑花叶以染黄不借矾而成色故名山矾海岸孤絶处补陀落伽山译者以谓小白花山予疑即此山矾花尔不然何以观音老人坚坐不去耶【此诗及序皆以山谷手蹟校过近世曾慥端伯作高斋诗话云唐人有题唐昌观玉蕊花诗云一树珑璁玉刻成飘廊点地色轻轻今瑒花即玉蕊花也介甫以比瑒谓当用此瑒字盖瑒玉名取其白耳山谷又更其名为山矾谓可以染也庐陵段谦叔家有杨汝士与白二十三一帖云唐昌玉蕊以少故见贵耳自来江南山山有之士人取以供染事不甚惜也则知瑒花之为玉蕊断无疑矣】

北岭山矾取意开轻风正用此时来平生习气难料理爱着幽香未拟回【取意开犹王胄所谓庭草无人随意绿取意或作取次非是後汉书刘玄传韩夫人曰帝方对我饮正用此时持事来乎晋书王徽之传桓冲尝谓曰卿在府日久此当相料理】高节亭边竹已空山矾独自倚春风二三名士看颜笑把断花光水不通【退之记梦诗神官见我开颜笑言花光老定力坚固独不为花所恼也传灯录乐普云末後一句始到牢关把断要津不通凡圣禅门语曰德山门下水泄不通】

山谷内集诗注卷十九

山谷内集诗注卷二十

钦定四库全书

山谷内集诗注卷二十 宋 黄庭坚 撰

任渊注

赠惠洪【惠洪字觉范筠州彭氏子祝髮为僧】

数面欣羊腍论诗喜雉膏【上句言每见辄移顷久而益亲下句言得诗之膏腴陶渊明答龐参军诗序曰俗谚云数面成亲旧况情过此者乎唐书骨利干日入烹羊腍熟东方已明盖近日出处也欧阳公诗岁月才如熟羊腍玉篇腍音古狎切背腍也易鼎卦之九三曰雉膏不食此借用南史谢朓传武帝问王俭谁能五言俭曰谢朓得父膏腴江淹有意】眼横湘水暮云献楚天高【言湘波如眼之明彻文选传毅舞赋曰目流睇而横波按宋玉神女赋曰望余帷而延视兮若流波之将澜李善注云流波目视貌王介甫诗暮林摇落献南山下句颇采其意言乱云脱坏星露天宇之高明楚词九辩曰沉寥兮天高而气清老杜诗天高云去尽】墮我玉麈尾乞君宫锦袍【晋书孙盛传诣殷浩谈论对食奋擲麈尾毛悉落饭中又王衍传手捉玉麈尾唐书李太白传尝乘月自采石至金陵着宫锦袍坐舟中旁若无人东坡以玉带施元长老诗曰锦袍错落知相称乞与佯狂老万回此句参用其事乞音气东坡中山松醪赋曰淋漓宫锦袍】月清放舟舫万里渺云涛【老杜诗落日放船好退之诗一泻百里翻云涛东坡中山松醪赋曰渺翻天之云涛】

戏咏零陵李宗古居士家驯鸕鹚二首【元注云李唯一妻一女垂老病足养鸕鹚鸕鹚以乐余年○零陵今湖南永州】

山雌之弟竹鸡兄乍入雕笼便不惊此鸟为公行不得报晴报雨总同声【法言曰山雌之肥其意得乎北梦琐言医工梁新曰竹鸡食半夏陶岳零陵记曰竹鸡状如鹑尾少长张籍谢裴晋公遗马诗曰乍离华廐移蹄澁初到贫家举目惊此反而用之言其驯也祢衡鸕鹚赋曰闭以雕笼又曰遇之不惧抚之不惊鸕鹚之声若云行不得哥哥故末句及之老杜诗不劳钟鼓报新晴】

真人梦出大槐宫万里苍梧一洗空【真人谓舜史记曰舜南巡狩崩于苍梧之野葬于江南九疑是为零陵庄子曰羊肉不慕蚁蚁慕羊肉羊肉羶也舜有羶行百姓悦之尧闻舜之贤举乎童土之地年齿长矣聪明衰矣而不得休归又曰真人于蚁弃智于鱼得计于羊弃意此诗用大槐蚁穴事意盖出于此谓舜厌天下不异蚁垤之陋故超然方外喜于云山之一洗也老杜诗一洗万古凡马空】终日忧兄行不得鸕鹚应是鼻亭公【汉书昌邑王传曰舜封象于有鼻顏师古注曰有鼻在零陵今鼻亭是也又按柳子厚有斥鼻亭神记盖在道州道州永实相接云舜至苍梧不复能巡狩而孟子谓象以爱兄之道来故此诗因鸕鹚之声以寄意陶岳

零陵记王仲闻思归乐诗云声声相劝教归去莫是陶潜化作君山谷当是戏效其体】

李宗古出示谢李道人苕帚杖从蒋彦回乞葬地二颂作二诗奉呈

提携禅客扶衰杖断当姻家葬骨山因病废基仍废酒鸛鵒鸛鵒伴清闲【扶衰见前注淳化法帖中有王羲之帖云想反理断当断音短今俗间犹作此语意谓剖判其事也东坡尝有诗云是处青山可埋骨按班婕妤自伤赋曰愿归骨于山足】诗书传女似中郎杞菊同盘有孟光【退之诗中郎有女能传业谓蔡邕之女文姬也文姬名琰与孟光并见後汉书陆龟蒙有杞菊赋同盘见前注】今日鸛鵒鸣蹇蹇他年鸛鵒恨堂堂【上句终扶杖意下句终乞葬地意易曰王臣蹇蹇匪躬之故此借用其字以言足蹇文选谢宣远诗蹇步愧无良李善注引说又曰蹇跛也薛能诗曰青春背我堂堂去白发欺人故故生此亦借用言其弃世而去也】

书磨崖碑後

春风吹船着【音斫】浯溪扶藜上读中兴碑【浯溪在今永州中兴颂元结次山所作顔鲁公书磨崖镌刻盖言安禄山乱肃宗复两京事】平生半世看墨本摩挲石刻鬓成丝【言垂老方见真刻退之石鼓歌曰谁复着手为摩挲老杜诗郑公樛散鬓成丝】明皇不作苞桑计颠倒四海由禄儿【易否卦之九五曰其亡其亡系于苞桑注云心存将危乃得固也元稹连昌宫词曰庙谟颠倒四海摇唐书安禄山传明皇以禄山为范阳节度禄山请为贵妃养儿】九庙不守乘輿西万官已作乌择栖【乌字或作鸟非唐书明皇纪天宝十四载十一月禄山反十五载六月行在望贤宫七月次蜀郡又按礼乐志开元十年太庙为九室蔡邕独断曰天子至尊不敢?渎言之故托于乘輿也楚语曰五物之官陪属万为万官古乐府有乌栖曲史记世家曰鸟能择木木岂能择鸟乎禄山之反宰相陈希烈等皆臣贼】抚军监国太子事何乃趣取大物为【左传太子从曰抚军守曰监国唐书肃宗纪禄山反天宝十五载明皇避贼行至马嵬父老请留太子讨贼明皇许之太子治兵于朔方七月即帝位于灵武尊皇帝曰上皇天帝本纪赞曰肃宗虽不即尊位亦可以破贼庄子曰夫有土者有大物也又曰天下大物也趣音促】事有至难天幸尔上皇局蹐还京师【中兴颂曰事有至难宗庙再安二圣重欢汉书霍去病传曰军亦有天幸未尝困絶也文选谢朓诗敕躬每局蹐正月诗云谓天盖高不敢不局谓地盖厚不敢不蹐注云局曲也蹐累足也上下皆可畏怖之言也肃宗纪至德二载十二月上皇天帝至自蜀都】内间张后色可否外间李父颐指挥【唐书肃宗废后张氏传曰后与李辅国谋徙上皇西内肃宗内制于后不敢谒西宫又宦者李辅国传曰李揆以子姓事之号五父辅国妄言太上皇居近市交通外人愿徙太上皇入禁中太上皇曰吾儿用辅国谋不得终孝矣怏怏不豫至弃天下退之炭谷湫诗曰羣怪僣伺候恩威在其顔汉书贾谊传曰力制天下颐指如意】南内凄凉几苟活高将军去事尤危【唐书明皇纪至自蜀郡居于兴庆宫上元元年徙居西内兴庆即南内也宦者高力士传曰先天初为右监门卫将军加累骠骑大将军从明皇幸蜀上皇还徙西内居十日为李辅国所诬长流巫州按李辅国传曰辅国诈请上皇按行宫中射生官遮道上皇惊几坠马力士厉声曰五十年太平天子辅国欲何事叱使下马上皇执力士手曰微将军朕且为兵死鬼】臣结春陵二三策臣甫杜鹃再拜诗【春陵或作春秋非是元结春陵行序曰漫叟授道州刺史道州旧四万余户经贼已来不满四

千到官未五十日承诸使徵求符牒二百余封吾将守官静以安人待罪而已此州是春陵故地故作春陵行以达下情孟子曰吾於武成取二三策此借用杜甫杜鹃行曰我见常再拜重是古帝魂北征诗曰臣甫愤所切】安知忠臣痛至骨世上但赏琼琚词【旧作岂知忠臣心愤切後世但赏琼琚词史记荆轲传曰每念之痛于骨髓汉书杜周传注曰深刻至骨老杜诗世上儿子徒纷纷木瓜诗曰报之以琼琚】同来野僧【旧作残僧】六七辈亦有文士相追随【曹子建诗曰清夜游西园冠盖相追随】断崖苍藓对立久涑雨为洗前朝悲【老杜诗断崖当白盐楚词九歌曰使涑雨兮洒尘涑音东暴雨也】

浯溪图【陶岳零陵记曰浯溪在永州北水路一百余里流入湘江此溪口水石奇絶唐上元中容管经略使元结罢任居焉】

成子写浯溪下笔便造极空蒙得真趣肤寸已千尺【世说佛经以为祛练神明则圣人可致简文云不知得登峯造极不文选谢朓观雨诗曰空蒙如薄雾江淹诗悠悠蘊真趣肤寸见前注】只今中宫寺在昔漫郎宅更作老夫船檣竿插苍石【漫郎谓元结见前注结有浯溪铭序曰浯溪在湘水南北汇于湘爱其胜异遂家溪畔溪世无名称者也为爱之故名曰浯溪埤苍曰帆柱曰檣唐独孤及招北客文曰摧檣折竿老杜诗前临洪涛寛却立苍石大】

太平寺慈氏阁【元注云晚与曾公衮同登】

青玻璃盆插千岑湘江水清无古今何处拭目穷表里太平飞阁暂登临【退之诗谿呀巨壑颇黎盆文选杨德祖牋曰观者骇视而拭目表里山河见前注文选谢灵运有登临海峤与从弟惠连诗按楚词宋玉九辩曰登山临水送将归】朝阳不闻皂盖下愚溪但见古木阴【元结朝阳岩铭序曰永泰丙午中自春陵至零陵爱其郭中有水石之异泊舟寻之得岩与洞此邦之形胜也以其东向遂以朝阳命之续汉志曰中二千石皂盖朱轡元结时为春陵郡刺史柳子厚愚溪诗序曰灌水之阳有溪焉东流入于潇水或曰冉氏尝居也故姓是溪为冉溪余以愚触罪谪潇水上爱是溪入二三里得其尤絶者家焉更之为愚溪嘉木异石错置皆山水之奇者以余故咸以愚辱焉按愚溪在永州子厚尝谪为司马】谁与洗涤怀古恨坐有佳客非孤斟【东京赋曰慨长思而怀古退之诗孤斟讎能醒】

题淡山岩二首【陶岳零陵记云淡山岩在永州西南状如覆盂其地宜淡竹故云淡山中有岩空阔可容数千人东南角有缺处仰望之如窻户洞照甚明】

去城二十五里近天与隔尽俗子尘【王介甫澶州诗曰去都二百四十里河流中间两城峙文选谢朓诗曰嚣尘自兹隔楚词屈原渔父曰安能以皓皓之白蒙世俗之尘埃乎】春蛙秋蝇不到耳夏凉冬暖总宜人【曹子建七啓曰温房则冬服絺綌清室则中夏含霜老杜诗疎快颇宜人】岩中清磬僧定起洞口绿树仙家春【陶岳零陵记曰淡山岩唐咸通中僧元畅居于是至今香灯不絶按今岩侧有佛寺洞口有道观故此诗云僧定起仙家春老杜诗清□树杪磬远谒云端僧北山录云如来灭後大迦叶昇须弥山顶击铜鞮椎起五百罗汉定西天以有声之物为鞮椎即此方钟磬也老杜诗洞经春长薜萝玉台新咏吴迈远拟乐府曰绿

树摇云光】惜哉次山世未显不得雄文鑱翠珉【按元次山于永州有浯溪及朝阳岩铭独淡岩无有盖是时未知名也陶岳零陵记载王仲浯溪诗云湘川嘉致有浯溪元结雄文向此题文选王仲宣诗惜哉空尔为其字本出史记宓不齐传柳子厚作韩君志铭曰载刻兹珉】

淡山淡姓人安在徵君避秦亦不归【零陵土人谓淡山以淡竹得名或云尝有淡姓居之王介甫梁王吹台诗繁台繁姓人埋灭随蒿蓬徵君谓周贞实零陵记曰周贞实零陵人居淡山石室秦始皇下诏徵之三徵皆不起遂化为石後汉黄宪传天下号曰徵君此用其字】石门竹径几时有琼台瑶室至今疑【上句用退之竹涧诗意】回中明洁坐十客亦可呼乐醉舞衣【元次山有大回中小回中诗言樊水之回洑也此借用以言岩洞回环其中虚明仰见天日可为张饮之地】阆州城南果何似永州淡岩天下稀【老杜阆水歌曰阆州胜事可肠断阆州城南天下稀】

明远庵

远公引得陶潜住美酒沽来饮无数我醉欲眠卿且去只有空瓶同此趣【山谷有戏效禅月作远公东林咏序云初远法师居庐山下持律精苦过中不受蜜汤而作诗换酒饮陶彭泽醉眠见前注空瓶同趣谓瓶空而亦卧也盖张籍诗有酒尽卧空瓶之句晋书孟嘉传曰公未知酒中趣耳柳子厚西山宴游记曰意有所极梦亦同趣】谁知明远似远公亦欲我行庵上路多方挈取瓮头春大白梨花十分注【乐天诗瓮头正是擘尝时法书要录曰山东云缸面犹河北称瓮头谓初熟酒也说苑曰魏文侯与大夫饮酒使公乘不仁为觴政曰饮不酺者浮以大白梨花谓酒杯样制如此】与君深入逍遥游了无一物当情素【高僧传支遁与刘系之等谈庄子逍遥篇云各适性以为逍遥遁曰不然夫杰跖以残害为适性若适性为得者彼亦逍遥矣于是退而注逍遥篇传灯录仰山传曰师问双峯师弟近日见处如何对曰据某甲见处实无一法可当情师曰汝解犹在境汝岂真能知无一法可当情者又汾州无业传曰常了一切空无一物当情是诸佛用心处战国策蔡泽说应侯曰公孙鞅事孝王竭心谋示情素】道卿道卿归去来明远主人今进步【元注云道卿浯溪僧陶渊明有归去来词传灯录长沙岑禅师偈曰百尺竿头须进步十方世界现全身】

玉芝园【并序】

去年三月清明蒋彦回喜太守监郡过其玉芝园作诗十六韵二侯皆有报章今年三月余到玉芝园记录一时次其旧韵

春生潇湘水风鸣涧谷泉过雨花漠漠弄晴絮翩翩名园上朱阁观後复观前借问昔居人岑绝无炊烟人生须富贵河水清且涟百年共如此安用涕潺湲【退之诗柳花还漠漠选诗里无曲突烟汉书杨惲传曰人生行乐耳须富贵何时左传曰俟河之清人寿几何伐檀诗曰河水清且涟猗楚词曰横流涕兮潺湲】蒋侯真好事杖屨喜接连车载溪中骨推排若差肩厌看孔壬面丑石反成妍【溪中骨谓石也汉书朱买臣传曰相推排陈列中庭拜谒曲礼注曰肩随者与之并行差退元稹作老杜墓铭曰李白乐府歌诗诚亦差肩于子美矣书曰巧言令

色孔壬选诗曰皎洁不成妍】感君劝我醉吾亦无间然乱我朱碧眼空花坠便翺行动须人扶那能金石坚【鲁论曰禹吾无间然矣太白诗曰催弦拂柱与君饮看朱成碧颜始红韵书曰翺翺小飞也又曰便翺轻丽也此借用老杜诗此生已媿须人扶文选古诗曰人生非金石岂能长寿考汉书贾谊传曰坚若金石】爱君雷氏琴汤汤发朱弦但恨赏音人大半随逝川【雷氏蜀人善制琴为世所宝家语曰伯牙鼓琴锺子期听之伯牙志在泰山子期曰善哉巍巍乎若在泰山少选之间志在流水子期曰善哉汤汤乎若在流水子期死伯牙鼓琴絶弦终身不复鼓赏音逝川并见前注】平生有诗罪如痼不可痊今当痛自改三衅复三湔【柳子厚答崔黯书曰凡人好词工书者皆病癖也吾不幸早得二病纏结心腑牢甚愿斯须忘之而不克文选刘公干诗余婴沈痼疾李善注引礼记曰身有痼疾说文曰痼久也三衅三浴见前注退之诗惧终莫洗湔】

游愚溪【并序】

三月辛丑同徐靖国到愚溪过罗氏修竹园入朝阳洞蒋彦回陶介石僧崇庆及余子相步及余于朝阳岩徘徊水滨久之有白云出洞中散漫洞口咫尺欲不相见介石请作五字记之

意行到愚溪竹舆鸣担肩【韩孟城南联句曰刈熟担肩赧】冉溪昔居人埋没不知年偶托文字工遂以愚溪传柳侯不可见古木?濺濺【冉溪见前注刘禹锡诗会书团扇上知君文字工柳子厚石涧记曰交错之流触激之音皆在牀下翠羽之木龙鳞之石均荫其上柳侯字见退之罗池庙碑楚词曰石濺兮浅浅按浅与贱同濺濺水疾流貌音笺】罗氏家潇东潇西读书园笋茁不避道檀栾摇春烟【梁王兔园赋曰修竹团栾夹池水】下入朝阳岩次山有铭?薛石破篆文不辨瞿李袁【次山铭见前注次山阳华岩铭曰江华县大夫瞿令问艺兼篆籀俾依石经刻之法书苑云李阳冰赵郡人善小篆袁氏未详】嵌窞响笙磬洞中出寒泉同游三五客拂石弄潺湲【老杜诗远川曲通流嵌窞潜泄瀨诗曰笙磬同音又曰爰有寒泉在浚之下谢灵运诗乘月弄潺湲】俄顷生白云似欲驾我仙吾将从此逝挽牵遂回船【文选江赋曰千里俄顷庄子曰乘云气御飞龙而游乎四海之外汉书高帝纪曰吾亦从此逝矣挽牵言为其子所挽留也太白诗出门妻子强牵衣又曰稽山无贺老空棹酒船回退之诗波恶强牵挽】

代书寄翠岩新禅师【黄龙死心悟新和尚晦堂老人之嫡子丛林谓之新孟八初住洪州分寧之云岩次住西山翠岩後住黄龙山谷尝参晦堂新清二老盖其道伴】

山谷青石牛自负万钧重【舒州皖公三祖僧璨大师道场是为山谷寺西北有石牛洞其石状如伏牛因以为名钱绅同安志云初李伯时画鲁直坐于石牛上鲁直因自号山谷道人】八风吹得行处处是日用又将十六口去作宜州梦【寒山子诗曰寒山无漏岩其岩甚济要八风吹不动万古人传妙此反用之按宝积经及大毗婆沙论以利衰毁誉称讥苦乐为八风大毗婆沙论又曰佛亦曾遇此世八法如何说佛解脱答曰虽遇此事而不生染故说解脱传灯録龐居士传石头问曰子自见老僧已来日用事作麼生呈一偈云日用事无别唯吾自偶诸头头非取舍处处勿张乖朱紫谁为号丘山絶点埃神通并妙用运水及搬柴老杜诗两京

三十口虽在命如丝梅圣俞赠欧阳□诗曰又随落花飞去作江西梦杜牧之诗有云十年一觉扬州梦时山谷携其子舍并亡弟知命骨肉俱往】苦忆新老人是我法梁栋信手斫方圆规矩一一中【高僧罗什传曰释慧远学贯羣经栋梁遗法洵山禅师警策亦云心期佛法栋梁用作后来龟镜乐普禅师颂曰入荒田不栋信手拈来草庄子曰方者中矩圆者中规】遥思灵源叟分坐法席共【灵源叟名唯清亦嗣晦堂新之法弟也後住黄龙法华经曰尔时多宝佛于宝塔中分半座与释迦牟尼佛而作是言释迦牟尼佛可就此座又按杂阿含经云尊者迦叶着弊衲衣来诣佛所时诸比丘心生轻慢世尊告摩诃迦叶于此半坐我今竟知谁先出家汝耶我耶彼诸比丘心生恐怖身毛皆竖】聊持楚狂句往作天女供【楚狂见前注维摩诘曰时维摩诘室有一天女见诸天人闻所说法便现其身即以天花散诸菩萨大弟子上】岭上早梅春参军慙独弄【宜州在岭南此句谓违去道伴无与共禅悦游戏尔独弄俳优本出俗谚按因话录曰肃宗宴宫中女优有弄假官戏其绿衣秉简者谓之参军桩】

戏答欧阳诚发奉议谢余送茶歌

欧阳子出阳山山奇水怪有异气生此突兀能豹颜【退之送区册序曰阳山天下之穷处也陆有丘陵之险水有江流悍急横波之石又送廖道士序曰郴之为州当中州清淑之气蜿蜒扶舆磅礴而郁积其水土之所生神气之所感必有魁奇忠信才德之民生于其间又送张道士诗曰张侯嵩高来面有熊豹姿按阳山隶连州】饮如江入洞庭野诗成十手不供写【唐人诗酒肠俱逐洞庭宽庄子曰帝张乐于洞庭之野老杜有石砚歌曰挥洒容数人十手可对面】老来抱璞向涪翁东坡原是知音者【抱璞用卞和事见前注後汉方术郭玉传有老父渔钓涪水因号涪翁山谷谪涪州别驾亦尝以自称或云涪皤】苍龙壁官焙香涪翁投赠非世味自许诗情合得尝【退之诗吾老世味薄东坡诗亦云吾衰向老世味薄所好未衰唯饮茶薛能谢王彦威寄茶诗云麤官乞与真抛却赖有诗情合得尝】却思翰林来馈光禄酒两家水监共寒光【翰林谓东坡按汉制光禄卿有良醖署水镜见前注】予乃安敢比东坡有如玉盘金叵罗直相千万不啻过【汉书曹参传惠帝曰朕乃安敢望先帝此用其语律应劭汉官仪曰封禅坛南有玉盘北史祖珽窃金叵罗藏髻中李太白诗蒲萄酒金叵罗孟子曰或相千万老杜诗方驾曹刘不啻过】爱公好诗又能多老夫何有更横戈奈此于思百战何【退之诗云四句意能多又诗文战谁与敌浩汗横戈鋌左传华元巡功城者讴曰于思于思弃甲复来使其驂乘谓之曰牛则有皮犀兕尚多弃甲则那注云于思多须之貌欧阳君必多髯故用此事】

到桂州

桂岭环城如鴈荡平地苍玉忽嶒峨【鴈荡山在今温州】李成不在郭熙死奈此百嶂千峰何【名画评曰李成营丘人能画山水林木当时称为第一张文懿公诗曰李成谢世范宽死唯有高阳许道宁退之石鼓歌曰少陵无人谪仙死才薄其奈石鼓何】

答许觉之惠桂花椰子茶盂二首

万事相寻荣与衰故人别来鬓成丝【选诗纏绵自相寻老杜诗郑公樽散鬓成丝】欲知岁晚在何许唯说山中有桂枝【文选阮嗣宗诗良辰在何许刘安招隐士曰桂树丛生兮岩之幽又曰攀援桂枝兮聊淹留】

硕果不食寒林梢剖而器之如悬匏故人相见各贫病且可烹茶当酒肴【易剥卦之上九曰硕果不食文选陆士衡叹逝赋步寒林而凄惻张景阳七命曰剖椰子之殼按刘渊林吴都赋注云椰树似槟榔实大如匏核可作饮器家语曰剖而食之甜如蜜鲁论曰其使人也器之潘岳笙赋河汾之宝有曲沃之悬匏焉頽弁诗尔酒既旨尔肴既嘉】

以椰子茶瓶寄德孺二首

硕果實林梢可以代悬匏?持二十年煮茗当酒肴我今御魑魅学打衲僧包聊持坚重器遗我金石交【祖庭事苑载打包说曰毗柰耶杂事云佛言苾芻应以袋盛衣今禅人腰囊亦承佛之制也诗中所用字并见前注左传祈招之诗曰式如玉式如金注云取其坚重刘师服石鼎聯句云徒示坚重性】

炎丘椰木实入用随茗椀譬如楛矢矜但贵从来远【家语曰孔子在陈有隼集陈侯之庭而死楛矢贯之石矜其长尺有咫惠公使人持隼如孔子馆而问焉孔子曰隼之来远矣此肃慎氏之矢注云楛木名矜箭鏃韩诗外传曰黄鹄无五德君犹贵之以其所从来者远矣】往时万里物今在篱落间知公一拂拭想我瘴雾顔【上两句山谷自况世说桓玄就桓崖求桃不得佳者玄与殷仲文书曰德之休明则肃慎氏贡其楛矢如其不尔篱壁间物亦不可得此借用篱落见前注】

寄黄龙清老三首

万山不隔中秋月一鴈能传寄远书【退之诗东西南北皆欲往千江隔兮万山阻谢庄月赋曰隔千里兮共明月老杜诗边秋一鴈声】深密伽陀枯战笔真成相见问何如【佛书有解深密经涅槃经曰因本经以偈颂名只夜余有说四句偈名伽陀祖庭事苑曰伽陀此云讽颂或名直颂谓直以偈说法法书苑曰平磔法口诀云不迟不疾战笔侧去此借用末句谓见其翰墨千里如对面也老杜诗道甫问讯今何如】

风前橄榄星宿落日下桃榔羽扇开【异物志曰橄榄生南海浦屿□八月乃熟木高大难采以盐擦木身其实自落岭表録云桃榔树身皮叶与蕃枣槟榔等小异羽扇见前雉尾注】昭默堂中有相忆清秋忽遣化人来【僧宝传曰清老居黄龙未几宝觉歿即移疾居昭默堂颓然坐一室古诗上有长相忆下有加餐食维摩经云维摩诘不起于座居衆会前化作菩萨而告之曰汝往上方界分有国名衆香佛号香积彼诸大士见化菩萨即以问佛佛告之曰维摩诘为诸菩萨说法故遣化来列子曰周穆王时西域之国有化人来】

骑鲈觅驴但可笑非马喻马亦成痴【传灯録志公大乘赞曰不解即心即佛真似骑驴觅驴】

庄子曰以马喻马之非马不若以非马喻马之非马也两句皆言知道者少】一天月色为谁好二老风流只自知【老杜宿赞公房诗云相逢今夜宿陇月向人圆又诗不知明月为谁好又寄赞上人诗云与子成二老来往亦风流孟子二老者天下之大老也此借用其字】

宜阳别元明用觴字韵

霜须八十期同老酌我仙人九醞觴【元注云术者言吾兄弟皆寿八十近得重醞法甚妙○西京杂记汉制宗庙八月饮酎用九醞】明月湾头松老大永思堂下草荒凉【明月湾永思堂皆在双井堂在先墓之侧故以永思为名老杜诗惆怅老大藤况吟屈蟠树退之书曰穷居荒凉草树茂密按文选北山移文曰石径荒凉徒延伫】千林风雨莺求友万里云天鴈断行【言鸟犹求友而我独与兄别也乐天诗树集莺朋友云行鴈弟兄刘禹锡诗见鴈随兄去听莺求友声又诗断行随鴈翅孤嘶聳莺肩】别夜不眠听鼠嚼非关春茗搅枯肠【别绪难为情自不能寐非以茗椀破睡也卢仝茶歌三椀搜枯肠】

和范信中寓居崇宁遇雨二首

范侯来?八桂路走避俗人如脱兔【山海经曰桂林有八树在番禺东孙子曰後如脱兔敌不及距】衣囊夜雨寄禅家行潦升阶漂两屣【汉书王吉传曰所载不过囊衣诗曰涧酌彼彼潦曲礼曰户外有二屣】遣闷闷不离眼前避愁愁已知人处【老杜有遣闷诗庾信愁赋曰闭户欲驱愁愁终不肯去深藏欲避愁愁已知人处】庆公忧民苗未立旻公忧木水推去【庆旻盖崇宁两禅僧汉书刘章传曰立苗欲疏】两禅有意开寿域岁晚筑室当百堵【徽宗崇宁三年诏天下置崇宁寺观为上祈年汉书王吉传曰驱一世之民跻之仁寿之域斯干诗曰筑室百堵】他时无屋可藏身且作五里公超雾【无屋藏身盖宗门中事船子和尚谓夹山云汝向去直须藏身处没踪迹没踪迹处莫藏身谢承後汉书曰张楷字公超性好道术能作五里雾】

当年游侠成都路黄犬苍鹰代狐兔【范君盖西蜀人汉书司马迁传赞曰序游侠则退处士而进奸雄选诗曰京华游侠窟】二十始肯为儒生行?丈人奉巾屣【巾屣见前注】千江渺然万山阻抱衣一囊遍处处或持剑挂宰上回亦有酒罢壶中去【退之诗千江隔兮万山阻又云情多地遐兮徧处处史记曰吴季札北过徐徐君好季札剑口不敢言季札知之而使上国未献还至徐徐君已死乃解其宝剑系徐君冢树而去曰始吾已心许岂以死倍吾心哉公羊传曰宰上之木拱矣注云宰冢也後汉费长房传市中有老翁卖药悬一壶于肆头及市罢辄跳入壶中长房诣翁翁乃与俱入壶中唯见玉堂严丽旨酒嘉肴盈衍其中共饮毕而出翁曰我神仙之人以过见责今事毕当去子宁能相随乎】昨来禅榻寄曲肱上雨傍风破坏堵【退之南海庙碑曰卜雨傍风无所盖障礼记曰儒有环堵之室】何时鲲化北溟波好在豹隐南山雾【见前注乐天诗好在李使君】

乞鍾乳于曾公衮

寄语曾公子金丹几时熟愿持锺乳粉实此罄悬腹【江文通别赋曰链金鼎而方坚李善注云链金为丹之鼎也抱朴子曰郑君唯见授金丹之经罄悬言其空也左传曰室如悬罄】遥怜蟹眼汤已化鹅管玉【蟹眼汤见前注按雷公修事锺乳法再三以水煮之然後入臼摇如粉筛过研之陶隐居注本草锺乳条云性通中轻薄如鷺翎管碎之如爪甲中无鴈齿光明者为善】刀圭勿妄传此物非碌碌【退之诗金丹别後知传得乞取刀圭救病身按本草云刀圭者十分方寸七之一此物见前注後汉书祢衡曰余子碌碌莫足数也】

山谷内集诗注卷二十

山谷外集诗注原序

<集部,别集类,北宋建隆至靖康,山谷外集诗注>

山谷外集诗注原序

书存于世惟六经诸子及迁固之史有注其下方者以其古今之变诂训之不相通也而今人之文今人乃随而注之则自苏黄之诗始也诗动乎情发乎言而成乎音人为之人诵之宜无难知也而苏黄二公乃以今人博古之书譬楚大夫而居于齐应对唯诺无非齐言则楚人莫喻也如将以齐言而喻楚人非其素尝往来庄岳之间其孰能之山谷之诗与苏同律而语尤雅健所援引者乃多于苏其诗集已有任渊史会更注之矣而公所自编谓之外集者犹不易通史公仪甫遂继而为之注上自六经诸子历代之史下及释老之藏稗官之録语所关涉无不尽予官成都得于公之子叔廉而徧閱之其於山谷之诗既悉疏理无复凝结而古文旧事因公之注所发明者多矣夫读古人之书得之於心应之于手固非区区采之简册而後用之也而为之注者乃即羣书而其所自来则注者之功宜难于作而公以博洽之能乃随作者为之训释此其追慕先辈嘉惠後学之意殆非世俗之所能识也昔白乐天作诗使媪读之务令易知而揚子云草太玄其词艰深人不能通乃曰後有揚子云必好之矣古之君子固有不徇世俗而自信於後世之知我者若公於山谷既以子云而知子云其为之训释则又谆谆然为人言之是亦乐天之志也公蜀青衣人名容号芎室居士仕至太中大夫晚谢事着书不自休尝为补韵及三国地名皆极精密今年余七十耳目清明齿髮不衰他日传于世者又将不止于数书而已也嘉定元年十二月乙酉晋陵钱文子序

山谷外集诗注原目【年谱附】

山谷外集诗注原目【年谱附】

山谷自言欲仿庄周分其诗文为内外篇意固有在非去此取彼今内集诗注有注而外集未也疑若有所去取焉者兹岂山谷之意哉秦少游与李德叟简云黄鲁直过此为留两日其敝帚焦尾两编文章高古邈然有二汉之风今时交游中以文墨自业者未见其比又简参寥云鲁直近从此赴太和令得渠新诗一编高古絶妙吾属未有其比仆顷不自揆妄欲与之後先而驱今乃知不及远甚赴太和盖元丰庚申岁而焦尾敝帚即外集诗文也其为时辈所推如此建炎间山谷之甥洪玉父为胡少汲编豫章集独取元佑入馆後所作盖必有谓未可据依此续注之所不得已也因以少游语冠于篇首其作诗岁月别行铨次有不可考者悉皆附见旧多舛误略加是正余且从疑以俟博识

第一卷

嘉佑六年辛丑【是岁山谷从其母舅李公择游学淮南始婚于孙氏萃老女兰溪也见所作二室墓志】

溪上吟【元注云时年十七】

清江引

治平三年丙午【是岁山谷再贡于乡俱为首选】

次韵叔父圣谟咏鸛迁谷

次韵十九叔父台源

叔父钓亭

岩下放言五首

治平四年丁未【是岁神庙登极山谷登第调汝州叶县尉】

寄傅君倚同年

答德甫弟

赠元发弟放言

宁元年戊申【是岁山谷赴叶县尉九月到汝州】

清明

何造诚作浩然堂陈义甚高然颇喜度世飞昇之说筑屋饭方士愿乘六气游天地间故作浩然词二章赠之

徐孺子祠堂

思亲汝洲作

次韵戏答彦和

宁二年巳酉【是岁在叶县】

次韵裴仲谋同年

流民叹

宁三年庚戌【是岁在叶县】

次韵寄滑州舅氏

宁四年辛亥【是岁在叶县】

张仲谋家堂前酴醾委地

和答登封王晦之登楼见寄

和答孙不愚见赠

睡起

还家呈伯氏

次韵时进叔二十六韵

寄黄从善

第二卷

薛乐道自南阳来入都留宿会饮作诗饯行 咏江南土风

奕碁二首呈任公渐

谢晓纯送衲袜

冲雪宿新寨忽忽不乐

听崇德君鼓琴

郭明甫作西斋于颍尾请予赋诗二首

劝交代张和父酒

过平舆怀李子先时在并州

宁五年壬子【是岁试中学官除北京国子监教授】

以金沙酴醾送公寿

寄怀公寿

武陵【年谱作杂诗八首今七首删去】

熙宁八年乙卯【是岁在北京】

呻吟斋睡起五首呈世弼

奉答子高见赠十韵

招子高二十二韵兼简常甫世弼

次韵谢子高读渊明传

奉和王世弼寄上七兄先生用其韵

送吴彦归番阳

宁九年丙辰【是岁在北京】

二月丁卯喜雨吴体为北门留守文潞公作李右司以诗送梅花至潞公予虽不接右司想见其人用老杜和元次山诗例次韵

宁十年丁巳【是岁在北京】

次韵外舅喜王正仲三丈奉诏祷南岳回至襄阳舍驿马就舟见过三首

次韵正仲三丈自衡山返命舍驿过外舅师厚赠答

第三卷

次韵子瞻春菜

元丰元年戊午【是岁在北京】

闰月访同年李夷伯子真于河上子真以诗谢次韵

戏答李子真河上见招来诗颇夸河上风物聊以当嘲云

和答李子真读陶庚诗

丙寅十四首效韦苏州

催公静碾茶

用前韵戏公静

对酒歌答谢公静

种决明

同世弼韵作寄伯氏在济南兼呈六舅祠部伯氏到济南寄诗颇言太守居有湖山之胜同韵和

次韵寄李六弟济南郡城桥亭之诗

用明发不寐有怀二人为韵寄李秉彝德叟陪师厚游百花洲盘薄范文正祠下道羊昙哭谢

安石事因读生存华屋处零落归山丘为十诗百花州杂题

竹下把酒

砌台晚思

和师厚接花

和师厚栽竹

次韵师厚雨中昼寝忆江南饼麴酒

次韵师厚萱草

次韵谢外舅病不能拜复官夏雨眠起之什次韵师厚病间十首

第四卷

次韵奉送公定

和谢公定河朔漫成八首

次韵谢公定王世弼赠答二絶句

次韵公定世弼登北都东楼四首

和谢公定往南谿

和师厚秋半时复官分司西都

和师厚郊居示里中诸君

寄南阳谢外舅

和外舅夙兴三首

和答师厚黄连桥坏大木亦为秋雹所碎

世弼惠诗求舜泉辄欲以长安酥共泛一盃次韵戏答

送蛤蜊与李明叔诸公

戏赠世弼用前韵

世弼病方家不善论蛤蜊之功戏答

次韵师厚食蟹

次韵谢外舅食驴肠

次韵师厚答马着作屡赠诗

次韵子瞻与舒尧文涛雪雾猪泉唱和

第五卷

薄薄酒二章

戏赠彦深

竹轩咏雪呈外舅谢师厚并调李彦深

赋未见君子忧心靡乐八韵寄李师载

次韵张秘校喜雪三首

次韵寅庵四首

元丰二年己未【是岁在北京】

以同心之言其臭如兰为韵寄李子先

见子瞻粲字韵诗和答三人四返不困而愈崛奇辄次韵寄彭门三首

再和寄子瞻闻得湖州

次韵答尧民

春游

次韵感春五首

圣东将寓于卫行乞食於齐有可怜之色再次韵感春五首赠之

第六卷

次韵盖郎中率郭郎中休官二首

次韵郭右曹

送杨瓘鴈门省亲二首

次韵答张沙河

送张沙河游齐鲁诸邦

和张沙河招饮

同尧民游灵源庙廖献臣置酒用马陵二字赋诗二首

八音歌赠晁尧民

八音歌赠晁尧民

次韵师厚五月十六日视田悼李彦深

次韵晁补之廖正一赠答诗

再次韵呈廖明略

走答明略适尧民来相约奉谒故篇末及之答明略并寄无咎

再次韵呈明略并寄无咎

再答明略二首

次韵无咎阎子常携琴入村

定交诗二首效鲍明远体呈晁无咎

赠无咎八音歌

二十八宿歌赠别无咎

第七卷

林为之送笔戏赠

再和答为之

再和答为之

赠赵言

次韵题粹老客亭诗後

赠张仲谋

乞猫

谢周文之送猫儿

谢张泰伯惠黄雀鮓

赠答晁次膺

杨朴墓

次韵孔四着作早行

次韵孔四着作北行潯沱

和陈君仪读太真外传五首

读曹公传

杂诗

卫南

酒

次韵答柳通叟求田问舍之诗

书扇

元丰三年庚申【是岁山谷八京改官授吉州太和县】

次韵答叔原会寂照房呈稚川

同王稚川晏叔原饭寂照房得房字

次韵叔原会寂照房得照字

次韵稚川得寂字

都下喜见八叔父

次韵叔父夷仲送夏君玉赴零陵主簿

病起次韵和稚川进叔唱酬之什

稚川约晚过进叔次前韵太稚川并呈进叔汴岸置酒赠黄十七

第八卷

晓放汴舟

次盱眙同前韵

外舅孙莘老守苏州留诗斗野亭庚申十月庭坚和

十月十三日泊舟白沙江口

发白沙口次长芦

阻风入长芦寺

次韵伯氏长芦寺下

金陵

赠别李端叔

阻风铜陵

阻水泊舟竹山下

池口风雨留三日

贵池

大雷口阻风

庚寅乙未犹泊大雷口

乙未移舟出口

丙申泊东流县

书石牛溪旁大石上

题山谷大石

同苏子平李德叟登擢秀阁

灵龟泉上

从丘十四借韩文二首

发舒州向皖口道中作寄李德叟

庭坚得邑太和六舅按节出同安邂逅於皖公溪口风雨阻留十日对榻夜语因咏谁知风雨
夜复此对牀眠别後觉斯言可念列置十字字为八句寄呈十首

题马当山鲁望亭四首

泊大孤山作

题落星寺四首

第九卷

玉京轩

过致政屯田刘公隐庐

寿圣观道士黄至明开小隐轩太守徐公为题曰快轩庭坚集句咏之

驻輿遣人寻访後山陈德方家

题李夫人偃竹

次韵章禹直开元寺观画壁兼简李德素

元丰四年辛酉【是岁山谷自乡井赴太和考试举人于南安军】

丰城

上萧家峡

何萧二族

魏夫人坛

隐梅福处

萧子云宅

避秦十人

黄雀

到官归志浩然二絶句

题吉州承天院清凉轩

次韵答杨子闻见赠

闻致政胡朝请多藏书以诗借书目

戏赠南安倅柳朝散

题槐安阁

洪范以不合俗人题廳壁二絕句次韵和之发贇上寄余洪范

次元明韵寄子由

再次韵奉答子由

再次韵寄子由

次韵寄上七兄

和七兄山蘋汤

同韵和元明兄知命弟九日相忆二首

代书

双涧寺二首

睡起

奉送周元翁鎖吉州司法廳赴礼部试

饮润父家

次韵寄润父

送酒与周法曹用前韵

第十卷

出迎使客质明放船自瓦窑归

次韵和答孔毅甫

再用旧韵寄孔毅甫

元丰五年壬戌【山谷是岁在太和】

二月二日晓梦会于庐陵西斋作寄陈适用长句谢陈适用惠送吴南雄所赠纸

寄陈适用

寄怀元翁

对酒次前韵寄怀元翁

候尉之吉水覆按未归三日泥雨戏成寄之侯尉家听琵琶

寄袁守廖献卿

廖袁州次韵见答并寄黄靖国再生传次韵寄之袁州刘司法亦和予摩字诗因次韵寄之

次韵奉答吉老并寄何君庸

次韵奉答廖袁州怀旧隐之诗

上权郡孙承议

奉和孙奉议谢送菜

和孙公善李仲同金樱饵唱酬二首

答余洪范二首

三月乙巳来赋盐万岁乡且蒐猕匿赋之家晏饭此舍遂留宿是日大风自采菊苗荐汤饼二首题高君正适轩

寄李次翁

四月戊申赋盐万岁山中仰怀外舅谢师厚癸丑宿早禾渡僧舍

宿观山

上大蒙笼

劳坑入前城

乙卯宿清泉寺

丙辰仍宿清泉寺

丁巳宿宝石寺

第十一卷

己未过太湖僧寺得宗汝为书寄山蘋白酒长韵诗寄答

庚申宿观音院

辛酉憩刀坑口

金刀坑迎将家待追浆坑十余户山农不至因题其壁

次韵汉公招七兄

寄题安福李令适轩

寄题安福李令先春阁

寄题安福李令爱竹堂

题安福李令朝华亭

登快阁

和李才甫先辈快阁五首

八月十四日夜刀坑口对月奉寄王子难子闻适用

雕陂

几复寄槟榔且答诗劝予同种复次韵寄之黄几复自海上寄惠金液三十两且曰惟有德之

士宜享将以排荡阴邪守卫真火幸不以凡物畜之戏答

几道复觅槟榔

次韵几复答予所赠三物三首

送酒与毕大夫

喜太守毕朝散致政

次韵道辅双岭见寄三叠

次韵章禹直魏道辅赠答之诗

次韵道辅旅怀见寄

和答魏道辅寄怀十首

仓後酒正厅昔唐林夫谪官所作十一月己卯予纳和租隔墙芙蓉盛开

吉老受秋租辄成长句

再次韵和吉老

招吉老子范观梅花

子范徼巡诸乡捕逐羣盗几尽辄作长句劳苦行李

送徐隐父宰余干二首

第十二卷

次韵君庸寓慈云寺待韶惠钱不至

次韵奉答存道主簿

从时中乞蒲团

奉送时中摄东曹狱掾

奉答茂衡惠纸长句

杂言赠罗茂衡

寄晁元忠十首

次韵晁元忠西归十首

元丰六年癸亥【是岁在太和十二月移监德平镇】

食笋十韵

萧巽葛敏修二学子和予食笋诗次韵答之二首胡朝请见和复次韵

立春

寄舒申之户曹

次韵答杜仲观二絶

再次韵

社日奉寄君庸主簿

观王王簿家醪醑

醪醑

元翁坐中见次元寄到和孔四饮王夔玉家长韵因次韵率元翁同作寄湓城

再次孔四韵寄怀元翁兄弟并致问毅甫

次韵元翁从王夔玉借书

学元翁作女儿浦口诗

去岁和元翁重到双涧寺观余兄弟题诗之篇总忘收録病中记忆成此诗

次韵周法曹游青原山寺

次韵曾都曹喜雨

戏题曾处善尉厅二首

寄上高李令怀道

第十三卷

谢文灏元丰上文藁

读方言

次韵秋郊晚望

次韵周德夫经行不相见之诗

欧阳从道许寄金橘以诗督之

次韵吉老十小诗

次韵吉老寄君庸

闻吉老县丞按田在万安山中

次韵喜陈吉老还家二絶

再次韵答吉老二首

太和奉呈吉老县丞

次韵知命永和道中

次韵吉老知命同游青原二首

次韵知命入青原山口

次韵吉老游青原将归

喜知命弟自青原归

寄张宜父

送彦孚主簿

寄余于徐隐甫

奉答李和甫代简二絕句

赠王环中

戏和于寺丞乞王醇老米

答永新宗令寄石耳

赠朱方李道人

题前定錄赠李伯牖二首

静居寺上方南入一径有钓台气象甚古而俗传谬妄意尝有隐君子渔钓其上感之作诗

高至言筑亭于家圃以奉亲总其观覽之富命曰溪亭乞余赋诗余先君之敝庐望高子所筑不过十牛鸣耳故余未尝登临而得其胜处

题息轩

题神移仁寿塔

题海首座壁

题仁上座画松

摩诘画

追忆余泊舟西江事次韵

宫亭湖

元丰癸亥经行潭石寺见旧和栖蟾诗甚可笑因削拊灭藁别和一章

第十四卷

夜发分宁寄杜涧叟

题杜盘涧叟冥鸿亭

过家

上冢

明叔知县和示过家上冢二篇复次韵

次韵郭明叔长歌

咏清水岩呈郭明叔

次韵清水岩

题章和父钓亭放言

铜官县望五松山集句

元丰七年甲子【是岁山谷过扬州泗州赴德平镇到官当在夏秋之间】

自咸平至太康鞍马间得十小诗寄怀晏叔原并间王稚川行李鹅儿黄似酒对酒爱新鹅此他日醉时与叙原所咏因以为韵

寄家

古风次韵荅初和甫二首

次韵荅和甫卢泉水三首

和甫得竹数本于周翰喜而作诗和之

寄耿令几父过新堂邑作廼几父旧治之地放言十首

送伯氏入都

渡河

送吕知常赴太和丞

别蒋颖叔

平原宴坐二首

同刘景文游郭氏西园因留宿

第十五卷

奉送刘君昆仲

元丰八年乙丑【哲庙登极是岁春山谷犹在德平四月丁丑以秘书省校书郎召其到京师
在六七月间】

和答莘老见赠

元佑元年丙寅【是岁山谷在秘书省十月丙戌除神宗实录院检讨官集贤校理】以潞公
所惠拣芽送公择次旧韵

吏部苏尚书右选胡侍郎皆和鄙句次韵道谢奉同公择作拣芽咏

今岁官茶极妙而难为赏音者戏作两诗用前韵公择用前韵嘲戏双井

又戏为双井解嘲

奉同六舅尚书咏茶碾煎烹三首

与李公择道中见两客布衣班荆而坐对戏奕秋因作一绝

六舅以诗来觅铜犀用长句持送舅氏学古之余复味禅悦故篇末及之

奉和公择舅氏送吕道人研长韵

再和公择舅氏杂言

次韵答王四

戏答仇梦得承制

戏答仇梦得承制二首

和任夫人悟道

暮到张氏园和壁间旧题

从人求花

赠陈师道

送六十五弟贲南归

赠吴道士

同谢公定携书浴室院汶师置饭作

谢人惠茶

懋宗奉议有佳句咏冷庭叟野居庭坚於庭叟有十八年之旧故次韵赠之

古意赠郑彦能八音歌

子瞻题狄引进雪林石屏要同作

送张材翁赴秦僉

元佑二年丁卯【是岁在秘书省兼史局正月辛未除著作佐郎】

题阳关图二首

题归去来图二首

题画鹅鴈二首

题老鹤万里心

题韦偃马

答王道济寺丞观许道宁山水图

第十六卷

和刘景文

奉谢刘景文送团茶

谢景文惠浩然所作廷珪墨

同景文丈咏莲塘

送刘道纯

送薛乐道知郾乡

寄朱乐仲

赠陈元舆祠部

元佑三年戊辰【是岁在秘书省兼史局正月东坡知贡举山谷为参详五月诏新除著作郎黄庭坚依旧著作佐郎以御史赵挺之所论故也】

松下渊明

老杜浣花谿图引

戏和舍弟船场探春二首

次韵舍弟题牛氏园二首

急雪寄王立之问梅花

又寄王立之

王立之以小诗送并蒂牡丹戏答

从王都尉觅千叶梅云已落尽戏作嘲吹笛侍儿次韵李士雄子飞独游西园折牡丹忆弟子奇二首

和曹子方杂言

谢曹子方惠二物二首

送高士敦赴成都钤辖二首

次韵子瞻送穆父二絕

和子瞻内翰题公择舅中丞山房

题子瞻书诗後

戏赠高述六言

戏题大年防御芦鴈

避暑李氏园二首

次韵胡彦明同年羈旅京师寄李子飞三章一章道其困穷二章劝之归三章言我亦欲归耳
胡李相甥也故有槟榔之句

与胡彦明处道饮融师竹轩

谢送宣城笔

王彦祖惠其祖黄州制草书其後

送徐景道尉武宁

杜似吟院二首

岁寒知松柏

效进士作观成都石经

送曹子方福建路运判兼简运使张仲谋

第十七卷

戏赠曹子方家凤儿

次韵子瞻书黄庭经尾付蹇道士

何氏悦亭咏柏

次韵答少章闻鴈听鸡二首

伯父祖善耆老好学於所居紫阳溪後小马鞍山为放隐斋远寄诗句意欲庭坚和之幸师友同赋率尔上呈

元佑四年己巳【是岁在秘书省兼史局】

题李十八知常轩

次韵奉答吉隣机宜

题刘所藏展子?感应观音二首

李濠州挽词二首

元佑五年庚午【是岁在秘书省兼史局】

寄忠玉提刑

绍圣元年甲戌【元佑六年六月山谷在馆中丁母忧至八年七月除神宗正史编修官九月服除具辞免除知宣州又除知鄂州十二月以台諫官言实録院修先帝实録诋 宁以来政事乞行窜黜诏黄庭坚责授涪州别驾黔州安置二年四月到黔州】

次韵元日

题大云仓达观台二首

元符元年戊寅【是岁山谷在黔州是春以避外兄张向之嫌迁戎州】

送曹黔南口号

元符三年庚辰【是岁徽庙登极山谷在戎州五月复宣义郎监鄂州在城盐税】十四弟归洪州赋莫如兄弟四章赠行

以虎臂杖送李任道二首

题王居士所藏王友画桃杏花二首

碾建溪第一奉邀徐天隐奉议并效建除体再作答徐天隐

重赠徐天隐

以十扇送天隐

建中靖国元年辛巳【是岁正月自江安出峡三月準告复奉议郎知舒州四月至荆南又準尚书省劄子已降告命除吏部员外郎乘马通发来赴阙再具辞免乞太平州】

戏呈田子平六言

荊州即事药名诗八首

崇宁元年壬午【是岁山谷在荆南待命六月领太平州事九日而罢】

太平州作二首

送昌上座归成都

崇宁三年甲申【崇宁二年十一月山谷以荆南所作承天塔记谪宜州是岁自潭州历衡永全州静江府以趋贬所】

长沙留别

赠花光老

题花光为曾公卷作水边梅

山谷外集诗注原目

山谷外集诗注卷一

钦定四库全书

山谷外集诗注卷一

宋 黄庭坚 撰

史 容 注

溪上吟【并序 山谷生于庆历五年乙酉至嘉佑六年辛丑年十七据黄?年谱载赵伯山中
外旧事云山谷少有诗名在叶县大名德州德平诗已卓絶後以史事待罪陈留偶自编退听
堂诗初无意尽去少作胡直孺少汲建炎初帅洪并为山谷类诗文为豫章集命洛阳朱敦儒
山房李彤編集而洪炎玉父专其事遂以退听为断以前好诗皆不收前後殊抵牾?尝闻先人
言先祖尚书叔敖尝编类诗文今家问中山谷晚年答书有云诗文久?令写寄亦为念九三七
书字多误故未能就独恨所编为徐俯师川久假不归遂无别本可据今豫章文集即洪氏所
次而山谷平生得意之诗及尝手写者多在外集?尝考洪氏李氏旧编洪氏以古风二首为首
不及古赋楚辞而李氏所编文集则第一卷首载古赋楚辞第二卷方及古诗乃以别李次翁
为首而古风二章反寘卷末至外集第五卷题目之首独注行役并杂体诗六字竟莫详其纲
目但分古诗律诗而于外集之末跋云彤闻山谷自巴陵取道通城入黄龙山为清禅师徧閱
南昌集自有去取仍改定旧句彤後得本用以是正其言非予诗者五十余篇彤亦尝见于他
人集中辄已除去其称不用者安敢弃遗今外集十一卷止十四卷是也又于第十一卷後跋
曰前集内休亭赋墨戏赋白山茶赋木之彬彬悲秋演雅次韵答王慎中题张澄居士隐居三
首题少章寄寂斋谢从善司业送惠山泉送刘士彦赴福建运判论诤断篇皆山谷晚年删去
其去取据此而已】

春山鸟啼新雨天霁【宋玉高唐赋遇天宇之新霁兮观百谷之俱集】汀草怒长【庄子春
雨日时草木怒生僧善懽诗桃李纷已华笋蕨俱怒长】竹筱交陰【书筱簜既敷筱小竹】
黄子观渔于塘下寻春于小桃源从以溪童穉子畦丁三四辈【杜诗畦丁告劳苦】茶鼎酒
瓢渊明诗编虽不命戒未尝不取诸左右临沧波拂白石咏渊明诗数篇清风为我吹衣好鸟
为我劝饮【欧阳公诗花能嫣然顾我笑鸟劝我饮非无情】当其漻然无所拘系而依依规
矩準绳之间自有佳处乃知白莲社中人不达渊明诗意者多矣【白莲社在庐山晋太元中
鴈门正觉禅师惠远卜居此山凿二池种白莲後以名其社社中合十八人远师招渊明入社
渊明攢眉而去】过酒肆则饮亦无量也然未始甚醉盖其所寓与毕卓刘伶辈同而自谓所
得与二子异人亦殊不能知之也酒酣得纸书之为溪上吟

短生无长期【谢灵运豫章行短生旅长世恒觉白日欹天台赋嗟人生之短期孰长年之能
执】聊暇日婆娑【王粲登楼赋聊假日以消忧李善本作暇日注云暇或作假离骚经聊假
日以媮乐补注云顔师古曰中心愁闷假延日月苟为娱乐耳今俗言犹言借时度日言暇者

非诗陈风婆娑其下】出门望高丘拱木漫春萝【孟子拱把之桐梓注两手所拱左传秦缪公谓蹇叔尔墓之木拱矣】试为省鬼录【魏文帝与吴质书云观其姓名已为鬼录】不饮死者多【欧公诗自古不饮无不死】安能如南山【毛诗如南山之寿】千岁保不磨【退之送穷文吾立于名百世不磨】在世崇名节飘如赴烛蛾【汉娄护传论议常依名节选诗努力崇明德南史傅亮传直宿禁中覩夜蛾赴烛作感物赋以寄意白乐天诗鱼烂缘吞饵蛾焦为扑灯】及汝知悔时万事蓬一窠【李太白诗昔日万乘坟今成一科蓬又云蓬科马鬣今已平】青青陵陂麦妍煖亦已花【庄子儒以诗礼发冢小儒曰诗固有之青青之麦生于陵陂老杜诗青茱陵陂麦窈窕桃李花】长烟淡平川【孟浩然诗微云淡河汉】轻风不为波无人按律吕【律历志阳六为律阴六为吕】好鸟自和歌【曹子建诗潜鱼跃清波好鸟鸣高枝】杖藜山中归【庄子原宪杖藜而出】牛羊在坡陀本自无廊庙【王羲之传报殷浩书曰吾素无廊庙】正尔乐涧阿【渊明诗御冬足大布麤绵以应阳正尔不能得哀哉亦可伤洪驹父诗话称山谷云渊明诗云正赖古人书正尔不能得正宜委运去皆当时语而或者改作上赖古人书止尔不能得甚失句法诗考盘在涧考盘在阿】念昔扬子云刻意师孟轲狂夫移九鼎深巷考四科亦有好事人时能载酒过无疑举尔酒定知我为何【杨雄字子云其赞云雄三世不徙官及王莽篡位谈说之士用符命称功德获封爵者甚众雄□不侯人希至其门时有好事者载酒肴从游学四科谓德行言语政事文学而四科字见论语正义退之诗遇酒即酩酊君知我为谁庄子云刻意尚行离世异俗】

清江引【时年十七】

江鸥摇荡荻花秋【老杜诗摇荡菊花期乐天诗枫叶荻花秋瑟瑟】八十渔公百不忧【杜诗吾知徐公百不忧】清晓采莲来荡浆【乐府有采莲曲老杜诗不有小舟能荡浆百壶那送酒如泉】夕阳收网更横舟羣儿学渔亦不恶【晋谢道韞传王郎逸少子不恶】老妻白头从此乐全家醉着篷底眠【唐韩偓诗渔翁醉着无人唤过午醒来雪满船南唐近事史虚白诗风雨揭帘屋浑家醉不知杜荀鹤诗山雨溪风卷钓丝瓦瓿篷底独斟时醉来睡着无人唤流下前溪也不知】舟在寒沙夜潮落

次韵叔父圣谟咏鸪迁谷

鸪舅颇强聒【庄子天下篇强聒而不舍者也陆龟蒙桃菜诗云行歇每依鸪舅影桃频时见鼠姑心按本草牡丹一名鼠姑用之去心以类推之则鸪舅亦当是一种草木之名山谷特借鸪舅字以名鸪耳】仆姑常勃谿【欧阳公诗云病识阴晴似勃姑又云天雨止鸪呼妇还鸣且喜勃姑仆姑皆鸪也米元章画史又称勃鸪庄子曰室无空虚则妇姑勃谿注勃谿争处也】黄鸟怀好音【□南葛覃云黄鸟于飞注搏黍也陆玕疏云黄鸟黄鹂留也或谓之黄栗留幽州人谓之黄鸪一名仓庚一名商庚一名鸪一名楚雀齐人谓之搏黍邶国风凯风云睨睨黄鸟载好其音桧国风匪风云怀之好音】秋菊染春衣【西京杂记黄鹄下太液池上为斂曰黄鹄飞兮下建章金为衣兮菊为裳太白大鹏赋岂比夫蓬菜之黄鹄夸金衣与菊裳】嚶嚶求朋友【小雅云伐木丁丁鸟鸣嚶嚶又云嚶其鸣笑求其友声】忧患同一枝【庄子逍遥篇鷦鷯巢于深林不过一枝】提壶要酤我杜宇赋式微【梅圣俞四禽言子规云不如归

去春山云暮提壶云提壶芦沽美酒子规一名杜鹃蜀王本纪杜宇为望帝亡去化为此鸟伐木云有酒酤我无酒酤我邶国风式微式微胡不归】黄鸟在幽谷【诗出自幽谷】韬光养羽仪【嵇康诗灵凤振羽仪易曰鸿渐于陆其羽可用为仪】晴风曜桃李【退之寄卢仝诗云偶逢明月曜桃李】言语自知时先生丘中隐乔木见雄雌引子迁绿阴相戒防祸机【文选鲍明远苦热行生躯蹈死地昌志登祸机李善注引庄子曰其发若机括司马彪曰祸败之来若机括之发班固汉书述曰祸如发机】李杜死刀锯【後汉李固杜乔皆为梁冀所害死狱中李膺杜密死于党锢时人亦称李杜焉】陈张怨弃遗【前汉张耳陈余相与为刎颈交後有隙余相赵汉遣耳与韩信破赵斩余诗将安将乐弃予如遗】不如听黄鸟永昼客争棊

次韵十九叔父台源【黄氏年谱山谷叔父讳襄字圣谟自台源先生此数诗皆是聚族居乡日所作凡诸父昆弟相与题咏赓唱不可系以岁月者悉附于早年乡居之作】

闻道台源境锄荒三径通【陶渊明归去来辞三径就荒松菊犹存杜诗葵荒自锄】人曾梦蚁穴【详见後宿观音院诗注用异闻集淳于棼梦入槐安国事】鹤亦怕鸡笼【用晋嵇绍鹤处鸡羣之意李白送赵四序赵少翁亦鸡栖鹤笼不足以窘束鸾凤耳】万壑秋声别千江月体同【心珠道场仪千江同一月万户尽皆春以言宾头尊者应四天下供王荆公诗日入千江体不分道人非复世间人】须知有一路不在白云中

叔父钓亭

檻外溪风拂面凉四围春草自锄荒【杜诗草茅无径欲自锄又云葵荒欲自锄】陆沉霜髮为鉤直【史记滑稽传东方朔歌曰陆沉于俗避世金马门楚辞曰以直针而为鉤维何鱼之能得卢仝诗人鉤曲我鉤直嗟哉我鉤反无食】柳贯锦鳞缘饵香【石鼓文其鱼维何维鯀与鲤何以贯之维杨与柳吕氏春秋善钓者出鱼乎十仞之下饵香也韩文公诗鸟下见人寂鱼来闻饵香】影落华亭千尺月【东坡答文与可诗云世间亦有千寻竹月落庭空影许长详见集中簞簞谷偃竹记】梦通岐下六州王【太公钓于渭滨而遇文王帝王世纪曰诸侯归周者六州文王不失臣节合六州之诸侯以朝纣毛诗芣苢毛义曰文王平六州武王平天下史记周纪曰自岐下而徙都丰】麒麟卧笑功名骨【杜诗江上小堂巢翡翠苑边高冢卧麒麟王荆公诗蝼蚁往还空垄断麒麟埋没几春秋功名盖世知谁是气力回天到此休江西宗派僧善权诗君看功名骨千载同古丘】不道山林日月长【白乐天诗远处尘埃少闲中日月长】

岩下放言五首【文选陆士衡有连珠五十首山谷效其体而更其名曰放言也文选注云连珠者假托衆物以讽谕汉章帝时班固贾逵已有此作唐元微之亦有放言诗白乐天序曰元九在江陵时有放言长句诗五首韵高而体律意古而词新】

钓台

林居野处而贯万事【韩退之送李愿归盘谷序穷居而野处升高而望远】花落鸟啼【杨

太真传明皇云鸟啼花落水綠山青】而成四时【尧典以闰月定四时成岁】物有才德【木有不材驥称其德若此类也】水为官师【书云官师相规工执艺事以諫言水如官师有相规正之义也荀子曰孔子观于东流之水子贡问於孔子所以见大水必观焉何也孔子曰夫水柔而无为也似德其浩浩乎不屈似有道其赴百仞之谷不惧似勇主量必平似法盈不求槩似正发源必东似志是以君子见大水必观焉大戴礼及家语皆有此段】空明湛羣木之影【退之祭李使君文航北湖之空明】搏击下诸峯之巘【言鷹隼之属】游鱼静而知机君子乐而忘归

池亭

水嬉者游鱼林乐者啼鸟【文选西京赋命舟牧为水嬉庄子天运篇林乐而无形杜诗水深鱼极乐林茂鸟知归】志士仁人观其大【论语志士仁人无求生以害仁】薪翁笱妇利其小【诗鱼丽于罍毛云寡妇之笱也】有美一人【诗野有蔓草有美一人清扬婉兮】独燕居万物之表

冠鳌台

石生涯于寒藤藤耆造于崖树【书耆造德不降耆老造成也】鳌插翼而成鹏【列子归墟中有五山帝使巨鳌十五戴之且用庄子鲲化为鹏之意】隘六合而未翥【文选曹子建七啓云若狭六合而隘九州】我来兮自东【幽风东山云我来自东零雨其蒙】攀桂枝兮容与【九歌云聊逍遥兮容与招隐士云攀援桂枝聊淹留】倚嵌岩兮顾同来谓公等其皆去【汉高祖公等皆去吾亦从此逝矣】

博山台

石蕴璵璠山得其来之泽【文选文赋石蕴玉而山辉魏文帝书鲁之璵璠庄子童土之地曰冀得其来之泽】木无牺象天开不材之祥【庄子曰百年之木破爲牺樽青黄而文之其断在沟中比牺樽于沟中之断则美恶有间矣其于失性一也礼记牺象周尊也左传牺象不出门不材之木亦见庄子韩文凡物之生不愿为材牺象青黄乃木之灾】屹金炉之突兀其山海之来翔【谓飞来峯也】然以明哲之火熏以忠信之香【李文饶黄冶赋尧舜之化大道为炉中和为冶声教为橐文明为火】俯仰一时非智所及付与万世其存者长

灵椿台

苍苔古木相依涧壑之滨黄葛女萝【诗頍弁葛与女萝施于松柏尔雅唐蒙女萝女萝兔丝】自致风云之上【史记范雎传不意君能自致青云之上】人就陰而息迹【庄子渔父篇人有畏影恶迹而去之走者举足愈数而迹愈多走愈疾而影不离身不知处陰以休影愚亦甚矣】鸟投暮而来归水影林光常相助发溪声斧响直下称提

寄傅君倚同年【君倚名肩娶山谷从姑诗中有方策名之句附丁未岁】

有情清江水东下投豫章故人江上居不寄书一行【杜诗相看过半百不寄一行书】相思对明月【李白诗相思如明月可望不可攀】谈笑如清光向风长叹息孤鴈起寒塘【杜诗鸟影度寒塘】倾写鬱结怀【楚辞遭沈浊而污秽兮独鬱结其谁语】因之东南翔【文选休上人诗桂水日千里因之平生怀太白尝用此语寄鲁中二子云裂素写远意因之汝阳川】姑氏有淑质【见孟子注疏题辞】幽林兰静芳愿因奉箕帚【汉高纪愿为箕帚妾】苹藻羞烝尝【采苹采藻见诗召南凡祀始杀而尝闭蛰而烝见左传左氏苹蘩蕰藻之菜可羞于王公】念君方策名【退之感二鸟赋况策名于荐书】要津迈腾骧【选诗何不策高足先据要路津西京赋乃奋翅而腾骧杜诗此岂有意仍腾骧】引车入里门【万石君传诸子入里门趋至家】观者塞路旁【玉台新咏诗云兄弟雨三人中子为侍郎五日一来归道上自生光黄金络马头观者满路旁】雝雝求匹好羔鴈委潘杨【诗雝雝鸣鴈注雝雝鴈声和也纳采用鴈文选潘安仁作杨仲武诔云潘杨之睦有自来矣】顾惟蓬茅陋【礼记儒行箴门圭窾蓬户瓮牖】岂能屈东牀【东牀见晋王羲之传】眷言南鸣鴈【毛诗?言顾之谢灵运诗眷言怀君子沈痛切中肠】七子伊在桑【曹国风鸣鴈在桑其子七兮】幸缘一日雅结好永不忘【谷永传无一日之雅左右之介】

答德甫弟

鸟啼花发独愁思【鸟啼花发见前注】怜子三章怨慕诗【孟子曰怨慕也】鸿鴈双飞弹射下脊令同病急难时【诗常棣脊令在原兄弟急难】功名所在犹争死【後汉姜肱与弟季江夜遇盗?杀之兄弟争死盗两释之】意气相须尚不移【文选轻死重气结党连羣意气相须当是相倾太白扶风豪士歌意气相倾山可移】何况极天无以报【诗?报之德昊天罔极】林回投璧负婴儿【庄子山木篇林回弃千金之璧负赤子而趋○原注云时以父事兄弟俱在縲紲】

赠元发弟放言

亏功一篲未成丘山【旅獒为山九仞功亏一篲论语子曰譬如为山未成一篲止吾止也譬如平地虽覆一篲进吾往也】凿井九阶不次水泽【孟子曰有为者譬若掘井掘井九仞而不及泉犹为弃井也】行百里者半九十【战国策语云行百里者半于九十此言末路之难】小狐汔济濡其尾【易未济亨小狐汔济濡其尾注云小狐不能涉大川须汔然後乃能济释文汔许讵反说文云水涸也史记春申君传易曰狐涉水濡其尾此言始之易终之难】故曰时乎时不再来终终始始是谓君子【史记李斯传赵高曰时乎时乎间不及谋赢粮跃马惟恐浚时国语范蠡曰得时无怠时不再来淮陰侯传时乎时不再来】

清明

佳节清明桃李笑【本事诗博陵崔护清明独游都城南得居人庄酒渴扣门求饮有女子以

孟水至倚小桃伫立而意属殊厚来岁清明往寻之门庭如故而扁锁之因题诗曰去年今日此门中人面桃花相映红人面不知何处去桃花依旧笑春风李义山李花诗自明无月夜强笑?风天义嘲桃诗无赖天桃面平明露井东春风为开了郤拟笑春风】野田荒壠只生愁雷惊天地龙蛇蛰【谓已过惊蛰节】雨足郊原草木柔人乞祭余骄妾妇【孟子所称齐人乞墦间之祭归而骄其妻妾以言清明上冢】士甘焚死不公侯【陆剡邱中记寒食断火起于子推据史记左传无介推被焚事周礼司烜仲春以木铎修火禁则禁火盖周之旧制】贤愚千载知谁是满眼蓬蒿共一丘【李白诗藜藿不满眼又仰天大笑出门去我等岂是蓬蒿人汉杨惲传古与今同一丘之貉师古曰言其同类也】

何造诚作浩然堂陈义甚高然颇喜度世飞昇之说筑屋饭方士愿乘六气游天地间故作浩然词二章赠之

公欲轻身上紫霞【黄庭经上清紫霞虚皇尊陆士衡乐府前缓声歌有轻举乘紫霞李太白古风至人洞元象高举凌紫霞】琼糜玉饌厌豪奢【离骚经云精琼举以为粢糜音糜吴都赋珠服玉饌】百年世路同朝菌【庄子朝菌不知晦朔】九钥天关守夜叉【楚辞招魂曰虎豹九关啄害下人些卢仝诗夜叉当昼不启关夜半醺祭夜半开东坡诗玉川何日朝金阙白昼关门守夜叉】霜桧左纽空白鹿【寰宇记谯县太清宫有桧树鹿迹存焉范文正公太清宫九咏序左纽桧其一也石曼卿诗引太清记云老子手植此桧根株枝干皆左纽】金炉同契漫丹砂【魏伯阳撰参同契其书论丹砂秘诀白乐天诗漫把参同契难烧伏火砂】要令心地闲如水万物浮沈共我家【楞严经当平心地则世界地一切皆平庄子自其异者视之肝胆楚越也自其同者观之万物一家也】

万物浮沈共我家清明心水徧河沙【传灯录张拙颂云光明寂照徧河沙凡圣含灵共我家】无钩狂象听人语【佛遗教经汝等当好制心心之可畏甚于毒蛇恶兽怨贼大火越逸未足喻也譬如狂象无钩猿猴得树腾跃踔踞难可禁制当急挫之无令放逸纵此心者丧人善事唐严叔敖与善寺大空智不广三藏碑西城隘巷狂象奔突以慈眼视之不旋踵而象伏不起权载之为作偈讽直言而海风恬息结秘印而狂象调伏】露地白牛看月斜【传灯录大安禅师曰安在汾山三十年只看一头水牯牛若落路入草牵出若犯人苗稼即鞭撻调伏既久受人言语如今变作个露地白牛常在面前终日露回回地赶亦不去】小雨呼儿艺桃李踈帘帟客转琵琶尘三昧开门户不用丹田养素霞【华严经有利刹尘尘第十会祖庭事苑三昧者三之曰正昧之曰定亦云正受谓正受不乱能受诸法黄庭经回紫抱黄入丹田唐道士吴筠步虚词绛树结丹实紫霞流碧津以兹保童婴永用超形神诗意劝以释氏三昧勿学道家修养之法】

徐孺子祠堂

乔木幽人三亩宅【诗出自幽谷迁于乔木寰宇记洪州南昌县徐孺子宅在州东北三里孺子美梅福之德于福宅东立宅】生刍一束向谁论【诗生刍一束其人如玉浚汉徐穉传郭林宗有母忧穉往吊之置生刍一束于庐前而去】藤萝得意干云日【後汉下鸿传干云蔽

日之木起于葱青】箫鼓何心进酒樽白屋可能无孺子【家语周公居豕宰之尊下白屋之士文选乐府云周公下白屋吐哺不及餐】黄堂不是欠陈蕃【本传陈蕃为太守不接宾客惟穉来特设一榻後汉郭丹传以丹事编署黄堂以为浚法注黄堂太守之厅事鸡跖集苏州太守所居堂以数遭火因涂雌黄故曰黄堂】古人冷淡今人笑湖水年年到旧痕【杜诗江流旧痕】

思亲汝州作【此诗与还家呈伯氏同意又按黄氏年谱载玉山汪氏有山谷此诗真蹟题云戊申九月到汝州时镇相富郑公今诗言岁晚必是拘留至此时也而首句与集中不同云风力霜威侵短衣】

岁晚寒侵游子衣【古乐府慈母手中线游子身上衣临行密密缝但恐迟迟归】拘留幕府报官移【呈伯氏诗云强趋手版汝阳城更责愆期被诃诟此事独见于此两诗】五更归梦三百里一日思亲十二时【复斋漫录云唐朱□诗曰一别一千日一日十二忆苦心无闲时今日见玉色乃知山谷五更归梦三百里一日思亲十二时之句取此】车上吐茵元不逐【汉丙吉传吉为丞相驭吏嗜酒数逋荡尝从吉出醉吐丞相车上西曹主吏白欲斥之吉曰以醉饱之失去士使此人将何所容西曹第忍之此不过污丞相车茵耳遂不去也时富郑公以前宰相判汝州诗意谓丞相初不以此为罪而或谗之三人成虎耳】市中有虎竟成疑【韩非子魏使龐葱与太子质于邯鄲谓魏王曰今一人言市有虎王信之乎曰否两人言王信之乎曰寡人疑之矣三人言王信之乎王曰寡人信之矣葱曰市之无虎明矣然三人言而成虎今邯鄲去大梁也远于市而议臣者过于三人愿王察之】秋毫得失关何事总为平安书到迟

次韵戏答彦和【元注云彦和年四十弃官杜门不出】

本不因循老镜春江湖归去作闲人【赵嘏诗早晚粗酬身事了水边归去一闲人】天于万物定贫我【庄子大宗师篇子桑曰吾思夫使我至此极者而弗得也父母岂吾贫哉天无私覆地无私载天地岂私贫我哉】智效一官全为亲【礼记司马辨论官材智效一官才宜称职庄子逍遥篇云知效一官行比一乡浚汉毛义家贫以孝行称张奉慕其名往候之坐定而府檄适至以义守令义拳檄书动颜色奉心贱之辞去及义母死去官行服数辟公府公车徵不至奉乃叹曰贤者固不能测往日之喜刀爲亲屈也】布袋形骸增硯磊【传灯录明州奉化县布袋和尚形裁腰膂蹙额蟠腹脰乌罪反膂奴罪反意彦和肥伟借以言之又前集荆江亭即事诗形骸弥勒一布袋盖属张文潜文潜素肥晚益甚】锦囊诗句婉清新【李贺小传每旦日出常从小溪奴骑距卢背古锦囊遇有所得投囊中暮归足成诗杜诗清新庾开府俊逸鲍参军】杜门絶俗无行迹相忆犹当遣化身【维摩诘经云维摩诘不起于座居衆会前化作菩萨时化菩萨昇于上方到衆香界礼彼佛足愿得世尊所食之余施行佛事故诸大士见化菩萨叹未曾有即以问佛佛告之曰下方有世界名娑婆佛号释迦牟尼有菩萨名维摩诘为诸菩萨说法故遣化来释氏有法身化身报身又千百亿化身柳子厚诗若爲化作身千亿万上峯头望故乡】

次韵裴仲谋同年【时仲谋爲舞阳尉】

交盖春风汝水边客牀相对卧僧毡舞阳去叶才百里【裴官于颍昌之舞阳山谷尉汝州叶县】贱子与公皆少年【山谷时年二十四】白髮齐生如有种【玉荆公诗风光断送朱颜去世事栽培白髮生陈胜传侯王将相宁有种耶】青山好去坐无钱【唐符载乞买山钱于子頔见云溪友议】烟沙篁竹江南岸输与鸬鹚取次眠【王元之诗满眼碧波输野鸟一蓑疎雨属渔人梅圣俞诗爱闲输白鸟尽日立沙汀本草鸬鹚谓之水老雒】

流民叹【据实録 宁二年正月判汝州富弼言唐邓襄汝地广不耕河北流民至者日衆若尽给以闲田使获生养实两得其便云云此诗言河北灾伤流民至襄叶间可见在叶县作】

朔方频年无好雨【杜诗好雨知时节当春乃发生】五种不入虚春秋【汉伍被传秦时徐福入海多齎五种而行注五谷之种也月令首种不入】迺来后土中夜震有似巨鳌复戴三山游【列子五山之根不得暂峙帝使巨鳌十五举首而戴之二山流于北极】倾墙摧栋压老弱冤声未定随洪流地文划剝水霤沸【退之祭神文划剝云陰卷日月也剝力支切大雅瞻卬篇霤沸檻泉沸音拂】十户八九生鱼头【南史康绚传淮水瀑涨堰坏奔流于海杀数万人怪物随流而下或人头鱼身或龙形马首退之月蚀诗尧呼大水浸十日不惜万国赤子鱼头生盖效玉川子诗天高日走沃不及但见万国赤子 生鱼头也】稍闻澶渊渡河日数万河北不知虚几州累累襁负襄叶间【襁负其子见论语】问舍无所耕无牛【三国志刘备谓许汜云君求田问舍言无可采此借使其字】初来犹自得旷土嗟尔後至将何怙【退之桃源诗初来犹自念乡邑岁久此地还成家诗无父何怙】刺史守令真分忧【老杜同元使君春陵诗序曰当天子分忧之地】明诏哀痛如父母【前汉西域传武帝末年遂弃轮台之地而下哀痛之诏】庙堂已用伊吕徒【谓富公已拜相也】何时眼前见安堵【杜诗何时眼前突兀见此屋田单传即墨即降愿无虏掠吾族家妻子令安堵汉高祖纪吏民皆按堵如故】疎远之谋未易陈市上三言或成虎【注见前】祸灾流行固无时尧汤水旱人不知【左传天灾流行国家代有汉食货志尧有九年之水汤有七年之旱】桓侯之疾初无证扁鹊入秦始治病【史记扁鹊传扁鹊过齐谓桓侯曰君有疾在湊理不治将深桓侯曰寡人无疾後五日?见曰疾在血脉桓侯不应後五日?见望见桓侯而走】投胶盈菊俟河清【抱朴子云寸胶不能理黄河之水左传云周诗有之俟河之清人壽几何】一簞岂能续民命【孟子一簞食一豆羹得之则生弗得则死南史刘怀珍族弟善明青州饥善明有积粟开仓以賑乡里多获全济百姓呼其家田为续命田】虽然犹愿及此春略讲周公十二政【周礼地官司徒以荒政十有二聚万民一曰散利二曰薄政云云诗意谓扁鹊已去而始治病固无及矣以一簞食一瓢饮而?救民死言賑济无益也虽如此而及今春讲荒政犹庶几焉】风生羣口方出奇【赵广汉见事风生史记白起賛料敌合变出奇无穷陈平六出奇计】老生常谈幸听之【三国志管辂传邓扬曰此老生常谈】

次韵寄滑州舅氏【据国史熙宁三年四月壬午右正言李常落秘阁校理降太常博士通判滑州今附是年】

舫斋闻有小溪山便是壶公谪处天【後汉费长房传长房为市掾吏有老翁卖药县一壶市罢跳入壶中市人莫见惟长房见之因往再拜翁与俱入壶中惟见玉堂严丽旨酒甘肴盈衍其中翁後曰我神仙之人以过见责事毕当去子能相随乎白乐天诗谁知市南北转作壶中天】想听琐窗深夜雨【景福殿赋青琐银铺注云青琐窗也以青画为琐文】似看叶水上江船瞻相白马津亭路【退士读东方朔杂事诗瞻相北斗柄两手自相接白乐天诗百吏瞻相面千夫捧拥身滑州治白马县有黎阳津亦曰白马津酈食其云守白马之津是也】寂寞双鳧古县前【明帝时王乔为叶令每朔望乘双鳧入朝今有墓在汝州叶县汝滑皆京西隶北路】舅氏知甥最疎嬾【杜诗旧谥疎嬾叔须汝故相?】折腰尘土解哀怜【时方作尉故用渊明五斗米折腰事】

张仲谋家堂前酴醾委地【仲谋名询】

沈水衣笼白玉苗【急就章注云篝一名簑亦以为熏笼搜神记曰羊公雍伯性笃孝父母亡葬无终山遂家焉山高无水公作义浆有一人就饮以一斗石子与种之云玉当生其中种之得白璧五双】不蒙湔拂苦无聊烦君斫取西庄柳扶起春风十万条【李义山灞陵柳色无离恨莫枉长条赠所思】

和答登封王晦之登楼见寄

县楼三十六峯寒【李太白赠嵩山焦鍊师序云余访道少室尽登三十六峯按河南志河南府永安县少室山在县西南七十里有三十六峯具列其名王荆公诗三十六峯应好在寄声多谢?来游】王粲登临独倚阑【文选有王仲宣登楼赋】清坐一番春雨歇相思千里夕阳残诗来嗟我不同醉别後喜君能自寛【列子善于能自寛者也杜诗老去悲秋强自寛】举目尽妨人作乐【晋向秀传始秀?注庄周书嵇康曰此尽诎复须注正是妨人作乐耳】几时归得钓鲈桓【庄子应帝王篇鲋桓之审为渊止水之审爲渊流水之审为渊渊有九名此处三焉音义云鲋桓鱼名又云鲋鲸也桓盘也审处也】

和答孙不愚见赠

诗比淮南似小山【文选有刘安石隐士一首注云淮南小山之所作也称大山小山犹诗有大雅小雅】酒名麴米出云安【杜诗闻道云安麴米春才倾一盞便醺人坡诗麴米春香竝舍闻】且凭诗酒勤春事【老杜诗自知白发非春事且尽芳樽恋物华】莫爱儿郎作好官【刘知几史通云师人有儿郎之称】簿领侵?台相笔【汉郊祀志侵寻于泰山矣王维缙兄弟以文名当代语曰朝廷左相笔天下右丞诗台相当谓富郑公】风埃蓬勃使星鞍【文选吴都赋歔雾蓬?音蓬?音勃潘安仁笙赋鬱蓬勃以气出此谓困于将迎使星见浚汉李合传】小臣才力堪为掾敢学前人便挂冠【南史陶弘景挂冠神武门此数语必有为】

睡起

髣髴江南一梦中虚堂尽日转温风【月令季夏之月温风始至】春深稍觉袂衣重【潘岳秋兴赋藉莞蒹御袷衣注袷衣无絮也杜诗地偏初衣袂荆公诗老病袂衣犹怯冷春深煮酒渐闻香】昼永不知樽酒空【孔融云樽中酒不空】

还家呈伯氏【元注云叶县作○山谷年二十三治平四年丁未登进士第授汝州叶县尉明年改元熙宁】

去日樱桃初破花归来着子如红豆四时驱迫少须叟两鬓飘零成老丑【纂异蜀本作四时略无一日闲两鬓已落年少後老杜云亲故伤老丑】永怀往在江南日原上急难风雨後【注见前】私田苦薄王税多诸弟号寒诸妹瘐【退之进学解云冬煖而儿号寒】扶将白髮渡江来【汉孝景王皇后传云女逃匿扶将出拜乐府木兰歌爷孃闻女来出郭相扶将】吾二人如左右手【如失左右手见韩信传又晋邵续传续谏成都王讨长沙王云兄弟如手足】苟从禄仕我遄回【屈原九歌云遄吾道兮洞庭注遄转也陟连切惜诵云欲僵徊以干僚兮注僵知然切】且慰家贫兄孝友强趋手板汝阳城【晋舆服志古者贵贱皆执笏主书君上之教令浚惟八座执笏其余卿士但执手板示非记事官也谢安石与王坦之见桓温坦之倒执手板韩退之赠张籍书上马插手板和卢郎中诗行抽手板付丞相祭文云朱衣象板盖唐人以笏为手板初无分别也】更责愆期被诃诟【诗匪我愆期子无良媒】法官毒螫草自摇【西都赋荡亡秦之毒螫螫舒亦切】丞相霜威人避走【丞相谓富文忠公也按实录熙宁元年二月判河阳富弼判汝州明年二月富公复拜相山谷之官当是熙宁元年戊申盖外集有诗其序云己酉三月按鬪死者于舞阳壁间得往岁书思拂尘落笔之时□者左右往岁即戊申也潘岳西征赋弛秋霜之威严流春泽之渥恩山谷尝云思亲初到汝州时镇相富公以予到官逾期下吏】贱贫孤远盖如此此事端于我何有一囊粟麦七十钱【东方朔传侏儒长三尺余奉一囊粟钱二百四十臣朔长九尺余亦奉一囊粟钱二百四十】五人兄弟二十口官如元亮且折腰【晋书云陶潜字元亮宋书云陶潜字渊明或云渊明字元亮南史云陶潜字渊明或云字深明名元亮昭明太子作传云陶渊明字元亮或云潜字渊明诸书皆云为彭泽令郡遣督邮至县吏目应束带见之潜叹曰吾不能为五斗米折腰事乡里小人解印去县】心似次山羞曲肘【元结次山集有恶曲一篇古人有恶曲者不曲臂以取物不曲膝以便坐纂异蜀本作忽与督邮较升斗】北窗书册久不开筐篋黄尘生锁钮【贾谊疏云俗吏之所务在于刀笔筐篋而不知大体师古曰筐篋所以盛书】何当略得共讨论【论语世叔讨论之】况乃雍容把杯酒意气敷腴贵壮年【鲍昭行路难云意气敷腴在盛时老杜诗两公壮藻思思我色敷腴】不早计之且衰朽【庄子汝亦太早计韩文公诗岂将衰朽计残年】安得短船万里随江风养鱼去作陶朱公【陶朱公养鱼法见齐民要术】斑衣奉亲伯与依【列女传老莱子养二亲行年七十着五色衣为小儿啼大业拾遗记帝嘲罗娘云幸好留依伴成梦不留依住意如何帝自逵广陵多效吴语故称依云韩文公泂吏诗依幸无负犯何由到尔知】四方上下相依从【退之醉留东野诗昔年因读李白杜甫诗长恨二子不相从又云四方上下逐东野虽有离别无由逢纂异蜀本作絶胜已致三千鍾】用舍由人不由己【论语为仁由己而由人乎哉】乃是伏辕驹犊耳【战国策驥伏鹽车而上太行负轡不能上田蚡传今日廷论局趣效辕下驹】

次韵时进叔二十六韵

时子河上园竹间开栋宇【系辞云上栋下宇】大儿胜衣冠小儿丰颊辅【後汉祢衡传大儿孔文举小儿杨德祖史记三王世家皇子赖天能胜衣趋拜檀弓云如不胜衣万石君传云子孙胜冠者韩文始任戴冠易咸其辅颊古左传谷也丰下必有後于鲁国】嫁女与朱公伏腊可称举【谓称觴举酒也汉杨惲传岁时伏腊烹羊炮羔斗酒自劳白乐天诗养之晨昏膳居无伏腊资】发疎虽苍浪【张鷟金载补遗云王能为洛阳令判妇人阿孟状云阿孟身年八十鬢髮早已苍浪】齿嚼未齟齬【楚辞吾固知其齟齬而难入】鸡栖牛羊下【国风鸡栖于埘日之夕矣羊牛下来】各自有室处【杜诗牛羊下来久各自闭柴门诗入此室处左传魏绛曰民有寝庙兽有茂草各有攸处】四墙规摹小易守若滕莒舍前花木深【唐常建诗竹径通幽处禅房花木深】春物丽观覩舍後曲池蛙【楚辞坐堂伏檻临曲池】斋堂风月苦【卢仝诗使君池亭风月苦】岂此不足欤【退之诗摆头笑且言我岂不足欤】叹岁不我与【论语阳货谓孔子曰日月逝矣岁不我与吴质答魏太子牋日月冉冉岁不我与】客宦孤云耳【狄仁杰登太行山南望见白云孤飞】未知秦吴楚向来千驷公果媿一丘土【论语齐景公有马千驷死之日民无得而称焉选诗昔为万乘君今为丘山土】宁当损轩昂【退之听琴诗划然变轩昂】聊欲效俯偻【左传正考父三命兹益共故其鼎铭曰一命而偻再命而伋三命而俯】时子听然笑【上林赋亡是公听然而笑】吾已悟仓鼠【史记李斯传斯年少时为郡小吏见吏舍厕中鼠食不洁近人犬数惊恐之斯入仓观仓中鼠食积粟居大庑之下不见人犬之忧斯叹曰人之贤不肖如鼠矣在所自处耳乃从荀卿学帝王之术】少犹守章句晚实爱农圃【论语吾不如老农吾不如老圃】鹊巢最知风蚁穴识陰雨【汉翼奉传巢居知风穴处知雨文选张茂先诗巢居知风寒穴处识阴雨】世网事谄委【文选诗世网婴我身退之与柳中丞书与贼不相谄委】醉乡俗淳古【唐王绩醉乡记其末云醉乡之俗岂古华胥之国乎何其淳寂也】坐忘两家说肉坚与肠腐【庄子曰坐忘矣枚乘七发云甘脆肥浓命曰腐肠之药晋孔羣传羣嗜酒王导戒之曰卿不见酒家覆瓿布日月久糜烂即答曰公不见肉糟酒淹更堪久耶】酒至即使倾【杜诗每过得酒倾】客来敢辞窶【曲礼云客酺醢主人辞以窶】时邀五柳陶【陶潜集有五柳先生传】共过三径诩【汉书鲍宣传後载自成帝至王莽清名之士十二人蒋诩元卿为兖州刺史以廉直为名王莽居摄以病免官归乡里卧不出户陶渊明集有圣贤羣辅録云求仲羊仲皆挫廉逃名蒋元卿之去兖州还杜陵荆棘塞门舍中有三径惟二人从之游时人谓之二仲见稽康高士传】往在少年场【汉尹赏传赏守长安令杂举轻薄少年恶子杀数百人瘞寺门桓东长安中歌之曰安所求子死桓东少年场生时谅不谨枯骨浚何葬乐府有结客少年场行盖出于此】豪气压颍汝【晋周顗传汝颍固多奇士祖纳传汝颍之士利如锥】借令今尚尔真复难共语稍知怜麴蘖【退之诗高士例须怜麴蘖丈夫终莫生畦畛字本出说命书若作酒醴尔惟麴蘖】渐解等灘漣【元注云水自河出为滩自济出为漣见尔雅释水如左太冲魏都赋清醑如济浊醪如河以漣漣之水而辨酒味也】朋友半山阿光陰共行旅【李太白宴桃李园序夫天地者万物之送旅光陰者百代之过客】人故义当亲衣故义当补【古艶歌曰??白兔东走西顾衣不如新人不如故後溪窦玄旧妻与玄书别曰衣不厌新人不厌故】飞鳧王令尹【後汉王乔传为叶令有神术每月朔望常自县诣台朝显宗怪其来数而不见车骑密令伺之言其临至辄有双鳧从东南飞来于是候鳧至举罗张之但得一双鳧乃诏尚方诊视则

四年中所赐尚书官属履也】期我向君所君为拂眠牀【南史鱼弘传有眠牀一张皆是蹙柏】淹留暮城阻【唐欧阳詹初发太原途中寄太原所思云高城已不见况?城中人左传不腆敝邑为从者之淹留久也】

寄黄从善【从善名降元丰末为国子司业山谷有谢惠山泉诗後为御史中丞此诗言鳧飞叶县宰乃先作今附叶县诗後】

故人千里隔谈经想见牛刀刃发硎【注见前】渴雨芭蕉心不展【文选谢灵运诗折麻心莫辰此借用】未春杨柳眼先青【白乐天杨柳枝词云叶含浓露如啼眼枝嫋轻风似舞腰】鳧飞叶县郎官宰【後汉书郎官出宰百里】虹贯江南处士星【帝王世纪瑶光之星贯日如虹史记荆轲传白虹贯日晋隐逸谢敷传初月犯少微少微一名处士星占者以隐士当之谯国戴逵有美才或忧之俄而敷死此语不知谓谁】天子文思求逆耳【杜牧诗文思天子复河湟汉张良谏高祖云忠言逆耳利于行苦口毒药利于病】吾宗一爲试雷霆【汉贾山传人主之威非特雷霆也】

山谷外集诗注卷一

山谷外集诗注卷二

钦定四库全书

山谷外集诗注卷二

宋 黄庭坚 撰

史 容 注

薛乐道白南阳来入都留宿会饮作诗饯行【叶县盖南阳入京之路又有送薛乐道知郾乡诗有黄山叶县连墙居之句此诗当是叶县作】

薛侯本贵胄射策一矢中【汉书儒林传赞曰设科射策劝以官禄易旅之六五曰射雉一矢亡此仿其语左传王召养由基与之两矢使射吕錡中项伏弢以一矢复命注云一发而中孔安国尚书传曰胄长也公卿之子为胄子】金兰托平生【易大传二人同心其利断金同心之言其臭如兰刘孝标广絶交论云自昔把臂之英金兰之友】瓜葛比诸从【後汉礼仪志上陵仪法苟先帝有瓜葛之属男女毕会晋王导传与其子悦奕碁争道导笑曰相与有瓜葛那得为尔耶】数面尚成亲【渊明集荅龐参军诗序云俗谚曰数面成亲况情过此者乎】况乃居连栋交游及父子讲学连伯仲奴人通使令孩稚接戏弄相怜负米勤【家语子路见于孔子曰昔者由也事二亲之时常食藜藿之实为亲负米百里之外亲歿之後南游于楚从车百乘积粟万鍾累茵而坐列鼎而食愿欲食藜藿为亲负米不可复得也】同力采兰供【文选束广微补亡诗南陔孝子相戒以养也循彼南陔言采其兰眷恋庭闱心不遑安退之作孟先生诗云采兰起幽念亦用此事盖孟郊有母也供谓供养其父母】每持君家书平安觀款纵【顏师古匡俗正谬云今官曹文案于纸缝上记之曰款缝何也答曰此语出魏晋律令字林本作??刻也古者簿领皆用简牋其编连之处于缝上刻记之呼为?缝今纸缝上书名犹取旧语呼为款】秦人与吾炙忧乐一体共【孟子曰耆秦人之炙无以异于耆吾炙】释之廷尉曹微过成系讼从此张长公不肯为时用【张释之传释之为公车令刻太子不下司马门不敬後拜廷尉景帝立释之恐用王生计景帝不过也岁余为淮南相犹尚以前过也其子挚字长公官至大夫免以不能取容当世故终身不仕陶渊明集有张长公诗云远哉长公萧然何事李白诗圣朝久弃青云士他日应怜张长公】丘阿无梧桐曲直不在凤【大雅卷阿云凤凰鸣矣于彼高冈梧桐生矣于彼朝阳箋云凤凰鸣于山脊之上居高视下观可集止喻贤者待礼乃行翔而後集】生涯谷口耕【扬子法言曰谷口郑子真耕乎岩石之下】世事邯鄲梦【异闻集道者吕翁经邯鄲道上邸舍中有少年卢生自叹其贫困言讫思寐时主人方炊黄粱为饌翁乃探怀中枕以授生枕两端有窍生梦中自窍入其家见其身富贵五十年老病而卒欠伸而寤顾吕翁在旁主人炊黄粱尚未熟】自君抱忧端【杜诗忧端齐终南澗洞不可掇】酒椀未忍齷【自注云借用】高秋自南归意气稍寬纵黄花尚满篱白蚁方浮瓮【文选谢朓诗緑蚁方独持注云释名曰酒有况齐浮蚁在上泛泛然】私言助燕喜【鲁颂云鲁侯燕喜令妻寿母诗意谓助其娛亲之乐也】且莫戒輜重【老子曰终日行不离

輜重輜重车也汉李陵传召陵欲使为贰师将輜重】霜风猎帷幕银烛吐蟾蜍【郭璞山海经序云安汲郡竹书穆天子传穆王见西王母取其玉石珍瑰之器金膏银烛之宝今考之穆王传则云天子之宝玉果璿珠烛银注云有精光如烛鲍明远芙蓉赋润蓬山之琼膏辉葱河之银烛鄘国风蟋蟀在东莫之敢指注虹也】密坐幸颇欢【文选曹子建书云得为密坐李善曰曹大家欹器颂曰侍帝王之密坐】剧饮宁辞痛【杜诗忘形到尔汝痛饮真吾师】疎钟鸣晓撞小雨作寒霏廐马萧萧鸣【诗乘马在廐又萧萧马鸣】征人稍稍动九衢槐柳中纵缓青丝鞵【杜诗不反青丝鞵虚烧夜烛花】朱楼豪士集【谢朓诗迢递起朱楼】红袖清歌送【退之诗清歌缓送感行人】河鲤献鱠材江橙解包贡【禹贡扬州厥包橘柚锡贡】蟹擘鰕子黄【老杜鰕儿黄似酒此借用】酒倾琥珀冻【杜诗春酒盃浓琥珀薄】举觴遥酌我发噀知见颂【邶国风云寤言不寐愿言则 笺云今俗人噀云人道我此古之遗语也盖寛饶云母多酌我】行行鞭箠倦短句烦屡讽

戏咏江南土风

十月江南未得霜高林残水下寒塘饭香猎户分熊白酒熟渔家擘蟹黄【世说蟹黄熊白】橘摘金苞随驿使【文选笙赋披黄苞以授柑乐天诗浸月冷波千顷玉苞霜新橘万株金荆州记陆凯与范蔚宗诗折梅逢驿使】禾舂玉粒送官仓【洪范惟辟玉食战国策粒米如玉杜诗碧酒随玉粒杜牧之阿房宫赋钉头磷磷多于在庾之粟粒】踏歌夜结田神社【踏歌近代曲也张说刘禹锡皆有踏歌行续仙传蓝采和带醉踏歌云踏踏歌蓝采和异闻集载邢凤之子梦一美人歌踏阳春之曲退之诗麦苗含穠桑生樾共向田头乐社神】游女多随陌上郎【乐府解题说邯郸女子姓秦名罗敷为王仁妻仁事赵王为家令罗敷采桑陌上赵王见而悦之置酒将夺焉刘梦得诗荡舟游女满中央采菱不顾马上郎】

弈碁二首呈任公渐

偶无公事负朝暄【韩文丞厅记云余方有公事子姑去负暄见列子】三百枯碁共一樽【枯碁三百孰与万人之将见文选博奕论】坐隐不知岩穴乐手谈胜与俗人言【语林曰王中郎以围棋是坐隐支公以碁为手谈司马子长报任少卿书云此可与知者道难为俗人言】簿书堆积尘生案【人间多事堆案盈几见嵇康书】车马淹留客在门战胜将骄疑必败果然终取敌兵翻【项羽传宋义谏曰战胜而将骄卒惰者败今少惰矣】

偶无公事客休时席上谈兵校【一作角】两碁心似蛛丝游碧落【乐天长恨歌上碧落下黄泉】身如蜩甲曳枯枝【退之联句化虫枯局茎言蝉也蝉亦曰蜩诗五月鸣蜩也评诗者谓山谷此二句则苦思忘形较胜负于一着与王荆公措意异矣荆公诗云莫将戏事扰真情且可随缘道我赢战罢两奩收墨白一枰何处有亏成】湘东一目诚甘死【南史王伟为侯景谋主伟作檄云项羽重瞳尚有乌江之败湘东一目宁为赤县所归】天下中分尚可持【史记高纪项羽与汉王约中分天下割鸿沟谓持碁白黑皆不可动也】谁谓吾徒犹爱日【爱日见法言】参横月落不曾知【月落参横见柳子厚龙城録】

谢晓纯送纳袜

剗草曾升马祖堂【传灯录江西一禅师姓马氏六祖能和尚请曰向後佛法从汝边去马驹踢刹天下人厥後江西法师布于天下时号马祖又丹霞禅师投南岳石头和尚石头告衆来日剗佛殿前草至曰各备锹鑿剗草独师以盆盛水净头于和尚前胡跪石头笑为剃头】暖窻接膝话还乡赠行百衲兜罗襪【楞严经云我今示汝兜罗绵手摘此二字】处处相随入道场

冲雪宿新寨忽忽不乐【纂异眉州本及黄氏本一梦江南据马鞍梦中投宿夜阑千山衔斗柄三星没雪共月明千里寒俗学近知回首晚病身全觉折腰难江南长尽捎云竹归及春风斩钓竿又案黄氏年谱云按垂虹诗话山谷尉叶县曰作新寨诗有俗学近知回首晚病身全觉折腰难之句传至都下半山老人见之击节称叹谓黄某清才非奔走俗吏遂除北京教授与国史本传下合】

县北县南何目了又来新寨解征鞍山衔斗柄三星没【诗三星在天】雪共月明千里寒【谢希逸月赋隔千里兮共明月】小吏有时须束带【陶明渊应束带见督邮事已见前注】故人颇问不休官【唐僧灵彻诗相逢尽道休官去林下何曾见一人见集古录】江南长尽捎云竹归及春风斩钓竿【杜诗钓竿欲拂珊瑚树删去诗中有新寨饯南归客诗乃叶县尉时作】

听崇德君鼓琴【前集有姨母李夫人墨竹诗外集十一卷有观从德墨竹歌其序云姨母崇德君赠新墨竹图且令作歌永元章画史云朝议大夫王之才妻南昌县君李氏尚书公择之妹能临松竹木石等画见本即为之卒难辨又别集有酌崇德君寿酒诗竝叶县作惟前集诗任氏编入元佑三年馆中作】

月明江静寂寥中大家斂袂抚孤桐【後汉列女传扶风曾世叔妻同郡班彪之女数召入宫令皇后诸贵人师事焉号曰大家禹贡峯阳孤桐注云特生桐中琴瑟】古人已矣古乐在【孟子云今乐犹古乐】髣髴雅颂之遗风妙手不易得【杜诗画师亦无数好手不可遇】善听良独难犹如优昙华时一出世间【法华经云如是妙法诸佛如来时乃说之如优昙鉢华时一现耳疏云优昙鉢华名端应现则金轮玉山】两忘琴意与已意乃似不着十指弹【孟郊妾薄命云不惜十指弦为君千万弹】禅心默默三渊静【三渊前已注事见庄子渊有九名此处三焉注云渊者静默之谓耳】幽谷清风淡相应丝声谁道不如竹【晋孟嘉传师不知竹竹不知肉】我已忘言得真性罢琴窻外月沈江万籁俱空七弦定【杜诗罢琴惆怅月照席】

郭明甫作西斋于颍尾请予赋诗二首

食贫自以官为业【诗三岁食贫荆公诗朝信有儿迎郭汲食贫无地乞羊昙】闻说西斋意凜然万卷藏书宜子弟十年种木长风烟【史记货殖传十岁树之以木】未尝终日不思颍

【欧阳公有思颖寄常处士诗】想见先生多好贤安得雍容一樽酒【沈休文诗勿言一樽酒明日难重持杜诗何时一樽酒重与细论文】女郎台下水如天【寰宇记颖州治汝陰县女郎台在县西北一里古老云昔娼之女嫁鲁昭侯为夫人筑台以宾之故俗谓之女郎台柳子厚诗桂岭瘴来云似墨洞庭春尽水如天】

东京望重两并州【郭丹郭汲皆为并州牧後汉书有传】遂有汾阳整缀旒【诗为下国缀旒唐郭子仪封汾阳郡王赞曰唐祚若赘旒而能辅太子再造王室】翁伯入关倾意气【汉郭解传解姊曰以翁伯时人杀吾子贼不得师古曰翁伯解字也传又云解入关关中贤豪闻声争交欢史记晏子传云意气扬扬甚自得李白诗扶风豪士下天奇意气相倾山可移】林宗异世想风流【郭泰字林宗事见後汉书李白诗吾非谢尚邀彦伯异代风流各一时】君家旧事皆青史今日高材未白头莫倚西斋好风月长随三径古人游【劝之仕也渊明归去来辞三径就荒汝颖隣州此亦叶县尉时作】

劝交代张和父酒

风流五日张京兆【汉张敞传敞使赋曹掾絮舜有所案验舜以敞劾奏当免不肯为敞竟事曰吾为是公尽力多矣命五日京兆耳安能复按事】今日诸孙困小官作尹大都如广汉【赵广汉张敞皆京兆尹所为大略相似】画眉仍复近长安【敞为妇画眉长安人传张京兆眉妩欲得官近长安唐人语也】三人成虎事多有【注见前孔融临终诗三人成市虎浸渍解胶漆】衆口铄金君自寛【楚辞故衆口之共铄金兮初若是而逢殆邹阳书云衆口铄金积毁销骨】酒兴情亲俱不浅贱生何取罄交欢【杜诗看弄渔舟移白日老农何有罄交欢】

过平舆怀李子先时在并州【平舆县隶蔡州嘉佑四年升并州为太原府案潜夫诗话载山谷教人云世上岂无千里马人中难得九方臯此可为律诗之法即此诗也解叶县尉时作】

前日幽人佐吏曹【易履道坦坦幽人贞吉】我行堤草认青袍【庾信哀江南赋云青袍如草白马如练杜诗汀草乱青袍范鲁公诗青袍春草色白紵弃如仇王荆公诗照映里门非白屋陵云春草有袍青】心随汝水春波动兴与并门夜月高世上岂无千里马人中难得九方臯【列子说符篇秦穆公谓伯乐曰子之年长矣子姓自可使求马者乎对曰臣之子皆才下可告以良马不可告以天下之马也臣有所与共担纒薪菜者自九方臯请见之公使求马三月而反报曰已得之矣牝而黄使人取之牡而骊公谓伯乐曰败矣子之所使求马者色物牝牡尚不能知又何焉之能知也伯乐曰臯之所观天机也】酒船鱼网归来是花落故溪深一篙【方言刺船谓之篙】

以金沙醪醕送公寿【山谷尝有跋云余与宗室越宫有葭苢故曩时与宣州院公寿景珍尝共文酒之乐试教官入京作】

天遣醪醕玉作花紫緜揉色染金沙凭君着意樽前看便与春工立等差【退之李花诗缟裙

练帨无等差沈立海棠记云惟紫縣者谓之海棠余乃棠梨花耳又苕溪云闺中漕字海棠有如紫縣揉色者此摘其字】

寄怀公寿

好赋梁王在日边【司马相如传以訾为郎会景帝不好词赋是时梁孝王来朝从游说之士邹阳枚乘之徒相如见而说之因病免客游梁李白诗西入长安到日边】重帘复幕锁神仙【退之诗黄帘绿幕朱户闭杜诗华屋艳神仙】莫因酒病疏桃李【诗何彼穠矣华如桃李美王姬之颜色盛也又曹子建诗南国有佳人容华若桃李】且把春愁付管弦【白乐天诗街东酒薄醉易醒满眼春愁销不得】愚智相悬三十里【魏武帝与杨修读曹娥碑有知无知较三十里】荣枯同有百余年【文选遭子建诗积善令余庆荣枯立可须】及身强健且行乐【汉杨惲传人生行乐耳须富贵何时】一笑端须直万钱【太白诗玉盘珍羞直万钱】武陵【黄氏年谱杂诗八首而第八首载外集第六卷题作武陵今从蜀本附叶县诗後】

武陵樵客出桃源自许重游不作难【太白诗回山转海不作难倾情倒意无所惜】卻觅洞门烟鎖断归舟风月夜深寒【晋大元中武林人捕鱼缘溪行忽逢桃林夹岸复前行尽水源便得一山山有小口豁然开朗黄髮垂髫自云先世避秦来此因延至其家具酒食停数日辞去既出及郡诣太守遣人随其往寻其处遂迷不得路详见陶渊明集中桃花源记】呻吟斋睡起五首呈世弼【王世弼名纯亮山谷妹夫所谓王郎者】

槌几坐清昼博山凝妙香【李白古乐府博山炉中沈香火双烟一气凌紫霞杜诗心清闻妙香】兰芽依客土柳色过邻墙巷僻过从少官闲气味长江南一枕梦高卧听鸣榔【文选潘安仁西征赋鸣榔厉响李文饶观钓赋喜良夜而不归更鸣榔而远适李白诗惜别耐取醉鸣榔且长谣】

学省非簿领【文选沈休文学省愁卧一首注云梁齐书明帝即位沈约迁国子祭酒学省国子也山谷时为北京国子监教授故得称学省苏子由诗鸾台与诸曹有政非簿领】卧病常闭关【谢灵运诗卧病对空林】两余楼阁静风晚鸟乌还赏逐四时改【沈休文诗山中咸可悦赏逐四时移】心安一味闲古人虽已往不废仰高山【诗高山仰止】

疏食吾犹饱曲肱哦古今【论语子曰饭疏食饮水曲肱而枕之乐亦在其中矣】酒倾因好事【扬雄传好事者载酒肴从之】弦絶为知音【扬雄解难云鍾期死伯牙絶弦破琴而不肯与衆鼓】妬蘂长春木争巢喧暮禽长怀阮校尉北望首阳岑【文选阮嗣宗诗步出上东门北望首阳岑】

已把社公酒【退之忆昨行社公礼罢元侯回】春寒那得严厌听鸿啄雪喜有燕穿帘璞玉深藏器【孟子今有璞玉于此易君子藏器于身】囊锥立见尖【史记平原君谓毛遂曰贤士之处世若锥之处囊中其末立见先生不能毛遂曰使遂蚤得处囊中乃颖脱而出非特其未见而已】儿时爱谈道【卫玠传卫玠谈道平子絶倒】今日口如箝【鼂错传邓公曰臣

恐天下之士箝口不敢复言矣退之苦寒云口角如衔箝】

墙下蓬蒿地儿童课翦除【张平子西京赋牧禽举觜数课衆寡注计数课録校所得多少杜诗喧呼山腰宅课奴杀青竹】蔓葛随分种杞菊未须鉏河水传烽火【杜诗烽火连三月家书抵万金】交州报捷书【交趾入寇盖 宁八年连岁进讨至十年乃降时山谷未离北京也】无能落闲处【唐司空图耐辱居士歌云籟是长教闲处着退之诗如今到死得闲处还有诗赋歌康哉】慙媿饱春蔬

奉答子高见赠十韵

柳径两着緜竹斋风陨箨【诗十月陨箨】屏处人事少【汉窦婴传谢病屏居南山下】晴余鸟声乐【左传鸟乌之声乐】诗卷堕我前谓从天上落【李白诗咳唾落九天随风生珠玉又寄崔侍御诗九乡天上落】君有古人风诗如古人作【魏志毛玠传云太祖以素屏风素凭几赐玠曰君有古人之风故赐君以古人之服鲍明远诗侧覩君子论预见古人风】簞瓢谢膏粱【簞瓢见论语孟子云所以不愿人之膏粱之味也注膏粱粱细如膏者也】翰墨化糟粕【庄子曰桓公读书于堂上轮扁斲轮于堂下问桓公曰敢问君之所读者何言也公曰圣人之言也曰圣人在乎公曰已死矣曰然则君之所读者古人之糟粕已】误蒙东海观吾浅乃可酌真成闻道百自谓莫已若【杜诗真成浪出游庄子云秋水时至两涘渚涯之间不辨牛马河伯欣然自喜顺流而行至于北海东面而望不见水端河伯叹曰野语有之闻道百以为莫已若者我之谓也】谢生石韞玉【陆机闻赋云石韞玉而山辉】志尚本丘壑【陶潜诗少无适俗韵雅志在丘壑】虽无首阳粟饮水亦不恶【史记伯夷叔齐传二人义不食周粟饿死于首阳山晋谢道韞传王郎逸少子不恶】趺然何时来为我一发药【庄子逃虚空者闻人足音趺然而喜庄子曰列子谓伯昏瞀人曰先生既来曾不发药乎】招子高二十二韵兼简常甫世弼【诗中言夏向厌次而冬自聊摄归盖以檄考试往来之时与奉和世弼诗同意盖是岁适当科举若附之戊午年则山谷乃考试于卫州而厌次非卫州经行之路今附于乙卯岁】

我行向厌次【厌次棣州所治县也】夏扇日在摇甘瓜未除垄高柳尚鸣蜩【诗小弁苑彼柳斯鸣蜩嘒嘒】驾言聊摄归【诗驾言出游聊摄博州所治聊城县也即左传所谓聊摄以东】飞霜晓封条【文选杂拟诗嘉树生朝阳凝霜封其条】负薪泣裘褐公子御狐貂【王孙子曰昔卫君重裘累茵而坐见路有负薪而哭者问其故对曰雪下衣薄是以哭也见艺文类聚王褒圣主得贤臣颂云裘?貉之煖者不忧至寒之凄怆法言云举世寒貂狐不亦煖乎】岁月坐晚晚【选诗思君令人老岁月忽已晚宋玉九辨曰日晚晚其将入兮明月销铄而减毁】鬓颜飒然凋道德千古事斯文非一朝【杜诗文章千古事得失寸心知】往者我不及【离骚云往者不可及兮来者不可待】後坐多见超【退之诗只见有不如不见有所超】吾党二三子【论语吾党之小子又二三子何患於丧乎】士林耸孤标【老杜诗顔氏之子才孤标】小谢抱周易忘言独参寥【庄子玄冥闻之参寥参寥闻之疑始】崔郎楚左史【楚左史倚相左传】二典考舜尧王生风雅学谈辩秋江潮【释氏所谓海潮音也】洒笔惊有司小敌谓可骄【汉光武纪诸部喜曰刘将军平生见小敌怯今见大敌甚勇可怪也】

安知擣菹局临关败三臬【李翱有五木经云擣菹五木玄白判又曰王采四毗采六白二玄三日臬又曰马出初关叠行非王采不出关】三生数步隔屡赴茗盃邀【陆羽茶经四之器曰盃越州上明州次婺州次岳州次】小谢殊未来【选诗日暮碧云合佳人殊未来】我觉百里遥问之忧菽水【檀弓孔子曰啜菽饮水尽其欢斯之谓孝】心虑极无聊【贾谊传一二指搔身虑无聊】父怜母不诃日以浊酒浇【世说阮籍胷中垒块故须酒浇之】此道如鼎实念子羹未调【文选潘安仁诗王生和鼎实书曰若作和羹尔惟盐梅】古来有亲养回也乐一瓢不田鶡生突在物乃为妖【庄子曰吾未尝为牧而鶡生于奥未尝好田而鶡生于突】吾言有师承【後汉儒林传序师资所承】可信如斗杓【斗杓招摇星也】诗以解子忧【孟子惟顺於父母可以解忧】亦用当子招【此诗言三子者举进士不中选谢治易崔习书王习诗不为不至而譬之于博有胜负也小谢恻而不出自言无以奉菽水之欢故为言顔子事亲一簞食一瓢饮不改其乐以解其忧也王纯亮字世弼山谷妹壻山谷至自厌次盖以檄考试进士也外集删去诗中有一诗其序云次韵答常甫世弼二君不利秋官郁鬱不平故予诗多及君子处得失事与此篇同时】

次韵谢子高读渊明传

枯木嵌空微暗淡【老杜诗云嵌空太始雪嵌期衔切】古器虽在无古弦【晋陶渊明传蓄琴素一张徽弦不具每朋酒之会则抚而和之曰但识琴中趣何劳弦上声】袖中正有南风手谁为听之谁为传【南风手谓舜作五弦之琴以歌南风司马迁答任安书云谚曰谁为为之孰令听之盖锺子期死伯牙终身不复鼓琴】风流岂落正始後【晋卫玠传不意永嘉之末复闻正始之音】甲子不数义 前【南史陶潜传所着文章义 之前明书年号永初以来惟云甲子】一轩黄菊平生事无酒令人意缺然【渊明九日诗序云秋菊盈园而时醪靡至渊明以九月九日无酒摘菊盈把望见白衣人送酒至庄子吾自视缺然】

奉和王世弼寄上七兄先生用其韵

宫槐弄黄黄【退之诗黄黄芜菁花】莲叶绿婉婉【退之元和圣德诗婉婉弱子今以言新荷嫩绿也】时同二三友竹轩凉夏晚驾言都城南【诗驾言出游大名府北京也故言都城】以望征车返何知苦淹回及此秋景短愁思令人瘦【文选古诗思君令人瘦杜诗远游令人瘦】举目道路远西风脱一叶【文选月赋洞庭始波木叶微脱杜诗风雨一秋叶退之诗林柯有脱叶李白大猎赋不周来风玄冥掌雪木脱叶草解节】荐土闻乡选【被檄试乡贡进士也】简书催渡河【诗出车云岂不怀归畏此简书】宾客不得展【檀弓云展墓而入注云展省视之】亲忧对萱丛【诗伯兮云焉得谖草言树之背毛云谖草令人忘忧背北堂也释文云谖本又作萱嵇康养生论合欢蠲忿萱草忘忧】妇病废巾盥【内则妇事舅姑进盥少者奉盥长者奉水请沃盥盥卒授巾】言趋厌次城【厌次见前注】鞭马倦长阪【文选曹子建诗秋兰被长阪又陆韩卿诗骏足思长阪】枣林蔽天日交阴不容繖仰看实离离忆见花纂纂【文选笙赋云咏园桃之夭夭歌枣下之纂纂歌曰枣下纂纂朱实离离宛其落矣化为枯枝注云古咄咄歌曰枣下何攒攒荣华各有时枣初欲赤时人从四边来枣适今日赐谁当仰视之】异乡怀节物不共斟酒盏举场下马入深锁严闱管诸生所程书摺束若稽

秆【後汉范丹传拾拾自资禹贡三百里纳秸服注秸藁也说文秸本或作稽工八反】蜜灯坐回环【庾信集中有灯赋云香添然蜜气杂烧兰柳子厚诗回环驱万象】丹砚精料束披榛拔芝兰【文选赵景真书披榛觅路】断石收琰琬【上林赋朝采琬琰和氏出焉】纷争一日事声实溷端颯【六家指要其实中其声者谓之端实不中其声者谓之】天球或弃遗【顾命曰天球河图在东序】斗筭尚何算【论语斗筭之人何足算也】西归到官舍尘土昏案版寒窗穿碧疏【文选天台赋彤云斐亶以翼棖皦日炯晃于绮疏注棖窗间子也刻为绮文谓之绮疏鲍明远诗朱爵文窗韬碧疏韦苏州酒肆行碧疏玲珑含春风银题彩织邀上客】润础闇苍藓【淮南子云山云蒸柱础润杜诗础润休全湿云时欲半回】诗书鹊巢翻【鹊巢见诗】帷幔蛛丝罥果知兄未来光阴坐晚晚【宋玉九辩曰晚晚其将入】昨蒙叔父报亦叹音书简【叔父谓黄廉字夷伯也王介甫荐为司农寺干当公事命同司农丞程之才体量河北河东灾伤道除知司农寺丞以荒政十二为科条自昨蒙叔父报至貂狐无余煖皆言体量赈济辛勤之状详见山谷遗文夷仲行状】薄言使事重【诗薄言还归】激切被天遣【高僧传僧嵬戒行严洁有一女子寄宿自称天女以上人有德天遣我来嵬曰无以革囊见试此摘其字北史李元忠传孙腾曰此君天遣来不可违也李长吉诗天遣裁诗作花骨】逋流一方病责任媿和扁【左传昭元年晋侯求医于秦秦伯使医和视之史记扁鹊姓秦名越人】咨询怀靡及【小雅皇皇者华君遣使臣也駉駉征夫每怀靡及末章云载驰载驱周爰咨询】不遑暇息偃【诗采薇云不遑启居不遑啓处北山云或息偃在牀】嚼冰进糜餐冲雪踏层巘严霜八月飞貂狐无余煖【貂狐见前注】念嗟叔母刘穷年寄甥馆【文选李令伯陈情表云祖母刘愍臣孤弱躬亲抚养此用其语行状又云娶刘氏屯田员外郎致仕涣之女夷仲往河北而刘氏终年留其父母家也孟子曰帝馆甥于贰室注谓妻父曰外舅谓我舅者吾谓之甥尧以女妻舜故谓舜甥也】尚怜公初黠诱掖到昭宛【公初昭宛疑是夷仲子侄小字如前集称阿巽及相与睦也】庭坚薄才资行又出畦町【庄子彼且为无町畦亦与之为无町畦释文云町徒顶切幽诗云町疃鹿场音他典切韩文公诗文才不如人行又无町畦】浮云与世疎【论语于我如浮云杜诗流水生涯尽浮云世事空李白诗河东郭有道于世若浮云】短绠及道浅【庄子褚小者不可以怀大绠短者不可以汲深退之诗汲古得修绠】匠伯首暂回大樗终偃蹇【意谓虽受诸公知终无心进取庄子匠石之齐至于曲辕见栢社树其大蔽牛匠伯不顾遂行释文曰匠伯石字也】学宫尸廩入奉养阙丰腆学徒日新闻陋孤犹旧典【学记则孤陋而寡闻时用王氏经学取士也】小材渠困我持斲问轮扁【原注云後用此一韵事异似不害轮扁见前注】大材我屈渠越鷄当鹄卵【庄子奔蜂不能化蠶蠋越鸡不能复鹄卵】未能引分去恋禄幸苟免【退之泂吏诗官不自谨慎宜郎引分往】平生报一饱从事极龟勉【老杜云常拟报一饭小雅云龟勉後事不敢告劳】岂如不见收放身就间散【退之进学解云投闲置散】思伯卧江南【伯即七兄也】无心趣轩冕【庄子缮性篇非轩冕之谓也】龐翁迹颇亲黄蘗门屢款【居士龐蘊黄蘗希运禅师传灯録皆有传】斋余佛饭香【维摩经云有国名衆香佛号香积维摩诘问衆菩萨谁能致彼佛饭维摩诘不起于座化作菩萨到衆音界礼彼佛足于是香积如来以衆香鉢盛满香饭与化菩萨化菩萨以满鉢香饭与维摩诘】茶沸甘露满【陆羽顾渚山记云豫章王子尚访昙济道人于八公山道人设茶茗子尚味之曰此甘露也何言茶茗】逢人问进退余事寄一莞【论语夫子莞尔而笑】仲父挟高才甘为沟中断【元注云音短庄子云百年之木破为犧樽而文之其断在沟中比牺樽于沟中之断则美恶有间矣其于失性一也退之木居士

诗为神谁比沟中断遇赏还同?下余】青黄可牺樽【礼记尊用牺象退之祭子厚文牺樽青黄乃木之灾】荐庙配瑚璉【论语云何器也曰瑚璉也注云瑚璉黍稷之器】季父有逸兴未尝入都辇【文选潘安仁诗自我违京辇】临流呼钓船拂石弄琴阮【唐元行冲传有人破古冢得铜器似琵琶身正圆行冲曰此阮咸所作器也命易以木弦之其声清亮乐家谓之阮咸】雍容从朋交林下追游衍【诗昊天曰旦及尔游衍谢朓诗于役傥有期鄂渚同游衍】田园虽是乐及时思还返阴寒木鸣条【论衡五日一风风不鸣条】望损倚门眼【战国策王孙贾事闵王闵王出走失王之处其母曰汝朝出而晚来则吾倚门而望汝暮出而不还则吾倚闾而望汝今事王王出走汝不知其处汝尚何归】南枝喜鸣鹊【魏武短歌行月明星稀鸟鹊南飞绕树三匝无枝可依杜诗浪传鸟鹊喜】尺素托黄犬【晋陆机传机有骏犬名曰黄耳羁寓京师久无家问笑语犬曰我家絶无书信汝能齎书取消息否摇尾作声机乃为书以竹箴好盛之而系其颈犬寻路南走遂至其家得报还洛岁以为常文选乐府云呼儿烹鲤鱼中有素尺书】又以窀穸留【左传襄十三年春秋窀穸之事】归期指姑洗【月令季春之月律月姑洗】寄声问僧护【僧护当是子侄小字】儿髮可以绾妙言对宾客称渠万金产【退之赠张籍诗云有儿虽甚怜教示不免简君来好呼出踉蹌越门限惧其无所知见则先媿赧昨因縁有事上马插手版留君住厅食使立侍盘 薄暮归见君迎我笑而莞指渠相贺言此是万金产】尔来弄笔砚墨水恶翻建大字如栖鸦已不作肥软【刘禹锡诗小儿弄笔不能瞋洊壁书窗且赏勤卢仝诗忽来案上翻墨汁涂抹诗书如老鸦汉高祖纪云秦形胜之国也地势便利其以下兵于诸侯譬犹居高屋之上建瓴水也注云幡瓴水言其向下之势易也法书苑曰邬彤善草书如寒林栖鸦】鲁论未彻章正苦诸叔懒新诗开累纸【自此以下皆言王世弼诗如月明如柘浆如砧声笕水声也】欲罢不能卷【论语欲罢不能】远怀托孤高别思盈繾綣【诗民劳云无纵诡随以谨繾綣】秋月明夜潮柘浆冻金盃【楚辞招魂云脰鼈炮羔有柘浆】疎杵韵寒砧【砧捣衣帛之石老杜诗寒衣处处催刀尺白帝城高急暮砧】幽泉流翠笕【韵书云笕古典切以竹通水也】吟哦口垂涎【杜诗道逢麴车口流涎】嚼味有余隳【汉蒯通传论战国说士亦自序其说号隳永注肥肉也】传示同好人我家东牀坦【东牀坦腹见晋王羲之传】风烟意气生【潘岳作杨荆州诔翰动若飞纸落如云杜诗挥毫落纸如云烟】挥毫写藤茧【唐舒元舆有吊剡溪古藤文言以剡藤为纸也法书要録王羲之兰亭序用蠶茧纸鼠?笔北户録云晋宋间有一种纸长丈余就船抄之世谓茧纸】猎山穷鹑鴛【鴛女居切鴛也月令田鼠化为鴛】罩海极鰕蜃【集中代书云文章六经来汗漫十牛车譬如观沧海细大极龙鰕即此诗之意也】银钩乱眼膜【晋索靖传作草书状曰草书之为状也宛若银钩老杜云金鑱刮眼膜价重百车渠涅盘经云是时良医即以金鑱刮其眼膜】嘉句濯肺腕且言伯在野【书曰君子在野】朋友必推挽五泰列清庙【荀子蚕赋臣愚而不识请占之五泰注云五泰五帝也五帝少昊颡项高辛唐虞也诗意以五帝比国朝列圣周颂云清庙祀文王也】圣绪今皇纘真儒运斗枢【言神宗继统而王荆公为相也法言云鲁不用真儒後汉梁商赞宰相运动枢极】道化廸天显【书酒诰我闻惟曰在昔殷先哲王廸畏天显小民注谓汤蹈道畏天明着小民】朝论惜才难逸民大蒐猕【左氏隐五年春蒐夏苗秋猕冬狩】岂闻任方物【书禹贡任土作贡旅獒无有远迓毕献方物】包贡遗羽籥【禹贡曰厥贡羽毛齿革又曰惟箛篥楛漳云楛中矢干】招车必翹翹【左传庄二十二年敬仲曰诗云翹翹车乘招我以弓岂不欲往畏我友朋注云逸诗也】前席思謇謇【文帝前席贾生易王臣蹇蹇】王甥欲好怀【王纯亮字世弼山谷妹婿也前

云我家东牀坦亦指世弼尔雅云妹之夫为甥】高意恐难转【诗我心匪石不可转也自且言伯在野以下皆谓世弼诗中称伯兄虽在田野间而朋旧在朝必能援引举逸民也世弼此怀虽好而七兄之意不可转也】长篇题远筒【白乐天与元微之唱和常以竹筒贮诗得琅玕截作筒緘题句章写心胸】封寄淚空漕遥知云际开灰飞黄钟管【太玄经曰调律者度竹为管芦葦为灰漠然不动寂然无声冬至夜半黄鍾以应】送吴彦归番阳【诗中有三见秋气爽之句盖在北京三年矣】

学省困齋盐【文选沈休文有直学省愁卧诗退之送穷文太学四年朝齋暮盐】人材任尊獎倥傯祝螟蛉【扬子学行篇天降生民倥傯顓蒙又曰螟蛉之子殪而逢蜾蠃祝之曰类我类我久则肖之矣】小大器罍觚【退之诗觚大餅罍小】诸生厌晚成【老子云大晚成後汉当是授传汝大材当晚成】躡学要佞狙【学记曰学不躡等货殖传曰节狙僧】摹书说偏旁【林罕有字源偏旁小说三卷其序云汉太尉祭酒许子取其形类作偏旁条例十五卷名之说文】破义析名象【陶渊明诗奇文共欣赏疑义相与析此讥王氏字解】九鼎奏箫韶爰居端不飡【易鼎大亨以养圣贤主父偃传大丈夫生不五鼎食死则五鼎烹周礼鼎有十二牢此言鼎食也臧文仲杞爰居事见国语庄子達生篇云有鸟止于鲁郊鲁君悦之为具太牢以飡之奏九韶以乐之鸟乃忧悲眩视不敢饮食今休款啓寡闻之民吾告以至人之德譬之若载鼙以车马乐鸚以鍾鼓也彼又乌能无惊乎哉李白赠卢主簿诗海鸟知天风窸身鲁门东临觴不能饮矫翼思陵空钟鼓不能乐烟云谁与同亦此意此亦讥王氏之学前篇和王世弼诗云学徒日新闻孤陋犹旧典亦此意】青衿少到门庭除昼闲敞【诗子衿刺学校废也青青子衿悠悠我心言学子兢趋新学不至公堂也文选南都赋体爽垲以闲敞】竹风交槐阴三见秋气爽时赖解事人载酒直心赏【扬雄传好事者载酒肴从之鲍照诗心赏犹难恃谢朓诗怀人去心赏】吴郎楚国材【左传声子说楚云虽楚有材晋实用之】幽兰秀榛莽彦国吐嘉言【晋胡毋辅之传王澄曰彦国吐嘉言霏霏不絕辅之字彦国】子将喜标榜【後汉许劭字子将核论乡党人物每月辄更其品题故汝南俗有月旦评】平生钦豪俊久客慕乡党【文选张茂先诗不曾远别离安知慕俦侣】虚斋延洒扫簿饭荐腍鯨【礼内则夏宜腍鱣注腍乾雉鱣乾鱼唐韵鯨乾鱼腊也音息两反】诗句唾成珠【文选诗咳唾自成珠老杜诗汝身已见唾成珠】笑嘲慳爬痒【杜牧诗云杜诗韩笔愁来读似倩麻姑痒处抓】春夏频谢除曾未厌来往归雁多喜声寒蝉停哀响【渊明诗云哀蝉无遗响来雁有余声杜诗云玄蝉无停号】黄花满篱落【渊明诗采菊东篱下抱朴子曰葛洪篱落频缺】白蚁鬧瓮盎【杜诗蚁浮仍腊味韩诗喧?鸣瓮盎】留君待佳节忽忽戒徂两【文选谢朓诗扰扰整夜装肃肃戒徂两】亲戚伤离居【楚辞将何以遣兮离居檀弓吾离羣而索居】交游念畴曩【文选卢子谅诗借曰如昨忽为畴曩畴曩伊何逝者弥疎】某局无对曹擣菹失朋长【史记淳于髡传六博投壶相引为曹李白诗连呼五白行六博分曹赌酒酣驰晖】问君去为何云物愁莽苍【庄子云适莽苍者三餐而反莽莫浪反苍七荡反白乐天春雪诗寒消春莽苍自注云二字上声又翼城北原作云野色何莽苍自注作去声】寿亲髮斑斑千里劳梦想家鸡藁头肥【藁禾秆也头有余粒鸡食之而肥藁头用禾头生耳字又北史齐本纪曰时有童谣云一束藁两头然藁头云者山谷摘字多此类】寒鱼受罾网甘旨中厨【内则云旨甘柔滑】伊哑弄文襁【东方朔传伊优哑者词未定也优一侯反亚乌加反刘梦得诗伊哑转井车汉宣纪在襁褓注云褓小儿被也褓小儿綳綳补耕反史记赵世家程婴杵臼匿赵

孤取他人婴儿负之衣以文褓】此行乐未央【诗夜未央老子荒乎其未央】安知州涂广
【渊明诗目倦川涂异】深秋上沧江远水平如掌【杜诗秦川对酒平如掌】人生要得意
壮士多旷荡野鹤被笼樊【渊明诗久在樊笼里复得反自然韩文公诗譬如笼中鹤六翮无
所摇】江鸥恋菰蒋【子虚赋东藩雕胡莲藕觚卢张揖曰雕胡菰米也郭璞曰菰蒋也】本
来丘壑姿不着刍豢养【孟子刍豢之悦我口】寄声谢乡邻为我具两桨有路即归田君其
信非诳【韩诗临分不汝诳有路即归田】二月丁卯喜雨吴体为北门留守文潞公作【据
实録熙寧七年判河阳文彦传判大名府】

乘輿斋祭甘泉宫【甘泉本秦离宫汉武帝增广之自武帝至西汉末皆上甘泉祠祭鲍明远
诗二年从车驾斋祭甘泉宫】遣使骏奔河岳中【书武成云丁未祀于周庙邦甸侯卫骏奔
走执豆笏】谁与至尊分盱食【董仲舒传制曰朕承至尊休德左传伍奢曰楚君大夫其盱
食乎】北门卧镇司徒公【唐裴度传度节度河东帝谕意曰为朕卧护北门可也白乐天献
裴令公诗保厘东宅静守护北门牢邵氏闻见録潞公判北京运判江辅之密劾公不治神宗
御批所奏付公曰侍中旧德故烦卧护北门小臣敢尔无礼】微风不动天如醉【庾信哀江
南赋云天何为而此醉原注云时闻太母闵雨勤甚故有微风不动之句盖言忧勤如此而天
不闻有若醉焉】润物无声春有功【老杜春夜喜雨诗云润物细无声】三十余年霖雨手
【书说命若岁大旱用汝作霖雨】淹留河外作时丰

李右司以诗送梅花至潞公予虽不接右司想见其人用老杜和元次山诗例次韵【潞公时
留守北京老杜有和元结春陵行兼贼退示官吏作二首其序云简知我者不必示元】

凡花俗草败人意【俗物已复来败人意见王戎传】晚见琼蕤不恨迟江左风流尚如此春
功终到岁寒枝

次韵外舅喜王正仲三丈奉诏祷南岳回至襄阳舍驿马就舟见遇三首【正仲三丈谓王存
字正仲元丰间修起居注元佑初自右丞迁左丞案实録熙寧九年十一月诏安南行营将士
疾病者衆遣同知太常礼院王存祷南岳自京师十一月被命至衡山回程必在次年案陈无
已诗话云谢师厚废居于邓王右丞存其妹壻也奉使荆湖枉道过之夜至其家师厚有诗云
倒着衣裳迎户外尽呼儿女拜灯前】

汉上思见龐德公【龐德公襄阳人以况师厚】别来悲叹事无穷【垂虹诗话云别来悲叹
事无穷张孝先光祖云曾见亲札作欢字正如山谷改杜诗少年今开万卷余不可拘平侧也
】声名藉甚漫前日【西汉陆贾传贾游汉廷公乡间声名藉甚】鬢须索然成老翁【杜诗
顏状老翁为文选魏文帝书已成老翁但未白头耳】家酿已随刻漏下【晋何充字次道刘
惔云见次道饮令人欲领家酿】园花更开三四红相逢不饮未为得【唐李敬方诗相逢不
饮空归去洞口桃花也笑人见复斋漫録】听取百鸟啼忽忽能来问疾【见维摩经】好音
传蹇步昏花当日痊【圆觉经譬彼病眼见空中花】烹鲤得书增目力【烹鲤见前注孟子
既竭目力焉】呼儿扶立候门前【归去来兮云稚子候门】游谈取重慙犀首【犀首公孙
慙也史记有传】居物多羸昧计然【史记殖货传越王勾践困于会稽乃用范蠡计然注计

然范蠡师也汉张汤传居物致富与汤分之】惟有交亲等金石【金石交见韩信传】白头忘义复忘年【忘年忘义见庄子齐物篇】

语言少味无阿堵【马援传过是恐少味矣晋王衍妻郭氏贪鄙衍嫉之口未尝言钱展起见钱曰举却阿堵物】冰雪相看有此君灯火诗书如梦寐麒麟图画属浮云【汉单于入朝上思股肱之美图画其人于麒麟阁】平章息女能为妇【息女见汉高纪老杜送封主簿诗序余与主簿平章郑氏女子垂欲纳采书至女子已许他族】欢喜儿曹解缀文【汉刘歆赞缀文之士】忧乐同科惟石友【潘安仁诗投分寄石友】别离空复数朝曛【韩诗吾徒幸无事庶以穷朝曛李白诗举迹倚松石谈笑迷朝曛】次韵正仲三丈自衡山返命舍驿过外舅师厚赠答

昏昏市井气【扬子云市井相与言则以财与利韩诗海气昏昏水拍天】咕咕儿女语【前汉灌夫传平生毁程不识不直一钱今日长者为寿乃效女儿咕啜耳语退之诗呢呢儿女语】禽喧声百种春作事万绪【列子云扰扰万绪起矣】人间鸡黍期【文选范云诗恨不具鸡黍注引谢承汉後书山阳范式字巨卿与汝南张元伯为友春别京师以秋为期至九月十五日杀鸡作黍二亲笑曰山阳去此几千里何必至元伯曰巨卿信士不失期言未绝而巨卿至】天上德星聚【世说新语注云续晋阳秋曰陈仲弓从诸子侄造荀朗陵父子于时德星聚太史奏五百里贤人聚老杜诗全蜀多名士严家聚德星】乖离略十年【文选诗乖离即长衢王逸少帖多有乖离字】发白齿龃龉【龃龉见前注】太史祷衡丘【汉武伐南越祷太一】佐王用貔虎【书桓桓如虎如貔史记黄帝教熊黑貔貅貔虎以与炎帝战于阪泉之野杜诗貔虎开金甲麒麟受玉鞭】子云免大夫【扬雄传雄以病免复召为大夫以言师厚】草玄空自苦【刘散观太玄谓雄曰空自苦】人生只尔是付与瓮头醕【法书要录江东云峒面犹河北称瓮头谓初熟酒也诗饮此醕矣谢灵运诗芳尘疑瑶席清醕满金樽】

山谷外集诗注卷二

山谷外集诗注卷三

钦定四库全书

山谷外集诗注卷三

宋 黄庭坚 撰

史 客 注

次韵子瞻春菜【据实録 宁十年二月癸巳尚书祠部员外郎直史馆权知河中府苏轼知徐州又按颍滨集诗序云 宁十年二月始会於澶渊相从赴彭城山谷时在北京始通书并二诗书云窃食於魏会□下开幕府在彭门魏即北京彭门徐州也按东坡集次韵鲁直见赠古风二首乃在春菜之後盖未通问时先和此诗也】

北方春蔬嚼冰雪【诗谷风云我有旨蓄亦以御冬笺云蓄美菜以御冬月乏无时也大抵北方地寒春初犹食淹菜及寒菹】妍暖思采南山蕨【召南草虫云陟彼南山言采其蕨晋张翰传翰谓顾荣曰天下纷纷祸难未已吾本山林间人无望於时子以明防前以智虑後荣怆然曰吾亦与子采南山蕨饮三江水耳翰因见秋风起乃思吴中菰菜蓴羹鲈鱼膾遂命驾而归】韭苗水饼姑置之【南史何尚之传帝好水引饼史记赵奢传王曰母置之】苦菜黄鸡羹粳滑【史记藜藿不糝】蓴丝色紫菰首白【齐民要术云四月蓴生茎而未叶名曰雉尾蓴第一肥美叶舒长足名丝蓴五六月用丝蓴周礼鱼宜菰注雕胡也内则蜗醢而菰食注雕胡也菰亦作菰世说陆机曰千里蓴羹未下盐豉宋玉讽赋主人之女为臣炊雕胡之饭杜诗为我炊雕胡逍遥展良觥】菱蒿芽甜葎头辣【齐民要术葎菜味辛葎音罕沈存中忘怀录云石芥罕菜二物极辛为菹大佳盱江志云葎菜生麻姑山及麻源盱江即建昌军】生菹入汤翻手成【汉陆贾传云如反覆手耳师古曰言其易也反音翻】茱以姜橙夸缕抹【诗左右茱之文选枚乘七发云肥狗之和茱以山肤注引礼记注云茱菜也谓以菜调和之也韩文公诗调以咸与酸茱以椒与橙】惊雷菌子出万钉【传灯录百文问黄叶甚麽处来曰大雄山下采菌子来此摘其字隋杨素传赐万钉宝带借使其字】白鹅截掌鼈解甲琅玕森深未飘箴软炊香粳煨短茁【禹贡球琳琅玕今以喻竹元稹种竹诗可怜亭亭干一一青琅玕召南驹虞云彼茁者葍注茁出也今言笋初出土老杜云软炊香饭缘老翁饭一作粳】万钱自是宰相事【晋何曾日食万钱杜诗左相日兴费万钱】一饭且从吾党说【论语吾党之直者】公如端为苦笋归明日青衫诚可脱

闰月访同年李夷伯子真于河上子真以诗谢次韵【是岁闰正月】

十年不见犹如此【自治平丁未同唱第至 寧乙卯向十年矣山谷时在北京故称河上】未觉斯人叹滞留【司马谈六家指要云太史公留滞周南】白璧明珠多按劔【汉书邹阳传明月之珠夜光之璧以暗投入于道衆莫不按劔相眄者】浊泾清渭要同流【杜诗浊泾】

清渭何当分泾以渭浊注泾渭相入而清浊异】日晴花色自深浅风软鸟声相应酬【唐杜荀鹤诗风暖鸟声碎】谈笑一樽非俗物【晋王戎与阮籍为竹林之游戎尝後至籍曰俗物复来败人意】对公无地可言愁【杜诗如渥之酒常快意亦如穷愁安在哉李白诗且须沽酒对君酌与尔同消万古愁】

戏答李子真河上见招来诗颇夸河上风物聊以当嘲云

浑浑旧水无新意漫漫黄尘浣白鸥安得江湖忽当眼卧听禽语信船流【杜诗汲多井水浑王荆公诗但有洛水流浑浑又江湖岂在眼昨夜梦汲涛】

和答李子真读陶庾诗

乐易陶彭泽【陶潜字渊明为彭泽令】忧思庾义城【庾信子山封义城公集中有云攻许愁城终不破荡许愁城终不开闭户欲遣愁愁终不肯去深藏避愁去愁已知人处】风流扫地尽【唐祝钦明授太子经帝与羣臣宴钦明自言能八风舞帝大笑卢藏用叹曰是举五经扫地矣杜诗豪杰谁人在文章扫地无太白诗春光扫地尽碧叶成黄泥本出汉魏豹等赞上古遗烈扫地尽矣】诗句识余情往者不再作【檀弓云赵文子曰死者如可作也吾谁与归】前贤畏後生【论语後生可畏杜诗庾信文章老更成凌云健笔意纵横今人嗤点流传赋不觉前贤畏後生】君言得意处此意少人明

丙寅十四首效韦苏州【并序】

二月丙寅率李原彦深谢愔公静游百花洲适为游人所擅见拒於晨门因赋何人有酒身无事谁家多竹门可款之句行系马李氏园步至广济僧舍谒寇忠愍莱国公祠堂用吏部诗韵作【据国史元丰元年二月丙午朔则丙寅乃二十一日山谷时在北京而谢师厚居南阳後篇夏雨眠起之什有腹便时蒙嘲之句又送朱觐中允宰宋城诗亦云邴王台边春一空但有雪飞扬柳风我从南阳解归橐重帘复幕坐学宫当是山谷告假或因他故至南阳在冬春间耳今附于此○百花洲莱公祠堂皆在邓州】

雪霁草木动【月令草木萌动】春融烟景和嘉晨掩关坐如此节物何同游得二子晤对不在多【诗云彼美淑姬可与晤言笺云晤对也】不知鞍马倦想见洲渚春清昼鎖芳园谁家停画轮【晋舆服志画轮章驾牛以彩漆画轮轂故名曰画轮车】高柳极有思向风招游人【退之诗杨花榆荚无才思此反而用之陶诗山泽久见招】

渐嘉楼外花嘉赏亭边柳作者归山丘【曹子建诗生存华屋处零落归山丘】今春为谁有千秋万岁後还复来游否【原注云渐嘉楼阳夏谢希深作嘉赏亭范文正公作桓子新论云雍门周说孟尝君曰千秋万岁後高台既已倾曲池又已平战国策楚王谓安陵君曰寡人万岁千秋之後谁与乐此矣汉高纪千秋万岁後魂魄犹思沛】

城南有佳园【王逆少帖云仆近修小园子殊佳致山简传诸习氏荆上豪族有佳园池】风物迎马首【左传惟子马首是瞻】但赏主人竹不饮主人酒【王徽之传吴中一士大夫家有好竹欲观之便出坐舆造竹下讽啸主人洒扫请坐徽之不顾将出主人乃闭门徽之便以此赏之】红日媚紫苔【沈休文诗宾阶绿钱满客位紫苔生】轻风泛春柳【楚辞光风转蕙泛崇兰】

三公未白髮【三公谓寇莱公花文正公谢希深也】十辈乘朱轮【杨惲家方隆盛时乘朱轮者十人】只取人看好何益百年身【杜诗长为万里客有媿百年身】但顾长今日清樽对故人【渊明诗但顾长如此躬耕非所叹】

江梅香冷淡开徧未全疎已有耐寒蜨双飞上花须【杜诗随意数花须】今夜严城角肯留花在无【乐府诗集云汉横曲有梅花落本笛中曲唐大角曲亦有大梅花等曲今其声犹有存者】

我思五柳翁解作一生事得钱送酒家便静寻山寺念我还如此翁应会人意【渊明传云尝着五柳先生传以自况又云颜延之为始安郡过浔阳造渊明每往必酣饮致醉临去留钱二万与渊明渊明悉送酒家稍就取酒谢灵运诗还得静者便杜诗老来苦便静】

庭空日色静楼迴钟声迟【李义山诗地宽楼已迴人更迴于楼】褐叟已争席【左传旨酒一盛兮余与褐之父睨之庄子曰其往也舍者避席其反也舍者与之争席矣】驯鸦更不疑同来复同去竟别我为谁【退之诗遇酒既酩酊君知我为谁】谢甥有逸兴李髯非不嘉【蜀志诸葛亮曰孟起当与翼德竝驱争先犹未及髯之絶伦逸羣也】苦思梦春草【南史谢惠连传族兄灵运尝思诗竟日不就忽梦见惠连即得池塘生春草大以为工】醉狂眠酒家【杜诗李白一斗诗百篇长安市上酒家眠】斯游无俗物傲睨至昏鸦【俗物见前注杜诗云眼前无俗物又云有待至昏鸦此借以言谢之能诗而李之好饮也】

寺古老僧静亭阴修竹多莱公作州日部曲屡经过衆推识公面苍石眠绿莎【寇準字平仲赠莱国公諡忠愍始为参知政事罢知邓州卢仝诗苍藓印我面雨露皴我皮此不嫌故我突兀蒙相知以言识公面者今惟苍石耳】

盛时衆吹嘘【杜诗冯唐已老听吹嘘又兹理傖吹嘘李白诗故人东海客一见借吹嘘】谪去衆毀辱不为公存亡幽兰春自绿欲书名相传安得南山竹【前汉公孙贺传云南山之竹不足受我词祖君彦代李密檄数炀帝十罪罄南山之竹书罪未穷此反用】

昔公调鼎实【周易鼎有实潘岳金谷集诗王生和鼎实】指顾九庙尊郡国富士马于今开塞垣【杜诗一寄塞垣深】谁能起公死为国守北门【守北门见前注寇公鎮大名日北使问公何以不在中书曰主上以朝廷无事北门鎖钥非准不可】出身世丧道【庄子曰世丧道矣道丧世矣世与道交相丧也李白诗世道日交丧浇风散淳源】解绶饥驱我【渊明乞食诗云饥来驱我去不知竟何之】杯中得醉乡【唐王绩有醉乡记】去就不复果岂为俗

人言【司马迁书可为知者道难为俗人言也】達人悦余可【贾谊鵬鸟赋達人大观物无不可】

少小尚狷介【退之诗少小聚嬉戏】与人常不款【後汉光武幸章陵置酒作乐宗室诸母因酣悦相与语曰文叔少时谨信与人不款曲惟直柔耳今乃能如此】置身稍雍容遇酒辄引满【汉书序传引满举白陶渊明诗携壶接宾侣引满更献酬】自是鹤足长难齐鳧胫短【庄子鳧胫虽短续之则忧鹤胫虽长断之则悲】

催公静碾茶

雪里过门多恶客【元注云不饮者为恶客出元次山集中按集中有絶句云有时逢恶客注云非酒徒即为恶客】春陰只恼有情人睡魔正仰茶料理【石曼卿诗已为物象添诗瘦更被陰晴长睡魔晋王徽之传云卿在府日久比当相料理】急遣溪童碾玉尘【幽怪录橘中四老人云君输我玉尘九解乐天诗茶新碾玉尘】

用前韵戏公静

偶逢携酒便与饮【渊明九日无酒适太守送酒便饮醉而归】竟别我为何等人【退之归彭城诗遇酒即酩酊君知我为谁】兔月龙团不当惜长卿消渴肺生尘【司马相如传常有消渴疾卢仝诗渴心归去生尘埃】

对酒歌答谢公静

我为北海饮【後汉书孔北海云座上客常满樽中酒不空】君作东武吟【鲍明远乐府有东武吟】看君平生用意处萧洒定自知人心【定自晋人语也世说王敦曰家兄在郡定佳又谢太傅曰定自佳定自佳】南阳城边雪三日愁阴不能分皂白【晋天文吉虔翼书曰此天公愤愤无皂白之徵也】推轮浣蹄泥数尺【退之朝贺归诗绿槐十二街涣散驰轮蹄又赠元十八何人识章甫而知骏蹄踠魏武苦寒行曰车轮为之摧】城门昼开眠贾客移人僵尸在旦夕谁能忍饥待食麦【左传成十年晋侯梦大厉觉召桑田巫巫言如梦公曰何如曰不食新矣又曰晋侯欲麦使甸人献麦将食张如厕陷而卒此借使】身忧天下自有人【白居易诗退身江海应无用忧国朝廷自有贤】寒士何者愁填臆民生正自不愿材【晋谢安传正自不能不尔退之祭子厚文凡木之生不愿为材】可乘以车可鞭策【列女传老莱子妻云可食以酒肉者可随以鞭捶可授以官禄者可随以斧钺】君不见海南水沈紫梅檀碎身百链金博山【本草沈香门白檀树出海南又云真紫檀旧在下品又云扶南国人言衆香共是一木根是梅檀节是沈水叶是藿香胶是薰陆选诗昔为百链刚汉故事诸王出合赐博山香炉李白诗博山炉中沈香火】岂如不蒙斧斤赏老大絶崖霜雪间投身有用祸所集【庄子匠石归栎社见梦曰云云且予求无所可用久矣几死乃今得之为予大用使予也而有用且得有此大也耶】何况四达之衢井先汲【尔雅四达谓之衢庄子直木先伐甘井先竭】昨日青童天上回手捧玉帝除书来【列仙傳有青童君诗仙邢氏有青童去撼南山木野

客来寻北帝经王莽传是时争为符命封侯其不为者相戏曰独无天帝除书乎此借用】一番通籍清都阙【列子穆王以为清都紫微帝王之居乐天诗只恐长生须有籍仙台试为检名看又平生同门友通籍在金闺刘禹锡诗金门通籍真多土黄纸除书每日开】百身书名赤城台【毛诗如何赎兮人百其身续仙传司马承祯身居赤城名在丹台茅君传云治赤城山】飞昇度世无虚日怪我短褐趋尘埃顾谓彼童子【退之秋怀诗顾谓汝童子置书且安眠】此何预人事【晋谢玄传子弟亦何预人事而正欲使其佳】但对清樽即眼开一杯引人着胜地【世说新语曰王卫军云酒正自引人着胜地杜诗胜地初相引徐行得自娱】传闻官酒亦自清径须沽取续吾瓶南山朝来似有意【王徽之云西山朝来致有爽气】今夜恍放春月明

种决明

后皇富嘉种【楚辞橘颂云后皇嘉树橘徕服兮】决明着方术【本草决明子注云俗方惟以疗眼也道术时须】耘锄一席地【老杜种莒苳诗序云理小畦种一两席许诗云破块数席间荷锄功易止】时至观茂密缥叶资笔羹【内则笔羹注云笔菜也又云雉兔皆有笔注云谓菜酿也】绀花马蹄实【绀谓浅黄色本草注云生子作角实似马蹄俗名马蹄决明】霜丛风雨余簸簸场功毕【国语单襄公过陈川不梁野有庾积场功未毕】枕囊代曲肱【本草决明子盛以囊作枕治头风明目】甘寝听芬苾【庄子云孙叔敖甘寝乘羽而郢人投兵诗苾苾孝祀】老眼愿力余【战国策赵王曰秦之攻我也不遗余力矣】读书真成癖【晋杜预传时王济有马癖和峤有钱癖武帝谓预曰卿有何癖对曰臣有左传癖刘轲上座主曰岁月悠久寢成书癖】

同世弼韵作寄伯氏在济南兼呈六舅祠部

山光扫黛水掇蓝【卓文君眉黛如远山色乐天乐府忆江南云春来江水绿如蓝又春池戏李郎中直似掇蓝新汁色与君南院染罗袞】闻说樽前惬笑谈伯氏清修如舅氏济南萧洒似江南屡陪风月乾吟笔【北史隋文令李德林作诏复郑译爵高颍戏谓译曰笔乾】不解笙簧醉舞衫只恐使君乘传去拾遗今日是前衔【汉高纪云乘传诣洛阳乐天诗十年不改旧官衔唐陈子昂杜甫皆左拾遗岂比之二子耶】

伯氏到济南寄诗颇言太守居有湖山之胜同韵和【济南即齐州李公择自滑州通判知鄂徙湖又移齐】

西来黄犬传佳句知是陆机思陆云【陆机传机寓京师久无家问有犬名黄耳乃为书系其颈犬南走至其家得报还洛】历下楼台追把酒【济南府治历城韩信袭破齐历下军即此】舅家宾客厌论文【老杜赠太白云重与细论文】山椒欲雨好云气湖面逆风生水纹【谢叔源诗悲猿响山椒谢灵运诗税驾登山椒李义山诗水纹如縠燕差池刘禹锡诗春水縠纹生】想得争棊飞鸟上行人不见只听闻次韵寄李六弟济南郡城桥亭之诗【德叟】

客心如头垢日欲撩千篲【汉书云头尘不去杜诗髮短不胜篲】闻人说江南喜气吐晴霓【太白诗意气素霓生】伏枕梦归路子规吟翠微【杜鹃一名子规一名鷦鷯尔雅山未及上翠微左太冲蜀都赋山阜相属触石吐云郁葢葢以翠微文选陆佐公石阙铭旁映重叠上连翠微】济南似江南【济南今齐州济南郡也後又升为济南府】旧见今不疑洗心欲成游王事相夺移【文选曹顔远诗田宝相夺移】弩马恋栈豆【干宝晋纪曰桓范出赴曹爽宣王谓蒋济曰智囊往矣济曰智则智矣弩马恋刍豆爽不能用也】岂能辞縶繯【诗皎皎白驹食我场苗縶之维之以永今朝】本无封侯骨【汉翟方进传从蔡父相蔡父大奇其形貌谓曰小史有封侯骨】见事又重迟【史记范雎传穰侯智士也其见事迟汉杜周传周少言重迟】徒能多着酒大腹如鸱夷【扬雄酒箴曰夷滑稽腹如大壶尽日盛酒人复借酤】惟思一渔舟载网横渺弥【退之诗摆棹出渺弥】矫贡历下亭【矫贡当是矫首诸本皆误渊明归去来辞时矫首以遐观老杜有陪李北海宴历下亭诗云海内此亭古济南名士多】朱阑转清溪春风吹桃李三月自成蹊【李广赞桃李不言下自成蹊】翠叶张日幄【文选陆士衡诗云密叶张翠幄】红英铺地衣【红锦地衣随步绉此南唐李氏宫中歌词也欧公称之】此中有佳兴【卢藏用指终南山曰此中大有佳处】不醉定自非【定自见前注】况当郡政成野茧麦两岐【汉光武纪建武二年野蚕成茧被于山阜张堪为渔阳太守百姓歌曰桑无附枝麦穗两岐见後汉书】与民同观游【孟子云与民同乐也观游二字惟柳子厚集中多有之字本出揚子云羽猎赋罕徂离宫而辍观游天说云筑为墙垣城郭台榭观游郭橐驼传云长安豪富人为观游永州新台记乃作栋字以为观游訾家洲记大凡以观游名于代者不过视于一方又零陵三亭记邑之有观游者或者以为非政韩文亦有此语汴州水门记云因而饰之匪为观游又欧阳生哀词序云观游饘飧必召预之】永夜不阖扉【言外户不闭也】女墙上金枢【杜诗楼高更女墙文选海赋大明?轡于金枢之穴注云月也金西方也杜诗云缺月壤金枢伏滔望清赋金枢理轡素月告望】天如青琉璃【杜诗波涛万顷堆琉璃】想子果下归马饱生刍嘶【後汉书臧国出果下马注云高三尺乘之可于果下行杜诗生刍适马性】

用明发不寐有怀二人为韵寄李秉彝德叟【秦少游作李公择行状云兄布早卒拊其子秉彝如已子秉彝盖山谷伯舅之子】

竹贯四时清【一作竹节晚逾绿】月通云气明【一作月华寒更明】外弟有佳质【一作处】妙年推老成後凋对霜雪【一作到冰霜】不昧处阴晴盛德当如此【一作观物忆相见】古人畏後生【一作契阔难为情礼器云如竹箭之有筠也如松柏之有心也二者居天下之大端矣故贯四时而不改柯易叶论语後生可畏杜诗粲粲元道州前圣畏後生通典世称姑子为外兄弟舅子为内兄弟非典言也异姓之亲通谓之外】

在昔授子书髭彼垂两髮【诗栢舟诗髭两彼髦注髦者髮至眉子事父母之饰】乖离今十年【退之诗乖离生难凭】树立映先达【世说云其商略先往名达】青灯哦妙句【一作诵佳句】如酌春酒滑把书念携手惆怅至明发【李陵诗携手上河梁】

人生不如意十事恒八九【晋羊祜传祜上疏乞伐吴而议者不同祜曰天下事不如意恒十

居七八】未见历下人徒倾历城酒【秉彝南康军建昌人时在济南前有寄李六弟诗即此人也已见前注】从来亲骨肉不免相可不【退之寄岳鄂李大夫诗云少年乐新知衰暮思故友譬如亲骨肉宁免相可否】但愿崇事实虚名等箕斗【诗大东维南有箕不可以簸扬维北有斗不可以挹酒浆文选古诗南箕北有斗牵牛不负轭言彼三星者虚负轭有其名太白诗北斗不酌酒南箕空簸扬】

蚤知鹊山亭李杜发佳思【老杜集有陪李北海宴历下亭诗又和北海郡太守李邕登历下亭自注云亭对鹊湖可见湖上山名鹊山也】弥年听传夸登览通梦寐遥怜坐清旷【谢灵运诗缙磷谢清旷】落笔富新制【渊明桃源诗俎豆犹古法衣裳无新制】尚因宾客集沥酒使我醉

往在舅氏旁 拚堂上帚【礼记少仪云泛埽曰埽埽席前曰拚拚席不以鬣执箕膺搗注鬣帚也释文拚弗运反】六经观圣人明如夜占斗索居废旧闻【礼记离羣而索居】独学无新友【学记独学而无友则孤陋而寡闻】美子杞梓材【左传声子说楚曰如杞梓皮革自楚往也虽楚有材晋实用之袁彦伯三国名臣赞竞收杞梓争采松竹】未曾离矫揉【易说卦云坎为矫輮释文云如九反輮又如又反宋忠王虞本作揉宋云使曲者直直者曲为揉荀子劝学篇木直中绳輮以为轮】

安诗无恙时学行超辈侪【山谷集中有李摅字说云予既字舅弟李摅曰安诗而安诗请其说云云风俗通恙毒虫喜噬人古人草居露宿故相劳问必曰无恙乎又李陵传霍与上官无恙乎】华屋落丘山【文选曹子建箴引云生存华屋处零落归丘丘】百忧满人怀此士如不亡仲子【一作叔也】抱奇材不独典刑在【诗云虽无老成人尚有典刑】神明还观来【法书要录庾翼与王羲之书云忽见足下答家兄书恍若神明顿还旧观集中又有评李德叟诗云孙莘老尝以德叟诗一轴示予曰子试为我评之予对曰再过普惠七言古人道中表字韵国朝以来能者不过一二人而已韩退之所谓横空盘硬语妥帖力排奭惟此诗足以当之】

少时诵诗书贯穿数万字【司马迁赞亦其涉猎者广博贯穿经传驰骋古今】迩来窥陈编记一忘三二【柳子厚寄许京兆书云往时读书自以不至抵滞今皆顽然无复省录每读古人一传数纸以後则再三伸卷复观姓氏旋又废失山谷盖用此意欧阳文忠鎮阳读书诗寻前顾後失得一念十忘】光阴如可玩老境翻手至【柳子厚与李翰林书悠悠人世不过为三十年客耳前过三十七年与瞬息无异後所得者其不足把玩亦已审矣】良医曾折足说病乃真意【左传齐高强曰三折肱知为良医屈原九章云九折臂而成医兮吾至今而知其信然】

桃李春成径【见前注】本自不期人【桃李成蹊非与人期而人自至耳】历下两寒士簞瓢能悦亲耻蒙伐国问【董仲舒传为江都相事易王王问曰粤王句践与大夫泄庸种蠡谋伐吴遂灭之孔子称殷有三仁寡人亦以为粤有三仁桓公决疑于管仲寡人决疑于君仲舒对曰昔者鲁君问柳下惠吾欲伐齐何如柳下惠曰不可归而有忧色曰吾闻伐国不问仁人

此言何为至于我哉徒见问耳且犹羞之况设诈以伐吴乎王曰善】肯卧覆车尘子既得此友从之求日新【易日新之谓盛德礼大学汤之盘铭曰苟日新日日新又日新】

陪师厚游百花洲盘礴范文正祠下道羊昙哭谢安石事因读生存华屋处零落归山丘为十诗【百花洲莱公范公祠皆在邓】

忆在昭陵日【仁宗葬永昭陵】倾心用老成功归仁祖庙正得一书生【谓文正公】

羊生但着鞭勿哭西州门故有不亡者南山相与存【羊昙事在谢安传着鞭见刘琨传庄子曰凡之亡也不足以丧吾存】

庆州自不恶藉甚载声华忠义可无憾公今有世家【仁宗时元昊反文正公自请守鄜延徙知庆州又以为环庆路经略安抚使决策取横山复灵武而元昊称臣请和文正仲子忠宣公纯仁字尧夫熙宁七年十月知庆州所谓世家者此也哲宗即位又自河中徙庆州此时未也不恶见前注】

公归未百年鹳巢荒古屋我吟殄瘁诗悲风韵乔木【诗人之云亡邦国殄瘁】

伤心祠下亭在时公燕处临水不相猜江鸥会人语公有一杯酒与人同醉醒遗民能记忆欲语涕飘零【北史裴义宣传不饮酒而好宾游终日献酬同其醉醒左传吴季札闻歌唐曰思深哉其陶唐氏之遗民乎】委径问谣俗高丘省佃作昔游非苟然今花几开落在昔实方枘成功见圆机【离骚经云不量凿而正枘兮固前修以菹醢九辩云圜凿而方枘兮吾固知其鉏鋸而难入文正平生鉏鋸不合多矣参知政事亦以不合出而其临边随宜制变未始不圆也文中子曰安得圆机之士与之言九流哉】九原尚友心【孟子是尚友也】白首要同归【潘安仁诗投分寄石友白首同所归文正公岳阳楼记其末云其必曰先天下之忧而忧後天下之乐而乐乎噫微斯人吾谁与归诗意端指此】

人去洲渚在春回花草斑【杜诗重岩细菊斑又云春风花草香】清谈值渊对发兴如江山【杜诗发兴自林泉】

落日衔城壁【渊明诗悠悠衔山日炯炯留清辉太白诗青山犹衔半边日】祠东更一游【文正守邓三年後人祠之】悲来惜酒少安得董糟丘【南史陈暄与兄子秀书曰速营糟丘吾将老焉李白寄元参军诗忆昔洛阳董糟丘为予天津桥南造酒楼黄金白璧买歌笑一醉累月轻王侯】

百花洲杂题【范文正公集中有答王源叔忆百花洲见寄云芳洲名冠古南都又献百花洲图上陈州晏相公云穰下胜游少此洲聊入诗百花争窈窕一水自连漪邓州南阳郡东汉为南都也】

范公种竹水边亭漂泊来游一客星【老杜上汉中王云西汉亲王子成都老客星客星老杜以自喻山谷亦用此意客星本出严光传】神理不应从此尽【谢灵运述祖德诗云拯溺由道情龛暴资神理】百年草树至今青【用老杜齐鲁青未了之意】

竹下把酒

竹下倾春酒愁阴为我开不知临水语更得几回来【柳子厚再上湘江诗好在湘江水今朝又上来不知从此去更遣几年回】

砌台晚思

目极江南千里春【楚辞目极千里兮伤春心】谁今洒笔可招魂【宋玉有招魂一篇杜诗昭州词翰与招魂】向人犹作故时面翠竹苍烟一万根【山谷卫南诗落句云惟有鸣?古祠柏对人犹是向时情与此同意晋刘惔传惔字真长褚哀谓孙绰曰真长平生何尝相比数而卿今日作此面向人耶】

和师厚接花

妙手从心得【轮扁斲轮谓齐桓公曰臣得之于手而应于心】接花如有神【杜诗下笔如有神】根株穰下土【邓州治穰县】颜色洛阳春【纂异蜀本前四句作妙得花三昧谁明幻与真家风穰下土笑面洛阳春】雍也本犁子【史记仲尼弟子传冉雍字仲弓子曰雍也可使南面仲弓父贱人子曰犁牛之子騂且角虽欲勿用山川其舍诸】仲由元鄙人【仲由字子路性鄙好勇力冠雄鸡佩玃豚陵暴孔子孔子设礼稍诱子路後儒服委质】升堂与入室只在一挥斤【论语子曰由也升堂矣未入于室也庄子匠石运斤成风言以洛阳牡丹接邓州所种花如化犁子鄙人为良士也】

和师厚栽竹

大隐在城市【文选王康琚诗大隐隐朝市】此君真友生【王徽之种竹云何可一日无此君耶诗矧伊人矣不求友生】根须辰日斲【艺苑雌黄云种竹多用辰日山谷所谓根须辰日斲也】笋要上番成【杜诗无数春笋满林生柴门密掩断人行会须上番看成竹客至从嗔不出迎番字原注云去声盖用蜀人方言也山谷姑作平声】龙化葛陂去【用费长房竹化为龙事】凤吹阿阁鸣【汉律历志黄帝使伶伦自大夏之西昆仑之阴取竹之解谷断两节间而吹之以为黄钟之宫制十二箫以听凤之鸣其雄鸣为六雌鸣亦六帝王世纪黄帝时凤巢阿阁】草荒三径断岁晚见交情【用翟公书门事】

次韵师厚雨中昼寝忆江南饼麴酒

雨砌无车马风帘洒静便【老杜诗秋风洒静便字本出谢康乐诗】忽思江外酒准拟醉时

眠【退之北湖诗準拟醉时来】隐几惟观化【庄子齐物论南郭子綦隐几而坐仰天而嘘云云篇末言庄周梦为胡蝶周与胡蝶则必有分矣此之谓物化李白诗虚舟不系物观化游江濱】开书屡絶编【汉儒林传序孔子晚而好易读之韦编三絶】遥知烟渚梦遣骑唤渔船【文选魏文帝书今遣骑到邕】

次韵师厚萱草

从来占北堂【卫国风伯兮云焉得谖草言树之背毛云谖草令人忘忧背北堂也释文云谖本又作萱】雨露借恩光【文选江淹书大王惠以恩光】与菊乱佳色【渊明诗秋菊有佳色裛露掇其英】共葵倾太阳【文选曹子建表若葵藿之倾叶太阳虽不为回光然向之者诚也】人生真苦相物理忌孤芳【顔延年祭屈原文物忌坚芳人讳明洁退之诗思质忌处羣孤芳难寄林】不及空庭草荣衰可两忘

次韵谢外舅病不能拜复官夏雨眠起之什【复官盖熙宁十年】

丈人养痾卧【後汉高彪传公今养痾傲士固其宜也文选谢灵运诗养痾丘园中又云卧痾对空林】此道取衆弃【史记白圭传人弃我取人取我与引此以言取舍与衆异耳山谷祭刘凝之文云执盈虚以化物取衆弃而致夥此乃言用白圭之术】强饭尚可饱【汉贡禹传生其强饭慎疾以自辅】力田苦常匮【言力学而不遇时如力田而不逢年也】欲从羣儿嬉出语不斌媚【退之诗又不媚笑语不能伴儿嬉唐魏徵传帝曰人言徵举止疎慢我但见其斌媚耳】轩窗坐风凉编简勘遗坠【汉刘歆传经或脱简传或间编】自安井无禽【易井卦初六井泥不食旧井无禽注谓井不渫治禽所不向而况人乎一时所共弃师厚能安之焉】未叹旅焚次【旅卦九三旅焚其次丧其童仆注谓次焚仆丧而身危也师厚幸未至此】夏暑极阳功【董仲舒策阳常居大夏以主岁功】时霖作阴事【礼记昏义月食则后素服荡天下之阴事】呼儿疏药畦植杖按瓜地【归去来辞或植杖而耘紆字本出论语杜诗青门瓜地新冻裂】南山云气佳北极冕旒邃【尔雅北极谓之北辰礼天子冕十有二旒前後邃延杜诗玉几由来天北极】自欣须髮白得见衣裳治【系辞垂衣裳而天下治】山林收枯槁【庄子此山谷之士非世之人枯槁赴渊者之所好也】草木洗憔悴舐痔以车来【卫国风以尔车来庄子列御寇篇秦王有病召医破痈溃痤者得车一乘舐痔者得车五乘】探珠遭龙睡【列御寇篇又云河上有家贫恃纬萧而食者其子没于渊得千金之珠其父曰千金之珠必在九重之渊而骊龙颌下子能得珠者必遭其睡也】腹便时蒙嘲【後汉边韶传曾昼日假卧弟子私嘲之曰边孝先腹便便嬾读书但欲眠】身退得自恣【庄周传云其言汪洋自恣以适已】伊优无下僚肮脏谢高位【後汉赵壹传有秦客者为诗曰伊优北堂上肮脏倚门边选诗英俊沈下僚】谁能领斯会【文选向秀思旧赋托运遇于领会注云领会冥理相会也】好在漆园吏【选诗漆园有傲吏史记庄子蒙人也尝为蒙漆园吏杜诗因君问消息好在阮元瑜柳子厚再上湘江诗好在湘江水今朝又上来】

次韵师厚病间十首

贝锦不足歌【小雅巷伯寺人伤于谗故作是诗也萋兮斐兮成是贝锦据实录熙宁五年五月□前提点成都府路刑狱司封郎中谢景初两官都官郎中李杲卿一官竝勒停坐在成都府路踰濫故也今观此诗盖必有织成其罪者前集和邢惇夫秋怀云谢公蘊风流诗作鲍照语丝虫紫谏草笔力挟风雨万里投东书石交化豺虎石交不知谓何人】请陈江汉诗【江汉乃大雅篇名荀子赋偏天下不治请陈诡诗】美人出江汉窈窕世未窺【诗窈窕淑女文选张平子四愁诗序云依屈原以美人为君子以珍宝为仁义以水深雪雰为小人】折兰不肯佩【韩退之猗兰操兰之猗猗扬扬其香不采而佩于兰何伤】告我以蚕饥【温飞卿诗云蚕饥使君马鴈避将军箭玉台新咏陌上桑秦氏有好女自言名罗敷罗敷善蚕桑采桑城南隅使君从南来五马立踟蹰使君遣吏问宁可共载不罗敷前置辞使君一何愚云云王无功赋闻乌啼而讶夕忆蚕饥而虑晚李白古乐府秦地罗敷女抹桑緑水边素手青条上红妆日色边蚕饥妾欲去五马莫留远】独归岂憚远三危露如饴【吕氏春秋本味篇云水之美者三危之露崑仑之井大雅緜云周原膠膠董茶如饴韩偓诗序云咽三危之瑞露美动七情】

德人更疾疢术智益洒落【孟子曰人之有德慧术知者恒存乎疢疾】及身见万古【孟子曰万物皆备於我矣反身而诚乐莫大焉】道不在卜度胷中有镆铘老境要志弱【言内刚外柔也吴越春秋干将吴人也?閻使作劒二曰干将曰镆铘镆铘干将之妻也道德经云实其腹弱其志注云和柔谦让不处权也】谢公赋達生达生真可托【庄子有达生篇谢灵运斋中读书诗万事难竝叹达生幸可托】

引镜照清骨惊非曩时人【肇法师物不迁论云梵志出家白首而归邻人曰昔人尚存乎志曰吾犹昔人非昔人也】天地入喻指【庄子齐物论以指喻指之非指不若以非指喻指之非指也以马喻马之非马不若以非马喻马之非马也天地一指也万物一马也】芭蕉自观身【维摩经是身如芭蕉中无有坚固】陈力则已病【论语陈力就列不能者止】征财又室贫古来支离疏粟帛王所仁【庄子人间世篇支离疏者颐隐于齐肩高于顶上有大役则支离以有常疾不受功上与病者粟则受三锺与十束薪】

菹寒知园秋【贾谊新书曰楚惠王食寒菹而得蛭遂吞之】饭白问米贱【老杜云与奴白饭马青刍又云为问淮南米贵贱】妇孙劝甘旨霜兔颇宜麪【内则云慈以旨甘又云牛宜稌羊宜黍豕宜稷犬宜粱鴈宜麦】黄花不举酒佳句余嫪恋【嫪郎到切退之荐士诗念将决焉去感物增恋嫪】经行宴坐堂【维摩经曾于林中宴坐】鼠迹书几砚【语林曰简文为抚军时所坐牀上生尘不听左右扫去见鼠行迹视以为佳】

桃李一春期松栢千岁永经玄事寂寞【扬雄有解朝云意者玄得无尚白乎又云惟寂惟寞守德之宅】髮白官闲冷草緑艾如张【艾如张乐府篇名】波清蜮司影【春秋庄十八年秋有蜮注短狐也含沙射人为灾音或官韵域或两音博物志江南溪水中有一寸口中有弩形气射人影不治则杀人】东里与无趾渠有幸不幸【庄子德充符篇申徒嘉兀者也而与鄭子产同师于伯昏无人子产谓申徒嘉曰我先出则子止子先出则我止又云鲁有兀者叔山无趾踵见仲尼仲尼曰子不谨前既犯患若是矣虽今来何及矣两人皆兀者故

误以申徒嘉为无趾东里子产也】

病余儿废锄门巷草芊眠【楚辞云远望兮阡眠陆士衡云林薄草阡眠谢朓云阡眠起杂树】来者何所闻披草足跼然【晋嵇康传康居贫锻于大树之下以自贍给锺会往造焉康不为之礼而锻不辍良久会去康谓曰何所闻而来何所见而去会曰闻所闻而来见所见而去会以此憾之言于文帝遂害之文选赵景真书云披榛觅路跼然见前注】封侯谢骨相【李广传岂吾相不当封耶班超传此万里侯相也翟方进传小史有封侯骨】使鬼无金钱【晋鲁褒钱神论云钱无耳可使鬼】梦作白鸥去江湖水黏天【退之祭张员外文云洞庭漫汗黏天无壁前集有诗云梦作白鸥去江湖水如天庄子曰且汝梦为鸟而厉乎天梦为鱼而没于渊南史梁忠烈世子方等传尝着论曰吾尝梦为鱼因化为鸟方其梦也何乐如之】

民生自煎熬【杜诗置膏烈火上哀哀自煎熬太白诗名利□煎熬】煮豆以其爨【世说魏文帝使东阿王七步作诗不成当行大法王应声曰其在釜下然豆在釜中泣本是同根生相煎何太急】居然忘本根【诗生民不康禋祀居然生子文子云形之与名居然别矣】光陰不供翫【柳子厚与李翰林书见前注】藏山夜半失【庄子大宗师篇云藏舟于壑藏山于泽谓之固矣然而夜半有力者负之而走司马彪曰舟水物山陆居者也藏之壑泽非人意所求谓之固有力者或能取之亦如人生于世自以为固四时迁移不可留止】乌合归星散【文选晋纪总论云新起之寇乌合之衆注引管子书云乌合之衆初虽相欢後必相噬蜀志姜维传曰星散流离死者甚衆】因病见不生達人果大观【维摩经云我不任诣彼问疾云云诸法毕竟不生不灭又云法本不生今则无灭贾谊鵬鸟赋小智自私贱彼贵我达人大观物无不可】

开田种白玉【种玉事出搜神记见前注】饱牛事耕犁雨露非无泽得秋常苦迟猛虎擅文章【论语虎豹之鞟犹犬羊之鞟正义曰此章贵尚文章】斑斑被诸儿【文选上林赋曰被斑文七命云拉虎摧斑】长松抱劲节惟有岁寒知【见论语潘安仁西征赋劲松彰于岁寒贞臣见于危国】

谢公蒔兰苕【文选郭景纯诗翡翠戏兰苕容色更相鲜】真意付此物惠然风肯来【诗终风惠然肯来】香为一披拂【庄子天运篇孰居无事而披拂是】遥知醉吟姿龟勉向朱绂【诗龟勉求之易困卦朱绂方来杜诗朱绂负平生师厚初复官得襄阳倅】搘筇橘柚黄僧屋对像佛【李太白诗露皓梧楸白风催橘柚黄文选头陀寺碑象设既辟注象佛之形像也】

身病心轻安道肥体癯瘦【韩非子云子夏见曾子曾子曰何肥也曰战胜故肥吾入见先王之义则荣之出见富贵之乐又荣之两者交战于胷中未知胜负故癯今先王之义胜故肥】好怀当告谁四墙枣红皱【退之联句红皱晒檐瓦黄团系门衡】负暄不可献【列子杨朱篇云宋国有田夫常衣縕黻仅以过冬暨春东作自暴于日不知天下之有广厦隩室絺絮貉顾其妻曰负日之暄人莫知者以献吾君将有重赏】扪蝨坐清昼【晋王猛传桓温入开猛被褐诣之扪蝨而言旁若无人】端有真富贵【乐天诗为报高盖车恐非真富贵】千秋

万年後【杜诗千秋万岁名寂寞身後事】

山谷外集诗注卷三

山谷外集诗注卷四

<集部,别集类,北宋建隆至靖康,山谷外集诗注>

钦定四库全书

山谷外集诗注卷四

宋 黄庭坚 撰

史 容 注

次韵奉送公定【谢师厚二子惜字公静惊字公定】

去年君渡河【公无渡河乐府篇名亦曰箜篌引】枣下实离离今年君渡河剥枣咏幽诗【文选笙歌赋曰枣下纂纂朱实离离幽七月诗八月剥枣】直缘恩义重不憚鞍马疲【南史卫敬瑜妻诗曰故人恩义重不忍复双飞】诗书半行李道路费岁时亲交叹存亡学问访阙遗【司马迁书又不能拾遗补阙故唐有补阙拾遗之官】我多後时悔君亦见事迟【史记范雎传云穰便智士也而见事迟魏武帝纪袁绍虽有大志而见事迟】即此有真意【渊明诗此中有真意欲辩已忘言】定非儿女知【汉高祖纪吕公曰此非儿女子所知】虚名无用处北斗与南箕【见前注】燕赵游侠子【文选曹子建乐府云借问谁家子幽并游侠儿郭景纯诗京华游侠客】长安轻薄儿【沈休文诗洛阳繁华子长安轻薄儿後汉书曰李宝劝刘嘉且观成败光武闻告邓禹曰孝孙素谨当是长安轻薄儿谈之耳嘉字孝孙】狂掉三寸舌【张良传良迺称曰今以三寸舌为帝者师】躡登九级墀【贾谊传故陛九级上廉远地则堂高】覆手云雨翻【杜诗翻手作云覆手雨纷纷轻薄何须数】立谈光陰移歃血盟父子【左传陈五父及郑伯盟歃如忘注志不在于歃血谷梁齐相衣裳之会十有一未尝有歃血之盟】指天出肝脾【退之作子厚墓志云握手出肺肝相示指天曰涕泣誓生死不相背负真若可信】从来国器重【韩安国传惟天子以为国器】见谓骨相奇【儿宽传见谓不习事】筑岩发梦寐【书云说筑传岩之野】猎渭非熊螭【史记齐太公世家周西伯将出猎卜之曰所获非龙非虬非虎非罴所获霸王之辅注云虬敕知反索隐曰余本亦作螭字】百工改绳墨【孟子大匠不为拙工改庆绳墨】一世擅文词全人脰肩肩瓮盎妩且宜【庄子德充符篇云闾跂支离无赈说卫灵公灵公说之而视全人其脰肩肩瓮盎大癭说齐桓公桓公说之而视全人其脰肩肩注云偏情一性则丑者更好而好者更丑也山谷诗意谓熙寧用人非贤而谓之贤贤则指为不肖也所谓游侠子轻薄儿盖言当时新进少年趋时苟合以口舌捷给躡等进用虽歃血而盟自谓披腹而出肝脾其言皆不足信也王介甫素有重名称为器者其遇主得时如起于筑岩钓渭而改制立法自炫文词附已者超迁之语不合意辄摈斥不用所谓悦闾跂支离瓮盎大癭而全视之无疾者乃诋为丑恶也前集神宗挽词固云筑钓收贤辅此诗含讥讽非一过可了故详言之】大槐陰黄庭女萝絛络之【庄子水中有火乃焚大槐大槐以喻用事者黄庭经注云黄庭以中得名今本云中庭诗云萼与女萝施于

松柏以喻小人附离而进也】昭阳两兄弟还自妬蛾眉工顰又宜笑【楚辞九歌云既含睇兮又宜笑】百辈来茹咨【周颂王厘尔成来咨来茹笺云咨谋茹度汝有事当来谋之来度之】班姬轻鸿毛更合衆口吹【汉成帝班婕妤传始为少使俄而大幸後赵飞燕姊弟自微贱兴寢盛于前譖告许皇后班婕妤挟媚道祝诅许后坐废婕妤求供养太后长信宫赵皇后传云召入宫大幸有女弟复召入后既立後宠少衰而弟絶幸为昭仪居昭阳舍飞燕外传云后怒以杯抵昭仪裙昭仪泣曰涕忘共被苦寒时耶今幸贵其忍相搏乎此事以喻王吕初为党而後乖争班姬以喻当时逐客也按实录熙寧七年三月王安石知江寧军府八年正月秘阁校理王国安追毁出身以来文字放归田里汀州编管人郑侠改英州初王安石将罢相引吕惠卿执政惠卿素与安国有隙因侠狱抵安国罪是年二月安石复相自後王吕之交遂絶山谷时在北京韩非子云齐景公曰去仲尼如吹毛耳乃遗哀公女乐哀公怠于政仲尼之齐】引绳痛排根【自注云音痕汉书灌夫传窦婴失势亦欲倚夫引绳排根生平慕之後弃者】蒙蔽枉成帷惟恐出已上杀之如奕碁【左传襄二十八年甯子视君不如弈碁】尘埃百年琴絶弦为锺期【见前注】落落虎豹文义难管中窥【晋王献之传管中窥豹时见一班】至今扬子云不与俗谐嬉岁晚草玄经覃思写天维【书序研精覃思退之诗白日座上倾天维】脱身天禄阁危于劔头炊【晋顾恺之传桓玄与恺之同在殷仲堪坐桓作危语玄曰矛头淅米劔头炊】卧闻策董贤闭门甘忍饥【摭言载秦韬玉贵公子行云却笑儒生把书卷学得顔回忍饥面】五侯盛宾客駉轡交横驰【楼护传云王氏方盛宾客满门五侯兄弟争名其客不得左右文选阮嗣宋诗走兽交横驰】时通问字人得酒未曾辞【扬雄赞云为郎与王莽刘歆并又与董贤同宦云云又云王莽时刘歆甄丰皆为上公莽既以符命自立欲絶其原以神前事而丰子寻歆子棻复献之莽诛丰父子投棻四裔词所连及便牧不请时雄校书天禄阁上治狱使者来欲收雄雄从阁上自投下几死莽闻之问其故廼棻从雄学作奇字雄不知情有诏不问问字见前注董贤见佞幸传】近者君家翁天与脱羴羴【庄子马蹄篇连之以羴羴丁立陟立两切左传云转厥执羴离骚云余虽好姱修以羴羴兮注羴在口曰羴革络头曰羴退之祭子厚文云子之中弃天脱羴羴】已为冥冥鸿矰?尚安施【扬子法言鸿飞冥冥弋人何慕焉高帝纪戚夫人泣涕上曰为我楚舞吾为苦楚歌歌曰鸿鹄高飞一举千里羽翼已就横絶四海横絶四海又可奈何虽有矰?尚安所施】养兰寻僧圃爱竹到水湄北阙免朝请西都分保厘【书毕命命毕公保厘东郊律诗中有和师厚复官分司西京诗】文章九鼎重【史记平原君传毛先生一至楚而使赵重于九鼎大吕】富贵一黍累【汉书律历志度长短者不失豪厘量多少者不失圭撮权轻重者不失黍累注云豪兔豪也十豪为厘六十黍为圭四圭为撮音仓括反十黍为象十象为一铢象来戈反亦音累继之累沈存中笔谈云唐开元钱重二铢四象今蜀中亦以十参为一铢参乃古象字相传误耳】赵良请灌园但为商君嗤【史记商君鞅传赵良见商君曰君之危若朝露尚欲延年益寿乎则何不归十五都灌园于鄙商君弗从五月而秦孝公卒太子立公子?之徒告商君反发吏捕商君】弃甲尚文过兕多牛有皮【左宣二年宋城华元为植巡功城者讴曰睥其目皤其腹弃甲而复于思于思弃甲复来使其驂乘谓之曰牛则有皮犀兕尚多弃甲则那役人曰从其有皮丹漆若何华元曰去之夫其口衆我寡】出仕书掣肘【家语云宓子贱为单父宰辞去请近史二人与俱二史书子贱掣其肘书不善则怒之】归来菊荒篱【渊明归去来辞云三径就荒松菊犹存】不为五斗折自无三径资【昭明太子作渊明传云谓亲朋曰聊欲弦歌以为三径之资可乎执事者闻之以为彭泽令岁余郡遣督邮至县吏请曰应束带见之渊明叹曰我岂

能为五斗米折腰向乡里小儿即日解印绶去职】胜箭洗蹀血【血洗箭见杜诗蹀血字见前汉书】归鞍悬月支【汉张骞传匈奴破月氏王以其头为饮器王摩诘燕支行云归鞍共饮月支头文选曹子建诗控弦破左的右发摧月支注云月支射帖也邯郸淳艺经云焉射左边为月支三枚马蹄二枚二说疑不能决故并列之】斯人万户侯造物付鑪锤【庄子大宗师篇皆在鑪锤之间耳】我观史臣篇疏略记糟醅【史记屈原传何不餽其糟而噉其醅借其字以言糟粕】譬如官池蛙谁能问公私【晋惠帝纪帝尝在华林园闻虾蟆声谓左右曰此鸣者为官乎私乎或对曰在官地为官在私地为私】君怀明月珠簸弄沧海涯【退之诗婆娑海水南 弄明月珠】深房佩芳兰固是王所姬【退之诗处子窈窕王所妃苟有令德隐不腓】南贡尚包橘【包橘见前篇】汉滨莫大随【左传汉东之国随为大】每来促谈麈【鹿之大者曰麈羣鹿随之视麈尾所转故谈者挥之见租庭事苑】风生庭竹枝肮脏得家法伊优不能为【汉赵台传有秦客者为诗曰文籍虽满腹不如一囊钱伊优北堂上肮脏倚门边】但听呼擣蒲便足解人颐【汉匡衡传匡说诗解人颐】功成在漏刻【汉光武纪王寻王邑围昆阳城自以为功在漏刻意气甚逸】颖利处囊锥【史记平原君传平原君谓毛遂曰夫贤士之处世也譬若锥之处囊中其末立见今先生处胜之门下三年于此矣左右未有所称胜未有所闻是先生无所有也毛遂曰臣乃今日请处囊中耳使遂早得处囊中乃脱颖而出非时其未见而已】失势落坑阱【退之诗失势一落千丈强】寒窳如愁鸱得马折足祸【淮南子曰近塞上之人有善术者马无故亡入胡人皆吊之其父曰此何遽不为福乎居数月其马将胡骏马而归人皆贺之其父曰何遽不为祸乎家当马良其子好骑堕而折其髀人皆吊之其父曰何遽不为福乎居一年胡人入塞丁壮死者十九此独以跛之故父子相保】亡羊多歧悲【列子云杨子之邻人亡羊既率其党又请杨子之竖追之杨子曰嘻亡一羊何追者之衆邻人曰多歧路既反问获羊乎曰亡之矣歧路之中又有歧焉吾不知所入所以反也心都子曰大道以多歧亡羊学者以多方丧生】屡敌困心计【屡当作虑食货志桑弘羊以心计】伏兵几面欺【汉季布传今佞面谩史记作面欺】长戈仰关来【过秦论云仰关而攻秦】吐款受羈縻【南史苑蔚宗传与孔熙先谋逆熙先望风吐款词气不挠】万事只如此毕竟谁成亏【庄子曰有成与亏故昭氏之鼓琴也无成与亏故昭氏之不鼓琴也自但听呼擣蒲至谁成亏皆言擣蒲也按李翱集中有五木经其略云擣蒲五木玄白判厥二作雉背雉作牛王采四卢曰雉牛毗采六开塞塔秃擣梟全为王驳为毗又曰设关二马出初关叠行非王采不出关不越坑入坑有谪行不择筴马外一矢为坑】爱君方寸间醇朴乃器师【器师疑是吾师】安得摆俗纒东冈并鉏犁由来在陰鹤不必振羽仪【易中孚之九二鸣鹤在陰其子和之渐之上九鸿渐于陆其羽可用为仪】送行倾车盖载酒满鸱夷【汉陈遵传自用如此不如鸱夷鸱夷滑稽腹大如壶】天高木叶下【楚辞洞庭波兮木叶下】潦退河流卑屯云攀六幕【退之诗夏槐作云屯前汉礼乐志云纷纭六幕浮大海师古曰六幕犹言六合】新月吐半规【韩诗前夕虽十五月圆未半规】人生会面难取醉听狂痴【杜诗主称会面难一举累十觴取醉见上南火沈昭略谓张约曰汝张约耶何乃肥而痴约曰汝沈昭略耶何乃瘦而狂昭略大笑曰瘦已胜肥狂又胜痴】语弄发欺笑【退之诗诘屈避语弄】诗锋犯嘲讥悬知履霜来【易履霜坚冰至】少别为不怡天津媚河汉【尔雅析木谓之津箕斗之间津也注汉津也天汉之津梁】阙角挂秋霓【阙角见钱薛乐道诗题下注】中有鬼与神赤舌弄陰机【太玄云赤舌烧城吐水于鉶测曰赤舌吐水君子以解?也王延寿梦鬼物赋云剡尖鼻踏赤舌退之雷诗譁譁弄陰机】夜光但十袭出怀即瑕疵【阌子云

宋之愚不汝瑕疵】去去善逆旅冻醪约重持山药倒藤架红梨带寒曦坐须骑奴还淹留岁恐期【骑奴见前注】无为出门念牵衣婴孺啼【李白诗儿女欢笑牵人衣】短韵愿成诵时时寄相思【文选陆士衡文赋或托言于短韵退之祭文投叉鱼之短韵唐陆羽传得南都赋不能读危坐效羣儿嘯嘯若成诵状韩诗愿寄相思字】

和谢公定河朔漫成八首

急雨长风溢两河欣然河伯顺风歌行观东海方存少不以黄流更自多

直渠杀势烦才吏【分杀水力穿直渠皆见汉沟洫志】机器爬沙聚水兵【机器谓铁龙爪濬川杷也爬沙字见退之月蚀诗爬沙脚手钝谁使汝解缘青冥】河面常从天上落金堤千里护都城【沟洫志云决酸枣护金堤】

直今南粤还归帝【汉南越王赵佗传妄窃帝号此聊以自娱改号不敢为帝】谁谓匈奴不敢王愿见推财多卜式未须算赋似桑羊【卜式传时汉方事匈奴式上书愿轮家财半助边上以语丞相弘弘曰此非人情不轨之臣乃罢式岁余会浑邪等降县官费衆仓府空式复持钱三十万与河南太守食货志以东郭咸阳孔仅领盐铁而桑弘羊贵幸弘羊贾人之子以心计三人言利事析秋毫矣】

莱公庙略传耆旧韩令风流在井疆安用鸣镝增汉垒不妨罗拜下诸羌【此皆河朔事寇莱公力请真宗幸澶州克敌耆旧谈之未已韩忠献公相州安阳人熙寧八年歿于相州此盖八年以後作时教授北京也井疆言其井邑疆畔所在书殊厥井疆】汉时水占十万顷官寺民居皆浊河【沟洫志成帝时河决于馆陶及东郡凡灌四郡三十二县水居地十五万余顷深者三丈坏败官亭室庐四万所又按孝元帝纪败坏官寺民室注凡府庭所在皆谓之寺】岂必九渠亡故道直缘穿凿用功多【沟洫志是岁河水溢溢败官亭民舍四万孙禁以为可决平原金堤开通大河至海五百余里又乾三郡水地得美田且二十余万顷许商以为古说九河之名自鬲以北至徒骇相去三百余里今河虽数徙不离此域】漠庭数遣林牙使羌种来窥鴈塞耕壮士看天思上策月边鸣笛为谁横【林牙契丹翰林学士也见实録江邻几杂志云冀州城南有张耳墓在送客亭北戎使林牙者由翰林学士出使问知州王仲平不知张耳何代人大使耶律防谢曰契丹家翰林学士名目而已】

蛛蒙黄画屏初暗尘澁金门锁不开六十余年望琬辇赭袍曾是映宫槐【此言澶渊行宫也自景德元年岁甲辰与契丹通好息兵至 寧元年戊申盖六十五年】

百里弃疆王自直【 寧七年九月契丹遣使来言代北对境有侵地帝以手诏问故老韩富文等皆言不可与王荆公再入相曰将欲取之必固与之以笔画地图至八年九月分画地界弃地五百余里此诗盖婉其词也】万金捐费物皆春【当谓岁币】须令牧马甘踰幕更遣弯弓不射人【汉匈奴传云匈奴益北絶幕又云匈奴远遁南无王庭诗意谓令契丹絶幕北去不复近塞而引弓之民不相射也杜诗云射人先射马此反其意】

次韵谢公定王世弼赠答二絕句

何用苦吟肝肾愁【退之赠崔立之云劝君韬养待徵招不用雕琢愁肝肾】但知把酒更无忧
声名本不关人事看取青门一故侯【曹参传载邵平东陵瓜事三辅黄图长安城东门曰青门昔邵平种瓜青门瓜美云云】

酒因咀嚼还知味诗就呻吟不要工王谢风流看二妙病夫直欲卧墙东【後汉逸民逢萌传与同郡王君公相友善君公遭乱佯牛自隐时人为之语曰辟世墙东王君公】

次韶公定世弼登北都东楼四首【此诗及前後数诗皆北京作】

日着阑干角风吹濯漈衣【诗葛覃序云服漈漈之衣】喜同王季哲【文选谢朓和王主簿怨情一首注云王簿名季哲】更得谢玄晖清兴俱不浅【兴复不浅注见前】长吟无用归月明南北道犹见驿尘飞【杜诗使尘来驿道】真皇多庙胜仁祖用功深【景德元年契丹举国来侵遂德清以犯天雄真宗用寇准计决策亲征既次澶渊兵始接射杀其骁将敌惧请和时诸将皆请以兵会界河上邀其归以精甲蹙其後殲之敌惧求哀于上上曰契丹幽蓟皆吾民也何多以杀为遂诏诸将按兵勿伐纵契丹国归自是通好守约三十有九年及元昊叛兵久不决契丹之臣教其主投词以动我欲得晋高祖所与关南十县庆历二年聚重兵境上遣使聘宰相举知制诰富弼报聘增币二十万而契丹平孙子曰夫未战而庙算胜者得胜算多也退之书云用功深者其收名也远】卜宅迁九鼎【史记太史公曰学者皆称周伐纣居洛邑综其实不然武王营之成王使召公卜居居九鼎焉而周复都丰镐】破胡藏万金【此卷先有河朔漫成八首其一云万金捐贖物皆春盖指岁币也藏疑作捐】百年休战士当日纵前禽欲断匈奴臂不如留此心【张骞传是断匈奴臂也文选沈休文诗命师诛後服投律缓前禽注云易曰王用三驱失前禽也王弼注云三驱之礼禽逆来趣已则舍之背已而走则射之爱于来而恶于去也故其所施常失前禽】

都城碍飞鸟军幕卧貔貅【曲礼曰前有鸞兽则载貔貅杜诗大城铁不如小城万丈余连云列战格飞鸟不能踰此所谓碍飞鸟也】紫萁蚕知老【卫国风氓云于嗟鸠兮无食桑葚释音云萁亦作椹音甚桑实也柳子厚诗西林紫椹行当熟】黄云见麦秋接天双阙起伏地九河流耆老深望幸銮輿不好游【司马相如封禅书云太山梁父设坛场望幸元稹连昌宫辞老翁此意深望幸老杜江陵望幸云望幸歛威神相如上林赋乘法驾建华旗鸣玉鸾礼经解云升车则有和鸾之音注鸾与和皆铃也杜诗鸾輿驻凤翔】

汉皇勤远略晚节相千秋【见车千秋传】不足中原地犹思一战收【杜诗乾坤一战收】圣朝方北顾斜日倚东楼庙筭知无敌寒儒浪自愁【庙筭见前注】

和谢公定征南謡【汉武平南粤分其地为儋耳珠厓南海苍梧郁林合浦交趾九真日南凡九郡置交州刺史以领之唐改交州总营又改安南都护国朝封其主为交趾郡王进南平王神宗时王安石乘政献言者谓交趾可取乃以萧注知桂州有献策平交州者辄火其书沈起

独言交州小丑无不可取之理安石喜乃罢注以起知桂州不能怀辑又禁交趾与州县贸易
寧八年交趾入寇陷钦廉二州遂围邕州城陷太守苏缄死之神宗以赵高为招讨使总九
将军进讨既又以郭逵为宣抚使而高副之逵至长沙督诸将进兵复邕州遣将拔永安州溪
洞悉降交趾乘船迎战逵破之贼势蹙乃乞降凡费钱帛金银粮草五百一十九万贯匹两石
二广之民大困此其大略也李乾德降盖 寧十年二月时山谷犹在北京然此诗未必是此
时作】

传闻交州初陆梁【扬雄甘泉赋云飞蒙茸而走陆梁】东连五溪西氏羌【後汉马援传击
武陵五溪蛮夷注云酈元注水经曰武陵有五溪谓雄溪橐溪西溪澗溪辰溪悉是蛮夷所居
皆盘瓠子孙在今辰州界南史河南宕昌邓至武兴并为氏羌之地】军行不断蛮标盾【曾
子固集中政要策论南蛮云南蛮于四夷为类最微然动辄一方受其患大中咸通之间安南
之变是也宋兴尝设广捷之兵习标牌之器皆以南蛮之为患也狄武襄平依智高记云贼执
大盾标枪又云贼皆翳大盾翼两标】谋主皆收汉畔亡合浦谿门腥血沸【合浦郡廉州也
汉陈胜传战谿门中注楼一名谿门上为楼以望也】晋兴城下白骨荒【晋兴郡晋元帝置
汉属郁林郡隋废为宣化县今邕州也盖寇陷钦廉邕三州也】谋臣异时坐致寇守臣今日
愧苞桑【易负且乘致寇至又云其亡其亡系于苞桑】已遣戈船下漓水更分楼船浮豫章
【汉南粤王传主爵都尉杨仆为楼船将军出豫章下横浦故归义粤侯二人为戈船下濑将
军出零陵或漓水或抵苍梧】颇闻师出三鵠路【通典板楯蛮篇云荆郢蛮大扰动断三鵠
路注云今南阳郡向城县北至临汝县】尽是中屯六郡良【汉武帝选天水陇西安定北地
上郡西河凡六郡良家子补羽林以材力为官名将多出焉见地理志】汉南食麦如食玉
【战国策苏秦曰使臣食玉炊桂】湖南驱人如驱羊【文选晋纪总论云扰天下如驱羣羊注
引淮南子云兵略者避实就虚若驱羣羊】营平请谷三百万【赵充国封营平侯本传云金
城湟中谷斛八钱吾谓耿中丞余三百万斛羌人不敢动矣耿中丞请余百万斛乃得四十万
斛耳】祁连引兵九千里【田广明为祁连将军事见匈奴传】少府私钱不可知大农计岁
今余几【汉贾捐之传论弃珠厓云臣窃以往昔羌军言之暴师曾未一年兵出不踰千里费
四十余万大农钱尽又以少府禁钱续之注云少府主供天子故曰禁钱】土兵番马貔虎同
蝮蛇毒草篁竹中【汉严助传发兵诛南粤淮南王安上书谏曰粤非有城郭邑里也处谿谷
之间篁竹之中习于水关又云林中多蝮蛇猛兽】未论刍粟捐金费直愁瘴疠连营空我思
荆州李太守欲募蛮夷令自攻至今民歌尹杀我州郡择入诚见功张乔祝良不难得谁借前
筭开天聪【後汉南蛮传顺帝永和二年日南象林徼外蛮夷攻象林县杀长吏交趾刺史发
交趾九真二郡兵万余人救之兵士惮远役反攻其府二郡虽击破反者而贼势愈盛岁余兵
谷不继帝以为忧明年召公卿百官问方略皆请遣大将发荆扬兗豫四万人赴之大将军从
事中郎李固骏曰前中郎将尹就讨益州谚曰虏来尚可尹来杀我後就召还以兵付刺史张
乔乔因其将吏旬日之间破殄寇虏此发将无益之效州郡可任之验也宜更选有勇略仁惠
任将帅者以为刺史太守悉使共住交趾募蛮夷使自相攻故并州刺史长沙祝良性多勇决
又南阳张乔前在益州有破虏之功皆可任用宜即拜良等便道之守四府悉从固议即拜祝
良为九真太守张乔为交趾刺史乔至开示慰诱并皆降散良到九真单车入贼中设方略招
以威信降者数万人皆为良筑起府寺由是岭外悉平参同契云竭力劳精神终年无见功张
良传愿借前筭而筹之书天聪明】诏书哀痛言语切【前汉西域赞遂弃轮台之地而下哀

痛之诏】为民一洗横尸血摧锋陷坚赏万户【南粤王传南粤已平伏波将军益封楼船将军以摧锋?坚为将】堑山堙谷穷三穴【史记蒙恬传始皇使蒙恬通道自九原抵甘泉堑山堙谷千八百里春秋後语冯煖谓孟尝君曰狡兔有三窟】南平旧时颇臣顺欲献封疆请旌节庙谟犹计病中原岂知一朝更屠灭天道从来不争胜【庄子曰天之道不争而善胜】功臣好为可喜说交州鸡肋安足贪【後汉杨修传修为曹操主簿操平汉中出教曰鸡肋而已外曹莫能晓修独曰鸡肋食之无所得弃之则可惜公归计之心决矣】汉开九郡劳臣监吕嘉不肯佩银印【汉南粤王赵佗传太子兴嗣立其母为太后元鼎四年汉使安国少季喻王王太后入朝赐其丞相吕嘉银印嘉反攻杀太后王尽杀汉使者元嘉五年路传德为伏波将军平南粤以其地为九郡】徵侧持戈敌百男【後汉马援传交趾女子徵侧及女弟徵貳反攻没其郡拜援伏波将军与贼战破之斩徵侧徵貳诗则百斯男】君不见往年濒海未郡县赵佗闭关罢朝献老翁窃帝聊自娱白头抱孙思事汉孝文亲遣劳苦书稽首请去黄屋车得一亡十终不忍太宗之仁千古无【赵佗传高帝十一年遣陆贾立佗为南粤王与剖符通使高后时有司请禁粤关市铁器佗乃自尊号为南粤武帝乘黄屋左纛文帝元年使陆贾使粤赐佗书云闻王发兵于边为寇长沙苦之虽王庸独利乎必多杀士卒得一亡十朕不忍为也又云王之号为帝两帝并立亡一乘之使是争也愿与王分弃前恶通使如故陆贾至南粤王恐乃顿首谢愿奉诏下令国中去帝制黄屋左纛因上书云妄窃帝号聊以自娱又云处粤四十九年于今抱孙焉文帝庙号太宗汉两粤赞云追怀太宗镇抚尉佗岂古所谓怀远以德者哉】

和师厚秋半时复官分司西都【实録熙寧十年诏复都官郎中谢景初权藩郡通判和师厚诗皆北京作】

遥知得谢分西洛【曲礼大夫七十而致事若不得谢注云谢听也盖师厚丐闕故分司西京】无复肯弹冠上尘【汉王吉传吉字子阳与贡禹为友世称王阳在位贡禹弹冠】园地除瓜犹入市【老杜有除架诗又云青门瓜地皆冻裂】水田收秫未全贫【陶潜传在县公田悉令种秫杜诗锦里先生乌角巾园收芋栗未全贫】杜陵白髮垂垂老【一鉶一鉢垂垂老贯休诗也】张翰黄花句句新【张翰字季鹰晋书有传文选有杂诗一首云暮春和气应白日照园林青条若总翠黄花如散金】还与老农争坐席【庄子寓言篇其往也舍者避席炆者避竈其反也舍者与之争席矣】青松同社赛田神【退之赛神絶句云麦苗贪穰桑生甚共向田头乐社神又南溪始泛云愿为同社人鷄?燕春秋】

和师厚郊居示里中诸君

篱边黄菊关心事【杜诗幽事颇相关】窓外青山不世情【罗邕诗年年点检人间事惟有春风不世情施肩吾诗江神也世情为我风色好太白诗相看两不厌只有敬亭山】江橘千头供岁计【三国志李衡种橘千株至临终敕其子曰吾有千头木奴可以不贫】秋蛙一部洗朝醒【两部鼓吹见前注】归鸿往燕競时节宿草新坟多友生【檀弓上曾子曰朋友之墓有宿草而不哭焉】身後功名空自重眼前樽酒未宜轻【晋张翰传使我有身後名不如即时一盃酒太白诗且乐生前一盃酒何须身後千载名】

寄南阳谢外舅

谢公遂偃蹇【後汉蔡邕传董卓闻邕名高辟之称疾不就卓大怒曰我力能族人蔡邕遂偃蹇者不旋踵矣】南阳无旧庐天与解纓绂元非傲当涂【老杜独酌诗本无轩冕意不是傲当时】庖丁释牛刀衆手斫大輶【庄子曰庖丁为文惠君解牛砉然向然奏刀騞然莫不中音文惠君曰技盖至此乎庖丁释刀对曰臣之所好者道也进乎技矣批大郤导大窾因其固然技经肯綮之未尝而况大輶乎】白云曲肱卧青山满牀书【寒山子诗家中何所有惟见一牀书】妙质落川泽【庄子郢人垺漫其鼻端使匠石斲之宋元君召匠石曰尝试为寡人为之匠石曰臣之质死久矣自夫子之死吾无以为质矣】果然天网疎【老子云天网恢恢疎而不失】故知今人巧未觉古人迂筑场岁功休【国语云场功未毕诗云九月筑场圃】夜泉鸣竹渠胸怀郁垒块【世说阮藉胸中垒块故须酒浇之】此物谅时须【此物谓酒先言夜泉鸣竹渠谓糟牀也】儿能了翁事【晋傅咸传云生子痴了官事官事未易了了事正自痴复为快耳此借用】安用府中趋【古乐府诗三十侍中郎四十专城居盈盈公府步冉冉府中趋】孙能诵翁诗【老杜骥子诗云问知人客姓诵得老夫诗】乃是千里驹【汉楚元王传云德有智略武帝谓之千里驹】人生行乐耳【汉杨惲传其诗云人生行乐耳须富贵何时】用舍要自如我方神其拙社栎官道樗【庄子逍遥游篇云惠子谓庄子曰吾有大树人谓之樗其大本拥肿而不中绳墨其小枝拳曲而不中规矩立之涂匠石不顾又人间世云匠石之齐至乎曲辕见栎社树云云】公犹忧斧斤睥睨斲樽壶【庄子云百年之木破为牺樽】万古身後前芭蕉秋雨余少年喜狡狴叱化粒成珠【神仙传王远字方平过蔡经家麻姑亦至求少许米撒地上视米皆成真珠方平笑曰姑固年少吾老矣不能作此狡狴变化也】谟功可歌舞【书序臯陶矢厥谟禹成厥功左传九功之德皆可歌也又文王之功天下诵而歌舞之】学古则暖姝【庄子徐无鬼篇云有暖姝者学一先生之言则暖暖姝姝而自悦也】所好果不同未可一理驱眇思忘言对【庄子臣之质死久矣郭象注云非夫不动之质忘言之对则虽至言妙斲无所用之】安得南飞鳧【飞鳧见前注】鄙心生蔓草萌芽望耘鋤【後汉黄宪传陈蕃周举曰时月之间不见黄生则鄙吝萌之复存乎心左传蔓草犹不可除】离筵如昨日【杜诗离筵何太频】春柳见霜枯未辱锦绣段时蒙双鲤鱼【文选张平子四愁诗云美人赠我锦绣段古乐府诗云客从远方来遗我双鲤鱼】忆昔参凡杖雍容觐规模引接开藻鉴【杜诗持衡留藻鉴】高明通事枢门生五七辈寂寞半白须谈经落尘尾【晋孙盛传善言明理时殷浩擅名一时惟盛与抗论尝谈论对食掷尘尾毛悉落饭中】行乐从篮輿【晋陶潜传向乘篮輿亦足自返】看行辟强宅【徽之观竹见前注王献之传公尝经吴郡闻顾辟强有名园先不相识乘平肩輿径入时辟强方集宾友而献之游历既毕旁若无人辟强勃然使驱出门献之傲如也】閱土黄公垆【晋王戎传戎尝经黄公酒垆下过顾谓後车曰吾昔与嵇叔夜阮嗣宗酣畅于此竹林之游亦预其末自嵇阮云亡吾便为时之所羈继今日视之虽近邈若山河】雪屋煮茶药晴檐张画图幽寺促灯火青氍置擣菹遶牀叫一掷十白九雉卢【晋刘毅传于东府聚擣菹大掷一判应至数百万余人并黑犢以还惟刘裕及毅在後毅次掷得雉大喜褰衣绕牀叫谓同坐曰非不能卢不事此耳裕恶之因投五木久之曰老兄试为乡答之既而四子俱黑其一子转跃未定裕厉声喝之即或卢焉毅意殊不快】蔡泽来分功【史记蔡泽传蔡泽谓应侯曰君独不观夫博者乎或欲大投或欲分功】袁耽必上都【晋袁耽传耽字彦道桓温少时游于掾徒资产俱尽尚有负进欲求济于

耽而耽在艰试以告焉耽略无难邑遂变服怀布?随温与债主戏耽素有艺名债者闻之而不相识谓之曰卿当不办作袁彦道也遂就局十万一掷直上百万耽投马絶叫探布?掷地曰竟识袁彦道不】开旗纵七走破竹殄羣胡【诸葛亮传注引汉晋春秋曰亮至南中所在战捷闻孟获者为夷汉所服募生致之既得使观于营阵之间获对曰向者不知虚实故败若祗如此即易胜耳亮笑纵使更战七纵七禽而亮犹遣获获曰公天威也南人不复反矣晋杜预传预曰今兵威已振譬如破竹数节之间皆迎刃而解诗意盖以兵喻擣菹也】成泉烛为明挟长朋佐呼终饮见温克【诗饮酒温克】所争匪鎗铄【礼儒行曰虽分国如鎗铄注八两曰铄释音说文云六铄】谁令运甕翁见谓牧猪奴【晋陶侃传诸参佐或以谈戏废事者乃命取其酒器蒲博之具悉投之江曰擣菹者牧猪奴戏耳侃在广州无事辄朝运百甕于斋外暮运于斋内人问其故答曰吾方致力中原过尔优逸恐不堪事见谓见前注】事托丈人重乃爱屋上乌【老杜云丈人屋上乌人好鸟亦好尚书大传曰武王登夏台以临殷民周公旦曰臣闻之爱其人者爱其屋上乌憎其人者憎其储胥韩诗外传曰武王至于邢丘天雨三日不休问太公对曰爱其人及屋上乌恶其人憎其胥余】旧言如对面形迹滞舟车【礼舟车所至】风帘想隐几天簾鸣寒梧【隐几天簾见庄子】尚喜读书否还能把酒无邺城渺尘沙冠盖若秋蕖【诗隰有荷华注曰荷华扶蕖也】相过问寒温【杜诗虚名但蒙寒温问泛爱不救沟壑辱】意气驰九衢楚客虽工瑟齐人本好竽【退之答陈商书云齐人好竽】永怀溟海量北斗不可?【诗维北有斗不可以挹酒浆韵书云?挹也】胜夜亲笔墨因来明月珠【肇法师答刘遗民书云君与法师当数有文集因来何少此篇题云奇南阳谢外舅而後人编类误杂之南阳诗中其诗云邺城渺尘沙邺城谓大名也大名本魏州後唐建邺都山谷自大名寄诗南阳也】

和外舅夙兴三首【寓大云寺作】

瓜蔓已除垄苔痕犹上墙蓬蒿贪雨露松竹见冰霜卷幔天垂斗披衣日在房【退之诗惟时月魄死冬日朝在房】无诗叹不遇千古一潜郎【董仲舒有士不遇赋文选思玄赋云尉廌眉而郎潜兮逮三叶而遭武注云汉武故事颜驷汉文时为郎至武帝辇过郎署见驷廌眉皓髮上问曰叟何时为郎答曰文帝为郎文帝时好文而臣好武至景帝好美而臣貌丑陛下好少而臣已老是以三世不遇上感其言擢拜会稽都尉是也】风烈僧鱼响霜严郡角悲短童疲洒扫落叶故纷披水冻食鲑少【食鲑见前注】瓮寒浮蚁迟【文选曹子建七啓云盛以翠樽酌以雕觞浮蚁鼎沸酷烈馨香李善曰释名云酒有泛齐浮蚁在上泛泛然】朝阳乌鸟乐安稳托禅枝【乌鸟声乐见前注杜诗禅枝宿衆鸟漂转暮归愁孟浩然东寺诗禅枝怖鸽栖】

暑逐池莲尽寒随塞鴈来【月令孟春仲秋皆曰鸿鴈来而孟春注曰鴈自南方来将北反其居诗言暑尽当是仲秋也】衣裘虽得暖狐貉正相哀【论语衣敝緼?与衣狐貉者立而不耻者】僧汲辘轳晓车鸣关鑰开不因朝鼓起来帙乱书堆【杜诗书乱谁能帙杯乾自可添】

和答师厚黄连桥坏大木亦为愁雹所碎

溪桥乔木下往岁记经过居人指神社不敢寻斧柯【用庄子栎社树意也晋阮修伐社树或止之修曰若社而为树代树则社移树而为社代树则社亡矣左传文七年此谚所谓疵焉而纵寻斧焉者也】青陰百尺蔽白日乌鹊取意占作窠【隋五行志童谣云可怜青雀子作窠犹未成】黄泉浸根雨长叶造物着意固已多风摧电打扫地尽【太白诗春光扫地尽字本出扬雄羽猎赋军惊师骇刮野扫地师古曰皆尽无遗余也】竟莫知为何谴诃【汉薛宣传云谴诃及细微】独山冷落城东路不见指名终不磨【项羽云非世所指名也韩文吾立子名百世不磨】世弼惠诗求舜泉辄欲以长安酥共泛一盃次韵戏答【舜泉河北酒名当是北京教授时作】

寒零薄饭留佳客【杜诗一饭未曾留俗客】蠹简残编作近邻【简编见前注】辟地梁鸿真好学【後汉逸民梁鸿作五噫之歌肃宗闻而非之乃易姓名居齐鲁之间】着书扬子未全贫【扬子谓扬雄】玉酥链得三危露【见前注】石火烧成一片春【乐天诗石火光中寄此身】沙鼎探汤供卯饮【探汤见论语乐天诗午茶能破睡卯酒善消忧】不忧问字絕无人【见扬雄传】

送蛤蜊与李明叔诸公

云屋吹灯然豆萁【煮豆然豆萁用曹子建语详见前注】古来壮士亦长饥广文不得载酒去且咏太玄庖蛤蜊【退之聯句庖霜鱸玄鲫摘庖字】

戏贈世弼用前韵

盗跖人肝常自饱【庄子盗跖篇鱸人肝而舖之】首阳薇蕨向来饥【见史记伯夷传】谁能着意知许事且为元长食蛤蜊【南史王融字元长尝遇沈昭略昭略谓主人曰是何年少融殊不平谓曰仆出于扶桑入于阳谷照耀天下谁云不知而卿此问昭略曰不知许事且食蛤蜊融曰物以羣分方以类聚君长东隅居然应嗜此族】

世弼病方家不善论蛤蜊之功戏答

伯乐无传骥空老【伯乐见前注】重华不见士长饥【渊明传重华去我久贤士世相寻】从来万事乖名实岂但药翁论蛤蜊

次韵师厚食蟹

海饌糖蟹肥【南史何子季传子传侈于味食白鱼?脯糖蟹使门人议之学生鍾?曰?之就脯骤于屈伸蟹之将糖躁扰弥甚】江醪白蚁醇每恨腹未厌【左传昭二十八年愿以小人之腹为君子之心属厌而已】夸说齿生津三岁在河外霜脐常食新【左传成十年不食新矣】朝泥看郭索【太玄云蟹之郭索後蚘黄泉林逋诗云草泥行郭索云木叫鉤輶】暮鼎调酸辛【战国策楚语云黄雀昼游乎茂树夕调乎酸辛】趋踰虽入笑【齐国风云巧踰踰兮】

退之诗点缀簿上字趋跄阁前铃】风味极可人忆观淮南夜火攻不及晨【借用晋周顗传阿奴火攻固出下策】横行葭苇中【云溪友议曰皮日休螃蟹诗云海龙王处也横行】不自贵其身谁怜一网尽【苏子美监进奏院用市故纸钱祠神会客以自盗除名所会客皆一时贤俊悉坐贬逐中之者喜曰吾一网尽之矣此借用其字】大去河伯民【晏子春秋曰齐景时大旱欲祀灵山及河水晏子曰山以石为身草本为毛髮今不雨毛髮日焦身且热山不欲为雨乎河伯以水为国以鱼鳖为民彼独不欲雨乎祀之何益君宜避殿暴露公从之果大雨】鼎司费万钱【汉彭宣云三公鼎足承君而鼎司字见于文选劝进表云臣等荷宠三世位厠鼎司又陈琳为袁绍檄曹豫州云窃盗鼎司倾覆神器晋何曾为太傅日食万钱】玉食罗常珍【去言云弃常珍而嗜异馔】吾评扬州贡此物真絶伦【扬雄赞以为絶伦】

次韵谢外舅食驴肠

垂头畏庖丁【见前注】趋死尚能鸣【退之秋怀诗浮生虽多途趋死惟一轨晋书王武子好驴鸣世说王仲宣好驴鸣】说以雕俎乐甘言果非诚【庄子達生篇祝宗人临牢筴说彘曰汝奚恶死吾将三月?汝十日戒三日斋藉白茅加汝肩尻乎雕俎之上则汝为之乎左传云币重而言甘诱我也】生无千金辔【老杜後出塞云千金买马鞍乐府木兰歌云南市买辔头驴安得有此哉】死得五鼎烹【主父偃传大丈夫生不五鼎食死则五鼎烹耳】祸胎无腸胃【枚乘书云福生有基祸生有胎】杀身和椒橙春风都门道贯鱼百十并【易剥卦贯鱼以宫人宠魏志邓艾传鱼贯而进】骑奴吹一映【史记任安传与骑奴同食庄子则阳篇吹剑首者映而已道尧舜于戴晋人之前譬犹一映也】驢骏不敢争【文选魏都赋曰冀马填廊而驢骏赭白马赋云于时驢骏充阶街兮注云说文曰驢壮也】物材苟当用【左传隐五年凡物不足以讲大事其材不足以备器用则君不举又云取材以章物采谓之物】何必渥洼生【汉书礼乐志乐章有元狩三年马生渥洼水中作】忽思麒麟楨突兀使人惊【朝野僉载云唐衢州盈川县令杨炯恃才简傲目朝官为麒麟楨人问之曰今假弄麒麟者刻画头角修饰皮毛覆之驴上及脱去皮褐还是驴耳无德而衣朱紫与此何异】

次韵师厚答马着作屡赠诗

尝闻马南郡【後汉马融传为南郡太守】少有拔俗韵【陶诗少无适俗韵性本爱丘山】寒灰几见溺【韩国安传安国坐法抵罪蒙狱吏田甲辱安国曰死灰当不复然乎甲曰然即溺之】铍翮常思奋【文选五君咏咏嵇康云鸾翮有时铍龙性谁能驯】桐薪鸣竈间【後汉蔡邕传吴人有烧桐以爨者邕闻火烈之声知其良木因请而裁为琴果有美音而其尾犹焦故时人名焦尾琴】劒气吐吴分【晋张华传吴之未灭也斗牛之间常有紫气吴平之後紫气愈明华问雷焕是何祥也焕曰宝劒之精上彻于天耳】多言世益嗤【老子多言数穷】当律心自隐【庄子言而当物则终日言而不尽自隐谓隐度也汉元帝纪自度曲应劭曰自隐度作新曲文选崔子玉座右铭云隐心而後动谤议庸何伤注云隐度也】家虽四立壁【见前注】仕要三无愠【论语三已之无愠色】会将渔父意往就庄生问【庄子有渔父篇】

次韵子瞻与舒尧文祷雪雾猪泉唱和

老农年饥望人腹【庄子无聚禄以望人之腹】想见四溟森雨足【文选张景阳杂诗云根临八极雨足洒四溟李善曰四溟四海也又诗森森散雨足】林回投璧负婴儿【庄子林回弃千金之璧负赤子而趋】岂闻烹儿翁不哭未论万户无炊烟蛛丝蜗涎经杼柚【诗杼柚其空】使君闵雪无肉味煮饼青蒿下盐菽岂云剪爪宜侵肌【文选应休琰与广川长书言祷雨不应其略云昔夏禹之解阳吁殷汤之祷桑林词未卒而泽滂沛今者云积而复散得无割髮宜及肤剪爪宜侵肌乎李善注云吕氏春秋曰汤克夏而大旱五年乃身祷于桑林剪其发其手自以为牲雨乃大至音郦】霜不杀草仍故绿【春秋陨霜不杀草】幽灵燹燹西山雾【文选西京赋巨灵燹肩高掌远跼吴都赋巨鳌燹肩首冠灵山燹音备肩音虚器切燹字乃诗所谓内燹于中国盖误写耳燹字又倒写当改正】牲肥酒香神未渎【退之南海神碑云牲肥酒香樽爵净洁】得微往从董父餐【左昭二十九年蔡墨对魏献子曰昔有鬻叔安有裔子曰董父实甚好龙能求其嗜欲以饮食之龙多归之乃畜龙以服事舜】寧当罪系葛陂渊【汉书费长房传东海君见葛陂君淫其夫人长房劾系之三年东海大旱长房曰东海君有罪吾前系于葛陂今出之使作雨于是雨立注】卜择祠官齐博士【汉武纪其令祠官修山川之祠汉儒林传五经博士多是齐人舒尧文时为教授故云】暴露致告苍崖顛请天行泽不汲汲尔亦枯鱼过河泣【乐府古词云枯鱼过河泣何时悔复及作书与鲂鱉相教谨出入】生鹅斩颈血未乾【庄子说剑篇上斩颈领下决肝肺退之诗一夫斩颈羣雏枯】风马云车坐相及【汉礼乐志房中歌云灵之车结玄云灵之下若风马】百里旌旗洒玉花【唐舒元舆序重雪终日玉花搅空】使君义动龙蛇蛰【老杜云意鍾老柏青义动修蛇蛰】老农欢喜有春事呼兒饭牛理蓑笠【吕氏春秋百里奚未遇时饭牛于秦】博士勿叹从公疲明年麦饭滑流匙【老杜云尝稻雪翻匙又云滑意雕胡饭香闻锦带羹溜匙兼暖腹谁欲致盃羹】

山谷外集诗注卷四

山谷外集诗注卷五

钦定四库全书

山谷外集诗注卷五

宋 黄庭坚 撰

史 容 注

薄薄酒二章【并引】

苏密州为赵明叔作薄薄酒二章愤世疾邪其言甚高以予观赵君之言近乎知足不辱有马少游之余风故代作二章以终其意【东坡熙宁七年冬知密州除夜作半字韵诗山谷和章乃元丰初作此篇当在半字韵诗以后作也】

薄酒可与忘忧【晋顾荣传惟酒可以忘忧】丑妇可与白头徐行不必驷马称身不必狐裘无祸不必受福【荀子福莫善于无祸】甘餐不必食肉【文选七发云甘餐毒药战国策颜斶云晚食以当肉安步以当车】富贵于我如浮云【见论语】小者谴诃大戮辱【贾谊传闻谴诃则白冠鵲缨又云被戮辱者不大迫乎山谷写本作谴何俗本误耳】一身畏首复畏尾【左传畏首畏尾身其余几】门多宾客饱僮仆美物必甚恶【左传昭二十八年叔向之母曰甚美必有甚恶】厚味生五兵【国语周语云厚味实腊毒五兵见前注】匹夫怀璧死【左传匹夫无罪怀璧其罪】百鬼瞰高明【见前注】丑妇千秋万岁同室万金良药不如无疾【汉灌夫传吴楚反时夫驰入吴军身中大创十余适有万金良药故得无死】薄酒一谈一笑胜茶万里封侯不如还家【太白诗锦城虽云乐不如早还家後汉班超传当封侯万里之外】

薄酒终胜饮茶丑妇不是无家醇醪养牛等刀锯深山大泽生龙蛇【襄二十一年叔向之母曰深山大泽实生龙蛇彼美余惧其生龙蛇以祸女】秦时东陵千户食何如青门五色瓜【见前注】传呼鼓吹拥部曲何如春雨一池蛙【传呼甚宠见萧望之传南史孔珪传云门庭之内草莱不剪中有蛙鸣或问之曰欲为陈蕃乎答曰我以此当两部鼓吹王晏尝鸣鼓吹候之闻蛙鸣曰此殊聒人耳珪曰我听鼓吹殆不及此晏甚有慙色】性刚太傅促和药【萧望之传天子方倚欲以为丞相会望之子汲上书讼望之前事弘石显建白望之前欲排退许史专权擅朝幸得不坐深怀怨望教子上书非颇屈望之于牢狱塞其快快心则圣朝亡以施恩厚上曰萧太傅素刚安肯就更显等曰望之所坐语言薄罪必亡所忧上乃可其奏望之欲自杀其夫人止之以问门下生米云云劝望之自裁望之乃谓云曰游趣和药来无久留我死竟饮鸩自杀】何如羊裘钓烟沙【後汉严光传光武即位光变姓名隐身帝令以物色求之後齐国上言有男子披羊裘钓泽中】绮席象牀瑠玉枕【太白诗龙驹瑠鐙白玉鞍象牀绮食黄金盘】重门夜鼓不停挝何如一身无四壁满船明月卧芦花吾闻食人之肉可随以鞭朴

之戮乘人之车可加以鈇钺之诛【刘向列女传老莱子妻云妾闻之可食以酒肉者可随以鞭箠可授以官禄者可随以斧钺】不如薄酒醉眠牛背上丑妇自能搔背痒【神仙传王远字方平过蔡经家麻姑手爪似鸟爪蔡经心中私言若背痒时得此爪以爬背当佳否方平已知其意即使人牵经鞭之曰吾鞭不可妄得也牛背见前注】

戏赠彦深【元注云李厚字彦深厚之弟居南阳】

李髯家徒立四壁【李髯见前注汉司马相如传家徒立四壁】未尝一饭能留客【老杜云一饭未曾留俗客】春寒茅屋交相风【渊明饮酒诗弊庐交悲风荒草没前庭】倚墙扞虱读书策【晋王猛传桓温之关猛被褐诣之扞虱而言旁若无人曲礼曰先生书策琴瑟在前坐而迁之戒勿越】老妻甘贫能养姑宁剪髻鬟不典书【晋陶侃传侃早孤贫为县吏鄱阳孝廉范逵尝过侃时仓卒无以待宾其母乃截髮得双髮以易酒肴乐饮极欢杜诗长者来在门荒年自餬口家贫无供给客位但箕帚俄顷羞颇珍寂寥人散後人怪髻髮空吁嗟为之久自陈剪髻鬻鬻市充杯酒】大儿得餐不索鱼小儿得襦不索襦【晋韩康伯传伯数岁母为作襦令捉熨斗而谓之曰且着襦寻当作复襦伯曰不复须火在斗中而柄尚热今既着襦下亦当煖】庾郎鲑菜二十七【食鲑二十七种见前注】太常斋日三百余【後汉周泽传为太常尝卧疾斋宫其妻哀泽老病闾间所苦泽大怒以妻干犯斋禁遂收送诏狱谢罪时人为之语曰生世不谐作太常妻一岁三百六十日三百五十九日斋一日不斋醉如泥】上丁分牐一饱饭藏神梦诉羊羴蔬【周礼大宗伯以脰膾之礼亲兄弟之国左传天子有事膾焉又云与执膾食此言释奠分胙也后颜录云有人常食蔬忽食羊肉梦五藏神曰羊踏破菜园】世传寒士有食籍一生当饭百瓮菹【诗疆场有瓜是剥是菹新序楚惠王食菹寒而得蛭菹若今菹瓮也又摘礼记醢醢百瓮字以相谑也食籍见第六卷】冥冥主张审如此【庄子孰主张是】附郭小圃宜勤锄【摘苏秦传附郭田二顷字】葱秧青青葵甲绿早韭晚菘羹糝熟【南史齐周顒隐鍾山文思太子问菜食何味最胜曰春初早韭秋末晚菘庄子藜羹糝不糝】充虚解战赖汤饼【晋束皙饼赋曰玄冬猛寒清晨之会涕冻鼻中霜凝口外充虚解战汤饼为最】茱以?藿与甘菊【内则云雉兔皆有茱注云菜藿也晋石崇传云韭菜藿是捣韭根杂以麦苗耳】几日怜槐已着花一心咒笋莫成竹【白乐天食笋诗且食勿踟蹰南风吹作竹】羣儿笑髯穷百巧我谓胜人饭重肉【汉朱家传食不重味公孙弘传汲黯曰弘位在三公奉禄甚多然为布被诈也上问弘弘曰有之臣闻管仲相齐有三归侈拟于君桓公以霸晏婴相景公食不重肉齐国亦治云云弘身食一肉脱粟饭】羣儿笑髯不若人我独爱髯无事贫君不见猛虎即人厌麋鹿【易曰即鹿无虞】人还寝皮食其肉【左襄二十一年州绰曰二子者譬于禽兽臣食其肉而寝处其皮矣】濡需终与豕俱焦【庄子徐无鬼篇有暖姝者有濡需者濡需者豕虱是也择疏鬣自以为广宫大囿奎蹄曲隈乳间股脚自以为安室利处不知屠者之一旦鼓臂布草操烟火而已与豕俱焦也】饫肥择甘果非福虫蚁无知不足惊横目之民万物灵【庄子天地篇夫子无意于横目之民乎书惟人万物之灵】请食熊蹯楚千乘【左文元年楚太子商臣以宫甲围成王王请食熊蹯而死弗听】立死山壁汉公卿【後汉献帝纪建安元年车驾至洛阳是时宫室烧尽百官披荆棘依墙壁间州郡各拥强兵而委输不至羣僚饥乏尚书郎以下自出采稻或饥死墙壁间或为兵士所杀】李髯作人有佳处【韩文诤辩云作人得如周公孔子亦可以止矣】李髯作诗有佳句虽无厚禄故人书【

杜诗厚禄故人书断絶长饥稚子色凄凉【门外犹多长者车【陈平事见前注】我读杨雄逐贫赋斯人用意未全疎【逐贫赋见雄传兹不及注】

竹轩咏雪呈外舅谢师厚并调李彦深【此篇至卷终皆自汴京回至南阳作】

破腊春未融【杜诗腊破思端绮】土膏寒不发【国语云自今至于初吉土膏其动】数声鸣条风【论衡五日一风风不鸣条】一夜洒窗雪【退之咏雪云洒急听窗知】开轩万物晓落势良未歇【退之齿落诗俄然落六七落势殊未已】铿铿青琅玕阅此岁凛冽【退之诗岂如秋霜虽凛冽】摧埋头抢地【司马迁书见狱吏则头抢地千羊反】意气终自洁【太白诗眼花耳热後意气素霓生】君子谓此君全身斯明哲【诗既明且哲以保其身】屋头维女贞颜色少泽悦【琅玕此君皆谓竹以比师厚女贞木名以比李彦深】梢能窥藩篱亦有固穷节【论语君子固穷渊明诗不赖固穷节百世谁人传又云深得固穷节】佳兴冉冉生门外无车辙【汉书陈平以席为门然门外多长者车辙】写之朱丝弦清坐待明月【文选诗直如朱丝弦清如玉壶冰】

赋未见君子忧心靡乐八韵寄李师载

同陞吏部曹往在纪丁未【山谷治平四年登第岁在丁未】别离感寒暑岁星行十二【岁星十二岁一周天丁未至戊午十二年盖元丰元年也山谷时在北京】我惭鸡荩谷【太玄第四卷鸡荩谷注荩谷进也进食其谷也】子难天且剗【易睽六三其人天且剗释文天剗也剗凿其额曰天】空余山梁期【山梁见论语】尚不昧初志会合良艰期系匏各异县【系匏见论语文选云他乡各异县展转不相见】千里共明月【文选月赋歌曰美人迈兮音尘阔隔千里兮共明月】如披故人面【晋乐广传卫瓘见广曰此人之水镜见之莹然如披云雾而覩青天】浮云比高秋此岂心中愿雾重豹成文【古列女传陶答子治陶三年名誉不闻家富三倍其妻谏曰南山有玄豹雾雨七日而不下食欲以泽其毛成文章也犬彘不择食以肥其身坐而须死耳】水清鱼自见【古乐府艳歌行曰语卿且勿眄水清鱼自见】

齐地谷翔贵【前汉食货志云谷价翔贵】排门无饔飧【诗泂酌可以饔飧】二仲有甘旨奉亲亦良勤原田水洗洗【韵书云洗水涌光也】何时稼如云无民愿岁丰正自不忘君【无民无字误疑是庶民刘向传忠臣虽在畎亩犹不忘君】

古人有成言岁暮于吾子【真诰萼绿华赠羊权诗云析期岂朝华岁暮于吾子】斧挥郢人鼻【庄子徐无鬼篇郢人垺漫其鼻端若蝇翼使匠石斲之匠石运斤成风聽而斲之尽垺而鼻不伤郢人立不失容】琴即鍾期耳【见前注】新诗凌建安【魏志王粲传粲卒于建安二十二年始文帝为五官将及平原侯植皆好文学粲与徐干伟长陈琳孔璋阮?元瑜应瑒德璉刘楨公干竝见友善】高论到正始【晋卫玠传大将军镇豫章长史谢鲲雅重玠相见欣然言论弥日大将军谓鲲曰昔王辅嗣吐金声于中朝此子复玉振于江表微言之绪絶而复续不意永嘉之末复闻正始之音】徒言参隔辰【扬子吾不覩参辰之相比也左传昭元年子产曰昔高辛氏有二子伯曰閼伯季曰实沈居于旷林不相能也日寻干戈以相征讨后帝

不臧迁阍伯于商邱主辰商人是因故辰为商星迁实沈于大夏主参唐人是因以服事夏商故参为晋星】未负石投水【吕氏春秋精喻篇白公问于孔子曰人可微言乎孔子不应白公曰若以石投水奚若孔子曰没人能取之白公曰若以水投水奚若孔子曰淄渑之合易牙能知之】

白雪非衆听【文选宋玉答楚王问云客有歌于郢中者其始曰下里巴人國中属而和者数千人其为阳阿薤露國中属而和者数百人其为阳春白雪属而和者数十人而已其曲弥高其和弥寡】夜光忌暗投【见前注】古来不识察【文选古诗一心抱区区惧君不识察】浪自生百忧三月楚国泪【卞和事见前注以言夜光之璧】千年郢中楼【以言阳春白雪】无因杭一苇【诗一苇杭之】浊水拍天流【退之诗海气昏昏水拍天】

河南李茂彦内蕴迈俗心濬冲有泾渭一顾重千金【文选任彦昇诗濬冲得茂彦注云传畅曰王戎字濬冲冲为选官时江夏李重字赞曾汝南李穀字茂彦二人俱处要职戎以识会待之各得其用彦昇此诗又云伊人有泾渭非余扬浊清向秀列传云秀与嵇康吕安为友康傲世不羈安放逸迈俗而秀雅好读书】事亲知色难胜已又勇沈【见前注】外物既难必求之首阳岑【庄子外物篇外物不可必故龙违诛比干戮论语夷齐饿于首阳之下】

飘风从东来雨足尽西靡【说苑上之化下犹风之靡草东风则草靡而西西风则草靡而东老杜云雨声已先风散足尽西靡】万物逐波流金石终自止【说苑丛谈云水浮万物玉石留止】渭因泾使浊菲以葑故毁【竝见毛诗】智所无奈何谁能为橐里【史记橐里子传滑稽多智号曰智囊秦人谚曰力则任鄙智则橐里】

纷纷车马客如集市人博彼虽有求来我但快一噓【文选陈孔璋书必大噓也】忽逢媚学子【退之诗蹢躅媚学子墙屏日有徒】时亦撼关钥何当携手期濠上得鱼乐【见前注】

次韵张秘校喜雪三首

落月烟沙静渺然好风吹雪下平田琼瑶万里酒增价桂玉【见前注】一炊人少钱学子已占秋食麦广文何憾客无毡【才名四十年坐客寒无毡此杜赠郑广文山谷以自况】睡余强起还诗债腊里春初未隔年

巷深朋友稀来往日晏儿童不扫除雪里正当梅腊尽民饥可待麦秋无【杜诗梅粦腊前破月令孟夏麦秋至】寒生短棹谁乘兴【晋王徽之传尝居雪夜初霁月色清朗忽忆戴逵逵时在剡便夜乘小船诣之经宿方至造门不前而反人问其故徽之曰本乘兴而来兴尽而反何必见安道耶】光入疎棂我读书【宋齐语曰孙康家贫映雪读书文选曹子建诗流焱激棂轩注轩窗间也】官冷无人供美酒【杜诗广文先生官独冷】何时却得步兵厨【阮籍闻步兵厨人善釀求为步兵校尉】

满城楼观玉阑干小雪晴时不共寒润到竹根肥腊笋【杜诗密竹复冬笋】暖开蔬甲助春

盘【杜诗自锄稀菜甲】眼前多事观游少【观游见前注】胥次无忧酒量宽闻说压沙梨已动会须鞭马蹋泥看【退之诗走马来看立不正】

次韵寅庵四首【寅庵山谷兄大临元明也其诗序云双井弊庐之东得胜地结茅庵居命曰寅庵喜成四诗寄鲁直可同魏都士人共和之可见山谷时在北京也】

四诗说尽庵前事寄远如开水墨图略有生涯如谷口【杨子法言云谷口郑子真耕乎岩石之下而名震于京师】非无卜肆在成都【汉书蜀有严君平卜筮于成都市】旁篱榛栗供宾客满眼云山奉燕居【礼记仲尼燕居】闲与老农歌帝力【帝王世纪帝尧之时天下大和老人击壤于道观者叹曰大哉帝之德也老人曰吾日出而作日入而息凿井而饮耕田而食帝何力于我哉】年丰村落罢追胥【周礼小司徒之职乃会万民之卒伍而用之以比追胥注追逐寇也胥伺捕盗贼也】

兄作新庵接旧居一原风物萃庭隅陆机招隐方传洛【陆机有招隐诗】张翰思归正在吴【晋张翰吴郡吴人齐王问辟为东曹掾见秋风起思吴中菰菜蓴羹鲈鱼遂命驾而归】五斗折腰惭仆妾【见陶潜传】几年合眼梦乡间【乐天诗春来梦何处合眼到东川】白云行处应垂泪【唐狄仁杰授并州法曹参军亲在河阳仁杰登太行山反顾白云孤飞谓左右曰吾亲舍其下瞻怅久之云移乃去】黄犬归时早寄书【见前注】

大若塘边搗网鱼【庄子则阳篇冬则搗鼈于江搗初角切】小桃源口带经锄【汉儿宽传带经而锄】诗催孺子成鸡栅【老杜有催宗文树鸡栅诗】茶约邻翁掘芋区【瓜畴芋区见蜀都赋】苦楝狂风寒彻骨黄梅细雨润如酥【楝风梅雨竝见前注退之诗天街小雨润如酥】此时睡到日三丈【南齐天文志永明五年日出三竿卢仝诗日高丈五睡正浓杜牧之诗白头扶不起三丈日还高】自起开关招酒徒【史记酈食其叱使者曰走复入言沛公吾高阳酒徒耳】

未怪穷山寂寞居此情常与世情疎谁家生计无闲地大半归来已白须不用看云眠永日【老杜云看云莫怅望又云时独看云泪横臆】会思临水寄双鱼【见前注】公私逋负田园薄未至妨人作乐无【见前注】

以同心之言其臭如兰为韵寄李子先

往日三语掾解道将无同我观李校书超迈有古风【晋阮瞻传见司徒王戎戎问曰圣人贵名教老庄明自然其旨同异瞻曰将无同戎咨嗟良久即命辟之人谓之三语掾】谈道屡入微【卫玠传胜日亲友时请一言莫不咨嗟以为入微又云卫玠谈道平子絶倒】闭门长蒿蓬【蓬蒿绕宅见前注】谁能赏远韵太守似安丰【晋庾凯雅有远韵王戎传进爵安丰侯】

流水鸣无意白云出无心【归去来辞云无心以出岫】水得平淡处渺渺不厌深云行不能

雨还归碧山岑斯人似云水廊庙等山林【文选曹子建诗朝云不归山霖雨成川泽前汉赞山林之士往而不能反朝廷之士入而不能出】

俗士得失重舍龟观朵颐【易舍尔灵龟观我朵颐】六经成市道狙侏以为师【史记廉颇传客曰天下以市道交汉货殖传节狙侏汉书吏道以法令为师】吾学淡如水载行欲安之【庄子君子之交淡如水左传襄二十四年子产寓书告范宣子曰夫令名德之舆也恕思以明德则令名载而行之扬子法言或问孔子知其道之不用也则载而恶乎之曰之後世君子】惟有无心子白云相与期

摧藏褫冠冕【文选扶风歌抱膝独摧藏易讼卦或锡之鞶带终朝三褫之後汉邓禹赞褫龙章于终朝左昭九年伯父裂冠毁冕】寂寞归邱园一瓢俱好学伯仲吹篪埭正以此易彼【韩文柳子厚墓志以彼易此孰得孰失】高车择朱门得失固有在难为俗人言【司马迁书云悲夫事未易一二与俗人言也又云此可为知者道难为俗人言也】

携手力不足七年坐乖离【此诗乃元丰二年岁己未北京解官後作也在北京首尾跨七年选诗乖离即长衢】愁思不能眠起视夜何其残月挂破镜【古乐府云破镜飞上天谓月半也】寒星满天垂明明故人心维斗终不移【见前注】

穷阎蒿蔓羶富屋酒肉臭【礼记富润屋汉霍去病传重车余弃梁肉而士有饥色杜诗朱门酒肉臭路有冻死骨】酒肉令人肥蒿蔓令人瘦欲从钟鼎食【家语子路曰亲没之後累茵而坐列鼎而食史记货殖传洗削薄技也而郢氏鼎食马医浅方张里击钟鲍照诗击钟陈鼎食方驾自相求】复恐忧患构秦时千户侯寂寞种瓜後【萧何传邵平者故秦东陵侯秦破为布衣贫种瓜长安城东瓜美故世称东陵瓜】

客从济南来【李子先及前篇李德叟皆在济南山谷母党也】遗我故人书墨淡字疎行【杜诗墨淡字欹倾】故人情有余上言犹健否次问意何如只今意何有思食故溪鱼【古乐府诗云客从远方来遗我双鲤鱼呼儿烹鲤鱼中有尺素书长跪读素书书中竟何如上言加餐食下言长相忆】

吾子有嘉德譬如舍薰兰清风不来过岁晚蒿艾间【渊明饮酒诗云幽兰生前庭舍薰待清风清风脱然至见别蒿艾中】古来百夫雄白首在涧盘【诗百夫之特又考盘在涧】非关自取重【杜诗云非关足无力又云非关故安排】直为知人难【书在知人惟帝其难之】

见子瞻餐字韵诗和答三人四返不困而愈崛奇辄次韵寄彭门三首【据东坡集乃熙宁七年冬除夜病中赠段屯田时在密州山谷和章乃元丰初】

公才如洪河灌注天下半【文选吴都赋?碻乎数州之间灌注乎天下之半】风日未尝撓【终上句洪河之义庄子徐无鬼篇故曰风之过河也有损焉日之过河也有损焉请只风与日相与守河而河以为未始有撓也】昼夜圣所叹【见论语】名世二十年穷无歌舞玩入宫

又见妬【女无美恶入宫见妬见邹阳传】徒友飞鸟散【庄子山木篇孔子问于子桑雥曰吾再逐于鲁伐树于宋削迹于卫穷于商周围于陈蔡之间吾犯此数患亲交益疏徒友益散何欤李陵传各鸟兽散犹有得脱】一饱事难谐【事不谐矣见宋弘传】五车书作伴【庄子惠施多方其书五车】风雨暗楼台鸡鸣自昏旦【诗风雨如晦鸡鸣不已】虽非锦绣赠欲报青玉案【文选张平子四愁诗美人赠我锦绣段何以报之青玉案】文似离骚经诗窥关雎乱【论语师挚之始关雎之乱】贱生恨学晚曾未奉巾盥【内则盥卒授巾】昨蒙双鲤鱼【双鲤事见前注东坡在彭门答山谷书见集中】远托郑人缓【庄子列御寇篇郑人缓也呻吟裘氏之地三年而缓为儒】风义薄秋天【谢灵运传论云高义薄云天老杜云高义薄会云】神明还旧贯【法书要录庾翼与羲之书云忽见足下答家兄书焕若神明顿还旧贯】更磨荐衿墨【後汉孔融上疏荐衿衡】推挽起疲懦忽忽未嗣音微阳归候炭【汉天文志冬至短极县土炭孟康曰先冬至三日县土炭于衡两端轻重适均冬至日阳气至则炭重夏至日阴气至则土重】仁风从东来拭目望斋馆鸟声日日春柳色弄晴暖漫有酒盈樽何因见此餐【归去来辞云携幼入室有酒盈樽诗今夕何夕见此粢者】

人生等尺捶岂耐日取半【庄子篇末云一尺之捶日取其半万世不竭辩者如此与惠施相应终身无穷】谁能如秋虫长夜向壁叹朝四与暮三适为狙公玩臭腐暂神奇【庄子知北篇臭腐复化为神奇神奇复化为臭腐】暗噫即飘散我观万世中独立无介伴小黠而大痴【退之送穷文曰子知我名凡我所为驱使令去小黠大痴】夜气不及旦【见孟子】低首甘参养尻雕登俎案【见前食驴肠诗注】所以终日饮醉眠朱碧乱【醉眠当是醉眼玉台新咏夜愁诗云谁知心眼乱看朱忽成碧】无人明此心忍垢待濯盥仰看东飞云只使衣带缓【文选古诗相去日已远衣带日已缓】先生古人学百氏一以贯见义勇必为少作衰俗懦忠言愿回天【唐张玄素传魏徵叹曰张公论事有回天之力】不忍敦吞炭【豫让吞炭】还从股肱郡【汉季布传上曰河东吾股肱郡故特召君耳】待诏图书馆【东壁二星天子图书之秘府也东坡为郡仍直史馆】投壶得赐金【杜诗能画毛延寿投壶郭舍人西京杂记郭舍人善投壶每为武帝投壶辄赐金帛】侏儒余饱暖宁令东方公但索长安粢【东方朔传上召问朔何恐侏儒为对曰侏儒饱欲死臣朔饥欲死臣言可用幸异其礼不可用罢之无令但索长安米惠帝纪曰为鬼薪白粢注取薪给宗庙为鬼薪坐择米使正白为白粢郭舍人及侏儒以比当时附会而进者东方朔比东坡】元龙湖海士毁誉略相半下牀卧许君上牀自永叹【魏志吕布传陈登者字元龙卒後许汜与刘备竝在荆州牧刘表坐与表共论天下人汜曰陈元龙湖海之士豪气不除备谓表曰许君论是非表曰欲言非此君为善士不宜虚言欲言是元龙名重天下备问汜君言豪○案此下注文阙】丈夫属有念人物非所玩坐令结欢客化为烟雾散武功有大略亦复寡朋伴咏歌思见之长夜鸣曷旦东南望彭门官道平如案简书束缚人一水不能乳斯文嬾秬鬯可用圭瓚盥诚求活国医【按以上诸句注文阙】何忍弃和缓【晋侯求医于秦秦使医和视之文子曰医及国家乎对曰上医医国其次医人】开疆日百里【诗日辟国百里】都内钱朽贯【史记平准书云京师之钱累巨万贯朽而不可校】铭功甚俊伟迺见儒生懦且当置是事勿使冰作炭【宁五年收复熙州十年交趾纳款铭功当是此等事盐铁论冰炭不可以同器渊明诗孰若当世上冰炭满怀抱退之聽颖师琴云颖乎尔诚能无以冰炭寘我肠】上帝羣玉府【穆天子传羣玉之山先王之所谓策府】道家蓬莱馆【後汉书学者称东观为老氏藏室道家蓬莱】曲肱夏簟寒炙

背冬屋暖【嵇康絶交书野人有快炙背而美芹子者欲献之至尊】只令文字垂万世星斗粲

再和寄子瞻闻得湖州

天下无相知得一已当半桃僵李为仆【古歌诗曰桃生露井上李树生桃旁虫来嚼桃根李树代桃僵见艺文类聚】芝焚蕙增难【文选叹逝赋云信松茂而柏悦嗟芝焚而蕙叹】佳人在江湖照影自娱玩一朝入汉宫扫除备冗散【汉申屠嘉传冗官居其中注云冗谓散辈也如今散官】何如终流落长作朝云伴【文选高唐赋妾在巫山之阳高邱之岨旦为朝云暮为行雨】相思欲面论坐起鸡五旦身惭尸廩禄有罪未见案【後汉孔融传丁零盗苏武牛羊可并案也】公文雄万夫皦皦不自乱臧谷皆亡羊【庄子骈拇篇臧与谷二人相与牧羊而俱亡其羊问臧奚事则挟策读书问谷奚事则博塞以游二人者事业不同其于亡羊均也】要以道湔盥传声向东南王事不可缓【孟子民事不可缓也】春波下数州快若七札贯【左传成十六年鄢陵之战养由基蹲甲而射之彻七札焉】椎鼓张风帆相见激衰懦空文不传心千古付煨炭安得垂天云【庄子翼若垂天之云】飞就吴兴馆【吴兴郡湖州也】鱼膾柳絮肥【孔毅甫杂记云永叔称圣俞河豚诗云春洲生荻牙春岸飞杨花河豚于是时贵不数鱼虾以谓河豚食柳絮而肥圣俞破题两句便说尽河豚好处乃永叔褒誉之词也其实不尔此鱼盛于二月至柳絮时鱼已过矣石林诗语所言略同】笋煮溪沙暖解歌使君词樽前三粲【国语周语曰三女奔密康公公母曰必致之王夫粲美物也衆以美物临而何德以堪之】

次韵答尧民

君闻苏公诗疾读思过半譬如闻韶耳三月忘味叹【见论语班固幽通赋云虞韶美而凤仪兮孔忘味于千载】我诗岂其朋组丽等俳玩【扬子雾縠之组丽女工之蠹矣司马迁书云文史星历近乎卜祝之间固主上所戏弄倡优畜之汉书枚臯言为赋迺俳见视如倡】不闻南风弦【礼记舜作五弦之琴以歌南风】同调广陵散【嵇康传康将刑东市索琴弹之曰昔袁孝尼尝从吾学广陵吾每靳固之广陵散于今絶矣】鹤鸣九天上肯作家鸡伴【诗鹤鸣于九臯南史王僧虔传小儿辈贱家鸡借用之】晁子但爱我品藻私月旦【後汉许劭传劭与兄靖好核论乡党人物每月辄更其品题故汝南有月旦评焉】官闲乐相从梨栗供杯案【渊明责子诗但覓梨与栗前汉贡禹传见赐杯案尽文画金银饰後汉董卓传偃转杯案间】门静鸟雀嬉花深蜂蝶乱忽蒙加礼貌斋戒事撝盥问大心更小【杜诗成王功大心转小此摘其字】意督词反缓君材于用多舞选弓矢贯【齐国风舞则选兮射则贯兮】聪明回自照【传灯録灵居义能曰回光返照看身心是何物】胜已果非懦我如相绘事素质施朽炭【见论语】古来得道人非独大庭馆【列子黄帝篇退而闲居大庭之馆斋心服形昼寝而梦游于华胥氏之国】晁子已不疑冬寒春自暖系表知药言择友得荀粲【魏志荀彧传注云粲字奉倩诸兄竝儒术论议而粲独好言道常以为子贡称夫子之言性与天道不可得闻然则六籍虽存固圣人之糠粃粲兄侯难曰易亦曰圣人立象以尽意系辞焉以尽言则微言胡为不可得而闻见哉粲曰盖理之微者非物象之所举也今称立象以尽意此非通乎

意外者也系辞焉以尽言此非言乎系表者也斯则象外之意系表之言固蘊而不出矣当时能言者不能屈也】

春游

终日桃李蹊【李广赞桃李不言下自成蹊】春风不相识【太白诗春风不相识何事入罗帏】同我二三子承我作意力把酒忘味着看花了春寂【楞严经云香严童子白佛言见诸比丘烧沈水香香气寂然来入鼻中】晴云散长空旷荡无限隔【杜诗是身如浮云安可限南北南都赋上平衍而旷荡】身为胡蝶梦【见前注】本自不渔色【礼坊记诸侯不下渔色】春虫劝人归【谓杜鹃】今我诚是客【渊明诗家为逆旅舍我如当去客文选诗人生天地间忽如远行客叹逝赋云托末契于後生余将老而为客】归来翻故纸书尾见麟获【传灯录古灵禅师传其师在窗下看经蜂子投窗纸求出师曰世界如许广阔不肯出钻他故纸驴年去此用其字左传哀十有四年春西狩获麟注云春秋絶笔于获麟之一句】文字非我名聊取二三策【乐天诗黄纸除书非我名孟子武成取二三策】

次韵感春五首

我与子桑友既往雨弥旬【庄子曰子舆子桑友而淋雨十日子舆曰子桑殆病矣里饭而往食之】交情未曾改【用汉书翟公书门之语而反其意所谓一死一生乃知交情一贵一贱交情乃见】天地忽趋东风无行迹佳气满城闉【鲍明远诗严车临迴陌延瞰历城闉】麦苗生陂陇叹息不食陈【麦生陵陂见前注左传不食新矣今已及麦故云不食陈】谁能里饭来定是寂寞人一曲古流水【志在流水见前注】试拂弦上尘古木少生意轮囷卧河滨惭愧桃与李相随见阳春

张侯脱朝衣儿褐多纯绿【礼记深衣具父母衣纯以青】闻道无米春煮术学辟谷【神仙传涓子齐人也好饵术张良传即导引不食谷注服辟谷药】官吏但索钱【?之嗟哉董生行云门外惟有吏日来徵租更索钱】诏书哀惻独【小雅哿矣富人哀此惻独】东方九尺长不得侏儒禄【东方朔见见前注】屋中声鹅鴈日暮搅心曲【退之诗云有时未朝餐得米日已晏隔墙闻讙呼衆口极鹅鴈心曲见前注】穷巷无桃李緼袍非春服【见论语】我吟白驹诗知君在空谷祁寒不可怨天道自平分【书冬祁寒小民亦惟曰怨咨宋玉九辩云皇天平分四时兮切独悲此凛秋退之诗云皇天平分成四时春风诞谩最可悲】及尔春风来四肢有余温丈夫力如虎【诗简兮有力如虎】为人行灌园【邹阳书於陵仲子辞三公为人灌园】椒兰工壅蔽未可怨芳荪【离骚经云余以兰为可恃兮羌无实而容长椒专佞以慢慝兮椒又欲充夫佩韩又云览椒兰其若兹兮又况揭车与江离注云兰怀王少弟司马子兰也椒楚大夫子椒也】寒鱼守穷辙蒙响一沫恩【庄子泉涸鱼相与处于陆相响以湿相濡以沫穷辙见後篇枯鱼注】一朝被湔祓吹毛见瘢痕【国策汗明说春申君曰君独无湔祓仆也文选广絶交论云剪拂使其长鸣注云与湔祓同吹毛求疵见前汉中山靖王胜传君面有瘢美玉可以灭瘢注云瘢疮痕也见王莽传】

鸟声春渐长烟雨春薄暮风光不长妍如客暂时寓芸芸物争时【老子曰夫物芸芸各复归其根】天地有常度【东方朔客难曰天有常度地有常形君子有常行】我行覩大河黄流日东骛【退之感二鸟赋出国门而东骛】喟然欲乘桴【见论语】莽不见洲渚张侯但饮酒无用恨羁旅十年富贵子今作一邱土【文选七哀诗昔为万乘君今为邱山土】

茶如鹰爪拳汤作蟹眼煎时邀草玄客【北苑修贡录茶有小芽有中芽小芽者其小如鹰爪蔡君谟茶录云候汤最难未熟则沫浮过熟则茶沈前世谓之蟹眼者过熟汤也扬雄传云时雄方草太玄有以自守泊如也】晴明坐南轩笑谈非世故【嵇康书云世故繁其虑七不堪也】独立万物先春风引车马隐隐何阗阗【蜀都赋车马雷骇轰轰阗阗】高盖相摩曼骑奴争道喧【史记田仁任安传曰平阳主家令两人与骑奴同席而食汉霍光传两家奴争道杜诗瑶池气郁律羽林相摩戛】吾人抚荣观燕处自超然【老子曰虽有荣观燕处超然】城中百年木有鹊巢其颠鸣鸠来相宅日暮更谋迁【书洛诰曰召公既相宅诗维鹊有巢维鸠居之】

圣柬将寓于卫行乞食于齐有可怜之色再次韵感春五首赠之

温气冰底归忽忽六过旬【易曰过旬灾也】园林改柯叶【礼器云如竹箭之有筠也如松柏之有心也故贯四时而不改柯易叶】鸟声日日新耕稼百年外四郊无短闾【曲礼四郊多垒此卿大夫之辱也】高邱试顾望俯仰迹已陈【兰亭禊饮序云俛仰之间已为陈迹】信陵松郁郁不见曩时人【史记魏公子无忌封为信陵君大名府即魏也】空怀负暄赏【列子宋国有田夫谓其妻曰负日之暄人莫知者以献吾君将有重赏】莫望属车尘【司马相如谏猎书云犯属车之清尘诗意言虽不忘君而无因自进也】腹中书万卷阼死沟壑滨【骚经云阼余身而危死兮汉文纪云阼于危亡注云近边欲堕之意音檐一音反坵之坵东方朔传先狗马填沟壑】投壶与射覆一笑物皆春【东方朔传上尝使诸数家射覆置守宫盂下射之皆不能中朔自赞曰臣尝受易请射之乃别蓍布卦而对曰臣以为龙又无角谓之为蛇又有足跂跂脉脉善缘壁是非守宫即蜥蜴上曰善赐帛十疋复使射他物连中辄赐帛朔平原厌次人厌次今棣州所治县也与大名相近神异经曰玉女投壶天为之笑则为电】种萱欲遣忧丛薄空自绿【嵇康养生论云合欢蠲忿萱草忘忧】洗心日三省【易圣人以此洗心语吾日三省吾身】人亦不我谷【诗此邦之人不我肯谷】谁能书窗下草玄抱幽独【太白诗谁能书阁下白首太玄经抱独见陶诗】白首官不迁校书汉天禄【三世不徙官校书天阁阁见雄传】身当万户侯【见此篇上谷注】鼓吹拥部曲解佩着犀渠【吴都赋家有鹤膝户有犀渠注鹤膝矛也犀渠楯也】张弓插雕服【周礼司弓仲秋献矢服韩文弓鞬服矢插房】何时李将军射猎出上谷【李广传数从射猎文帝曰令当高祖时万户侯何足道哉景帝时为上谷太守】

春风鸣布谷【尔雅鸣鸠鵲鵲注今布谷也杜诗云布谷处处催春种】天道似劝分【左僖二十一年务穡劝分】持饥望路人谁能颜色温笑忆枯鱼说诙谐老漆园【庄子曰庄周贷粟于监河侯监河侯曰我将得邑金贷子三百金可乎周曰周昨来有中道而呼者周顾视车辄中有鲋鱼焉周问之对曰我东海之波臣君岂有斗升之水而活我哉周曰我且南游吴越】

之王激西江之水而迎子可乎鮒鱼忿然作色曰吾得斗升之水然活耳君乃言此曾不如索我于枯鱼之肆诙谐见东方朔赞漆园见前注】湘累不得禄哀怨写荃荪【杨雄吊屈原文曰因江潭而注记兮钦吊楚之湘累】千年涧谷松惭愧雨露恩思为万乘器【万乘器见前注】顾掩斧凿痕【退之诗徒观斧凿痕】

风雨桃李华佳人来何暮【後汉廉范传廉叔度来何暮江淹诗日暮碧云合佳人殊未安】安齐果未安寓卫岂所寓【庾信集中咏怀诗云寓卫非所寓安齐独未安按左传晋公子重耳出奔及齐齐桓公妻之有马二十乘公子安之从者以为不可国风式微黎侯寓于卫】张侯室县罄【见前注】得酒美无度【诗彼其之子美无度】常忧腐肠死【三国陈思王传注云丁仪父冲过诸将饮醉烂肠死文选枚乘七发云命曰腐肠之药】须我嫁阿骛【三国朱建平传初荀攸鍾繇相亲善攸先亡子幼繇与人书曰吾与公達曾共使朱建平相建平曰荀君虽少然当以後事付鍾君吾时啁之曰惟当嫁卿阿骛耳何意戏言遂验乎今欲嫁阿骛使得善处】双鱼传尺素何处迷春渚【文选诗客从远方来遗我双鲤鱼呼童烹鲤鱼中有尺素书】啼鸟劝不归晓鞍逐行旅遥知登楼兴信美非吾土【王粲登楼赋虽信美而非吾土兮曾何足以少留】

鲁公但食粥百口常忧煎【顏鲁公帖云拙于生事举家食粥已数月今又罄竭祗益忧煎惠及少米实济艰勤】金张席贵宠【张安世传功臣之世惟有张氏亲近贵显比于外戚刘向传产禄席太后之宠注席因也】奴隶乘朱轩【鲍照诗奕奕朱轩驰】丈夫例寒饿万世无後先风霾天作恶【诗终风且霾羲之传辄作数日恶】雷亦怒阗阗俄顷花柳静烟暖谷鸟喧【司空图集戴容州云诗家之景如蓝田日暖良玉生烟】人事每如此翻覆不常然【杜万事反覆何所无】下流多谤议【司马迁答任安书负下未易居下流多谤议】高位又疾颠【国语高位实疾僨厚味实腊毒】空余壮士志不逐四时迁【选诗赏逐四时移】

山谷外集诗注卷五

山谷外集诗注卷六

钦定四库全书

山谷外集诗注卷六

宋 黄庭坚 撰

史 容 注

次韵盖郎中率郭郎中休官二首

仕路风波双白髮闲曹笑傲两诗流故人相见自青眼【见阮籍传】新贵即今多黑头【晋王珣与谢玄俱为桓温所重温曰王掾当作黑头公杜诗旧交新贵音书絶熙丰多擢用新进少年】桃叶柳花明晓市荻芽蒲笋上春洲定知闻见休官去【乐天诗放慵长饱睡闻健且闲行又云闻健此时相劝醉偷闲何处共寻春】酒户家园得自由【元注云郭女时御道巾野服过亲党饭颇为分台御史所诃故有此句○杜诗送客逢花可自由退之诗我云以病归此已颇自由唐人以酒量为酒户乐天诗户大嫌甜酒】世态已更千变尽心源不受一尘侵【一作险阻艰难亲得力是非忧患饱经心四十二章经断欲去爱识自心源達佛深理】青春白日无公事紫燕黄鹂俱好音【杜诗隔叶黄鹂空好音】付与儿孙知伏腊聽教鱼鸟逐飞沉【南史梁世子方等传尝着论曰吾不及鱼鸟远矣鱼鸟飞浮任其志性吾之进退尝在掌握白乐天诗双凤栖梧鱼在藻飞沉随分各逍遥】黄公垆下曾知味【晋王戎传戎尝经黄公酒垆下过顾谓後车曰吾昔与嵇叔夜阮嗣宗酣畅于此】定是逃禅入少林【杜诗醉中往往爱逃禅传灯録菩提達磨居于洛阳寓止嵩山少林寺面壁而坐】

次韵郭右曹

閱世行将老斲轮【潘安仁欢逝赋川閱水以成川水??而日度世閱人而为世人冉冉而行暮庄子行年七十而老斲轮详见答子高诗注】那能不朽见仍云【尔雅晁孙之子为仍孙仍孙之子为云孙】岁中日月又除尽【左太冲吴都赋露往霜来日月其除】圣处工夫无半分【退之感春诗惜哉此于巧言语不到圣处年非痴】秋水寒沙鱼得计【庄子云于蚁弃智于鱼得计】南山浓雾豹成文【见前注】古心自有着鞭地【退之诗孟生江海士古貌又古心着鞭见祖逖传】尺璧分陰未当勤【文子曰圣人不贵尺璧而重寸陰淮南子曰禹之趋时冠挂不顾故曰不贵尺璧而重寸陰晋陶侃语人曰大禹圣人乃惜寸陰至于衆人当惜分陰】

送杨瓘雁门省亲二首【从予学易业未成辞归】

执戟老翁年七十人看生理亦无聊草玄事业窥周易作赋声名动汉朝【杨雄事见前注本

传无执戟字文选曹子建与杨德祖书云杨子云先朝执戟之臣耳注云为郎皆执戟】今见远孙勤翰墨还持遗藁困箠瓢【见论语】三年乡校趋晨鼓【入北京郡庠也】一日边城聽夜刁【李广传不击刁斗自谓边城谓代州?门郡也】野饭盈盘厌葱韭【庄子徐无鬼篇徐无鬼见武侯武侯曰先生居山林食芋栗厌葱韭以实寡人】春风半道解狐貂【杨子举世寒貂狐不亦燠乎】归时定倒迎门屣问?安能学度辽【後汉王符传度辽将军皇甫规解官归安定乡人有以货得?门太守者亦去职还家刺谒规卧不迎既入而问卿前在郡食?美乎有顷又白王符在门规素闻符名乃惊遽而起衣不及带屣履出迎退之後汉三贤赞云皇甫度辽闻至乃惊衣不及带屣履出迎岂若?门问?呼卿】

蜀客出衰世【蜀客谓杨子云蜀人也而客于京师】独升邹鲁堂【言其学孔孟如论语所言由也升堂矣未入於室也】蚊虻观得失【扬子云蚊虻嗜肤淮南子云毁誉之于已也犹蚊虻之一过也子云于得失亦然】虎豹擅文章【易革卦九五大虎变象曰其文炳也上六君子豹变象曰其文蔚也】吾子已强学【儒行云夙夜强学以待问】草玄宜不忘江河须畎浍【书益稷禹曰予决九川距四海濬畎浍距川此言积畎浍而成江河劝其博学】松柏要冰霜马策路千里?门书数行旨甘君有妇【内则云慈以旨甘玉台新咏使君自有妇】尺璧爱分光【见前注】

次韵答张沙河【知邢州沙河县】

张侯堂堂身八尺【曾子曰堂堂乎张也汉张苍长八尺余】老大无机如汉陰【庄子曰子贡过汉陰见一丈人方将为国畔凿隧而入井抱瓮而出灌子贡曰有械于此凿木为机後重前轻挈水若抽其名为槲夫子不欲乎为圃者曰吾闻有机者必有机事有机事者必有机心吾非不知羞而不为也杜诗鹿门自此往永息汉陰机】猛摩虎牙取吞噬【法言云茅焦虽辨摩虎牙矣此语必有谓】自叹日月不照临【诗国风云日居月诸照临下土】策名日已污轩冕【左传策名委质轩冕见前注】逃去未必焚山林【琴操曰介子推为龙蛇之歌而隐文公求之不肯出乃燔木子推抱木而死魏志太祖闻阮瑀名辟之不应逃入山中太祖使人焚山得之】我评君才甚高妙孤竹截管空桑琴【汉律志黄帝使伶伦自大夏之西崑仑之陰取竹之解谷生其窍厚均者断两节间而吹之以以为黄鍾之宫周礼曰孤竹之管云和之琴瑟云门之舞又曰孤竹之管空桑之琴瑟咸池之舞杜子美朝享太庙赋空桑孤竹贵之多李太白明堂赋孤竹代奏空林和鸣】四十未曾成老翁【文选魏文帝与吴质书曰已老成翁但未白头耳老杜诗丈夫盖棺事始定公今幸未成老翁】紫髯垂颐郁森森【文帝春秋曰张辽问吴降人向有紫髯将军是谁降人答曰是孙会稽】眉宇之间见风雅【文选枚叔七发云阳气见于眉宇之间浸淫面上杜诗眉宇□天人陆士衡辨亡论风雅则诸葛瑾张承步騭以声名光国杜诗词华倾後辈风雅藹孤騫】蓝田烟雾生球琳【李商隐诗蓝田日暖玉生?司空图集云诗家之景如蓝田日暖良玉生?禹贡云厥贡惟球琳琅玕】胸中垒块正须酒【见前注】东海可揽北斗斟【诗维北有斗不可以挹酒浆楚辞九歌云援彼酒兮酌桂浆】古人已悲铜雀上不闻向时清吹音【文选吊魏武帝文曰吾媿好妓人着铜雀台月朝十五日辄向帐作技文选谢朓铜雀台诗云鬱鬱西陵树讵闻歌吹声鲍明远行路难云不见柏梁铜雀上宁闻古时清吹音铜雀台在相州相魏邻境也可见大名作】百年毁誉付

谁定取醉自可结舌瘡【取醉见前注晋段灼传云知直之不用皆杜口结舌】使公系腰印如斗【晋周顗传顾左右曰今年杀诸贼奴取金印如斗大系肘】驷马高盖驱駸駸【汉千定国传少高大门闾令容驷马高盖车诗载骤駸駸】亲朋改观婢仆敬成都男子宁异今【孟郊诗云亲朋改旧观僮仆生新敬汉萧望之传萧育杜陵男子何诣曹也】又言屋底甚悬磬【悬磬见前注】儿婚女嫁取千金【後汉向长传男女娶嫁】古来圣贤多不饱【杜诗自古圣贤多薄命】谁能独无父母心【孟子父母之心人皆有之白乐天诗遂令天下父母心不重生男重生女】衆雏墮地各有命强为百草忧春霖【佛书云朝生王子一日墮地便胜凡人传休奕乐府云男儿当门户墮地自生神前集书赠俞清老其略云男女婚嫁渠依墮地自有衣食分齐今蹙眉终日者正为百草忧春雨耳】艾封人子暗目睫与王同牀悔沾襟【艾封人子见前注史记齐使者至越曰幸也越之不亡也吾不贵其智之如目见毫毛而不见其睫也】陇鸟入笼左右啄【文选鷦鷯赋鸚鵡惠而入笼鸚鵡赋命虞人于陇坻南方异物志广管雷罗等州多鸚鵡但稍小不及陇山者杜诗陇俗轻鸚鵡原情类鵲鵲】终日思归碧山岑【韩诗过岑出寸碧】一生能几开口笑【庄子盗跖篇其中开口而笑者一月之中不过四五日而已矣乐天诗人生开口笑百年都几回】何忍更遣百虑侵【易云一致而百虑杜诗抚事煎百虑】忽投雄篇写逸兴仰占乾文动奎参【书断曰苍颉仰观奎星图合之势合而为字孝经援神契云奎主文章详见和答莘老诗注奎娄胃昂毕觜参参与奎皆西方七星故云】自陈使酒尝骂坐【汉书李布使酒难近灌夫骂坐不敬】惜予不与朋盍簪【易豫九四朋盍簪杜诗盍簪喧枥马】君才蜀锦三千丈要在刀尺成衣衾【文选郭泰机诗衣上秉刀尺弃我忽若遗】南朝例有风流癖楚地俗多词赋淫【用汉书杜预左传癖皇甫谧书淫之义言耽惑也汉赵充国等赞曰今之歌謡慷慨风流犹存耳嵇康琴赋体制风流莫不相袭沈约宋书谢灵运传论云在下祖习如风之散如水之流风流之意本自如此耳而江左诸人非独然也南史谢晦传时谢混风流为江左第一张融传云阿风风流顿尽以此推之可见当时好尚风俗相扇故曰风流癖也词赋皆祖屈宋号为楚辞故曰词赋淫法言云词人之赋丽以淫盖言其文词靡丽与此义不同】屈原离骚岂不好只今漂骨沧江浔【屈原作怀沙之赋于是怀石遂自投汨罗以死见史记本传】正令夷甫开三窟【晋王衍传衍字夷甫虽居宰辅而为自全之计乃以弟澄为荊州族弟敦为青州谓曰卿二人在外而吾留此足为三窟矣】猎以我道皆成禽【扬子云猎德而得德前集有诗云安得入丝?以道猎衆智文选张平子思玄赋结典籍以为罟兮驱儒墨以为禽取此意也】温恭忠厚神所劳【诗岂弟君子神所劳矣】于鱼得计岂厌深【见庄子又云鱼鼈不厌深】丈夫身在要勉力【退之诗学问藏之身身在则有余】岂有吾子终陆沈【庄子云方且与世违而不屑与之俱是陆沈者也】鄙人相士盖多矣【汉高祖纪臣少好相人相人多矣无如李相】勿作蔡泽笑噤吟【杨雄解嘲云蔡泽虽噤吟而笑唐举噤音巨锦反吟鱼锦反按史记蔡泽传泽从唐举相曰吾闻先生相李兑曰百日之内持国秉政有之乎唐举熟视而笑曰先生曷鼻巨肩魋颜蹙齁膝挛吾闻圣人不相殆先生乎】

送张沙河游齐鲁诸邦

张侯去沙河三食邳下麦【沙河属邢州邳今相州也用老杜一别星桥夜三移斗柄春之意】笔力望晁董【错与仲舒】颇遗俗眼白【晋阮籍传能为青白眼见礼俗之士以白眼对

之】平生学经纶胸中负奇画未论功活人【後汉长沙太守张机仲景有南阳活人书】饱饭不常得【杜老但使残年饱吃饭】妻寒尚宾敬【左传初臼季使过冀见冀缺耨其妻饁之敬相待如宾】儿饿犹笔墨侧闻共伯城【共城县属卫州】鱼稻颇宜客又持尘生甑【後汉范丹字史云间里歌之曰甑中生尘范史云釜中生鱼范莱芜】欲往立四壁【四壁见前注】平生贷米家十辈来簿责【汉娄敬传使者十辈来周亚夫传吏簿贵亚夫】囊无孔方兄【晋鲁褒钱神论曰亲爱如兄字曰孔方】面有在陈色【论语在陈絶粮】守株伺投兔【韩非子曰宋人有耕者田中有株兔走触折头而死因释耕守株冀复得兔为宋国笑】岁晚将何获广道无人行春风转沙石栖栖马如狗【论语微生畎谓孔子曰丘何为是栖栖者与後汉陈蕃传陈留朱震字伯厚三府谚曰车如鸡栖马如狗疾如风朱伯厚】去谒东侯伯布衣未可量苍髯身八尺鱼乾要斗水【得升斗之水然活矣见前注】士困易为德【孟子云饥者易为食渴者易为饮史记平原君传土方其危苦之时易德耳】譬之举大木人借一臂力【吕氏春秋云今之举大木者前呼舆譟後亦应之此其于举大木者善矣岂无郑卫之音哉然不若此其宜也淮南子曰举大木者前呼邪许後亦应之余同吕覽庄子曰吾终身与汝交一臂而失之此摘其字】诸公感意气【鲍明远诗意气相倾死何有】岂待故相识吾穷乏祖饯折柳当马策【左传文十三年绕朝赠之以策注策马挝此诗盖以张沙河往作游士山谷以诗先焉庶几诸人合力资之意气相感不必旧相识也】

和张沙河招饮

张侯耕稼不逢年【史记佞幸谚曰力田不如逢年善仕不如遇合】过午未炊儿女煎【退之诗有时未朝食得米日已晏隔墙闻譟呼衆口极鹅雁】腹里虽盈五车读【杜诗男儿须读五车书】囊中能有几钱穿【後汉赵壹传为诗曰文籍虽满腹不如一囊钱杜诗囊空恐羞澁留得一钱看】况闻緼素尚黄葛可怕雪花铺白毡【太白北风行云燕山雪花大如席老杜诗糝径杨花铺白毡】谁料丹徒布衣得【晋诸葛长民传今日欲为丹徒布衣岂可得耶】今朝忽有酒如川【左氏昭十二年穆子曰有酒如淮齐侯曰有酒如澠杜诗不有小舟能荡浆百壶那得酒如川一作泉】

同尧民游灵源庙廖献臣置酒用马陵二字赋诗二首

灵源庙前木我昔见拱把【外集删去诗中有会灵源庙下池亭诗云系马着柳堤置酒临魏城魏即北京也孟子曰拱把之桐梓注云拱合两手也把以一手把之也】七年身屡到鬱鬱?檐瓦【退之聯句云红皱晒檐瓦】春风响马衔【文选海赋云海童邀路马衔当蹊此借用以言马口衔勒也】竝轡客萧洒更愿少尹贤置酒意倾写斋头有佳处花柳轻娅姹【樽前集和凝词云娅姹含情娇不语】莲塘想旧叶稻畦识枯苴【庄子曰其土苴以治天下释文云土苴如粪草也】开关抚洪河黄流极天泻忆昔武皇来系璧沉白马从官亲土石襁负至鰥寡空余瓠子诗哀怨逼骚雅【汉沟洫志云孝武元光中河决于瓠子东南注钜野发卒数万人塞瓠子决河于是上以用事万里沙还自临决河湛白马玉璧令群臣从官自将军以下皆负薪寘决河上既临河决悼功之不成廼作歌曰瓠子决兮将奈何云云】白圭自圣禹今谁定真假【孟子云白圭曰丹之治水也愈於禹孟子曰子过矣禹之治水云云退之诗古声

久埋灭无由见真滥】晁子发说言【文选东都赋说言弘说注美言也音党汉书叙传上曰吾久不见班生今日复闻说言注善言也】圣功谅难亚排河着地中势必千里下移民就宽闲何地不耕稼此论似太高【张释之传卑之无甚高论】吾亦茫取舍有器可深川吾未之学也【论语军旅之事未之学也沟洫志云贾让奏言治河有上中下策今行上策徙冀州之民当水冲者决黎阳遮害亭放河入海河西薄太山东薄金堤势不能远泛滥晷月自定今濒河十郡治堤岁费且万万及其大决所残无数如出数年治河之费以业所徙之民且以大汉方制万里岂其与水争咫尺之地哉此功一立河定民安千载无患故谓之上策禹贡随山濬川注谓深其流此语盖指时事按实录且参以诸书其大要云元丰元年知制诰熊本分司西京判大名府文彦博放罪初选人李公义诸为铁龙爪内侍黄怀信以为未尽更作濬川杷谓禹所用濬川者也时王安石为相信其说乃置濬川司以都水监丞范子渊制之既而子渊奏功未赏乃言疏导水势悉归故道出民田数万顷朝廷下大名府保奏文彦博言小臣兴利诬罔诏本行视坐附会彦博报不以寔故谪】洪河壮观游【观游见前注】太府佳友朋春色挽我出东风如引?【退之张中丞传後叙云引?而?之其絶必有处】昏昏版筑气【退之诗海气昏昏水拍天孟子曰传说举于版筑之间】王事始繁兴大堤如连山【退之诗花艳大堤倡】小堤如冈陵【诗如冈如陵】增卑更培薄【贾让又云若乃缮完故堤增卑培薄劳费无已此最下策也】万杵何登登【诗筑之登登】忆昨河失道【前汉沟洫志王横言九河之地已为海所渐周普云定王三年河徙则今所行非禹之所穿也】平原鱼可罾【汉陈胜传罾人所罾鱼腹中退之诗有蛟寒可罾】田莱人未复【诗楚茨序云田莱多荒注云田废生草曰莱】疮大国方惩忽念耒耜闲为民保邱塍百县伐鼙出【周礼鼓人以鼙鼓鼓役事】夜半废曲肱【论语曲肱而枕之】吾侪愧禄廩游衍事鞍乘【游衍见前注】晁子汉公孙新去司马丞出干大农部【汉食货志桑弘羊请置大农部丞数十人分部主郡国】才术见嗟称【鲍明远白头吟云周王曰沦惑汉帝益嗟称】我坐广文舍七年读书灯结髮入塲屋【汉李庸传广曰臣结髮而与匈奴战】肯谓河难凭【论语暴虎凭河】尔来触事短【韩诗触事苦难办又云触事得谗谤】痴甚霜前蝇【退之诗痴如遇寒蝇】世味极淡薄【退之诗我老世味薄】不了人爱憎惟得一卮酒尚能别淄澠【淮南子曰淄澠之水合易牙口而知之列子亦云水经曰淄水出泰山莱芜县原山澠水出营邱城东世谓之汉湊水入干时水】所以对樽俎未曾闻斗升【杜诗仍嗔问斗升】酌我良已多狂言恐侵陵【汉盖宽饶传许伯入第丞相御史将军中二千石皆贺宽饶不行许伯请之乃往许伯自酌曰盖君後至宽饶曰无多酌我我廼酒狂丞相魏侯笑曰次公醒而狂何必酒也礼记经解倍畔侵凌之败起矣汉李广传广三子曰当户椒敢敢男禹与侍中贵人饮侵陵之莫敢应】暮云吞落日归鸟求其朋【小雅伐木云嚶其鸣矣求其友声】冷官仆马瘦及门鼓腾腾【杜诗广文先生官独冷退之诗擊鼓腾腾树赤旗】

八音歌赠晁尧民【往长与尧民论出处之致未竟故终言之○诗苑类格云陈沈炯为此体秦少游集中輿黄鲁直简云李端叔过此斗野诗八音二十八舍歌皆和了今録其副寄上可见此诗与斗野亭诗相先後耳】

金生寒沙中见别会有时【渊明咏兰云清风脱然至见别萧艾中】石上千年柏【退之诗柏生两石间万岁终不大】材高用苦迟【杜诗古来材高难为用】丝乱犹可理【杜诗待

君乱丝为君理】心乱不可治竹斋闻履声【汉郑崇传我识郑尚书履声】迺是故人来【古诗开门风动竹疑是故人来】匏苦只多叶水深难为涉【邶国风匏有苦叶济有深滩深则厉浅则揭】土牀不安席象牀卧煜煜【战国策孟尝君至楚楚献象牀】革与井同功【井革二卦相连井言不改革言革而当虽若异而实同功】守道非关怯【非关见前注左传守道非如守官】木直常先伐【庄子山木篇直木先伐甘井先竭子其饰知以惊愚修身以明污昭昭乎如揭日月而行故不免也李白诗直木忌先伐芬兰哀自焚】樗栎万世叶【樗栎见前注颜延年曲水诗序固万叶而为量也柳子厚贺皇太子賸万叶固本叶世也】

八音歌赠晁尧民

金荷酌美酒【李适之有酒器九品有慢卷荷金焦叶出逢原记欧公诗萧条两鬓霜後草湫澦十分金卷荷山谷在戎州作长短句云共倒金荷其序云以金荷叶酌客】夫子莫留残【庾诗诗饮酒那得留残】石有补天材【列子天地亦物也物有不足故女娲鍊五色石以补其缺】虎豹守九关【楚词招魂云虎豹九关啄害下人】丝窠将柳花【退之聯句云丝窠扫还成】入户扑衣冠竹风摇永日思与子盘桓【归去来辞抚孤松而盘桓】匏瓜岂无匹【洛神赋叹匏瓜之无匹咏牵牛之独处注云史记曰四星在危南匏瓜牵牛为牺牲其北织女阮瑀止欲赋曰伤匏瓜之无匹悲织女之独勤俱有此言然无匹之义未详其始】自古同心难【易系词同心之言其臭如兰】革急而韦缓【韩非子云西门豹之性急故佩韦以缓已革乃皮之未熟者也】只在揉化间【揉而九反又音柔见考工记】木桃终报汝药石理予颜【卫国风投我以木桃报之以琼瑶○原阙土字韵一聯按别本自古同心难下一聯云土硬非道器要君斲鼻端始足八音】

次韵师厚五月十六日视田悼李彦深【元注云彦深去年五月十三日与之游西郊】

南雁传尺素【尺素见前注】飞来卧龙城【卧龙洲当在南阳谢师厚南阳人今邓州也彦深亦南阳人同乡里可见卧龙洲之为南阳也】颇知高卧久忽作田野行湛湛陂水满欣欣原草荣【归去来辞木欣欣以向荣泉涓涓而始流】日华丽山川【杜诗迟日江山丽】秀色夺目精【高唐赋煌煌荧荧夺人目精神女赋详而视之夺人目精】对酒不满怀揽物有余清【文选陆士衡诗安寝北堂上明月入我牖照之有余晖揽之不盈手谢灵运诗密林含余清】念昔读书客远人遗世情南亩道观饷西郊留劝耕共游如昨日笑语絶平生此士今已矣宾筵无老成【诗宾之初筵左右秩秩退之祭文甑石之储常空于私室方丈之食每盛于宾筵】犹倚谢安石深心抚嫠嫠【以安石比师厚嫠谓无夫也左传嫠不恤其纬嫠也何害已为嫠妇韵书嫠忧也】

次韵晁补之廖正一赠答诗【按晁无咎集云及第东来将赴调寄李成季又云复用前韵答明略并呈鲁直按登科记已未元丰二年晁补之廖正一同榜晁字无咎廖字明略无咎集中又有建除体诗答鲁直教授时教授北京也】

晁子抱材耕谷口【见前注】世有高贤践台斗【杜诗及乎贞观初尚书践台斗】顷随计

吏西入关【汉朱买臣随上计吏为卒将重车至长安】关夫数日传车还【汉终军传初军从济南当诣博士步入关关吏予军繻曰为复传军曰大丈夫西游终不复传还退之诗屈指数日怜婴孩字本出左传行则数日而反】封侯半属妄校尉射虎猛将犹行间【李广传广与王朔语曰自汉击匈奴广未尝不在其中而妄校尉以下材能不及中以军功取侯者数十人广不为後人然终无尺寸功以得封邑何也广出猎见草中石以为虎而射之中石没矢视之石也汉吴王濞传诸宾客皆得为将校尉行间侯司马师古曰在行伍间或为侯或为司马也濞传又曰周立者说王曰臣以无能不得待罪行间】无因自致青云上【史记范雎传须贾曰不意君能自致于青云之上谢灵运诗托身青云上】浪说诸公见嗟赏【张文潜志无咎之墓云年十三从王安国于常州学官安国名重天下一见公大奇之公从皇考于杭之新城作七述今端明苏公轼通判杭州读之叹曰吾可以阁笔臭延誉公如不及由此名籍甚】骥伏盐车不称情【贾谊吊屈原赋曰骥垂两耳服盐车兮】轻裘肥马凤凰城【裘马见论语凤凰城谓汴京也杜甫送覃二判官饯尔白头日永怀丹凤城赵彦材注指言长安帝城也刘梦得诗南山宿雨情春入凤凰城此言长安也建中靖国初陈无已在馆中和谢公定两行逢卖花云得知春入凤凰城可见指帝城矣盖两人方赐第归来也临安虽有凤凰山赵清猷诗云老来重守凤凰城然与此不相涉前集诗亦借长安以言汴京】归来作诗谢同列句与桃李争春荣【後汉杨修书华若春荣曹子建书煜若春荣穆若清风】十年山林廖居士今随诏书称举子文章宏丽学西京新有诗声似侯喜【退之石鼎联句序云侯喜新有能诗声】君不见古来良为知音难絶弦不为时人弹【後汉景丹传何意二郡良为我来此摘其字絶弦见前注】已喜琼枝在我侧【楚词折琼枝以继佩晋卫玠传珠玉在侧觉我形秽】更恨桂树无由攀【淮南小山云桂树丛生兮山之幽偃蹇连蜷兮枝相绕攀援桂枝兮聊淹留】千里风期初不隔【骆宾王书官守牵纆风期有限杜诗风期终破浪】独怜形迹滞河山【陶潜诗情通万里外形迹滞江山】

再次韵呈廖明略

吾观三江五湖口【周礼职方氏扬州其川三江其浸五湖江赋注江水注入五湖灌于三江】汤汤谁能议升斗【尧典汤汤洪水方割庄子外物篇鲋鱼对曰君岂有升斗之水而活我哉】物诚有之士则然【司马相如谏猎书曰人诚有之兽亦宜然】晚得廖子喜往还学如云梦吞八九【子虚赋吞若云梦者八九】文若壮士开黄间【李广传自以大黄射其裨将注黄肩弩也黄肩即黄间大黄其大者也】十年呻吟江湖上【庄子杂篇列御寇郑人□也呻吟裘氏之地】青枫白鸥付心赏【选诗心赏犹难恃又云怀人去心赏】未减北郭汉先生五府交书不到城【元注云汉汝南廖扶按本传州郡公府辟召皆不应时人号为北郭先生】相者举肥骥空老【宋玉九辨云今之相者兮举肥史记滑稽传谚曰相马失之瘦相士失之贫】山中无人桂自荣【楚词丽桂树之冬荣淮南王招隐词桂树丛兮山之幽】君既不能如锺世美匭函上书动天子【按寔録元丰元年十一月乙酉太学生锺世美为试校书郎陆州军事推官太学正以内舍生上书称旨故也又按续通监长编云或刻世美书印卖上批世美所论有经制四夷等事传播非便令开封府禁之又按九朝通略云元丰二年先是太学生宣城锺世美欲上辟雍图会得段归宁既还而新学已成因再上书论学校云云又言前二府大臣见干政事其德弥助而道义足为後学之师者孰若以提举太学今乃使之退托于

山林无用之地良为可惜世美所谓大臣盖指王安石也其後擢世美为中书习学公事又按党事始末云建中靖国元年九月乙未诏中书省开具元符三年臣僚姓名正上六人锺世美为首又云庚子中书省检会元符三年宣德郎提举福建路常平锺世美应诏上书言当复宁元丰绍圣政事以销天变可赠谏议大夫兴一子郊社斋郎锺世美何足言山谷诗盖戏语也正堪一笑耳而当时用事者之所升黜实系国之兴替不可不记也辟书所记始末皆不记故具列于此按唐武后垂拱三年三月铸铜为匱置之朝堂以受天下表疏退之诗匱函朝出开明光】且向华陰郡下作参军要令公怒令公喜【晋郗超传桓温辟为掾时王珣为温主簿皆为温所重府中诗曰髯参军短主簿能令公喜能令公怒超髯珣短故也】君不见晁家乐府可管弦【前集诗云晁子庙中雅歌自注云无咎乐府于今第一】惜无倾城为一弹【汉李夫人传歌曰北方有佳人絶世而独立一顾倾人城再顾倾人国】从军补掾百僚底【老杜诗有材无命百僚底】九关虎豹何由攀【见前注】男儿身健事未定且莫着书藏名山【杜诗男儿功名遂亦在老大时又云丈夫盖棺事始定白乐天诗且到来岁期不知身健否司马迁书云着书藏之名山传之其人】走答明略适尧民来相约奉谒故篇末及之

君不见生不愿为牛後宁为鸡口【战国策苏秦说韩王云鄙语曰宁为鸡口不为牛後今西面交臂而事秦何异于牛後乎】吾闻向来得道人终古不忒如维斗【考工记则于马终古登阤也注云终古犹言常也庄子云维斗得之终古之忒】希价咸阳诸少年【史记吕不韦传不韦着吕氏春秋布咸阳市门县千金其上有能增损一字者与千金】可推令往挽令还【异乎汲黯招之不来麾之不去也管子书云推之而往引之而来邓攸去郡吴人歌曰邓侯挽不来谢令推不去】俗学风波能自拔【庄子云俗学以求复其初】我识廖侯眉宇间【唐元德秀传见紫芝眉宇使人名利之心都尽庄子云老子谓南荣□曰吾见汝眉睫之间吾因以得汝矣】省庭无人与争长【左传隐十一年滕侯薛侯来朝争长杜诗陈留阮瑀谁争长】主司得之如受赏【太白送人赴选诗云夫子有盛材主司得球琳萧何传进贤受上赏】东家一笑市尽倾略无下蔡与阳城【文选宋玉赋登徒子云臣望之美者莫若臣东家之子嫣然一笑惑阳城廷下秦倾城见前注汉司马相如传一坐尽倾阮嗣宗未怀诗倾城廷下蔡】生珠之水砂砾润生玉之山草木荣【荀子曰玉在山而木润渊生珠而岸不枯陆机文赋云石韞玉而山辉水怀珠而川媚】观君词章亦如此谅知躬行有如子【论语躬行君子则吾未之有得】更约探囊閱旧文【庄子云肱篋探囊】蛛丝灯花助我喜【西京杂记蜘蛛集而百事喜杜诗灯花何太喜退之灯花诗更烦将喜事来报主人翁卢仝诗一片新茶破鼻香请君连来助我喜】贤乐堂前竹影斑好鸟自语莫令弹【退之竹迳诗无尘从不扫有鸟莫令弹】北邻着作相劳苦【汉张耳传劳苦如平生欢】整驾谒子邀同攀【汉王式传歌骊驹注云逸诗篇名客欲去歌之其词曰骊驹在路仆夫整驾】应烦下榻煮茶药【文选沈休文诗宾至下尘榻王勃滕王阁序云徐穉下陈蕃之榻事见後汉徐穉传】坐待月轮衔屋山【退之诗每骑屋山下窥瞰】

答明略并寄无咎

可以忘忧惟有酒【汉东方朔传销忧者莫如酒晋顾荣传尝纵酒酣畅曰惟酒可以忘忧但无如作病何耳】清圣浊贤皆可口【三国徐邈传平时醉客谓酒清者为圣人浊者为贤人】

庄子云其犹枵梨橘柚耶其味相反而皆可于口】得日过君饮不多明日解醒无五斗【晋刘伶传一饮一石五斗解醒】古木清?丹井栏【太白诗络纬秋啼金井栏】夜来凉月屋头还论文拨置形骸外【渊明诗拨置且莫念一觴聊可挥庄子云申屠嘉兀者也而与郑子产同师于伯昏无人申屠嘉曰今子与我游于形骸之内而子索我于形骸之外不亦过乎杜诗相从歌万事尽付形骸外】得意相忘樽俎间冰壶不可与夏虫飧【庄子秋水篇夏虫不可以语于冰者笃于时也】秋月不可与俗士赏已得樽前两友生更思一士济阳城虽无四至九卿之规画【汲黯传黯姊子司马安善宦四至九卿】犹有千秋万岁之真荣【渊明挽诗千秋万岁後谁知荣与辱杜诗千秋万岁名寂寞身後事】空名未食太仓米【史记平準书太仓之粟陈陈】今作斑衣老莱子【斑衣见前注】卿家嗣宗望尔来不独我闻足音喜【晋阮籍字嗣宗以况尧民尧民盖无咎诸父行如嗣宗之于阮咸也故其诗云已得樽前两友生更思一士济阳城两生谓尧民明略而无咎时在济州济州其所居也号济阳郡足音跫然见前注】西风索寞叶初乾【退之秋怀诗霜风侵梧桐衆叶着树乾】长铗归来亦罢弹【史记孟尝君传冯驩弹其劔而歌曰长铗归来乎食无鱼】穷巷蓬蒿深一尺【王褒贤臣颂生于穷巷之中长于蓬茨之下蓬蒿绕宅见前注】朱门廉陛高难攀【贾谊传故陛九级上廉远地则堂高陛亡级廉近地则堂卑】吾侪相逢置是事百世之下仰高山【诗云高山仰止李白赠孟浩然诗高山安可仰徒此揖清芬】

再次韵呈明略并寄无咎

夏云凉生土囊口【陶潜诗夏云多奇峯宋玉风赋盛怒于土囊之口】周鼎汤盘见科斗【礼记有汤之盘铭卫孔悝之鼎铭左传有正考父鼎铭尚书序云皆科斗文字韩诗字青石赤形摹奇科斗拳身薤叶垂】清风古气满眼前乃是户曹报章还只今书生无此语已在贞元元和间【韩愈赞贞元元和间愈遂以六经之文为请愈倡真宗谓王旦曰杨亿文章有贞元元和风格】一夫鄂鄂独无望千夫唯唯皆论赏【商鞅传赵良曰千羊之皮不如一狐之腋千人之诺诺不如一士之谔谔赵世家简子曰吾闻千羊之皮不如一狐之腋诸大夫朝徒闻唯唯不闻周舍之鄂鄂是以忧也】野人泣血漫相明和氏之璧无连城【和氏之璧见前注连城见蔺相如传魏文帝与锺大理书不损连城之价韩诗自许连城价】参军挂笏看云气【晋王徽之传为车骑桓冲骑兵参军冲谓曰卿在府日久比当相料理徽之高视以手板挂颊云西山朝来致有爽气耳】此中安知枯与荣我梦浮天波万里【木华海赋浮天无岸】扁舟去作鸱夷子【史记范蠡浮海自谓鸱夷子皮】两土风流对酒樽四无人声鸟语喜【退之诗霜操云四无人声谁与儿语】梦回扰扰仍世间心如伤弓怯虚弹【战国策曰有鴈从东方来更羸虚发而雁下魏王曰射可至此乎更羸曰其飞徐其鸣悲飞徐者故疮痛也鸣悲者失群也故闻弦音而下】不堪市井逐乾没【乾没见张汤传】且愿朋旧相追攀寄声小掾笃行李落日东面空云山【赵广汉传云亭长寄声谢我鲍照诗愿尔笃行李】

再答明略二首

挟策读书计糊口【庄子问臧奚事则挟策读书左传使餬其口于四方】故人南箕与北斗【诗维南有箕维北有斗言离别】江南江北万重山【文选谢灵运诗江南倦历覽江北旷

周旋】千里寄书声不还当时朱弦写心曲果在高山深水间【礼记清庙之瑟朱弦而疏越文选诗直如朱丝弦国风乱我心曲高山流水见前注】枯桐满腹生蛛网【白乐天诗书牀鸣蟋蟀琴匣网蜘蛛】忍向时人觅清赏【山谷律诗有云忽向时人觅赏音】廖侯文字得我惊五岳纵横守严城【李白诗气酣落笔摇五岳皮日休诗五岳为词锋】万夫之下不称屈【箫何传夫能屈于一人之下而信于万乘之上此借使其字白乐天诗暂留书殿多称屈】定知名满四海非真荣富于春秋已如此【赵高说秦二世曰陛下富于春秋曹参传悼惠王富于春秋高五王传皇帝春秋富】他日卜邻长儿子【杜诗王翰愿卜邻】一邱各自有林泉扶将白头亲燕喜【扶将见前注诗称燕喜者再山谷所引盖鲁颂所谓鲁侯燕喜令妻壽母也】秋风日暮衣裳单【乐天诗如何为不念马瘦衣裳单】深巷落叶已如弹数来会面复能几六龙去人不可攀【文选郭景纯游仙诗六龙安可顿运流有代谢注曰六龙日驾也李善曰楚词云贯鸿蒙以东竭兮维六龙于扶桑王逸曰结轡于扶桑以留日曹子建与吴季重书云思抑六龙之首损羲和之轡李白短歌行吾欲揽六龙□车挂扶桑】短歌溷公更一和聊乞淮南作小山【楚词有刘安招隐士一首王逸注云淮南小山之所作也】廖侯言如不出口【礼檀弓云赵文子其中退然如不胜衣其言呐呐然如不出诸其口汉张释之曰绛侯东阳侯此两人言事曾不能出口】铨量古今胆如斗【庄子铨才讽说之士音义云铨七全切铨量人也蜀志姜维胆大如斗】度越崔张与二班【崔张谓崔瑗张衡二班谓彪与固也扬雄赞云则必度越诸子矣】古风萧萧笔追还前日辞家来射策【退之短檠歌太学儒生东鲁客二十辞家来射策】声名藉甚诸公间【陆贾传声名藉甚晁错传後邓公其子章显诸公间】华陰白云锁千嶂胜日一谈谁能赏【晋卫玠传遇有胜日亲友时请一言无不咨嗟以为入微】君不见曩时子产识然明【左传襄二十五年晋程郑卒子产始知然明注前年然明谓程郑将死】知音鬱鬱闭佳城【西京杂记滕公驾至东都门马以足跑地得石椁铭曰佳城鬱鬱三千年见白曰吁嗟滕公居此室】勿以匣中之明月计较粪上之朝荣【汉邹阳传明月之珠夜光之璧朝荣谓朝菌也庄子音义云朝菌天陰生粪上见日则死文选乐府王明君辞昔为匣中玉今为粪上英】我去丘园十年矣种桑可蚕犊生子使年七十今中半【山谷年二十三治平丁未擢进士第至熙宁丁巳七十将半矣寒山子诗养得三犊牛生得五犊子犊子又生儿积数无穷已】安能朝四暮三浪忧喜【庄子狙公赋茅曰朝三而暮四衆狙皆怒曰然则朝四而暮三衆狙皆悦】据席谈经只强顏不安时论取讥弹【文选曹子建与杨德祖书仆尝好人讥弹其文有不善者应时改定】爱君草木同臭味颇似瓜葛相依攀【左传襄八年季武子曰今譬于草木寡君在君君之臭味也又二十二年郑公孙侨对曰谓我敝邑还在晋国譬诸草木吾臭味也瓜葛见前注】我有仙方煮白石何时期君蓝田山【神仙传白石先生常煮白石为粮韦应物诗涧底束荆薪归来煮白石杜诗云未试囊中餐玉法明朝且入蓝田山季预居长安每羨古人餐玉之法躬往蓝田攻掘得若环璧杂器形者百余椎为屑日服食之见魏书李先传後】

次韵无咎阎子常携琴入村

达士寒饿古犹今【列子曰五情好恶古犹今也四体安危古犹今也世事苦乐古犹今也变易治乱古犹今也】向来亦有子桑琴【庄子云子舆与子桑友淋雨十日子舆曰子桑殆病矣裹饭而往食之至子桑之门则若歌若哭鼓琴曰父耶母耶天乎人乎有不任其声】倚檻

嘯歌非寓淫【列女传曰鲁漆室女倚柱而嘯鄙人妇曰子欲嫁乎女曰吾忧鲁君老而太子少也】伯牙山高水深深【见前注】万世丘垄一知音阎君七弦抱幽独【抱独见前注】晁子为之梁父吟【梁父吟云步出城东门遥望荡阴里里中有三坟累累正相似问是谁家坟田疆古冶氏力能排南山文可绝地纪一朝被谗言二桃杀三士谁能为此谋国相齐晏子尝见山谷写此诗且跋云陈寿叙武侯躬耕陇亩好为梁父吟语势既不尽其意谓又失载此诗此盖好简之过余观武侯此诗乃以曹公专国杀杨修孔融荀彧耳既作此诗时时为客歌之故云尔乎杜诗不阻蓬荜兴得兼梁父吟李太白诗予亦南阳子时为梁父吟】天寒络纬悲向壁【李白诗络纬秋啼金井栏微霜凄凄簟色寒谓蟋蟀居壁也蟋蟀一名络纬见炙毂子杂录】秋高风露声入林【韩退之诗风露气入秋堂凉】冷丝枯木拂朱网【见前注】十指乃能写人心村村系鼓如鸣鼙【李斯书云建翠凤之旗树灵鼙之鼓上林赋建翠华之旗树灵鼙之鼓】豆田见角谷成螺【许表民诗畦中红豆半垂角晋石崇及卫瓘传皆言饭化为螺此借用以言谷成穀也】岁丰寒士亦把酒满眼飮餽梨枣多【退之诗飮餽鱼菜瞻】晁家公子屡经过笑谈与世殊白科【退之石鼓歌为我度量掘白科】文章落落映晁董【左太冲咏史落落穷巷士杜甫元使君春陵序得结辈十数公落落然参错天下晁错董仲舒】语句往往妙陰何【陰铿何逊也杜诗颇学陰何苦用心】阎夫子勿谓知人难使琴抑怨久不和明光画开九门肃【汉武帝太初四年?明光宫师古曰三辅黄图云在城中老杜诗汝翁草光明】不令高才牛下歌【琴操曰甯戚饭牛车下叩牛角而商歌曰南山矸白石烂生不逢尧与舜禅短布单衣才至豳长夜漫漫何时旦齐桓公闻之举以为相】

定交诗二首效鲍明远体呈晁无咎【以建除满平定执破危成收开闭十二字冠为句首○建除体入音歌二十八宿歌皆北京教授时作已见前注李淑诗苑类格云鲍照为此体十二韵】

建酉金为政【谓八月左传云今日之事我为政】摇落草木衰【宋玉九辨萧瑟兮草木摇落而变衰】除瓜陇亩净邵平无米炊【见前注】满家色藜藿【春秋外传云始见夫子有菜色今有刍豢之色】诗书不凋饥平生晁公子正用此时来【後汉刘玄传正用此时持事来乎】定交无一物秋月以为期【诗氓将子无怒秋以为期】执持荆山璧【即和氏之玉】要我雕琢之破斧不能柯【邠风有破斧伐柯二柯】况乃玉无疵危冠论百揆【舜典纳于百揆百揆时叙】备乐奏四时成功彼有命用舍君自知收身渺江湖【退之诗收身归閤东期不到死迷】岁时白鸟嬉【列子海上有人从鸥鸟游】开径蒲葦中【江淹拟渊明诗开径望三益】倚锄望君归闭塞乃非道不才当尔为【月令闭塞而成冬诗意谓深闭固拒而不出非道也顾我不才自当如此耳文选王仲宣诗惜哉空尔为】建鼓求亡子【庄子大道篇又何偈偈乎揭仁义若击鼓而求亡子焉天运篇又奚杰然若负建鼓而求亡子者耶】原非入耳歌【李陵答苏武书云左右之人见陵如此以为不入耳之欢退之秋怀诗夜半偏入耳】除去绿绮尘【绿绮琴见放言注】水深山峩峩【伯牙钟期事见前注】满堂悦秦声【史记李斯上书曰击瓮叩缶弹箏搏髀而歌呼呜呜者真秦之声也汉杨惲传报孙会宗书曰家本秦也能为秦声仰天拊缶而呼呜呜】君独用此何平分感秋节【宋玉九辩云皇天平分四时兮窃独悲此凛秋】空阔湛金波【汉礼乐志歌词云月穆穆以金波谢眺诗金波丽鵷鹊】定夜百虫息高论听悬河【晋郭象传王衍云听象语如悬河泻水注而不竭韩

文公石鼓歌愿借辨口如悬河】执揽北斗柄斟酌四时和【汉天文志北斗建四时】破屋仰见星【神仙董奉传大旱县令见董君求雨君曰雨易耳贫家屋皆见天如何令曰祈雨当为架屋乃运竹木起屋成是夜大雨】得子喜且多危柱无安弦【柳子厚文云心怵怵若危柱之弦】野水自盈科【盈科而後进见孟子】成道在礼乐成山在丘阿收此桑榆景【後汉凭异传失之东隅收之桑榆东观记收之桑榆】相从寄琢磨【诗云如切如磋如琢如磨】开怀溟海阔百怪出蛟鼉【杜诗蛟鼉好为崇】闭藏愿自爱【月令云以助天地之闭藏】惊人取谴诃【一鸣惊人见史记谴诃及细微见汉薛宣传】

赠无咎八音？

金马避世客谈谐玩汉朝【史记滑稽传褚先生曰东方生名朔酒酣据地歌曰陆沈于俗避世金马门汉书朔赞云应谐似优又云依隐玩世】石门抱关人长往闭寂寥【论语宪问篇子路宿于石门晨门曰奚自子路曰自孔氏曰是知其不可而为之者与注云晨门阍人萧望之传不肯碌碌反抱关为後汉逸民传长往之轨未殊杜诗知君此计成长往】丝虫日夜织劳苦则以食【符子曰公子重耳游于大泽之中见蜘蛛布网曳?执豸而食之顾舅犯曰此虫也德薄□而犹役其智】竹生罹斧斤高林乃其贼匏樽酌吾子虽陋意不浅土德贵重迟水德贵深远革能谈鲲鹏晚乃得庄周【列子汤问篇言殷汤问干夏革大槩皆语怪也庄子首篇云汤之问棘也是已穷髮之北有冥海者天池也有鱼焉其广数千里其名为鲲有鸟焉其名为鹏背若太山翼若垂天之云诗意味先有夏革之言而後庄周有鲲鹏之论棘即革也】木雁两不居相期无待游【庄子曰山中之木以不材得终其天年主人之雁以不材死庄子逍遥篇列子御风而行泠然善也此虽免乎行犹有所待者也若夫乘天地之正而御六气之和彼且乌乎待哉】

二十八宿歌赠别无咎【类格不言二十八宿谁为此体得非始于山谷耶】

虎剥文章犀解角【文子曰虎豹之文来射猿狖之捷来格犀亦有文战国策张仪说楚云猷骇鸡之犀】食未下亢奇祸作【娄敬传与人鬪不搯其亢拊其背注亢喉咙也音刚】药材根氏罹斲掘【蟠木根柢见邹阳传】蜜虫夺房抱饥渴有心无心材慧死人言不如龟曳尾【庄子秋水篇楚有神龟死已三千岁臭王巾笥而藏之此龟者宁其死为留骨而贵乎宁其生而曳尾于涂中乎】卫平哆口无南箕斗柄指日江使噫【史记龟策传江使神龟于河至于泉阳渔者豫且得之龟见梦于宋元王曰我为江使而豫且得我元王召博士卫平而问之平曰南风新至江使先来斗柄指日使者当囚退之诗我生之辰月宿南斗牛奋其角箕张其口言卫平张口如箕也小雅卷伯哆兮侈兮成是南箕注哆大貌昌者反】狐腋牛衣同一爨【世家简子曰千羊之皮不如一狐之腋汉王章传疾病无被卧牛衣之中】高丘无女甘独宿【离骚经忽反顾以流涕兮哀高丘之无女】虚名挽人受实祸累棊既危安处我【荀息累十二棊子加九卵于上晋平公曰危哉见魏都赋注】室中凝尘散髮坐【唐杨绾凝尘满席文选张茂先诗云散髮重陰下注遗鍾会遗荣赋云散髮拍簪】四壁蠹蠹见天下奎蹄曲隈取脂泽【庄子徐无鬼篇有濡需者豕蝨也奎蹄曲隈乳间股脚以自为安室利处】娄猪艾豕彼何择【左传既定尔娄猪盍归吾艾豕】倾肠倒胃得相知贯日食昂然不疑【汉邹

阳书昔荆轲慕燕丹之义白虹贯日太子畏之卫先生为秦画长平之策太白食昴昭王疑之李太白诗太白夜食昴长虹日中贯】古来毕命黄金台【曹子建表云量能而受爵者毕命之臣也文选放歌行将起金黄台注云上谷郡图经曰黄金台易水东南十八里燕昭王置千金于台上以延天下之士杜诗未怪及时年少子扬眉结义黄金台李白诗酒扫黄金台招邀青云上】佩君一言等觚觿【尔雅二曰灵龟注即今觚觿龟也】月没参横惜相违【柳子厚龙城録开皇中赵师雄迁罗浮天寒曰暮憇于松间酒肆见一女子淡妆素服出迓师雄与醉饮共寝但觉风寒相袭起视乃在大梅花树下月落参横但惆怅而已】秋风金井梧桐落【太白诗梧桐落金井一叶飞银牀又曰金井?梧桐】故人过半在鬼録【文选魏文帝书徐陈应刘一时俱逝观其姓名已为鬼録】柳枝赠君当马策【见前注】岁晏星回观盛德【月令星回于天岁且更始】张弓射雉武且力【晋陆云传荀隐字鸣鹤与云会张华坐抗手曰云间陆士龙荀曰日下荀鸣鹤云又曰既闻青云覩白雉何不张尔弓挟尔矢隐曰本谓是云龙騊駼乃是山鹿野麋兽微弩强是以发迟华大笑】白鸥之翼没江波【杜诗白鹭没浩荡】抽弦去轸君谓何【韩诗外传孔子南游有处子佩璚而浣者孔子抽琴去其轸以授子贡曰善为之词云云】

山谷外集诗注卷六

山谷外集诗注卷七

<集部,别集类,北宋建隆至靖康,山谷外集诗注>

钦定四库全书

山谷外集诗注卷七

宋 黄庭坚 撰

史 容 注

林为之送笔戏赠

阎生作三副规摹宣城葛【三副栗尾枣核散卓皆笔名宣州诸葛氏能作笔柳公权求之不能用惟王右军能用之故世有曰非右军不能用诸葛笔也东坡云宣城诸葛氏笔擅天下其间不甚佳者终有家法如北苑茶内库酒教坊乐虽弊精神欲强学之而草野气终不可脱山谷尝言宣城诸葛三副笔锋虽尽而心故圆】外貌虽铄泽毫心或麤粦【尔雅絶泽谓之铄注云美金光泽也蜀志张裔传张府君知瓠壶外虽泽而内实麤杜诗百年麤粦腐儒餐】功将希栗尾拙乃成枣核李庆缚散卓【东坡云散卓笔惟诸葛能之他人学者皆得其形似而无其法反不如常笔】含墨能不泄【退之毛颖传颖为人强记无不爱重又善随人意後虽见废弃终默不泄】病在惜白毫往往半巧拙小字亦周旋大字难曲折时时一毛乱乃似逆梳髮张鼎徒有表【明皇杂録上欲相苏頲夜艾召直宿舍人萧蒿草诏既成其词曰国之瓊宝上曰頲瓊之子不欲斥其父名当为刊削久之复进惟改曰国之珍宝上擲其草曰虚有其表耳此借喻也】徐偃元无骨【後汉东夷传注云徐君宫人娠而生卵弃之有犬名鹄仓衔卵以归遂生小儿生而偃因以为名尸子曰偃王有筋而无骨故曰偃东坡云鲁直出衆工笔使仆历试笔锋如着盐曲蟾诘曲纸上鲁直曰此徐偃笔也有筋无骨可谓名不虚得如东坡之言则徐偃有筋无骨非独山谷借喻亦当时固有此语耶】樵画记姓名【项籍传书足记姓名而已】亦可应仓卒为之街南居时通铃下谒【晋羊祜传铃间之下侍卫不过数人杨方传初为郡铃下威仪】晴轩坐风凉怪我把枯笔开囊扑蠹鱼遣奴送一束洗砚磨松煤挥洒至日没蚤年学屠龙【庄子朱□漫学屠龙子支离益殫千金之家技成无所用其巧温庭筠诗虎拙休言画龙稀莫学屠】适用固疎阔【自言所学不同流俗若屠龙之技无所用之如退之书云凡所辛苦而仅有之者皆符于空言而不适于实用故学成而道益穷年老而身愈困也】广文困蠶盐【唐增国子学置广文馆以郑?为博士山谷时为大名府国子监教授故以自况退之送穷文云太学四年朝蠶暮盐】烹茶对秋月略无人问字况有客投辖【扬雄传刘棻常从雄学作奇字陈遵传遵嗜酒每大饮宾客满堂辄关门取客车辖投井中虽有急不得去杜诗甘从投辖饮肯作置书邮】文章寄呻吟讲授费颊舌【颊舌见前注】闲无用心处雌黄到笔墨【晋王衍传世号口中雌黄】时不与人游【即岁不我与也】孔子尚爱日【扬子法言或曰孔子之道不可小兴曰小则败圣如何曰若是则何为去乎曰爱日曰

爱日而去何也曰由羣婢之故也】作诗当鸣鼓聊自攻短阙【用论语鸣鼓而攻之自攻其短也退之诗还家虽阙短指日亲晨餐此摘其字】

再和答为之

君勿嘲广文沍寒被絺葛【左传其藏冰也深山穷谷固陰沍寒注沍闭也北史袁充传年十余岁父党至门时冬初充尚衣葛衫客戏曰絺兮綌兮凄其以风充应声曰惟絺与綌服之无斃杜对焉知南邻客九月犹絺綌】君勿嘲广文穷年饭粢粝【列子云食则粢粝居则蓬室】常恐俎豆予与世充肴核【庄子云老聃之役有庚桑楚者居畏垒之山三年而畏垒大穰畏垒之民相与言曰胡不尸而祝之杜而稷之庚桑子闻之曰畏垒之细民而窃窃然欲俎豆予于贤人之问小雅宾之初筵云筵豆有楚殽核维旅注殽豆实也核加筵也笺云豆实菹醢也筵实有桃梅之属】凡木不愿材【退之祭子厚文凡木之生不愿为材】大折小枝泄栝依曲辕社聊用神其拙【庄子云匠石之齐至于曲辕见栝社树其大蔽牛观者如市匠石顾曰散木也无所可用故能若是之壽匠石归栝杜见梦曰汝将乌乎比予哉若将此予于文木耶夫粗梨橘柚果蓏之属实熟则剥则辱大枝折小枝泄】吾家本江南一邱藏曲折【杜诗一丘藏曲折缓步有跻攀】濒溪?苍筤【易系辞震为苍筤竹】萧洒可散髮【文选稽叔夜诗散髮岩岫】既无使鬼钱【见前注】又无封侯骨【见前注】薄禄庇间曹且免受逼卒为此懒出门徒弊怀中谒【汉高祖纪乃给为谒曰贺钱万师古曰为谒者书刺自言爵里若今参见通名也後汉禰衡传陰怀一利既无所之至子刺字漫灭】直斋宾客退风物供落笔诗成着牀头【晋王湛传牀头有周易】不知今几束若何向予勤见诗叹埋没嗣宗须洒浇【嗣宗见前注】未信胷怀阔自状一片心【唐裴庆自赞曰一片灵台丹青莫状】碧潭浸寒月【寒山子诗我心似秋月碧潭清皎漈】令德感来教为君赋车辖【小雅间关车之辖兮此篇又云令德来教左传昭二十五年宋公享昭子赋新宫昭子赋车辖】君思扬雄吒【吒当为吃本传口吃不能剧谈】何似张仪舌【史记张仪传仪云视吾舌尚在否】此意恐太狂愿为引绳墨【此语盖答其和章之意望其规正如木从绳也】正使此道非改过从今日报章望琼琚【诗不成报章又云报之以琼琚】勿使音尘阙【文选月赋美人迈兮音尘阙谢灵运诗各勉日新志音尘慰寂灭】

再和答为之

林君维闽英数面成瓜葛【数面成亲瓜葛并见前注】邻居接杖藜过饭厌疏粝【汉鲍宣传俱过宣一饭去後汉第五伦传不过从兄饭杖藜见前注大雅召旻篇彼疏斯粝笺云疏麤也谓粝米也退之诗疏粝亦足饱我饥】读书饱工夫论事极精核【南史王僧?传宋文帝书天然胜羊欣工夫少于欣汉书孝宣之治综核名实政事文学法理之士咸精其能此摘其字】奋身君子场勇若怒未泄【东都赋云马踠余足士怒未泄】穷年栖旅巢【易旅卦鸟焚其巢】由命非由拙王良驱八骏【左传哀二年邲无恤御简子注王良也左传又称子良又曰邲良穆天子传云八骏之乘盗骊赤骥白义渠黄骅骝绿耳】方驾度九折【杜诗切攀屈宋宜方驾又方驾曹刘不啻过九折坂在汉蜀郡严道县王尊叱驭处】学堂疎雨余【退之秋怀诗学堂日无事】石砌长苔髮【尔雅薄石衣注云水苔也一名石髮】弟子肥如瓠【

汉张苍传肥白如瓠【先生瘦惟骨】元注云林君在朱氏讲授朱氏儿皆面白丰肥林君如刻削【北门一都会】一都会也史记货殖传多有此语【尘埃人卒卒】司马迁书卒卒无须臾之闲霍光传见云家卒卒【高盖如秋荷势利相奔谒】汉张耳传势利之交古人羞之【惟君尚寂寞来观草玄笔】扬雄传雄作太玄自言寂寞为尸【斯文未易陈正当高阁束】退之诗春秋三传束高阁字本出庾翼传【金马事陆沈】陆沈见前注【市门逐乾没】货殖传刺文绣不如倚市门张汤传始为小吏乾没【未须相贤愚】退之别赵子云宜各从所务未用相贤愚【聊自嘲迂濶】孟子题辞时君咸谓之迂濶子事【忆昨戏赠诗乃辱报明月】邹阳传明月之珠夜光之璧【极知推挽意】左传或挽之或推之【我车君欲辖】见前篇车辖注【屠龙真强言】屠龙见前篇【奔马不及古】论语驷不及舌自悔出屠龙之语也第二篇固云此意恐太狂愿为引绳墨邓析书曰一言而非驷马不及追【赐书盈五车】庄子曰惠施多方其书五车【直舍方二墨】二墨见前注【会意便欣然】渊明集五柳先生传云好读书不求甚解每有会意便欣然忘食【余事过窻日尚恐素餐钱诸生在城关】诗不素餐兮又子衿刺学校废也挑兮达兮在城关兮汉高后纪赐餐钱奉邑】

赠赵言

饶阳赵方士眼如九秋鹰【释氏书云舍利佛此言鷲鷲子以其母眼如鷲鷲也此用其意】学书不成不学劔【项籍传学书不成去学劔】心术妙解通神明医如俯身拾地芥【夏侯胜传取青紫如俛拾地芥耳】相如仰面观天星【刘向传夜观星宿】自言方术杂鬼怪万种一贯皆天成【论语吾道一以贯之】大梁小肆倾宾客【李白诗荆门倒屈宋梁苑倾邹枚】二十余年声籍籍【前汉江都易王非子建传国中口语籍籍李白诗高名动京师天下皆籍籍】得钱满屋不经营【诗经之营之寒山子诗文夫莫守困无钱即经纪】散与世人还寄食【韩信传寄食于漂母】北门尘土满衣襟广文直舍官槐陰【杜诗广文到官舍】白云劝酒终日醉红烛围棋清夜深大车驷马不回首【史记范雎传须贾曰非大车驷马吾不出】强项老翁来见寻【强项见前注】向人忠信去表襮【诗扬之水云素衣朱襮尔雅黼领谓之襮退之云襮顺而里方】可喜正在无机心【机心见前注】轻谈祸福邀重糴【史记货殖传诸食技术之人为重糴也司马季主传卜而有不审不见夺糴注云离骚经曰怀椒糴以要之王逸云糴精米所以享神王荆公诗老吏闭门无重糴韵略有糴字无糴字疑即糴也集韵音胥说文粮也又音所广韵私吕切孙鸿庆诗萧萧鳬鹭行重糴不到门】所在多于竹苇林【维摩经云譬如甘蔗竹韦稻麻丛林】翁言此辈无足聽見叶知根论才性飞腾九天沈九渊【汉郊祀志九天巫祠九天师古曰九天谓中央钧天东方苍天东北旻天北方玄天西北幽天西方浩天西南朱天南方炎天东南阳天其说见淮南子渊有九名见庄子应帝王篇晋胡奋传闻女为贵人哭曰老奴不死惟有二儿男入九地之下女上九天之上】自种自收皆在行【班固奕旨曰博悬于投不必在行】先期出语骇传闻事至十九中时病轮困离奇惜老大成器本可十万乘【邹阳传蟠木根柢轮困离奇而为万乘器】自叹轻霜白髮新又去惊动都城人都城达官老于事【礼檀弓疏达官谓国之卿士大夫被君命者也退之诗中朝大官老于事】嫌翁出言不斌媚【唐魏徵传帝曰人言徵举止疎慢我但见其斌媚耳前集元师此君轩诗云神人传书道人命死生祸福如看镜晚知直语触憎嫌深藏幽寺钟鼓磬与此同意】有手莫炙权门火【杜诗炙手可热势絶伦唐崔铉传曰郑杨段薛炙手

可热】有口莫辩荆山玉【新序曰荆人卞和得玉璞而献之荆厉王王使玉尹相之曰石也以和为谩而断其左足武王即位和复奉璞而献之武王使玉尹相之曰石也又断其右足共王即位和乃奉璞而哭于荆山三日三夜泣尽继之以血共王使人问之对曰宝玉而名之曰石贞士而戮之以谩此臣之所以悲也王乃使人理其璞而得宝玉焉名之曰和氏之璧】吴宫火起燕焚巢【此语谓上自权门火越絶书吴宫西在长 门秦始皇十一年守宫者照燕失火烧也鲍照空城雀云犹胜吴宫燕无罪得焚巢李白野田黄雀行游莫逐炎洲翠栖莫近吴宫燕吴宫火起焚尔窠炎洲逐翠遭网罗】当时卞和斲两足【此语谓上句荆山玉】千里辞家却入门【韩诗二十辞家来射策】三春荣木会归根【归去来辞木欣欣以向荣老子云夫物芸芸各复归其根归根曰静】我有江南黄篋舫【隋书炀帝纪上御龙舟幸江都文武官五品以上给楼舰九品以上给黄篋】与翁长入白鸥羣【庄子曰入兽不乱羣入鸟不乱行李白诗明朝拂衣去永与白鸥羣】

次韵题粹老客亭诗後

客亭长短路南北【长亭短亭见哀江南赋】袞袞行人那得知惟有相逢即相别一杯成喜只成悲【古乐府木兰歌父母见木兰喜极成悲伤韦应物诗北日相逢非旧日一杯成喜亦成悲】

赠张仲谋

车如鸡栖马如狗【见前注】闭门常多出门少去天尺五张公子【老杜赠韦七赞善诗时论同归尺五天自注曰俚语云城南韦杜去天尺五前汉外戚传云童謡曰燕燕尾涎涎张公子时相见杜诗天上张公子】官居城南池馆好【杜诗宋公旧池馆】健儿快马紫游缰【杜诗朔方健儿好身手洛阳伽蓝记快马健儿不如老婢吹箎杜诗右持腰间刀左牵紫游缰自注云昔邺下童謡曰青青御路杨白马紫游缰】迎我不知沙路长高榆老柳媚寒日枯荷小鸭冻野航津人刺船起应客【庄子渔父言吾去子矣乃刺船而去陈平传解衣羸而佐刺船杜诗刺船思郢客解水乞吴儿】遥知故人一水隔下马索酒呼三迟【杜诗马上谁家白面郎当阶下马生人牀不通姓字祖豪甚指点银瓶索酒尝卢仝诗等间对酒呼三迟屠羊杀牛皆自任】骑奴笑言客竟痴【晋王述传桓温欲为子求婚子坦之言温意述大怒曰汝竟痴耶】向来情义比瓜葛万事略不置町畦【骑奴瓜葛町畦竝见前注】追数存亡异忧乐烛如白虹贯酒卮【白虹贯日见邹阳传】开轩临水弄长?【笛称弄用晋桓伊传三调弄也】吹落残月风凄凄城头漏下四十刻破魔惊睡聽新诗【楞严经云亲见如来降伏诸魔今言睡魔也石曼卿诗已为物象添诗瘦更被陰晴长睡魔】君诗清壮悲节物正与秋虫同一律【韩文由汉至今用一律】迺来更觉苦语工思妇霜碓捣寒月【曹子建七哀诗曰明月照高楼流光正徘徊上有愁思妇悲叹有余哀沈休文云高楼切思妇盖用子建语也谢朓有捣衣诗白居易诗谁家思妇秋捣帛月苦风凄碓杵悲】朱颜緑髮深误人【孟郊诗酒人皆倚春髮緑病叟独藏秋髮白】不似草木长青春【文选潘尼诗予涉素秋子登青春泣云素秋谓老青春谓少】洁身好贤君自有今日相看进于旧以兹敢倾一盃酒为太夫人千万壽【张翰曰使我有身後名不如即时一盃酒後汉岑彭传以朔望问太夫人起居注云汉法列

侯之母方称太夫人】

乞猫【山谷手书此诗题云从随主簿乞猫】

秋来鼠辈欺猫死【魏志曹公曰忧天下无此鼠辈耶退之诗立召贼曹与五伯尽取鼠辈尸诸市】窥瓮翻盘搅夜眠闻道狸奴将数子【传灯录僧曰狸奴白牯为什么却有知南史何承天云凤皇将九子此摘其字】买鱼穿柳聘衔蝉【衔蝉用俗语也后山诗话云乞猫诗虽滑稽而可喜千岁之下读者如新】

谢周文之送猫儿

养得狸奴【见前注】立战功将军细柳有家风【用周亚夫细柳营事】一簞未厌鱼餐薄四壁当令鼠穴空

谢张泰伯惠黄雀鮓

去家十二年黄雀慳下筯【晋何曾传日食万钱犹曰无下筯处】笑开张侯盘汤饼始有助【东哲餅赋云汤饼为最】蜀王煎藪法醢以羊彘兔【自注云俗谓亥卯未馄饨内则曰三牲用藪注云藪煎茱萸也正义曰贺氏云今蜀郡作之三牲谓牛羊豕】麦饼薄于纸含浆和咸酢秋霜落场谷【诗云食我场谷】一一挟蜚絮【东坡诗披绵黄雀漫多脂】飞飞蒿艾间入网辄万数烹煎宜老稚罍缶烦爱护南包解京师【老杜北征诗粉黛亦解包】至尊所珍御【文选西京赋侈靡踰乎至尊退之李花诗冰盘夏荐碧实脆斥去不御慙其花此御字之意】玉盘登百十睥睨轻桂蠹【汉陆贾传尉佗献挂蠹二器注桂蠹桂树蠹虫师古曰此虫食桂故味辛而渍之以蜜食之也】五侯啖豢豹【西汉娄护合五侯开奇膳以为鲭世称五侯鲭见西京杂记文选枚叔七发云山梁之餐豢豹之胎退之南山诗思想甚含啖】见谓美无度【美无度见前注】濒河饭食浆瓜蒔已佳茹【汉食货志菜如有畦】谁言风沙中乡味入供具【汉荆王刘泽传请张卿临亲修具注曰具供具也又叙传云迎延满堂日为供具】坐令亲饌甘更使客得与【郭林宗传茅容杀鸡为饌林宗谓为已设既而以供其母自以草蔬与客同饭山谷用此意而反其词】蒲陰虽穷僻【蒲陰齐州所治县也张泰伯官于此】勉作三年住愿公且安乐分寄尚能屡【诗云将安将乐】

赠晁次膺

次膺豪健如霜鹘空拳误挂田犬牙【汉李陵博士张空拳拳音秦杜诗霜鹘不空拳山谷用少陵语当音权汉文纪地形如犬牙】果输司空城旦作【汉辕固传太后怒曰安得司空城旦书乎按刑法志云完为成旦春文选任彦昇策秀才文睚眦有违论输左校注输役也】付与步兵厨人家【晋阮籍传籍闻步兵厨营人善酿酒】野马横郊作凝水【庄子野马也尘埃也文选连珠沈寒凝水不能结风】牵牛引竹上寒花无酒醉公不甚惜诵公五字使人嗟【东坡诗乐天长短三千首却爱韦郎五字诗乐天尝云韦应物为苏州牧诗甚多有郡宴诗

兵卫森画戟燕寝凝清香最为警策诗意叹次膺挂吏议而左迁酒官】

杨朴墓

三尺孤坟一布衣人言无复似当时千秋万岁还来此【千秋万岁见前注】月笛烟莎世不知【元注云杨朴喜吹笛尝作莎诗极工按范文正公诗话云杨朴字契玄郑州人善为诗不仕少与毕相同学毕荐之太宗召见面赋莎衣诗云狂脱酒家春醉後乱堆渔舍晚晴时除官不受聽归山以其子从政为长水尉东坡云昔年过洛见李公简言真宗东封访天下隐者闻郑人杨朴能为诗召对自言不能上问临行有人作诗送行否朴曰惟臣妻有一首云更休落魄耽盃酒且莫猖狂爱咏诗今日捉将官里去这回断送老头皮上大笑放回山】

次韵孔四着作早行

弃置锄犁就车马【选诗弃置勿重陈退之诗起身自犁锄】从来计出古人下【退之诗之罟别我去计出柏马下】尘埃好在三尺桐不疑万世期子野【白乐天诗家池动作经年别松竹禽鱼好在无琴操曰琴长三尺六寸六分象三百六十六日左传昭八年石言于晋魏榆晋侯问于师旷对曰云云叔向曰子野之言君子哉注云子野师旷字晋成公绥琴赋云伯牙弹而驷马仰秣子野挥而玄鹤翔鸣】明经使者着书郎风雨乘駟忘夙夜【左传昭五年楚子以駟至于罗汭注駟传也】回车过门问无恙【退之书云问无恙外不暇出一言】何意深巷勤长者【陈平传家乃负郭穷巷以席为门然门外多长者车辙】圣师之後盖多贤【左传昭七年吾闻将有達者曰孔邱圣人之後也又云圣人有明德者若不当世其後必有达人其在孔丘乎】领略世故有余暇【选诗领略归一致又云世故尚未夷】白而长身虽不见好古发愤尚类也【韩文孔戡墓志曰孔世三十八吾见其孙白而长身寡笑与言其尚类也论语子曰述而不作信而好古窃比於我老彭叶公问孔子於子路子路不对子曰女奚不曰其为人也发愤忘食乐以忘忧东坡和孔君亮诗固知严胜风流在又在长身十世孙孔戡字君严孔戡字君胜今君亮四十八世】自然身如警露鹤【周处风土记白鹤性警至八月露降于草木滴滴有声则鸣骆宾王登王司马楼宴序鹤鸣在陰上中天而警露李义山诗鹤应闻露警蜂亦为花忙】每先鸣鸡整初驾【晋书赵至传鸡鸣戒旦则飘尔晨征又选诗整驾肃时命】北行河决所至郡【此诗先言明经使者又言北行河决盖比之汉平当也平当传云以明经为博士又云以明经禹贡使行河行下更反】肃肃王命哀鰥寡【诗肃肃王命仲山甫将之又曰不侮鰥寡】力排滹沱避城郭【後汉王霸传光武南驰至下曲阳传闻王郎兵在後及至滹沱河令霸往视之霸诡曰冰坚可渡下曲阳汉属钜鹿郡今入祁州鼓城县滹沱所在于此可见】深泽疲民且田舍贾生三策藏胷中【汉沟洫志贾让奏言治河有上中下策】羿矢百中不虚舍【羿射官也南宫适云羿善射孟子云逢蒙学射于羿此尧以前羿也寒浞虞羿于田杀而烹之此有穷后羿也诗云舍矢如破周纪养由基去柳叶百步而射之百发而百中】行归定拜关内侯但赐黄金恐非价【平当传又云至丞相以冬月赐爵关内侯注云以冬月非封侯时且先赐爵也非价谓功大赏轻如市物之不当价也】

次韵孔四着作北行滹沱

驼褐蒙风霜【毆阳文忠诗轻寒漠漠侵驼褐左传范宣子曰蒙荆棘注蒙胃也】鸡声眇墟里【渊明诗暧暧远人村依依墟里烟】青灯进豆粥【後汉冯异传光武自蓟东南驰时天寒异上豆粥因复渡滹沱李商隐诗语罢休边角青灯雨鬓丝】落月踏冰水平生不龟药才可卫十指持比干户封谁能优劣此【庄子逍遥篇宋人有善为不龟手之药者世世以泝澠統为事客闻之买其方百金以说吴王吴王使之将冬与越人水战大败越人裂地而封之能不龟手一也或以封或不免于泝澠統则所用之异也】

和陈君仪读太真外传五首

朝廷无事君臣乐花柳多情殿阁春【柳公权聯句薰风自南来殿阁生微凉】不觉胡雏心暗动【一作付与山河买忠义李白猛虎行胡雏緑眼吹玉笛】绮罗翻作坠楼人【外传云初禄山于上前应对杂以谐謔而妃常在坐禄山心动及闻马嵬之死数日叹惋晋石崇传崇有妓緑珠孙秀求之不与秀劝赵王伦诛崇介士到门緑珠自投于楼下而死杜牧之诗可怜金谷坠楼人】

扶风乔木夏陰合斜谷铃声秋夜深【外传云上至斜谷霖雨涉旬栈道雨中闻铃因采其声为雨霖铃曲考之史及诸书明皇自陈仓入散关出河池初不由斜谷今梓潼有上亭驿古今诗刻皆以为明皇闻铃之地当不妄也】人到愁来无处会不关情处总伤心【太白诗何许最关情】

梁州一曲当时事【当时事一作开元梦按开元传信记西凉州献新曲曰凉州寧王闻之以以为恐有播越之祸乐府诗集凉州歌序亦称凉州曲云云初无区别】记得曾拈玉笛吹【外传云妃子窃宁王玉?吹故张祜诗云金輿远幸无人见偷把宁王小管吹】端正楼空春昼永小桃犹学淡燕支【华清宫有端正楼贵妃梳洗之所杜诗林花着雨燕脂落】

高丽条脱珣红玉【条脱钏也高丽所贵真诰萼緑华降羊权家遗以金条脱一李义山诗羊权虽得金条脱温峤终虚玉镜台】遶遶琵琶捻緑丝【一作一双条脱玻璃玉三尺琵琶緑蠶丝妃子琵琶遶遶檀也寺人白秀真使蜀还献木润如玉光可鉴有金缕红文蹙成双凤弦乃末诃弥罗国所贡緑水蚕丝也】蛛网屋煤昏故物【昏故物一作脂泽歇】此生惟有梦来时

上皇曾御昭仪传镜里观形只眼前【上覧汉成帝内传见飞燕身轻欲不胜风帝为制七宝避风台上曰尔则任吹多少妃曰霓裳一曲可掩千古杜诗听说开元事分明在目前退之诗听说两京事分明皆眼前】养得禄儿倾四海【禄山恩遇最深上及贵妃皆呼以为儿】千秋更有一伶玄【赵飞燕外传汉江东尉伶玄所撰也伶自叙云伶玄字子于历刺守州郡为淮南相哀帝时老休买妾樊通德有才色知书能言飞燕姊弟事通德曰斯人俱灰灭矣当时疲精力驰骛蛊惑宁知终归荒田野草乎通德顾视烛影以手拥髻凄然泣下于是撰赵后别传诗意谓以古为鉴兴坏在日前而明皇不之戒为可叹也】

读曹公传【并序】

曹公自以勲高宰衡文对西伯【汉礼乐志及王莽为宰衡欲燿衆庶西伯谓周文王也】蝉蜕揖让之中【史记屈原传蝉蜕于浊秽】而用汉室于家巷【离骚经云五子用失乎家巷後汉延笃传笃以病免归教授家巷】更党锢之灾义士忠臣耘除略尽献灵之间北面朝者拱而观变汉魏何择焉彼见宗庙社稷之无与也执太阿而用其颖【梅福传倒持太阿授楚其柄】以司一世之命左右无不得意引後宫于鈇钺如刈蒲茅【後汉献帝伏皇后纪政在曹操操求董贵人杀之帝以贵人有妊累为请不得后怀惧与父书言操残逼状令密国之事露曹逼帝废后令华歆勒兵入宫收后后闭户藏壁中歆就牵后出时帝在後殿后被髮徒跣行泣过诀曰不能复相活耶帝曰我亦不知命在何时遂将后下暴室以忧崩】夫匹妇婢使罪家人犹为谢过之而亲北面受命之君自以为未知死所呜呼病怜王其谁曰过言【战国策楚语云或说春申君曰孙子天下贤人也君何辞之春申君于是使人请孙子于赵孙子为书谢曰病人怜王此不恭之语也虽然不可不审察也此为刼杀死亡之主言也夫人主年少而矜材无法术以知奸则大臣主断楚王子围以冠纓绞王杀之因自立也齐崔杼攻庄公射中其股遂杀之近代李兑用赵饿主父于沙邱淖齿用齐擢闵王之筋县于其庙梁夫病虽癰肿胞疾上比前世未至绞纓射股下比近代未至擢筋而饿死也由此观之病虽怜王可也注云续韩非子谚曰病怜王】虽然终已恭让腹毒而色取仁任不以易汉姓者何也汉之末造虽得罪于社稷骨鯁之臣而犹不得罪于民故犹相与爱其名耳余闻曰道揆以上惠不足而明有右不在社稷而数有功粢盛殆其不继哉感之作曹公诗一章

南征北伐报功频刘氏亲为魏国宾【书微子篇作宾于王家】毕竟以丕成霸业岂能于汉作纯臣【献帝纪建安二十五年正月庚子魏王曹操薨三月改元延康冬十月乙卯皇帝逊位魏王丕称天子奉帝为山阳公奏事不称臣左传君子曰颍考叔纯孝也注曰纯犹笃也传又云君子曰石碣纯臣也】两都秋色皆乔木二祖恩波在细民【班固两都赋序曰有西都宾问东都主人云云孟子曰所谓故国者非谓有乔木之谓也二祖谓高祖世祖杜诗莫怪恩波隔又云恩波锦帕舒】驾驭英雄虽有术【杜诗君王自神武驾驭必英雄又云君王无所惜驾驭英雄材】力扶宗社可无人

杂诗

古风萧索不言归贫贱交情富贵非【下邳翟公为廷尉宾客填门及废门外可设爵罗後复为廷尉客欲往翟公大书其门曰一死一生乃知交情一贫一富乃知交态一贵一贱交情乃见见郑当时传後】世祖本无天下量子陵何慕钓鱼矶【後汉严光传光字子陵与光武同游学及光武即位变姓名隐身不见帝令以物色求之後齐国上言有一男子披羊裘钓泽中帝疑其光乃备安车聘之三反而後至竟不屈子陵高抗皆世祖之量有以容之也若世祖有贫富交情之异则严光岂慕此哉此语必有为而发】

卫南【卫南属澶州与北京为邻】

今年畚鍤弃春耕折苇枯荷绕坏城【杜诗菱荷枯折随风涛陆龟蒙鵲诗不似间楼折苇秋】白鸟自多人自少【尝闻东坡知登州有一主簿白事不已公颇倦漫云晚可见过主簿不渊其意至晚独入公强出见之因閱杜诗问云江湖多白鸟天地足青蝇白鸟鸥鹭之属耶主簿曰白鸟乃蚊蚋以况赃吏江湖之间距朝廷远多赃吏耳天地之间君子少而小人多公即改观厚待之夏小正曰八月丹鸟羞白鸟说曰丹鸟谓丹良也白鸟谓闽蚋也闽音文又金楼子云白鸟蚊也齐桓公卧栢寝谓仲父曰一物失所寡人悒悒今白鸟营营是必饥耳人少字用杜诗萧条四海内人少豺虎多】污泥终浊水终清【杜诗浊河终不污清济退之诗清沟映污渠】沙场旗鼓千人集渔户风烟一笛横惟有鸣鵲古祠柏对人犹是向时情

酒

江形圜似阮家盆【世说阮仲容至宗人间共集以大盆盛酒】山势岑如北海樽【孔融传樽中酒不空】户有浮蛆春盎盎【周礼五齐三曰盎齐山谷尝有玉醴颂醞玉醴拔浮蛆春盎盎想可?】双松一路醉乡门【唐王绩有醉乡记楞严经颂云十方薄伽梵一路涅槃门】

次韵答柳通叟问舍求田之诗

少日心期转谬悠【文选任彦昇诗中道遇心期庄子末篇以谬悠之说荒唐之言】蛾眉见妒且障羞【离骚经衆女嫉余之蛾眉兮谣诼谓余以善淫李白诗由来紫宫女共妒青蛾眉南史刘穆之曾孙祥齐建元中为正员郎司徒褚彦回入朝以腰扇障面祥从侧过曰作如此举止羞见人面扇障何益玉台新咏云举扇且障羞李义山美人赋枕有光而照泪屏无影而障羞】但令有妇如康子【列女传鲁黔娄先生之妻先生死曾子往吊之曰何以为諡其妻曰以康为諡曾子曰先生食不充口衣不盖体何乐于此而諡为康乎妻曰昔君尝欲以为国相辞而不为是有余贵也君尝赐之粟三十鍾辞而不受是有余富也甘天下之淡味安天下之卑位求仁而得仁求义而得义其諡为康不亦宜乎曾子曰唯】安用生儿似仲谋【吴志孙权字仲谋曹公叹曰生子当如孙仲谋刘景升儿子若?犬耳】横笛牛羊归晚径【杜诗牛羊归径险鸟雀聚枝深】卷帘瓜芋熟西畴【蜀都赋云瓜畴芋区归去来辞云将有事于西畴】功名可致犹回首何况功名不可求

书扇

鲁公笔法屋漏雨未减右军锥画沙可惜团团新月面故教零乱黑云遮【法书苑云颜鲁公与怀素学草书于鄮兵曹或问曰张长史见公孙大娘舞劒得低昂回翔之状兵曹有之乎怀素以古钗脚为对鲁公曰何如屋漏?怀素曰老贼得之矣书诀墨数载颜鲁公记张长史笔法云长史曰闻于褚河南云用笔当如印印泥锥画沙初不言出于王右军也当考】次韵答叔原会寂照房呈稚川【按山谷石刻次韵王稚川客舍题云王欲稚川元丰初调官京师前後集数篇皆同时作时山谷入京改官盖元丰庚申岁】

客愁非一种历乱如蜜房【杜诗天寒割蜜房】食甘念慈母衣绽怀孟光【内则曰衣裳绽

裂纫箴请补缀孟光乃後汉梁鸿妻】我家犹北门【时解北京教授至京师其家犹在北京母夫人无恙初在北京丧偶殡于北京者十一年】王子泐湖湘寄书无鴈来衰草漫寒塘故人哀王孙【哀王孙而进食见韩信传】交味耐久长【唐魏玄同与裴炎缔交能保始终号耐久朋】置酒相暖热【元稹苦乐相倚曲犹得半年佯煖热王荆公次程公辟韵云清月若覩兰亭月暖热应忘蕙帐秋】愜于冬饮汤【孟子云公都子曰冬日则饮汤夏日则饮水】吾侪痴絶处不减顾长康【顾恺之痴絶见前注】得闲枯木坐【长沙石霜山释庆诸衆议延请诸闻之更入深山无人之下长坐不卧屹若枯株天下谓之石霜枯木见僧北山宝传】冷日下牛羊【诗云日之夕矣羊牛下来】坐有稻田衲【北山録曰稻畦为衣陶土为器稻畦袈裟也陶土瓦鉢也僧道学妙高堂诗何时卷此稻畦衲慰我弥年归意勤】颇薰知见香【释氏书有解脱知见香】胜谈初亶亶【晋阮修传王衍谈易有所未了敦曰阮宣子可与言衍曰未知其亶亶之处定何如耳又谢安传安弱冠诣王蒙清言良久既去蒙子修曰向客何如大人蒙曰此客亶亶为来逼人】修绠汲银牀【用退之汲舌得修绠之意古诗後园凿井银作牀金鉚素绠汲寒浆杜诗露井冻银牀太白诗梧桐落金井一叶飞银牀】声名九鼎重【见前注】冠盖万夫望【易系辞君子知微知彰知柔知刚万夫之望汉文诏使者冠盖相望韩诗冠盖相望催入相】老禅不挂眼【退之诗余事不挂眼】看蜗书屋梁【酉阳杂俎云睿宗为冀王时寝斋壁上蜗迹成天字上遽扫之经数日如初及即位铸金为蜗分真道释像前杜诗鸟喙催寒木蜗涎蠹画梁】韵与境俱胜【文选头陀寺碑道胜之韵虚往实归】意将言两忘【易系辞子曰书不尽言言不尽意庄子云不若两忘而化其道】出门事袞袞斗柄莫昂昂月色丽双阙【三辅黄图古歌词云长安城西有双阙】雪云浮建章【文选谢朓诗金波丽鵙鹊玉绳低建章】苦寒无处避惟欲酒中藏【李白诗青莲居士谪仙人酒肆藏名三十春】

同王稚川晏叔原饭寂照房得房字

高人住宝坊【杜诗虚白高人静华严论云安立宝坊集诗人天】重客歛斋房【汉高帝纪豪杰闻令有重客又礼乐志有斋房之歌元封二年芝生甘泉斋房作此借用其字】市声犹在耳【左传言犹在耳】静虚生白光【庄子虚室生白】幽子遗淡墨【退之别赵子诗海中诸山中幽子颇不无】窻间见潇湘蒹葭落鳬鴈【诗蒹葭苍苍】秋色媚横塘博山沈水烟淡与人意长【西京杂记有五层金博山炉古诗云博山炉中百和香】自?鷹爪芽来试鱼眼汤【鷹爪鱼眼见前注】寒浴得温湑【内则曰外内不共井不共湑浴释音彼力切注湑浴堂也】体净心凯康【宋玉神女赋心凯康以乐欢尔雅释诂云恺康乐也】盘餐取近市【杜诗盘餐市远无兼味】厌饫谢羶羊【庄子羊肉不慕蚂蚁慕羊肉羊肉羶也】裂饼羞豚脍【晋何曾蒸饼上不裂作十字则不食老杜诗浮瓜供老病裂饼常所爱】包鱼茭荷香平生所怀人【诗卷耳嗟我怀人寘彼周行】忽言共榻牀常恐风雨散【白乐天诗风雨或消散江山渺回旋刘禹锡诗故人云雨散满目山川多】千里郁相望斯游岂易得渊对妙濠梁【庄子与惠子游于濠梁之上详见前注】雅雅王稚川【晋刘惔传洛中雅雅有三嘏】易亲复难忘【古乐府君家甚易知易知复难忘】晏子与人交【论语晏平仲善与人交】风义盛激昂两公盛才力宫锦丽文章鄙夫得秀句【杜诗最传秀句寰区满】成诵更怀藏【文选杨修答曹植笺云有所造作若成诵在心余见前注】

次韵叔原会寂照房得照字

风雨思齐诗【齐国风风雨思君子也乱世则思君子不改其度焉风雨凄凄鸡鸣喈喈】草木怨楚调【宋玉悲秋词草木摇落而色衰渊明有怨诗楚调一篇】本无心击排【贾谊疏云屠牛坦一朝解十二牛而芒刃不顿者所排击剥割皆衆理解也】胜日用歌啸【胜日见前注】僧窗茶烟底【杜牧诗今日鬓丝禅榻畔茶烟轻扬落花风】清绝对二妙【晋卫罐传一台二妙南史伏曼客与袁餐时论以为一台二妙以此叔原稚川】俱含万里情【杜诗中原有兄弟万里正含情】雪梅开岭徼【谓大庾岭头梅花】我慙风味浅砌莎慕松莛【诗頍弁云莛与女萝施于松柏】中朝盛人物【退之诗云国朝盛文章】谁与开颜笑二公老谫事【退之诗朝中大官老于事】似解寂寞钓【退之答崔立之书耕于宽间之野钓于寂寞之滨】对之空叹嗟楼阁重晚照【杜诗上方重阁晚百里见秋毫又云连山晚照红】

次韵稚川得寂字

平生万里兴敛退着寸尺【退之诗敛退就新懦趋营悼前猛】向来类窃鈇【列子曰人有亡鈇者意其邻之子视其行步窃鈇也颜色窃鈇也言语窃鈇也动作态度无为而不窃鈇也俄而扣其谷而得其鈇他日复见其邻人之子动作态度无似窃鈇也鈇音斧】少日已争席【见前注】曩过招提饭【老杜游奉先寺诗已从招提游更宿招提境按僧辉记云招提者梵言拓闢提奢唐言四方僧物後人传写之误以拓为招又省去闢奢二字止称招提则今十方住持寺院也涅槃经云造僧招提则生不动国】惬当易为适【杜诗惬当久忘筌盖用渊明诗人亦有言称心易足也又云称心固为好】食鲑如举士【食鲑见前注】名下无遗索【阎立本见张僧繇画曰名下定无虚士】谈余天雨花【楞严经云即时天雨百宝莲花间错纷糅】茶罢风生腋【卢仝谢孟谏议寄新茶诗云七椀吃不得也惟觉两腋习习清风生】谁言尘土中有此坐上客【吕布顾谓刘备曰玄德卿为坐上客谢安传安既出桓温问左右颇尝见我有此客否】言前倾许可【後汉宣秉等传语曰同言而信则信在言前稽康与山巨源书曰足下旁观多可注多可言多有许可也】胷次开堦塞【退之南山诗堦塞生恂愁】同是蠹鱼痴【退之诗岂殊蠹书虫生死文字间痴谓书痴】还归理编册长安千门雪【借长安以见汴京可见此四诗自北京解官至京师作】蟹黄熊有白更约载酒行无为守岑寂都下喜见八叔父【八叔父讳廉字夷仲为集贤校理判尚书刑部元丰三年除河东提刑正山谷入京之时诗中有一别七冬夏之句当是熙宁间山谷在北京时夷仲体量河北东路灾伤经由相见今七年矣夷仲终于给事中相见盖元丰庚申也】

一别七冬夏【山谷官北京留守文潞公留再任遂跨七年故前诗云我坐广文舍七年读书灯又云七年身屡到鬱鬱?檐瓦杜诗云一别五秋萤】几书通置邮【孟子德之流行速于置邮而传命】冥鸿难借问江鲤多沉浮【用苏武传上林射鴈得鴈足系帛书事及古乐府呼童烹鲤鱼中有尺素书兼用晋殷羡事所致书皆投水中曰沉者自沉浮者自浮殷洪乔不作致书邮杜诗甘从投辖饮肯作置书邮】心因梦相去迹为山川留叔趋丹凤阙身向卧龙洲【诗意谓叔先入京而身往南阳已乃会都下也关中记云建章宫圆阙临北道凤在上故曰凤阙也卧龙洲在南阳见前注】邂逅入关马【诗邂逅相遇】同时解轡秋【考工记必犹

其牛後注关东谓紂为縡縡亦作秋】别後事万端【後汉吴汉传帝责汉曰比敕公千条万端】向来身百忧【诗逢此百忧】咨嗟旧田园【归去来辞田园将芜】恸哭新松楸【退之诗毕命依松秋】稍询耆旧间大半归山丘【秦收大半之赋】小儿?妇子【诗同我妇子】襁褓皆裹头【汉卫青传臣子在襁褓中杜诗去时里正与裹头】青灯照逆旅【左传令虢为不道保于逆旅】呼酒濯乱愁破啼为笑语【文选刘越石答卢谡诗并序曰相与举觞对膝破啼为笑李白送侄序申悲道旧破涕为笑】霜夜尽更筹【杜诗城暗更筹急】岁寒叔旧节况又高春秋【汉苏武传陛下春秋高】老松心梗槩【张平子东京赋粗为言其梗概】緑竹气和柔【霍去病传去病以和柔自媚子上张释之传焉赖和柔】言如不出口体若不胜裘【檀弓云赵文子其中退然如不胜衣其言呐呐然如不出诸其口】德音润九里【河润九里本出庄子後汉郭汲传帝劳之曰河润九里冀京师并蒙福也】政事无全牛【庄子云庖丁为文惠君解牛文惠君曰技盖至此乎庖丁曰始臣之解牛之时所见无非全牛者三年之後未尝见全牛也】诗成戏笔墨清甚韦苏州【唐韦应物为苏州刺史有诗集】篆籀有志气当于古人求【汉艺文志史籀十五篇注云周宣王太史作大篆十五篇晋王戎传当从古人中求耳杜诗似君须向古人求】自悲闻道晚涉世如虚舟虽无触物意傥亦遭骂【庄子云方舟而济于河有虚船来解舟虽有扁心之人不怒孟子衆楚人咻之】稍窥性命学未穷言行尤【论语言寡尤行寡悔】息心待自信渺如大河流堤防小不密一决败数州【此言防心之难也传灯録有僧亡名息心铭山谷常手写】安得心服礼【左传僖三十三年服于有礼社稷之卫也】不见为疮疣【退之随事生疮疣】荆鸡变化材鹄卵滞陰幽【庄子曰奔蜂不能化藿蠋越鸡不能伏鹄卵吾才小不足以化子】愿因啄抱力浩荡碧云游【退之诗鹤翎不天生变化在啄抱杜诗白鸥没浩荡万黑谁能驯】次韵叔父夷仲送夏君玉赴零陵主簿

田窦堂上酒未醉已变态【太白诗田窦相倾夺宾客互盈亏窦婴田蚡事见汉书本传子虚赋覽将帅之变态又云殫觀衆物之变态】何如东陵瓜子母相鈎带【阮嗣宗诗已见前注】富贵席未煖【班固宾戏孔席不煖】珠玉作灾怪【孟子宝珠玉者殃必及身文选阮嗣宗诗多财为患害】茅茨虽长贫终有懿亲在【左传封建亲戚以藩屏周不废懿亲也】丈人困州县短髮余会撮【庄子曰支离疏者颐隐于齐肩高于顶会撮指天会古外反撮于外反诗言髮脱仅余髻耳】居然枳棘栖【後汉仇覽传一名香考城令王涣署为主簿谢遣曰枳棘非鸾凤所栖】坐閱岁月代青云已迷津【太白诗迷津觉路失托势随风翻又赠友人诗斯人无良朋岂有青云望】浊酒未割爱【杜诗割爱酒如澠自注云平生所爱消渴止乏】簿领能无休釘餽唤鱼菜【退之云呼奴具盘餐釘餽鱼菜贍】羈旅苦地偏【渊明诗心远地自偏】江湖见天大万里一帆樯长风可倚赖【乐府诗云象牙作帆樯南史宗慤云愿乘长风破万里浪】因行访幽禅头陀烟雨外【文选头陀寺碑文注斗擻烦恼故曰头陀李白诗头陀云外多僧气王立之诗话云山谷有送零陵主夏君玉诗本云因行访幽禅头陀烟雨外盖君玉头甚大故以此戏之梵语头陀此言斗擻斗擻烦恼也】

病起次韵和稚川进叔倡酬之什

池塘夜雨聽鸣蛙老境侵寻【见前注】每忆家白髮生来惊客髮黄梁炊熟又春华【见前

注】百年不负胶投漆【後汉陈重雷义同郡为友乡里为之语曰胶漆自谓坚不如陈与雷
白乐天诗百年胶漆初心在万里烟霄中路分】万事相依葛与瓜【见前注】胜日主人始
有酒犹堪扶病见鶯花【杜诗莺花围世界卢仝诗莺花烂漫君不来】

稚川约晚过进叔次前韵赠稚川并呈进叔

人骑一马钝如蛙【晋祖纳传幽冀之士钝如椎】行向城东小隐家【文选王康琚诗小隐
隐陵薮大隐隐朝市李白诗小隐慕安石远游学子平】道上风埃迷皂白【皂白见前注】
堂前水竹湛清华【文选谢叔源诗水木湛清华】春归河曲定寒食公到江南应削瓜【礼
记为天子削瓜者副之】樽酒光阴俱可惜端须连夜发园花【明朝游後苑火急报春知花
须连夜发莫待晓风吹武后语也见唐人小说】

汴岸置酒赠黄十七【与後篇晓放汴舟同时作黄名几复】

吾宗端居丛百忧长歌劝之肯出游【一作百丈暮卷篙人休侵星争前犹几舟】黄流不解
涓明月【孟郊寓言谁言浊路泥不污明月色】碧树为我生凉秋【杜诗寒蝉碧树秋】初
平羣羊置莫问叔度千顷醉即休【一作诗吟吾党夜来作酒置田翁社後】葛洪神仙传云
皇初平年十五家使牧羊有道士将至金华山四十余年其兄初起求得之问羊何在初平言
叱叱羊起于是白石皆起成羊数万头後汉黄宪字叔度郭林宗曰叔度汪汪若千顷波皇初
平亦作黄山谷多用此事按杨文公谈苑金华山乃皇初平化石之地有石如羊形者人争求
以为玩好有内侍掌市征于婺州辍已俸募人求得耳角尾足皆具如真羊者数枚归阙献之
太祖曰此墓田中物也杖其内侍神仙之说固多渺茫而皇初平事信而有证此其彰彰者也
】谁倚柁楼吹玉笛【用晋王廙柁楼长啸事玉笛见前注】斗杓寒挂屋山头【屋山见前
注又王荆公诗落木回飈动屋山王立之诗话山谷谓洪龟父云甥爱老舅何等篇龟父举蜂
房各开户牖蚁穴或梦封侯王及其黄流不解涓明月碧树为我生凉秋深类老杜山谷云得
之矣】

山谷外集诗注卷七

山谷外集诗注卷八

钦定四库全书

山谷外集诗注卷八

宋 黄庭坚 撰

史 容 注

晓放汴舟【山谷罢北京教授入京改京官得知吉州太和县其秋自汴京归江南寔元丰三年】

秋声满山河行李在梁宋【梁即汴京宋即南京】川涂事鷄鸣【渊明诗目倦川涂异心念山泽居文选谢灵运诗岂伊川涂路注云周礼两山之间必有川焉大川之间必有涂焉】身亦逐羣动【渊明诗云日入羣动息归鸟趋林鸣李白诗灭见羣动息】霜清鱼下流橘柚入包贡【禹贡扬州厥包橘柚锡贡】又持三十口去作江南梦【杜诗两京三十口虽在命如丝】

次盱眙同前韵【盱眙泗州所治县也绍兴十四年升盱眙为军以天长招信属焉】

去此二十年持家西过宋起予者白鸥【论语起予者商也】归兴岌飞动宫殿明宝坊【华严合论云安立宝坊集诸天入】山川开禹贡破浪一帆风更占梦中梦【南史宗慤传愿乘长风破万里浪庄子齐物篇方其梦也不知其梦也梦之中又占梦焉】

外舅孙莘老守苏州留诗斗野亭庚申十月庭坚和【庚申元丰三年也】

谢公所筑埭未叹曲池平【晋谢安传至新城筑埭于城北後人追思之名为召伯埭在今扬州广陵县雍门周以琴见孟尝君曰君百岁之後高台既已倾曲池又已平文选沈休文诗贵贱犹如此况乃曲池平】苏州来赋诗句与秋气清僧构擅空阔浮光飞栋甍【杜诗江阔浮高栋】维斗天司南【庄子维斗得之终古不?汉天文志斗为帝车古有司南车也】其下百渚倾贝宫产明月含泽遍诸生盘礴淮海间【解衣盘礴见庄子】风烟侵十城【屈原九歌云紫贝阙兮珠宫明月谓明月之珠也沈存中笔谈云嘉佑中扬州有一珠甚大天晦多见初出于天长县波泽中後转入璧社湖後又在新开湖中九十余年常常见之又文昌杂录云孙莘老庄居在高邮新开湖边一夕庄客报湖中珠见因至水际光明如月忽见蚌蛤如芦席大一壳浮水上一壳如张帆状其疾如风飞小艇逐之不可反今以珠比莘老也元佑三年莘老丐祠得请山谷赠诗亦以珠为喻云璧社湖中有明月淮南草木借光辉】簾箫吹木末【通典乐门凡箫一名簾杜诗我仆犹木末】浪波沸庖烹【退之诗还家敕妻儿具此煎庖烹此摘其字】我来杪摇落霜清见鱼行白鸥远飞来得我若眼明【杜诗二月六夜春水生门前】

小滩浑欲平鸕鶿莫漫喜吾与汝曹俱眼明】佳人归何时解衣绕厢荣【上林赋偃佺之伦暴于南荣注云屋南檐也集韵云屋椳之两头起者为荣佳人谓莘老也莘老在熙丰间以言事屡黜自苏州徙福州徐州时犹未召还也归何时者望其归故里也】

十月十三日泊舟白沙江口【元注云真州唐永正县之白沙镇也】

岸江倚帆樯【见前注】已专北风权飞霜挟月下【西京杂记淮南王着鸿烈白云字中皆挟风霜】百竿直如弦【後汉末谣言云直如弦死道边摘其字以言引竹索挽船如弦直退之联句云浮桥交万竿】緑水去清夜黄芦摇白烟篙人持更柝【易重门击柝】相语闻并船平生濯纓心【沧浪之水清兮可以濯我纓沧浪之水浊兮可以濯我足见于孟子离娄篇又见于文选屈原所作渔父篇】鸥鸟共忘年【言与鸥鸟为忘年之友也南史江总传张纘等雅相推重为忘年交】风吹落尘网岁星奔回旋【岁星十二岁一周天】险艰自得力【左传晋文公险阻艰难其备尝之矣此其所以霸也故云得力孟子所谓生于忧患死于安乐也】细故可弃捐【汉文帝与匈奴书朕与单于皆捐细故俱蹈大道】至今梦汹汹呼禹济广川【元注云河出崑仑墟色白所渠并千七百一川色黄见尔雅释水】

发白沙口次长芦

篙师救首尾【孙子善用兵者如常山之蛇击其首则尾至击其尾则首至击其中则首尾俱至】我为制中权【左传宣十二年中权後劲】挂席满风力【杜诗挂席穷海岛】如椎强弩弦晓放白沙口长芦见炊烟一叶托秋雨沧江百尺船反观世风波谁家保长年【杜诗冉冉征涂间谁是长年者】念昔声利区【鲍明远诗三川养声利】与世阙周旋大道甚闲暇【老子云大道甚夷而民好径】百物不废捐【易系辞下云其道甚大百物不废惧以终始其要无咎此之谓易之道也】谁知目力净改观旧山川【维摩经目净修广如青莲孟郊诗亲宾改旧观】

阻风入长芦寺【长芦寺属真州】

福公开百室【周颂公以开百室按续灯録真州长芦崇福禅院祖印禅师讳智福江州人四处住持胜缘毕集三十年间衆盈五百】不借邻国权法筵森龙象【传灯録達磨传云波罗提法中龙象智度论曰龙象言力大龙水中行力大象陆中行力大负荷大法者比之龙象】天乐下管弦【老杜道林岳麓二寺诗云六时天乐朝香烟】我来雨花地【楞严经云即时天雨百宝莲花青黄赤白间错纷糅李白诗漫漫雨花落嘈嘈天乐鸣】依旧薰炉烟金碧动江水【子虚赋其土则锡碧金银注云碧谓玉之青白色者也杜诗云润聚金碧气蜀都赋连珠玉碧之岩】钟鱼到客船茗椀洗昏着【退之诗茗椀纖纖捧】经行数徂年岁寒风落山故乡喜言旋【左传昭元年风落山谓之蛊小雅黄鸟云言旋言归】林回负赤子白璧乃可捐【见前注】侍亲如履冰【意取孝经第三章云如临深渊如履薄冰】风雨森暗川

次韵伯氏长芦寺下

风从落帆休天与大江平僧房昼亦静钟磬寒逾清淹留属暇日植杖数连甍【归去来词云或植杖而耘耔字本出论语】颇与幽子逢【退之诗幽子颇不无】煮茗当酒倾【杜诗每过得酒倾李白诗愁多酒虽少酒倾愁不来乐天诗聊将茶代酒】携手霜木末朱栏见潮生檣移永正县【见泊舟白沙江口题下柱】鸟度建康城薪者得树鸡【退之有答道士寄树鸡诗云软湿青黄状可猜欲烹还唤木盘回烦君自入华阳洞直割乖龙左耳来东坡和陶诗黄蕊养土羔老楮生树鸡未忍便烹煮绕观日百回】羹盂味南烹【退之初南食诗自宜味南烹】香秣炊白玉【杜诗白玉定晨炊退之联句庖霜脍玄鲫白玉炊香粳】饱饭愧闲行丛祠思归乐吟弄夕阳明思归诚独乐薇蕨渐春荣【汉陈胜传注丛祠谓草木岑蔚者元稹谪江陵有思归乐诗云山思归乐尽作思归鸣应缘此山路自古离人征云云白居易和云山中不栖鸟夜半声嚶嚶似道东归乐行人掩泣听陶岳零陵记云思归乐状如鳩而惨色三月则鸣其音云不如归去】金陵【今建康府也治上元江寧二县本楚邑楚威王以其地有王气埋金以镇之故曰金陵秦改曰秣陵吴改建康】

豪士阻江海瓜分域中权【战国策赵语云乘赵之弊而瓜分之唐书瓜分河北地鲍照芜城赋竟瓜剖而豆分注其土地如瓜之割肌老子域中有四大】真人开关梁曾不费一弦【开宝七年十月诏曹彬潘美等伐江南所至克捷十一月以龙船数千艘为浮梁自采石矶以济大军八年十一月攻拔昇州擒唐国主李煜江南平】六朝妙人物【吴都秣陵晋元帝渡江复都焉宋齐梁陈皆因之】蔓草萦寒烟至今哀江南【後周书庾信有哀江南赋一首宋玉招魂篇末云魂兮归来哀江南庾信盖取诸此】咏歌在渔船穷山虎豹穴磨衲拥高年【谓法秀也按僧宝传秀在法云寺神宗遣中使赐香并磨衲】青天行日月坐看磨蚁旋【苏子美诗卧看青天行白云晋天文志日月实东行而天牵之以西没如蚁行磨石之上磨左旋而蚁西行】身将时共晚道与世相捐【庄子缮性篇世丧道矣道丧世矣世与道交相丧也】犹能揽壮观【史记封禅书云皇皇哉斯事天下之壮观】巨浸朝百川【元注云时秀禅师在鍾山寺○秀乃圆通禅师法秀也吕汲公铭其塔云元丰二年王荆公居金陵以礼邀师居鍾山之兴国寺兴国者公捐私财以治者也寺之事一听于公而後行师至之日告于衆曰以财管寺则宜归王氏以寺听命则宜归老僧一日公以所着佛书解义示师师曰文章之妙所不敢议然不可以智知殆非义学所能尽也公滋不悦师遂弃去按元丰二年岁己未而山谷此行盖三年庚申岁时秀师正在金陵庄子大浸稽天而不溺元佑间和东坡送李方叔诗又用此语云君看巨浸朝百川】

贈別李端叔【李之儀字端叔姑孰人舉進士元佑中為樞密院編修官東坡帥定武辟置幕下】

我觀江南山如目不受垢憶食江南薇子獨與我厚在北思江山如懷冰雪顏【杜詩試看他時冰雪容】千峯上云雨【列子周穆王篇化人之宮出云雨之上】岑絕何由攀當時喜文章各有兒子氣【漢高五王傳朱虛侯章嘗入侍燕飲高后兒子畜之】爾來頷須白有兒能拜起【史記三王世家皇子賴天能勝衣趨拜蜀志伊籍傳一拜一起未足為勞】讀書浩潮海解意開春冰【老子云渙若冰將釋春秋序若江河之浸膏澤之潤渙然冰釋怡然理順】成山更崇崛【論語譬如為山未成一簣止吾止也】顧我丑邱陵【丑類也】白玉著石中

与物本落落【老子不欲琤琤如玉落落如石】泾渭相将流世不名清浊【文选曹子建诗山峯高无极泾渭扬浊清注引毛萇诗云泾渭相入而清浊异】乞言既不易赠言良独难【晋桓伊传为君既不易为臣良独难】右来得道人挂舌屋壁间牧羊金华道载酒太玄宅【两事见前注】支颐聼晤语【陈国风云可与晤语传灯録天台丰干禅师传居国清寺厨中有二苦竹寒山拾得二人执爨终日晤语潜聼者都不解独与师相亲】愿君喙三尺【见庄子】我行风雨夜船牕闻远鷄故人不可见故人心可知【李陵与苏武书人之相知贵相知心】

阻风铜陵【铜陵县亦隶池州唐为铜官县五代改铜陵】

顿舟古铜官昼夜风雨黑洪波崩奔去天地无限隔【文选魏都赋岩冈潭渊限蛮隔夷】船人谨维竿【唐韵竿竹索也老杜桔栢渡诗驾竹为长桥连竿动嫋娜】何暇思挂席【杜诗挂席上南斗】凭江裂嵌空【嵌口衔切太白咏山樽云拥肿寒山木嵌空成酒樽】中有暗水滴洞视不敢前潭潭蛟龙宅【老杜瞿塘诗猿猱髯须古蛟龙窟宅尊】网师登长鱣贾我腥釜鬲【贾谊吊屈原赋横江潭之鱣鲸史记蔡泽传遇夺釜鬲于涂】斑斑被文章突兀喙三尺【老杜画鹢行初惊无拘挛何得立突兀喙三尺见前注】言语竟不通噉啜亦何益【吴都赋云噉啜浮沉】魁梧类长者【左太冲三都赋序风謡歌舞各附其俗魁梧长者莫非其旧魁梧奇伟见张良赞杜诗泉出巨鱼长比人】卒以釜饵得【庄子得鱼而忘筌注积柴水中使鱼依而食一云鱼筍庄子鱼鼈以江湖为浅而穴其中卒所以得之者饵也】浮沉江湖中波友永相失有生甚苦相细大更噉食【楞严经以人食羊羊死为人人死为羊死死生互来相噉】安得无垢称对榻忘语默【译梵云维摩罗诘此云净名又净无垢称按维摩经时维摩诘默无言文殊师利叹曰善哉乃至无有文字语言是真入不二法门】

阻水泊舟竹山下

竹山虫鸟朋友语【朋友语如张衡山王传乃昆弟语除前隙也】讨论陰晴怕风雨【论语世叔讨论之】丁宁相教防祸机【杜诗便觉莺语太丁宁祸机见前注】草动尘惊忽飞去【陆机豪士赋序风起尘合而祸至常酷】提壶归去意甚真【提壶见前注】柳暗花浓亦半春北风几日铜官县欲过五松无主人【五松山在铜陵西五里太白铜官山诗我爱铜官乐千年未拟还要须回?舞拂尽五松山】

池口风雨留三日

孤城三日风吹雨小市人家只菜蔬【杜诗小市常争米孤城早闭门】水远山长双属玉【上林赋鸿鹄鸕驾鹅属玉注云属玉似鸭而大长颈赤目苏子美诗属玉双飞水满塘菰蒲深处浴鸳鸯】身闲心苦一春锄【尔雅鹭春锄皮日休诗数点春锄烟雨微】翁从旁舍来收网【汉高纪高祖适从旁舍来】我适临渊不羡鱼【董仲舒策临渊羡鱼不如退而结网】俛仰之间已陈迹【王逸少兰亭禊饮序向之所欣俛仰之间已为陈迹】暮牕归了读残书

贵池【贵池池州所治县也元注云池人祀昭明为郭西九郎时新覆大舟水死者十二人以为神之威也】

横云初抹漆【卢仝月蚀诗云初既犹朦胧既久如抹漆欧阳文忠诗浮云蔽天衆星没举首向空如抹漆】烂漫南纪黑【诗滔滔江汉南国之纪老杜八哀诗相国生南纪】不见九华峰如与亲友隔【池州青阳县有九华山太白改九子山为九华山联句其序云青阳县南有九子山山高数十丈上有九峰按图徵名无所依据予乃削其旧号加以九华之目】忆当秋景明九老对几席何曾闭篷牕卧聽寒雨滴不食贵池鱼喜寻昭明宅【寰宇记贵池在县北七里按顾野王舆地志云梁昭明太子食此鱼美遂立名焉】笔砚鼠行尘【世说晋简文为抚军时所坐牀上尘不聽拂见鼠行迹视以为佳】芝菌生铜鬲【金鬲见前注郭璞曰鼎曲脚音历诗意谓无祀赛也】思成佳句梦贻我锦数尺【用江淹梦人索锦事】属者浪吞舟【汉李寻传属者颇有变注云近时也庄子云吞舟之鱼东坡诗黑沙白浪相吞屠】风雹更附益【论语而附益之】老翁哭妇儿相将难再得【白乐天诗有时还後到无处不相将汉外戚传佳人难再得此摘其字】存亡如日月薄蚀行道失【历家之说谓日光以望时遥夺月光故月食日月同会月掩日故日食日以朔食月食以望不尔谓之薄】流俗暗本源谓神吐其食【左传僖五年若晋取虞而明德以荐馨香神其吐之乎】神理傥有私邱祷久以默【见论语】

大雷口阻风【同安志云大雷口属舒州望江县去县三十里】

号檣下沧江避风大雷口天与水馍糊【乐天诗平明山雪白馍糊杜诗子章髑髅血馍糊摘此二字】不复知地厚【荀子不临深壑不知地之厚也杜诗坡陀因地厚】谁家上江船【杜诗百丈谁家上水船】狂追雪山走孤村无十室【杜诗孤村春水住论语十室之邑】旅饭困三韭【南史庾杲之贫食惟有韭菹漚韭生韭见前注】黄芦麋鹿场【幽风东山云町疃鹿场】此地广千肘【传灯録尊者在世化导证果最多每度一人以筹置于石室纵十八肘广十二肘译梵云二尺成一肘四肘成一弓】得禽多文章【当谓雉也】肯顾鱼贯柳【见前注】莽苍天物悲【庄子适莽苍者三餐而反音义云莽苍皆平上二音】雕弓故在手鹿鸣犹念羣【小雅呦呦鹿鸣食野之萍注云鹿得萍呦呦然鸣而相呼家语夫子云关雎兴于鸟而君子美之取其雌雄之有别鹿鸣兴于兽而君子大之取其得食而相呼】雉媒竟卖友【文选潘安仁射雉赋序云习媒翳之事注曰媒者少养雉子至长狎人能招引野雉也卖友见汉书酈商传赞曰当孝文时天下以酈寄为卖友夫卖友者谓见利而忘义也若寄父为功臣而又执刦虽摧吕禄以安社稷谊存君亲可也】商人万斛船挂席上牛斗【挂席见前注】横笛倚柁楼【晋王廙传柁楼长啸神气甚逸】波深苍龙吼失水不能神【楚辞神龙失水而陆居为蝼蚁之所裁退之三星行嗟汝牛与斗汝独不能神】伐葭作城守【汉高祖纪闭城城守注谓守其城也龙之自卫亦若守城焉】欲寄大雷书【鲍明远文集中有登大雷岸与妹书即此地也太白秋浦寄内云结荷倦水宿郤寄大雷书】往问长干妇【古乐府有长干曲李太白有四首其间云十四为君妇羞顔未尝开文选吴都赋长干延属注云江东谓冈间为干池州隶江东】何当楫迎汝【玉台新咏王献之桃叶歌桃叶复挑叶渡江不用楫但渡无所苦我自迎接汝一作楫迎汝】秦淮绿如酒【杜牧诗烟笼寒水月笼沙夜泊秦

淮寄酒家刘禹锡诗淮水东边旧时月夜深还过女墙来此金陵五题也按寰宇记秦淮乃秦所凿在丹阳湖姑孰之界西北流经建康绵亘三百里左传昭十四年有酒如淮有肉如坻】

庚寅乙未犹泊大雷口【按国史元丰三年十二月巳丑朔庚寅盖初二日也】

广原嘒终风【诗终风且霾】发怒土囊口【宋玉风赋盛怒于土囊之口】万艘萍无根【文选吴都赋浑万艘而既同杜诗舟楫无根蒂】乃知积水厚【庄子逍遥篇水之积也不厚则负大舟也无力】龙鳞火荧荧【子虚赋照烂龙鳞】鞭笞雷霆走【退之诗不如散仙鞭笞鸾凤终日相迫陪杜诗安得鞭雷公】公私连樯休森如束春韭【杜诗夜雨剪春韭】倚筇蒹葭湾垂杨欲生肘【庄子至乐篇俄而柳生其左肘】雄文酬江山惜无韩与柳【退之子厚】五言呻吟内【杜诗作诗呻吟内墨淡字敲倾】惭愧陶谢手【杜诗焉得思如陶谢手令渠述作与同游】送菜烦邻船【杜诗园官送菜把】买鱼熟溪友【杜诗溪友得钱留白鱼】儿童报晦冥正画见箕斗【杜诗儿童报急流易丰之九三日中见斗】吾方废书眠【史记乐毅赞未尝不废书而泣也杜诗老困拨书眠】鼻鼾鼹囊吼【鼹韦囊吹火步拜功亦作排魏志韩暨作水排说文云鼾鼻息也音旱退之外集有嘲鼾睡诗二首】犹防盗窥家严鼓申夜守治城谢公墩【寰宇记昇州江宁县开皇移于治城唐武德移白下贞观移还治城六朝事迹谢安墩在南山报宁寺之後基址尚存太白诗治城访古迹犹存谢安墩介甫诗我名公字偶然同我屋公墩在眼中公去我来墩属我不应墩姓尚随公人言王介甫性好争退居与谢安争墩见诗话】牛渚荡子妇【寰宇记太平州当涂县有牛渚山望夫山皆在县北昔人往楚累岁不还其妻登此山望夫乃化为石文选右诗昔为娼家女今为荡子妇荡子游不归空牀难独守】何时快登临篙师分牛酒【文选吴都赋篙工楫师杜诗稽留篙师怒後汉耿弇传击牛酺酒】

乙未移舟出口【元注云畏风涛复入遂宿焉同行有刘三班善射沙夹遇盗刘手杀三人】

江湖吞天胸【杜牧之诗大江吞天去一练横坤抹今言江之吞天如人之胸量阔也子虚赋吞若云梦者八九其于胸中曾不芥蒂吴都赋或吞江而纳汉】蛟龙垂涎口【柳子厚岭南诗山腹雨晴添象迹潭心日暖长龙涎欧阳公乞致仕表上赖至仁脱臣于蛟鳄垂涎之口】养躯无千金【沈约杂诗坐丧千金躯杜诗王孙善保千金躯】特为亲故厚【自言此身不足惜而临危忧恐为母在故耳】本心非华轩【选诗金张服貂冕许史乘华轩】而与马争走【荀子云君子力如马而不与马争走司马迁答任安书曰太史公牛马走】聘妇缉落毛【昭明太子作渊明集序云或货海东之药草或纺江南之落毛盖用列女传楚老莱妻曰鸟兽之解毛可缉而衣之其遗粒可拾也庾信诗曰蒙吏观秋水莱妻缉落毛】教儿耨葱韭【庄子徐无鬼篇食芋栗厌葱韭】衣食端须几【渊明诗衣食常须几】将老犹掣肘【家语宓子贱为单父宰辞行请君之近史二人与之俱至官令二史书辄掣其肘书不善则怒之二史辞归鲁报于君君太息曰寡人乱宓子之政而责其善者数矣遽发使告宓子曰自今单父非吾有也从子之制宓子得行其志于是单父治焉】安能诡随人曲折作杞柳【诗民劳云无纵诡随孟子云以杞柳为桮棬】桓公瓮盎瘿【庄子德充符篇瓮盎大瘿说齐桓公公悦之而视全人其胹肩肩】楚国不龟手【庄子第一篇宋人有善为不龟手之药者客得其方

以说吴王越有难吴王使之将冬与越人水战大败越人裂地而封之今日楚国恐误】生涯但如此那问托?友【书盘庚至于?友】久陰快夜晴天文若科斗村南鬼火寒【杜诗陰房鬼火青坏道哀湍泻】村北风虎吼野人驱鷄豚缚落坚纏守刘郎弓石八猛气厌冯妇【孟子曰晋人有冯妇者善抔虎虎负嵎莫之敢撓望见冯妇趋而迎之冯妇攘臂下车衆皆悦之其为士者笑之】一试金仆姑【左传庄十一年公以金仆姑射南宫长万注矢名】归饮软臂酒【大唐稽疑云郭子仪自同州归代宗诏大臣就宅作软脚局今挽弓故曰软臂】

丙申泊东流县【东流建德二县皆隶池州元注云语曰东流速客惊动建德】

前日发大雷真成料虎头【庄子盗跖篇孔子曰邱所谓料虎头编虎须几不免虎口哉】今日伐鼓出【诗采芑伐鼓渊渊】棹歌傲阳侯【战国策塞漏舟而轻阳侯之波则舟覆矣屈原哀郢云陵阳侯之泛滥兮忽翱翔之焉薄太白诗谗浪棹海客喧呼傲阳侯】沧江百折来及此始东流东流会宾客建德椎羊牛野语尚信然小市黄芦洲惟有采薪翁经营往来舟楫尽斤斧【上林赋沙棠栢楮音历诸】山童烟雨愁【孙卿子曰斩伐养长不失时故山林不童公孙宏传山不童泽不涸】

书石牛溪旁大石上【同安志云石牛洞在三祖山山谷寺之西北其石状若伏牛因以为名初李伯时画鲁直坐石牛上因此号山谷道人题诗石上所谓青牛驾我山谷路也】

郁郁窈窕天官宅【黄庭经云郁郁窈窕真人墟真人即天官也】诸峰排霄帝不隔六时谒天开关键我身金华牧羊客【见前注】羊眠野草我世间高真衆灵思我还石盆之中有甘露青牛驾我山谷路【刘向列仙传李耳字伯阳陈人也生于殷时为周柱下史转为守藏吏积八十余年後周德衰乃乘青牛车去入大秦西过关关令尹喜知其真人也乃强使着书作道德上下经】

题山谷大石

畏畏【音委】佳佳【音觜】石谷水【庄子齐物篇山林之畏佳注云大风之所扇动也释音云畏于鬼反佳醉鬼反】冬冬隆隆山木风【揚雄解嘲云炎炎者灭隆隆者絶注云隆隆雷声也】炉香四百六十载开山者谁梁宝公【谓宝志也同安志云飞锡泉在三祖山後宝公自金陵飞锡而至以相山谷寺基泉为之涌出遂寓此山今资壽殿有宝公遗像】

同苏子平李德叟登擢秀阁【同安志云擢秀阁在舒州彰法寺乃陈莹中读书处自此登第黄鲁直名而书之城中楼观与城北山水凭栏尽见】

筑屋皖公城木末置曲栏【杜诗我行已水滨我仆犹木末】岁晚对烟景人家橘柚间【李白诗人烟寒橘柚秋色老梧桐】独秀司命峰【同安志司命峰至皖山二里有九天司命真君祠】衆口让高寒【退之作刘统军碑云仍世北边乐其高寒】松竹二乔宅【同安志孙策周瑜得桥公二女今郡城东有佛庐世传为公故宅】雪云三祖山【纂异一本作暮雨二

乔宅孤云三祖山○山谷寺在怀宁县西有三祖僧璨大师塔】衰怀造胜境转觉落笔难苏李工五字属联不当慳【文选李陵苏武相赠答诗皆五字句以比二子取其同姓】

灵龟泉上【同安志载此诗注云灵龟泉在皖口中路去州七十里】

大灵壽日月化石皖公陂偶无斧斤寻【左传文七年谚所谓庇焉而纵寻斧焉者也】不作宰上碑【王建诗涧底盘陀石渐稀尽向坟前作羊虎灵龟泉铭有序其略云发皖口而西四十里泉淙淙行山径乱石间坎甃清彻项有大石如龟引气云云宰上已见前注】倾首若有谓指泉来自西泉甘崖木老坐歎欲忘归风流裴通直【一作裴髯喜幽事】商略从我嬉【世说商略先往名逵】蒔梅盈百科洗石出崛奇【文选创阿房之崛奇退之诗心迹两崛奇】更约聘石工鑱我灵龟诗舅弟妙学古【元注云舅弟李德叟按韩文柳子厚墓志云葬子厚于万年之墓者舅弟卢导舅弟之称盖出于此】亦复古须眉卿家北海公【谓李邕也】笔法可等夷【张良传诸将皆陛下故等夷杜诗雅量涵高远清襟照等夷】为我书斯文要与斗牛垂

从邱十四借韩文二首

吏部文章万世吾求善本编窥散帙云牕棐几同安得见邱迟【谢灵运诗散帙问所知太白诗得憩云牕眠王羲之传诣门生家见棐几滑净因书之南史邱灵鞠传子迟词采丽逸同安今舒州也】

中有先君手泽【礼玉藻父没而不能读父之书手泽存焉耳】丹铅点勘书诗【退之秋怀诗不如观文字丹铅事点勘】莫惜借行千里他日还君一鸕【古语借书一痴还书一痴苏黄诗乃作鸕详见胡朝请借书目注】

发舒州向皖口道中作寄李德叟【同安志云皖口镇去州八十里】

黑云平屋檐【一作崔嵬云压空李贺诗黑云压城城欲摧】晨夜隔星月晓装商旅前冰底泥活活野人攘畔耕【一作侵畔耕史记帝纪舜耕历山历山之人皆让畔文选注云朝子曰历山农侵畔者舜往而耕者让河滨渔者争坻舜往而渔者让】蹇马不能滑驼裘惜蒙茸【左传狐裘蒙茸】俱落水塘缺孤材小蜗舍【三国志焦先传先尝作小庐形如蜗牛壳故曰蜗牛庐白乐天诗凤池隔絶三千里蜗舍沉冥十五春】乞火乾履襪【汉蒯通传束縕乞火崔浩女仪冬至进履襪于舅姑见初学记】前登极峥嵘【一作高寒】他日飞鸟没寒花委乱草【杜诗寒花隐乱草宿鸟择深枝】耐冻鸣风叶【一作耐冻风叶闲梅苔零乱发】江形篆平沙【退之联句沙篆印回平】分派回劲笔髯弟不俱来得句漫剗【一作漫得句奇崛甘泉赋般倕弃其剗蒯注云剗曲刀也蒯曲凿也 蒯同音居卫切亦见楚辞】却望同安城惟有松郁郁【选诗郁郁涧底松】遥知浦口晴诸峰见明雪【一作松雪选诗山明望松雪】

庭坚得邑太和六舅按节出同安邂逅于皖公溪口风雨阻留十日对榻夜语因咏谁知风雨夜复此对牀眠别後觉斯言可念列置十字字为八句寄呈十首【同安郡舒州也有皖公山六舅谓李常字公择也提点淮南西路刑狱提刑司在舒州】

鹄白不以乌【庄子天运篇鹄不日浴而白乌不日黔而黑】兰香端为谁【家语兰生深林不以无人而不香】外家秉明德晚与世参差【退之诗岂敢尚幽独与世寔参差】乖离岁十二【渊明答庞参军诗序云人事好乖便当语离】会面卒卒期【杜诗主称会面难司马迁传卒卒无须臾之闲】何言灊邱底玉稻同一炊【舒州有灊山一名天柱】

沧江渺无津同济共安危【书微子云若涉大川其无津涯孙子曰同舟济而遇风其相救也如左右手言世路风波也】四海非不广舅甥自相知孔鸾在榛梅【上林赋遁孔鸾促鵠退之诗明庭集孔鸾以喻公择言处非其地】鷦鷯亦一枝【庄子鷦鷯巢于深林不过一枝此以自喻】千里同明月【见前注】相期不磷缁【韩诗方为金石姿万世无缁磷杜诗但取不磷缁磷缁字出论语】

少小长母家拊怜辈诸童食贫走八方【卫国风氓三岁食贫】略已一老翁【见前注】不能成宅相【晋魏舒传少孤为外家甯氏所养甯氏起宅相宅者云当出贵甥外祖母以盛氏甥小而慧意谓应之舒曰当为外家成此宅相北史邢晏称其甥李绘曰如对珠玉宅相之寄当在此甥李白别从甥高五诗能成吾宅相不减魏阳元】颇似舅固穷【论语君子固穷晋何无忌传桓玄曰何无忌刘牢之之甥酷似其舅】何以报嘉德取琴作南风【礼记舜作五弦之琴以歌南风一作鼓琴歌南风】

德人心寂寥立朝实庄语【庄子天下篇以天下为沉溺而不可与庄语公择熙宁初自太常博士改右正言论新法通判滑州知鄂湖齐三州徙淮西提刑】虎节坐山城【周礼地官掌节云凡邦国之使节山国用虎节】孤云犹能雨文章被甥侄孝友谐妇女偃息一亩宫植梅当歌舞【诗北山或偃息在牀儒行云儒有一亩之宫】江都克家才【易蒙卦子克家】万卷书插架【退之诗邺侯家多书架插三万轴】愿言渠出仕从舅问耕稼谁云濒老境【曲礼曰耆指使释文耆至也至老境也】此子即长夜【杜诗短褐即长夜】归欤淼前期蒔橘锄甘蔗【元注云江都尉李攄字安诗】

曩窥涉世方白驹且场穀【小雅皎皎白驹食我场谷】平生漫岁晚志尚向山木【庄子有山木篇言山中之草木以不材得终其天年焉】返身观小丑【孟子反身而诚乐莫大焉】真成覆车轍【晋书石季龙传快牛为犊子时多能破车汝当小忍之】否臧太磊磊从此更三复【潢郑当时不敢甚斥臧否诗意盖悔其有所评品欲三复白圭也】负薪反羊裘爱表只伤里【魏志明帝破诸葛亮露布曰亮反裘负薪里尽毛殫事本出新序其词曰魏文侯出游见路人反裘而负刍问之对曰臣爱其毛文侯曰若不知其里尽而毛无所恃耶明年东阳上计钱布十部文侯曰此无异夫路人反裘而负刍也民不加衆而钱十倍必取之民也】补纫虽云工岁晏安可恃洗心如秋天【易系辞云圣人以此洗心退藏于密】六合无尘滓【庄子出入六合游乎九州晋会稽王道子戏谢重曰卿强欲滓秽太清耶】浮云风去来在彼

不在此【此篇有所讽】

阿髯学升堂【德叟】干母思靡悔【蛊九二干母之蛊】文成艺桃李不言行道兑【大雅绵曰行道兑矣兑成蹊也此用李广赞桃李不言下自成蹊】阿苏妙言语机警欲无对子侄何预人兰玉要可佩【阿苏舅氏幼子晋谢玄传叔父安尝戒约子侄因曰子弟何预人事而正欲其佳玄曰如芝兰玉树欲其生于堦庭耳】

解衣卧相语涛波夜掀牀十年身百忧险阻心已降【诗我心则降】涉旬风更雨宿昔烛生光衾裯无端冷明月一船霜【诗小星抱衾与裯注衾被也裯单被也郑云裯牀帐也尔雅裯谓之帐楚辞翳阿拂壁罗裯张又云翡翠翠裯饰高堂杜诗邂逅无端出钱迟】

亲依为日浅【李密陈情表母孙二人相依为命祖母刘今年九十有六是臣尽节于陛下之日长报刘之日短也】爱不舍我眠【退之示爽诗座中悉亲故谁肯舍汝眠】教我如牧羊更着後者鞭【庄子達生篇善养生者若牧羊然视其後者而鞭之】得邑还梅岭开花向春妍【杜诗短日行梅岭】碌碌幸苟免称觴大人前【晋周顗母李氏字络秀顗等并列顗位尝置酒络秀举觴曰吾本渡江托足无所不谓尔等并贵列吾目前嵩起曰伯仁志大而才短名重而识暗非自全之道嵩性抗直亦不容于世惟阿奴碌碌当在阿母目下耳阿奴谡小字也後果如其言大人自言其母也後汉范滂就诛与母诀曰大人割不忍之爱勿增戚戚韩文柳子厚墓志播非人所居而梦得亲在堂吾不忍梦得之穷无词以白其大人汉淮阳王钦传王遇大人益解注云自称其母也】

题马当山鲁望亭四首【元注云彭泽旧治所】

马当一曲孤烟【按寻阳志马当山江州彭泽县西四十里高八十丈其下无底有庙封为上元水府陆龟蒙字鲁望有马当山铭大概言太行吕梁马当合是三险而为一未敌小人方寸之包藏名亭曰鲁望以此故也因画陶元亮等四人】人物于今眇然【当今人物渺然王逸少帖中语也】不见绕篱黄菊【陶诗采菊东篱下】谁收种秫圭田【一作有地自荒杭稻无人更与酒钱晋书陶潜传潜字元亮为彭泽令在县公田悉令种秫谷曰令吾常醉于酒足矣妻子固请种杭乃使二顷五十亩种秫五十亩种杭圭田见孟子老杜赠郑云赖有苏司业时时与酒钱】

右元亮

鲸波横流砥柱【杜诗溟涨鲸波动刘梦得诗世道剧颓波我心如砥柱禹贡砥柱在陕州硤石县熙宁废县为镇隸陕县河水分流包山而过若柱然唐太宗勒铭于此】虎口活国宗臣【庄子盗跖篇几不免虎口哉汉叔孙通传云通自言几不免虎口唐狄仁杰传力劝武后迎庐陵王曰立庐陵王则千秋万岁後常享宗庙三思立庙不祔姑后感悟即日迎王于房州杜诗冀公柱石姿论道邦国治汉萧曹赞为一代之宗臣】小屈弦歌百里【仁杰尝为来俊臣所诬捕送制狱已承反减死贬彭泽令人为置生祠】不诬天下归仁【小屈一作少日不诬】

一作莫言论语一日克已复礼天下归仁焉】

右狄梁公

不见鲁公断石谁家为础为杠【鲁公当是贬吉州司马时经行此地有纪行碑石而不存疑其为基础以荐柱或为桥梁也孟子云十一月徒杠成注疏引说文云石杠石桥也俗作杠从木】笔法锥沙屋漏心期晓日秋霜【心期见前注】

右顏鲁公

笠泽道人高古【吴郡图经曰松江一名笠泽陆鲁望居甫里号所注书曰笠泽丛书李白宣城青溪篇山见日高古石容天倾侧】文章白发萧条【一作文章岁寒後雕】欲问勒铭遗墨【即马当铭】应书水府蛟绡【吴都赋泉室潜织而卷绡渊客伉慨而泣珠注云俗传蛟人从水中出曾寓人家积日卖绡绡即孚俞也临去索器泣而出珠满盘以遗主人】

右陆鲁望

泊大孤山作【元注云庚申十二月作庚申盖元丰三年也是年赴太和有寄李公择诗序云元丰庚申得邑太和此诗当在宫亭湖诗之前大孤山在德化县东四十五里大江中】

汇泽为彭蠡【书禹贡东汇泽为彭蠡】其容化鵬鵬【见庄子第一篇】中流擢寒山正色且无朋【庄子天之苍苍其正色耶诗椒聊硕大无朋退之诗汝岂无朋匹】其下蛟龙卧宫谯珠贝层【屈原九歌紫贝阙兮珠宫谯城也】朝云与暮雨何处会高陵【高唐赋旦为朝云暮为行雨】不见凌波韞【洛神赋凌波微步罗韞生尘】靓妆照澄凝【上林赋靓妆刻饰欧阳归田录江南有大小孤山在江中嶷然独立而世俗转孤为姑江侧有一石矶谓之彭浪矶遂转为彭浪矶云彭浪小姑壻也予过小孤山庙像乃一妇人而敕额为圣母庙岂止俚俗之谬而东坡亦有小姑嫁彭浪之诗今山谷诗中亦用世俗相传之语退之诗凝澄闰陰罍】空余血食地猿啸枯楠藤高帆驾天来【退之诗高浪驾天输不尽】落叶聚秋蝇幽明异礼乐【礼记明则有礼乐幽则有鬼神】忠信岂其凭【白乐天入峡诗一跌无完舟吾生系于此常闻使忠信蛮貊可行矣扬子岂其卿岂其卿】风波浩平陆何况非履水【诗如履薄冰】安得旷達士霜晴尝一登【老杜登慈恩寺塔诗自非旷士怀登兹翻百忧】题落星寺四首【山谷真蹟前二首题云题落星寺第三首题云题落星寺岚漪轩第四首题云往与道纯醉卧岚漪轩夜半取笔题壁间又有蜀本石刻前一首题云落星寺僧请题诗而首句作游空天象有竇坠又昼吟作画倚江撼牀作波撼牀蜜房作蜂房牖户作户牖青云梯几级作虚空更几级瘦藤作一藤而第四首石刻题作醉书落星寺壁时与刘道纯同饮二僧在焉四诗非同时作後人类聚于此故诗语有重复不可指其岁月】

星宫游空何时落【寰宇记落星石在江州庐山东周回一百五步高丈许】着地亦化为宝坊【宝坊见前注落星寺在彭蠡湖中】诗人昼吟山入座【白乐天诗高堂虚且迴坐卧见

江山王禹偁诗随船晓月孤轮白入坐晴山数点青】醉客夜愕江撼牀蜜房各自开牖户【魏志管辂射覆卦成曰家室倒悬门户衆多此蠡窠也杜诗风落收松子天寒割蜜房】蚁穴或梦封侯王【用异闻集淳于棼梦入大槐安国事详见後宿观音院诗注】不知青云梯几级【墨子公输班为云梯以攻宋文选谢灵运诗共登青云梯】更借瘦藤寻上方【上方见维摩经杜诗上方楼阁晚】

岩岩正俗先生庐【後汉郡国志庐州郡寻阳注云释慧远庐山记曰寻阳南滨宫亭湖有匡俗先生者出殷周之际隐遁潜居时人谓其所止为仙人之庐而命焉匡俗字君平寻阳记匡俗先生庐在德化县南三十里】其下宫亭水所都【荊州记宫亭即彭蠡湖也】北辰九阙隔云雨【尔雅北极谓之北辰九关见楚辞】南极一星在江湖【杜诗南极一星朝北斗】相黏蚝山作居室【退之初南食云蚝相黏为山百十各自生岭表録异云蚝即牡蛎也初生海岛边如拳石渐长有高一二丈者杂俎云介虫中惟牡蛎是咸水中生】窍凿混沌无完肤【庄子应帝王篇儻与忽谋报浑沌之德曰人皆有七窍以听视息此独无有尝试凿之日凿一窍七日而浑沌死】万鼓舂撞夜涛涌【退之泷吏诗险恶不可状船石相舂撞】骊龙莫睡失明珠【见前注】落星开土深结屋【楞严经云竝其同伴十六开土杜诗独在深崖结茅屋】龙阁老翁来赋诗【元注云寺僧择隆作晏坐小轩为落星之胜处龙阁老爷当谓李公择南康军建昌人庐山亦在南康境内必有赋咏按元佑三年八月丙子御史中丞李常充龙图直学士其赋诗当在此前】小雨藏山客坐久【庄子大宗诗篇藏舟于壑藏山于泽】长江接天帆到迟燕寝清香与世隔【韦应物诗燕寝凝清香】画图妙絶【一作絶笔】无人知【元注云僧隆画甚富而寒山拾得画最妙】蜂房各自开户牖处处煮茶藤一枝北风吹倒落星寺吾与伯伦俱醉眠【晋刘伶字伯伦以况刘道纯】螟蛉蜾蠃但痴坐【刘伶酒德颂云二豪侍侧焉如蜾蠃之与螟蛉蜾蠃螟蛉本出诗又见揚子】夜寒南北斗垂天【元注云戏题落星寺壁时与刘道纯俱饮二僧在焉】

山谷外集诗注卷八

山谷外集诗注卷九

<集部,别集类,北宋建隆至靖康,山谷外集诗注>

钦定四库全书

山谷外集诗注卷九

宋 黄庭坚 撰

史 容 注

玉京轩【元注云玉京山在炉峯下落星寺僧开轩对之○按慕异蜀本云苍山其下白玉京广成安期来访过紫云黄雾镇玄关雷驱不祥电挥扫上有千年来归之白鹤下有万世不凋之瑶草野僧云卧对开轩炉香霏霏日杲果稻田衲子非黄冠一鉢安巢若飞鸟莫见仙人乞玉泉问取紫霄耶舍老又山客有真蹟跋语云将旦起坐复得长句忽忽就竹舆不暇写岁行一周道纯已凋落为之陨涕故书遗超上人可刻石於吾二人醉处他日有与予友及道纯好事者尚徘徊碑侧元佑六年大寒黄庭坚书自元佑逆数元丰盖庚申岁一周也】

苍山其下白玉京五城十二楼【史记封禅书方士有言黄帝时为五城十二楼以候神人命曰迎年太白诗云上白玉京十二楼五城】郁仪结邻常杲杲【黄庭经云郁仪结邻善相保注云郁仪奔日之仙结邻奔月之仙毛诗杲杲出日】紫云黄雾鑱玄关【文选王简栖碑云玄关幽键】雷驱不祥电挥扫【韩文送李历归盘谷序云鬼神守护兮阿禁不祥老杜诗去秋羣胡反不得无电挥】上有千年来归之白鹤【续搜神记辽东华表柱有鹤歌曰有鸟有鸟丁令威去家千岁今来归城郭犹是人民非何不学仙冢累累】下有万世不凋之瑶草【江淹香炉峯诗瑶草正翕葩注云玉芝也老杜诗方期拾瑶草李太白诗上有无花之古树下有伤心之春草】野僧云卧对开轩【杜诗云卧衣裳冷】一鉢安巢若飞鸟【传灯录有道吾和尚一鉢歌】北风卷沙过夜窗枕底鲸波撼蓬岛【太白诗白波连山倒蓬壶又云海鲸东蹙百川回】个中即是地行仙但使心闲自难老【楞严经第八卷有十仙种名地行仙其一也】

过致政屯田刘公隐庐【刘涣字凝之筠州人举进士为颍上令以刚直不屈弃官家于庐山之阳时年五十欧阳公为作庐山高按蜀本拜刘凝之画像诗置之崇宁元年时山谷自荆入岳遵陆至萍乡回途自筠阳豫章山行由东林太平观至江州初不经南康且道纯已卒於元佑前而诗中有少子似公贤之句则是诗作于元丰无疑】

儿时拜公牀【後汉马援传尝有疾梁松来侯之独拜牀下又龐公传注诸葛孔明每至德公家独拜牀下】眼碧眉紫烟【祖庭事苑初祖達磨眼有紺青之色故称祖曰碧眼】舍前架茅茨炉香坐僧禅女奴煮鬻粟【杜诗童子能煎鬻粟汤】石盆泻机泉【退之联句云机春

潺湲力庄子天地篇凿木为机後重前轻挈水若抽其名为橈】今来扫门巷【杜诗三年门巷空】竹间翁蛻蟬【退之谢自然诗入门无所见冠屨同蛻蟬】堂堂列五老【寰宇记云五老峯在庐山东高崖突出如五人相逐罗列之状】胜气失江山石盆烂黄土茅斋薪坏椽女奴为民妻又瘞蒿里园【汉武五子传广陵厉王歌曰蒿里召兮郭门闕注云死人里也】当年笑语地华屋转朱栏【曹子建诗生存华屋处】课儿种松子伞盖上参天【文选曹子建诗荆棘上参天】投策数去日木行天再环【尚书考灵耀云岁星木精也岁星十二岁一周天自儿时拜公牀至是二十四年矣恐是山谷儿时尝拜凝之至元丰庚申岁过其隐庐盖天再环矣山谷时年三十六则拜凝之时年十二必少时自豫章至南康也】先生古人风铁胆石肺肝【皮日休称宋广平铁肠石心见日休桃花赋序文选曹子建三良诗哀哉伤肺肝】眼前不可意壮日挂其冠解衣庐君峯【按世说言远公在庐山事引豫章旧志曰庐俗字君孝本姓匡夏禹苗裔野王助汉定天下野王亡军中汉封俗鄱阳男食邑於兹印曰庐君故世谓庐山又引远法师庐山记有匡俗先生庐】洗耳瀑布源【庄子尧让天下于许由巢父闻之而洗其耳李白庐山瀑布诗云日照香炉生紫烟遥看瀑布挂长川飞流直下三千尺疑是银河落九天】雾豹藏文章惊世时一斑【见前注】衆人初易之久远乃见难【退之答李翱书及之而後知履之而後难耳】忆昔子政在为翁数解顔【刘向字子政以比道原也道原名恕字凝之子列子云老商始一解顔而笑】五兵森武库【周礼夏官司兵五盾注戈殳戟酋矛夷矛晋杜预传号曰杜武库言其无所不有也道原博学强记裴楷传目鍾会云如观武库森森但见矛戟在前】河汉落舌端【庄子第一篇肩吾问于连叔曰吾闻言於接輿吾惊怖其言犹河汉而无极也韩诗外传君子避三端避文士之笔端避武士之锋端避辩士之舌端】王阳已富贵尘冠不肯弹【汉书王吉字子阳与贡禹为友世称王阳在位贡禹弹冠道原与王介甫有旧介甫欲引道原修三司条例辞不就因言宜恢张尧舜之道不应以财利为先介甫不能用亦未之怒也及吕海得罪知邓州道原见介甫曰公所以致人言盖亦有所未思因为条陈所更法令不合衆心者宜复其旧则议论自息介甫怒遂与之絶道原以亲老遂告归南康乞监酒税以就养】呻吟刊十史凡例墨新乾【道原着十国纪年四十二卷杜预春秋经传集解序云其发凡以言例皆经国之常制又云修丘明之传以释经经之条贯必出于传传之义例总归诸凡老杜八哀诗赠李邕云各沟深望还森然起凡例】宰木忽拱把【庄子人间世云宋有荆氏者宜楸柏桑其拱把而上者求狙猴之杙者斩之宰木见前注】相望风隧寒【左传隐元年颍考叔曰若阙地及泉隧而相见其谁曰不然注云隧若今延道】百楹书万卷少子似翁贤【少子谓道纯也】

壽圣观道士黄至明开小隐轩太守徐公为题曰快轩庭坚集句咏之【洪觉范冷斋夜话云山谷在星渚赋道士快轩诗点笔立就其略曰吟诗作赋北窗里万言不及一杯水愿得青天化作一张纸想见其高韵气摩云霄也觉范安知此为何人语而遽评品也星渚即落星湾已见前注山谷以集句为百家衣而此篇专取太白一家略间他人言以成章也太白古风云金华牧羊儿乃是紫阳客襄阳歌云鸬鹚杓鹦鹉盃百年三万六千日一日须倾三百盃清风明月不用一钱买玉山自倒非人推蜀道难云砭崖转石万壑雷寒夜独酌云吟诗作赋北窗里万言不直一杯水山中对酌云两人对酌山花开一杯一杯复一杯庐山謡云庐山秀出南斗傍银河倒挂三石梁送窦明府云有长鲸白齿若灵山选诗云桂水日千里因之平生怀古乐府罗敷行使君东南来五马立踟蹰吕洞宾诗云一粒粟中藏世界二升铛内煮乾坤】

金华牧羊儿一粒粟中藏世界使君从南来清风明月不用一钱买鸬鹚杓鹦鹉杯一杯一杯复一杯玉山自倒非人推卢山秀出南斗傍登高送远形神开银河倒挂三石梁砮崖转石万壑雷吟诗作赋北窗里安得青天化作一张纸有长鲸白齿若雪山我愿因之寄千里

驻輿遣人寻访後山陈德方家

江雨蒙蒙作小寒雪飘五老髮毛斑【五老峯见前注】城中咫尺云横栈独立前山望後山

题李夫人偃竹【李夫人山谷之姨母公择之妹善临松竹木石见米芾画史】

孤根偃蹇非傲世【唐杜审言传恃才高以傲世】劲节癯枝万壑风闺中白髮翰墨手落笔乃与天同功【唐李贺诗笔补造化天无功】次韵章禹直开元寺观画壁兼简李德素【禹直字嗣功尝以书上言新法羁管洪州详诗中语意山谷未赴太和家居时作】

丹青古藏壁风雨饱侵食拂尘开藻鉴【老杜诗持衡留藻监】志士泪沾臆【老杜云人生有情泪沾臆】灵山远飞来不可以智测【?安灵隐山有飞来峯晏元献輿地志云晋咸和元年西天僧慧理曰此是中天竺国灵鹫山之上岭不知何年飞来】龙神湛洄向【楞严经有十回向】拥卫立劒戟依稀吴生手旌旆略可识【老杜云昼手看前辈吴生远擅场又曰冕旒俱秀发旌旆尽飞扬又云依稀橘奴迹】鸿蒙插楼殿【张衡思玄赋踰鸿蒙于岩冥兮贯倒景而高厉老杜灵湫作云东山气蒙鸿宫殿居上头又岳麓山道林二寺行云殿聊插入赤沙湖】毫髮数动植【周礼大司徒其动物宜毛物其植物宜早物杜诗直欲数秋毫】广林瞻二圣有衆拱万亿【诗云万亿及秭】飞行凑六合【庄子六合之内圣人论而不议六合之外圣人存而不论】揽取着一席人人开生面【老杜丹青引凌烟功臣少顔色前事下笔开生面】絶妙推心得【庄子得之心应之手世说曹娥碑题云絶妙好辞】李侯天机深【庄子大宗师篇其嗜欲深者其天机浅杜诗刘侯天机精】指点目所及【杜诗指点虚无是征路】三生石上梦【甘泽謡记图泽事云图泽歌曰三生石上旧精魂赏月吟风不要论惭愧情人远相访此身虽异性长存】天乐鸣我侧【太白登瓦官阁诗漫漫雨花落嘈嘈天乐鸣又东林寺诗天香生虚空天乐鸣不歇】幽寻前日事【退之诗幽寻事随去】晦明忽复易章生南溟鹏【庄子北溟有鱼化而为鸟其名为鹏海运则将徙于南溟】笼檻鎖六翮【韩诗外传鸿鹄一举千里所恃者六翮耳】能同寂寞游浊酒聊放适【文选嵇叔夜书浊酒一盃弹琴一曲志愿毕矣】西风叶萧萧蟋蟀依墙壁【月令季夏蟋蟀居壁】家无万金产【退之诗指渠相贺言此是万金产】四邻碓声急【杜诗白帝城高急暮碓】藜羹傲鼎食【见前注退之送惠师云囊无一金资翻为富者贫】蓝缕亦山立【左传宣十二年筓路蓝缕乐记緦干而山立玉藻山立时行言虽贫而不动如山也】并船有歌妹粉白眉黛黑【淮南子云粉白黛黑韩文云粉白黛緑】期公开顔笑醉语杂翰墨不须谈俗事祇令人气塞【淳化帖王羲之书云而艰疾若此令人短气唐书田令孜矫诏杀孟昭国闻者气塞而不敢言此言 丰之政】

丰城【元注云亭上有李卫公劒池赋世父长善石堤记○丰城乃洪州属邑洪今为隆兴府

】

丰城邑岩岩【诗云太山岩岩】水种六万户石堤眠长虹【朝野僉载赵州石桥望之如初月出云长虹饮涧】辍棹日沈雾【杜诗翳翳月沈雾晖晖星近楼】令君政有声新亭延客步泪落石父碑【晋羊佑襄阳百姓于岷山立碑望其碑者莫不流涕杜预因名堕泪碑】心倾文饶赋【李德裕字文饶有劔池赋云丙辰孟夏予届途丰城弭楫江渚闻埋劔之地则有池存焉感人亡劔去因为此赋云】忆昔两神兵【周亚夫传兵事上神密张景阳七命注曰劔能威天下故谓之神兵南史沈庆之传文帝北侵庆之处分旬日内外整办时皆谓神兵杜诗近贺中兴主神兵动朔方】埋玉思武库【晋庾亮传埋玉树于土中武库见前注】寒光射汉津【尔雅析木谓之津箕斗之间汉津也】两贤纒一顾张公拆中台【杜诗星拆台中地注中台星拆张华见诛】木拱孔章墓不能从儿嬉【退之送张道士诗又不媚笑语不能伴儿嬉】岁晚龙蛇去空余寒泉泓因雨长蛙鲋铅刀藏宝室万世同此度【张华传斗牛之闲常有紫气华邀豫章雷焕问之焕曰宝劔之精上彻于天在豫章丰城即补焕为丰城令焕到县掘狱基入地四丈余得一石函中有双劔并刻题一曰龙泉一曰太阿送一与华留一自佩华諫失劔所在焕卒子华特劔行经延平津劔忽于腰间跃出堕水使人入水取之但见两龙各长数丈华少子翬以中台星拆劝华逊位华不从而难作雷焕子孔章见水经潁水注篇末用贾谊赋莫耶为钝铅刀为鋋之意离骚经云何不改此度也】

上萧家峡

玉笥峯前几百家山明松雪水明沙【文选顔延年诗庭见野陰山昏明望松雪】趣虚人集春蔬好桑菌竹萌烟蕨芽【一作趣虚人在烟中语荷条归来有蕨芽柳子厚柳州诗云青箬裹□归洞客绿荷包饭趣虚人元注云虚市也寰宇记吉州卢陵县玉笥山道书福地记云此山地肥美宜谷辟兵桑菌桑榘也诗食我桑榘尔雅笋竹萌山谷尝有诗云蕨芽已作小儿拳】

何萧二族

西汉功名相国多南朝人物数诸何【相国谓萧何也南史何尚之传庐江灊人子孙弟侄附传者八人】向来富贵喧天地亦有文章在涧阿【涧阿见前注】

魏夫人坛

独扫蛾眉作远山【卓文君眉色不加黛饰常如远山杜诗淡扫蛾眉朝至尊】春风瑶草照朱颜【李白诗相期拾瑶草】我来欲问许玉斧二十四峯如髻鬟【寰宇记抚州临川县西北六里二百步有魏夫人坛神仙内传夫人晋司徒舒之女传法于护军长史许穆穆子玉斧皆昇仙韦应物绿华歌云世淫浊兮不可降胡不来兮玉斧家】

隐梅福处

吴门不作南昌尉上疏归来朝市空【渊明诗一世异朝市】笑拂岩花问尘世故人子是国师公【汉书梅福字子真九江寿春人寰宇记洪州南昌县有梅福池福叹曰生为我酷仕为我桎形为我辱智为我毒于是弃南昌尉去妻子入洪崖山得道为神仙代代有人或于玉笥山中逢见诗意谓梅福与刘向皆仕元成间数上疏直谏亦略相似而向之子歆改名秀王莽篡位歆为国师後事皆在莽传】

萧子云宅

郁木坑头春鸟呼云迷帝子在时居风流扫地无寻处只有寒藤学草书【南史齐高帝孙子云字景乔善草隶自云效锺元常王逸少而微变字体出为东阳太守百济国使人至建业求书逢子云为郡维舟将发望船三十许步行并行前子云遣问之答曰待中尺牍之美远流海外今日所求唯在名迹子云停船三日书三十纸与之获金货数百万玉笥山记曰萧子云来栖止有人谓曰东北有洞曰都木坑水自东注可以久居子云遂徙家居之後全家隐洞中不知所之其地名都木岩也大历初有道士谢修通居此山囚千年後遇人引行见宅基遂结庵居之长庆初入都木坑见一宅重扉须史有青衣童子招修通入见一人紫绶峨冠佩劔立堂之左一人碧绶素简立堂之右童子曰左者萧君右者梅君即梅福也此记详见太平御览郁木坑头当作都木坑扫地见前注】

避秦十人

九真承诏上龙胡【史记封禅书有龙垂胡髯下迎黄帝上骑羣臣从者七十余人按汉金日磾传粹胡投莽何罗殿下注胡颈也尚书序云承诏作传】尽是骊山所送徒惟有邓公留不去松根搯鼎煮菖蒲【汉高纪为县送徒骊山】

黄雀

牛大垂天且割烹【庄子逍遥篇其翼若垂天之云以割烹要汤见孟子】细微黄雀莫贪生头颅虽复行万里【卿头颅方行万里见袁绍传王荆公尝用此事作二十字送吕望之赴临江云黄雀有头颅长行万里余想因君出守暂得免苞苴】犹和盐梅传说羹【和羹见尚书说命】

到官归志浩然二絶句【到官盖初至太和也此後皆太和所作】

雨洗风吹桃李净【刘梦得诗桃花净尽菜花开】松声聒尽鸟惊春满船明月从此去本是江湖寂寞人

鸟乌未觉常先晓笋蕨登盘始见春【晓鷄未鸣而先起因见笋蕨始知春深言作邑之劳如此也】斂手还他能者作从来刀笔不如人【汉曹参传起秦刀笔吏师古曰刀所以削书古者用简牒故吏皆以刀笔自随也陈汤传挫于刀笔师古曰刀笔谓吏】

题吉州承天院清凉轩

菩萨清凉月【东坡诗亦如诃佛丹霞老却向清凉礼白毫注清凉山万菩萨所在】游於毕竟空【维摩经云无戏论毕竟空故楞严经若离明暗见毕竟空】我观诸境尽心与古人同僧髮侵眉白桃花映竹红傥来寻祖意展手似家风【传灯录南岳让禅师问嵩山安如何是祖师西来意安曰如何不问自己意】

次韵答杨子闻见赠

金盘厌饫五侯鯖【五侯鯖见前注】玉壶浇泼郎官清【国史补云酒则郢之富水乌程之若下荥阳之土窟春剑南之烧春京城之虾蟆陵郎官清李白诗玉壶美酒清若空】长安市上醉不起【老杜云李白一斗诗百篇长安市上酒家眠】左右明妆夺目精【杨炯少室山庙碑光照耀兮夺目退之李花诗云静濯明妆有所奉目精见前注】结交贤豪多杜陵【班孟坚西都赋云乡曲豪举游侠之雄连交合衆驰骛乎其中若乃观其四郊浮游近县则南望杜霸北眺五陵英俊之域绂冕所兴注云宣帝葬杜陵文帝葬霸陵】桃李成蹊卧落英【上林赋垂条扶疏落英□纒】黄绶今为白下令【元注云太和县古白下○汉朱博传云刺史不察黄绶师古曰丞尉职卑皆黄绶】苍颜只使古人惊督邮小吏皆趋版【晋陶潜传潜为彭泽令素简贵不私事上官郡遣督邮至县吏白应束带见之潜叹曰吾不能为五斗米折腰拳拳事乡里小人解印去县趋版谓执手版而趋手版见前注退之诗勿嫌法官未登朝犹胜赤县长趋尹趋字盖取此义】阳春白雪分吞声【李白古风郢客吟白雪遗响飞青天徒劳歌此曲举世谁能传试为郢人唱和者乃数千声吞何足道叹息空凄然江淹恨赋叹不饮恨而吞声鮑明远和行路难心非木石岂无感吞声踟躅不敢言杜诗吞声踟躅涕泪零】杨君青云贵公子【刘伶酒德颂云贵介公子】叹嗟簿领困书生【刘公干诗沉迷簿领书李善曰簿领谓文簿而记录之庄子注曰领録也】赠我新诗甚高妙泪斑枯笛月边横【述异记舜葬苍梧二妃泪下沾竹文悉为之斑唐高骈题二妃庙当时珠泪垂多少直到如今竹尚斑】文章不直一杯水【太白云吟诗作赋北窗里爲言不直一杯水】老矣忍与时人争江城歌舞聊得醉但愿数有美酒倾莫要朱金纏縛我陆沈世上贵无名【杨子注言纒朱怀金之乐老子曰无名万物之始又曰道常无名李白诗含光流世贵无名何用孤高比月明】

闻致政胡朝请多藏书以诗借书目

万事不理问伯始【万事不理问伯始天下中庸有胡公见後汉胡广传广字伯始】藉甚声名南郡胡【名声藉甚见陆贾传胡广南郡华容人】远孙白头坐郎省【蔡质汉宫典职云尚书郎省中以胡粉涂壁】乞身归来犹好书手抄万卷未阁笔【典略王粲才阮高□每朝廷奏议卿相阁笔不敢措手唐刘知几传云阁笔相视含毫不断】心醉六经还荷鋤【列子见之而心醉见列子中说云心若醉六经目若营四海常林性好学带经耕鋤】愿公借我藏书目时送一鴈开鑰鱼【古语借书一痴还书一痴或谓痴当作瓠说文云瓠音絺注酒器按集云瓠字注云古以借书借书馈酒一瓠还书亦馈酒一瓠独苏黄诗乃作?东坡云不持丙?酒肯借一车书山谷又有诗云莫惜偕行千里他日还君一鴈秦少游亦云知续春明退朝録

借观当奉一?还盖用扬雄酒箴?夷滑稽殷大如壶尽日盛酒人复借酤师古曰革囊盛酒也
芝田録云门钥必以鱼者取其不瞑目守夜之义李义山诗鷁舟系两岸鱼钥啓重关】

戏赠南安倅柳朝散

柳候风味晚相见衣袂颇薰荀令香【襄阳记刘季和云荀令君至人家坐席三日香详见观
王主簿酴醾诗注】桃李能言妙歌舞【借使李广传桃李不言】樽前一曲断人肠【刘禹
锡于李司空坐上赋诗曰?□梳头宫样妆春风一曲杜韦娘司空见惯浑间事断尽江南刺史
肠李因以妓赠之】洞庭归客有佳句【玉台新咏有梁柳恹江南曲云洞庭有客归潇湘逢
故人】庾岭梅花如小棠【庾岭见前注诗蔽芾甘棠笺云召伯舍小棠之下正义郭璞曰今
之杜梨又曰杜赤棠白者棠然则其白者为棠其赤者为杜宜以比梅也】乘兴高帆少相待
淮湖秋月要传觞【文选南都赋依才齐敏授爵传觞】

题槐安阁【并序○东禅属?州山谷自太和考试南安过?州作】

东禅僧进文结小阁于寝室东养生之具取诸左右而足彼虽闻中天之台百常之观【文选
西京赋径百常而茎擢注云倍寻曰常】盖无嫪慕之心予为题曰槐安阁而赋诗夫据功名
之会以嫫媸一世其与蚁丘亦有辨乎虽然陋蚁丘而仰太山之崇崛犹未离乎俗观也【淳
于棼梦大槐安国详见宿观音院诗注】

曲阁深房古屋头病僧枯几过春秋垣衣蛛网蒙窗牖【本草垣衣一名昔 又云在墙垣谓
之垣衣在水中石上谓之陟厘】万象纵横不系留【贾谊鵬鸟赋泛乎若不系之舟】白蚁
战酣千里血【檀萝国来伐王命棼征之败绩亦槐安国事也晋楚战于鄢陵战酣之时子反
渴而求饮见淮南子】黄粱炊熟百年休【炊黄粱未熟见前注王荆公诗邯鄲四十余年梦
相对黄粱欲熟时】功成事遂人间世【老子功成名遂身退天之道人间世庄子篇名】欲
梦槐安向此游

洪范以不合俗人题厅壁二絶句次韵和之【余洪范名卞山谷元丰四年自太和往南安军
考试经行赣上洪范时为赣州郡掾与之唱和故有南康郡下参军之句南康即赣州之郡名
有答洪范二首寄一诗皆此时作】

寂寥吾道付万世忍向时人覓赏音【临博而全竦闻乐而窃拚者或有赏音而识道者见曹
子建求自试表闻弦赏音见吴志周瑜传集中答明略云枯栅满腹生蛛网忍向时人覓清赏
皆用锺期伯牙事】搔首金城西万里樽前从此叹人琴【元注云德占最知洪范徐德占死
事见後和荅魏道辅诗注晋王徽之传献之卒徽之奔丧不哭直上灵牀取献之琴弹之久而
不调叹曰呜呼子敬人琴俱亡白乐天祭元微之文弦笔两絶其今日乎乃人琴俱亡之意也
】埋没高才筑钓间【杜牧之筑钓乘时用言传说太公也韩文公代裴相辞官表高宗登傳
说于版筑周文用吕望于钓屠】风云未会要颯桓南康郡下参军耳付与红尘白眼看【颯
桓青白眼并见前注】

发赣上寄余洪范【山谷真蹟第三联却作红衣传酒倾诸客清夜中谈夸九州又有题名云王诚之柳诚甫周道甫魏伯殊余洪范徐适道徐致虚马固道东禅惠老及诗一首云惠老有才气往来三十年松风沉永日诗句即深禅万水千山里长安大道边相逢欲留语此月别时圆固附注此】

二川来集南康郡【?州治赣县唐武德曰?州天宝曰南康郡二川谓贡水章水皆北流合于赣县流入大江绍兴二十三年改作赣州】气味相似相和流【白乐天长恨歌迫者血泪相和流】木落山明数归鴈郁孤栏楯绕深秋【郁孤台在?州】曾中淳于吞一石【史记淳于髡一石亦醉】尘下庖丁解十牛【庄子音义庖人丁其名也管子有屠牛坦一朝解九牛又贾谊传屠牛坦一朝解十二牛而芒刃不顿者所排击剥割皆衆理解也尘下疑是笔下】他日欲言人不解西风散髮棹扁舟【嵇叔夜诗散髮岩岫】次元明韵寄子由【山谷兄天临字元明寄子由诗云鍾鼎功名淹管库朝廷翰墨写风烟管库谓监筠州塩酒税也子由在筠有东轩记实元丰三年十二月作是岁庚申山谷得邑太和辛酉到官】

半世交亲随逝水【论语子在川上曰逝者如斯夫不舍昼夜刘桢诗逝者如流水哀此遂分离卢仝诗百年逝过如流川】几人图画入凌烟【唐书贞观中功臣图形凌烟阁】春风春雨花经眼江北江南水拍天【韩诗海气昏昏水拍天】欲解铜章行问道【汉官仪县令秩五百石铜章墨绶欲解铜章可见太和作四首同时】定知石友许忘年【石友忘年并见前注】脊令各有思归恨日月相催雪满颠【杜诗干戈况复尘随眼鬓髮还应雪满头言彼此皆有兄弟之思如脊令在原也】

再次韵奉答子由

蛭尾银钩写珠玉【见前注】剡藤蜀蛭照松烟【唐舒元舆有吊剡藤文蛭纸见前注】似逢海若谈秋水【庄子秋水篇见前注】始觉醯鸡守瓮天【庄子田子方篇孔子曰丘之于道其犹醯鸡欤微夫子之发吾覆也吾不知天地之大全也杜诗谬知终画虎微分是醯鸡】何日青扬能覩面【鄘国风君子偕老云子之清扬扬且之顔也注云清视清明也扬广扬而头角丰满鲁国风猗嗟云抑若扬兮注扬广扬人云猗嗟名兮美目清兮注目上为名目下为清又云清扬婉兮】只今黄落又凋年【月令季秋草木黄落汉武帝秋风词草木黄落兮鴈南归文选舞鹤赋穷陰杀节急景凋年】万钱买酒从公醉【杜诗左相曰兴费万钱饮如长鲸吸百川】一鉢行歌聽我颠【传灯録道吾和尚有一鉢歌】

再次韵寄子由

想见苏耽?手僊【神仙传苏仙公桂阳人汉文帝时得道仙去後有白鹤来止郡城东北楼上人或挟弹弹之鹤以瓜攫楼板似漆书云城郭是人民非三百甲子一来归吾是苏君弹何为又一说苏耽者桂阳人也少以至孝着称初去时云今年大疫死者略半家中井水饮之无恙果如所言出洞仙传所载乡里及行事大?皆同可见仙公即苏耽也】青山桑柘冒寒烟骐驎墮地思千里【韵书曰骐驎白马黑脊传休奕豫章行云男儿当门户墮地自生神】虎豹憎

人上九天【宋玉招魂云魂兮归来君无上天些虎豹九关啄害下人些】风雨极知鸡自晓【郑国风风雨凄凄鸡鸣喈喈】雪霜宁与菌争年【庄子逍遥篇朝菌不知晦朔蟪蛄不知春秋此小年也杜牧题魏文贞蟪蛄宁与雪霜期贤哲难教俗士知诗意谓松柏冒霜雪岂与朝菌较修短耶】何时确论倾樽酒医得儒生自圣颠【元注云出素问今按难经五十九难曰狂颠之病何以别之自高贤也自辨智也自贵倨也妄笑好歌乐也】

次韵寄上七兄

学得屠龙长缩手【屠龙见前注】链成五色化苍烟【列子汤问篇天地亦物也物有不足故昔者女娲氏链五色石以补其阙】谁言游刃有余地【恢恢乎其于游刃必有余地矣此庄子言庖丁解牛今以言屠龙李白诗投刃有余地】自信无功可补天【言链石也】啼鸟笑歌追暇日饱牛耕凿望丰年【帝王世纪老人击壤于道曰吾凿井而饮耕田而食帝何力于我哉】荷锄端欲相随去邂逅青云恐疾颠【高位实疾僨厚味实腊毒见国语周语下】

和七兄山蕲汤

厨人清晓献琼糜【见前注】正是相如酒渴时【司马相如传常有消渴病杜诗酒渴爱江清】能解饥寒胜汤饼【束皙饼赋玄冬猛寒清晨之会涕冻鼻中霜凝口外充虚解战汤饼为最】略无风味笑蹲?【汉货殖传下有蹲?至死不饥注谓芋也世说大饥不饥蜀有蹲?】打窗急雨知然鼎乱眼晴云看上匙已觉尘生双井椀【双井茶出洪州分宁】浊醪从此不须持【杜诗浊醪有妙理】

同韵和元明兄知命弟九日相忆二首【山谷有此诗草木真蹟云万重云里孤飞鴈只聽归声不见身却把黄花同怅望寄传诗句更清新末句奉亲归制白纶巾傍注改今本南北作南渡兄弟作摹写老作改晚作次篇田邻作邻田】

革囊南渡传诗句摹写相思意象真九日黄花倾壽酒几回青眼望归尘蚤为学问文章误【杜诗纨绔不饿死儒冠多误身】晚作东西南北人【檀弓上孔子曰丘也东西南北之人也高适人日寄杜二拾遗诗龙锺还忝二千石愧尔东西南北人】安得田园可温饱长抛簪绂裹头巾【後汉皇甫规传退不得温饱以全命】

万水千山厌问津芭蕉林里自观身【维摩经是身如芭蕉中无有坚又云又复观身身不离病】邻田鸡黍留熊也【论语杀鸡为黍而食之】风雨关河走阿秦【熊也阿秦当时山谷兄弟小字山谷兄弟五人大临庭坚叔献叔达仲熊仲熊即墓志所谓非熊代书一篇所谓阿熊而今诗所谓熊也阿秦盖可类推】鸿鴈池边照双影脊令原上忆三人【兄弟中两人相聚而三人别去也】年年献壽须欢喜白髮黄花映角巾【晋羊佑传与从弟琇书曰既定边事当角巾束路归故里王道曰元规若来吾便角巾还第杜诗锦里先生乌角巾白乐天诗病喜头轻换角巾】

代书

阿熊去我时【山谷有非熊墓铭云仲熊其名非熊其字先大夫之幼子汉外戚传窦广德曰姊去我西时与我诀传舍中】秋暑削甘瓜【魏文帝与吴质书浮甘瓜于清泉】离别日月除【诗日月其除】莲房倒箭靫【靫箭室也】得书报平安肥字如栖鹑【玉川子添丁诗忽来案上统墨汁涂抹诗书如老鹑】汝才跃鑪金自必为模鄡【庄子大宗师篇今大冶铸金金踊跃曰我臣必为模鄡大冶必以为不祥之金】穷年抱新书【新书谓王氏经学东坡次韵秦观秀才见赠诗纵扫所值无不可如君不怕新书新】挽条咀春葩【退之进学解舍英咀华又诗云东野动惊俗天葩吐奇芬】弄笔不能休【文选典论云傅毅之于班固伯仲之间也而固小之与弟超书曰武仲下笔不能自休】屈宋欲作衙【唐杜审言传常语人曰吾文章当得屈宋作衙官】屈指推日星【屈指计其日见陈汤传】许身上云霞【杜诗许身一何愚墓铭云先大夫以岁月日时参伍以历象为言祥非熊亦自恃其命曰我生日在申辰在卯岁庚午一天地合终富贵】安知九天关虎豹守夜义【虎豹九关夜又守门并见前注】视田操豚蹄持狭所欲奢【史记淳于髡传臣从东方来见道傍有禴田者操一豚蹄酒一盂而祝曰瓠窋满篝污邪漙车五谷蕃熟穰穰济家臣见其所持者狭而所欲者奢故笑之】文章六经来汗漫十牛车【汉?宽传大家牛车小家担负柳子厚作陆文通墓表其为书处则充栋宇出则汗牛马李白诗笔秃千兔毫书载两牛腰】譬如观沧海细大极龙鰕【退之鰕鱼丈云潮之州大海在其南鲸鰕之大鰕蟹之细无不容归】古人以圣学未肯废百家旧山木十围斋堂绿阴遮红稻香盂饭【维摩经化菩萨以满鉢香饭与维摩诘】黄鸡厌食蛙【食蛙见前注蛙鱼也音鞋不在此韵疑是食蛙按图经本草蛙有背作黄文者又云一名水鸡】摩挲垂腴腹【韩诗外传鱼之侈口垂腴者鱼畏之凡言腹腴皆鱼也独王充论衡云尧若腊舜若腴桀纣之君垂腹尺余】颇复读书耶念汝齿壮矣无妇助烹茶父兄亦怜汝须儿牧犬豕【左传史卒出豕行出大鸡鲍明远诗倚杖牧鸡豚】且伐千章木【汉货殖传木千章】赠行当马槌【文选马融笛赋云剡其上孔通洞之裁以当箠使易持注云箠马策也】赢粮果後时【史记李斯传跃马赢粮唯恐後时】定随八月槎【张华博物志云旧说天河与海通近世有人居海滨年年八月有浮槎去来不失期人有奇志立飞阁于槎上多齎粮乘槎而去十余日中犹见星月日辰自後茫茫息忽亦不觉昼夜十余日奄至一处有城郭状屋舍甚严遥望宫中多织妇见一丈夫牵牛渚次饮之牵牛人惊问曰何由至此此人具说来意并问此是何处答曰君还至蜀郡访衆君平则知之及归问君平对曰某年月日有客星犯牵牛宿计其年月正此人到天河时也杜甫秋兴诗聽猿实下三声淚奉使虚随八月槎】觉民在林中【集中字说云弟仲堪温恭而文庭坚字之曰觉民】丁丁闻兔置【诗肃肃兔置之丁丁又云肃肃兔置施于中林】奉身甚和友干父办咄嗟【易云干父之蛊晋石崇传为客作豆粥咄嗟便办按文选曹子建诗自顾非金石咄嗟个心恶注引说文云咄叱也嗒大呼也言人命在叱呼之间咄丁兀切嗒子夜切汉木有此语至晋而讹为咄嗟也】台源吟松籁【集中有次的十九叔台源诗云闻道台源境□嵩三径通】先生岸巾纱【杜诗自?岸江臯王荆公诗孙陵西曲岸乌纱】留客醉风月盘筯供柔嘉【退之诗野蔬拾新柔诗柔嘉非则此摘其字】仍工朱丝弦【文选陆士衡诗直如朱丝弦】洗心拂奇邪【礼记祭义虽有奇邪而不治者则微矣】孤臣发楚调【谓屈原楚词】倾国怨胡笳【世传胡笳十八拍蔡琰所作倾国见汉书李夫人传】把笔学周鼓【凤翔石鼓文世传周宣王时作】不为蓬生麻【

说苑蓬生麻中不扶自直】元明祖师禅【山谷兄大?字元明】妙手发琵琶已无富贵心鼓吹一池蛙【孔蛙池蛙见前注】天民服农圃颇复秋歛除【天民疑是觉民昆仲周礼泉府歛市之不售货之滞於民用者以其贾买之凡除者祭祀无过旬日】下田督耒耘入岭按新畬【周颂臣工云亦又何求如何新畬注云田二岁曰新三岁曰畬】悉力输王赋至今困生涯【庄子吾生也有涯】知命叔山徒【庄子德充符篇鲁有兀者叔山无趾知命山谷弟名叔逵足蹇故以为喻】炉香严佛花【圆觉经云心礼发明】惟思苾刍园【梵语比丘或曰苾刍尊胜经号僧曰苾刍此物草也而有五义一生不背日二冬夏常清三体性柔软曰香气远腾五引蔓傍布为佛徒弟亦然故以为名】脱冠着袈裟【梵语袈裟此云不正色即坏色染衣也】起家望两季【汉儒林传孔氏有古文尚书孔安国以今文读之因以起具家】佩金踢朝鞬嘉鱼在南国【小雅南有嘉鱼乐得□也】宗庙荐鱣魮【小雅鱼丽美万物盛多可以告于神明矣鱼丽于罍鱣魮】我为万夫长【书咸有一德万夫之长可以观政言为万户县也】朝论不齿牙【南史谢朓传朓好奖人才曰士子声名未立应共奖成无惜齿牙余论退之诗顾我未肯置齿牙】刺头簿领中蚤虱废搔爬【柳子厚诗中散蝨空爬盖用文选稽康絶交书性复多蝨爬搔无已而当裹以章服】世累已纏缚官箴易疵瑕【左传襄四年魏绛论和戎云昔周辛甲之为太史也命百官官箴王阙僖七年楚文王谓申侯曰予取予求不女疵瑕】何时烟雨里驱羊入金华【黄初平牧羊金笔山见前注】遣奴迫王事不暇学惊蛇【晋卫恒传张伯英临池学书池水尽黑下笔必为楷则号忽忽不暇草书法书要录义之自叙草书云疾若惊蛇之失道】

双涧寺二首【寺在太和境内】

二水犇犇鸣屋除【韩文蓝田丞厅记水??循除鸣】松林落日吼乌菟【左传楚人谓虎为乌菟】老僧更有百岁母白髮身为反哺乌【束皙补亡诗嗷嗷林乌反哺于子尔雅纯黑而反哺者乌也杜诗舟鷁排风影林乌反哺声】

山陬江深屋翠崖夜钟声自瓮中来长松偃蹇苍龙卧六月涧泉轰怒雷

睡起

柿叶铺庭红颗秋薰炉沈水度衣篝【说文曰篝客也可熏衣】松风梦与故人遇同驾飞鸿跨九州【文选郭璞游仙诗赤松临上仙驾鸿乘紫烟李白诗不及广成子乘云驾轻鸿】

奉送周元翁鎖吉州司法厅赴礼部试【周敦頤濂溪二子壽焘壽字季老後改元翁焘字通老後改次元山谷在太和元翁任吉州司法至元丰五年於黄裳榜登第此诗即送其赴礼部试也後次元亦于元佑三年李侍宁榜登第元翁终司封员外郎次元终徽猷阁待制集中与元翁及次元唱和诗凡十篇】

江南江北木叶黄【楚词洞庭波兮木叶下】五湖归鴈天雨霜【後汉隗嚣传范蠡乘扁舟於五湖杜诗青枫叶赤天雨霜】系船湓城秣高马【湓城江州也言自此陆行文选马赋旦

刷幽燕画秣荆越退之云膏吾车兮秣吾马】客丁结束女缝裳【诗葛屨云掺掺女手可以缝裳】贡书登名彻未央【退之复志赋岂不登名于一科兮曾不捕其遗余汉高帝纪萧何治未央宫立东阙北阙师古曰未央殿虽南向而上书奏事谒见之徒皆诣北阙公车司马亦在北盖以北阙为正门而又有东门东阙以厌胜之术也】不比长卿薄游梁【司马长卿病免客游梁见本传梁即汴京也】南山雾豹出文章【见前注】去取公卿易驱羊【杜牧示阿宜云愿汝出门去取官如驱羊】与君初无一日雅【汉谷永传永奏书谢王凤曰永无一日之雅左右之介】倾盖许子如班扬【家语孔子之郯遭程子于涂倾盖而语班谓固扬谓雄也】囚拘官曹少相见【鹏鸟赋愚士系俗窘若囚拘】忽忽岁晚稼涤场【诗七月云十月涤场】一盃僚友喜多在谢守不见空澄江澄江如练明橘柚【谢眺诗云余霞散成绮澄江净如练又云南中荣橘柚李白诗解道澄江净如练令人长忆谢玄晖】万峯相倚摩清苍暮堂醺醺客被酒【汉书高祖被酒夜径泽中】艷歌聒醉烛生光【韩退之短檠歌长檠艷歌照珠翠前集聽宋宗儒□阮歌云促弦聒醉惊客起□用此字按春明退朝錄云太宗尝谓侍臣曰後唐庄宗湛饮以鄴声与胡部合奏谓之聒帐自昏達旦不息山谷盖取此意】椎鼓发船星斗白【见前注】明日各在天一方【杜云我行山川异各在天一方】寒鷗满枝二桥宅樽前顾曲忆周郎【吴志周瑜传时年二十四吴中皆呼为周郎从孙策攻皖城拔之得桥公两女皆国色也策自纳大桥瑜纳小桥瑜少精意于音乐虽三爵之後其有阙误瑜必知之知之必顾故诗人謠曰曲有误周郎顾寰宇记云桥公亭在舒州怀宁县北隔皖水一里□安志有桥公亭记云闻之耆耄桥公之旧居也】鲈鱼斫脍蔗为浆【後汉左慈传在司空曹操坐操曰今日高会珍羞略备所欠吴松江鲈鱼耳元放曰此可得也因求铜盘贮水以竹竿饵钓于盘中须臾引出一鲈鱼又饵钩沈之须臾复引出皆长三尺余操使目前脍之周□会者蔗浆见前注】恨君不留谁与尝殿前春风君射策汉庭诸公必动色【刘丈房餞萧郎中赴润州序我萧公建隼此地化行五年汉庭羣公方待以美职吕和撰刘公神道碑重氛再廓阖境昭苏由是汉庭诸公始重其节杜诗满堂动色嗟神妙射策见前注】故人若问黄初平将作金华牧羊客【太白诗金华牧羊见迺是紫烟客黄初平见前注】饮润父家【黄□字润父会稽人後更名育字懋建山谷以司宗为作字序时为吉州司理与之同寅】

斋合寒麝薰书帙映斜景【老杜咏竹云色侵书帙晚】偶来樽俎同延此笑言顷宫线添尺余【荆楚岁时记宫中以红线量日影至日日添一线杜诗何人错忍穷愁日愁日愁随一线长】朝来日未永一醉解语花【开元天宝遗事太液池千叶白莲开帝与贵戚蒸赏指贵妃曰争如我解语花】万事画地饼【魏志卢毓传诏曰选举莫取有名名如画地作饼不可啖也白乐天诗望梅阁老无妨渴画饼尚书不救饥】要似虎头痴何须樗里癭【虎头顾恺之也晋书本传云恺之才絶画絶痴絶史记樗里子传滑稽多智秦人号曰智囊恺之传无虎头之称东坡诗有痴虎头字注谓顾恺之尝为虎头将军按张彦远名画记恺之小子虎头樗里传不言癭白氏六帖疾门有智囊宿瘤注并癭也】

次韵寄润父

昏昏迷簿领【昏昏簿领见前注】勿勿贵晷景【顏氏家训世中书翰多称勿勿相承如此莫知其由或有妄言此忽忽之残缺耳案说文勿者州里所建之旗也象其柄及三旂之形所

以促民事故忽遽者称勿勿说文又曰晷日影也周礼地官曰大司徒以土主之法测土深正日景以求地中退之秋怀诗忧愁费晷景日月如跳丸贵字疑是费】尝尽身百忧【左传称晋侯险阻艰难备尝之矣】迄无田二顷【苏秦传使我有雒阳负郭田二顷吾岂能佩六国相印乎】喜从吾宗游九里河润永【见前注】呼儿跪酒樽戒妇饌汤饼【杜诗唤妇出房亲自饌刘梦得云我作坐上客引箸举汤饼】老夫何取焉君悦瓮盎瘿【瓮盎大瘿见前注退之诗余口怒不已喧聒鸣瓮盎】

送酒与周法曹用前韵【吉州司注周元翁也】

遥知谢法曹【南史谢惠连为彭城王义康法曹行参军】诗句多夏景闻道学书勤墨池方一顷【王羲之传曾与人书云张芝临池学书池水尽黑法书要录所载一同唯石刻孙过庭书谱云张精熟池水尽墨当以碑板为正临川有王逸少墨池曾子固作记见本集】大字苦未遒【魏文帝与吴质书曰公干有逸气但未道耳刘孝标广绝交论声未遒于云阁】小字逼智永【法书要录陈永欣寺僧智永会稽人远祖逸少历纪专精真草唯命张佑诗不绝羲之法难穷禅智流】我有何郎樽清江醞玉饼还书及斗数与君酌楠瘿【玉饼谓麴也司马迁传云媒蘖其短师古曰孽如麴孽之孽齐人谓麴饼为媒还书及斗数疑有舛误武攸绪王公遗以瘿杯东坡赋酌以瘿藤之樽】

山谷外集诗注卷九

山谷外集诗注卷十

钦定四库全书

山谷外集诗注卷十

宋 黄庭坚 撰

史 容 注

出迎使客质明放船自瓦窑归

鼓吹喧江雨不开丹枫落叶放船回【谢灵运诗晓霜枫叶舟杜诗送客苍溪县山寒雨不开直愁骑马滑故作泛舟回】风行水上如云过【易涣卦风行水上涣】地近岭南无鴈来【衡阳有回鴈峯详见前注】楼阁人家卷帘幕【杜牧之诗深秋帘幕千家雨落日楼台一笛风】菰蒲鸥鸟乐湾洄惜无陶谢挥斤手【杜诗焉得思如陶谢手令渠述作与同游挥斤见前注】诗句纵横付酒杯

次韵和答孔毅甫【毅甫尝为吉倅】

?飞鵾化未即逍遥游【见庄子第一篇】龙章凤姿终作广陵散【嵇康传人以为龙章凤姿康将刑东市顾视日影索琴弹之曰昔袁孝尼尝从吾学广陵散吾每斩固之广陵散于今絶矣初康游洛西宿华阳县引琴而弹夜分忽有客至与康谈音律因索琴弹之而为广陵散声调絶伦遂以授康仍誓不传人韩臯生音知律闻鼓琴至止息叹曰美哉嵇康之为是曲其当晋魏之际乎其音主商晋金运商又金声此所以知魏方季而晋方代也王淩母邱俭诸葛诞继为扬州都督咸谋兴复为司马氏所杀康以扬州故广陵地淩等皆魏大臣故名其曲曰广陵散言魏散亡而广陵始止息者晋虽暴兴终止息于此见白氏六帖知音门并附于此】湓浦鑪边督数钱【平仲字毅甫元佑入馆时监江州钱监按浔阳志广宁监岁铸钱二十万东坡帖云数日前孔毅甫见过此人钱监得替欲入京注拟中路思家而还後汉志童謡曰河间姹女工数钱】故人陆沉心可见【陆沉见前注】气与神兵上斗牛【神兵剑气冲斗牛并见前注】诗如晴雪濯江汉【孟子江汉以濯之】把咏公诗闔且开【王荆公寄王逢原披衣起生愁不愜归坐把卷闔且开乐天和高斋青灯明灭照不寐但把君诗闔且开】旁无知音面墙叹【书不学墙面後汉邓后传面墙学术】我今废书迷簿领【乐毅传未尝不废书而泣】鱼蠹笔锋蛛?砚【选诗五车摧笔锋】六年国子无寸功【退之诗三年国子师肠肚习藜苲李广传终无尺寸功】犹得江南万家县客来欲语谁与同令人熟寐触屏风【三国管辂传尝闻人曰吾与刘颍川兄弟语使人神思清发自此之外殆白日欲寝矣汉陈万年传子咸有异材万年尝病召咸教戒于牀下语至夜半咸睡头触屏风】窃食仰愧冥冥鸿【杨子云鸿飞冥冥弋人何慕焉】少年所期如梦中江头酒贱樽屡空【孔融传樽中酒不空】南山有田岁不逢【汉杨惲传其诗曰田彼南山无秽不治种一顷豆落而为萁人生行

乐耳须富贵何时】相思夜半涕无从【檀弓上吾恶夫涕之无从也】千金公亦费屠龙【屠龙见前注韩诗屠龙破千金为艺亦云亢】

再用旧韵寄孔毅甫

鉴中之发蒲柳望秋衰【晋书顾悦之与简文同年而髮早白帝问之曰松柏之姿经霜犹茂蒲柳常质望秋先零欧阳公乞致仕表羣才方茂蒲柳未秋而早衰】眼中之人风雨俱星散【陆士衡诗感念桑梓域髣髴眼中人魏文帝诗回顾四向望眼中无故人李白大堤曲不见眼中人杜诗青眼高歌望吾子眼中之人吾老矣言熙丰间诸人皆斥逐三国志姜维传星散流离杜诗别离同雨散行止若云浮又草阁柴扉星散居白乐天诗同出复同归从朝复至暮风雨或消散江山渺回互刘禹锡诗故人云雨散满目山川多】往者托体同青山【陶明明挽歌死去何所道托体同山阿】健者漂零不相见庾公楼上有诗人【揆在江州】平生落笔泻河汉【庄子逍遥游篇其言犹河汉而无极也韩文公上于頔书文章变化若雷霆浩汗若河汉】置驿勤来索我诗自说中郎识元叹【吴志顾雍传雍字元叹吴郡吴人蔡伯喈避怨于吴雍从学琴书江表传云伯喈谓曰今以吾名与卿故雍与伯喈同名吴録曰雍字元叹言为蔡雍所叹也】我方冻坐酒官曹公然薪炙为冰砚【西京杂记以酒为书滴以玉为砚皆取其不冰】不解穷愁着一书【史记虞卿传不重万户侯卿相之印与魏齐间行卒去赵困于梁不得意乃着书世传之曰虞氏春秋太史公曰虞卿非穷愁亦不能着书以自见于後世云】岂有文章名九县【汉光武赞九县颺回】奴星结柳送文穷【退之送穷文云主人使奴星结柳作车】退倚北窗睡松风太阿耿耿截归鸿【张华传雷焕掘丰城狱得一石函中有双剑一曰龙泉一曰太阿退之诗利剑光耿耿】夜思龙泉号匣中斗柄垂天霜雨空独鴈叫羣云万里【退之诗一一叫羣猿杜诗孤雁不饮啄飞鸣声念羣谁怜一片影相失万重云】何时握手香炉峯【香炉?潁江州】不看寒泉濯卧龙【诸葛孔明号卧龙】

二月二日晓梦会于庐陵西斋作寄陈适用【适用名汝器时知庐陵县】

燕寝着炉香【韦苏州诗燕寝凝清香】悵悵闲窗閤【左传析招之悵悵注云安和貌】梦到郡城东笑谈西斋月行乐未央【诗庭燎夜未央注夜未央渠音遽】苦遭晴鸠聒【杜诗苦遭此物聒孰谓吾庐幽】江郡梅李白士女嬉城阙【郑国风在城阙兮】闻道潘河阳满城花秀发【潘岳为河阳令树桃李花人号曰河阳一县花廋结集中有春赋云河阳一县并是花金谷从来满园树文选蜀都赋君平王褒煜煜而秀发】颇留载酒车【揚雄传时有好事者载酒肴从游学】共醉生尘袜【文选洛神赋凌波微步罗袜生尘李白诗香尘动罗袜緑水不沾衣】想见舞余姿风枝斜蚤发【诗都人士云彼君子女卷髮如蚤】鄙夫不举酒春事亦可悦【老杜诗自知白髮非春事且尽芳樽对物华又北征诗幽事亦可悦】雨足肥茵芝沙暄饶笋蕨海牛压风帘【海牛犀也前集有诗云海牛压帘风不开盖用张君房脞说萧学士梦中赋晓寒歌云海牛压帘风不入前注偶不及此】野饭薰僧鉢【维摩经以满鉢香饭普薰毗耶城】饱食愧公家曾无助毫末劝盐惟新令王欲惇独活【尚书无虐惇独】此邦淡食伦【贾谊传国制抢攘注抢音伦吴人骂楚人曰伦伦攘乱貌也音仕庚切晋周处传处子圯将卒谓子勰曰杀我者诸伦子能复之乃吾子也吴人谓中州人曰伦故云尔

南史宋孝武狎侮羣臣各有称自柳元景垣护之并北人而王玄谟独受老伧之日南史杜坦曰臣本中华高族直以南渡不早便以伧荒见隔世说推量门云昨有一伧父来寄亭中注云晋阳秋曰吴人以中州人为伧柳子厚诗我今误落千万山身同伧人不思还以上所说不同故具列之山谷豫章人也而诋吉州人为伧盖取伧荒之义无分于南北也劝塩已见赋塩诗盖官塩不售而抑配焉婉其词曰劝耳】俭陋深次骨【汉杜周传内深次骨】公困积邱山贾豎但圭撮【汉律历志量多少者不失圭撮注四圭曰最三指撮之也又曰六十四黍为圭撮仓括反】县官思乳哺【县官出霍光传南史梁宗室始兴王憺传行荆州事人歌曰始兴王人之爹赴人急如水火何时复来哺乳我荆土方言谓父为爹徒我反】下吏用鞭撻正恐利一源【陰符经云絶利一源用师十倍】未塞兔三窟【战国策冯煖为孟尝君收债于薛烧券而还孟尝君不悦後就国于薛老幼迎于道孟尝君乃喜冯煖曰狡兔三窟免其死耳今君有一未得高枕而卧请复凿二窟云云谓孟尝君曰三窟已成请君高枕矣晋王衍传以弟澄为荆州族弟敦为青州因谓曰荆州有江汉之固青州有辅海之险卿二人在外而吾留此足为三窟矣盖举冯煖语也】寄声贤令尹何道补黥荆【庄子大宗师篇息我黥而补我劓】从来无研桑【班固宾戲研桑心计于无垠注云史记勾践用范蠡计然研计然之名也汉书桑宏羊以心计为侍中】顾影愧簪笏【退之诗峨峨进贤冠耿耿水苍佩服章岂不好不与德相对顾影聽其声赧顔汗渐背】何顔课殿上解绶行采葛【汉儿寛传寛迁左内史以负租课殿当免民间当免皆恐失之大家牛车小家担负轮租襁属课更以最上王国风采葛惧讒也】

长句谢陈适用惠送吴南雄所赠纸

庐陵政事无全牛【吉州治庐陵县适用与山谷同时作邑庄子庖丁未尝见全牛见前注杜诗妙割无全牛】恐是汉时陈太邱【後汉陈寔传除太邱长修德清浄百姓以安】书记姓名不肯学【项籍传少时学书不成去学剑又不成去籍曰书足记姓名而已】得纸无异夏得裘琢诗包纸送赠我自状明月非暗投【见前注】诗句纵横剪宫锦惜无阿买书银鈎【退之诗阿买不识字颇知书八分诗成彼之泻亦足张吾军银鈎见前注】蛮溪切藤卷盈百侧理羞滑瓘羞白【拾遗记南越献侧理纸南人以海苔为之其理纵横斜侧因以为名苏易简纸谱云张华造博物志成晋武帝赐侧理纸万番南越所贡也本草陟厘陶隐居云此即南人所用作纸者唐本注云此物乃水中苔今取为纸音陟厘陟厘与侧黎相近侧黎又与侧理相近也又云即石髮也璽书见前注】想当鸣杵砧面平枕榔叶风溪水碧【枕榔木广南所出此纸吴南雄所赠南雄州隶广南东路】千里鹅毛意不轻【复斋漫録云谚曰是人眼里有西施又曰千里寄鹅毛物轻人意重皆鄙语也山谷取以为诗答公益春思云西施逐人眼称心最为得谢陈适用惠纸云千里鹅毛意不轻】瘴衣腥膩北归客君侯谦虚不自供胡不赠世文章伯【老杜诗同心不减骨肉亲每语见许文章伯】一涔之水容牛蹄【淮南子曰牛蹄之涔无尺之鲤退之题炭谷湫祠堂吁无吹毛剑血此牛蹄殷殷血深色】识字有数我自知【杨文公谈苑云晋开运中诏令两制各作诗赋一篇付礼部为考试之式独学士李恠不肯曰李恠识字有数因人成事使令衣白袍入贡部下第必矣胡能作文章为世模楷时论美之】小时双鈎学楷法【山谷论学字云先当双鈎用两指相叠蹙笔压无名指高捉笔令腕随已左右然後观人字格则不患其难矣】至今小儿憎家鸡【南史王僧虔传论书云征西

庾翼书少时与右军齐名右军後进庾犹不分在荆州与都下人书云小儿辈贱家鸡皆学逸少书柳子厚诗闻道近来诸子弟临池寻已厌家鸡】虽然嘉惠敢虚辱【贾谊赋恭承嘉惠兮】煮泥续尾成大轴【後汉邓训传注云东观记曰训故吏最贫羸者念训常所服药北州所乏又知训好青泥封书从黎阳步推鹿车于洛阳市药还过赵国易阳并载青泥一襆至上谷遗训其得人心如此】写心与君心莫传【诗既见君子我心写兮】平生落魄不问天【酈食其传家贫落魄音薄杜诗自断此生休问天】樽前花底幸好戏【杜诗退朝花底散】为君絶笔谢风烟【杜诗挥毫落纸如云烟】已无商颂猗那手【商颂猗那为首其词曰猗与那与】请续南华内外篇【庄子号南华真经内篇七外篇三十三李白大鹏赋南华老仙发天机于漆园】

寄陈适用

日月如惊鸿归燕不及社【杜诗日月不相饶节序昨夜隔杜牧之归燕诗画堂歌舞喧喧地社去社来人不看】清明气妍暖亶亶向朱夏【楚辞时亶亶而过中兮蹇淹留而无成杜诗人生几何春又夏】轻衣颇宜人【杜诗宜人独桂林又云疎快颇宜人】裘褐就檐架【曲礼男女不同檐架】已非红紫时【韩诗黄黄□菁花红紫事已退】春事归桑柘空余车马迹颠倒桃李下新晴百鸟语各自有匹亚【选诗春鸟翻南飞翩翩独翱翔悲声命俦匹哀鸣伤我腸】林中仆姑归苦遭拙妇骂【见前注】气候使之然光陰促晨夜解甲号清风即有幽虫化【言蝉也退之聯句化虫枯局莖】朱墨本非工【後周书苏绰传始制文案程式朱出墨入】王事少闲暇幸蒙余波及【左传重耳云其波及晋国者君之余也】治郡得黄霸【黄霸传及为相功名损于治郡时】邑邻陈太邱【後汉陈寔为太邱长】威德可资借决事不迟疑敏手擘太华【西京赋缀以二华臣灵鼉肩高掌远跼以流河曲厥迹犹存善曰古语云此本一山当河水过之而曲行河之神以手擘开其上足蹠离其下中分为二以通河流手足之迹今尚在也】颇复集红衣呼嘹饮休假【退之诗两府变炎凉三年就休假】歌梁韵金石【歌梁用韩娥能使逶迤之声环梁而凝尘奋飞二日不止事谢灵运诗急弦动幽聽清歌拂梁尘谢眺诗舞馆识余基歌声想遗嘒李白诗醉舞纷绮席清歌绕飞梁曾子曳屣而歌商颂声满天地若出金石】舞地委兰麝寄我五字诗句法窥鲍谢【明远灵运】亦叹簿领劳行欲问田舍【求田问舍见前注】相期黄公垆【黄公垆见前注】不异秦人炙【孟子告子篇耆秦人之炙无以异於耆吾炙】我初无廊庙【王羲之传吾素无廊庙】身愿执耕稼今将荷锄归区宇畦甘蔗【文选蜀都赋瓜畴芋区甘蔗辛姜】观君气如虹【礼记聘义君子於玉比德焉气如白虹天也江淹谓郭巩曰子之咳唾成珠玉吐气作虹蜺】千辈可陵跨自当出怀璧往取连城价【赵得和氏璧秦愿以十五城易之閹相如使从者衣赭怀璧归赵详见相如传】赐地买歌僮珠翠罗广厦【杜诗安得广厦千万间】富贵不相忘寄声相慰籍【苟富贵无相忘见陈胜传界上亭长寄声谢我见赵广汉传所以慰荐走卒师古曰荐者举藉也见胡建传所以慰籍之良厚见後汉隗嚣传】

寄怀元翁

岁年丰稻秔井邑盛烟火【选诗井邑自相循注引周礼九夫为井四井为邑史记律书烟火

万里】北园曾未窥【董仲舒传三年不窥园】王事方勤我【诗王事适我】花枝互低昂
【韩文公诗道傍草木花红紫相低昂欧阳公诗薰风入花骨花枝互低昂】鸟语相许可【
汉萧何传上奏许可师古曰可其所奏许其所请】观物见归根抚时终宴坐【老子云万物
并作吾以观其复夫物芸芸各归其根归根曰静宴坐见前注】搔首望四邻诸贤皆最课【
班固叙传云奏课连最韩诗寄邹刺史初如遗宦情终仍最郡课】极工簿领书甚办米盐
【史记天官书其占验凌杂米盐汉书咸宣传其治米盐】平生短朱墨【见前注】吏考仰
丞佐初无公侯心骨相本寒饿【退之诗自叹虞翻骨相屯】明窗怀玉友清绝吟楚些【见
楚辞招魂南史下琳传时谓铨锡二王玉昆金友沈存中云今夔峡湖湘人凡禁呪句尾皆称
些乃楚人旧俗】念君方坐曹【薛宣传日至休吏贼曹掾独不肯休坐曹治事白乐天诗竟
日主官曹经荀旷休沐】无因奉虚左【史记魏公子无忌传公子从车骑虚左自迎夷门侯
生魏勃愿见相君无因见齐悼惠王传】

对酒次前韵寄怀元翁

花光渐寒食【李白诗花尤不减上林红】木燧催国火【论语钻燧改火邶中记并州一百
五日为介子推断火冷食三日内则云大镌木燧注云木燧钻火也周礼司燿掌行火之政令
四时变国火以救时疾张景阳诗离居几何时钻燧忽改火】沽酒鸟劝人【见前注】怀贤
吾忘我【庄子齐物论云今者吾丧我注云我自忘矣】事往堕甑休【孟敏荷甑堕地不顾
而去林宗见而问其意对曰甑已破矣视之何益林宗异之劝令游学十年知名见後汉郭太
传】心知求田可【陈登谓许汜曰君求田问舍言无可采附吕布传後王荆公诗老焉无用
亦求田】可人不在眼【礼记管仲遇盗取二人焉上以为公臣曰其所与游辟也可人也晋
史桓温过王敦墓曰可人可人】樽俎思促坐有生当倥偬【後汉卓茂传斯固倥偬不假给
之日】无暇天所课【如束坡诗此病天所赅长安小东天所放之类】不解闻健饮【韩退
之诗不解文字饮白乐天诗闻健偷闲且勤饮】俄成一蓬颗【贾山传曾不得蓬颗蔽家而
记宿焉】泥钩 万物【董仲舒策云犹泥之在钩唯甑者之所为老子云埏埴以为器注云
埏和也埴土也】寒暑勤五佐【史记天官书云天神贵者太一太一佐曰五帝按月令四时
皆有常而土旺四季】岂其怀爱憎私使我穷饿【庄子太宗师篇云父母岂欲吾贫哉天无
私覆地无私载天地岂私贫我哉】醉招魂不来浪下巫阳些【杜诗不知临老曰招得几人
魂退之诗愁狄酸骨死怪花醉魂馨招魂云帝告巫阳曰云云乃下招曰魂兮归来去君之恒
干何为乎四方些】梦成少年嬉走马章台左【汉张敞传走马章台街太白诗青云少年子
挟弹章台左】

侯慰之吉水覆按未归三日泥雨戏成寄之

叹息侯嬴老【史记魏公子无忌传封为信陵君魏有隐士侯嬴年七十家贫为大梁夷门监
者公子往请欲厚遗之不肯受乃置酒大会宾客坐定公子从车骑虚左自迎侯生云云】尉
曹鞍马疲山花迷部曲江雨压旌旗越鸟劝沽酒【太白诗清风动窗竹越鸟起相呼谓提壶
卢】竹鸡忧蹋泥【谓泥滑滑】不知何处醉遥寄解醒诗【刘伶五斗解醒】

侯尉家聽琵琶

舫齋蒼竹雨聲中一曲琵琶酒一鍾恰似潯陽江上聽只無明月與丹楓【白樂天琵琶引其略云潯陽江頭夜送客楓葉荻花秋瑟瑟主人下馬客在船舉酒欲飲無管絃醉不成歡慘將別別時茫茫江浸月云云】

寄袁守廖獻卿

公移猥甚丛生笋【退之詩戢戢已多如束笋集中有符移官移與公移皆一也司馬相如有喻巴蜀檄】訟牒紛如蜜分窠【訟牒即北山移文所謂牒欣倥偬也】少得曲肱成夢蝶【見前注】不堪衙吏報鳴鼉【詩靈台云鼉鼓逢逢柳子厚詩蹀躞貽先駕龍銅鼓報衙東坡詩鼉鳴穴中如打衙】已荒里社田園了【見歸去來辭】可柰春風桃李何想見宜春賢太守【袁州宜春郡亦治宜春縣】無書來問病維摩【維摩經維摩詰即以神力空其室內唯置一床以疾而卧】

廖袁州次韵見答并寄黃靖國再生傳次韵寄之

春去懷賢感物多飛花高下冒絲窠【杜詩風花高下飛退之聯句絲窠掃還成】傳聞治境無戾虎【戰國策秦語云陳軫曰有兩虎爭人而鬪者管莊子將刺之管與止之曰虎者戾虫人者甘餌也注云戾貪也兼用後漢宋均為九江太守虎渡江事】更道丰年鳴白鼉【唐張籍詩天欲雨有東風南溪白鼉鳴窟中】史筆縱橫窺寶鉉【元注云干寶作搜神記徐鉉作稽神錄當時謂寶鬼之董孤】詩才清壯近陰何【杜詩頗學陰何苦用心陰何謂陰铿何遜】寄聲千萬相勞苦如倚胡牀得按摩【趙廣漢傳界上亭長戲曰至府為我多謝問趙君師古曰多厚也言殷勤若今人言千萬問訊据胡牀見晉桓伊傳禮記內則問衣燠寒疾痛苛痒而敬抑搔之注云抑按搔摩之孟子為長者折板注折枝按摩折手節也劉峻廣絕交論注折枝按摩手足也】

袁州劉司法亦和予摩字詩因次韵寄之

袁州司法多兼局日暮歸來印几窠詩罷春風榮草木【歸去來辭木欣欣以向榮】書成快劍斬蛟鼉【退之石鼓歌快劍斫斷生蛟鼉】遙知吏隱清如此【杜詩史隱適情性茲焉具窟宅汝南先賢傳鄭欽吏隱于蚊陂之陽】應問卿曹果是何【王徽之傳為桓沖騎兵參軍沖問卿署何曹對曰似是馬曹】頗憶病余居士否在家無意食蘿摩【本草枸杞注曰諺云去家千里不食蘿摩枸杞】

次韵奉答吉老并寄何君庸

傾懷相見開城府【文選千令升晉紀總論云宣皇帝性深阻有如城府面能寬綽以容納唐李林甫城府深密人莫窺其際】取意閑談沒白窠【白窠見前注】但取吏曹無狡兔【狡

兔三窟见前注】任呼舞女伐灵鼉【采芑诗伐鼓渊渊南都赋吹紫凤之箫伐灵鼉之鼓】屡中瓮面酒几圣【缸面即瓮头见前注魏志徐邈传时科禁酒而邈私饮至沈醉按事赵逵问以曹事邈曰中圣人逵白之太祖太祖甚怒鲜于辅曰平日醉客谓酒清者为圣人浊者为贤人偶醉言耳坐得免後文帝践阼问曰颇复中圣人不对曰时复中之李白诗酒倾愁不来所以知酒圣】苦忆尊前人姓何愿得两公俱助我不唯朱墨要渐摩【非特治簿书朱出墨入亦欲渐仁摩义也】

次韵奉答廖袁州怀旧隐之诗

诗题怨鹤与惊猿【文选北山移文蕙帐空兮夜鹤怨山人去兮晓猿惊】一幅溪藤照麝烟【剡溪上多古藤见舒元舆吊剡藤文】闻道省郎方结绶【後汉黄香为尚书郎不离省闕白乐天集有贺杨十二新拜省郎诗杜诗省郎京尹必俯拾簫朱结绶见汉萧育传】可容名士乞归田【渊明诗云守拙归园田文选张平子有归田赋】严安召见天嗟晚【主父偃传上书朝奏暮召时徐乐严安亦俱上书上召见三人谓曰公等皆安在何相见之晚也】贾谊归来席更前【谊为长沙傅帝思谊徵之至入见至夜半文帝前席】何况班家有超固应封定远勒燕然【班超封定远侯班固勒燕然铭各有传】

上权郡孙承议

公家簿领如鸡栖【簿领见前注车如鸡栖马如狗见陈蕃传後】私家田园无置锥【荀子无置锥之地而明于为社稷之大义】真成忍骂加餐饭【杜诗真成浪出游文选古诗努力知餐饭】不如西江之水可乐饥【诗泌之洋洋可以乐饥】他人勤拙犹相补【乐天诗救烦无若静补拙莫如勤列子云恩过不相补矣汉何武传圣王有计功除过故云无功状】身无功状堪上府【汉朱博传齎伐閹诣府注伐功劳也于定国传具狱上府】公诚遣骑束缚归【文选魏文帝书今遣骑到邳老杜云大官喜我来遣骑问所须鲍叔牙曰使管仲无忌束缚于鲁时杜诗君看束缚去亦得归山冈山谷在太和閹郡守三人按集中所志墓云知吉州姚公元丰辛酉卒又一志云知吉州毕公元丰五年十一月卒又按吉州西峯院三秀亭记云庐陵北缺守辄以他吏掇承托宿传舍吏胥视民万俎豆执鞭者衆羊失其牧元丰六年春诏用壽春魏候以此观之则孙权郡者必能病诸邑故诗有忿语】长随白鸥卧烟雨

奉和孙奉议谢送菜

春蔬照映庾郎贫【南史庾杲之传庾郎贫食鲑】遣骑持笼佐茹葦【遣骑老前注庄子人间世篇不饮酒不茹葦】却得斋厨厌滋味白鹅存掌鼈留裙【江南别錄云僧谦明好诗酒烈祖问其所求曰唯愿鹅生四个腿鼈生两重裙陶岳五代史补亦云】

和孙公善李仲同金樱饵唱酬二首

人生欲长存日月不肯迟【渊明诗日月不肯迟四时相催逼】百年风吹过忽成甘蔗滓【

寒山子诗更足三十年还如甘蔗滓【传闻上世士烹饵草木滋【檀弓必有草木之滋焉姜桂之谓也】千秋垂绿发【李贺诗绿鬓少年金钗客绿髮见前注】每恨不同时【司马相如传朕独不得於此人同时哉】李侯好方术【方术见前注】肘後探神奇【庄子臭腐化为神奇南史陶弘景传着肘後方杜甫诗腹中书籍幽时晒肘後医方静处看】金樱出皇坟【本草金樱子味酸涩久服令人耐寒轻身方术多用云是今之刺黎子色黄有刺本草序云世所传曰神农氏本草三卷尚书序云伏羲神农黄帝之书谓之三坟】刺橐覽霜枝寒窗司火候古鼎冻胶飴【内则枣栗飴蜜释文飴饴也图经本草云金樱子蜀中人熬作煎】初尝不可口【庄子曰粗梨橘柚皆可于口老杜病橘诗纷然不适口】醇酒味相宜【和味宜见石耳诗芥姜作辛和味宜注】至今身七十孺子色不衰【庄子達生篇毕豹有年七十而犹有婴儿之色】田中接耘鋤孙息亲抱持却笑邻舍公未老须杖藜【见前注】

假守富春公【汉南奥千传诛奏所置吏以其党为所假注云今为郡县之职或守或假刘禹锡诗假守亦高卧墨卿正垂耳前有上权郡孙承议诗即此人也庐陵比缺守孙掇州事】秋毫聽民词夙夜临公厅归卧酸体肢【枚乘七发云恣支体之安柳子厚读书诗云欠伸展体肢乐天聽琴诗聽者酸心髓】李侯来馈药【论语康子馈药】期以十日知【史记扁鹊传长桑君出怀中药予扁鹊曰饮是以上池之水三十日当知物矣古方书云以知为度未知再服】深中护灵根【黄庭经五池清水灌灵根太玄经云藏心于渊美厥灵根】金鑰秘王?【黄庭经云?金龠常完坚】不须许斧子辛勤采玉芝【真诰英夫人吟云有心许斧子言当采玉芝芝草不必得汝亦不能来汝来当可得芝草与汝食许斧子许五斧也一本作五芝天台山赋云五芝含秀而晨敷见文选】我方困健讼挝翁争一锥【魏武纪第五伯鱼三娶孤女谓之挝妇翁此摘其字争锥见左传昭六年锥刀之末将尽争之注云锥刀末喻小事】不能鸣弦坐颇似巫马期【韩诗外传子贱治单父弹鸣琴身不下堂而单父治巫马期以星出以星入日夜不处以身亲之而单父亦治巫马期问于子贱子贱曰我任人子任力任人者佚任力者劳亦见说苑】敢乞刀圭余【本草序例云刀圭者十分方寸之一准如梧桐子大也退之诗云乞取圭刀救病身白乐天诗相衰白髮分刀圭】归秋卯饮卮【白乐天诗卯饮一卮眠一觉世间何事不悠悠】倪令忧民病从此得国医【晋语云上医医国】

答余洪范二首

道在东西祖【传灯錄天竺有二十七祖達磨西来为中华初祖赞宁僧史以中国为东夏僧宝传玄沙禪师传云诗曰達磨不来东上二祖不往西天又按传灯錄大同禪师传师问僧什麼处来曰东西山礼祖师来师曰祖师不在东西山疑或用此意南岳石头和尚参同契云竺土大仙心东西蜜相付人根有利钝道无南北祖】诗如大小山【按许子解淮南鸿烈其序云安袭封淮南王方术之士多往归焉遂与苏飞李尚左吴田由雷被毛彼五被晋昌等八人及诸儒大山小山之徒共讲论道德总统仁义而着此书】一家同雪月【即龙光和尚千江同一月之意】万事废机关【乐天诗应须?墨机关外】天上麒麟阁【汉书甘露三年上思肱股之美图画其人于麒麟阁】山中虎豹闲何时得邱壑【前汉叙传渔鈎于一壑则万物不奸其志栖迟于一丘则天下不易其乐】明镜失朱顏【乐天诗腰间红绶挂未稳镜里朱顏看已失】

悬磬斋厨数米炊【室如悬磬见左传乐天诗贫室如悬磬简髮而栉数米而炊见庄子庚桑楚篇】贫中气味更相思可无昨日黄花酒又是春风柳絮时三月乙巳来赋盐万岁乡且菟猕匿赋之家晏饭此舍遂留宿是日大风自采菊苗荐汤饼二首【纂异别本汤饼下有红药盛开四字二首作三首第三首云春风一曲花十八得百醉玉东西露叶烟枝见红药犹似舞余和汗蹄】

飞廉决云开白日【离骚云前望舒使先驱兮後飞廉使奔属注飞廉风伯也】顿撼天地万窍号【退之女挈圻铭云輿致走道撼顿庄子齐物篇云大块噫气其名为风是唯无作作则万窍怒号】按抄桃李欲净尽【曲礼云共饭不泽乎注泽谓按抄也刘禹锡玄都观诗桃花净尽菜色开】乞与游丝百尺高【古诗游丝百尺诚娇妬欲绊青春归上天庾信燕歌行洛阳游丝百丈连黄河春冰千片穿退之同冠峡诗落英千尺堕游丝百丈飘】

幽丛秀色可揽撷【大业拾遗帝曰古人云秀色若可餐杜牧之云光洁疑可揽欲以襟怀贮晋志隆安中民作懊恼歌有草生可揽撷之言】煮饼菊苗深注汤【崔氏四民月令曰立秋无食煮饼及水溲饼】饮冰食蘗浪自古【白乐天诗三年为刺史饮水复食蘗】摩挲满怀春草香【後汉蓟子训传摩挲金狄】

题高君正适轩

至静在平气至神惟顺心【易系辞非天下之至神孰能与于此渊明归去来辞序云因事顺心命篇曰归去来兮】道非贵与贱达者古犹今【见前注】功名属廊庙闲暇归山林【已见廊庙等山林注】畜鱼观羣嬉笼鸟听好音【诗睨睨黄鸟载好其音文选潘岳秋兴赋曰池鱼笼鸟有江湖山藪之思】不如一邱壑随愿得飞沉【丘壑见前注】开门纳日月【选诗璇题纳明月】呼客解纓簪诗书抚尘迹歌舞送光陰妖媚倾国笑【上林赋妖冶间都史记作妖冶媚都阳城下蔡倾城倾国见前注】丝竹感人深【乐记曰物之感人无穷而人之好恶无节又曰奸声感人而逆气应之正声感人而顺气应之】豁然开胸次风至独披襟【宋玉风赋楚襄王游于兰台之宫宋玉景差侍有风飒然而至王乃披襟而当之日快哉此风】樊笼锁形质物外有幽寻【退之诗幽寻事随去孰能量远近又云物外日月本不忙】

寄李次翁

雨断山川明【老杜诗楚天不断四时雨太白诗岭峭纷上干川明屡回顾】古今同一壑【汉杨惲传古与今如一丘之貉注云言其同类也】惟有在世时聊厚不为簿【文选古诗斗酒相娱乐聊厚不为簿王荆公诗珍足海物味其厚不为簿】南箕与北斗亲友多离索【集中有诗云故人南箕与北斗已注其详檀弓云子夏曰吾离羣而索居】斯文如旧欢李侯极磊落颇见元鲁山用心抚疲弱【元德秀字紫芝为鲁山令有德政天下高其行不名谓之元鲁山详见唐书卓行传前集有赠别李次翁曰言诗其略云观物慈哀莅民爱庄而此诗又比之元鲁山此人当是作邑张方回家本编四言诗于太和诗中此诗亦在太和作】不以民为梯俯仰无所怍【退之诗将举汝愆尤以为已阶梯孟子仰不愧于天俯不怍于人】胸中种

妙觉【圆觉经由彼妙觉性徧满故根性尘性无坏无杂】岁晚期必获然膏夜读书【进学解云焚膏油以继晷】见圣宜有作【书君陈云凡人未见圣若不克见既见圣亦不克由圣】文字寄我来官邮远飞橐【橐谓直筒也白乐天云与微之唱和来去常以竹筒贮诗又有诗云寂寥无复递诗筒】世缘心已死恍得万金药【万金良药见灌夫传】

四月戊申赋盐万岁山中仰怀外舅谢师厚【山谷铭胥夫人谢氏墓云尝任司封郎中提点成都府路刑狱公事或以疑似中之坐失官数年已而有大臣冤其狱天子直之今为屯田郎中通判襄州名景初者父也景初字师厚按师厚之弟刑部尚书景温所作谢氏小隐田记云元丰五年予自长沙以礼待召道出襄阳时伯兄通判襄州兄弟相见皆白首矣山谷此诗是年所作无疑其下十数诗皆述赋盐之苦盖同时也】

只今汉龐公白发佐州郡【後汉书龐公者南郡襄阳人也用襄阳事因以龐比师厚】穷通视寒暑【庄子让王篇古之得道者穷亦乐通亦乐所乐非穷通也道得于此则穷通为寒暑风雨之序矣】仕已谁喜愠【见前注】长松卧涧底【文选诗郁郁涧底松离离山上苗以彼径寸叶荫此百尺条世胄渐高位英俊沉下寮】桴溜多裂璽【方言器破而未离谓之璽】未须论才难【柳子厚诗才难不其然字本出论语】世人无此韵【晋庾敳传雅有远韵陶潜诗少无适俗韵性本爱丘山谢浑为韵语奨劝灵运等曰康乐诞通度实有名家韵】禅悦称性深【维摩经云虽复饮食而以禅悦为味】语端入理近涣若开春冰【左传序云涣然冰释韩文公诗离思春冰泮烂漫不可收】超然聽年运【老子燕居超然庄子年运而往】临氏秉三尺【汉杜周传客有谓周曰君为天子决平不循三尺法注云以三尺竹简书法律也左传鲁秉周礼】朱墨不可紊【朱墨见前注】传闻但言归心许手自隐【自隐见次韵师厚答□着作注】欲知南陂稻得几就收掬【後汉范丹传招拾自资注引他书云招拾麦得五斛】胥疏江湖滨【庄子山水篇犹且胥疏于江湖之上】不迹金玉训【诗云母金玉尔音】濡需且肉食【濡需见前注】鷃鷃恐钟衅【孟子对齐宣王曰王坐于堂上有牵牛而过堂下者王曰牛何之对曰将以衅钟王曰舍之吾不忍其鷃鷃】龙移山发洪虎乳月生晕【淮南子虎啸而谷风至龙举而景云属月生晕谓月晕而风也】竹声寒夏簟輟寝中夜听寄声向鹿门恍赐劳苦问【龐公传云遂携妻子登鹿门山因采药不反劳苦见汉张耳传杜甫冬日怀李白诗未因乘兴去空有鹿门期李白诗尝闻龐德翁家住洞湖水终身栖鹿门不入襄阳市】

癸丑宿早禾渡僧舍【壬戌四月癸丑至辛酉赋盐万岁山及金刀坑凡十篇】

城头渡可涉早禾渡可【诗大东云维北有斗不可以挹酒浆注云挹也释音云广雅曰酌也音拘】试问安用舟春水三丈余是维一都会【史记货殖传邯郸亦漳河之间一都会也凡言一都会者八】狙侏侏正输【汉货殖传节狙侏注侏者合二家交易者也狙者其首率也狙子党切征输即赋输也史记平準书天下赋输或不偿其僦费】郁郁多大姓儒冠颇诗书【汉赵广汉传颖川豪杰大姓】以武断乡曲【食货志晁错奏言并兼豪党之徒以武断乡曲】旧俗小未除厌器谢近市【左传昭三年景公谓晏子曰子之宅近市湫溢嚣尘又云贾而欲赢而恶嚣乎】斩絶得僧区【刘孝标广絶交论太行孟门岂日斩絶韩文郑羣墓志

云不为崖岸斩絶之行】此地美水竹林明见浴鳧【沙煖低风蝶天晴喜浴鳧】相追唼菱藻【楚辞鳧雁皆唼梁藻兮凤翱翔而高举子虚赋唼蝶菁藻咀嚼菱藕唼亦作唼唼色甲反】天乐非世娱【庄子黄帝张乐于洞庭之野其卒无尾其始无首此之谓天乐李白宫中行乐词春风开紫殿天乐下珠楼】忆在田园日放浪友禽鱼【兰亭禊饮序云放浪形骸之外】今来长山邑忍饥抚惇孤出入步曲随【汉光武纪云各领部曲注引续汉志曰大将军营有五部部三校尉部下有曲曲有军侯一人】咳唾吏史趋【法书要录羲之帖云顷因小差欲极游娱而吏卒守之可叹耳】形骸束簪笏可意一事无【杜诗咸阳客舍一事无】谋生理未拙仰愧拥肿樗【拥肿樗见前注】曲肱晴檐底结网看蜘蛛【王荆公诗移床独卧秋风里静看蜘蛛结网丝】

宿观山

暮发白下地【白下见前注】暝投观山宿横溪赤栏桥【温飞卿乐府云一渠春水赤栏桥】一径入松竹野僧如惊麇【文选沈休文诗惊麇去不息】避堂具灯烛【曹参传避正堂舍盖公】我眠兴视夜【诗子兴视夜】部曲始炊熟笕水烟际鸣【以竹通水曰笕古典切】万籁入秋木【庄子齐物论敢问天籁子纂曰吹万不同而使其自己也】平生潇洒兴本愿终涧谷【杜诗非无江海志萧洒送日月】世累渐逼人【晋谢安传亶亶为来逼人】如垢不醲沐【礼内则五日则燂汤请浴三日具沐其间面垢燂潘请醲释文曰醲音悔】已成老翁为作更长碌碌【史记平原君传公等碌碌因人成事】

上大蒙笼【乙卯晨起】

黄雾冥冥小石门苔衣草路无人迹【尔雅薄石衣注水苔也东汉马后传黄雾四塞杜诗日满楼前江雾黄】苦竹参天大石门【杜诗乔木上参天】虎迹兔蹊聊倚息【尔雅麋其迹躔兔其迹迹注迹脚所践处迹户郎反】陰风搜林山鬼啸【宋玉风赋稍杀林莽屈原九歌有山鬼篇杜诗山鬼吹灯灭厨人语夜阑白乐天诗水虫能射影山鬼解藏身】千丈寒藤绕崩石【杜诗缺篱将棘拒倒石赖藤纏】清风源里有人家牛羊在山亦桑麻向来陆梁嫚官府【陆梁见前注庄子官天地府万物】试呼使前问其故衣冠汉仪民父子【光武纪复见汉官威仪】吏曹扰之至如此穷乡有米无食盐今日有田无米食【当作今日有塩无食米】但愿官清不爱钱【太白赠崔秋浦云见客但倾酒为官不爱钱县古槐根出官清马骨高见欧阳公诗话】长养儿孙聽驱使【退之赠卢仝云有力未免遭驱使】

劳坑入前城【乙卯饭後】

刀坑石如刀【乐天入峡诗大石如刀剑小石如齿牙】劳坑人马劳窈窕篁竹陰【退之送区册序云夹江荒茅篁竹之间本出汉书】是常主逋逃【武城云为天下逋逃主】白狐跳梁去【甘泉赋注云陆梁跳也】豪猪森怒嗥云黄觉日瘦【杜诗久行见空巷日瘦气惨惨】木落知风飗【退之祭文云雪虐风号号一作飗】轻轩息源口饭煮溪毛【左传涧溪沼沚之毛】山农惊长吏【退之诗山农惊见之】出拜家骚骚【檀弓骚骚尔则野】借问淡

食民祖孙甘餽糟【退之徐偃王碑祖孙相望楚辞餽其糟而啜其醢】赖官得盐吃正苦无钱刀【泉布刀皆钱也食货志王莽造契刀错刀柳子厚诗钱刀恐贾害饥至益逡巡】

乙卯宿清泉寺

税舆陟高冈【诗卷耳云陟彼高冈】却立倚天壁【宋玉大言赋长剑耿介倚天外东坡诗倚天无数开青壁】就舆乱清溪转石飞霹雳【太白诗崩崖转石万壑雷韩文公祭张署文洞庭漫汗粘天无壁风涛相脰中有霹雳】十步一沮洳【魏国风彼汾沮洳韩诗大鱼岂肯居沮洳杜诗沮洳栈道湿】五步一枳棘【阿房宫赋五步一楼十步一阁】上方未言返【上方见前注】豁见平土宅【书是降丘宅土孟子然後人得平土而居之】田家鸡犬归佛庙檀栾碧【枚乘兔园赋修竹檀栾王维诗闲居日清静修竹自檀栾谢朓诗檀栾映修竹】莲荡落红衣【赵嘏诗红衣落尽渚莲愁】泉泓数白石人如安巢鸟【杜诗东走无复忆鲈鱼南飞觉有安巢鸟韩文公联句暮鸟已安巢春蚕看满箔】稍就一枝息【庄子鷦鷯巢于深林不过一枝】钟鱼各知时吾亦自得力【杜诗生我不得力】

丙辰仍宿清泉寺

山农居负山呼集来苦迟既来授政役【文选东京赋赋政任役常畏人力之尽也】謡詠谓余欺按省其家货可忍鞭扶之【元结春陵行悉使索其家而又无生资左传一扶女庸何伤注扶击也敕栗切】恩言输公家疑阻久乃随滕口终自愧【易咸之上六滕口说也】吾敢乏王师官宁惮淹留【官字盖用韩退之泂吏诗云泂吏垂手笑官何问之愚譬官屋京邑何由知东吴左传僖三十三年不腆弊邑为从者之淹】职在拊 嫠所将部曲多溷汝父老为【汉陆贾传母久溷汝为也】西山失半壁【太白诗青山欲衔半边日又云半壁见海日】且复下囊輜【汉王吉传所载不过囊衣左传襄十二年楚重至于泌注云輜重也正义曰輜一名輶前後蔽以载物】啼鸦散篇帙【灵运诗散帙问所知诗意谓日暮罢休文书也】休吏税巾衣【汉薛宣传日至休吏】石泉鼓坎坎【诗坎坎鼓我言泉鸣如鼓声】竹风吹参差【楚辞吹参差兮谁思注参差洞箫也补注曰风俗通云舜作箫其形参差此联虽以萧鼓为喻然亦取柳子厚南涧诗迴风一萧瑟林影久参差也】书冷行熠熠【诗熠熠宵行注熠熠磷也磷萤火也诗盖取车武子聚萤之意】壁虫催杼机【古今注促织一名投机谓其声如急织也】昏缸夜未央【缸灯也西都赋金缸壁夜未央见诗】高枕梦登巘

丁巳宿宝石寺

钟磬秋山静【柳子厚诗鹤鸣楚山静】炉香沉水寒【楞严经云见诸比丘烧沉水香】晴风荡蒙雨【诗东山零雨其蒙】云物尚盘桓【归去来辞云抚孤松而盘桓注云尔雅曰盘桓不退也】淪茗赤铜碗筍泉苍烟竿红榴罇玉房【吴都赋云榛栗罇发文选陆士衡吊魏武文云陪窈窕于玉房注引汉书郊祀歌曰神之出排玉房柳子厚诗侯家炽炭雕玉房此摘其字】么橘委金丸【西京杂记韩嫣好弹以金为丸苏舜钦诗洞庭柑熟客分金】枕簟已思爨饭?可加餐【翟方进传饭我豆食羹芋以乐府诗上有加餐食】观已自得力谈元舌本

乾【晋殷仲堪传每云三日不读道德经觉舌本间强】理窟乃块然【晋张凭传简文帝召凭与语叹曰张凭勃率为理窟骆宾王上韦明府奉训趋庭束情田于理窟曹子建求通亲亲表每四节之会块然独处】世故浪万端【杜诗世故莽相仍王莽传云方故万端】牛刀经肯綮【庄子庖丁解牛技经肯綮之未尝】古人贵守官【左传守道不如守官柳子厚论守道不如守官是非圣人之言未有守官而失道守道而失官之事者】摩挲发硎手考此一邱盘【後汉蓟子训摩挲铜人此摘其字刀刃若新发于硎亦庖丁事卫国风考盘在涧注云考成盘乐也】

山谷外集诗注卷十

山谷外集诗注卷十一

<集部,别集类,北宋建隆至靖康,山谷外集诗注>

钦定四库全书

山谷外集诗注卷十一

宋 黄庭坚 撰

史 容 注

已未过太湖僧寺得宗汝为书寄山蕨白酒长韵诗寄答

从学晚闻道【庄子曰孔子行年五十有一而不闻道】谋官无见功【魏伯阳参□契云竭力劳精神终身无见功】早衰观水鉴【酒诰云人无于水监当於民监庄子人莫鉴子流水而鉴于止水】内热愧邻邦【庄子人间世篇今吾朝受命而夕饮冰我其内热欤】比邻有宗侯治剧乃雍容摩手抚鰥寡藁砧磔强梁【老子强梁者不得其死庄子从其强梁随其曲传乐府诗云藁砧今何在藁砧鉄也项籍传身伏斧质师古曰质谓鍤也古者斩人加于鍤上而斫之鍤竹林反景帝纪云改磔曰弃市师古注磔张其户也弃市杀之市也磔竹客反】桃李与荆棘【说苑简子谓阳虎曰树桃李者夏得休息秋得食焉?蒺藜者夏不得休息秋得其刺焉】称物施露霜【易君子以称物平施言恩威兼用如雨露霜雪也诗云蒹葭苍苍白露为霜此摘其字】政经甚缜密【柳子厚志崔永州墓悼于政经莫有禁御】私不蚍蜉通【韩文无蚍蜉蝼蚁之援此言无一蚁之私也】吏舍无请赇【曹参传後□近吏舍吏舍日饮歌呼赵广汉传吏受取请求铢两之奸皆知之尹赏传受赋报仇】家有侯在堂府符下盐策【管子曰海王之□谨正盐筴十口之家十人食盐百口之家百人食盐】县官劝和羹【书若作和羹】作民敏风雨令先诸邑行我居万夫上闚惰世无双此邑宅岩岩【鲁颂太山岩岩】里中颇秦风翁媪无恙时出分如蜂房【贾谊新书秦人家富子壮则出分家贫子壮则出赘】一钱气不直【汉书灌夫骂贤曰平生毁程不识不直一钱】白梃及父兄簪笔怀三尺揖我谓我臧【山谷江西道院赋序其略云江西之俗其细民险而健以终讼为能名曰珥笔之民惟筠为州独不囁于讼然与南康庐陵宜春三郡并蒙恶声庐陵即吉州也齐国风还云揖我谓我臧兮三尺见前注】向来豪杰吏治之以牛羊我不忍敌民教养如儿甥荆鸡伏鹄卵久望羽翼成【庄子庚桑楚篇越鸡不能伏鹄卵鲁鸡固能矣音义曰小鸡也或云荆鸡鲁鸡大鸡也今蜀鸡张良传上召戚夫人指祝曰羽翼已成不可动矣】讼端汹汹来谕去稍听从尚余租庸调【杜诗况闻处处鬻男女割慈忍爱还租庸】岁岁稽法程【汉贾谊云立经陈纪可以为万世法程】按图索家资四壁逴牖牕揜目鞭扑之【檀弓每毙一人揜其目】桁杨相推振【庄子云桁杨接摺音义云械夹颈及胫者】身欲免官去弩马恋豆糠【桓范出赴曹爽蒋济曰弩马恋栈豆爽必不能用也见魏志】所以积廩盐未使户得烹八月酺社酒公私乐年登遣徒与会稽【史记夏纪禹会诸侯江南计功而崩因葬焉命曰会稽会稽

者会计也】而悉走荻箬吾惟不足遣【张良传上曰吾惟之竖子固不足遣迺公自行耳】夙驾略我疆【诗星言夙驾】邑西?戾地【軼当作輒音孤庄子庖丁解牛技经肯綮之未尝而况大輒乎注云輒戾大骨也音义云盘结骨】是尝婴吾锋岷齕其强宗【岷齕也口很切退之曹成王碑岷其奸猖汉田儼传云秦复得志于天下则齕齕首用事者坟墓矣注云齕侧齕也音义齕也音纡】彼乃可使令夙夜於远郊草露沾帷裳【诗渐车帷裳】入磴履虎尾【用易履卦语】扞萝触蛭芒【杜诗萝扞澁先登】借问夕何宿烟边数峯横松竹不见天【楚辞山鬼余处幽篁兮终不见天汉书广川王歌曰内弗鬱忧哀积上不见天生何益】蟠空作秋声谷鸟与溪瀨合弦琵琶箏【楚辞石瀨兮濺濺杜诗絶壁过云间锦绣疎松隔水奏笙簧张籍祭退之诗云乃出二侍女合弹琵琶箏】税驾乱石间【李斯曰吾未知所税驾矣】岩寺鸣疎钟山农颇来服见其父孙翁【退之铭马少监云吾未耄老而哭其祖子孙三世】苦辞王赋迟户户无积藏民病我亦病呻吟達五更韵为诵书语【一作书生语】行歌类楚狂【论语楚狂接輿歌而遇孔子】举鞭问嘉禾秣马可及城【嘉禾谓吉州永新县也县有禾山故号嘉禾集中有答永新宗令寄石耳诗云嘉禾令尹清如水宗令即汝为也】惜哉忧城旦【汉儒林传窦太后好黄老轅固曰此家人言矣太后怒曰安得司空城旦书乎惠帝纪当为城旦舂者皆耐为鬼薪白粲注云城旦者旦起行治城舂作米皆四岁刑也】不得对榻洒笔付飞鸟北风吹报章书回银鈎壮【见前注】句与麝煤香【李建中题杨凝式大字壁後云枯杉倒桧霜天老松烟麝煤风雨寒山谷喜书此诗】浮蛆拨官醕【李太白诗恰似蒲萄新拨醕曾南丰诗浮蛆蒲瓮尝春酒】倾壶嫩鹅黄【杜诗鷺儿黄似酒对酒爱新鹅】山气常蓊?【杜诗蓊句川气黄】此物可屡觴蒨药割紫藤开笼喜手封味温颇宜人【杜诗疎快颇宜人】笔以石飴姜举杯引药麤咏诗对寒江寄声甚劳苦【寄声劳苦并见前注】相思秋月明我邑万户乡其民资囂凶欲割以寿公使之承化光【易含万物而化光】反以来寿我中有吞舟鲸【贾谊吊屈原赋彼寻常之污渌兮岂能容夫吞舟之巨鱼杜诗中有掉?鲸】铜墨俱王命【文选策秀才文深汰珪符妙简铜墨注云珪符谓刺史铜墨谓县令汉书曰县令长皆□官秩六百石铜印墨绶】职思慰孤惇【诗职思共忧】何时赌一掷烧烛呪明琼【晋刘毅传擲蒲大擲一判至数百万列子说符篇射者射问琼注云齿五百也此卷先有三月乙巳来赋盐万岁乡且蒐独匿赋之家二首又有四月戊申赋盐万岁山中一首今观此诗可见盐之扰民甚矣司马温公记文载皮公弼言官卖盐无利实録载皮公弼言官卖盐不得不罢今观此诗盖官□不售而赋之民也前三首有月日後十一首止称甲子自癸丑至辛酉几浹旬历尽崎岖虽不能无怨而词甚婉】

庚申宿观音院

谷底一墟落【文选范彦龙诗轩盖点墟落李善曰说苑云师旷谓晋平公曰五鼎不当生墟落】地形如盎盆椳题相照耀【孟子椳题数尺释文云尔雅曰桷谓之椳题头也】其民颇家温【董仲舒传家温而食厚禄】土风甚于秦不可借釜鬲【音言贾谊言秦俗云借父耰鋤虑有德色母取箕帚立而诮语潘安仁西征赋子羸鋤以借父训秦法而着色】僧屋无陶瓦剪茅苍竹樊【晁错传茅茨不剪诗东方未明折柳樊圃注樊藩也】借问僧安在乞饭走诸门人哄鸟鸟语【法言云一哄之市】簟凉风水文【退之诗水文浮桃簟】旁有蜂蜜庐【山海经云是惟螫虫寔惟蜂蜜之庐】颇闻衙集喧【俚雅蜂有两衙应潮钱昭度村居云

黄蜂衙退海潮上白蚁戢酣山雨来见谈苑】将雨蚁争丘麀兵复追奔【异闻集淳于棼梦人扶入宅南古槐穴中有大城门楼题曰大槐安国其王以女瑶芳妻之使为南柯郡守二十年有檀萝国来伐王命生征之败绩共妻病死王谓生可暂归生上车出一穴见本里间巷入其门见已身卧堂庑下发悟如初梦中倏忽若度一世矣遂寻古槐下穴见大穴洞然积土壤为城郭台殿之状有蚁数斛中有小台二大蚁处之即槐安国也又穷一穴直上南枝亦有土城小楼即南柯郡也宅东一里涧侧有大檀树藤萝拥织旁有蚁穴意其为檀萝国合短兵麀臯兰下见霍去病传追奔逐北见文选李陵书】红英委凤翼赤帟峩鸡冠【老杜树鸡棚诗云终日□赤帟今以言鸡冠花】汲烹寒泉窟伐竹古松根相戒莫浪出月黑虎夔藩【老杜诗伐木诗序云我有藩篱是缺是?有虎知禁若恃爪牙之利必昏黑揜突夔人屋壁山谷盖用此语而杜诗作于夔州所谓夔人盖夔州之人也老杜有夔州咏怀诗云市暨壤而巖自注云市暨夔人语也夔人屋 即此类文选灵光殿赋欲动而蹢躅夔藩盖误以夔人为蹢躅之义也蹢躅动也】

辛酉憇刀坑口

羣山黛新染【卓文君眉色不加黛饰常若远山韩文公南山诗天宇浮修眉浓绿画新就】蒙气寒郁郁【汉京房传上封事曰辛酉以来蒙气衰去太阳精明辛巳蒙气复乘卦太阳侵色复上封事曰乃丙戌小雨丁亥蒙气去】扫除迎将家【庄子寓言篇其往也舍者迎将其家公执席释文曰家公主人公也一读舍者迎□其家为句此事本出列子列子云舍者迎将家注云客舍家也山谷本用此语而庄子云迎将其家多一其字转写误耳释文又承误也】下簟脱巾屣【退之送文畅诗诡制桓巾屣】南北舍一棠【诗蔽芾甘棠勿翦勿伐召伯所茇毛云蔽芾小貌笺云舍小棠之下】况可清烦渴【文选西京赋此焉清暑史记禹扇喝暑病也】鸟声废书眠聊以休吏卒竹鸡苦唤人【北梦琐言医工云竹鸡食半夏陶岳零陵记云竹鸡状如鹑尾少长大率皆鸚也方言各异耳唤谓唤雨】觉坐观法窟无外同一家【见前注王荆公杂咏万物予一体九州予一家】惟已非万物清波两鸳鸯善游且能没【庄子达生篇颜渊问仲尼曰吾尝济乎觴深之渊津人操舟若神吾问焉曰操舟可学耶曰可善游者数能若乃夫没人则未尝见舟而便操之也】惊人相追飞甚念失其匹【文选刘安招隐士云禽兽骇兮亡其音】春鋤貌闲暇【尔雅鹭春鋤鵬鸟赋止于坐隅貌甚间暇】羨鱼情至骨【董仲舒云临渊羨鱼不如退而结网杜诗传内深次骨注云深刻至骨也】广道策坚良【汉食货志乘坚策良墨子圣王为衣服之法坚车良马不知贵也】集于苑【国语晋优施谓里克妻曰主孟?我我教兹暇豫市君乃歌曰暇豫之事吾不如鸟乌人皆集于苑已独集于枯里克曰何谓苑何谓枯曰其母为夫人其子为君可不谓苑乎其母既死其子又有谤可不谓枯乎诗苑彼柳斯鸣蜩嘒嘒苑音鬱今叶韵当用此音】烂额始论功傥能谋曲突【汉霍光传初霍氏奢侈茂陵徐生曰霍氏必亡迺上疏言霍氏泰盛宜以时抑制无使至亡书三上辄报□其後霍氏诛灭而告霍氏者皆封人为徐生上书曰臣闻客有过主人者见其寛直突旁有积薪客谓主人更为曲突远徙其薪不者且有火患主人默然不应俄而家果失火邻里共救之幸而得息于是杀牛置酒谢其邻人灼烂者在于上行余各以功次坐而不録言曲突者人谓主人曰向使聽客之言不费牛酒终亡火患今论功而曲突徙薪亡恩泽焦头烂额为上客耶主人寤而请之今茂陵徐福数上书言霍氏且有变宜防絶之使福说得行

则国无列土出爵之费且无逆乱诛灭之败往事既已而福不蒙其功惟陛下察之此诗篇末盖有所讽也】

金刀坑迎将家待追浆坑十余户山农不至因题其壁

穷乡阻地险篁竹啸夔魑【篁竹见前注国语云木石之怪夔水之怪龙文选东京赋残夔魑与罔象注云夔木石之怪说文曰魑耗兔也甘泉赋亦云捎夔魑而秩犷狂】恶少擅三窟【见前注杜诗奸雄恶少皆封侯又诗寄语恶年少黄金旦休柳李白诗孟尝习狡兔三窟赖冯煖】不承吏追呼老翁燕无凶【此句疑舛误】偃蹇坐里间後生习闻见官不禁权舆【尔雅权与始也】怀书斥长吏持杖麇公徒【麇见前注鲁颂公徒三万】遂令五百里化为豺豕墟古来沈牛羊檄水臣鳄鱼【韩退之告鳄鱼文云以羊一猪一投恶溪之潭水以与鳄鱼食而告之曰云云】猛虎剥文章矧而民发肤【孝经身体髮肤】哀哉奉其身曾不如鸟乌【见前注】破家县令手南面天子除要能伐强梁然後活悍孤属为民父母未教忍先诛【孟子曰恶在其为民父母也又曰其教之不改而後诛之乎】山川甚秀拔人物亦诗书十室有忠信此乡何独无【见论语】

次韵汉公招七兄

白髮霏霏雪点斑朱樱忽忽鸟衔残【传灯录汾山与仰山遯行次鸟衔一红柿落前佑将与仰山仰山接得以水洗了却与佑云云介甫诗云鸟残红柿昔曾分】公庭休吏进汤饼【汉薛室传日至休吏汤饼见前戏赠彦深诗注】语燕无人窥井栏诗句多传知有暇道人相见不应难老郎亲屈延处士风味依稀如姓桓【元注云桓冲礼处士刘麟之郑粲甚厚按晋桓冲传云命处士南阳刘麟之为长吏麟之不屈亲往迎之礼之甚厚又辟处士长沙郑粲为别驾备礼尽?粲感其好贤乃起应命】

寄题安福李令适轩【安福县隶吉州】

琳宫接丛霄【此轩当在道观故云道人勤洒扫】渌水连翠微【尔雅山未及上翠微】幽花露林薄【甘泉赋列新夷于林薄韩文公诗潜军索林薄】好鸟娱清辉【谢灵运诗清辉能娱人游子澹忘归】道人勤洒扫令尹每忘归孝慈民父母虎去蝗退飞【後汉刘昆传守弘农虎北渡河卓茂传时天下大蝗独不入密县界鲁恭传郡国螟伤稼犬牙缘界不入中牟左传六鷁退飞】来思僚友同【小雅尔羊来思尔牧来思】歌舞醉红衣定知与民乐【孟子云与民同乐】吏瘦吾民肥【唐韩休传帝曰吾虽瘠天下肥矣】

寄题安福李令先春阁

宫殿绕风烟【此句与前篇琳宫同意】江山壮城郭令君艺桃李【太白诗因君艺桃李此地忽芳菲】面春筑飞阁春至最先知雨露徧花药【渊明诗言息其庐花药分列鲍明远诗乳燕拾草虫巢蜂拾花药】是日劝农桑冰销土膏作【周语云土乃脉发又曰土膏其动张

平子东京赋农祥晨正土膏脉起】弦歌出县斋【子之武城闻弦歌之声见论语退之有县斋读书诗】裴回问民瘼【後汉循吏传序广求民瘼】鸡犬声相闻【庄子胠篋篇邻邑相望鸡犬之声相闻老子亦云】嬰此簿领缚【簿领见前注】安得携手嬉烹茶煨鸭脚【欧阳公和梅圣俞鸭脚子诗绦囊因入贡银杏贵子州又诗鸭脚虽百个得之诚可珍】

寄题安福李令爱竹堂

渊明喜种菊【见陶潜诗集】子猷喜种竹【晋王徽之字子猷寄居空宅便令种竹曰何可一日无此君耶】托物虽自殊心期俱不俗【见前注】千载得李侯异世等风流【风流见答张沙河诗注李白答杜秀才诗吾非谢尚邀彦伯异代风流各一时】为官恐是陶彭泽爱竹最知王子猷寒窗对酒听雨雪夏簟烹茶卧风月小僧知令不凡材【者杜鹰诗金眸玉爪不凡材】自扫竹根培老节富贵于我如浮云【见论语】安可一日无此君【见前注】人言爱竹有何好此中难为俗人道【晋孟嘉传桓温问嘉河有何好而卿嗜之嘉曰公未得此中趣耳司马迁报任安书此可为知者道难为俗人言也】我于此物更不疎一官窘束何由到【贾谊赋窘若囚拘文选吴都赋罽笼窘束退之诗人生如此自可乐岂必局束为人鞅】

题安福李令朝华亭

丹楹刻桷上峥嵘【春秋庄二十三年秋丹桓宫楹二十四年三月刻桓宫桷】表里江山路【一作略】眼平【表里山河必无害也见左传僖二十八年乐天诗嵩山表里千重雪】晓日成霞张锦绮【谢朓诗余霞散成绮】青林多露缀珠缨【谢灵运诗云花上露犹泫法华经普门品云无尽意白佛言我今当供养观世音菩萨即解颈象宝珠缨珞以与之文选王昭君词云泣泪湿珠缨】人如旋磨观羣蚁【见前注】田似围碁据一枰【文选博奕论一枰之上李善本从木音平五臣本作一枰补萌切】对案昏昏迷簿领暂来登览见高明

登快阁【快阁在太和山谷送吕知常赴太和丞云我去太和欲暮矣吕君初得太和官又云快阁六月江风寒】

痴儿了却公家事【生子痴了官事官事未易了也了事正作痴复为快耳见晋傅咸传】快阁东西倚晚晴【唐李涉感□诗隋氏造宫阙巍巍倚云烟】落木千山天远大澄江一道月分明【老杜天河诗常时任显晦秋至晨分明李白诗水寒夕渡急木落秋山空柳子厚诗木落寒山静江空秋月明】朱弦已为佳人绝【用锺期伯牙事不知谓谁】青眼聊因美酒横万里归船弄长笛此心吾与白鸥盟【夏文庄诗自有沙鸥知此心】

和李才甫先辈快阁五首

山寒江冷丹枫落【唐文艺传崔信明诗云枫落吴江冷】争渡行人簇晚沙【庾信诗河桥争渡喧孟浩然诗渔梁渡头争渡喧】菰叶苹花飞白鸟一张红锦夕阳斜【杜牧之题韦家亭子云蔕红半落平地晚曲渚飘成锦一张】

赤栏终日倚西风山色挹蓝小雨中【雪浪斋日记列公小词云挹蓝一水紫花草寂寞小橘千牵抱人不到柴门自有清风扫唐人诗但言水如蓝挹蓝字当始于荆公】将老鬓毛秋着木相思亲旧水连空

长江淡淡吞天去【杜牧之诗大江吞吴去一练横坤轴】甲子随波日日流【杜诗别来频甲子归到忽春华】万事转头同堕甌【郭林宗传後孟敏荷甌堕地不顾而去】一身随世作虚舟【庄子虚船触舟见前注】

云横章贡【二水】雨翻盆【杜诗白帝城下雨翻盆】寺下江深雨到门落日荷锄人着本【汉食货志理民之道地着为本注谓安土也音直略反贾谊说上曰今驱民而归之农皆着其本各食其力】西风满地叶归根【鲍明远诗别叶早辞风注引翼氏风角云木落归本水流向东】

西南佳气浮马祖【马祖山也】东北祥风绕静居【静居寺即青原山王褒颂思从祥凤翱】山邑丰年人少讼身来访道得斋鱼

八月十四日夜刀坑口对月奉寄王子难子闻适用【元注云闻郡中数月未尝有燕游○子难名尧臣】

去年对月庐陵郡【吉州曰庐陵郡治庐陵县】醉留歌舞蹋金沙【老杜陪王使君晦日泛江诗云有径金沙秋无人碧草芳】今年今夕千峯下新磨古鉴动菱花【魏武帝有菱花镜赵飞燕外传有七出菱花镜一奁庾信诗镜失菱花影钗除却月梁】寒藤老木被光景深山大泽皆龙蛇【左传襄二十一年深山大泽实生龙蛇杜诗深山大泽龙蛇远春寒野阴风景暮】西风为我奏万籁落叶起舞惊栖鸦遥怜城中二三友风流惯醉玉钗斜【退之诗金钗半醉□添春】今夕传杯定何处【老杜诗旧日重阳日传杯不放杯】应无二十四琵琶【此言吉州官妓琵琶之数亦见次韵周德夫诗注】

雕陂

雕陂之水清且泚【老杜云蛟之横出清泚】屈为印文三百里【韩文公城南联句沙篆印平曰沙篆鸟迹之在沙者印如篆文】呼船载过七十余褰裳乱流初不记【郑国风于惠思我褰裳涉溱○元注云乘舟上十余渡徙涉者不可复记】竹舆岖 山径凉仆姑呼妇声相倚【见前注】篁中犹道泥滑滑【泥滑滑蜀中号鸡头鹑梅舜俞五禽诗泥滑滑苦竹冈】仆夫惨惨耕夫喜穷山为吏如漫郎【漫郎唐元结自谓也见本传】安能为人作嚆矢【庄子在宥篇焉知曾史之不为桀石之嚆矢也言曾参史鰌】老僧迎谒喜我来吾以王事笃行李【鲍明远诗手迹可传心愿尔笃行李】知民虚实应县官我宁信目不信耳【霍光传县官非我家将军不得至是如淳曰县官谓天子东平王宇传县官年少张晏曰不敢指斥成帝谓之县官高士传孔子曰吾之信顔回□独今日所信者目目犹不可言】僧言生长八十余县令未曾身到此

几复寄槟榔且答诗劝予同种复次韵寄之【黄几复名介豫章西山人山谷志其墓熙宁九年同学究出身为长乐尉广州教授楚州推官知四会县仕于岭南者十年元佑三年没于京师与山谷少年交游】

少来不食蚁丘浆【庄子则阳篇孔子之楚舍于蚁丘之浆词多不录白氏六帖谓蚁丘之浆卖浆之家也】老去得意漆园方【见前注】监中已失儿时面忍能乞与兵作郎【传灯录云认奴作郎此摘其字独未知其意所指也】

黄几复自海上寄惠金液三十两且曰唯有德之士宜享将以排荡陰邪守卫真火幸不以凡物畜之戏答

皱面黄须已一翁【迫于衰耄发白面皱见楞严经已成老翁见前注】樽前犹发少年红【乐天诗衰颜借酒红王荆公诗衰颜浸到酒边红】金丹乞与烦真友只恐无名帝籍中【礼记月令藏帝籍之收于神仓今借使以言挂名仙籍也乐天诗但恐长生须有篇仙台试为检名看纂异本作党籍蜀本作常籍旧本作掌籍皆误】

几道复觅?榔【案此题疑谀味诗语似是向人觅?榔者又前篇几复寄?榔且答诗则所答或即此诗】

蛮烟雨里红千树逐水排痰肘後方【肘後见前注】莫笑忍饥穷县令【陆龟蒙杞菊赋序云我几年来忍饥诵经岂不知屠沽儿有酒肉耶】烦君一斛寄?榔【刘穆之为丹徒尹召妻兄弟及醉令厨人以金□贮?榔一斛进之】

次韵几复答予所赠三物三首

谁怜湖海士【见前注】白发夜牕檠【退之短檠歌太学书生东鲁客二十辞家来射策夜书细字缀语言两眼眇昏头雪白】风雨鸡不已【讨风雨如晦鸡鸣不已】诗书眼尚明禅枝安宿鸟【禅枝见和外舅夙兴诗注】僧粥吼华鲸【东都赋发鲸鱼铿华锺以言木鱼呼粥也】但满五车读【五车见前注】行看一座倾【一座尽倾见司马相如传】

右石灯檠

絕域蔷薇露【岭南有蔷薇露杨文公谈苑金陵宫中人掇蔷薇水染生帛一夕忘收为浓露所渍色倍鲜翠今言其香也】他山菡萏炉【诗他山之石可以攻玉西京杂记丁缓作九层博山香炉镂为奇禽怪兽今刻莲花也尔雅荷芙蕖其华菡萏】薰衣作家想伏枕梦□姝游子宫蚁穴【见前注】谪仙居瓠壶【用费长房传壶公事】当时有忧乐回首亦成无【一作稍熏衣一筦似慰客心孤游子梦蚁穴谪仙居瓠壶霏霏丽丝网清兴可能无】

右石博山

九原谁复起【檀弓死者何可作也吾谁与归】糟魄未传心【见前注】不取丁仪米【晋陈寿传丁仪丁廙有□名于魏壽谓其子曰可觅千斛米见与当为尊公作佳传丁不与竟不立传】疑成校尉金【曹操特置发丘中郎将摸金校尉见文选陈琳檄】名从高位借德有下僚沈【选诗英俊沈下僚】笔削多瑕点【孔子世家笔则笔削则削退之诗指摘□瑕玷】犹希畏友箴【一本云笔从高位曲陆有德人沈救俗规如此慵疎废古今】

右石刻

送酒与毕大夫

浅色官醕昨夜筭一樽聊付卯时投【卯酒见前注】瓮边吏部应欢喜殊胜平原老督邮【晋毕卓字茂世为吏部郎比舍郎酿熟卓夜至其瓮间盗饮之为掌酒者所缚明旦视之乃毕吏部也世说桓公有主簿善别酒好者谓青州从事忍者谓平原督邮青州有齐郡言至齐也平原有鬲县言至鬲上住也】

喜太守毕朝散致政

膏火煎熬无妄灾【文选阮嗣宗诗膏火自煎熬多财为患害注引庄子山水自寇也膏火自煎也易无妄六三无妄之灾杜诗置膏烈火上哀哀自煎熬】就陰息迹信明哉【就陰出庄子已见前注书元首明哉】功名富贵两蜗角【庄子则阳篇有国于蜗之左角者曰触氏有国于蜗之右角者曰蛮氏时相与争地而战伏尸数万逐北旬有五日而後反】险阻艰难一酒杯【左传险阻艰难备尝之矣】百体观来身是幻【维摩经云又复观身身不离病】万夫争处首先回胷中元有不病者【传灯録德山宣鑑禅师传师因疾僧问还有不病者无师曰有如何是不病者师曰阿耶阿耶】记得陶潜归去来【山谷志毕守之墓云吉州太守以元丰五年冬没于理所其铭云公疾卧牖上章请老】

次韵道辅双岭见寄三叠【和答魏道辅等凡四诗今考三诗皆言徐德占而永乐之祸乃元丰五年九月今置之五年庶与诗合】

明如九井璜【见前注】美如三危露【三危露见前注】贞观魏公孙【魏徵也】今来功名误【杜诗从来御魑魅多被才名误】儿时汉南柳摇落伤岁暮时不与我谋【论语日月逝矣岁不我与韩文公复志赋哀白日之不与吾谋兮至今十年其犹初】义和促天步【离骚经云吾令羲和弭节兮望□崦而勿迫注云羲和日御也诗云天步艰难陆士衡诗昭昭清汉辉粲粲光天步】

生涯鱼吹沫【庄子大宗师篇泉涸鱼相处于陆相煦以□相濡以沫不如相忘于江湖】文彩豹藏雾【南山雾豹见前注文选谢朓诗虽无玄豹姿终隐南山雾】人言壶公老渠但未得趣【晋孟嘉传公未得酒中趣耳】饮酒入壶中茫然失巾屨【後汉费长房传市有老翁卖药挂一壶市罢辄跳入壶中惟长房覩之因往奉酒脯翁与俱入壶中惟见玉堂严丽旨

酒甘肴共饮毕而出老杜诗松下丈人巾屨同偶坐似是商山翁】时不与我谋今君向何处

莲塘倒箭鞬【集中有代书一篇亦云莲房例鞬鞬】桂影凉【一作落】霜兔平生知音地
地下无尺素【乐府诗云中有尺素书】十夜九作梦虏乘惊沙度【李华吊古战塲文惊沙
入口又云河冰夜渡】时不与我谋征西枕戈去【自平生知音地至此皆言徐德占也越王
勾践出则尝瞻夜则枕戈晋刘琨传吾枕戈待旦】

次韵章禹直魏道辅赠答之诗【据山谷与章禹直手简云昨与德素天倪会语县庭殊思与
公同之又云与道辅唱酬诗已送□□闻道□昨已宿双岭少□録呈可见在太和作】

我老倦多故心期马少游【渊明诗实欣心期方从我游文选任彦昇诗中道遇心期後汉马
援传援谓官属曰吾弟少游常哀吾慷慨多大志曰士生一世但取衣食才足乘下泽车御款
段马为郡掾吏守坟墓乡里称善人斯可矣】愿爲春眠蚕吐丝自绸缪【诗绸缪束薪白乐
天诗烛蛾粧救护蚕茧自纏缚】翩翩魏公子【史记平原君翩翩浊世之佳公子也】閱世
无全牛【见前注】吹嘘鼓万物【说卦云动万物者莫疾乎雷□□物者莫疾乎风】领袖
倾九流【晋裴秀传时人为之语曰後进领袖有裴秀後汉班固传博贯载籍九流百家之言
无不穷究注云九流谓道儒墨名法陰阳农杂纵横】昨来怀白璧往撼西诸侯【史记蔺相
如率璧入秦使其从者衣褐怀其璧亡归退之王适墓志云闻金吾李将军年少喜士可撼乃
□□门告曰天下奇男子王适愿见将军白事】中丞文武将【徐德占自布衣为中书户房习
学公事召对除太子中允馆阁校勘权监察御史里行?中丞致有永乐之败已见前注】良非
卫霍侔【青去病】誓开河源地画作禹贡州壮士捐躯死【文选曹子建诗捐躯远从戎】
鲸鲵尚吞舟【庄子吞舟之鱼荡而失水则蚁能苦之左传宣十二年取其鲸鲵而封之】客
心无一寸【庾信诗且将一寸心能容万斛愁老杜心折此时无一寸】草食随百忧【木食
草衣见传灯録】故人道旧语【汉高帝纪诸母故人曰乐饮极欢道旧故为笑乐】末路非
前筹【邹阳传至其晚节末路张良传诸借前箸筹之】重来滕王阁【阁在洪州德占洪州
人今为隆兴府】枫叶江上秋章子饱经术赋诗如曹刘【曹植子建刘桢公干】太学得虚
名【文选古诗南箕北有斗牵牛不负轡良无盘石固虚名复何益】权势殊未尤祸机发无
妄【易无妄之灾祸机见前注】对吏抵抢头【司马迁书见狱吏则头抢地】遇逢椎鼓赦
帝泽万邦休【退之诗昨日州前椎大鼓嗣皇?圣登夔臯赦书一日行万里罪从大辟皆除死
】章江三年拘解装买莫愁【文选马赋辍驾回虑息徒解装退之诗解装具盖筵古乐府云
河中之水向东流洛阳女儿名莫愁唐诗乐志曰莫愁乐省出于石城乐石城有女子名莫愁
善歌謡】丽姬泣又悔【见前注】生故难豫谋邂逅识面晚困穷理相收夜语倒樽酒参旌
偃风旒【文选景福殿赋参旗九旒从风飘扬注云参三也旗上画日月星今言夜语见星耳
】两公但取醉古今共高丘【取醉见前注□杨惲传古与今如丘之貉注云言同类也】

次韵道辅旅怀见寄

岁华其将晚霜叶不可风【孟子王口有寒疾不可以风此借使汉韩安□传草木经霜者不
可以风过】生理鱼乞水【辙中鲋鱼?前注】归心鸟飞空风尘化衣黑【陆士衡诗京洛多

风尘素衣化为缁谢朓诗谁能久京洛缁尘染素衣皆见文选】旅宿梦裙红【退之诗孤游怀耿介旅宿梦婉婉又云不解文字饮唯能醉红裙】人言家无壁【司马相如家徒四壁立】自倚笔有锋【退之诗题诗尚?笔锋劲盖用鲍明远诗两诗穷舌端五车摧笔锋】转蓬且半岁【曹子建诗转蓬离本根飘飏随长风步里客谈云古人多用转蓬不知何物外祖林公使辽见蓬花枝叶相属团栾在地遇风即转问之云转蓬也】交臂各衰翁【庄子吾终身与汝交一臂而失之司马长乡巴蜀檄文单于怖骇交臂受事注交臂拱手也】扁舟去日远明月与君同【千里共明月见前注】露曦百年驶【诗湛湛露斯匪阳不曦言人生如朝露也驶音史疾也园觉经云驶月运】麟获万事穷【春秋絶笔于获麟】装怀酒澹淡【莢琰二字元注也上林赋云随风澹淡与波摇荡师古曰澹大覽反淡音琰北山移文云牒诉僇倥装其怀】塞意雾空蒙诸公尚无恙【贾谊书六七贵人皆无恙】不见陈元龙【此语亦指徐德占按魏志陈登字元龙许汜曰陈元龙湖海之士豪气不除】

和答魏道辅寄怀十首【魏泰字道辅襄阳人曾子宣妇弟有东轩録自号汉南处士】

堂堂阳元公人物妙晋东【晋魏舒字阳元太白诗能成吾宅相不减魏阳元】魏侯多能事髣髴见家风长鱼无波涛坐与鰕蚶同【後汉隗嚣传鱼不可脱于渊神龙失势与蚯蚓同】诸山摇落尽旅食岁时穷【魏文帝与吴质书旅食南馆耳杜诗旅食京华春】

平生弄翰墨客事半九州天末逢故人【老杜天末怀李白云凉风起天末君子意如何】园蔬当肴羞【柳子厚诗掇野代嘉肴】酒阑豪气在尚欲椎肥牛【汉高祖纪酒阑注云饮酒者半罢半在谓之阑豪气见前注曹子建箴引中厨办丰膳烹羊宰肥牛李白诗丈夫相见宜为乐椎牛挝鼓会衆宾桐江诗话云魏道辅与王介甫兄弟最相厚试院中因上请恃才豪纵殴主文几死坐是不许取应】虞卿不穷愁後世无春秋【详见前用旧韵寄孔毅父诗注】

雷行万物春【易无妄天下雷行万物与无妄】天震而地撼闭塞成冬冰【月令孟冬之月天地不通闭塞而成冬】楚越自肝胆【庄子德充符篇自其异者视之则肝胆楚越也李白诗肝胆不楚越山河亦衮衮】貂狐谅柔温【貂狐见前注温柔乡见赵飞燕外传】藜藿自羹糝【藜羹不糝见前注六家指要云墨氏粝梁之食藜藿之羹】相思牛羊下【诗牛羊下来】城鼓寒紉紉【晋邓攸传吴人歌曰紉如打下鼓鸡鸣天欲曙】

劒埋丰城狱气与牛斗平【见前注】皇明烛九幽【文选西都赋云散皇明以烛幽山海经曰赤水之北有神其暝乃晦其视乃明是烛九陰是谓烛龙黄庭经九幽日月洞虚无】湔祓用神兵【神兵见丰城诗注】谁言黄沙磧【杜诗今君渡沙磧班固北征颂□□鹿超黄磧】矢尽鼓不鸣【李陵传一日五十万矢皆昼夜半时击鼓起士鼓不鸣】至今门下士落涕为荆卿【荆轲传荆轲卫人也卫人谓之庆卿轲为燕太子丹使秦左手把秦王之袖而右手持匕首搥之秦王自引而起左右前杀轲此语为徐德占作德占娶山谷从妹潘子真诗话云道辅少与徐忠愍及山谷老人友善】

别时燕辞屋草黄秋半分今来冬至稍添刺绣文【冬至日添一线史记货殖传刺绣文不如倚市门】百年几会合美酒不屡醺犀牛可乞角穷士难荐论【文选蜀都赋拔象齿戾犀角戾立结反拔犀之角擢象之齿见唐舒元舆传山谷帖有戏答宝胜云易拔苍龙角难参宝胜禅语意与此同】

排江鬼瞰室【扬?解嘲高明之家鬼瞰其室】贯朽粟红陈【汉食货志京师之钱累百钅万贯朽而不可校太仓之粟陈陈相因红腐而不可食】君行谁为容【邹阳传蟠木根柢轮囷离奇而为万乘器者以左右先为之客也】款门定生嗔【汉宣纪款塞来享注云叩塞门也韩文公诗谁家有竹门可款又诗剥剥啄啄有客至门我出不应客去而嗔今言主人嗔也】谅无绋袍故【史记范雎传绋袍恋恋有故人之意】尽是白头新【邹阳传白头如新倾盖如故】天涯阿介老有鼻可挥斤【阿介老疑是黄介字几复元丰末为端州四会县令前集和谢公定秋怀云四会有黄令学者着勳多白头对红叶奈此摇落何虽怀斲鼻巧有斧且无柯与斲鼻可挥斤语意同阿介云者如晋人以王平子为阿平也斲鼻见前注】

赤豹负文章【楚辞乘赤豹兮从文狸】岁晚智劖【楚辞握劖劖而不用兮操规矩而无所施注劖劖刻镂刀也劖亦作 淮南子镂之以劖 退之诗先生闾穷巷未得窥劖?上居蚁切下音厥】渴饮南山雾【见前注】饥食西山蕨【张翰传与子采南山蕨见春菜诗注】封狐托脂泽【丰狐文豹见庄子等书离骚经又好射夫封狐注云封大也郭氏玄中记曰千岁之狐为淫妇百岁之狐为美女白乐天古冢狐云狐假女妖害犹浅一朝一夕迷人眼女为狐媚害即深日长月长溺人心】眉颊颇秀发【唐司空图山居记云中条距□乡百里亦犹人之秀发必见于眉宇之间】时时一樽酒【沈休文诗勿言一樽酒明月难重持老杜何时一樽酒】婆娑弄风月【退之诗我今官间得婆娑】

猛虎倚山号强梁不敢前失身槛穽间摇尾乞人怜【司马迁书猛虎处深山百兽震恐及其在穽槛之中摇尾而求食积威约之渐也】男子要身在【退之诗学问藏之身身在则有余史记魏豹等赘曰智略絶人独患无身耳得□尺寸之柄云蒸龙变】万金自保全【老杜王孙善保千金躯】云黄雉兔伏霜鹘莫空拳【杜诗霜鹘不空拳】

生涯共七十去日良已半【山谷生于乙酉至庚申作包太和时年三十六】短长相觖望【楚辞卜居尺有所短寸有所长汉卢绾传羣臣觖望觖音决】面【一作向】尽酒可断大道体甚寛【大道甚夷见前】窘束非逵观【贾谊传鹏鸟赋曰达人大观物亡不可又曰愚士系俗窘若囚拘】莫问夜如何【诗夜如何其】醉从鸡号旦明驼思千里【杨妃外传实妃私发明驼以瑞龙脑遗安禄山明驼者眼下有毛夜明日行五百里西阳雜俎云古乐府木兰篇愿驰明驼千里足多误作鸣駝駝卧腹不帖地屈足涵明则行千里】弩马怯负荷【智友论云今以负荷大法者比龙象】小人蠹诗书【韩诗古史散左右诗书置後前岂殊蠹书虫生死文字间】安乐北窗卧【国语人生安乐孰知其他】瓢空且乞饭【渊明有乞食诗】儿寒教补破【山谷写衲襖歌其略云补破□寒过一生岂问人言妙不妙】机巧生五兵【五兵见前注杜诗所历见机巧】百拙可用过【传灯録宣州柏严明哲禅师传药山云跛跛挈挈百丑千拙且□麼过时】

仓後酒正厅昔日林夫谪官所作十一月己卯余纳秋租隔墙芙蓉盛开【元丰五年十一月己卯乃初二日】

攀檻朱云头未白【朱云请尚方斩马劔斩张禹上大怒御史将云下云攀殿檻檻折见本传】不知流落向何州空余前日学书地小阁红蕖取意秋【元法云林夫喜作隶字】

吉老受秋租辄成长句【吉老太和丞也後篇云播糠眯眼丞良苦】

黄花事了绿丛霜【黄花事了盖仿退之桃李事已退也】蟋蟀催寒夜夜牀【诗十月蟋蟀入我牀下阮嗣宗诗闻秋兆凉气蟋蟀鸣牀帟】爱日捃收如盗至【汉食货志力耕数耘收获如冠盗之至】失时鞭扑奈民疮田夫田妇肩赧担【退之联句刈熟担屑赧】江北江南稼淅场【幽风云十月纳禾稼又云十月淅场毛云淅扫也场功毕入也】少忍飞糠眯君眼要令私廩上公仓【庄子天运篇播糠眯目则天地四方易位矣】

再次韵和吉老

今日仆姑晴自语【仆姑见前注】愁陰前日雪铺牀三冬一雨禾头湿【朝野僉载云秋雨甲子禾头生耳】百斛几痕牛领疮【白乐天官牛诗云官牛驾官车漥水岸边般载沙载白五门官道西绿槐阴下铺沙堤马蹄踏沙虽净洁牛领牵车欲流血但能济人治国调阴阳官牛领穿亦无方】民欲与翁归作腊【汉严延年传延年母从东海来欲从延年腊又云母毕正腊遂去师古曰建丑之月为腊祭因会饮若今蜡节也】公方无事可开场相勤冻坐真成恶愧我偷闲饱太仓【太仓见前注】

招吉老子范观梅花【子范姓李名覲袁州人元丰二年时奏推思为太和尉】

播糠眯眼丞良苦鸣鼓连村尉始归【後魏李崇徙兖州刺史兖土旧多刼盗崇命村置一楼楼皆悬鼓盗发之处乱击之声布百里皆发人守险由是盗发无不获诸州皆效之】及取江梅来一醉明朝花作玉尘飞【玉尘眯目见前注何逊雪诗若逐微风起谁言非玉尘非言梅片飞也】

子范徼巡诸乡捕逐羣盗几尽辄作长句劳苦行李

白髮尉曹能挽弓【老杜前出塞云挽弓当挽强用箭当用长】着鞭跨马欲生风乃兄本是文章伯【杜诗每韵见许文章伯子范之兄李观字梦符为清江尉尝为太守作祭欧阳公母夫人曰文昔孟轲亚圣母之教也今有子如轲虽死何憾文忠击节故有文章伯之句】此老真成矍铄翁【马援传矍铄哉是翁也】枹鼓诸村宵警报【汉张敞传云枹鼓稀鸣市无偷盗】牛羊几处暮牢空得公万户开门卧【汉汲黯传上曰吾徒得君重唐魏徵传外户不闭行旅不齎粮】看取三年治最功【魏梁集为并州刺史政治为天下称最】

送徐隱父宰余干二首【余干隶饶州山谷真蹟藁本地方百里古诸侯嚙笑阴晴民具瞻寒霜改冰霜又改冷霜皆廉改争廉第五句樽前桃李亲朋友注云改此次篇瑞世改下瑞同生改同兄】

地方百里身南面【论语雍也可使南面孟子地方百里而可以王】翻手冷霜覆手炎【汉陆贾谓□佗曰越杀王降汉如反覆手耳老杜诗翻手作云覆手雨】贅壻得牛庭少讼【贾谊传家贫子壮则出贅旧唐书张允济传大业中为武阳令元武县邻接人有以牯牛依其妇家者八九年牛孳生十余头及将异居妇家不与累政不能决其人□武阳质于允济允济令左右缚牛主以衫蒙其头将至村中云捕盗牛贼召村中牛悉集问所从来妻家不知其故指其所诉牛曰此女壻家牛也非我所知允济发蒙曰此即女壻以牛归之妻家叩头伏罪】长官斋马吏争廉【旧唐书冯元淑传则天时历浚仪始平二县令未尝以妻子之官所乘马牛後不与刍云令其作斋身及奴仆日一食而已僧道举诗岂无斋马冯元淑】邑中丞掾陰桃李【李白诗举邑栖桃李垂陰亦流芳】案上文书略米盐【米盐见前注】治状要须闻岂弟【诗岂弟君子民之父母】此行端为霁威严【汉魏相传为霁威严】

天上麒麟来下瑞【南史徐陵传陵年数岁释宝志摩其顶曰天上石麒麟也杜牧之诗天上麒麟时一丁韩□董生行生祥下瑞无时期】江南橘柚间生贤【禹贡淮海惟扬州厥包橘柚锡贡楚辞后皇嘉树橘未服兮受命不迁生南国兮王逸注橘柚受命于江南不可移徙种于北地则变而为枳】玉台书在犹骚雅【玉台新咏徐陵所编也】孺子亭荒只草烟【见前注】半世功名初墨绶【後汉志千石六百石墨绶】同兄文字直青钱【唐张廌传祖鸞字文成员半千称鸞文词犹青铜钱万选万中时号青钱学士】割鸡不合庖丁手【论语割鸡焉用牛刀】家传风流更着鞭【晋祖逖传先我着鞭家传言其家世也诗中皆用徐姓事】

山谷外集诗注卷十一

山谷外集诗注卷十二

钦定四库全书

山谷外集诗注卷十二

宋 黄庭坚 撰

史 容 注

次韵君庸寓慈云寺待韶惠钱不至

主簿看梅落雪中 闺人应赋首飞蓬【诗伯兮自伯之东首如飞蓬】问安儿女音书少【礼记文王世子问内之御者曰今日安否何如孟郊诗归书但问安】破笑壶觞梦寐同【归去来辞引壶觞以自酌文选刘越石诗序云破涕为笑排终身之积愤求数刻之暂欢】马祖峯前青未了 鬱孤台下水如空【马祖峯在太和鬱孤台在漳州见和李才甫登快阁发赣州寄余洪范诗杜诗齐鲁青未了】江山信美思归去【文选登楼赋虽信美非吾土兮曾何足以少留】听我劳歌亦欲东【文选谢叔源诗悟彼蟋蟀唱信此劳者歌注引韩诗曰朋友之道缺劳者歌其事汉书高祖曰吾亦欲东耳】

次韵奉答存道主簿

主簿朝衣如败荷 高怀千尺上松萝【小雅葛与女萝施于松柏毛云葛寄生也女萝兔丝松萝也】旅人争席方归去【庄子寓言篇其往也舍者避席其反也舍者与之争席矣】秋水黏天不自多【庄子秋水篇吾未尝以此自多退之祭文洞庭汗漫粘天无璧】学到会时忘粲可【僧粲惠可传灯录皆有传杜诗余亦师粲可身犹缚禅寂或谓王粲可朋二人能诗】诗留别後见羊何【羊璿何长瑜与谢灵运荀雍为四友文选谢灵运诗序云登临海峤初发疆中作与惠连见羊何共和之李白诗别後遥传沧海作可见羊何共和之】向来四海习凿齿 今日期君不啻过【四海习凿齿弥天释道安见晋书习凿齿传此用主簿事杜诗方驾曹刘不啻过】

从时中乞蒲团【纂异蜀本作谢时中送蒲团云织蒲投我最宜寒正欲陰风雪作团方竹火炉跌足稳何如矍铄据征鞍与今本句多不同详诗意是谢送蒲团今本题作从时中乞蒲团疑有误】

扑屋陰风雪作团 织蒲投我最宜寒 君当自致青云上【见前注】快取金狨覆马鞍【国朝侍从皆跨狨鞍】

奉送时中摄东曹狱掾【时中盖太和同官入城摄事故有府中夺我同官良之句又云苍崖】

按轡昨日归怨是代子范为尉】

公退蒲团坐後亭【诗自公退食白居易诗清旦方堆案黄昏始退公传灯录龙牙禅师传师在翠微时问如何是祖师意翠微曰与我过禅板来又问临济如何是祖师意临济曰与我过蒲团来】短曰松风吟万籁【庄子齐物篇汝闻地籁而未闻天籁李白诗一风鼓羣有万籁各自鸣】黄葵紫菊委榛丛雪梅靚妆欲无对【上林赋靚妆刻饰顔延年曲水诗序靚妆藻野祛服縟川世说习凿齿曰乐令无对於晋世】遣骑相呼近酒樽【遣骑见前注】言君晓鼓前征旆苍崖按轡虎豹号【周亚夫传天子乃按轡徐行】野水呼船风雨晦【诗风雨如晦】昨日归来有行色【庄子盗跖篇车马有行色】未曾从容解冠带府中夺我同官良【老杜送长孙侍御赴武威判官云夺我同官良飘飘按城堡】简书趣行将数辈【诗岂不怀归畏此简书】王事君今困马鞍田园我亦思牛背【牛背见前注又唐陆羽传又使牧牛羽潜以竹画牛背为字】安得归舟载月明【满船空载月明归船子和尚偈也】鸬鹚白鸥为友生【诗虽有兄弟不如友生】一身不是百年物五湖无边万里行欲招蓑笠同云水念君未可及吾盟【春秋公及邾仪父盟于蔑孟子凡我同盟之人既盟之後言归于好】富于春秋貌突兀【西汉书帝富春秋又云富于春秋杜诗夜深殿突兀】睥睨满世收功名【睥睨视也左传子产授兵登陴注陴城上睥睨也好功名者睥睨视一世城上短垣亦于此睥睨视因以为名】参军虽卑狱司命多由陰德至公卿【于定国传我治狱多陰德】鎮頤折额秦相国【杨雄解嘲云蔡泽山东之匹夫鎮頤折额注鎮曲也晋职官志丞相相国并秦官也】不满三尺齐晏婴【史记晏婴传晏子长不满六尺身相齐国名显诸侯】丈夫身在形骸外【庄子德充符篇索我于形骸之外】俗眼那能致重轻

奉答茂衡惠纸长句【年谱罗茂衡太和人】

阳山老藤截玉肪【山之南曰阳文选魏文帝论玉玦书云白如截肪唐舒元舆吊剡藤文剡溪上多古藤溪中多纸工斩伐无时通俗文曰脂在腰间曰肪王逸正部论曰或问玉符曰白如猪肪】乌田翠竹避寒光【苏易简纸谱今江浙间有以嫩竹为纸者作密书随手裂乌田地名】罗候包赠室生白【庄子虚室生白】明于机上之流黄【乐府诗长安有狭邪行大妇织绮罗中妇织流黄又文选别赋注间色有五绀红缥紫流黄又注流黄素名张载诗佳人赠我筒中布何以报之流黄素】愧无征南蛭尾手【法书要录载宋羊欣古来能书人名云炖煌索靖张芝姊之孙晋征南司马亦善草书又截王僧论书云索氏自谓其书具银鈎蛭尾晋书不言曾为征南司马又王羲之尝为征南将军】为写黄门急就章【急就章汉黄门令史游撰】罗候相见无杂语【陶诗相见无杂言但道桑麻长】苦问汾山有无句春草肥牛脱鼻绳【汾山露地白牛石巩禅师牧牛入草便拽鼻孔来并见覓铜犀注】菰蒲野鸭还飞去【传灯录百丈与马祖游山见野鸭子祖问曰是甚麽丈曰野鸭又曰甚麽处去丈曰飞过去祖遂引手招百丈鼻百丈作痛声祖曰何曾飞过去丈於是大悟山谷尝草书一偈云野鸭子知何许马祖见来相共语话尽山空水月清依前不会还飞去还飞去卻把住】故将藤面乞伽陀【梵语伽陀此言讽诵楞严经秘密伽陀微妙章句】愿草惊蛇起风雨【书法要录王羲之自叙草书势云疾若惊蛇之失道迟若录水之徘徊怀素草书如飞鸟出林惊蛇入草】长诗脱纸落秋河要知溪工下手处【溪多纸工见前注】却将冰幅展似君震旦花开第

一祖【梵语震旦此云汉地第一祖谓迦叶也二十八传而至达磨达磨天竺国人告尊者曰我既得法当往何国而作佛事尊者曰待吾?後当往震旦後寓在嵩山少林寺以法传慧可告之曰昔如来以正法眼付迦叶大士展转嘱付累而至於我我今付汝听吾偈曰吾本来兹土传法救迷情一花开五叶结果自然成证道歌曰第一迦叶者传灯二十八代西天记入此土菩提达磨为初祖】

杂言赠罗茂衡

嗟来茂衡【庄子嗟来桑户乎】学道如登【孟子道则高矣美矣宜若登天然似不可及也国语云从善如登从恶如崩】欲与天地为友欲与日月并行万物峥嵘本由心生去子之取舍与爱憎【庄子去子之态色与淫志】惟人自缚非天黥【传灯录僧璨传有沙弥礼师曰乞与解脱法门师曰谁缚汝又曰律师持律自缚庄子天刑之安可解又曰庸知造物之不息我黥而补我劓】堕子筋骨【庄子堕汝形体吐尔聪明又云忘汝神气堕汝形骸】堂堂法窟九丘四溟【书序曰九州之志谓之九丘丘聚也左传曰楚左史倚相能读三坟五典八索九丘四溟见前注】同一眼精不改五官之用而透声色【荀子天论篇耳目口鼻形能各有接而不相能也夫是之谓天官心居中虚以治五官夫是之谓天君】常为万物之宰而无死生念子坐幽室炉香思青冥是谓蛰虫欲作吾惊之以雷霆【庄子天运篇蛰虫始作吾惊之以雷霆】

寄晁元忠十首

国工裁白璧【考工记轮人曰可规可万谓之国工】巧冶铸干将【圣主得贤臣颂云巧冶铸干将之璞吴越春秋云干将者吴人也能为劔作二枚一曰干将二曰莫耶莫耶干将之妻也】成为万乘器贯日吐寒光【汉邹阳传云荆轲慕燕丹之义白虹贯日又云蟠木根柢而为万乘器】其谁湔拂汝【文选絶交论剪拂使其长鸣注云与湔祓同】岁月海生桑【神仙传云王远字方平过蔡经家麻姑亦至麻姑自说接待以来见东海三为桑田】蛛网连成玉【史记藺相如传赵得和氏璧秦愿以十五城请易璧】苔生百链刚【文选刘越石诗何意百链刚化为绕指柔】

子云赋逐贫【扬雄逐贫赋见前注】退之文送穷【退之此文盖拟逐贫而笔力远过之】二作虽类俳【汉枚乘传其孽子臯诙笑类俳倡又云臯赋词中自言为赋不如相如又言为赋迺俳见视如倡自悔类倡也】颇见壮士胸晁子问行津【论语使子路问津焉】欲济无山穷【左传楚子围萧还无社号申叔展叔展曰有麦面乎曰无有山鞠穷乎曰无何鱼腹疾奈何注云麦麴鞠穷所以御湿欲使无社逃泥水中鞠音穷子虚赋曰穹穷葛蒲】着书蓬蒿底端有古人风【古人风见前注文选杂拟诗顾念张仲蔚蓬蒿满中园注引三辅决录云张仲蔚隐身不仕明天官博物所居蓬蒿没人】

沙拥大江水【韩信传龙且与信夹潍水陈信乃夜令人为万余囊盛沙以壅水上流引兵半度击龙且阳不胜还走龙且追度水信使决壅囊水大至龙且军大半不得度即急击杀龙且

】泥封函谷关【隗嚣传嚣将王元说嚣曰元请以一丸泥为大王封函谷关此万世一时也】古来世上雄【李白诗长才犹可倚不惭世上雄】宰木风雨寒【公羊春秋秦伯谓蹇叔曰若尔之年者宰上之木拱矣】鲁儒守一经亦有涧谷盘【汉韦贤传遗子黄金满籛不如一经贤号称邹鲁大儒诗考盘在涧】何事穷愁极江南庾子山【史记虞卿传云虞卿非穷愁亦不能着书以自见于後世云庾信字子山作哀江南赋後周书具载其词】

河清无人待【左传俟河之清人寿几何】兰芳无人采【退之琴操云兰之猗猗扬扬其香不采而佩于兰何伤】山空露团团【诗零露团兮团作漙】葛蔓石磊磊【楚辞石磊磊兮葛蔓蔓】世有倾国媒一笑珠百琲【西汉李延年歌北方有佳人絶世而独立一顾倾人城再顾倾人国韩诗谁为倾国媒自许连城价吴都赋金溢珠琲注金二十四两为溢珠十贯为一琲】往时称处士颠倒孔北海【见後汉祢衡传杜诗处士祢衡俊诸生原宪贫】楚宫细腰死长安眉半额【马援传子廖上疏长乐宫云传曰吴王好劔客百姓多创瘢楚王好细腰宫中多饿死长安语曰城中好高髻四方高一尺城中好广眉四方且半额城中好大袖四方全匹帛斯言如戏有切事实】比来翰墨场【文选谢宣远诗粲粲翰墨场】烂漫多此色【扬子法云女有色书亦有色乎曰有】文章本心术万古无辙迹【老子善行章善行无辙迹】吾尝期斯人隐若一敌国【汉剧孟传大将军得之若一敌国云後汉吴汉传帝叹曰吴公差强人意隐若一敌国矣】

北书来无期鴈不到梅岭【杜诗短日行梅岭盖谓大庾岭上梅也卫山有回鴈峯柳子厚过衡山诗云正是峯前回鴈时】欲之双鲤鱼【之字误遗我双鲤鱼见前注】枫叶江路永平生中心愿褊短不获骋富贵安可为吾亦有岑鼎【韩非子云齐伐鲁索谗鼎鲁以其鴈往齐人曰鴈也鲁人曰真也齐人曰使乐正子春来吾将听子鲁君请乐正子春子春曰胡不以其真往君曰吾爱之答曰臣亦爱臣之信又按新序云齐攻鲁求岑鼎鲁载鼎往齐不信而反之使人告鲁君柳下惠以为是则请受之鲁君请于柳下惠对曰君之欲以为岑鼎也以免国也臣亦有国于此破臣之国以免君之国此臣所难也鲁君乃以真岑鼎往柳下惠可谓守信矣信之于人重矣言不可以富贵而易其素守也】

济岱有佳人【北方有佳人见前注】肌肤若冰雪【庄子逍遥篇藐姑射之山有神人焉肌肤若冰雪淖约若处子】我愿从之游补我黥与劓【庄子见前注】了不解人嗔真成一痴絶【晋顾恺之俗传恺之有三絶才絶画絶痴絶】栎社定颓然聊用神吾拙【见前注】

山公怀泾渭濬冲遭鉴赏【晋山涛传涛所奏甄拔人物各为题目时称山公启事王戎传戎有人伦鉴识常目山涛如浑金璞玉人皆钦其宝莫知名其器弟敦有高名戎恶之後果逆乱其鉴赏先见如此濬冲戎字也】代岂无若人吹嘘青云上【韩诗青冥送吹嘘强箭射鲁缙李白诗功略盖天地名飞青云上】念君如济水抱清伏泉壤【文选谢朓诗浊河秽清济注引战国策张仪说秦王曰清济浊河足以为阻尚书注曰济水入河并流十数里而南截河又并流数里溢为滎泽】行潦酌尊彝吾犹恃源往【大雅洞酌彼行潦书作会宗彝注云宗庙彝尊庄子徐无鬼篇请只风与日相与守河而河以为未始其攬也恃源而往者也】

蛾眉在蒿莱【卫国风螭首蛾眉以美人比君子也】金玉千里音【诗无金玉尔音】遥思甑生尘【後汉范丹传丹字史云闻里歌之曰甑中生尘范史云釜中生鱼范莱芜】汗漫观古今沉冥惊人句【杨子法言蜀庄沉冥老杜诗句不惊人死不休】摹写咏时禽【陆士衡悲哉行目感随气草耳悲咏时禽】无为愁肝肾君子要刳心【元稹作老杜墓志云摆去拘束摹写物象退之赠崔立之云劝君韬养待微招不用雕琢愁肝肾庄子天地篇君子不可以不刳心焉】

临川往长怀神交可心晤【论语子在川上曰逝者如斯夫不舍昼夜此段说者不一独景迂讲义云江熙曰人非山立俛仰而过临川兴怀能不慨然山谷意恐或近此】文章不经世【文选应休琰百一诗云文章不经国筐篋无尺书】风期南山雾【见前注】化虫哦四时【退之诗化虫枯揭茎】悲喜各有故吾独无间然【论语禹吾无间然矣】子规劝归去【子规鸣若云不如归去又有次韵晁元忠十诗与此同是元丰间作】

次韵晁元忠西归十首

我田失耕耘岁暮拾枯萁枯萁不可食日晏抱长饥【汉杨惲传田彼南山芜秽不治种一顷豆落而为萁渊明诗屡空不获年长饥至於老】猛虎依山林眼有百步威【司马迁答任安书猛虎处于山林百兽震恐退之猛虎行正昼当谷眠眼有百步威】一从梁鸯食风月何时归【列子云周宣王之牧正有役人梁鸯能养禽兽虽虎狼无不柔驯者梁鸯曰养虎之法顺之则喜逆之则怒夫食虎者不敢以生物与之为其杀之之怒也虎与人异而媚养已者】

圣莫如东家长年困行路公养为淹留岂不以食故【邴原别传曰原游学诣孙崧崧曰君舍郑君所谓以郑君为东家丘也原曰君谓仆以郑为东家丘必以仆为西家愚夫耶孟子云孔子有见行可之仕有际可之仕有公养之仕】林薄鸟迁巢水寒鱼不聚【老杜诗林茂鸟有归水深鱼知聚】孤士似无家【左传心苟无瑕何恤乎无家】转蓬何由往【说苑鲁哀侯弃国而走齐对齐侯曰是犹秋蓬恶其本根而美其枝叶秋风一起根且拔矣曹子建云转蓬离本根飘飘随长风老杜云飘零似转蓬】

前有熊羆咆後有虎豹号【文选刘安隐招士云虎豹鬬兮熊羆咆杜诗空荒咆熊羆乳兽待人肉】已出涧谷底更陟山阪高五日一并食【儒行云儒有易衣而出并日而食】十年一緼袍【论语衣敝緼袍庄子载曾子居卫緼袍无表顔色肿吟手足胼胝三日不举火十年不制衣兼用檀弓所云晏子一狐裘三十年之意】未知归宿处岂惮鞍马劳【退之病中赠张籍诗言籍之词云从此识归处东流水淙淙】

丽姬封人子弄影爱朝日【文选舞鹤赋叠霜毛而弄影】晋国始得之泣涕甘首疾【诗伯兮甘心首疾】忧危与安乐一生谁能必同牀食刍豢乃悔沾襟失【庄子曰丽之姬艾封人之子也晋国之始得之也涕泣沾襟及其至于王所与王同匡牀食刍豢而後悔其泣也】

怨句识之推【史记晋世家文公赏从亡者介子推不言禄禄亦不及隐不复见子推从者悬

书宫门曰龙欲上天五蛇为辅龙已升云四蛇各入其宇一蛇独怨终不见处所文公见之曰此介子推也】商歌知甯戚【琴操曰甯戚贩牛车下叩牛角而商歌曰南山粲白云烂生不逢尧与舜短布单衣裁至骭长夜冥冥何时旦齐桓公闻之举以为相】我占晁氏贤乃在赋行役【诗父曰嗟予子役役】同游羿毂中【庄子德充符篇云游于羿之毂中】偿免非尔力【孟子其中非尔力也】滔滔今如此去邦将安适【论语滔滔者天下皆是也兼用陈文子违之至他邦之意退之古风云一邑之水可走而违天下汤汤曷其而归】

热避恶木陰渴辞盗泉水【尸子孔子过于盗泉渴而不饮恶其名也管子孔子忍渴于盗泉曾参回车于胜母文选陆士衡诗渴不饮盗泉水热不息恶木陰恶木岂无枝志士多苦心】曾回胜母车【邹阳书里名胜母曾子不入邑号朝歌墨回车子】不落抱玉泪【邹阳书玉人献宝楚人诛之注曰卞和抱其璞哭于郊太白诗抱玉入楚国】晁氏猛虎行【古有猛虎行饥不徙猛虎食老杜烈士恶苟能俊杰思自致赠子猛虎行出郊载酸鼻】噉噉壮士意人生高唐观【高唐之观见文选宋玉赋】有情何能已【文选颜延年诗有怀谁能已元注云晁诗云安得龙山潮驾回实河水水从楼前来中有美人泪】

腰垂九井璜【尚书中候曰吕尚钓于磻溪得玉璜云云见文选注山谷琴铭云钓鱼而得九井之璜盖兼山海经事经云海内崑仑墟在西北帝之下都高九仞有九井以玉为槛】耳着明月璫【文选洛神赋赠江南之明璫注云耳珠曰璫】兰荪结襟带【沈休文和谢宣城诗昔贤侔时雨今守馥兰荪】芰荷制衣裳【离骚经制芰荷以为衣兮集芙蓉以为裳】其人虽甚远其室大道傍【郑国风其室则迓其人甚远古语筑室道傍三年不成】当身不着意千载永相望【太白诗遮莫亲姻连帝城不如当身自簪纓当字作去声读】

风雨去家行手龟面黧黑【庄子宋人有善不龟手之药者韩非子晋文公反国及河令笪豆捐之席蓐捐之手足胼胝面目黧黑者後之列子年老力弱面目黧黑杜诗会面嗟黧黑】屠龙非世资【屠龙见前注】学问求自得【孟子君子深造之以道欲其自得之也】我思脊令诗同飞复同息兄弟无相远急难要羽翼【小雅常棣云脊令在原兄弟急难角弓云兄弟昏姻无胥远矣唐明皇赐让皇帝兄弟天生之羽翼】

人言贫在家殊胜富作客【乐天诗始知为客苦不及在家贫唐戎昱诗远客归去来在家贫亦好又在家贫亦好殊胜富作客】鸡栖牛羊下【见前注】君子亦安息千里求明师赢粮从事役【庄子胠篋篇延颈举踵曰某所有贤者赢粮而趣之庚桑楚篇南荣趺赢粮七日七夜至老子之所退之南蹊始泛云谁谓非事役】学问非物外室虚生纯白【虚室生白见前注杜诗兴残虚白室前集赠柳展如诗八方去求道渺渺困多蹊归来坐虚室夕阳在吾西与此同意盖谓道在迩而求诸远也】

开田望食麦春陇无秀色【王僧达诗麦陇多秀色杨园流好音】深耕不偿勤牛耳徒湿湿【小雅尔牛来思其耳湿湿】丰凶谁主张坐令愁煎迫河清会有时【河清见前注】得酒洒胸臆【集中有答晁元忠书云未识足下之面因昆弟得足下之诗兴托深远不犯世故之锋永怀善怨鬱然类骚故追韵写意于无能之词又云南来拘窘吏事虽江山映发心不在焉】

又云十诗仰报盛意又云承去岁不利秋官可见诗中之意矣其言南来拘窘吏事可见在太和作追韵写意即此诗十诗仰报盛意乃前十诗】

食笋十韵【前集上子瞻书云闻燕坐东坡心醉六经又云比以职事在山中食笋得小诗辄上寄一笑旁州士大夫和诗时有佳句要自不满人意莫如公待我厚愿为落笔思得申纸疾读如老杜所谓一洗万古凡马空者据东坡集和篇乃将去黄州时作山谷至太和盖元丰四年春庚申岁七年甲子岁春移监德平镇东坡亦以七年春移汝州此诗当是六年作】

洛下斑竹笋花时压鲑菜【庾郎贫食鲑已见前注杜诗云自愧无鲑菜空烦卸马鞍鲑户佳切切韵曰鱼名出吴志】一束酬千金掉头不肯卖【杜诗巢父掉头不肯住】我来白下聚此族富庖宰【退之鬪鸡联句义肉耻庖宰】蜚栗戴地翻觥觥触墙坏【退之咏笋云见角牛羊没又云穰穰疑翻地天地之牛角蜚栗见礼记觥觥见孟子】入中厨【诗尔羊来思其角戢戢】如偿食竹债【楞严经云身为畜生酬其宿债诗意谓牛羊食竹及死为笋为人所食若偿债然又用传灯录死为菌令人食之之意按第十五祖那提婆传尊者既得法後至毗罗国有长者园树生大耳如菌味甚美惟长者与第二子罗睺罗取而食之尽而复生余皆不得见时尊者知其宿因长者问其故尊者曰汝家昔供养一比丘然此比丘道眼未明以虚沾信施故报为木菌惟汝与子得以享之】甘菹和菌耳【菹谓酢菜也生大耳如菌见上句注】辛膳膾姜芥【左传宣三年使宰夫膾熊蹯】烹鹅杂股掌炮鼈乱羶介【江南别录云僧谦明好诗酒烈祖问其所求曰惟愿鹅生四个腿鼈生两重裙陶岳五代史补亦云诗韩奕云其杀维何俎鼈鲜鱼】小儿哇不美【孟子出而哇之注出门而哇吐之】鼠壤有余噉【庄子鼠壤有余蔬孟子蝇蚋蛄噉之】可贵生于少古来食共噉【记不敢啖噉】尚想高将军五溪无人采【明皇杂录高力士谪黔州山谷多芥而人不食力士作诗曰两京作斤卖五溪无人采夷夏虽有殊气味都不改】

萧巽葛敏修二学子和予食笋诗次韵答之二首【吴氏漫录云山谷南还至南华竹轩令侍史诵诗板戒勿言姓名诵一絶句云不用山僧供帐迎世间无此竹风清独拳一手支颐卧偷眼看云生未生徐视姓名曰果吾学子葛敏修也此篇言二妙各能诗端不滥语】

北饌厌羊酪南庖丰笋菜【退之诗我来御魑魅自宜味南烹】自北初落南【退之南海神碑人士之落南不能归者】几为儿所卖【史记越世家陶朱公中男杀人事庄生羞为儿子所卖】习知价廉平【史记吴起传起廉平能得士心此摘其字】百态事烹宰盐曦枯腊瘦密渍真味坏就根煨茁美【茁出也见前春菜诗注】岂念炮烙债【史记周纪西伯请紂去炮烙之刑】咀吞千亩余【退之南食诗咀吞面汗辍史记货殖传渭川千亩竹】胸次不蜚芥【子虚赋其于胸中曾不蜚芥】二妙各能诗【晋卫瓘索靖供善草书人号为一台二妙】才名动江介【楚辞长江介之遗风魏都赋与江介之湫洳注云韩诗章句曰人界也】诗论多佳句脍炙甘我噉【孟子脍炙与羊枣孰美言其诗脍炙人口也曲礼毋噉炙注噉谓一举尽齧】因君思养竹万籁听秋噉【庄子齐物篇汝开地籁而未闻天籁又云大块噉气其名为风】从此缮藩篱下令禁渔采

韭黄照春盘【欧阳行周有春盘赋杜诗春日春盘细生菜】菰白媚秋菜【本草菰根蒋草也江南人呼为茭草图经云又谓之茭白】惟此苍竹苗市上三时卖江南家家竹翦伐谁主宰【诗勿翦勿伐】半以苦见疎不言甘易坏【表记云君子之接如水小人之接如醴君子淡以成小人甘以坏庄子山水篇君子之交淡如水小人之交甘若醴君子淡以亲小人甘以絶】葛陂雕龙睡未索儿孙债【後汉费长房传长房辞归翁与一竹杖曰骑此任所之则自至矣既至可以杖投葛陂中也长房乘杖须臾来归即以杖投陂顾视则龙也庄子千金之珠必在骊龙颌下子能得之必遭其睡也】獭胆能分杯虎魄妙拾芥【本草序例云虎啸风生龙吟云起磁石引针虎魄拾芥漆得蟹四散麻得漆而涌桂得葱而软树得桂而枯戎盐累卵獭胆分杯其气爽有相关感者多如此类三国志虞翻年十二客有过其兄不遇翻追与书曰虎珀不取腐芥磁石不受曲针过而不存不亦宜乎客得书奇之】此物于食穀如客得宾介【汉食货志诏曰夫盐食者之将】思入帝鼎烹忍遭饥涎噉懒林供翰墨砥杵风号噫每下叹枯株焚如落樵采【懒林疑字误诗意谓其始也思入大烹以享上帝之鼎其次为笔以供翰墨最下枯槁而为樵夫所采颇含箴规之意焚如见易离卦每下愈况见庄子知北游篇】

胡朝请见和复次韵

人笑庾郎贫满胸饭寒菜【见前注】春盘食指动【左传子公之食指动曰他日我如此必尝异味】笋茁入市卖回首万钱厨不美廊庙宰【日食万钱见前注文选李陵答苏武书闻子之归无尺土之封而亲戚贪佞之类悉为廊庙宰】民生暂神奇【见前注】胞隳伐性坏【枚叔七发云皓齿蛾眉命曰伐性之斧甘脆肥醲命曰腐肠之药盖取吕氏春秋靡曼皓齿命曰伐性之斧肥肉厚酒命曰烂肠之食隳永谓肥肉胞当作肥又疑是庖字东方朔传陶公主胞人师古曰胞与庖同】忍持芭蕉身【见前注】多负牛羊债【楞严经云以人食羊羊死为人人死为羊死死生互来相噉汝负我命我还汝债】箴龙不称冤【卢仝寄男抱孙诗云竹林吾最惜新笋好看守万箴包龙儿攒迸溢林藪又云箴龙正称冤莫杀入汝口丁叮嘱托汝汝活箴龙否】易致等拾芥【夏侯胜传如俯拾地芥】萧萧烟雨姿壮士持戈介【杜牧之晚晴赋竹林外里兮十万丈夫甲刃枹枹密阵环侍】骈头沸鼎鼎【易贯鱼以宫人宠注曰贯鱼谓五阴骈头相次似贯鱼也退之又鱼诗骈头类同条】可口垂涎噉【庄子云其味相反而皆可于口杜诗道逢麴车口流涎】霜丛负後凋玉食香余噫【书惟辟玉食晋王濬玉食锦服】续诗无全功【列子天地无全功圣人无全能】葑菲傥可采【诗采葑采菲】

立春

韭苗香煮饼【崔实四民月令曰立秋无食煮饼】野老不知春看镜道如咫倚楼梅照人【杜诗勋业频看镜行藏独倚楼退之春雪间早梅诗寒光助照人赵嘏诗长笛一声人倚楼】

寄舒申之户曹【年谱舒申之名卷】

吉州司户官虽小会屈诗人杜审言【唐杜审言传恃才高以傲世见疾尝语人曰吾文章当

得屈宋作衙官迁洛阳丞坐事贬吉州司户参军审言生子闲闲生甫字子美】今日宣城读书客还趋手板傍辕门【趋手板见前注项羽传羽见诸侯将入辕门膝行而前】江山依旧岁时改桃李欲开烟雨昏公退但呼红袖饮【诗自公退食】剩传歌曲教新翻【元稹连昌宫词偷得新翻数般曲刘禹锡杨柳枝词听唱新翻杨柳枝】

次韵杜仲观二絶

鸟啼花动却春寒雨压青旗卷画干多事今年废诗酒烦君传语问平安【用李卫公报竹平安借取其字】

重帘复幕和风雨无奈催沽鸟唤人【鸟名提壶卢见前注】只是樽前欠狂客舞娃冰雪酒磷磷【退之诗黄帘绿幕朱户闭唐贺知章自号四明狂客庄子云肌肤若冰雪诗杨之水白石粼粼注清彻也粼亦作磷】

再次韵

短舞朱裙愜醉看【陶岳零陵记长沙王发于上前自为短舞人笑其拙】惜公官守隔江干遥怜得句无人赏走马城东觅道安【习凿齿传时有桑门释道安俊辩有高才与凿齿初相见道安曰弥天释道安当谓游寺】

诗家二杜【审言及甫】见仍云【仍云见尔雅】佳句风流照映人青眼向来同醉醒白头相望不缙磷【论语磨而不磷涅而不缙杜诗但取不缙磷】

社日奉寄君庸主簿【何君庸为太和簿】

花发社公雨【社公见前注】陰寒殊未开初闻燕子语似报玉人来【元稹作张君传崔氏诗曰待月西厢下迎风户半开拂墙花影动疑是玉人来】遮眼便书册【传灯録僧问药山为什麼看经师曰只图遮眼】挑聋欺酒杯【李氏谈録李相涛小字社公为兵部时文公昉为翰林学士月给内醢兵部因春社寄昉诗云社公今日没心情为乏治聋酒一餅俗云社日酒治聋治音持挑当作治欺当作欠刘萧仲社日招客饮治聋聊复尽余盃】传声习主簿勤为拨春醕【晋习凿齿传为桓温西曹主簿温曰三十年看儒书不如一诣习主簿太白诗恰似蒲萄新拨醕】

观王主簿家醕醺

肌肤冰雪薰沉水【肌肤冰雪见前注】百草千花莫比芳【白居易诗绿水红莲朵朵间千花百草无颜色杨文公谈苑称郑文宝诗百草千花路斜风细雨天】露湿何郎试汤饼【语林曰何平叔美姿仪而絶白魏文帝疑其着粉夏月与热汤饼既啖大汗出随以朱衣自拭色转皎然平叔何晏也魏初尚主】日烘荀令炷炉香【襄阳记刘季和性爱香常如厕还辄过

香炉上主簿张坦曰人名公作俗人不虚也季和曰苟令君至人家坐席三日香与我如何坦曰丑妇效顰见者必走公欲坦遁走耶季和大笑诗人咏花多比美女山谷赋酴醾独比美大夫见冷斋夜话李义山诗谢郎衣初翻雪苟令薰炉更换香】风流彻骨成春酒【韩持国诗只恐春归有余恨典刑原在酒杯中】梦寐宜人入枕囊【世说有以茶蘼花作枕囊前集酴醾诗名字因壶酒风流付枕帙与此句意同】输与能诗王主簿瑶台影里据胡牀【晋王徽之泊舟清溪侧桓伊于岸上过谓伊曰闻君善吹曲为我一奏伊据胡牀为作三调弄】

酴醾

汉宫娇额半涂黄【後汉马廖传城中好广眉四方且半额幽恠录橘中四老一叟曰君输我智琼额黄十二枚王介甫梅花诗汉宫娇额半涂黄粉色凌寒透薄妆诗句偶同附载于此】入骨浓薰贾女香【晋贾谧传母贾午充少女也吏韩寿与女通家中莫知时西域贡奇香一着人则经月不歇帝以赐充女密盗以遗寿充寮属与寿燕处闻其芬馥称之于充云云】日色渐迟风力细倚栏偷舞白霓裳【楚辞青云衣兮白霓裳今借使杨太真外传进见日奏霓裳羽衣曲偷字如乐天诗兰偷苟令香之意】

元翁坐中见次元寄到和孔四饮王夔玉家长韵因次韵率元翁同作寄湓城【夔玉名球太和人侍郎王贽之子】

雨罢山泽明日长花柳困【老杜春光嬾困倚微风】游丝上天衢【简文帝春日诗落花随燕入游丝带蝶惊老杜落花游丝白日静】观物得无闷【易遯世无闷酒德颂云俯观万物】时从顾曲人【周瑜传曲有误周郎顾以言周元翁】笋馐酌春酝季子未识面想见眉目俊新诗如鸣弦快读开鄙吝【後汉黄宪传时月之间不见黄生则鄙吝之萌复存乎心】铜官鲁诸生事道三无愠【见前注】比来工五字句法妙何逊【梁记室兼水部郎何逊字仲言有诗集】枯槁覆吴图【文选博奕论云夫一木之枰孰与方国之封枯槁三百孰与万人之将杜牧送国碁王逢云别後竹窻风雪夜一灯明灭覆吴图齐书曰能碁人琅邪王抗为第一品吴郡褚思庄会稽夏赤松第二品宋文帝世羊玄保戏因制局图还于帝前覆之】青简玩秦烬【後汉吴佑传杀青简以写书】叶暗黄鸟时【见前注】风号报花信【东皐杂录云江南自初春至初夏有二十四风信梅花风最先楝花风最後唐人诗曰楝花开後风光老梅子黄时雨意浓晏元献诗亦曰二十四番花信风是也】遥仰吟思苦江锦割向尽【南史江淹传梦一人自称张景阳谓曰前以一疋锦相借今可见还探怀中得数尺与之此人大恚曰那得割截都尽顾见丘迟曰余此数尺无所用以遗君自是淹文章蹶矣】应烦王公子又破黄封印【宫酒以黄罗怕封之东坡所谓上尊日日写黄封是也】再次孔四韵寄怀元翁兄弟并致问毅甫

书帙蠹鱼乾【退之云岂殊蠹书虫生死文字间】炉香眠鸭困【李义山云舞鸾镜匣收残黛睡鸭香炉换夕薰】佳人来无期【选诗佳人殊未来】诗句且排闷【杜诗排闷强裁诗】遥知乌衣游【刘梦得金陵五题云朱雀桥边野草花乌衣巷口夕阳斜旧时王谢堂前燕飞入寻常百姓家盖江左诸王多居乌衣巷建康图诗云在上元县东南四里】碁局具肴醢

争道嘲不恭【汉吴王剿传吴太子入见得侍皇太子饮博吴太子素骄博争道不恭】麀兵劳得俊【汉霍去病传合短兵麀臯兰下师古曰麀谓苦击而多杀也佐传云得隼曰克】颇寻文献盟【文献见论语】不落市井吝【杨子云市井相与言则以财与利】四月明朱夏南风解人愠【帝王世纪曰舜弹五弦琴歌南风曰南风之薰兮可以解吾民之愠兮】风前怀二陆家法窥抗逊【晋陆机传祖逊吴丞相父抗吴大司马大康末与弟云俱入洛范阳卢志於衆中问机曰陆逊陆抗于君近远机曰如君于卢毓卢志默然】身有三尺桐爨下得余烬【蕉尾琴见前注】端可张洞庭【庄子黄帝张乐于洞庭之野谢眺诗洞庭张乐地潇湘帝子游】寥濶世未信为我谢孔君举酒取快尽世故安足存【文选潘正叔诗世故尚未夷】青天飞鸟印【白乐天诗更无寻覓处鸟迹印空中退之联句云沙篆印回平盖言鸟迹印沙今言印青天】

次韵元翁从王夔玉借书

为吏三年弄文墨【文选刘公干诗职事相填委文墨纷消散注云汉书功臣皆曰萧何文墨顾居臣上】草莱心径失耕锄【孟子今茅塞子之心矣】常思天下无双祖得读人间未见书【後汉黄香传京师号曰天下无双江夏黄童肃宗诏香诣东观读所未尝见书】公子藏山真富有【言其藏书如老氏藏室道家蓬莱山也易系辞富有之谓大业司马迁与仕安书仆诚已着此书藏之名山】小儒扪腹正空虚【退之诗诗书勤乃有不勤腹空虚】何时管钥入吾手为理签题扑蠹鱼【杜诗书籤映隙嚙蠹鱼见前注】

学元翁作女儿浦口诗

五老峯前万顷江【见前注】女儿浦口鸳鸯双【女儿浦隶江州德化】惊飞何处沙上宿夜雨钓船灯照窻

去岁和元翁重到双涧寺观余兄弟题诗之篇总忘收录病中记忆成此诗

素琴声在时能听【陶潜传蓄素琴一张】白鸟盟寒久未?【左传盟可寻也亦可寒也】眼见野僧垂雪髮养亲原不顾朱金【史记聂政传严仲子具酒聂政母前奉黄金百镒为母壽聂政固谢曰家贫养亲亲供养备不敢当仲子之赐烈女传秋胡子之妻曰妾采桑奉二亲不愿人之金法言曰纡朱怀金之乐】开泉浸稻双涧水煨笋充盘春竹林安得一?吾欲老【孟子愿受一?而为氓】君听庄舄病时吟【史记陈轸传轸至秦惠王曰子去寡人之楚亦思寡人否对曰王闻夫越人庄舄乎庄舄在楚执珪有顷而病楚王曰舄故越之鄙细人也今仕楚执珪贵富矣亦思越不对曰凡人之思故在其病也彼思越则越声不思越则楚声使人往听之犹越声也今臣虽弃逐之楚岂能无秦声哉李白诗笑吐张仪舌愁为庄舄吟】

次韵周法曹游青原山寺【即周元翁】

市声故在耳【说苑孔子谓弟子曰违山千里螻蛄之声尚犹在耳】一原谢尘埃乳窦响钟

磬【选诗南邻击钟磬】翠峯丽昭回【诗倬彼云汉昭回于天】俯看行磨蚁【磨蚁见前注】车马度城隈水犹曹溪味【传灯录僧问清凉如何是曹溪一滴】山自思公开【传灯录行思禅师传师吉州安城人闻曹溪法席乃往参礼问曰当何所务即不落阶级云云祖深器之师既得法住吉州青原山净居寺有沙弥希迁问曰曹溪大师还识尚和否师曰汝今识吾否曰识又争能识得师曰衆角虽多一麟足矣】浮图涌金碧【浮图塔也杜诗润聚金碧气文选陆机连珠曰金碧之崑必辱凤举之使】广厦构坏材蟬蛻三百年【史记屈原传蟬蛻于浊秽】至今猿鸟哀祖印平如水【传灯录初祖达磨传师曰内传法印以契证心外付袈裟以定宗旨】有句非险崖心花照十方【圆觉经世尊告普觉菩萨云心花发明照十方刹东坡尝作偈云心花发明照十方盖本此】初不落梯阶【不落阶级见此篇注步步踏佛阶梯见传灯录法融禅师传】我行暝托宿夜雨滴华櫬【王仲宣诗高会君子堂并坐饮华櫬】残僧四五辈【杜诗野寺残僧少】法筵叹尘埋石头麟一角【见前注本传云师付法石头】道价直九垓【祖如封禅书云上畅九垓】庐陵米贵贱传与後人猜【本传云僧问如何是佛法大意师曰庐陵米作麼价】晓跻上方上【上方见前注】秋塍乱萁荻寒藤上老木龙蛇委筋骸【礼记礼运云肌肤之会筋骸之束】鲁公大字石笔势欲崩摧德人曩来游颇有嘉客陪忆当拥旌旗千骑相排阓且复歌舞随丝竹写烦哇事如飞鸿去【杜牧诗恨如春草多事与孤鸿去】名与南斗偕【狄仁杰传北斗以南一人而已】松竹吟高邱何时更能来【颜鲁公真卿贬吉州司马大字当是纪游也】回首翠微合【尔雅山未及上翠微】于役王事催【诗君子于役又云王事靡盬】猿鹤一日雅【孔德璋北山移文云蕙帐空兮夜鹤怨山人去兮晓猿惊诗意谓猿鹤既有一日之雅再来尚可从容也一日之雅见汉书谷永传】重来尚徘徊【碑本荻字韵下有两句云莲子委箭簇葵花仄金杯】

次韵曾都曹喜雨【都曹在郡中不应有洁斋蕲得岁之句又集中有戏题曾处喜尉厅即此人亦非都曹所居而集中又有送时中摄东曹诗恐是时中与之对摄】

水旱国代有【左传僖十三年天灾流行国家代有】人神理本通偏雩祠小大【周礼春官若国大旱则帅巫而舞雩礼记祭法雩祭祭水旱也春秋书大雩】敢指蜺雌雄【郭璞云雄曰虹雌曰蜺五历吾结反南史王筠传沈约制郊居赋示筠草筠读雌蜺连蜺约抚掌曰仆常恐人呼为霓】地厌焚燄极【诗如燄如焚】天回顾盼中蛟龙起乖卧星斗晦澄空云挟雷声走【西京杂记淮安王着鸿烈自言字中皆挟风霜】江翻电脚红宠光归稼穡【老杜江雨诗宠光蕙叶与多碧点注桃花舒小红】滴沥在梧桐【孟浩然诗疎雨滴梧桐】詖讼犹相及时霖恐未丰洁斋蕲得岁同病托诸公

戏题曾处善尉厅二首

鸡埘啄鴈如驾鹅【诗鸡栖于埘子虚赋弋白鹄连驾鹅扬雄反骚岂驾鹅之能捷】万里天衢且一波宫锦络衫弓石八与人同状不同科【论语为力不同科】

右超然台

茅茨中安一牀寂【退之送张道士云臣有胆与气不能死茅茨维摩经维摩诘即以神力空其室内唯置一牀以疾而卧】天女原非世间色道人今日八关斋【南史袁粲传宋孝武即位迁侍中文帝讳曰羣臣并于中兴寺入关斋中食竟粲别与黄门郎张淹更进鱼肉食何尚之密以白孝武并免官南史又云吴兴有项羽神太守到必须祀以軀下牛李安人不与又于厅上设入关斋俄而牛死道人山谷自谓也按释氏书戒有八一不杀二不偷盗三不邪淫四不妄语五不饮酒六不坐高广大牀七不着花鬘璎珞不用香油涂身薰衣八不自歌舞不得辄往聽不过中食此八戒名入关斋戒关者闭也禁也白乐天诗八关净戒斋销日一曲狂歌醉送春】莫散花来染衣袂【天女散花见维摩经袂古得切衣前襟也弥陀经曰西方圣衆以衣袂盛花奉诸佛皎然诗天女来相试将花欲染衣禅心定不起还捧旧花归】

右不动庵

寄上高李令怀道【上高隶筠州】

李侯湖海士【魏志陈登传元龙湖海之士】瓜葛附婚友【瓜葛婚友见前注】平生各转蓬【转蓬见前注】未曾接樽酒【司马迁报任安书云未曾衔杯酒接殷勤之欢】寄声维辛勤【寄生见前注】江路常永久节物居然秋【庄子山木篇居然不免于患】蛻虫悲高柳【谓蝉也】传闻辟学館鼓士荐豚韭【鼓字如李膺鼓动流俗之鼓礼内则豚春用韭秋用蓼】能使珥笔黔【黔谓黔首也史记秦纪更名民曰黔首珥笔见前注】稍知忠信有【论语十室之邑必有忠信】骄虎缩爪距【李翰赞裘旻将军射虎图战羣虎之命使锯牙钩爪戢而莫措】诗礼开户牖事胜感邦人【渊明咏二疏云余荣何足顾事胜感行人】伐山谋不朽【汉地理志以渔猎山伐为业左传襄二十四年春穆叔如晋范宣子逆之问焉曰古人有言曰死而不朽何谓也穆叔曰鲁有先大夫曰臧文仲既没其言立其是之谓乎豹闻之太上有立德其次有立功其次有立言虽久不废此之谓不朽】武功笔如椽【晋王珣传梦人以大笔如椽与之】文字烂琼玖【国风木瓜报之以琼玖】谓予有书癖【书癖见次韵答张沙河注】摹篆写科斗不珍金石刻【陆士衡文赋被金石而德广段墨卿平淮西碑刻金石以扬休德】要我一挥肘安知乃儿戏【汉周亚夫传乡者霸上棘门如儿戏耳】敢传万世後摩拂幼妇篇【後汉蔡邕题曹娥碑云黄绢幼妇外孙齏臼】慙非换鵲手【见王羲之传李白诗山陰道士如相见为写黄庭换白鵲】公其勤劳来【小雅鸿鴈序万民离散而能劳来还定安集之正义曰劳来者来勤也殷勤于民】嘉政民父母不用琢苍崖丰碑在人口【礼公室视丰碑诗意谓姓苏人作碑山谷为书末章言但能劳来安定则民事之如父母所谓道上行人人口似碑无用此也】

山谷外集诗注卷十二

山谷外集诗注卷十三

钦定四库全书

山谷外集诗注卷十三

宋 黄庭坚 撰

史 容 注

谢文灏元丰上文藁

虎豹文章非一斑【王献之传管中窥豹时见一斑】乳雉五色蜃胎寒【书山龙华虫疏云华虫雉也雉五色象草华也杨雄赋剖明月之珠胎吴都赋蚌蛤珠胎尔雅蚌含浆注蚌即蜃也】天生材器各有用【太白将进酒云天生我材必有用千金散尽还复来】相如名独重太山【蔺相如传退而让颇名重太山】风流小谢宣城後【南齐书云谢朓转中书郎出为宣城太守而南史不载太白宣州谢朓楼饯别诗蓬莱文章建安骨中间小谢又清发】少年如春胆如斗【见前注】裕陵书藁公不朽【永裕乃神宗陵】持名铁石要长久【魏武帝令长史王必曰忠能勤事心如铁石国之良吏也】

读方言【扬雄着此书名曰輶轩使者絶代语释别国方言其答刘歆书云成帝时天下上计孝廉及内郡卫卒会者雄常把三寸弱翰齎油素四尺以问其异方语归即以铅摘次之于槧云云】

八月梨枣红【杜诗庭前八月梨枣熟】绕墙风自落江南风雨余未觉衣衾薄壁虫忧寒来催妇织衣【去声】着【斫音二字元注也】荒畦?菊花犹用充羹臠【招魂云露鸡臠觶注云有菜曰羹无菜曰臠齐民要术有羹臠法一肉大率以肉作羹臠耳尔雅蟋蟀蜚注云促织也陆龟蒙有?菊赋】连日无酒饮令人风味恶颇似扬子云家贫官落魄【扬雄传何为官之拓落也酈食其传家贫落魄魄音薄】忽闻輶轩书【文选注輶轩使者车】澁读劳辅髀【柳子厚答韦珩书雄之遣词措意颇短局澁滞周易咸其辅颊舌注辅上颌也讲学根本髀齿齧也逆各反】虚堂漏刻间九土可领略【宋玉登徒子赋云少曾远游周览九土李善曰九土九州之土也】愿多载酒人喜我识字博【渊明诗云子云性嗜酒家贫无由得时赖好事人载醪祛所惑觞来为之尽是谑无不塞】设心更自笑欲过屠门嚼【文选曹子建书过屠门而大嚼虽不得肉贵且快意注云桓子新论人闻长安乐则出门向西而笑知肉味美对屠门而大嚼】往时抱经纶待价一丘壑【论语我待价者也班固叙传云渔钓于一壑栖迟于一丘】卜师非熊罴【史记齐太公世家云吕尚以渔钓于周西伯西伯将出猎卜之曰所获非龙非虬非虎非罴所获霸王之辅西伯猎果遇太公立为师杜诗燕王买骏骨渭老得熊罴】梦相解麤索【书高宗梦得说俾以形旁求于天下说筑傅岩之下惟肖爰立作相疏曰皇甫谧云高宗梦天赐贤人胥靡之衣使百工写其形像求诸天下果见筑岩者胥靡衣褐带索

执役子虞虢之间】所欲吾未奢【史记淳于髡传所持者狭而所欲者奢】傥使耕可获【杨子法言耕不获猎不飧耕猎乎】今年美牟麦厨饌丰饼飴【欧阳公归田录汤饼唐人谓之不托今俗谓之饆飴矣束皙饼赋有馒头薄持起溲牢九惟馒头至今存余莫晓何物】摩挲腹中书安知非糟粕【世说郝隆晒腹中书庄子所读者古人之糟粕已见前注此篇言索寞无酒因读方言愿多有好事者载酒肴来问奇字因得大嚼耳古者固有抱经纶之术而隐于筑钓後为师为相我则异于此所望不奢也若使麦田丰而富汤饼足矣】

次韵秋郊晚望

道同一指马【庄子齐物篇以指喻指之非指不若以非指喻指之非指也以马喻马之非马不若以非马喻马之非马也天地一指也万物一马也】心解非耳目短生行衰谢【文选谢灵运诗短生旅长世】黄落看草木【汉武秋风词秋风起兮白云飞草木黄落兮鴈南归月令季秋之月草木黄落】无怀世不知有酒客可速【易不速之客来】谁能缚诗书【用老杜身犹缚禅寂之意】闭门抱羈独披襟临江臯【宋玉风赋王乃披襟当之】万籁发空谷【李白诗一风鼓羣有万籁各自鸣】风力斜鴈行山光森雨足【选诗森森散雨足杜诗雨声先已风散足尽西靡】壁虫先知寒机织日夜促【促织见前注】居人思行人裘褐谁结束【文选古诗何为自结束】行人喜归来邂逅天从欲【左传人之所欲天必从之】可奈甑生尘【汉书范丹传甑中生尘范史云】严霜冻菊【见前注】

次韵周德夫经行不相见之诗

春风倚樽俎緑发少年时【欧阳公诗緑髮少年时青衫喜从事】酒胆大如斗【蜀志姜维胆大如斗】当时淮海知醉眼槩九州何尝识忧悲看云飞翰墨【老杜诗明日看云还杖藜】秀句咏蛛丝【杜诗最传秀句寰区满】乐如同队鱼【退之诗少小聚嬉戏不殊同队鱼】游泳清水湄波涛倏相失岁月秣马驰【诗言秣其马李斯传时乎时乎赢粮跃马唯恐後时】客事走京洛乡贡趋礼闈艰难思一臂【唐薛元超传帝幸东都留辅太子曰朕留卿若失一臂】讲学抱羣疑【易睽卦羣疑亡也】邂逅无因得【诗邂逅相遇适我愿兮】君居天南陲谁言井里坐【後汉马援传子阳井底蛙也韩文坐井观天】忽枉故人诗清如秋露蝉【李白诗白若白鹭鲜清如清泪蝉】高柳噫衰迟【大块噫气见前注子虚赋榜人歌声流喝郭璞曰言悲嘶也一介切退之聯句云腾口甚蝉喝又云蝉烦鸣转喝噫喝音义同】感叹各头白民生竟自痴【晋王述排其子坦之曰汝竟痴耶见本传】过门不我见宁复论前期【文选沈休文诗平生少年日分手易前期注谓春秋富前期非远分手之际轻而易之及年衰则难别今过门不相见岂论此耶】杯酒良难必况望功名垂吉守乡丈人【易师贞丈人吉】政成犬生犛【後汉岑熙为魏郡太守人歌曰狗卧不惊足下生犛】緑柳阴铃阁【晋羊祜都督荊州诸军事所宿铃阁之下侍卫不过数十人】红莲媚官池【老杜有官池春鴈诗媚字盖用谢灵运诗緑筱媚青涟又云孤屿媚中川山谷多用此字】开轩纳日月【见前注】高会无吏讥琵琶二十四【前有诗言庐陵郡燕游寄郡僚云今夕传杯定何处应无二十四琵琶当是言吉州官妓琵琶之数如东坡云琵琶一抹四十弦也】明妆百骑随【鲍明远诗明妆带罗绮退之诗净濯明妆有所奉顾我未肯寘齿牙】为公置乐饮才可慰路岐

【列子岐路又有岐焉诗言分携也】矧公妙顾曲【周瑜传曲有误周郎顾取同姓也】调笑才不羈【玉台新咏冯子都诗调笑酒家胡邹阳传不羈之士司马迁传仆少负不羈之才】幕中佳少年多欲从汝嬉人事喜乖牾【渊明集人事好乖会当语离班固宾戏乖牾而不可通老杜新婚别人事多错忤对君永相忘】曾莫把一卮朝云高唐观【高唐赋襄王望高唐之观又云妾在巫山之阳高唐之岨旦为朝云暮为行雨】客枕劳梦思【杜诗云雨荒台岂梦思】主翁悲琴瑟【礼有丧事撤琴瑟而不御丁晋公榴花诗莫怪主翁相看好举家新自洞庭来王荆公诗日暮主翁投客辖周与吉守同乡不知官于何郡主翁盖指其郡将以悼亡不听音乐也】生憎见蛾眉【杜诗生憎柳絮白于绵】君亦晚坎轲【楚辞七谏云年既过半百兮愁轲轲而滞留古诗坎轲常苦辛】有句怨弃遗【退之诗频蒙怨句刺弃遗】夜光暗投人【见前注】行向蒙诋嗤相思秋日黄【杜诗血战乾坤赤氛迷日月黄又锦城曛日黄】西岭含半规【谢灵运诗密林含余清远峯隐半规白乐天悲清秋赋云西阳半规映岛欲没】老矣失少味尚能诗酒为忽解扁舟下何年复来兹寄声缓行李【鲍明远诗愿尔笃行李此反其意】激箭无由追【贾谊传矢激则远白乐天诗年光同激箭】

欧阳从道许寄金橘以诗督之【元注曰从道参禅尝有言句来颇闻数从歌舞饮故及之】

禅客入秋无气息【白乐天诗掩镜望东寺降心谢禅客】想依红袖醉毵毹【射雉赋敷藻翰之陪颶上薄回反下苏来反二字玉篇云凤舞】霜枝摇落黄金弹许送筠笼殊未来【西京杂记韩嫣好弹以黄金为丸杜诗西蜀樱桃也自红野人相赠满筠笼】

次韵吉老十小诗

什裘发硎刀【见前注】无名自贵高秋衣犹葛制【重裘兼味养大贤冰食葛制神所怜退之苦寒歌也】午饭厌溪毛【涧溪沼沚之毛见左传】

万木霜摇落【见前注】山呈斧凿痕【退之诗徒观斧凿痕不瞩治水航】痴蝇思附尾【史记伯夷传颜渊虽笃学附骥尾而行益显索隐曰苍蝇附骥尾而致千里後汉书苍蝇之飞不过十步若附骥尾日驰千里】警鹤畏乘轩【卫懿公好鹤鹤有乘轩者见左传闵二年】日短循除庀溪寒出臼科【臼科见上注】官居图画里【杜诗飞阁卷帘图画里】小鸭睡枯荷【谓薰炉也李义山诗云睡鸭香炉换夕薰】

眼看人换世【文选叹逝赋川阅水以成川水滔滔而日度世阅人而为世人冉冉而行暮人何世而弗新世何人之能故欧阳公梦中诗暮罢不知人换世】手种木成阴【杜牧之诗緑叶成阴子满枝】藏拙无三窟【见前注】谈禅剧七禽【谈禅问答之间譬若孔明之于孟获七纵七禽也详见寄谢外舅诗注】

寒水几痕落秋山万窍号【庄子齐物篇大块噫气其名为风是惟无作作则万窍怒号】红梨啄乌鹊残菊挂蠨蛸【诗东山云蠨蛸在户柳子厚诗庭除盛蓬艾隙牖悬蠨蛸】

佳人斗南北【集中有诗云故人南箕与北斗言离别也】美酒玉东西【酒杯名王荆公诗舞急锦腰迎十八酒酣金盏照东西】梦鹿分真鹿【列子曰郑人有薪于野者遇骇鹿御之击之毙之恐人见之也遽而藏之隍中覆之以蕉俄而遗其所藏之处遂以为梦焉顺咏其事傍人有闻者用其言而取之薪者之归不厌失鹿其夜真梦藏之之处又梦得之之主旦爽案所梦而寻得之遂讼而争之归之士师士师请二分之】无鸡应木鸡【庄子达生篇纪渚子为王养鬪鸡曰望之似木鸡矣异鸡无敢应者反走矣】

斲鼻昔常尔絶弦知者稀无人与争长惟有钓鱼矶【并见前注】

茵席絮剪茧枕囊收决明【杜诗阶下决明颜色鲜】南风入昼梦起坐是松声【梦中闻风起及觉乃松声也如楞严经云如重睡人其家有人捣练舂米其人梦中闻舂捣声别作他物或为击鼓或为撞钟宋玉高唐赋云俯视峥嵘不见其底虚闻松声】

半菽一瓢饮【项籍传卒食半菽论语顔子一瓢饮】悬鹑百结衣【荀子曰子夏家贫衣若悬鹑董京隐居白社以残缕絮帛为衣号百结衣杜诗敝衣何啻聯百结】萧条鬼不瞰【鬼瞰其室见前注】聊可与同归【扬雄逐贫赋其末云贫遂不去与我游息此用其意白乐天诗岁晚青山路白首期同归】

学似斲轮扁【见前注】诗如饭颗山【本事诗李白嘲杜甫诗饭颗山头逢杜甫头戴笠子日卓午借问年来太瘦生总为从前作诗苦】室中余一劒无气斗牛间【见前注】

次韵吉老寄君庸

何郎生事四立壁【见前注】心地高明百不忧【杜诗愿闻第一义回向心地初心地本出佛书杜诗又云吾知徐公百不忧】白眼醉来思阮籍【见前注】碧云吟罢对汤休【文选江文通挺休上人诗日暮碧云合佳人殊未来沙门惠休本姓汤】诸公着力书交上尺璧深藏价未酬空使君如巢幕燕将雏处处度春秋【燕之巢于幕上见左传乐府有凤将雏】

闻吉老县丞按田在万安山中

苦雨初闻唤妇鸠【左传昭四年申丰曰春无凄风秋无苦雨欧阳公诗天将阴鸣鸠逐妇鸣中林鸠妇怒啼无好音天雨止鸠呼妇归鸣且喜妇不亟还呼不已】红妆满院木蕖秋【木蕖即木芙蓉也亦名拒霜花韩柳皆有木芙蓉诗芙蓉亦曰芙蓉韩诗又云平铺红蕖盖明镜此言水芙蓉即荷花也】樽前不记崔思立应在诸山最上头【韩文有蓝田县丞厅壁记云博陵崔思立黜官再转而为丞兹邑老杜诗安得万丈梯为君上上头又诗东山气蒙鸿宫殿居上头】

次韵喜陈吉老还家二絶

公庭无事吏人休【日至休吏见前注】垂箔寒厅对奕秋【孟子云使奕秋诲二人奕】催织青笼篲白酒竹炉煨栗煮鸡头

夜寒客枕多归梦归得黄柑紫蔗秋小雨对谈挥麈尾【麈尾见前注】青灯分坐写蝇头【南史齐衡阳王巾箱五经蝇头细书】

再次韵答吉老二首

水宿风餐甚劳苦【文选升天行云风餐委松宿云卧恣天行谢灵运诗客游倦水宿风潮难具论】勉旃吾子富春秋【汉杨惲书愿勉旃毋多谈富春秋见前注】我愧疲民欲归去麦田春雨把锄头【传灯录传大士颂云空手把锄头步行骑水牛山谷屡写此颂】贤劳王事一归休【孟子此莫非王事我独贤劳也】霜落园林失九秋想得君家乌鹊喜蛛丝萦绕玉搔头【李固传搔头弄姿注引西京杂记武帝过李夫人就取玉簪搔头西京杂记目矚得酒食灯火花得钱财乾鹊噪而行人至蜘蛛集而百事喜】

太和奉呈吉老县丞

山拥鸠民县【左传隐八年君释三国之图以鸠其民君之惠也注云鸠集也】江横决事厅土风尊健讼吏道要繁刑觥觥今无种【觥胡瓦切?除倚切此两姓今无人矣按後汉儒林注丹传时中山觥阳鸿亦以孟氏易教授有名又按姓氏书?姓古有善听者?俞汲黯传公以此无种矣】蒲卢教未形【礼中庸云夫政也者蒲卢也注云蒲卢蜾蠃谓土蜂也诗云螟蛉有子蜾蠃负之螟蛉桑虫也蒲卢取桑虫之子化为已子政之于民亦然释文云尔雅蜾蠃蒲卢之今细腰蜂】里多齐矚氏【元注云矚氏汉书音闲而今济南田家有此姓音谏】材谢宋庖丁【庖丁庄子不言宋当考】令尹三年课斯人万物灵【泰誓曰惟人万物之灵】吾方师岂弟僚友助丹青【丹青谓缘饰吏事也杨子或问圣人之言炳若丹青】

次韵知命永和道中【知命名叔达】

灵骨閤金鑱【续玄恠录延州有妇人少年子悉与之狎昵数岁而没葬于道左大历中有胡僧敬礼其墓曰此乃大慈悲喜舍即鑱骨萨萨也衆开墓视其骨鈎结如鑱状世传观音化身所谓金沙滩头马郎妇类此】梵宫超玉绳【选诗玉绳低建章玉绳星名言超出星辰之上】道人住香火独先开净行【柳子厚诗始悟三空门华堂开净域东坡云酌茗开净筵山谷处独先开净行其意一也又山谷为惠林冲禅师烧香颂西瞿耶尼开净】呼船久无人月沉河汉倾【杜诗七星在北户河汉声西流谓天河也】虚舟不受怒故在蓼滩横【庄子山木篇方舟而济于河有虚舟来触舟虽有褊心之人不怒】

次韵吉老知命同游青原二首

洗鉢寻思去【传灯录行思禅师传师得法于曹溪住吉州青原山静居寺六祖将示寂有沙

弥希迁问曰和尚百年後希迁当依附何人祖曰寻思去及祖顺世迁每於静处端坐第一坐曰汝有师兄行思和尚今住吉州汝因缘在彼师言甚直汝自迷耳迁便礼辞直诣静居】论诗匡鼎来【见前注】醵窥锡处井【如罗浮山卓锡泉也梁景泰禅师居此山病无水师卓锡于地泉涌数尺自是得井唐子西作记又如舒州三祖山飞锡泉宝公自金陵飞锡而至以相山谷寺基泉为之涌出见同安志】鱼泳钓时台垂足收亲子【师既付法希迁垂一足迁礼拜寻辞往南岳即南岳石头和尚也】存身亘劫灰【汉武帝穿昆明池悉是灰有外国胡僧曰此天地劫灰之余见高僧传李白诗留欢若可尽劫石尽成灰】僧雏手金钥一为道人开【杜诗不寝听金钥】

至人来有会吾道本无家【庄子至人无已贾谊鹏赋至人遗物独与道俱】阅世鱼行水遗书鸟印沙【见前注】斋盂香佛饭法席雨天花【并见维摩经】时有清谈胜还同叹永嘉【晋书不意永嘉之末复闻正始之音】

次韵知命入青原山口

坑路羊肠绕【魏武苦寒行羊肠坂诘曲车轮为之摧注太行羊肠在太原】稻田碁局方林间塔余寸风外竹斜行吠客犬反走惊人鸟坌忙山形与祖印岑绝两相当【传灯录中华初祖达磨传慧可曰诸佛法印可得闻乎又云内传法印以契证心汉卫霍领兵与匈奴杀戮常相当白乐天诗牕与竹相当】

次韵吉老游青原将归

欣欣林臯乐【庄子知北篇山林与臯壤与使我欣欣然而乐与】赏心天际翔【文选谢灵运诗序赏心乐事又诗灵境信淹留赏心非徒设殷重文诗云天亦辽亮时与赏心遇】清樽鱠鲂鲤【诗六月云烹鳖脍鲤采绿云其钓维何维鲂及鲤】朱果实圆方【谢朓诗夏李沈朱实文选南都赋珍羞琅玕充溢圆方王仲宣诗嘉肴充圆方】罢罢听疎雨【孟浩然诗疎雨滴梧桐】衾寒梦国香【左传宣三年初郑文公有贱妾曰燕姑梦天使与已兰曰余为伯儵余而祖也以是为而子以兰有国香人服媚之如是既而文公见之与之兰而御之生穆公名之曰兰】雨余山吐月【杜诗四更山吐月】的砾满帘霜【上林赋明月珠子的砾江靡】展转复展转【诗展转反侧张籍宛转行云宛转复宛转忆忆更未央】锺鱼晓琅琅思归笑迎门儿女相扶将【古诗归来儿女笑迎门扶将出拜见前注】

喜知命弟自青原归

为吏困米盐【见前注】曲肱梦灵泉凉非调鼎手正觉荷鋤便【文选潘岳诗王生和鼎实渊明诗带月荷鋤归】在公虽勤苦【诗风夜在公】归喜叔山禅【庄子德充符篇鲁有兀者叔山无趾踵见仲尼知命山谷弟也足蹇故比之叔山】去我忽数日草虫傍牀煎【诗十月蟋蟀入我牀下乐天闻虫诗犹恐愁人暂得睡声声移近卧牀前】屋角鸟乌乐【见前注】行舆响檐肩【退之联句刈熟檐肩赧】包解分柿栗【老杜北征诗粉黛亦解包】儿女

閣樽前白紵绕祖塔【知命布衣也故称白紵鲍照集有白紵歌沈约有四时白紵歌思公塔见前次韵周法曹游青原寺】香?青原烟玄珠一百八【庄子象罔得玄珠以言数珠也】夜纫湘缕穿【内则纫箴请补缀纫女陈反湘当作湘按说文緗帛浅黄色也】高林风落子老僧选霜坚【杜诗叶里松子僧前落】袖中出新诗山水含碧鲜五言吾老矣佳句付惠连【谢灵运诗山水含清晖惠连灵运弟也事见南史本传】

寄张宜父

建德之国有佳人【庄子山木篇市南宜僚谓鲁君曰南越有邑焉名为建德之国其民愚而朴少私而寡欲知作而不知藏与而不求其报猖狂妄行乃蹈乎大方吾愿君去国捐俗与道相辅而行庄周盖寓言也文选江文通杂拟诗云幸游建德乡亦用此事而池州有建德县张宜父乃此县人耶】明珠为佩玉为衣去国三岁阻音徽【诗太姒嗣徽音笺云徽美也】所种桃李民爱之【见前过太湖僧寺得宗汝为寄山蘋白酒寄答诗注】射阳城边春烂漫【楚州山阳县本汉弋阳县地张宜父当是建德人而仕于山阳时已解去】柳暗学宫鸟相唤追随裘马多少年【老杜壮游诗放荡齐赵间裘马颇清狂退之云从兹富裘马宁复茹藜蕨肥马轻裘本出论语】独忍长饥把书卷【秦韬玉贵公子行却笑儒生把书卷学得顔回忍饥面】读书万卷不值钱【一作笔有神杜诗读书破万卷下笔如有神汉灌夫传夫曰平生毁程不识不直一钱此用其字太白诗吟诗作赋北窗里万言不值一杯水此用其意】逐贫不去与忘年【一作交亲扬雄有逐贫赋庄子忘年忘义称衡始弱冠孔融年四十为忘年友南史江总传与张纘等为忘年友杜诗清谈见滋味尔辈可忘年】虎豹文章被禽缚【易大人虎变其文炳也君子豹变其文蔚也】何如达生自娱乐【庄子有达生篇】

送彦孚主簿【彦孚姓黄故有吾宗之语】

斯文当两都江夏世无双【後汉黄香传京师号曰天下无双江夏黄童】叔度初不言汉庭望风降【黄宪传宪字叔度论曰黄宪言论风旨无所传闻然士君子见之者靡不服深远去疵吝】中间眇人物【王逸少帖云当今人物眇然而艰疾若此令人短气】潜伏老崆峒【元注云许江切】本朝开典礼【易系辞云观其会通以行其典礼】槲朴作株桩【大雅槲朴文王能宫人也芄芄槲朴薪之槩之诗人谓小木可为薪山谷以为可作株桩皆言无弃材也若子吾处也若槩株拘退之诗寥豁斲株槩又云槩伐栢与桩】世父盛文藻【集中有丰城诗自注云有世父长善石堤记韩退之荐士诗云国朝盛文章本出宋玉神女赋其盛饰也则罗纨绮绩盛文章】如陆海潘江【鍾鏐诗品云陆才如海潘才如江】三战士皆北【管仲曰吾尝三战三北鲍叔不以我为怯今云士皆北言其胜也】韞弓锦韬杠【檀弓下射之毙一人韞弓毛诗之子于狩言韞其弓尔雅素锦绸杠注旗之竿】白衣受传诏短命终萤牖【论语顔回不幸短命晋车武子家贫不常得油练囊盛数十萤火以照书退之诗安居守萤牖】梦升卧南阳耆旧无两龕【谓龕德公及其从子士元也见後汉德公传及蜀志龕统传】空鑱欧阳铭松风悲陇洸【音双退之诗籍乃陇头洸又有洸吏诗亦音间江切欧阳文忠集有黄梦升墓志铭云讳注】四海羣从间尔来颇琤【士耕切】淙【士江切退之聯句切音玉淙琤淙两音】主簿吾宗秀【李邕诗吾宗固神秀体物写谋长】其能任为邦【论语

善人为邦百年】躯干虽眇小【杜诗子虽躯干小老气横九州】勇沉鼎可扛【项籍传力扛鼎】择师别陈许【孟子云陈相见许行而大悦尽弃其学而学焉】取友观羿逢【孟子云逢蒙学射於羿尽羿之道思天下惟羿为愈已於是杀羿又云其取友必端矣】折腰佐髯令【陶潜诗不能为五斗米折腰】邑讼销吠彪【诗无使彪也吠】时邀府中饮下箔蜡烧缸【杜诗铜盘烧蜡光吐白谢希逸宋妃诮金缸煖兮玉座寒】红裳笑千金【异闻实録杨缙于昭应寺读书每见一红裳女子验之乃经幢中灯列女传楚成王夫人郑瞽初成王登台瞽直行不顾王曰顾吾与汝千金嫫不一顾鲍明远诗千金顾笑买芳年太白诗美人一笑千黄金】清夜酒百缸同僚有恶少嘲谑语乱咙【管子曰四民杂处则其言咙注咙乱也退之诗子言得无咙】君但隐几笑【庄子隐几而坐】诸老叹敦彪【左氏成十六年传曰民生敦彪】况乃工朱墨【见前注】气和信甚缸【庄子德厚信缸注云醵实貌】持此应时须【杜诗窦氏检察应时须】十年拥麾幢【退之诗不令见麾幢】相逢常鞅掌【诗北山或王事鞅掌】衙鼓趋【诗灵台鼙鼓逢逢】簿书败清谈【王戎传阮籍曰俗物已复来败人意此摘其事】汗顔吏枌枌【子虚赋枌金鼓退之诗扶机导之言曲节初枌枌音窻】临分何以赠【退之云临分不汝诳有路即归田】要我赋兰茝【子虚赋茝藙蘼芜】黄华虽衆笑【庄子天地篇大声不入於里耳折杨皇华则嗑然而笑注折扬黄华古之俗中小曲乐府解题有折扬柳黄华子舒元舆悲剡溪古藤文使周南风骨折入于杨柳黄华中李白诗折杨黄华合流俗晋君听琴枉清角】白雪不同腔【阳春白雪歌见前寄李师载诗注】野人甘芹味【文选嵇叔夜絶交书云野人有快炙背而美芹子者欲献之至尊亦已疏矣事见列子】敢馈厌羊羴【退之云酒壶缀羊羴】顾予百短拙【百拙见答魏道辅诗注】饱腹戢降【音麓】肛【许江切退之诗连日挟有形躯顿降肛】惟思解官去一丘事耕【音窻集韵云不耕而种】君当取富贵钟鼓罗击撞【汉田蚡传前堂罗钟鼓立曲旃退之诗金石日击撞】伏藏鼪鼯径【庄子徐无鬼篇逃虚空者藜藿柱乎鼪鼯之径闻人足音跂然而喜矣】犹想足音跂【庄子音义云跂巨恭曲恭反又苦江反】

寄余干徐隐甫【余干县属饶州】

江行长遄回【楚辞遄吾道兮洞庭又云固遭回而不息】风水忧索米【东方朔传无令但索长安米】相逢解人颐【匡衡传匡说诗解人颐】高士徐孺子【後汉徐穉字孺子】鸬鹚葭苇间煮茗当酌醴【诗以御宾客且以酌醴乐犬诗聊将茶代酒】夜船饷蒸鹅白髮厌甘旨【礼记内则慈以旨甘】东江始分风【庐山庙有神分风送客舟见神仙传】苔网馈百纸【後汉蔡伦传造意用树肤麻头及敝布鱼网以为纸】遣兵夜赋诗月冷石齿齿【退之罗池庙碑桂树团团兮白石齿齿】别来星环天【左传襄九年是为一终一星终也注岁星十二岁一周天韩文公诗天星回环数才周谓周岁也】再见艳桃李【退之诗偶逢明月曜桃李选诗艳阳桃李节】寄声良劳勤【集中有答宗汝为诗寄声甚劳苦即良劳勤也赵广汉传寄声谢我张耳传劳苦如平生欢师古曰劳苦相劳问其勤苦也】报我阙双鲤【并见前注】但闻佳邑政桯械生菌耳【莲经普门品云或囚禁枷鎖手足被桯械】颇闻延诸儒破讼作诗礼顾予白下邑【山谷先有诗黄绶今为白下令自注云太和县古白下按寰宇记太和汉为庐陵县也隋改为太和唐贞元三年移归白下驿西置即今治也】庭聚雨前蚁【李义山诗閤若雨前蚁多于秋後蝇义山以言洞庭鱼山谷以言县庭人聚】珥笔诵汉章

锥刀争未已【珥笔锥刀见前注】初无得民具【周礼太?一曰牧以地得民二曰长以贵得民言得民者九】名实正尔尔【尔尔魏晋间语也崔琰传生女尔尔阮咸传聊复尔尔】愿闻庖丁方江湖天到水遥知解千牛【庖丁解牛见前注】袖手笑血指【退之祭柳子厚云不善为斲血指汗颜巧匠旁观缩手袖间】书来悦垂教改事从此始【左传宣十二年不泯其社稷使改事君退之诗君其务赉过我亦请改事】

奉答李和甫代简二絕句

山色江声相与清【杜诗湖水林风相与清】卷帘待得月华生【欧阳公歌曲云栏干倚遍待得月华生】可怜一曲并船笛说尽故人离别情梦中往事随心见醉里繁华乱眼生【太白诗不知繁华子扰扰何所迫】长为风流恼人病不如天性总无情

贈王环中

丹霞不蹋长安道【传灯録丹霞天然禅师初习儒学将入长安应举方宿逆旅偶一禅客问曰仁者何往曰选官去客曰选官何如选佛遂直造江西见马大师】生涯萧条破席?囊中收得刼初铃【宝积经云善顺菩萨得刼初特间浮金铃于四衢中高声言此舍卫中谁最贫穷当以此铃而施与时有耆旧最胜长者云我于此城最为贫穷可施于我菩萨曰汝非贫者有波斯匿王最为贫者而施与之今齎此铃愿以相奉复说偈言若人多贪求积财无厌足如是狂乱者名为最贫人王闻斯语内怀慙愧曰仁者汝虽善劝我有未信为汝自说为有证乎答曰汝不闻耶如来至真等正觉当证大王是贫穷人王言我愿相与往见如来于是善顺菩萨说偈遥请如来从地涌出尔时世尊告言大王当知或有于法善顺贫穷王当富贵或有于法王为贫穷善顺富贵所以者何身登王位于世自在王为贵贵善顺贫穷勤特梵行乐特尸罗善顺富贵王为贫穷】夜静月明狮子吼【传灯録释迦牟尼佛生兜率天分手指天地作狮子吼声】那伽定後一炉香【译梵曰那伽此云龙也】牛没马回观六道【牛头没马头回曹溪镜里絶尘埃山谷喜书此偈传灯録宝志十赞云轮回六道不停结】耆域归来日未西一锄识尽婆婆草【高僧传耆域天竺人神奇任性迹行不常且善医见本传】

戏和于寺丞乞王醇老米

君不见公车待诏老诙谐几年索米长安街【谓东方朔并见前注】君不见杜陵白头在同谷夜提长鑿掘黄独【老杜集云乾元中寓居同谷县作歌七首其一云长鑿长鑿白木柄我生托子以为命黄独无苗山雪盛短衣数挽不掩胫山谷云往时儒者不解黄独义改为黄精学者承之以予考之盖黄独是也本草赭魁肉白皮黄巴汉人蒸食之江东谓之土芋江西谓之土卯蒸煮食之类芋魁】文人古来例寒饿安得野蚕成茧天雨粟【汉光武纪野蚕成茧被于山阜淮南子昔者苍颉作书而天雨粟史记天雨粟鬼夜哭】王家圭田登几斛【孟子卿以下必有圭田圭田五十亩】于家买桂炊白玉【战国策苏秦曰使臣食玉炊桂山谷前集又有诗云薪桂炊白玉】

答永新宗令寄石耳【永新与太和皆吉州属邑】

饥欲食首山薇【史记伯夷传义不食周粟隐于首阳山采薇而食之】渴欲饮颍川水【庄子让王篇故许由娱于颍阳後汉逸民传序云尧称则天不屈颍阳之高注云颍阳谓巢许陆士衡猛虎行渴不饮盗泉水热不息恶木阴太白诗有耳莫洗颍川水有口莫食首阳薇】嘉禾令君清如冰【文选白头吟清如玉壶冰寰宇记永新县西北有禾山】寄我南山石上耳筠笼动浮烟雨姿淪汤磨沙光陆离【庄子云疏淪而心澡雪而精神上林赋牢落陆离烂漫远迁】竹萌粉饵相发挥【尔雅笋竹萌礼记内则糗饵粉酏刘梦得杨柳枝词云桃红李白皆夸好须得垂杨相发挥】芥姜作辛和味宜【礼记王制中国夷蛮戎狄皆有安居和味宜服】公庭退食饱下筋【诗退食自公晋书无下筋处】杞菊避席遗萍蘂【陆龟蒙有杞菊赋韭萍蘂见石崇传借使孝经曾子避席字】鴈门天花不复忆【代州鴈门郡五台山有天花草】况乃桑鹅与楮鸡【桑鹅未详东坡和陶诗云老楮生树鸡当是黄耳菌之属】小人藜美亦易足嘉蔬遣饷荷眷私吾闻石耳之生常在苍崖之絶壁【老杜挂君高堂之素壁此用其句律】苔衣石腴风日炙【苔衣石髮见前注】扪萝挽葛采万仞【文选谢灵运诗薛萝若在眼又云葛弱岂可扪】仄足委骨豺虎宅【庄子侧足而垫之及黄泉】佩刀买犊劔买牛【汉龚遂传民有带持刀劔者使卖劔买牛卖刀买犊曰何为带牛佩犊】作民父母今得职【赵广汉传盛制豪强小民得职注云职常也】闵仲叔不以口腹累安邑【後汉书太原闵仲叔世称节士客居安邑日买猪肝一片屠者或不肯与安邑令闻敕吏常给焉仲叔曰闵仲叔岂以口腹累安邑耶】我其敢用鲑菜烦嘉禾【鲑菜见前注】愿公不复甘此鼎免使射利登嵯峨【文选吴都赋富中之氓贷殖之选乘时射利财丰巨万司马相如赋垒入曾宫之嵯峨】

赠朱方李道人

颧骨横穿寿门过年比数珠剩三颗【传灯録赵州从谏禅师传俗寿一百二十岁尝有人问师年多少师云一穿数珠数不足】横吹铁笛如怒雷国初旧人惟有我【刘禹锡与歌者米嘉荣云旧人惟有我米嘉荣】

题前定録赠李伯牖二首

五贼追奔十二宫【维摩经云乐离五欲乐观五阴如怨贼五阴即多心经五蘊皆空也色受想行识是为五阴东坡诗君知五蘊都是贼十二宫即十二辰也】白头寒士黑头公【晋王珣与谢玄俱为桓温所重温曰王掾当作黑头公】明朝一饭先书籍【前定録韩晋公滉在中书尝召一吏不时至将撻之吏曰某不幸兼属阴司主三品以上食料公曰若然吾明日当何食吏请疏于纸明旦既对适太官进饈糜上以半赐公食之美又赐焉退而腹胀进橘皮汤夜啗浆水粥及旦视其书皆如其说因问以人间所食皆有籍耶对曰然三品以上日支五品旬支六品至九品季支庶人岁支】安用研桑作老翁【班固宾戏研桑心计于无垠研计然桑桑宏羊】

万般尽被鬼神戏看取人间傀儡棚【乐府杂录傀儡起汉平城之围陈平访知阼氏妬忌造木偶运机关舞埤间阼氏望见谓是生人虑下城冒顿必纳之遂退军後翻为戏旧唐书乐志云又有窟儡子等戏】烦恼自无安脚处从他鼓笛弄浮生【传灯录梁宝志十赞云衆生身同太虚烦恼何处安脚】

静君寺上方南入一径有钓台气象甚古而俗传谬妄意尝有隐君子渔钓其上感之作诗【吉州青原山静居寺行思禅师道场】

避世一丘壑【论语且而与其从辟人之士也岂若从辟世之士哉渔钓于一壑栖迟于一丘见班固叙传】似渔非世渔【柳子厚饶娥碑世渔鄱水】独吟嘉橘颂【屈原九章有嘉橘颂老杜诗向来嘉橘颂谁欲计蓴羹】不遗子公书【汉陈咸传予陈汤书曰即蒙子公力得入帝城死不恨】笋蕨园林晚丝缙岁月除【诗其钓维何维丝伊缙】安知冶容子【易系辞曰冶容诲淫】红?泣前鱼【文选阮嗣宗诗昔日繁华子安陵与龙阳注云说苑曰安陵纒得幸於楚恭王云云战国策云龙阳君钓十余鱼而泣下王问之对曰臣始得鱼甚喜後得益多而遂欲弃前所得也今臣得拂枕席爵至人君走人於庭避人於途四海之内美人甚多矣闻臣得幸於王褰裳而趋王臣亦曩之所得鱼也亦将弃矣陆韩卿诗云子瑕矫後驾安陵泣前鱼注云泣鱼是龙阳非安陵】高至言筑亭于家圃以奉亲总其观覧之富【退之南山诗崎岖山轩昂始得观覧富】命曰溪亭乞余赋诗余先君之敝庐【左传犹有先人之敝庐在】望高子所筑不过十牛鸣地耳【释氏书五里为一牛鸣王荆公诗潮沟直下两牛鸣十亩连漪一草亭又诗京岷城南隐映深两牛鸣地得禅林】故余未尝登?而得其胜处

逸人生长在林泉【太白诗过憇悲逸人岩居陵丹梯】更筑亭臯名意在【上林赋亭臯千里靡不被筑】明月清风共一家【传灯录张掘颂云凡圣舍灵共我家南史谢朓传入吾室者但有清风对吾饮者惟当明月】全以山川为眼界【多心经无眼界无意识界】鸟度云行閱古今【太白诗人行明镜中鸟度屏风里易云云行雨施】溪滨木末聽竽簾【杜诗万簾真笙竽本出高唐赋纖条悲鸣声似竽簾】老夫平生行乐处【前汉杨惲传人生行乐耳】只今许公分一派【东坡集中文与可画竹记云传为徐州与可以书遗余曰近语士大夫吾墨竹一派近在彭城可往求之】

题息轩

僧开小檻笼沙界【金刚经以恒河沙数三千大千世界文选头陀老碑演勿照之明而鑒穷沙界李善注亦引金刚经】郁郁参天翠竹丛【老杜古柏行黛色参天二千尺】万簾参差写明月一家寥落共清风【万簾一家并见前注】蒲团禅板无人付【过禅板来过蒲团来见前注】茶鼎薰炉与客同【文选雪赋燎薰炉兮炳明烛】万水千山寻祖意归来笑杀旧时翁【僧贯休诗万水千山得得来祖师意见前】

题神移仁寿塔

十二观音无正面【僧伽至?淮尝卧贺跋氏家现十二面观音形其家欣庆遂舍宅焉即今寺也见宋僧传问十二面观音阿那面正见传灯录义玄禅师传】谁令塔户向东开【大医禅师示寂後明年四月八日塔户无故自开】定知四梵神通力【阿舍经曰世尊说四梵福若能补理故寺是谓二梵之福见初学记】曾借六丁风雨推【老君六丁符图云丁卯神司马卿丁丑神赵子玉丁亥神张文通丁酉神成文公丁未神石叔通丁巳神崔巨卿退之诗天官敕六丁雷电卜取将】蝇说冰霜如梦寐【庄子秋水篇井蛙不可以语於海夏虫不可以语於冰】鸚闻钟鼓亦惊猜【達生篇譬之若载鼙以车马乐鸚以钟鼓也彼又乌能无惊乎哉】从今不信维摩诘断取三千世界来【维摩经断取三千大千世界如陶家轮着右掌中掷过恒沙世界之外】

题海首座壁

骑虎度诸岭【天台丰干禅师居天台山国清寺尝诵唱道歌乘虎入松门衆僧惊畏见传灯录杜诗有时骑猛虎虚室使仙童】入鸥同一波【王立之诗话云方时敏言荆公云鸥鸟不惊之类如何作语则好故山谷有云入鸥同一波】香寒明鼻观【楞严经云世尊教我观鼻端白】日永称头陀【文选头陀寺碑李善曰天竺言头陀此言斗数盖斗数烦恼也白乐天诗百衲头陀任运僧】

题仁上座画松

偃蹇松枝隔烟雨知依定是岁寒材百年根节要老硬【传灯录岩头云德山老人一条脊骨硬如铁】将恐崩崖倒石来【太白诗崩崖转石万壑雷】

摩诘画

丹青王右辖诗句妙九州【唐王维传维字摩诘迁尚书右丞昼思入神至山水平远云势石色绘工以为天机所到学者不及也别墅在?川赋诗为乐】物外常独往【物外见前淮南子江海之士山谷之人轻天地细万物而独往】人间无所求?手南山雨?川桑柘秋胸中有佳处泾渭看同流【诗谷风注云泾渭相入而有清浊杜诗浊泾清渭何当分】

追忆余泊舟西江事次韵

江西泊舟後作【注云太和小船板上尘土中得此诗】莆田李才甫江水冥冥沙石阴一舸行尽春已深浪花緑蔓曳锦带短芦刺水抽玉簪饥鱼未沉波面筒小舫正横溪上风清辉濯净远山碧白鸟飞入苍烟丛

老大无机如汉阴【见前注】白鸟不去相知深【文选江文通诗豐豐玄思清胷中去机巧物我俱忘怀可以狎鸥鸟李太白鸣臯歌云白鸥兮飞来与君兮相亲】往事刻舟求坠剑【吕氏春秋察令篇楚人有涉江者其剑自舟中坠於水遽契其舟曰是吾剑之所从坠舟止从

其契者入水求之舟已行矣而剑不可求】怀人挥泪着【直略反】亡簪【韩诗外传孔子出游少源之野有妇人中泽而哭甚哀使弟子问焉妇人曰向者刈薪亡吾簪是以哀也弟子曰亡簪有何悲焉妇人曰非伤亡簪也盖不忘故也】城南鼓罢吹【去声】画筒城北归帆落晚风人烟犬吠西山麓鬼火狐鸣春竹丛【杜诗阴房鬼火青汉陈胜传丛祠中夜篝火狐鸣】

宫亭湖【寻阳志江州德化县东四十五里有彭蠡湖荆州记曰宫亭湖即彭蠡泽又谓之彭泽又谓之滙泽山谷癸亥解太和归途作盖归舟自湖滨入修江由武宁而至分宁耳】

左手作圆右手方【史记龟策传人虽贤不能左画方右画圆韩非子功名篇右手画圆左手画方不能两成北史儒林传刘炫少以聪敏见称强记博识莫与为俦左画圆右画方口诵目数耳听三事同举无所遗失玉川诗信手斫方圆规短一一中】世人机敏便可尔一风分送南北舟斟酌鬼神宜有此江津留语同济僧他日求我于宫亭吁嗟人盖自有口独为栾公不举酒【神仙传曰时庐山庙有神於帐中与人言语饮酒能令宫亭湖中分风船行者举帆相逢栾巴未到数日庙中神不复作声高僧传安清字世高自言前身已经出家有一同学多嗔高与诀云卿命过当受恶形我若得道必当相度灵帝末行过宫亭湖庙甚灵能分风送客商旅三十余船奉牲求福乃降祝曰船有沙门可呼卜高入庙请神出形乃出大蟒头不知尾之长短高向之胡语蟒悲泪如雨须臾还隐後人於山西泽中见一死蟒头尾数里今寻阳郡蛇村名曰蛇冈山两事相类故择其大槩两存之】栾公千岁湖冥冥白茅缩酒巫送迎【左传尔贡苞茅不入王祭不共无以缩酒】朱幡皂盖来托宿【杜诗东藩驻皂盖後汉舆服志中二千石二千石皆皂盖朱两幡】不聽灵君专此屋雄鸭去随鸥鸟飞【寻阳记曰周访与商人共入宫亭庙宿明起如厕见一白头翁访逐之化为雄鸭还船欲煮之商人争夺遂飞去】老巫莫歌望翁归贝阙珠宫开水府【九歌云紫贝阙兮珠宫灵何为兮水中文选海赋水府之内极深之处】雨栋风帘岂来处【滕王阁序画棟朝飞南浦云朱帘暮卷西山雨】平生来往湖上舟一官四十已包羞【山谷自言平生往来于此故经行诗难辨其岁月惟一官四十粗可考见山谷生于巳酉至元丰七年甲子恰四十岁时移监德平镇易否卦六三包羞】灵君如愿傥可乞【録异传庐陵欧明从贾客道经彭泽湖每以舟中所有投湖中後忽见一人来候明云青洪君感君前後有礼故要君必有重遗君勿取独求如愿尔明见青洪君求如愿使逐明去如愿者青洪君婢也明将归所愿辄得数十年大富】收此桑榆老故丘【桑榆见前注】

元丰癸亥经行石潭寺旧和栖蟾诗甚可可笑因削拊灭薰别和一章【癸亥及元丰六年是岁十二月自太和移德平经涂所作又按纂异一本云千里追奔两蜗角百年得意大槐宫梦回身卧行窻日院静鷗啼柿叶风世路侵人头欲白山僧笑我颊犹红壁间佳句多丘壑问讯髑髅聊攘蓬题云癸卯岁过宿石潭寺得前朝诗僧栖蟾长句我之岁行二十一重来读旧诗复用其韵按长历嘉佑八年岁在癸卯至元丰六年癸亥二十一年前诗盖嘉佑癸卯作】

千里追奔两蜗角【蜗角见前】百年得意大槐宫【见宿观音院诗注】空余祇夜数行墨【涅槃经云因本经以偈颂名祇夜译梵祇夜此云重颂】不见伽梨一臂风【译梵僧伽梨

三衣也】俗眼只如当日白我顔非复向来红【言俗人犹以白眼相视而吾亦老矣白眼见阮籍传】浮生不作游丝上即在尘沙逐转蓬【游丝转蓬见前注】

山谷外集诗注卷十三

山谷外集诗注卷十四

钦定四库全书

山谷外集诗注卷十四

宋 黄庭坚 撰

史 容 注

夜发分宁寄杜涧叟【山谷居双井隶分宁县】

阳关一曲水东流【渭城朝雨浥轻尘客舍青青柳色新劝君更尽一杯酒西出阳关无故人此王维送元二使安西诗遂为歌曲】灯火旌阳一钓舟【寰宇记旌阳山在分宁县东一里旌阳诗君曾游故以为名】我自只如常日醉【欧阳公别滁州云我欲秣如常日醉莫教弦管作离声】满川风月替人愁【杜牧诗蠟烛有心还惜别替人垂泪到天明王介甫絶句只有明月西海上伴人征戍替人愁】

题杜盘涧叟冥鸿亭【亭在庐山】

少陵杜鸿渐颇薰知见香【唐杜鸿渐传以宰相兼成都尹性畏怯无他远略而溺浮图道畏杀戮释氏书有解脱知见香】风流有诸孙结屋庐山阳藉交游侠窟【郭璞诗京华游侠窟杜诗萧条游侠窟】猎友少年场【汉书游侠传郭解以躯藉友报仇尹赏传安所求子死桓东少年场】光怪惊隣里收身反摧藏【收身见前注选诗扶风歌云抱膝独摧藏】江湖拍天流【退之诗海气昏昏水拍天】罗网盖稻粱安能衍衍饱【易渐卦饮食衎衎不素饱也】遂欲冥冥翔【见前注】畏影走万里不如就阴凉【见前注】亭东亭西渺烟水稻田衲子交行李【稻田衲见和稚川诗注又僧祇律云佛住王舍城帝释石窟前经行见稻田畦畔分明语阿难过去诸佛衣相如是从今依此作依相王摩诃诗乞饭从香积裁衣学水田左传若舍郑以为东道主行李之往来共其乏困】古灵庵下倚寒藤莫向明窗钻故纸【古灵禅师云钻他故纸去】

过家

络纬声转急【炙毂子杂録云莎鸡古今注一名促织一名络纬一名蟋蟀促织谓其声鸣如急织也络纬谓其鸣如纺绩织纬也】田车寒不运儿时手种柳上与云雨近舍傍旧佣保【司马相如传与佣保杂作】少换老欲尽宰木郁苍苍【宰木见前注】田园变畦畛【周礼遂人沟上有畛】招延屈父党劳问走婚亲归来翻作客【唐刘长卿诗旧业今已无归来反作客】顾影良自哂一生萍托水【刘伶酒德颂俯观万物扰扰焉如江海之载浮萍】万事雪侵鬓夜阑风陨霜【陨霜见前注】乾叶落成阵灯花何故喜【杜诗灯花何太喜酒绿正

相亲】大是报书信亲年当喜惧【见论语】儿齿欲毁龋【周礼司厉未龋者不为奴注毁齿也男八岁女七岁初观切】系船三百里去梦无一寸

上冢

自公返蓬茆【诗自公退食礼记茆门圭窳蓬户瓮牖茆家语作茆】税驾上邱垄【李斯传吾未知所税驾也後汉岑彭传有诏过家上冢】霜露此日悲【祭义曰霜露既降君子履之必有凄怆之心】松楸千年拱【退之诗深思罢官去毕命依松楸】养雏数毛羽初不及承奉康州断肠猿【山谷父庶字亚夫尝摄康州世说新语桓公至三峡有得猿子者其母绿岸哀号遂跳上船即绝破视其腹肠寸寸断李白赠武谔云吾爱子伯禽在鲁许为冒胡兵致之其诗云爱子隔东鲁空悲断肠猿】风枝割永痛【一作风树终日痛家语邱吾子曰树欲静而风不停子欲养而亲不待】少年不如人【左传僖三十年烛之武曰臣之壮也犹不如人今老矣无能为也已】登士无前勇髮疎齿牙摇【韩文而髮苍苍而齿牙动摇】鲸波怒号汹【徐陵江行鲸鲵涌波鼉蛟作浪】愿为保家子【左传昭二年非保家之主也】敢议世轻重称觞太夫人鱼菜贍庖供【岑彭传大长秋以朔望问太夫人起居退之诗呼奴具盘餐飮餽鱼菜贍】

明叔知县和示过家上冢二篇复次韵【郭明叔名知章治平二年进士元丰中知分宁县诗中云去国二十年盖自太和还家赴德平所作】

敝邑荷佳政【文选曹子建书在彼自有佳政】耕桑及时运【渊明有时运诗】令君平生欢远别喜相近【汉邹阳传而求亲近于左右】吾友徐光禄死战万事尽【徐禧熙宁五年与沈括等建议城永乐城成虏骑围之禧及李舜举李稷阖城俱没】不见东陵侯惟见瓜连畛【阮嗣宗诗见前注】且当置是事椎牛会宾亲百年共如此破涕作嘲哂【破涕见都下见八叔父诗注又李白送侄端序申悲道旧破涕为笑】枯荷野塘水照影惊颜鬓功名黄粱炊成败白蚁阵【吕公邯郸道上炊黄粱事已见钱薛乐道诗注此事与南柯事相类皆出异闻集大槩言淳于棼梦入槐安国其王妻以女使为南柯太守十年有檀罗国来伐王命棼征之败绩及觉见蚁穴云云山谷多以此二事为一事虽不同其义一也又按古今五行记後魏显宗事有黑蚁与赤蚁鬪赤蚁断头而死东魏孝靖帝时邺下有黄蚁与黑蚁鬪黄蚁尽死】少时无老境身到乃尽信【曲礼六十曰耆指使音义曰耆至也至老境也渊明诗尝闻长者言掩耳每不喜奈何五十年忽已亲此事盖用此意】此来见抱子【诗云亦既抱子】别日多未龋夜阑如梦寐寒烛泣余寸【杜诗夜阑更秉烛相对如梦寐】

女萝上杉松【尔雅唐蒙女萝菟丝诗莛与女萝施于松柏文选古诗与君为新婚菟丝附女萝注引诗传云女萝松萝也草木疏曰今松萝蔓松而生菟丝蔓联草上与松萝殊异】野葛蔓畦墉【诗葛生蒙楚藪蔓于野】蛛丝网祠屋芝菌生画拱【老杜新楼成诗云朱拱洪浮细细轻太白登扬州西灵塔云霞运绣拱张】去国二十年雪涕夙严奉【杜甫八哀不知万乘出雪涕夙悲鸣李白诗有言不可道雪涕惜兰芳】更历饱艰难【左传楚子入居于申曰晋侯在外其九年矣而果得晋国险阻艰难备尝之矣】抑搔知痒痛【内则问衣燠寒疾痛】

苛痒而敬抑搔之】闻道下士笑【老子云下士闻道大笑之】转物大人勇【楞严经一切衆生从无始来迷已为物失于本心为物所转若能转物即同如来】平生随风波归来梦犹汹特此寸草心【孟郊诗谁言寸草心报得三春晖】负荷九鼎重【史记平原君传使赵重于九鼎大吕】柔嘉无牛羊保身以为供【诗仲山甫之德柔嘉维则又云既明且哲以保其身供为供养其母也汉班婕妤传求供养太后长信宫退之作欧阳詹哀辞其序云?父母老矣舍朝夕之养以来京师其心将以有得而归为父母荣也?在侧虽无离忧其志不乐也?在京师虽有离忧其志乐也所谓以志养志者欤其词曰以志为养兮何有牛羊又按晋周顗母络秀传尝置酒举觞赐三子曰吾本渡江托足无所不谓尔等并贵列吾目前嵩起曰恐不如尊旨伯仁志大而才短非自全之道嵩性杭直不容于世惟阿奴碌碌当在母目下耳保身盖用此事】

次韵郭明叔长歌【山谷真蹟云谨次韵上答知县奉议惠赐长歌邑子黄庭坚再拜上其间不同者何如高阳酈生醉落魄作都不如蚓食而蝎跽蝎跽作蝎跽自可老斲轮作自奇老斲轮公直起作公且起黄花零落作零乱此帖见藏泉江刘廌家亦太和还家时作】

君不见悬车刘屯田骑牛涧壑弄潺湲【楚辞观流水之潺湲白乐天诗攀芳蹋翠弄潺湲】八十唇红眼点漆金锤举酒不留残【谓刘涣凝之也详见送刘道纯诗注晋杜乂传眼如点漆庾信诗饮酒那得留残】君不见征西徐尚书为国捐躯矢石间【徐禧字德占洪州分宁人与山谷同乡死于永乐之祸已见过家上冢诗注赠吏部尚书諡忠愍文选曹子建诗云谁言捐躯易杀身良独难】龙章凤姿委秋草【稽康事见前注唐李揆传龙章凤姿士不见用驪头鼠目子乃求官耶】天马长辞十二闲【周礼校人曰天子十有二闲马六种王平甫诗海鹏未击三千里天马须归十二闲】何如高阳酈生醉落魄长揖辍洗惊龙颜【酈食其传陈留高阳人落魄无衣食业为里监门沛公略地陈留麾下骑士适食其里中子从容言食其食其入谒沛公方踞牀令两女子洗食其长揖不拜沛公辍洗起衣谢之汉高纪隆準而龙颜】丈夫当年倾意气【太白豪士歌意气相倾山可移】安用蚓食而蝎跽【孟子夫蚓上食稿壤蝎音□又音曷犹蛭也】古人已作泉下土风义可想犹班班【後汉五行志童謡曰车班班入河间】郭侯忠信如古人荐书飞名上九閼【楚辞虎豹九閼啄害下人】诗书自可老斲轮【轮扁行年七十而老斲轮见庄子】智略足以解连环【庄子言惠施之辩曰连环可解也】铜章屈宰山水县【铜章见前注退之诗出宰山水县读书松桂林】友声相求不我顽【诗求其友声】鹏翼垂天公直起【庄子其名为鹏翼若乘天之云】燕巢见社身思还文思舜禹开言路【杜牧诗文思天子复河湟字本出尧典思息嗣反又如字】即看承诏着豸冠【汉官仪御史四人持书皆法冠一名柱後一名獬豸冠】尚趋手板事直指【手扳见前注隼不疑传暴胜之为直指使者】少忍吏道之多艰【汉薛宣传吏道以法令为师】黄花零落一尊酒别有天地非人寰【太白诗问君何事栖碧山笑而不答心自闲桃花流水窅然去别有天地非人间】

咏清水岩呈郭明叔【并序】

清水岩号为天下胜处去县庭才二十里一山空洞如覆青玉盎也寒泉在其间甚壮急至岩

口伏流入石鼻中岩下有石钟鼓磬其声清越不敝袞袞跑跑能警动人世间金革声亦不足道也岩前平衍略可坐千人不审旌旆尝因公事一游否【山海经河水其源浑浑泡泡注云水潰涌之声】

尝闻清水岩空洞极明好虎狼迁部曲【仙传舍遗郭文字文举隐余杭天柱山虎尝驯扰于左右亦可抚而牵之文出山虎必随焉俛首随行如羊犬耳晋书有传事亦略同李广传行无部曲行陈】钟鼓天擊考【唐风子有鍾鼓弗鼓弗考注考击也释文曰鼓本或作击】云生卧龙石水入炼丹竈【李白谒老君庙诗流沙丹竈灭関路紫烟沉】有意携管弦【李白诗明朝有意抱琴来】山祇应洒扫【文选顔延年诗山祇蹕峤路李善曰山祇山神也】

次韵清水岩

西安封域中【太平寰宇记洪州分宁县云西安县故城在县西二十里古今志云汉献帝建安中置隋开皇元年废山谷所君双井隶分宁且在邦域之中矣见论语】清水岩泉好金堂茂芝术【晋许迈传采药于桐庐饵术涉三年移入安西山登岩茹芝遗王羲之书曰自山阴南至安多有金堂玉室仙人芝草左元放之徒汉末得道者多在焉】仙吏书勲考【刘向列仙传刑子者上山山上有台殿宫府仙吏侍卫】桃源人已往千古遗井竈【陶渊明归田园诗云徘徊丘壑间依依昔人居井竈有遗处桑竹残朽株借问采薪者此人皆焉如桃源事亦见渊明集已见前注】双凫能来游俗子迹可扫【双凫谓郭令也事见前注诗岂弟君子来游来歌老杜雨过苏端云诸家忆所历一饭迹便扫又诗苦之大药资山林迹如扫】

题章和甫钓亭放言

斩木开亭却倚石壁寒潭百雷【文选西京赋复陆重阁转石成雷】古木千尺观鱼乐而相忘【鱼乐见庄子】聽鸟啼而自得去而之京洛之间数年犹常梦嶄岩之石【家语孔子谓弟子曰违山十里螻蛄之声尚犹在耳】

铜官县望五松山集句【西清诗话云集句自国初有之至石曼卿始大着下策诗云一生不得文章力欲上青云未有因圣主不劳千里召嫦娥何惜一枝春凤凰诏下虽沾命豺虎丛中立身啼得血流无用处着朱骑马是何人至元丰间王荆公益工於此人言起自公非也】

北风无时休【退之诗十月阴气盛北风无时休老杜诗烈风无时休】崩浪聒天响【渊明诗崩浪聒天响长风无息时】蛟鼉好为祟【老杜诗舟楫无根蒂蛟鼉好为祟】此物俱神王【老杜诗天寒大羽猎此物俱神王】我来五松下【太白游五松诗我来五松下】白髮三千丈【太白云白髮三千丈缘愁似个长】松门闭青苔【太白诗】惜哉不得往【退之诗惜哉不得往岂谓吾无能】今日天气嘉【渊明诗今日天气嘉清吹与鸣弹】清絶心有向【老杜云殊姿各独立清絶心有向】子云性嗜酒【渊明云子云性嗜酒家贫无由得】况乃气清爽【老杜八哀诗】此人已成灰【太白诗吟咏思管乐此人已成灰】怀贤盈梦想【太白诗日夕听猿愁怀贤盈梦想】衣食当须几【渊明诗衣食当须几力耕不吾欺】

吾得终疎放【老杜诗中原未解兵吾得终疎放】弱女虽非男【渊明诗弱女虽非男慰情良胜无盖山谷时未有男也按遗文有乞奏补侄朴状云今过明堂大礼臣子相才六岁明堂乃元佑四年逆数至元丰七年岁甲子相始生前一年十二月自太和移德平集句盖经途所作】出处同世网【老杜八哀诗】搔背牧鸡豚【太白诗闲时田野中搔背牧鸡豚】相见得无恙【退之诗怜我窜逐归相见得无恙】

自咸平至太康鞍马间得十小诗寄怀晏叔原并问王稚川行李鹅儿黄似酒对酒爱新鹅此他日醉时与叔原所咏因以为韵【咸平太康两县皆隶开封府】

诗入鸡林市【唐白居易传最工诗当时士人争传鸡林行贾售其国相率篇易一金】书邀道士鹅【王羲之传山阴道士好养鹅羲之固求市之道士云为写道德经当举羣相赠羲之欣然写毕笼鹅而归】云间晏公子风月兴如何【晋陆云传云曰云间陆士龙荀隐曰日下荀鸣鹤】

春风马上梦樽酒故人持犹作狂时语邻家乞侍儿【元注云稚川醉时在傍知状○侍儿婢也见袁盎传】

忆同嵇阮辈醉卧酒家牀今日垆边客初无人姓黄【黄公垆见前阮籍传邻家少妇有美色当垆沽酒籍尝诣饮醉便卧其侧】

对酒诚独难论诗良不易人生如草木臭味要相似【并见前注】

春色挟曙来【韩诗威风挟惠气】恼人似官酒酬春无好语怀我文章友

红梅定自开有酒无人对归时应好在常恐风雨晦【诗风雨如晦定自好在并见前】

东南万里江緑浄一杯酒王孙江南去更得消息否【退之诗水容与天色此处皆緑浄又云瞰?渺空阔绿浄不可唾乐天诗澄鲜浄緑表里光】

献笑果不情【庄子大宗师篇造适不及笑献笑不及排唐鱼朝恩传释菜执易升坐言鼎有覆餗象以侵宰相王缙怒元载怡然朝恩曰怒者常情笑者不可测也】貌亲初不爱【礼记情疏而貌亲在小人则穿窬之道也与】谁言百年交投分一倾盖【投分倾盖见前】四十垂垂老【山谷生于庆历五年乙酉至元丰七年甲子盖四十矣时自太和移监德平镇集中有代其母祭陈氏女云我徂江南三年摇摇元丰甲子汝兄还朝可见是岁过汴京故在咸平太康之间作此诗僧贯休诗一瓶一鉢垂垂老】文章岂更新鼻端如可斲犹拟为挥斤【斲鼻挥斤见前】

土气昏风日人器极鴈鹅【衆口极鹅鴈见前注】寻河着【斫】绳墨诗思略无多

寄家

近别几日客愁生固知远别难为情【文选王昭君诗传语後世人远嫁难为情退之诗人间有累不可住依然离别难为情】梦回官烛不盈把【後汉巴祗与客暗坐不然官烛杜诗何须把官烛似照鬓毛斑又云浩歌泪盈把又云盈把那须沧海珠檀道鸾续晋阳秋日陶潜九月九日无酒于宅边菊丛中摘盈把望见白衣人送酒】犹听娇儿索乳声【退之诗娇女未絶乳念之不能忘忽如在我前耳若闻啼声】

古风次韵答初和甫二首【诗云道人四十心如水山谷生于乙酉至元丰甲子年四十凡五诗皆德平作】

饥思河鲤与河魴【诗岂其食鱼必河之魴岂其取妻必齐之姜岂其食鱼必河之鲤岂其取妻必宋之子】渴思蔗浆玉盃凉【楚辞招魂云腍鼈炮羔有柘浆前汉礼乐志歌泰尊蔗浆析朝醒注取甘蔗汁为饮可解醒老杜诗蔗浆归厨金盃冻】冬愿纯绵对阴雪【王褒颂云荷旃被毳者难矣道纯绵之丽密】夏愿约絺度盛阳【国风蒙被约絺是继衿也洪范五行传盛阴雨雪凝滞而冰寒阳气薄之不相入则散而为霰盛阳雨水温暖而阳热阴气胁之不相入则转而为雹】万端作计身愁苦【王莽传所以诳耀媚事太后下至旁侧方故万端】一事不谐鬓苍浪【後汉宋弘传帝顾谓主曰事不谐矣苍浪见前】调笑天街吟海燕【文选诗调笑辄酬答嘲谑无慙沮李白诗手把一枝菊调笑二千石晋天文志昴毕之间谓之天街梁吴均燕诗一燕海上来一燕高堂息】藜藿脱粟非公狂【孔子在陈藜藿不糝王褒颂云藜藿哈糗者不足与论太牢之滋味脱粟见公孙弘传】

君吟春风花草香【杜诗春风花草香】我爱春夜璧月凉【陈书后妃传其曲云璧月夜夜满】美人美人隔湘水【杜诗美人胡为隔秋水贯休善哉行有美一人兮婉如清扬久不见之兮湘水茫茫岑参春梦诗洞房昨夜春风起遥忆美人湘江水柳子厚赠吴武陵美人隔湘浦一夕生秋风】其雨其雨怨朝阳【国风其雨其雨杲杲出日阮籍诗其雨怨朝阳】兰茝盈怀报琼玖【左传声伯梦涉洹或与已琼瑰食之泣而为琼瑰盈其怀歌曰济洹之水赠我以琼瑰归乎归乎琼瑰盈吾怀乎国风木瓜报之以琼玖韩文公送灵师诗逐客三四公盈怀赠兰茝】冠纓自洁非沧浪【沧浪之水清兮可以濯我纓见孟子及楚辞白乐天诗莫唱沧浪曲无尘可濯纓】道人四十心如水【孟子我四十不动心汉郑崇传臣门如市臣心如水】那得梦为胡蝶狂【蝶梦见前注】

次韵答和甫卢泉水三首【并序】

和甫作卢泉之水不求于古乐府而规摹暗合余为和成三叠自余官河外罕得逆耳之言于朋友和甫爱我也居有药言吾不欲其思卢泉也故作其一父母之邦有如仲尼柳下惠而怀安之以吾之乐双井知和甫之不忘卢泉也故作其二坐进此道者于物无择清漳之浊波河之流卢泉之水求其异味而不得也亲乐之身安之斯可矣故作其三夫三言者虽不同惟知言者领其不异也【初虞世字和甫善医有必用方行於世卢泉其所居也在东平府须城县

卢泉乡】

初候不能六尺长【史记晏婴传云其御之妻谓其夫曰晏子长不满六尺身相齐国名显诸侯】少日结交皆老苍【杜说脱略小时辈结交皆老苍】垫利不可更炎凉【汉张耳陈余赞势利之交古人羞之老杜诗且复过炎凉太白诗荣枯异炎凉】解纓从我濯沧浪【解纓见前注】与君论心松柏香【取後凋之义乐天祭崔相羣文玉德弥温松心不凋】何为独忆卢泉之上多绿杨卢泉如练照秋阳【谢朓诗澄江净如练】泉上之人犹谤伤【退之诗不知羣儿愚那得故谤伤】此邦虽陋有佳士勿厌风沙吹茫茫愿君不负上池水【史记扁鹊传长桑君呼扁鹊与语曰我有禁方年老欲传与公乃出其怀中药与扁鹊曰饮是以上池之水三十日当知物矣其後扁鹊过虢虢太子死扁鹊能生之故天下尽以扁鹊为能生死人扁鹊曰越人非能生死人也此自当生者越人能使之起耳】囊中探丸起人死【汉尹赏传长安闾里少年相与探丸为弹得赤丸者斫武吏得黑者研文吏借此以为丸药杜诗囊中药未陈又戏答赵伯充劝莫学书章怀中探丸起九死才术颇似汉太仓诗意亦谓药石之言】

卢泉之木百尺长下荫泉色如木苍芊荷风雨洒面凉倒影摇荡天沧浪【汉郊祀志登遐倒影则日月返从下照於上孙绰天台赋序或倒影於重溟乐天诗倒影咫尺如千寻杜诗影动倒景摇潇湘】网登锦鳞蒲荇香【李白诗鲁酒若琥珀汶鱼紫锦鳞杜诗渚蒲芽白水荇青】何以贯之柳与杨【石鼓文其鱼维何维鰋及鲤何以贯之维杨与柳】古来希价入咸阳【见前注】贪功害能相中伤【文选李陵答苏武书妨功害能之臣尽为万户侯白乐天诗自贤夸智慧相纠鬭功能】君今已出纷争外但思烟波春渺茫奉亲安乐一杯水【啜菽饮水见前注李白诗万言不直一杯水此摘其字】卢泉之滨可忘死【说苑楚昭王欲之荊台司马子綦諫曰荊台之游左洞庭右彭蠡其乐使人遗老而忘死】

舍後鍾梵炉烟长【杜诗梵放时出寺鍾仍殷牀】舍前帘影竹苍苍事亲煖席扇枕凉【东观汉记曰黄香躬执勤若尽心供养冬无被袴而亲极滋味暑即扇牀枕寒即以身温席陶渊明黄香赞其序云九岁失母思慕骨立事父竭力以致养暑则扇牀枕寒则以身温席】中有一士鬢苍浪同心之言兰麝香【易系辞同心之言其臭如兰】与游者谁似姓杨朝发枉渚夕辰阳【屈原九章云朝发枉渚兮夕宿辰阳】怀瑾握瑜祗自伤【左氏握瑜而怀瑾九章又云怀瑾握瑜兮穷不知所示】东有浊河西清漳【汉高纪田肯曰夫齐西有浊河之限】胡为搔头卢泉思茫茫【搔头见前注】清明在躬不在水【礼记清明在躬气志如神】此曹狡狴可心死【神仙传王远谓麻姑曰吾老矣不复作此狡狴变化也列子云心死形废庄子心若死灰杜诗心死着寒灰】和甫得竹数本于周翰喜而作诗和之

初候一亩宫【礼记儒有一亩之宫环堵之室】风雨到卧席前曰筑短垣【国语晋人谓吴曰君有短垣而自踰之】昨日始封植平生岁寒心乐见岁寒色【见论语】翩翩佳公子【史记曰平原君翩翩浊世之佳公子也】为致一窻碧忆公来相居筮吉龟墨食【洪范相協厥居洛诰云召公既相宅又云惟洛食注云卜必先画龟然後灼之兆须食墨周礼春官卜师扬火以作龟致其墨】人言陋如何我自适其适【庄子适人之适而不自适其适论语子欲居九夷或曰陋如之何子曰君子居之何陋之有柳子厚诗我自适其适非愿为世儒】白眼

对俗徒【晋阮籍传见礼法之士以白眼对之】醉帽坐敲侧【北史独孤信在秦州尝因猎日暮驰马入城其帽微侧旦而吏人有戴帽者或慕而侧帽焉】人爱知酒耳不解心得得【庄子曰所谓聪者非谓其闻彼也自闻而已矣非谓其见彼也自见而已矣夫不自见而见彼不自得而得彼者是谓得人之得而不自得其得者也】阿堵絶往还【晋王衍传衍口未尝言钱晨起见钱谓婢曰举却阿堵物盖言将此物去耳後人遂以钱为阿堵顾恺之传云传神写照正在阿堵中盖谓目睛也然则目睛亦可称阿堵乎盖相传承误耳】此君是宾客【王徽之传徽之指竹曰何可一日无此君】清风吹月来【韩诗清风吹空月舒波】懼甚齿折屐【谢安传既破苻坚有驿书至过户限心喜甚不觉屐齿之折】有节似见圣【书凡人未见圣若不克见既见圣亦不克由圣左传成十五年前志有之曰圣達节】无言諒知默【扬雄解嘲云知玄知默守道之极】数回长者车【见前注】犹恨地未僻【杜诗地僻嬾衣裳又曰幽栖地僻经过少】阴雨打叶时【白乐天诗秋雨梧桐打叶时】曲肱自宴息【曲肱见论语易君子以向晦入宴息】心游万物初【庄子田子方篇老子曰吾游于物之初】何处寻辙迹【老子云善行无辙迹刘伶酒德颂云行无辙迹居无室庐】从来修行林乃是逸民国【晋阮咸传与叔父籍为竹林之游论语逸民乃夷齐下惠之属後汉逸民传盖隐土耳】寄耿令几父过新堂邑作乃几父旧治之地【堂邑隶博州】

呼船?大河驱马踏平沙【退之诗遂?大江极东陬】道傍开新邑千户有生涯四衢平且直【尔雅四達谓之衢】綠槐映县衙【古诗县古槐根出官清马骨高】问谁作此邑著旧对予嗟前日耿令君迁民出坳窰【退之聯句采月漉坳泓东坡重九诗惟有黄茅浪堆壠生坳窰窰乌瓜反一高一下也】始迁民怀土异端极纷拏【论语小人怀王又攻乎异端汉霍去病传汉匈奴相纷拏】既迁人气和草木茂萌芽桃李虽不言【见前注】春风满城花陵陂青青麦【见前注】烟雨润桑麻【杜诗桑麻深雨露】自非耿令君大泽荒蒹葭【汉高帝纪尝息大泽之陂秦国风蒹葭苍苍毛云蒹葭葭芦也诗硕人云葭莢揭揭毛云葭芦莢藪也陆玕云藪或谓之萩至秋坚成则谓之佳】白头晏起饮襁褓语呕哑【见前注】自非耿令君漂转随鱼虾岂弟民父母【诗岂弟君子民之父母】不专司歛賒【周礼泉府歛市之不售贷之滯於民用者以其贾买之凡賒者祭祀无过旬日】令君两男儿有德必世家问令今安在解官驾柴车【韩诗外传齐子曰臣赖君之赐驾马柴车陶诗日暮中柴车】当时舞文吏【汉张汤传舞文巧诋】白壁强生瑕【蔣相如传曰璧有瑕请指示王】今君袖手去不忍试虎牙【见前注】人往惜事废感深知政嘉我闻耆旧语叹息至昏鸦【见前注】定知循吏传来者不能加今为将军客轩盖湛光华幕府省文书【汉李广传幕府省文书】醉归接?斜【晋山简传童儿歌曰山公出何许往至高阳池日夕倒载归酩酊无所知时时能骑马倒着白接?】怀宝仁者病【论语怀其宝而迷其邦可谓仁乎】偷安道之邪【左传闵元年宴安酖毒不可怀也僖二十三年怀与安实败名】勉哉思爱日赠言同马樞【并见前注】

放言十首【论语谓虞仲夷逸隐居放言】

废兴宜有命【论语道之将行也与命也道之将废也与命也】得失但自知踽踽衆所忌【诗独行踽踽孟子曰古之人行何为踽踽凉凉】悠悠谁与归【诗悠悠我思檀弓云死者如可作也吾谁与归范文正岳阳楼记微斯人吾谁与归】吾义苟不存岂更月攘鸡【孟子曰

月攘一鸡以待来年然後已如知其昨义斯速已矣何待来年】风清闻鹤唳想见南山栖【晋谢玄传苻坚余衆弃甲宵遁闻风声鹤唳皆以为王师至此借用】

匣中緑绮琴【文选张孟阳诗云佳人遗我緑绮琴注云传休奕琴赋序云齐桓公有琴曰号鍾楚庄王有琴曰绕梁司马相如有緑绮蔡邕有焦尾皆名器也】欲抚已絶弦问弦何时絶鍾期谢世年【见前注】正声不可闻千载寂寞间未有顔叔子安知柳下贤【小雅哆兮侈兮成是南箕毛公云哆大貌南箕箕星也侈之言是必有因也斯人自谓避嫌之不审也昔者顔叔子独处于室邻之嫠妇又独处于室夜暴风雨至而室坏妇人趋而至顔叔子纳之而使执烛放乎旦而蒸尽缩屋而继之自以为避嫌之不审矣若其审者宜若鲁人然鲁人有男子独处于室邻之嫠妇又独处于室夜暴风雨至而室坏妇人趋而托之男子闭户而不纳妇人自牖与之言曰子何为不纳我乎男子曰吾闻之也男子不六十不闭居今子幼吾亦幼不可以纳子妇人曰子何不若柳下惠然嫠不逮门之女国人不称其乱男子曰柳下惠固可吾固不可吾将以吾不可学柳下惠之可孔子曰欲学柳下惠者未有似于是也】

轻肥马上郎【论语乘肥马衣轻裘老杜云马上谁家白马郎】枯槁林下士【屈原渔父篇顔色憔悴形容枯槁】声名斷自然【自然见此章华胥注】势利焚和气【庄子外物篇利害相摩生火甚多衆人焚和权载之序无耗气无焚和】智人不骇俗同朝皆用事物外有华胥时时梦中至【列子黄帝篇黄帝昼寝而梦游於华胥氏之国盖非舟车之所及神游而已其国无帅长自然而已其民无嗜慾自然而已】

兰楫桂为舟【九歌云木兰为楫桂为舟】大江可远游坚车无良马【西汉食货志乘坚策肥後汉邓太后诏温衣美食乘坚驱良】出门败吾輶【论语出门如见大宾柳子厚愚溪对云吾荡而趋不知太山之异乎九衢以败吾车吾放而游不知吕梁之异乎安流以没吾舟】一身交万物用我未易周安得柳下惠穷年与之游微云起肤寸大?弥九州【公羊春秋云触石而出肤寸而合不崇朝而雨徧乎天下者惟泰山尔弥字取弥天之意晋习凿齿传时桑门释道安与凿齿相见道安曰弥天释道安凿齿曰四海习凿齿石林诗话曰旧不解四海弥天为何等语因读梁慧皎高僧传载凿齿与道安书云夫不终朝而雨六合者弥天之云也宏渊源而润八极者四海之流也因摘其语以为戏耳】至仁虽爱物用含如春秋【孟子云是故孔子曰知我者其惟春秋乎罪我者其惟春秋乎】晴空不成雨远岫行归休【渊明归去来辞云云无心以出岫曹子建诗云朝云不归山暮雨成川泽此反其义】何疑陶渊明一去如惊鸥【渊明去官如海上之狎鸥人欲取而玩之则舞而不下鸥鸟见列子】

黄鹄送黄鹄中道言别离【汉西域传乌孙公主作歌曰愿为黄鹄兮归故乡文选苏子卿答李少卿云黄鹄一远别千里顾徘徊又云愿为双黄鹄送汝俱远飞】送君不憚远愁见独归时【退之送李员外云饮中相顾色送後独归情】罗网翳稻梁【杜诗君看随阳鴈亦有稻梁谋】江湖水弥弥行行不相见勉哉冥冥飞【扬子云鸿飞冥冥弋人何慕焉】

蝉声已纾迟秋日行晼晚【宋玉九辩云白日晼晚其将入兮】长年困道路驱马方更远从事常厌烦【诗黽勉从事後汉书闵仲叔世称节士注引高士传云周党遗之生藁仲叔曰我

欲省烦耳今更作烦耶】归心自如卷旨甘良未丰安得怀息偃【诗我心匪席不可卷也又云或息偃在牀】

月满不踰望日中为之倾【孔子易传曰中则昃月盈则食天地盈虚与时消息蔡泽传语曰日中则移月满则亏李文饶敲器赋序月满而亏日中而昃彼天道而常然欲久盛而焉得】天地尚乃尔万物能久盈【李白诗天地有泰否日月有盈亏况尔悠悠人安得久世间】明德忌煜煜【韩文公知名箴勿病无闻病其煜煜】高才贵冥冥【顏延年祭屈原文云物忌坚芳人讳明洁冥冥见前注】勿解扁舟去怀哉张季鹰【晋张轮传字季鹰齐王问辟为大司马束曹掾因见秋风起乃思吴中菰菜蓴羹鲈鱼膾曰人生贵得适志何能羈宦数千里以要名爵乎遂命驾而归谢朓诗怀哉谢欢宴怀哉怀哉本出诗】

榨牀在东壁【榨玉篇作醅又作 反射反切韵云压酒具也】病起绕壁行新醅浮白蚁【白乐天诗香醅浅酌浮如蚁杜诗蚁浮仍腊味】渴见解朝醒【刘伶传五斗解醒】小槽垂玉筍【李贺云小槽酒滴真珠红】音响有余清疾风春雨作静夜山泉鸣【雨作及泉鸣以喻槽牀滴声也】安得朱丝弦为我写此声【礼记朱弦疏越一唱而三叹有遣音者矣史记乐书卫灵公将之晋至於濮水之上夜半闻鼓琴声召师涓曰为我听而写之】想知舜南风正尔可人情【礼记舜作五弦之琴以歌南风正尔见前注】弄水清江曲采薇南山隅【诗陟彼南山言采其薇史记伯夷传隐于首阳山采薇而食之及饿且死作歌曰登彼西山兮采其薇矣索隐曰薇蕨也】当吾无事时此岂不我娱乔木好鸟音【诗伐木丁丁鸟鸣嚶嚶出自幽谷迁于乔木】夭风韵虚徐【诗其虚其邪邪音徐】遐心游四海【诗母金玉尔音而有遐心陆机文赋精骛八极心游万仞】万里不须臾回首古衣冠荆樊老邱墟【文选月赋曰臣东鄙幽介长自邱樊注引尔雅樊藩也郭璞曰藩葛也回视古衣冠者皆老於荆棘之篱丘壑墟落之间古衣冠谓背时也不随时俯仰在熙宁间皆斥逐也】欲付此中意归翻虫蠹书【退之诗岂殊蠹书虫生死文字间】短生忧【前注】不足此道乐有余

送伯氏入都

贫贱难安处别离更增悲【老杜诗乃知贫贱别更苦孟郊诗人言贫别易贫别愁更重】经营动北征【诗经之营之杜诗杜甫将北征】慈母待春衣【言母欲令待缝衣就乃行孟郊诗慈母手中线游子身上衣?行密密缝意恐迟迟归】短箠驱瘦马青草牧中嘶送行不知远可忍独归时【已见前篇送君不憚远愁见独归时注】太华物华春【案句疑有误】街柳啖黄鹂【王维诗陰陰夏木啖黄鹂】九衢生紫烟【退之诗子云祇自守奚事九衢尘三辅旧事云长安城中八街九陌】到家使人迷知音者谁子【老杜诗伐木者谁子退之诗訏谋者谁子又联句喝道者谁子】倦客无光辉王侯不可谒【易不事王侯战国策苏秦之楚三日乃得见乎王谈卒辞而行曰楚国之食贵于玉薪贵於桂谒者难得见如鬼王难得见如天帝今令臣食玉炊薪因鬼见帝】秣马兴言归【诗之子于归言秣其马又云兴言出宿又云言旋言归】岂无他人游不如我嵬【诗岂无他人不如我同父又云伯氏吹嵬仲氏吹篪】陈书北窗下【陶渊明高卧北窗之下】此自有余师【孟子子归而求之有余师】

渡河

客行岁晚非远游河水无情日夜流去年排堤注东郡【汉东郡治濮阳今澶州所治县也】诏使夺河还此州忆昔东行河梁上【文选李少卿诗携手上河梁游子暮何之】飞雪千里曾冰壮【杜诗交河几蹴曾冰裂又云安得赤脚踏曾冰盖取东方朔神异经云北方有曾冰万里】人言河源冻彻天水底犹闻沸惊浪【汉书赞张骞穷河源】

送吕知常赴太和丞

我去太和欲暮矣【山谷在太和三年至元丰七年移监德州德平镇是年三月过泗州僧伽塔有发愿文八年四月以校书郎召今言去太和欲暮犹在德平也】吕君初得太和官邑中亦有文字乐【韩诗不解文字饮惟能醉红裙此反其意】惜不同君润谷盘【见前注】观山千尺夜泉落快阁六月江风寒【观山快阁在太和自乐天喷玉泉诗练垂青嶂上珠泻绿盆中溜滴三秋雨寒生六月风】往寻佳境不知处扫壁觅我题诗看【退之诗曲江山水闻来久恐不知名访倍难愿借图经将入境亦逢佳处便开看渐入佳境见书顾恺之传】

别蒋颖叔【蒋之奇字颖叔新法行为福建通判迁淮东运副母丧服除为江西运副改河北入奏计神宗奖谕之移陕西官制行移淮南转运使擢江淮荆浙等路运副使元丰六年五月奏计神宗劳问甚备赐三品服此据实录也此诗云三品衣鱼人仰首当是六年以后作山谷移监德平镇过泗州僧伽塔作愿文时元丰七年三月也别蒋颖叔当是此时】

金城千里要人豪【张良传此所谓金城千里天府之国贾谊过秦论金城千里子孙帝王万世之业也】理君乱丝须孟劳【左传犹治丝而棼之汉龚遂曰治乱民犹治乱丝不可急也北史齐文宣帝纪神武尝使诸子各理乱丝文宣独抽刀斩之曰乱者当斩老杜大食刀歌云得君乱丝与君理孟劳者鲁之宝刀也见谷梁僖元年】文星合在天东壁【杜诗北斗避文星天文志东壁二星主文章天子图书之秘府也】清都紫微醉云璈【列子曰穆王以为清都紫微钧天广乐帝之所居汉武帝内传上元夫人自弹云琳之璈】荆溪居士傲轩冕胸吞云梦如秋毫【司马相如子虚赋吞若云梦者八九中曾不芥】三品衣鱼人仰首【见题下注又李翱撰韩文公行状赐三品衣鱼】不见全牛可下刀【见前注】秦州渭水森长戟【言为陕西转运也续本事诗韦蟾题驿亭云渭水秦川豁眼明】方壶蓬莱冠巨鳌【列子无底之谷有五山曰岱舆员峤方壶瀛洲蓬莱五山之根无所连着帝使巨鳌十五举首而戴之五山始峙而不动诗意言其负荷重也】万钉宝带珣玞席【隋杨素传赐万钉宝带国朝侍从跨玞鞍】献纳论思近赭袍【文选两都赋序云朝夕论思日月献纳杜诗献纳思存雨露边又献纳纁皇眷唐王建诗曰日色赭袍相似不着红鸾扇遮日光庭诗曾上云天侍赭袍】连营貔虎湛如水【尚书如虎如貔】开尽西河拥节旄【谓移陕西漕也时已复河湟】何时出入诸公间【汉晁错传云显诸公间】淮湖閲船今二毛【左传不禽二毛】凿渠决策与天合【颖叔在南始凿泗州殷渠以避淮长淮之险舟行自是无覆溺下诏褒赏】支祈窘束缩怒涛【异闻集载古岳渎经云禹治水至相柏山淮涡水神曰巫支祈善应对辨淮之浅深源之远近禹鑿于龟山之足淮乃安流至唐有渔者钓得一古鑿牵出其末有猕猴即支

析也】衣食京师看上计【汉武纪令与计偕注计者上计簿吏也】陛下文武收英髦【退之诗三公尽是知音人?不荐贤陛下圣】春风淮月动清鉴白拂羽扇随轻舫【诗谁谓河广曾不容刀注小船曰刀】下榻见贤倾礼数【陈蕃下榻详见前注王勃滕王阁序云徐孺下陈蕃之榻】後车载士回风骚【诗命彼後车谓之载之文选魏文帝与吴质书云从者鸣笳以启路文学托乘於後车】斲鼻于郢【郢人垺漫其鼻端使匠石斲之已见前注又按扬子云解难云锺期死伯牙絶弦破琴而不肯与俗人弹□人亡则匠石辍斤而不敢妄斲服虔曰□古之善涂墍者也施广领大?以仰涂而领?不污有小飞泥误着其鼻因令匠石挥斤而斲知匠石之善斲也师古曰墍即今之仰泥也□□拭也故为涂者为□人□乃高反又音乃回反此段与庄子意同而事异又非寓言山谷喜用斲鼻故事具列之】观鱼于濠【濠梁见前注】小夫閱人盖多矣【唐房乔传高孝基曰仆观人多矣未有如此郎者汉盖寛饶传此如传舍所閱多矣】几成季咸三见逃【庄子应帝王篇郑有神巫曰季咸知人之死生祸福若神列子与之见壶子出曰子之先生死矣列子入涕泣以告壶子壶子曰是殆见吾杜德机也尝又与来明日又与之见壶子出曰幸矣子之先生遇我也也有瘳矣列子入以告壶子壶子曰是殆见吾善者机也尝又与来明日又与之见壶子出曰子之先生不齐吾无得而见焉列子入以告壶子壶子曰是殆见吾衡气机也尝又与来明日又与之见壶子立未定自失而走又家语季羔谓别者曰今吾在难正子报怨之时而逃我者三因并记之】

平原宴坐二首【蜀中刻山谷真蹟题作平原郡斋而诗句小异云平生浪学不知株江北江南去荷锄窻风文字翻叶叶犹似劝人勤读书成巢不处避岁鹄得巢不安呼妇鸠金钱满地无人费一斛明珠薏苡秋平原郡德州也山谷元丰七年在太和移监德州德平镇此诗题下注公泽二字诗意殊不相涉盖本注于旧集谢送宣城笔而後人误寘于此今去之】

老作儒生不解事【文选杨德祖賸修家子云老不解事强着一书唐娄师德传云解事仆射】江南有田归荷锄北窻风来举书叶犹似劝人勤读书【谓风吹叶子册如劝人读书也】

黄落委庭观九州【月令草木黄落杜诗黄落惊山树】虫声日夜戒衣裘【谓促织】金钱满地无人费【谓黄叶】一斛明珠薏苡秋【以薏苡比明珠盖马援传南方薏苡实大援欲以为种军还载一车谮之者以为所载皆明珠文犀】

同刘景文游郭氏西园因留宿

人居城市虚华馆秋入园林着晚花落日临池见蝌斗必知清夜有鸣蛙【刘景文有西园和韵絶句云雨过西园物物佳柳风竹日映葵花更无人迹宜清睡柰此池头一部蛙元符三年七月山谷自戎州至青神省其姑有和青神士人蒲志同字泰亨诗其序云伏承泰亨先辈和示东坡之友刘景文同不肖宿城西郭氏园七言小诗且推不肖当与岭南数公同时鹏举凤举非所拟伦辄用元韵土答并序东坡伯仲方来之意其诗云我已人间无可用鬓飘霜雪眼生花东坡兄弟来虽晚折箭堪除蚀月蛙东坡海上无消息想见惊帆出浪花三十年来世三变几人能不化鹑蛙玉座天开旋北斗清班鸟散落余花有人难立百官上不为庙中羔兔蛙栽竹养松人去尽空闻道士种桃花昨来一夜惊风雨满地残红噪暮蛙又谢泰亨送酒云风

扫三峩山外雨霜催五柳宅边花非君送酒添秋睡可耐东池到晓蛙此诗真本尚存而遗文不载因附见於此城西郭园不知何处案前集有次韵刘景文登邳玉台见思五首云何时郭池晚照影写闲情时正在德平也案徽宗实録元符三年九月上谓辅臣韩忠彦曰章惇求去朕不欲以定策贬惇祗缘护哲宗灵驾不职累有弹章惇於是遂出故和章云有人难立百官上不为厢中羔兔蛙霍光传霍山曰丞相擅减宗庙羔兔蛙可以此罪也言章丞相之罪不独如此耳】

山谷外集诗注卷十四

山谷外集诗注卷十五

<集部,别集类,北宋建隆至靖康,山谷外集诗注>

钦定四库全书

山谷外集诗注卷十五

宋 黄庭坚 撰

史 容 注

奉送刘君昆仲

游子归心日夜流【汉高祖纪谓沛父兄曰游子悲故乡】南陔香草可晨羞【束广微补亡诗云循彼南陔言采其兰又云馨尔夕膳洁尔晨羞】平原晓雨半槐夏汾上午风初麦秋【杜诗麦秋晨气润槐夏午风凉欧阳公诗话云赵学士师民诗思尤精如麦天晨气润槐夏午阴清前世名流皆所未到也】鸿鴈要须翔集早脊令无憾急难求【诗鸿鴈云鸿鴈于飞集于中泽常棣云脊令在原兄弟急难论语翔而後集】欲因行李传家信姑射山前是晋州【刘君兄弟当自德州归晋故称平原汾上时山谷在德州德平也按寰宇记晋州所治临汾县有平山一名壶口禹贡所谓既载壶口治梁及岐也今名姑射山在县西八里庄子藐姑射之山有神人焉即此】

和答莘老见赠

往岁在辛丑【嘉佑六年辛丑山谷时年十七有溪上吟清江引二诗】从师海濒州外家有行役【外家谓母家见汉书】拜公古?沟【?沟谓扬州也唐曰?州左传吴城?沟以通江淮取此义也】儿曹被鉴赏【晋王戎传鉴赏先见如此】许以综九流【见前注】仍许归息女采苹助春秋【後集黄氏二室墓铭云庭坚之初室曰兰溪县君孙氏故龙图阁直学士孙公觉莘老之女初庭坚年十七从舅氏李公择学於淮南始识孙公孙公怜其少立以兰溪归之息女见汉高祖纪采苹见诗】斯文开津梁【世说庾公见卧佛曰此子疲於津梁列子体道穷宗为世津梁江文通诗道丧涉千载津梁谁能了】盛德见虚舟【虚舟见前注杜诗对君疑是泛虚舟】离合略十年【文选陆士衡诗离合非有常譬彼弦与括杜诗人生有离合岂择贵贱端】每见仰清?【魏志陈登曰清?疾恶有识有义吾敬赵元达】久次不进迁【杨雄赞以耆老久次转为大夫此言莘老】天禄勤校讎文武修袞职谏垣始登收【实録治平四年正月丙子秘书丞馆阁校勘孙觉直集贤院昌王府记室熙宁元年四月癸亥太常博士直集贤院孙觉为右正言杨雄赞校书天禄阁上诗袞职有阙维仲山甫补之】身趋邳公城【邳当作叶传写误耳山谷初仕为汝州叶县尉叶本楚地楚惠王以封沈诸梁谓之叶公】逐臣既南浮【实録熙宁元年八月癸卯以太子中允直集贤院同知谏院孙觉通判越州以

言事得罪也诗意自言方之叶县而莘老已为逐臣南往矣到官与莘老窜逐同是元年汉高祖纪云南浮江汉以下】变彼丞中馈【诗泉水云变彼诸姬易家人无攸遂在中馈】家庭供百羞【周礼天官内饔选百羞酱物珍物以俟渍】堂堂来问寝忽为云雾休遗玩犹在篋汝水遶坟丘【二室墓志云孙氏年二十而卒殡于叶县者二十二年文选潘安仁悼亡云流芳未及歇遣挂犹在壁】南箕与北斗日月行置邮【速於置邮见孟子】相逢辇毂下存没可言愁【元丰八年四月山谷以校书郎召时莘老为秘监】当年小儿女【杜诗遥怜小儿女未解忆长安】生子欲胜裘【胜衣见前注】瓠越委琴瑟江湖拱松楸【文选谢灵运游方山诗云指期憩瓠越越州春秋时为越国所都史记东瓠王徐广曰今之永宁也当是莘老在越州悼亡返葬于江南墓木拱矣故有存没可言愁之句诗云妻子好合如鼓瑟琴按秦少游集中与参寥简云莘老寿安君竟不起子实遂丁忧远方罹此祸故殊可伤也莘老悼亡于此可见越州今为绍兴府】持节转七郡【莘老自越倅徙知通州召还修起居注又以言事黜知广德军踰年徙湖州又徙庐州持祖母丧服除知苏州徙福州徐州又南京召为太常少卿易秘书少监哲宗即位兼侍讲迁右谏议大夫故言七郡】治功无全牛【见前注】还朝蒙嗟职明月岂暗投【见前注】抱被直延阁【刘歆七略云武帝广献书之路书积如丘山外有太常博士之藏内则延阁广内秘室之府退之送殷侑序云持被入直三省丁宁】疏帘近奎钩【书断曰苍颉仰观奎星圆曲之势合而为字孝经援神契云奎主文章苍颉文字总而为言晋天文志钩陈後宫也大帝之正妃也时宣仁后御帘】三生石上梦【葛洪川畔牧童叩牛角而歌曰三生石上旧精魂赏月吟风不要论慙愧情人远相访此身虽异性常存此乃僧圆泽事见于甘泽谣东坡删改作圆泽传见遗文】记是复疑不隐几付天籁【庄子齐物篇南郭子綦隐几而坐仰天而嘘云云又曰汝闻地籁而未闻天籁】閱人如海鸥【列子云海上之人有好鸥鸟者每旦之海上从鸥鸟游鸥鸟之至者以百数而不止其父曰吾闻鸥鸟从汝游取来吾玩之明日之海上鸥鸟舞而不下】襟怀俯万物顏鬢与百忧长歌可当泣短生等蜉蝣【古乐府王融悲歌云悲歌可以当泣远望可以当归短生见前注诗蜉蝣之羽毛云渠略也朝生夕死郭璞诗借问蜉蝣辈宁知龟鹤年白乐天诗长生无得者举世如蜉蝣】悲欢令人老【文选任彦昇诗悲欢不自持】万世略同流【书万世同流】轩冕来逼身【轩冕见前注】白苹晚沧洲【柳恽江南曲云汀洲采白苹日落江南春】履拂知道肥【杜诗中拂香余捣药尘阶除灰死烧丹火诗意言道学萧散也子夏战胜故肥见前注渊明诗贫富常交战道胜无戚顏】净室见天游【庄子外物篇室无空虚则夫妇勃谿心无天游则六凿相攘】小人乐蛙井【庄子井蛙不可以语于道】痴甚顾虎头【晋书顾恺之痴絶才絶画絶或曰小字虎头或曰虎头将军】世缘真嚼蜡【楞严经于横陈时味如嚼蜡】骨相谢封侯【後汉班超传相者曰此万里侯相也】松根养茯苓【杜诗知子松根养茯苓迟暮有意来同煮】岁晏望华輶【考工记輶人为輶注车辕也谢眺诗叠鼓送华輶】

以潞公所惠栋芽送公择次旧韵【前集有谢公择分赐茶三絶句今次前韵】

庆云十六升龙样【前汉志若烟非烟若云非云郁郁纷纷萧索轮囷是谓庆云】国老元年密赐来【左传国老皆贺子文北苑贡茶録云庆历中蔡君谟造小凤团自小团出而龙凤遂为次元丰有旨造密云龙其品又加于小团之上】技拂龙纹射牛斗外家英鉴似张雷【谓张华雷焕也】

吏部苏尚书右选胡侍郎皆和鄙句次韵道谢

不待烹茶唤睡回天官两宰和诗来清如接筩【以竹通水】通春溜快似挥刀斫怒雷【天官吏部也周礼治官之属有太宰小宰以喻尚书侍郎】奉同公择作拣芽咏【贡茶录云茶芽最上曰小芽如雀舌鹰爪次曰中芽乃一芽带一叶者号一枪一旗一枪一旗号拣芽最为挺特】

赤囊岁上双龙璧【元注云囊贡小团亦单叠惟拣芽双叠】曾见前朝盛事来想得天香随御所延春阁道转轻雷【元注云元丰末作延春阁○张平子西京赋复陆重阁转石成雷复陆复阁道也于上转石以象雷声】

今岁官茶极妙而难为赏音者戏作两诗用前韵

鸡苏狗虱难同味【煎茶赋云或济以盐勾贼破家滑窍走水又况鸡苏之与胡麻鸡苏俗呼紫苏胡麻一名狗虱皆见本草】怀取君恩归去来青箬湖边寻顾陆【箬溪在湖州顾陆谓顾野王陆羽按寰宇记湖州长兴县箬溪在县南一名顾渚顾野王舆地志云夹溪悉生箭箬南岸曰上箬北岸曰下箬村人取下箬水酿酒醇美俗称箬下酒陆鸿渐名羽有顾渚山记二篇盛言顾渚茶之美为江左第一陆龟蒙嗜茶置园顾渚山下岁取茶租自判品第张彦远名画记有论顾陆张吴用笔一篇谓顾恺之陆探微非此诗所引】白莲社里觅宗雷【白莲社在江州庐山晋慧远法师故事也同社十八人宗炳字少文雷次宗字仲伦与焉】

乳花翻碗正眉开时苦渴羌冲热来【拾遗记晋有羌人姚馥但言渴於酒羣辈呼为渴羌初学记程晓伏日诗云今世襌襌子触热到人家摇扇髀中疼流汗正滂沱襌襌谓不晓事渴羌亦此流也】知味者谁心已许维摩虽默语如雷【维摩诘经时维摩诘默然无言庄子渊默而雷声】

公择用前韵嘲戏双井

万仞峰前双井坞【山谷所居双井隶吉州分宁县】婆娑曾占早春来如今摸索苍龙壁【许敬宗曰若遇曹刘沈谢暗中摸索着亦可识借用其字】沈井铜饼漫学雷【老杜铜饼诗乱後碧井废时清瑶殿深铜饼未失水百丈有哀音】

又戏为双井解嘲

山芽落磴风回雪曾为尚书破睡来勿以姬姜弃蕉萃逢时瓦釜亦鸣雷【虽有姬姜无弃蕉萃见左传文选屈平卜居云黄钟毁弃瓦釜雷鸣】

奉同六舅尚书咏茶碾煎烹三首

要及新香碾一盃不应传宝到云来【见前注】碎身粉骨方余味莫厌声喧万壑雷【李白蜀道难砢崖转石万壑雷碎身粉骨如老杜咏丁香云晚堕兰麝中休怀粉身念也】

风炉小鼎不须催鱼眼长随蟹眼来深注寒泉收第一亦防枵腹爆乾雷【嵇康养生论终朝未餐则嚣然思食言空腹也蟹眼见前注】乳粥琼糜雾脚回色香味触映根来【六根眼耳鼻舌身意即色声香味触法见楞严经茶录有色香味琼糜见前注】睡魔有耳不及掩【石曼卿诗更被陰晴长睡魔唐李靖传兵机事以速为神震霆不及掩耳】直拂?牀过疾雷

与李公择道中见两客布衣班荆而坐对戏奕秋因作一絶

两客班荆覆局图【左传襄三十六年楚伍举奔郑将遂奔晋声子将如晋过之於郑郊班荆相与食而言复故陶渊明诗班荆坐松下数斟已复醉魏志王粲传观人围棋局坏粲为覆之不误一道】看人车马溷泥涂文昌八座邻枢极【唐刘泊疏云八座此於文昌六曹尚书及令仆为八座见职官志志後汉梁统传论宰相运动枢极】天上归来愧不如

六舅以诗来觅铜犀用长句持送舅氏学古之余复味禅悦【维摩经曰虽复饮食而以禅悦为味】故篇未及之

海牛压纸写银钩【海牛压帘银钩并见前注】阿雅【元注云师妙僧号】守之索自收长防玩物败儿性【书玩物丧志】得归老成散百忧先生古心冶金铁【魏武帝令长史王必曰忠能勤事心如铁石退之孟先生诗云孟生江海士古貌又古心皮日休云余尝慕宋广平铁肠石心】堂堂一角谁能折【犀盖一角兽也汉朱云传云五鹿岳岳朱云折其角】儿言觥觥【见孟子】持赠谁外家子云乃翁师【子云盖比之杨?也】不着鼻?两手古犀牛儿好看取【传灯录抚州石巩慧藏禅师一日在厨下作务马祖问曰作什麼曰牧牛祖曰作麼生牧曰一回入草去便把鼻孔拽来福州大安禅师曰安在汾山三十年只看一头水牯牛若落路入草便牵出若犯人苗稼即鞭撻调伏既久可怜生如今变作露地白牛常在面前露迥迥地赶亦不去也】

奉和公择舅氏送吕道人研长韵

奉身玉壶冰立朝朱丝弦【文选白头吟云直如朱丝?清如玉壶冰】妙质寄郢匠【郢人垆漫其鼻端使匠石斲之见庄子已见前注】素心乃林泉力耕不罪岁【孟子王无罪岁】嘉谷有逢年【史记佞幸传力田不如逢年善仕不如遇合】校书天禄阁【见扬雄传】艺竹老风烟携提寒泉泓【退之毛颖传谓砚为陶泓】松煤厌磨研【後汉苏竟传以磨研编削之才】藉甚在台省六经勤传笈【毛氏注诗曰诂训传郑氏曰笈公择有诗传十卷】諫草蠹穿穴江湖渺归船【公择熙宁初为右正言论新法谪通判滑州元丰六年召为太常少卿迁礼部侍郎哲宗立进吏侍】春官酌典礼【左太冲魏都赋斟洪范酌典宪】日月丽秋天【易日月丽乎天据实録元丰八年四月黄庭坚为秘书省校书郎是年十二月礼部侍郎李常为吏部侍郎此时未迁吏侍也】少也长母家学海颇寻沿【杨子学行篇百川学海而至

于海丘陵学山而不至于山是故恶夫画也】诸公许似舅【似舅见前注】贱子岂能贤【杜诗贱子请具陈左传云岂曰能贤】辕驹蒙推挽【汉窦婴田蚡传云今日延论局趣若辕下驹山谷除校书郎时孙莘老李公□故在朝因最先诸公收召信推挽之力也及元佑五年二月丁酉公择卒戊戌莘老卒六年三月山谷除右史中书舍人韩川有言至六月遂居母忧自此不复振矣山谷遗文有祭莘老文云二月丁酉公择去化厥明戊戌公亦命驾】官次奉丹铅【退之秋怀诗丹铅事点勘言作校书也左传襄二十三年闵子马谓公鉏曰若能孝敬富倍李氏可也公鉏然之敬共朝夕恪居官次】新诗先旧物包送比青毡【晋王献之传青毡我家旧物言以诗先研也左传僖末年弦高以乘韦先牛十二犒师注云古者将献遗於人必有以先之襄十九年享晋六卿于蒲团赠荀偃束锦加璧先吴壽梦之鼎注古之献物必有以先之柳子厚送濬上人序云古之赠礼必以轻先重故郑商之犒先乘韦鲁侯之赠後吴鼎】缪传黄梅鉢未邨少林禅【少林谓达磨也自南天竺国来寓止于嵩山少林寺面壁而坐终日默然後传法与慧可且付袈裟慧可传僧璨僧璨传弘忍弘忍大师蕲州黄梅人也黄梅传卢行者慧能有道明者闻五祖密付衣鉢与卢行者即率同意数十人追逐至大庾岭卢行者掷衣鉢于盘石曰此衣表信可力争耶仕君将去道明举之如山不动乃曰我来求法非为衣也愿行者开示祖曰不思善不思恶正恁麼时阿那个是明上座本来面目明当下大悟偏体汗流维摩经言若能如是坐者佛所印可】汲井涤败墨【谢灵运诗激涧代汲井】苍珪谢磨镌【盖以所送研比衣鉢以墨比苍珪也】王蟾泻明滴【西京杂记晋灵公旧豕窍中有玉蟾蜍一枚大如拳】要须笔如椽【见前注】眷求尽耆德【元佑初多用故老】舅氏且进迁山龙用补袞【书予欲观古人之象日月星辰山龙华虫作会补袞见毛诗】舟楫功济川【说命云若济巨川用汝作舟楫】当身任百世【当字去声见後注】旧学不虚捐私持杀青简【见前注】缉缀报餐钱【汉高后纪列侯幸得赐餐钱奉邑】屡书愿无愧继麟趾篇【诗麟之趾关雎之应也退之答元稹书云嗣餐有继将大书持书屡书不一书而已也自当身任百世至篇末皆言身为史官书传百世杀青屡书皆史官事而关雎之应言宣仁后也後汉郭太傅林宗卒同志者其刻石立碑蔡邕为其文曰吾为碑文多矣皆有慙德惟郭有道无愧耳】

再和公择舅氏杂言

外家有金玉我躬之道术【诗金玉其相庄子天下篇道术将为天下裂又云古之道术有在於是者】有衣食我家之德心【书作德心逸日休】使我蝉蜕俗学之市【後汉窦融传论蝉蜕王侯之尊庄子缮性篇俗学而求复其初】乌哺仁人之林【尔雅纯黑而反哺者乌也文选补亡诗嗷嗷林鸟受哺于子山谷有母在也】养生事亲汔师古炊玉爨桂能至今【见前注】岁暮三十裘食口三百指寒不缉江南之落毛【缉落毛见前注】饥不拾狙公之橡子【庄子齐物篇狙公赋茅音义云茅音序橡子也杜诗岁拾橡栗从狙公】平生荆鸡化黄鹄【荆鸡伏鹄卵见前注】今日江鸥作樊雉【江鸥见前注庄子养生主篇泽雉十步一啄百步一饮不蕲畜乎樊中】人言无忌似牢之【见前注】挽入书林覩文字【长杨赋并包书林退之诗文字覩天巧又云不如覩文字】更蒙着鞭翰墨场【选诗粲粲翰墨场】赠研水苍珪玉方【玉藻云大夫佩水苍玉】蓬门系马晚色净【杜诗水花晚色净】茅檐垂虹秋气凉湔拂【见前注】垢面生寒光汉隶书吕规其阳【东坡云吕道人沈?砚其首有吕字

非刻非画坚致可以试金】吕翁之冶与天通不但澄渥烧铅黄初疑蚩汉水中骨【山谷有帖云嘉州峨眉县中正寨之蚩溪出研石青绿密致而宜笔墨】不见鸛鹄目突兀【端石有鸛鹄眼】但见受墨无声松花发颇似龙尾琢紫烟【欧阳公砚谱歙石出于龙尾溪端溪以北岩为上龙尾以深溪为上东坡龙尾砚歌君看龙尾岂石材玉德金声寓于石】不见罗縠纹粼粼【唐积歙砚图谱有罗纹石出罗纹山】但见含墨不泄如寒渊往在海濒时【前篇云从师海濒州】晨夕亲几杖恪居有官次【恪居官次见前注】遣吏问无恙【战国策齐王使使者问赵威后书未发问使者岁无恙耶民无恙耶王无恙耶】抚摩宝泓置道山【宝泓谓陶泓也见前篇注後汉窦章传是时学者称东观为老氏藏室道家蓬莱山遂荐章入东观为校书郎】鬱鬱秀气似舅眉宇间【唐元德秀传见紫芝眉宇使人名利之心都尽】其重可以回进躁之首其温可以解横逆之顔【横逆见孟子】乌虡端是万乘器【万乘器见感春诗轮囷注】红丝潭石之际知才难【砚録云红丝石出青州黑山其理红黄相参二色皆不深理黄者其丝红理红者其丝黄欧阳公砚谱红丝石砚君谟赠余云此青州石也得之唐彦猷云须饮以水使足乃可用】

次韵答王四

病懒百事废不惟书问疎新诗苦招唤是日鎖直庐【文选陆士衡诗朝游游曾城夕息旋直庐】潢污深一尺【左传潢污行潦之水】大道覆行车【贾谊书前车覆後车戒枚乘七发车覆能起之】晴夜遥相似秋堂对望舒【离骚前望舒使先驱兮注月御也谢朓诗借问下车日匪直望舒圆】

戏答仇梦得承制

仇侯能骑矍铄马【後汉马援传武威将军刘尚系武陵五溪蛮夷深入军没援因请行时年六十二帝愍其老未许援自请曰臣尚能被甲上马帝令试之援据鞍顾眄以示可用帝笑曰矍铄哉是翁也】席上亦赋竞病诗【南史曹景宗传梁武帝宴连句令沈约赋韵惟景宗不得韵意色不平诏约与韵时韵已尽唯有竞病二字景宗操笔便成曰去时儿女悲归来笳鼓竞借问行路人何如霍去病】玄冬未雷苍蛇卧玉山无年天马饥【山海经崑仑亦名玉山上玉禾其?百寻退之诗称骐驎云饥食玉山禾鲍明远诗诚不及青鸟远食玉山禾】三年荷戈对摇落十借乞弟亦可缚【乞弟事见秦少游所作任师中墓表甚详其大略云元丰中朝廷治西南乞弟之罪至于斩将帅绌监司两蜀骚然四年而後定实部使者为之裔夷可足责也刘备谓诸葛亮曰君才十倍曹丕】何如万骑出河西捕取弄兵黄口儿【西夏自陷永乐城後为边患及秉常卒子乾顺立元佑二年遣使册乾顺夏人以地界为词不入谢且犯泾原镇戎军又侵德靖砦又犯塞门砦黄口儿谓乾顺也家语孔子见罗雀者所得皆黄口小雀弄兵潢池见龚遂传】

戏答仇梦得承制二首

结发从征听鼓鼙【李广传谓其麾下曰广结发与匈奴大小七十余战礼记君子聽鼓鼙之

声则思将帅】未曾一展胸中奇【退之代张籍书开口一吐胸中之奇】弯弓如月落霜鴈谁道将军能赋诗【李白幽州胡马客歌弯弓若转月白鴈落云端】横槊不为万骑先【南史垣荣祖传荣祖曰曹操曹丕上马横槊下马谈论此可不负饮食矣元微之作老杜墓志云曹氏父子往往横槊赋诗】传杯把笔过年年【杜诗传杯不放杯杜牧之诗自说江湖不归去阻风中酒过年年】怀中黄石开三略【兵书有黄石公三略三卷】道上青旗漫百篇【青旗谓置筒加旗也元白号诗筒】

和任夫人悟道

夫亡子幼如月魄【书旁死魄疏云魄形也月之轮郭无光之处朔後明生而魄死望後明死而魄生退之诗维时月魄死冬日朝在房】摧尽蛾眉作诗客二十余年刮地寒见儿成人乃禪寂【杜诗予亦师粲可身犹缚禪寂】万事新新不留故瘦藤六尺持门户【玉台新咏健妇持门户亦胜一丈夫】烦恼林中即是禪更向何门觅重悟

暮到张氏园和壁间旧韵

邵平不见见园瓜三径还寻二仲家莫道暂来无所得未秋先已碧莲华【邵平二仲见前注高僧传求那跋摩于别室入禪累日不出寺僧遣沙弥侯之亘室弥漫生青莲花】

从人求花

舍南舍北勃姑啼【柳子厚闻黄鹂诗此时晴烟最深处舍南巷北遥相语杜诗舍南舍北皆春水勃姑见前注】体中不佳陰雨垂【晋王湛传兄子济尝诣湛见牀头有周易问何用此为湛曰体中不佳脱复看耳】欲向黄梅问消息背陰合有两三枝【传灯録慧能大师传智远禪师谓曰西域菩提达磨传心印於黄梅汝当往彼参决师辞诀直造黄梅之东禪诗含此意李白诗闻道春还未相识走傍寒梅问消息祖庭事苑曰经律异相云有噉人鬼捉得一人日方欲出人谓鬼曰君何以面白背黑曰我鬼性畏日也其人向日而走既得脱因说偈言勤学第一道勤问第一方道逢罗刹难背陰向太阳白乐天忠州桃花诗长忆小楼风月夜红栏杆上两三枝】

赠陈师道【元佑元年二年陈无已在京师寓居陈州门按实録二年四月乙巳徐州布衣陈师道充徐州州学教授赠此诗时未得官也按黄?年谱王景文质闻之荣茂世云得之前辈言山谷与後山相遇於颍昌因及杜诗客子入门月皎皎谁家捣练风凄凄故此诗有云霜月入户寒皎皎万人丛中一人晓】

陈侯学诗如学道【王立之诗话称潘邠老云陈三学诗如学仙时至骨自换自谓此语得意然山谷有学诗如学道之句陈三所得岂其苗裔耶今按张良传乃学道欲轻举学道即学仙也陈无已此语乃印山谷之言此篇论诗固非王立之所及苟非陈无已山谷亦未尝向人说此也故云十度欲言九度休万人丛中一人晓】又似秋虫噫寒草【如蟋蟀俟秋吟也噫见

前注欧阳公诗下视区区郊与岛萤飞露湿吟秋草【日晏肠鸣不俛眉【卢仝月蚀诗饥肠彻死无由鸣杨雄解嘲云羣卿不揖客将相不俛眉】得意古人便忘老君不见向来河伯负两河观海乃知身一蠡【河伯观海见奉答子高见赠诗注按东方朔传语曰以管窥天以蠡测海注云蠡瓠瓢也来具切今作河字韵乃蚌属也疑别有所出然山谷集中又有诗云在公每怀归安得借明驼畏涂失无卿酌海持有蠡则是用东方朔语也盖文选以蠡测海音力禾切杜诗且持蠡测海况把酒如渑】旅牀争席方归去【争席见前注】秋水黏天不自多【退之祭文洞庭汗漫粘天无壁庄子秋水篇云北海若曰天下之水莫大於海而吾未尝以此自多王荆公诗白浪黏天无限断】春风吹园动花鸟霜月入户寒皎皎十度欲言九度休【云居膺示衆云如有□人终不取次十度拟发言九度却休去见祖庭事苑】万人丛中一人晓贫无置锥人所怜穷到无锥不属天【庄子云尧舜有天下子孙无置锥之地张良传无立锥之地传灯録汾山传香严颂曰去年贫未是贫今年贫始是贫去年贫尚有卓锥之地今年锥也无】呻吟成声可管弦能与不能安足言【庄子呻吟裘氏之地檀弓云弹琴而不成声孔子世家诗三百五篇皆弦歌之以求合韶武雅颂之音诗意谓吟咏之际而自成声音可被之管弦不复有能否之念如东坡南行集叙夫昔之为文者非能为之为工乃不能不为之工也】

送六十五弟贲南归

风惊鸿鴈行吹落秋江上为扫碧岩边问叔今无恙【史记范雎传须贾曰范叔固无恙乎】

赠吴道士

吴山十二碁一击玄关应探人怀中事如月入清镜【刘存事始云世本曰乌曹作六博说文曰十二碁也御览方术部异苑曰十二碁卜出自张文成受法於黄石公行师用兵万不失一至东方朔密以占衆事後密不传晋宁康中襄城寺法味道人遇一老公着黄皮衣竹筒盛此以授法味无何失所在遂复传於世山谷称十二碁盖异苑所言者非六博也张文成盖张良謚文成侯文选王简栖碑云玄关幽键陆龟蒙诗幽忧拂长剑憔悴慙清镜】

同谢公定携书浴室院汶师置饭作此

竹林风与日俱斜细草犹开一两花天上归来对书客【一作卷杜诗天上张公子韩诗应知侍史归天上】愧勤僧饭更煎茶

谢人惠茶

一规苍玉琢蜿蜒【此言龙团退之南海神碑云蜿蜒蜿蜒来慕饮食】藉有佳人锦段鲜【张平子四愁诗云美人赠我锦绣段】莫笑持归淮海去为君重试大明泉【唐张又新水记云水之与茶宜者凡七品淮南路扬州大明寺水第五】

懋宗奉议有佳句咏冷庭叟野居庭坚于庭叟有十八年之旧故次韵赠之【庭叟有佳侍儿因早朝而逸去其後乃插椒藩甚严密】

城西冷叟半忙闲【湘山野录云杨大年为闲忙令世上何人取号闲世上何人取号忙】人道王阳得早还【汉王吉字子阳为谏大夫谢病归琅邪】四望楼台皆我有一原花竹住中间初无狗盗窥篱落【史记孟尝君客最下坐有能为狗盗者入秦宫藏中取狐白裘】底事蛾眉失锁关每为朝天三十里时时惊枕梦催班【杜诗汝阳三斗始朝天坡诗晓风宫殿梦催班】

古意赠郑彦能八音歌【前集有送郑彦能宣德知福昌县山谷有此诗真蹟跋云吾友郑彦能今可为县令师也以予寒乡土不能重之於朝故作此诗赠行以识吾愧元佑元年丙寅黄庭坚题彦能名仅今附此诗於元佑时】

金欲百鍊刚【柳子厚诗干有千寻竦精闻百鍊刚】不欲绕指柔【刘越石诗何意百鍊刚化为绕指柔】石羊卧荒草一世如蜉蝣【石羊?间物也王建诗涧底盘陀石渐稀尽向坟前作羊虎蜉蝣朝生夕死诗云蜉蝣之羽注渠略也】丝成蚕自缚【白居易诗蚕茧自纏紫】智成龟自囚【庄子曰楚有神龟死已三千年王巾笥而藏之此龟者宁其死为留骨而贵乎宁其生而曳尾於涂中乎】竹箭天与美【尔雅东南之美者有会稽之竹箭焉】岂愿作嚆矢【庄子在宥篇不为桀跖嚆矢】匏枯中笙竽不用系墙隅【匏瓜系而不食见论语】土偶与木偶未用相贤愚【孟尝君传孟尝君将入秦苏代谓曰今旦代从外来见木偶人与土偶人相与语木偶人曰天雨子将败矣土偶人曰我生于土败则归土今天雨流子而行未知所止息也今秦虎狼之国而君欲往有如不得还君得无为土偶人所笑乎乃止未用相贤愚退之语也】革辙要合道覆车还不好木讷赤子心百巧令人老【论语刚毅木讷近仁孟子曰大人者不失其赤子之心者也注谓人能不失其赤子时心则为贞正大人】

子瞻题狄引进雪林石屏要同作【东坡集有狄咏石屏考其岁月盖元佑元年作时山谷在馆中】

翠屏临研滴【西京杂记广川王发晋灵公冢惟玉蟾蜍腹空容五合水取以盛书滴】明窗翫寸陰【帝王世纪禹不重径尺之璧而爱日之寸陰吴都赋责千里于寸陰】意境可千里【意境如刘梦得诗腰斧上高山意行无旧路也】摇落江上林百醉歌舞罢四郊风雪深将军貂狐暖【见前注】士卒多苦心【选诗志士多苦心】

送张才翁赴秦会

金沙酴醾春纵横【荆公诗云酴醾一架最先来夹水金沙次第栽又有诗云故作酴醾架金沙祗漫栽似矜颜色好飞度雪前开】提壶栗留催酒行【欧阳公啼鸟诗云独有花上提壶卢劝我酤酒花前倾诗葛覃陆玕疏云黄鸟黄鹂留也或谓之黄栗留】公家诸父酌我醉横笛送晚延月明此时诸儿皆秀发【杜诗平公今诗伯秀发吾所美】酒间乞书藤纸滑北门

相见後十年【谓北京教授时】醉语十不省七八吏事衮衮谈赵张【广汉敞张华说汉书衮衮可聽】乃是樽前綠发郎【綠发见前注】风悲松丘忽三岁【言其居忧也】更觉綠竹能风霜【前汉严助传不能其水土师古曰能堪也】去作将军幕下士【退之云水北山人得声名去年去作幕下士】犹闻防秋屯虎兕【唐陆贄传西北边岁调河南江淮兵谓之防秋杜诗闻道君牙帐防秋近赤霄虎兕出於柙见论语】只今陛下思保民所要边头不生事【此语可见元佑初作】短长不登四万日【如太白云百年三万六千日人壽短长多不及此数也南史袁峻传抄书自课日五十纸纸数不登则不止此摘其字】愚智相去三十里【世说云魏武过曹娥碑下杨修见碑背上题作黄绢幼妇外孙齏臼八字魏武谓修曰解否答曰解魏武曰卿未可言待我思之行三十里曰吾已得之令修别记所知修曰黄绢色丝也於字为絕幼妇少女也於字为妙外孙女子也於字为好齏臼受辛也於字为辞所谓絕妙好辞也魏武亦记之与修同乃叹曰我才不及卿乃较三十里】百分举酒更若为【古乐府隔谷歌食粮乏尽若为活太白诗桃李今若为当窻发光采】千户封侯傥来尔【庄子繕性篇轩冕在身非性命也物之傥来寄也寄之其来不可圉其去不可止】

题阳关图二首

断肠声里无形影画出无声亦断肠【白乐天诗一声肠一断能有几多肠】想得阳关更西路北风低草见牛羊【高欢玉壁之败使斛律金作敕勒歌其词曰山苍苍天茫茫风吹草低见牛羊欢自和之哀感流涕】

人事好乖当语离【渊明答龐参军诗序云人事好乖便当语离】龙眠貌出断肠诗【李伯时画也杜诗貌得山僧及童子坡诗龙眠独识殷懃意画作阳关意外声】渭城柳色关何事自是离人作许悲【渭城柳色见前注汉书阳关去长安二千五百里唐人送客西出都门三千里曰渭城今有渭城馆刘梦得诗旧人惟有何戡在更与殷勤唱渭城】

题归去来图二首

日日言归真得归迎门儿女笑牵衣【太白诗儿女歌笑牵人衣】宅边犹有旧时柳【陶潜宅边有五柳树】漫向世人言昨非【词云觉今是而昨非】人间处处犹崔子【论语崔子弑齐君陈文子有马十乘弃而违之至於他邦则曰犹吾大夫崔子以崔子以比刘裕篡晋也】岂忍更令三径荒【归去来辞三径就荒】谁与老翁同避世桃花源里捕鱼郎【桃花源见前注荆公诗渔郎漾舟迷远近】

题画鹅鴈二首

驾鹅引颈回【子虚赋弋白鹄连驾鹅】似我胸中字右军数能来【杜诗邻家送鱼鼈问我数能来】不为口腹事【王立之诗话云古人有诗驾鹅引颈回似我胷中字右军数能来不为口腹事或曰山谷诗非也王羲之传性爱鹅会稽有孤居姥养一鹅善鸣携亲旧就观姥闻羲之将至烹以待之羲之叹息弥日後汉书闵仲叔曰岂以口腹累安邑哉】

水国鸿鴈秋烟沙风日丽莫遣角弓鸣惊飞不成字

题老鹤万里心【老杜遣兴云蛰龙三冬卧老鹤万里心】

仙人驾飞骑朝会白云衢【文选别赋驾鹤上汉庄子乘彼白云至于帝乡】老骥不伏乘【曹孟德乐府云老骥伏枥志在千里易系词服牛乘马引重致远】清唳彻九虚【太白诗清如清唳蝉】野田篁竹底【淮南王书云越处溪谷之间篁竹之中】毵毵伴鸡鳧【文选射雉赋敷藻翰之陪颺毵毵凤舞张羽貌】时因长风起犹欲试南图【庄子而後乃今将图南】

题韦偃马

韦侯常喜作羣马杜陵诗中如见画【老杜戏为壁画马歌自注云韦偃画】忽开短卷六马图想见诗老醉骑驴【杜诗骑驴三十载】龙眠作马晚更妙【谓李伯时】至今似觉韦偃少【老杜双松图歌天下几人画古松毕宏已老韦偃少言晚岁笔画老苍视韦偃如少年也】一洗万古凡马空句法如此今谁工【老杜丹青引须臾九重真龙出一洗万古凡马空】

答王道济寺丞观许道寧山水图【外集十二卷又载一篇云往逢醉许在长安蛮溪大砚磨松烟忽呼绢素翻砚水久不下笔或经年一日踏门撼门钮巾?敲斜犹索酒举盃意气欲翻盆倒卧虚樽将八九醉拈枯笔尝墨色势若山崩不停手数尺江山万里遥满堂风物冷萧萧山僧归寺童子後渔伯欲渡行人招先君笑指溪上宅鸬鷀白鹭如相识许生再拜谢不能乃是天机非笔力自陈精力初未衰八幅生绢作四时蚤师李成最得意什袭自藏人已知贵人取去弃墙角流落几姓知今谁大梁画肆閱水墨四图完然当物色自言早过许史门常卖一声偶然得雨雪涔涔满寺庭四图冷落让丹青往来睥睨谁比数十万酬之观者惊客还次第閱春夏坐更岁序寒峥嵘王丞来观叹啧啧亦如我昔初见日新诗雌黄多得实信知君家有摩诘我持此图二十年眼见绿髮皆华颠许生缩手入黄泉衆史弄笔摩青天君家枯松出老翟颇似破屏有骨骼一时所弃愿爱惜不诬方将有人识比此篇多一韵其间大同小异恐此是改定本因附见】

往逢醉许在长安【郭若虚图画见闻録云许道寧河间人学李成山水笔墨简快峰峦峭拔自成一家醉许如怀素世称醉素】蛮溪大砚磨松烟【蛮溪砚见前注】忽呼绢素翻砚水【杜诗诏谓将军拂绢素】久不下笔或经年异时踏门闯白首【退之诗闯然入其户又联句云儒门虽大啓奸首不敢闯闯丑甚反韵书注云马出门貌】巾冠敲斜更索酒【杜诗不通姓字麤豪甚指点银瓶索酒尝】举杯意气欲翻盆倒卧虚樽将八九【张籍诗酒尽卧空瓶】醉拈枯笔墨淋漓【杜诗戏拈秃笔扫骅骝】势若山崩不停手【退之进学解手不停披於百家之编】数尺江山万里遥【南史竟陵王传其孙贲字文焕善画於扇上图山水咫尺之内便觉万里为遥杜诗咫尺应须论万里】满堂风物冷萧萧【杜诗满堂动色嗟神妙退之诗萧萧风景寒】山僧归寺童子後【杜诗貌得山僧及童子】渔伯欲渡行人招【庄子渔父篇孔子鼓琴奏曲未半有渔父下船而来曲终而招子贡此反而用之】先君笑指溪

上宅鸛鷗白鷺如相识许生再拜谢不能【项籍传陈婴谢不能】原是天机非笔力【老杜山水障歌云刘侯天机精爱画入骨髓】自言年少眼明时手挥八幅锦江丝赠行卷送张京兆【京兆不知为谁而言锦江丝疑是张乖崖盖比之张敞云】心知李成是我师【图画见闻录云李成字咸熙家营丘志尚冲寂博涉经史尤善画山水寒林开宝中都下贵人王公贵戚争驰书延请成多不答子觉职践馆阁赠光禄丞】张公身逐铭旌去流落不知今主谁大梁画肆閱水墨我君盘礴忘揖客【盘礴见後注汲黯曰使大将军有揖客反不重耶】蛛丝煤尾意昏昏【集中有答郭英发书云蛛丝所谓蠨蛸在户者煤尾屋尘屋尘合墨医方谓之乌龙尾杜诗头白昏昏足醉眠】几年风动人家壁【杜诗挂君高堂之素壁】雨雪淅淅满寺庭【老杜秦州杂诗淅淅塞雨繁】四图冷落让丹青笑酬肆翁十万钱卷付骑奴市尽倾【司马相如传一坐尽倾】王丞来观皆失席指点如见初画日四时风物入句图【杨大年谈苑云李昉以司空致仕畜五琴皆以客为名各为诗一章画为图传於好事者句图盖此类也】信知君家有摩诘【王维字摩诘唐书有传其诗云宿世谬辞客前身应画师】我持此图二十年眼前緑发皆华颠【緑发见前注後汉崔駰传駰作達旨云唐睢华颠以悟秦甘罗童牙而报赵】许生缩手入黄泉【韩丈巧匠旁观缩手袖间左传不及黄泉无相见也】衆史弄笔摩青天【庄子田子方篇宋元君将画图衆史皆至受揖而立舐笔和墨有一史後至者僵僵然不趋受揖不立因之舍公使人视之则解衣盘礴羸君曰可矣是真画者也】君家枯松出老翟【图画见闻录云翟院深北海人学李成山水但自创意者格下临摹者夺真】风烟枯枝倚崩石【李白诗枯松倒挂倚絶壁】蠹穿风物皆爱惜不诬方将有人识【言此画虽蠹而他日有识之者按文选谢灵运拟邺中诗其序言建安末在邺宫?欢愉之极古无此娱何者楚襄王有宋玉唐景梁孝王有邹枚严马其主不文汉武时徐乐诸才备应对之能而雄猜多忌岂获晤言之适不诬方将庶必贤於今日耳灵运之意谓他日人必以今日之乐为贤於昔人不诬之义如嵇叔夜养生论云一溉之益不可诬也五臣注词不逢故为笺云】

山谷外集诗注卷十五

山谷外集诗注卷十六

钦定四库全书

山谷外集诗注卷十六

宋 黄庭坚 撰

史 容 注

和刘景文【刘季孙字景文父平与西夏战于三川口死焉景文笃学能诗文爲两浙兵马都监东坡知杭州荐其才除知隰州】

追随城西园残暑欲退席【传灯录云六祖慧能答洪州法達云若不肯信者从他退席借使此二字】夜凉雨新休城谿挂苍壁【谿楼见陈胜传谿门注】佳人攜手嬉调笑忘日夕【乐天诗打嫌调笑易饮讶卷波迟自注云抛打曲有调笑饮酒有卷白波】刘侯本将家今爲读书客诗名二十年风雅自推激【杜诗词华倾後輩风雅藹孤騫又诗陶谢不枝梧风骚共推激】牛铎调黄钟【晋荀勗传初勗于路逢赵贾人牛铎识其声及掌乐音韵未调乃曰得赵之牛铎则谐矣遂下郡国悉送牛铎果得谐者北史长孙绍达传闻浮屠上铎鸣雅合黄钟】薪余合琴瑟【蔡邕传吴人烧桐以爨邕闻火烈之声因而裁爲琴果有美音而尾犹焦故时人名曰焦尾琴】食无千户封【汉货殖传此其人皆与千户侯等】句有万人敌【项羽传学万人敌耳兼用老杜白也诗无敌之意】颇类邳侯家连墙架书册【邳侯书见前注退之送石洪序云戒行李载书册】残编汲县冢【杜预经传集解後序云太康元年汲县有发其界内旧冢者大得古书皆简编科斗文字】半隶鸿都壁【汉灵帝元和元年二月始置鸿都门学书法书要录载王逸少笔阵图云蔡尚书入鸿都观碣十句不反嗟其不羣退之石鼓歌云观经鸿都尚填咽盖熹平四年三月诏诸儒正五经文字命议郎蔡邕爲古文篆隶三体书之刻石于太学门外使後生晚学咸取正焉碑始立其观覽及摹写者车乘日千两填塞街陌退之所云盖出于此按汉书初无鸿都字山谷所引用又出于韩诗也半隶谓三体书隶居其半】渠成亦秦利【汉沟洫志韩闻秦之好兴事欲罢之无令东伐使水工郑国间说秦令凿泾水以溉田中作而觉秦欲杀郑国郑国曰始臣爲间然渠成亦秦之利也秦以爲然卒使就渠】愿公多购获竟须卜比邻【左传匪宅是卜惟邻是卜汉孙宝传祭竈请比邻】劳苦相饮食身有小丑女【诸葛亮择妇得阿承丑女】已自喜翰墨要传未见书【见前注】遮眼差有益【传灯录僧问药山爲什麼看经师曰只图遮眼】人生但安乐【国语云人生安乐孰知其他】券外岂吾力【庄子券内者行乎无名券外者志乎期实注云券分也】分鹿谁觉梦【梦鹿出列子见前注】亡羊路南北【列子曰杨子之邻人亡羊既率其党又请杨子之竖追之杨子曰嘻亡一羊何追者之衆邻人曰多岐路既反问获羊乎曰亡之矣岐路之中又有岐焉吾不知所之所以反也】公今百寮底【杜诗有才无命百寮底】雪髮不胜帻爱公欲湔拂顾我已头白【见前注】

奉谢刘景文送团茶

刘侯惠我大玄璧上有雌雄双凤迹鹅溪水练落春雪【蔡君谟茶录云茶罗以絶细为佳罗底用蜀东川鹅溪画绢之密者投汤中揉洗以冪之诗意爲以白练爲罗茶如雪落也】粟面一杯增目力【粟面盖茗花也孟子既竭目力焉】刘侯惠我小玄璧自裁半璧煮琼糜【离骚经云精琼糜以爲粇糜音糜借此以喻点茶如茶録所谓汤少茶多则粥面聚】收藏残月惜未碾直待阿衡来说诗【匡衡传无说诗匡鼎来】绦囊团团余几璧因来送我公莫惜个中渴羌饱汤饼【渴羌汤饼见前注】鸡苏胡麻煮同吃【本草水苏一名鸡苏胡麻一名巨胜今油麻】

谢景文惠浩然所作廷珪墨

廷珪麝墨出苏家【韩非子云齐伐鲁索谗鼎鲁人以其麝往齐人曰麝也鲁人曰真也东坡尝云予蓄墨数丸云是李廷珪墨虽形色异衆然岁久墨之乱真者多矣疑而未决今时多贵苏浩然墨浩然本用高丽煤杂远烟作之】麝煤漆泽纹乌鞞柳枝瘦龙印香字十袭一日三摩挲刘侯爱我如桃李挥赠要我书万纸不意神禹治水圭【禹贡禹锡玄圭】忽然入我怀袖里吾不能手抄五车书【五车书见前注】亦不能写论付官奴【周越书法苑云王献之字子敬羲之第七子五六岁时学书右军从後掣其笔不脱叹曰此儿後当有大名遂书乐毅论一篇与之後题云书赐官奴官奴子敬小字也刘梦得诗日日临池弄小雏逖思写论付官奴】便当閉门学水墨洒作江南骤雨图【李成有骤雨图山谷跋郭熙山水云熙因爲苏才翁家摹六幅李成骤雨从此笔法大进按名画记李成营丘人】

同景文丈咏莲塘

塘上鈎帘对晚香半斜红日已侵牀江妃羞出凌波鞞长在高荷扇影凉【吴都赋江妃于是往来洛神赋凌波微步罗鞞生尘】

送刘道纯【东坡与鲜于子骏简云故人刘格字道纯刘恕道原之亲弟读书强记辩博文词粲然而立节强鯁吏事亦健君实颇知之而余人未识也欲告子骏与一差遣收置门下敢保称职也旦夕归南康军待阙轼非?之为时惜才也】

五松山下古铜官【太白铜官山絶句我爱铜官乐千年未拟还要须回舞?拂尽五松山又游五松山诗自注云山在南陵铜井西五里按南陵县今爲铜陵县隶池州在唐亦尝爲铜官县】邑居褊小水府寛【文选西都赋名都对郭邑居相承杜诗吴吞水府寛】民安蒲鱼少囂讼【周礼职方氏兗州其利蒲鱼尧典帝曰囂讼可乎】簿领未减一丘盘【簿领见前注诗考盘在涧道纯当是主铜陵簿】胸中峥嵘书万卷簸弄日月江湖间【退之诗婆娑海水南簸弄明月珠】稠人广衆自神王【灌夫传云稠人广衆荐宠後辈庄子养生主篇神虽王不善也世说新语司马太傅多名士一时隽异庾文康云见子嵩在其中常自神王】按劔之眼白相看【按劔相眇白眼视之并见前注】老身风波谙世味【退之诗吾老世味薄】如食

橘柚知甘酸麒麟图画偶然耳【汉书甘露三年单于始入朝上思股肱之美图画其人於麒麟阁後汉刘昆传帝问前在江陵反风灭火後守弘农虎北渡河何以致之昆对曰偶然耳】半枕百年梦邯郸【见钱薛乐道诗注】平生樽俎宫亭上【官亭湖属江州及南康军荆州记曰官亭湖即彭蠡泽】涉世忘味皆朱顔此时阿翁尚无恙【阿翁谓刘涣凝之也庐山记云凝之筠州人天圣八年擢进士第居官有直气不屑辄弃去卜居落星渚常乘黄犊往来庐山中】追琢秀句酬江山【诗追琢其章秀句见前注】堂堂今为蛻蝉去【史记屈原传蝉蛻於浊秽】五老偃蹇无往还【寰宇记五老峯在江州德化县悬崖突出如五人相对】大梁城中笏挂颊【大梁城汴京也笏挂颊用王徽之顾西山言口气事】颌髭今成雪点斑【退之云若摘颌底髭】青云何必出公右【汉田叔传上召见与语汉廷臣无能出其右者】亨衢在天无由攀椎鼓转船如病已【杜诗打鼓发船何郡郎】梦想楼台落星湾【寰宇记落星寺在江州庐山东周回一百五步高丈许图经云昔有星坠水化为石当彭蠡湾中故呼落星湾】子政诸儿喜文史阿秤亦闻有笔端【子政谓刘恕道原也外集有过致政屯田刘公隐庐诗亦云忆昔子政在为翁数解顔元佑八年改葬道原山谷志之曰初凝之忿世不容弃官老於庐山之下至道原而节愈高又自以源出歆向务追配前人则子政云者比道原於刘向也其志又云生三男羲仲和叔秤才器皆过人和叔以文鸣而秤笃行不幸相继死韩诗外传君子避三端避文士之笔端】丹徒布衣未可量【南史刘穆之传谓所亲曰贫贱常思富贵富贵必践危机今日思为丹徒布衣不可得也此亦用刘家事】诗书且对藜藿盘【家语子路曰常食藜藿为亲负米絶宣传浆酒藿肉注云藿豆叶也】穴中生涯识陰雨木末牖户知风寒【见前注】我今四壁恋微禄知公未能长挂冠【後汉逢萌传王莽杀其子萌即解冠挂东城门归将家浮海陶弘景挂冠神武门】

送薛乐道知郟乡

黄山叶县连墙居【汝州叶县有黄成山山谷为叶尉同官也】谢公席上对携菹双鬟女弟如桃李早许归我舍中雏【诗何彼穠矣华如桃李笺云兴王姬与齐侯之子顔色俱盛也汉张耳传舍中人皆笑此摘其字】平生同忧共安乐【史记范蠡曰越王可与共患难不可与共安乐】岁晚相看青云衢去年樽酒辇毂下【司马迁书云待罪辇毂下曹子建表出从华盖入侍辇毂】各喜身爲反哺鸟【反哺鸟见前注】城头归鸟尾毕逋【汉灵帝纪注云桓帝之初京都童謡曰城上乌尾毕逋杜诗城头乌尾讹】春寒啄雪送行车解佩我无明月珠【列仙传二女步游江滨郑交甫挑之女解佩与之数十步空怀无佩女亦不见诗曰何以赠之琼瑰玉佩汉邹阳书曰明月之珠】折柳不对千里驹【折柳赠行也古歌曲有折杨柳无玉佩以赠送而徒折柳与千里马不相称也千里驹见前汉宗室刘德传】念君胸中极了了作吏辨事犹诗书浊酒挽人作年少关防心地亦时须【楞严经当平心地则世界地一切皆平杜诗延州秦户北关防犹未已又诗君臣各有分管葛本时须】郟乡县古民少讼但问自己已不关渠【杜诗治生但耕凿只有不关渠民之治否在长吏之邪正耳】登临一笑双白髮宜城冻笋供行厨【郟乡属均州宜城属襄阳府】人生此乐他事无行李道出汉南都寄声诸谢今何如【文选张平子南都赋李善曰南阳郡治宛在京之南故曰南都翰曰南都在南阳光武旧里以置都焉桓帝时议欲废之故衡作是赋汉之南都今邓州也山谷继室南阳谢景初师厚之女也自襄阳至郟乡必取道南阳故诗云尔左传襄八年不使一介行李告于寡

君】谢公书堂迷竹坞【庄子云桓公读书堂上】手种竹今青青否【章台柳昔日青青今在否此以言竹】我思谢公泪如雨【诗泣涕如雨古乐府乌夜啼停梭怅然忆远人独宿空房泪如雨】属公去洒穰下土【邓州治穰县】

寄朱乐仲

故人昔在国北门邻舍杖藜对樽酒十五余年乃一逢黄尘急流语马首【文选恨赋云黄尘匝地注引山阳公载记云鸣鼓雷震黄尘蔽天急流盖用後汉马后纪车如流水马如龙也左传惟予马首是瞻】懒书愧见南飞鸿君居三十六峯东【三十六峯谓嵩山见前注白乐天诗何以嵩峯三十六长随申甫作家山】我心想见古人面晓雨垂虹到望崧【洛阳嵩山嵩亦作崧】

赠陈元舆祠部

武成园木锁中秋久得汀州刺史游招唤丁宁方邂逅谁言天网漏吞舟【实録元佑二年八月祠部郎中陈轩爲主客郎中元舆轩字也武城王庙即考试院陈祠部与山谷试闈中同事前集亦有戏答陈元舆诗云平生所闻陈丁州此诗亦同时作老子天网恢恢疎而不失汉酷吏传叙号爲网漏吞舟之鱼曹子建牋设天网以该之顿八紘以掩之】

松下渊明【此诗在前集已有注画本今藏眉山陈氏与板本小异今录于此】

南渡诚草草长沙济艰难夜半舟移岸今无晋衣冠松风自度曲我弦不须弹慧远香火社遗民文字禅虽非老翁事幽尚亦可欢客来欲开说觴至不得言【蜀本诗集前一篇注云皆试院作後一篇载外集当是初本又蜀本石刻真迹题云题李伯时所作松下渊明而第三第四句亦不同云平生梦管葛把菊见南山】

老杜浣花谿图引【金陵续帖山谷有草书此诗其间多不同如碧鸡坊西结茅屋百花潭水濯冠纓作浣花溪边筑茅屋百花潭底濯冠纓空蟠作独蟠探道作谭道且眼前作但眼前乐易作乐逸园翁作田翁皆去作皆出酒船作江楼无主看作烂漫列解鞍脱作干戈解不用作不愿平安报作平安信铺墙作铺壁常使作长使千古无作古今无因附于此】

拾遗流落锦官城【杜诗花重锦官城】故人作尹眼爲青【故人严武也眼青见前注】碧鸡坊西结茅屋【杜诗时出碧鸡坊坊名取碧鸡金马之义】百花潭水濯冠纓【杜诗万里桥西宅百花潭水庄百花潭事盖节度使崔宁妻冀国夫人家于浣花溪上夫人初爲儿童有异僧过其家徧身疮秽夫人奉之甚谨僧持敝衣谓曰爲我濯此夫人即就溪浣之莲花随出潭中及贵俗呼百花潭】故衣未补新衣绽【礼记内则衣裳绽裂纫箴请补缀】空蟠胸中书万卷【杜诗读书破万卷】探道欲度羲黄前【陶渊明与子俨等疏云五六月中北窗下遇凉风至自谓是羲黄上人南史王僧虔传駸駸常欲度骅骝前摘此二字】论诗未觉国风远干戈峥嵘【一作终风且霾】暗?县【文选谢朓诗霸功兴?县注引说文曰?籀文字字杜诗

宇县复小康】杜陵韦曲无鸡犬【老杜赠韦七诗云时论同归尺五天自注云俚语云城南韦杜去天尺五】老妻稚子且眼前【杜诗老妻画纸爲碁局稚子针作钓钩】弟妹飘零不相见【杜诗干戈犹未定弟妹各何之又云丧乱闻吾弟饥寒傍济州人稀吾不到兵在见何由】此公乐易真可人【蜀志费祎传君行可人字本出礼记】园翁溪友肯爲邻【杜诗溪友得钱留白鱼又诗王翰愿卜邻】邻家有酒邀皆去【杜诗田父要皆去邻家问不违要邀义同】得意鱼鸟来相亲【世说简文入华林园顾谓左右曰会心处不必在远絜然林木不觉鸟兽禽鱼自来亲人太白鸣皋歌曰白鸥兮飞来长与君相亲】浣花酒船散车骑野墙无主看桃李【杜诗手种桃李非无主野老墙低还是家又云桃花一簇开无主】宗文守家宗武扶【老杜云熊儿幸无恙骥子最怜渠又有示宗文宗武两诗宗武生日诗注云宗武小子骥子陈无已和饶节用周昉昼李白真诗云君不见浣花老翁醉骑驴熊儿捉辔骥子扶金华仙伯哦七字好事不复千金摸谓此诗也金华谓山谷】落日蹇驴驮醉起【杜诗蹇驴破随金鞍】愿闻解鞍脱兜鍪【书惟甲冑起戎注甲冑冑兜鍪也汉韩延寿传披甲鞬鍪注即兜鍪也退之诗边封脱兜鍪】老儒不用千户侯【老杜忆背云老儒不用尚书郎乐府木兰歌木兰不用尚书郎】中原未得平安报【杜诗夕烽来不近每日报平安】醉里眉攒万国愁【上四字作清扬之间驴阜杂记远法师结白莲社以书招渊明渊明造焉远因勉以入社陶攒眉而去杜诗故国愁眉外长歌欲损神】生绡铺墙粉墨落【老杜用尽口佳此志气远岂惟粉墨新】平生忠义今寂寞兒呼不苏驴失脚犹恐醒来有新作常使诗人拜画图煎胶续弦千古无【东方朔十洲记煮凤喙麟角合煎作胶名为续弦胶博物志汉武帝时西海国献胶五两以付外库余半两使者佩以自随後从帝射于甘泉帝弓弦断西使乞以所余胶续之弦遂相着使力士各引一头终不相离因名续弦胶杜诗麟角凤嘴世莫辨煎胶续弦奇自见杜牧之读韩杜集云杜诗韩笔愁来读似倩麻姑痒处天外凤凰谁得髓无人解合续弦胶】

戏和舍弟船场探春二首

雨余禽语催天晓月上梨花放夜阑莫听游人待妍暖十分倾酒对春寒【李白诗月上飞天镜王荆公诗娟娟月上初】

百舌解啼泥滑滑【梅圣俞禽言四首其一竹鸡云泥滑滑苦竹冈雨潇潇马上郎泥滑滑蜀人号为鸡头滑东坡诗泥声厌听鸡头鹑】忽成风雨落花天【颜延年诗寄语落花风莫吹花落尽】城南一段春如锦唤取诗人到酒边

次韵舍弟题牛氏园二首

春与园林共晚人将蜂蝶俱来【唐王驾诗蛺蝶飞来过墙去】樽前鸟歌花舞【李太白诗好鸟迎春歌後院飞花送酒舞前檐】归路星翻汉回【明月清风良宵会同星河易翻欢娱不终此广记所载鬼诗也苏黄皆喜为人书之字本出文选鲍明远舞鹤赋云星翻汉回晓月将落】

春事欲了鶯催主人虽贫燕来【武瓘诗花开蝶满枝花谢蝶还稀惟有旧巢燕主人贫亦归

王荆公诗鷺犹来旧友燕不背贫家】玉烛传杯未厌【尔雅四时和谓之玉烛此借使其字杜诗传杯不放杯】金吾静夜惊回【本或作昼夜或作尽夜今定为静夜唐十六卫有左右金吾卫盖循汉执金吾之名掌京城巡警韦述西都新记云京城街衢有金吾晓暝传呼以禁夜行惟正月十五日夜敕金吾弛禁前後各一日杜诗醉归应犯夜可怕李金吾】

急雪寄王立之问梅花【王才元舍人名棫立之其子也字直方是年出贡院作】

红梅雪里与蓑衣莫遣侵寒鹤膝枝【吴都赋家有鹤膝户有□渠借此以言梅枝之瘦也】老子此中殊不浅【庾亮在武昌诸佐吏乘秋夜共登南楼俄而亮至诸人将起避之亮曰老子于此处兴复不浅】尚堪何逊作同时【杜诗东阁观梅动诗兴还如何逊在扬州梁何逊有诗名作扬州法曹廨舍有梅花盛开尝吟咏其下後居洛思梅花西请其任司马相如传上曰朕独不得与此人同时哉】

又寄王立之

南人羈旅不成归梦绕南枝与北枝【蜀川红梅阁鬼诗南枝向暖北枝寒】安得孤根连夜发要当雪月并明时【花须连夜发见前注】

王立之以小诗送并蒂牡丹戏答二首

分送香红惜折残【邵尧夫□寄梅花诗太守分香及野人韩魏公锦被堆诗香红不解知人意睡取东君不放回】春阴醉起簿罗寒不如王谢堂前燕会见新妆并倚栏【刘梦得诗旧时王谢堂前燕飞入寻常百姓家唐王谢航海至一州见翁媪皂服引见王王以女妻之谢问曰此何所也女曰乌衣国也後王取飞云轩令谢入其中闭目少顷已至其家梁上双燕呢喃下视谢乃悟所止燕子国也因并记之】

露曦风晚别春丛拂掠残妆可意红【王荆公诗荷花称意红】多病废诗仍止酒可怜虽在与谁同【玉台新咏有歌词云东飞伯劳西飞燕其末云空留可怜与谁同】

从王都尉觅千叶梅云已落尽戏作嘲吹笛侍儿

若为可耐昭华得【柳子厚诗若为化作身千亿遍上峯峦望故乡驸马都尉王晋卿家吹笛妓名昭华】脱?看髮已微霜【杜诗脱帽露顶王公前】催尽落梅春已半【乐府诗集汉横笛曲有梅花落其序云梅花落本笛中曲唐大角曲亦有大梅花小梅花等曲今其声犹有存者李太白诗黄鹤楼中吹玉笛江城五月落梅花】更吹三弄乞风光【晋桓伊传王徽之泊舟青溪侧伊于岸上过令人谓伊曰闻君善吹笛爲我一奏伊踞胡牀为作三调弄选诗风光草际浮杜诗传与风光共转流】

次韵李士雄子飞独游西园折牡丹忆弟子奇二首【旧本共三首前二首云花开西寺十里

雪管领须倾三百盃已拨醅闌如蚁望君及得禁烟回东阳瘦尽吟诗骨冷落花前饮凤团
魏紫姚黄满京洛大名城里看山丹而此本第一首却题作再和子飞寄子奇】

西园春色才桃李蜂已成围蝶作团更欲开花比京洛放教姚魏接山丹【欧阳公花品云姚
黄魏紫以姓着苏门下种山丹诗云淮阳千叶花到此三百里城中衆名园接栽比桃李乘秋
种山丹得雨生可喜山丹非佳花老圃有深意宿根已得土絶品皆可寄又种花诗云山丹得
春雨艳色照除末品何曾数羣芳自不知今秋接千叶试取洛人余】

桃李陰中五兄弟扶将白髮共传盃风吹一鴈忽南去空得平安书信回【扶将传盃见前注
】

和曹子方杂言【曹辅字子方为太仆寺丞前集有次韵答曹子方杂言此篇亦次韵也而不
言次韵诗意略同不应再出又不称再和疑是先作此篇後复审易故两存耳此诗盖子方未
出使以前所作也】

正月尾垂云如覆盃鴈作斜行书三十六陂浸烟水【王荆公诗三十六陂烟水白头想见江
南】想对西江彭蠡湖【三十六陂在扬州天长县此据实录蒋之奇传天长今蜀旻军彭蠡
湖在江州】人言春色浓如酒【杨文公谈苑载郑文宝诗杜曲花光浓似酒灞陵春色老於
人】不见插秧吴女手【老杜补稻畦水诗云插秧适云已】冷卿小坞颇藏春【语録京师
谓宗正为冷谓其管玉东坡诗冷卿谁复温刁景纯有藏春坞前集杂言云往时尽醉冷卿酒
旧注谓冷卿如水厅之类恐未必然外集有冷庭叟诗其序云庭坚於庭叟有十八年之旧庭
叟有佳侍儿因早朝而逸去前集诗云往时尽醉冷卿酒侍儿琵琶春风手又云谁怜相逢十
载後其事迹及岁月皆相似疑庭叟即冷卿也】张侯官居柳对门【张侯谓闽漕张仲谋】
当风横笛留三弄【见前注】烧烛围棋覆九军【庄子德充符篇勇士一人雄入於九军】
尽是向来行乐事每见琵琶忆朝云【李白诗瑶姬天帝女精彩化朝云洛阳加蓝记言河间
王有婢名朝云善吹箎诸羌叛令朝云假为老嫗吹箎羌皆流涕复降语曰快马健儿不如老
婢吹箎】只今不举蛾眉酒红牙扞拨网蛛尘曹侯束书丞太仆试说相马犹可人【庄子徐
无鬼见魏文侯曰尝语君吾相狗也吾相狗不若吾相马也武侯大悦而笑徐无鬼出女商曰
先生何以说吾君使吾君悦若此乎曰吾直告之吾相狗马耳】照夜白真乘黄【诗叔于田
乘乘黄老杜观曹将军画马图云将军得名三十载人间又见真乘黄曾貌先帝照夜白龙池
十日飞霹雳】万马同秣随低昂【楚辞服偃蹇以低昂】一矢射落皂鵬双【杜诗皂鵬寒
始急汉李广传是必射鵬者也北齐书斛律光传尝从世宗校猎见一大鸟云表飞扬光引弓
射之形如车轮旋转而下乃大鵬也】张侯犹思在戎行横山虎北开汉疆【横山隶西夏虎
北隶契丹御史中丞吕海上奏云种世衡有复横山之意而後保安军宋迪言招横山之民执
政深信其说欧阳文忠公集中有论塞垣云晋高祖得戎主为援乃以幽蓟山後为耶律之寿
故契丹有幽陵遂絶虎北之隘】冷卿智多髮苍浪牛刀发硎思一邦【并见前注】政成十
缀舞红妆【乐记云其治民逸者其舞行缀远】两侯不如曹子方朶頤论诗蝟毛张【易观
我朶頤贾谊传高帝功臣反者如蝟毛而起魏志苏则传则须髯悉张欲正论以对传巽招则
乃止退之书张巡传後云巡怒须髯辄张王摩诘送高判官诗如紫石棱须如蝟毛磔】龟藏

六用中有光【祖庭事苑曰杂阿含云有龟被野干所得藏六不出野干怒而舍去佛告诸比丘汝当如龟藏六白藏六根魔不得便楞严经云尘既不缘根无所偶反流全一六用不行东坡诗得如虎挟乙失若龟藏六龟首尾及四足凡六】何时端能俱过我扫除北寺读书堂【北寺即前集杂言所谓酺池寺也山谷入馆後寓居此寺读书堂见前庄子】菊苗煮饼深注汤更碾盘龙不入香【蔡君谟茶录云茶有真香而入贡者微以龙脑和膏欲助其香建安民间试茶皆不久香恐夺其真】

谢曹子方惠二物二首

飞来海上峰【地理书云钱塘县郭下有灵隐山昔梵僧云自天竺飞来】琢出华阴碧【华岳三峰也】炷香上裊裊映我鼻端白【楞严经世尊教我观鼻端白我初谛观经三十日见鼻中气出入如烟身心内明圆洞世界徧成卢净犹如琉璃烟相渐销鼻息成白心开漏尽诸出入息化爲光明照十方界得阿罗汉苏养直诗闭门聊想鼻端白宴坐倏移窗日红】听公谈昨梦沙暗雨矢石今此非梦耶烟寒已无迹

博山炉

短喙可候煎枵腹不停尘【庄子言魏王大瓠非不鸣然大也注云鸣然虚大貌嵇康养生论终朝未餐则嚣然思食鸣器皆言空腹山谷屡用此皆作枵字柳子厚祭裴令文云枵然其量廓尔其字】蟹眼时探穴龙文已碎身【茶录云候汤最难未熟则沫浮过熟则茶冗前世谓之蟹眼者过熟汤也龙文谓龙团】茗椀有何好【孟嘉传酒有何好而卿嗜之此摘其字】煮饼被宠珍【茶录又云饼中煮之不可辨故曰候汤难文选刘公干诗北面自宠珍言茶饼亦爲人所贵也】石交凉如此湔祓长日新【苏秦曰此所谓弃仇雠而得石交者也湔祓见前注】

煎茶饼

送高士敦赴成都钤辖二首【东坡集中亦有此诗乃元佑三年也】

玉钤金印临参井【淮南子云通许由之论金滕豹韬废矣注云金滕豹韬周公太公陰谋图王之书也国朝置钤辖曰钤曰滕曰韬皆取秘密之义王荆公诗府谟资石画兵略倚珠钤注珠钤犹玉钤谓兵书也欧阳诗将论纵横轻玉钤太白蜀道难云扞参历井仰胁息】控蜀通秦四十州日下书来望鸿鴈江头花发醉貔貅【礼记前有挚兽则载貔貅注貔貅亦挚兽也】巴滇有马驹空老【汉有巴郡治江州今重庆府所治巴县也後汉末分而爲三巴西郡治阆中今阆州所治县也巴东郡治鱼复今夔州所治奉节也与巴郡为三巴蜀马皆取之西南夷史记西南夷传云西南夷君长以竹数夜郎爲大其西靡莫之属以什数滇为大如淳曰滇音颠颠马出其国驹空老言不用兵也】林箐无人叶自秋能爲将军歌此曲鸣机割锦与缠头【开元中富人王元宝会宾客明日或问曰昨来有何高谈元宝曰但费锦缠头耳杜诗樽前还有锦缠头】

捧日高宣事东京四姓侯【後汉记显宗九年为四姓小侯开立学校置五经师注外戚樊氏郭氏陰氏马氏也高盖宣仁后家】军中闻俎豆【论语俎豆之事则尝闻之】庙胜脱兜鍪【退之诗边封脱兜鍪】烧烛海棠夜香衣药市秋君平识行李【严君平见汉书】河汉接天流

次韵子瞻送穆父二絶【钱勰字穆父元佑初知开封府迁给事中复以龙图阁待制知开封以系囚别所迁就园空出知越州越今为绍兴府】

渺然今日望人材【当今人物渺然见前注】每见紫芝眉宇开【唐元德秀字紫芝房琯每见叹曰见紫芝眉宇使人名利之心都尽】又触惠文江海去快帆谁与挽令回【汉张敞传弟武拜为梁相曰梁国大都吏民凋弊当以柱後惠文弹治之秦时狱法吏冠柱後惠文武意欲以刑法治梁】

谪官犹得住蓬莱【越州有蓬莱馆】抱牍人稀书卷开【牍谓案牍退之蓝田丞厅记云文书行吏抱成案诣丞】张敞忧眉应急召【此用尹京事也张敞治京兆为妇画眉长安中传张京兆眉妩有司以奏上问之云云】董宣强项莫低回【扬雄解难大语叫叫大道低回韩诗联句圣籍饱商摧危行无低回後汉董宣传为洛阳令湖阳公主苍头白日杀人宣格杀之主诉帝帝使叩头谢主宣不从强使顿之宣两手据地终不肯俯帝哭因敕强项令出】

和子瞻内翰题公择舅中丞山房

幽人八座复中台【东坡迁端明翰林侍读二学士守礼部尚书时公择为御史中丞】想见书堂山杏开四十余年僧屈指时因秋鴈寄声来【东坡集有李氏山房藏书记其略云余友李公择少时读书于庐山五老峯下白石庵之僧舍公择既去而山中之人思之指其所居为李氏山房藏书其後元丰七年东坡自黄移汝因往筠自筠游庐山书李公择白石山房云偶寻流水上崔嵬五老苍头一笑开若见谪仙还寄语匡山头白早归来屈指字见汉陈阳传屈指计其日曰不出五日】

题子瞻书诗後

诗就金声玉振【见孟子】书成蚕尾银钩【见前注】已作青云直上何时散发沧州【北山移文云干青云而直上散髮见前注】

戏赠高述六言

江湖心计不浅翰墨风流有余相期乃千载事要须读五车书【见前注】

戏题大年防御芦鴈【宗室大年名令□喜微行而善画小景诗盖有所讥也】

挥毫不作小池塘芦荻江村落鴈行虽有珠帘藏翡翠不忘烟雨罩鸳鸯【太白诗玉楼巢翡翠金殿锁鸳鸯】

避暑李氏园二首

李侯别馆锁春陰花径吹香可细寻【杜诗花径不曾缘客扫王荆公诗隔壁吹香併是梅又山櫻诗赖有春风嫌寂寞吹香渡水报人知】迸笋侵堦藤倒架【庾全诗迸溢林藪】主人重为费千金【用孙子日费千金字】

荷气竹风宜永日冰壶凉簟不能回题诗未有惊人句会唤谪仙苏二来【王立之诗话曰山谷尝避暑城西李氏园题两诗其一云题诗未有驚人句喚取谪仙苏二来秦少游言于东坡曰以先生为苏二大似相薄少章为予言】

次韵胡彦明同年羈旅京师寄李子飞三章一章道其困穷二章劝之归三章言我亦欲归耳胡李相甥也故有槟榔之句

看除日月坐中铨【言坐待铨选閱岁月之除去也唐制三铨选士尚书为尚书铨侍郎二人分为中铨东铨见德宗实录今铨法有尚书左右选侍郎左右选胡彦明隶侍郎左选故曰中铨文选褚渊碑云转吏部郎执铨以平注云韦昭汉书注曰铨称锤也声类曰铨所以称物】一岁应无官九迁【文选任彦升代范云谢表云千秋之一日九迁荀爽之十旬远至方之微臣未为速达注云千秋自寝园郎论戾太子事一日超九级至大鸿胪退之上张建封书虽曰受千金之赐一岁九迁其官】葱韭盈盘市门食【市门见前注】诗书满枕客牀毡【杜诗坐客寒无毡】留连节物孤朋酒【幽风朋酒斯餐杜诗朋酒日懽会】恼乱邻翁謁子钱【汉货殖传吴楚兵之起长安列侯封君行从军旅齎贷子钱家以为关东成败未决莫肯予惟母盐氏出捐千金贷其息十之】谁料丹徒布衣得困穷且忍试新年【南史刘穆之传曰今日思为丹徒布衣不可得也穆之少时家贫好往妻兄家乞食食毕求槟榔江氏兄弟戏侮之按尔雅妻之舅弟为甥诗序相甥盖谓此】

丁未同升乡里贤【丁未治平四年同登第】别离寒暑未推迁【贾谊鵬赋万物变化固无休息斡流而迁或推而还太白诗百齡何蕩漾万化相推迁渊明诗序云日月推迁】萧条羈旅深穷巷蚤晚声名上细毡【汉王吉传諫昌邑王疏曰广厦之下细旃之上注云旃与毡同】碧嶂青江原有宅白鱼黄雀不论钱【杜诗白鱼如切玉朱橘不论钱】槟榔一斛何须得李氏弟兄佳少年【斛貯槟榔见前注太白诗何时黄余盘一斛荐槟榔】

畏人重禄难堪忍【文选魏文帝诗弃置勿复道客子常畏人】閱世浮云易变迁徐步当车饥当肉【战国策齐宣王见顔觸云云觸辞去曰觸愿得归晚食以当肉安步以当车无罪以当贵东坡答毕仲举书云偶读战国策见处士顔觸之语晚食以当肉欣然而笑若觸者可谓巧于居贫者也菜菽黍差饥而食其味与八珍等而既饱之後刍黍满前惟恐其不持去也】鋤头为枕草为毡原无马上封侯骨【见前注】安用人间使鬼钱【见前注】不是朱门争?

事清溪白石可忘年【乐天诗白石清泉就眼来杜诗尔辈可忘年】

与胡彦明处道饮融师竹轩

井寒茶鼎甘竹密午陰好【文选谢灵运诗密竹使径迷】瓜尝邵平种【见前注】酒为何侯倒【晋何充字次道能饮酒雅为刘惔所贵惔每云见次道饮令人欲倾家酿言其能温克也】倦须盘礴羸归可倒着?欲去更少留道人谈药草【盘礴羸见前注晋山简传云日夕倒载归茗

无所知时时能骑马倒着白接?法华经有药草喻王续使奴婢自种黍莳药草自供】

谢送宣城笔【山谷草书此诗又跋云李公择在宣城令诸葛生作鸡距法题云草玄笔以寄孙莘老】

宣城变樣蹲鸡距【白乐天鸡距笔赋足之健者有鸡足毛之劲者有兔毛就足之中奋发者利距在毛之内秀出者长毫合为乎笔正得其要矣】诸葛名家捋鼠须【草书本作拔鼠须法书要録云右军写兰亭序以鼠须笔世说王羲之得用笔法于白云先生遗之鼠须笔又云鍾繇张芝皆用鼠须笔】一束喜从公处得千金求买市中无漫投墨客摹科斗【子墨客卿问于翰林主人见扬雄长杨赋】胜与朱门饱蠹鱼愧我初非草玄手不将闲写吏文书

王彦祖惠其祖黄州制草书其後【其祖禹偁字元之咸平中自西掖谪知黄州】

脱略看时辈【江淹赋脱略公卿跌宕文史老杜壮游诗脱略小时辈结交皆老苍】诸君等发蒙【汲黯传淮南子谋反憚黯曰黯好直諫守节死义至说公孙弘等如发蒙耳】董狐常直笔【左传宣元年赵穿攻灵公於桃园宣子未出山而复太史书曰赵盾弑其君宣子曰不然对曰子为正卿亡不越境反不讨贼非子而谁孔子曰董狐古之良史也书法不隐修太祖实录禹偁书其事执政以禹偁轻重其间出知黄州】汲黯少居中【黯传黯以数切諫不得久留内袁盎传盎以数直諫不得久居中】鵬入迁臣舍【汉贾谊为长沙傳有鵬飞入谊舍眼似鵩不祥鸟也谊自伤悼以为寿不得长元之谪黄州其事大类此东坡在黄作五禽言其一云使君唱蕲州更唱蕲州鬼自注云王元之自黄移蕲州闻啼鸟问其名或对曰此名蕲州鬼元之大?之果卒於蕲】乌号厌世弓【言元之未责黄州时太宗已上仙矣封禅书云黄帝铸鼎既成有龙垂胡髯下迎黄帝帝上骑小臣不得上乃悉持龙髯髯拔堕帝之弓百姓乃抱其弓与龙髯而号名其处曰鼎湖弓曰乌号庄子天地篇千岁厌世去而上仙】平生有嘉树犹起九原风【左传韩宣子来聘公享之韩子赋角弓既享宴于季氏有嘉树焉宣子誉之武子曰宿不敢封殖此树以无忘角弓遂赋甘棠诗意谓元之名德在人如其宰上之木人思之不忘也檀弓赵文子与叔誉观乎九原云云李白诗更寻嘉树传不忘角弓诗】

送徐景道尉武寧

李苦少人摘【见前注】酒醇无巷深【古语美酒无曲巷】当官莫避事【左传当官而行

】为吏要清心【清心见前注】葛藟松千尺【国风緜緜葛藟】寒泉纒百寻【庄子纒短者不可以汲深】公朝有汲引【汉刘向云禹稷臯陶转相汲引】吾子茂徽音【诗太姒嗣徽音谢灵运诗长絶子徽音】

黄綬补一尉【朱博传刺史不察黄綬注丞尉职卑皆黄綬李太白称赵少府才貌瓌雅志气豪烈以黄綬作尉泥蟠当涂亦鸡栖鹤笼不足以窘束鸾凤耳】还依水竹居身随南渡马【晋五马渡江一马化为龙退之诗一马南渡开新主此摘其字】书寄北来鱼风俗谙邻并艰难试事初官闲莫歌舞教子诵诗书【邻并事初使俗语所谓以俗为雅也】

杜似吟院二首

日长吟院无公事燕入花开必有诗莫道南风吹鴈去春来亦有北风时【世说鸿鴈知避陰阳寒暑者春则避阳暑而北秋则避陰寒而南退之诗嗷嗷鸿鴈鸣且飞穷秋南去春北归】

吟院虚明如画舫想成檻外是长江杜郎忽作扬州梦雨带风沙打夜窗【唐杜牧之诗三年一觉扬州梦赢得青楼薄行名】

岁寒知松柏【此诗效进士体元佑间作有两篇其一见前集】

松柏天生独青青贯四时【礼记其在人也如松箭之有筠也如松柏之有心也贯四时而不改柯易叶庄子受命于地惟松柏独也在冬夏青青】心藏後凋节岁有大寒知【论语岁寒然後知松柏之後凋也】惨淡冰霜晚轮囷涧壑姿【轮囷见前注】或容蝼蚁穴【老杜古柏行苦心岂免通蝼蚁】未见斧斤迟摇落千秋静婆娑万籁悲郑公扶贞观已不见对彝【唐魏徵传帝曰此徵劝我行仁义既效矣惜不令封德彝见之杜牧之题魏文贞诗可怜贞观太平後天且不留封德彝】

效进士作观成都石经【成都记孟蜀时伪宰相母昭裔以俸金刻九经於石其毛诗仪礼礼记皆秘书郎张绍文书用礼校书郎孙朋古书周易国子博士孙逢吉书尚书校书郎周德政书尔雅简州平泉令张德昭书题云广政十四年盖孟昶所镌惟三传至皇佑元年方毕工後列知益州枢密直学士右谏议大夫田况名】

成都九经石岁久麝煤寒【麝煤寒见前注】字画参工拙文章可鉴观危邦犹劝讲【後汉杨秉传以明尚书徵入劝讲注云犹侍讲也】相国校雕刊羣盗烟尘後诸生竹帛残【刘向典校书藉皆先书竹帛改易刊定可缮写者以上事见御覽简门】王春尊孔氏【孔子作春秋首书春王正月】乙夜诏甘盘【汉官仪中黄门持五夜谓自甲夜至戊夜杜阳杂编文宗视朝後即閱羣书谓左右曰若不甲夜视事乙夜观书则何以为人君耶书说命旧学于甘盘】愿比求诸野【汉艺文志仲尼有言礼失求诸野】成书上学官【尚书序悉上送官藏之书府汉文翁为蜀郡守起学官于成都市中学官谓学舍也刘歆移书让责太常博士欲建立左氏春秋逸礼毛诗尚书皆列于学官为置博士】

送曹子方福建路运判兼简运使张仲谋【此诗集前两诗後四五诗皆是元佑三年作按实录元佑三年九月太仆寺丞曹辅权发遣福建路转运判官辅字子方】

曹侯黄须便弓马【魏志任城王彰太祖之子大破乌桓归功诸将太祖喜持彰须曰黄须竟大奇也】从军赋诗横槊间【横槊见前注】阿瞒文武如兕虎【魏志帝纪注云太祖一名吉利小字阿瞒诗云匪兕匪虎率被旷野】远孙风气犹斑斑【上林赋被斑文】昨解弓刀丞太仆【退之送郑尚书序太府帅或道过其府府帅必戎服左握刀右属弓矢迎于郊】坐看收驹十二闲【杜诗伊昔太仆张景顺监收驹閱清峻一作考牧攻驹周礼校人天子十有二闲邦国六】远方不异辇毂下【司马迁传待罪辇毂下】诏遣中使哀恫鰥【康诰王曰呜呼小子封恫鰥乃身注恫痛鰥病】吾闻斯民病盐策【见前注】天有雨露东南乾谢君论河秉禹贡【用左传鲁秉周礼之义平当以明禹贡行河详见前注】诘难蠡起安如山【杜诗风雨不动安如山】老郎不作患失计【论语苟患失之无所不至矣】凜然宜着侍臣冠愿公不落谢君後江湖以南尚少寬百城閱人如閱马泛驾亦要知才难【汉武纪五年诏曰泛驾之马?弛之士亦在御之而已泛方勇切刘禹锡嘉话石季龙少好挟弹其父怒之母曰健犢须走车破轅良马须逸鞅泛驾】监车之下有絶足【战国策汗明见春申君曰驥之齿长矣服盐车上太行中坂迁延负轅不能上伯乐遭之下车攀而哭之解紵衣而羃之於是俯而喷仰而鸣欣伯乐之知己也魏文帝与孙权书中国虽多马其知名絶足亦少】败羣勿纵为民残【卜式传式言牧羊曰非独羊也治民亦犹是矣以时起居?者辄去母令败羣左传政寬则民慢猛则民残】官焙荐璧天解顔【官焙谓建安北苑所造茶也】淪汤试春聊如餐【乐府诗上言加餐食下言长相忆】子鱼通印蚝破山【遁斋闻覽云莆阳通印子鱼名天下盖有通应侯庙庙前有港其鱼最佳今人必求其大可容印者谓之通印子鱼荆公云长鱼俎上通三印此传闻之误也蚝相粘为山见前注】不但蕉黄荔子丹【退之罗池庙碑荔子丹兮蕉叶黄杂青疏兮进□堂】道逢使者汉郎官【谓张仲谋】清溪弭节问平安【屈原九歌云朝骋骛兮江皋夕弭节兮北渚枚乘七发弭节乎江浔】天子命我参卿事【晋孙楚传为石苞参军初至曰天子命我参卿军事杜诗参卿休坐幄荡子不还郷注老杜为劔南节度参谋谓知参卿】奋然相对亦可欢回波一醉嘲桮桮【本事诗中宗朝裴谈为御史大夫妻悍妬谈畏之内宴互唱回波词有优人唱云波回尔时桮桮怕妇也是大好外间只有裴谈内里无过李老韦后意色自得此句当有为】山驿官梅破小寒【杜诗梅筑腊前破又云东阁官梅动诗兴】

山谷外集诗注卷十六

山谷外集诗注卷十七

钦定四库全书

山谷外集诗注卷十七

宋 黄庭坚 撰

史 容 注

戏赠曹子方家凤儿

拣芽入汤狮子吼【北苑贡茶録一枪一旗号拣芽上品拣芽蜡茶名也维摩经云演法无畏犹狮子吼此借用】荔子新剥女儿颊凤郎但喜风土乐不解生愁山叠叠目如点漆射清扬【晋杜乂传王羲之目之曰肤若凝脂眼如点漆此神仙人也诗云子之清扬正义曰眉之上下皆曰扬目之上下皆曰清】归时定自能文章莫随闽岭三年语转郤中原万籁簾【闽岭一作阿囿通典乐门凡箫一名籁礼明堂位女娲之笙簧闽人谓父为郎罢谓子为囿唐顾况囿哀闽曰郎罢别囿吾悔生汝囿别郎罢心摧血下隔地絶天及至黄泉不得在郎罢前】

次韵子瞻书黄庭经尾付蹇道士【东坡书黄庭经跋云成都道士蹇拱宸翊之葆光法师将归庐山东坡居士苏轼子瞻为书黄庭内景经一卷龙眠居士季公麟伯时为画经相赠之元佑三年九月二十二日时山谷亦正在史局山谷和篇其序云十月四日】

琅函绦简欒珠篇【黄庭经云玉书绦简赤丹文又云闲居欒珠作七言注秘要经云仙宫中有阳寥之殿欒珠之阙白乐天诗斜支花石□卧咏欒珠篇又诗入戒夜持香火印三元朝念欒珠篇】寸田尺宅可蘄仙【经云寸田尺宅可理生注谓三丹田之宅各方一寸尺宅谓面也】高真接手玉宸前【经云烧香接手玉华前又云太上大道玉宸居】女丁来谒粲六妍【经云神华执中六丁谒注云六丁陰神玉女也又引六甲符图言六丁名韩文公陆浑山火诗女丁归壬传世婚陰阳书大畏水以丁为壬妃壬公言水丁女言火】金龕闭欲形完坚【经云□珠固精养神根玉茂金龕常完坚】万物荡尽正秋天使形如是何尘缘【楞严经有六尘谓地火水风空见又有三缘谓世界衆生业果也】苏李笔墨妙自然万灵拱手书已传【汉郊祀志黄帝接万灵于明廷】传非其人恐飞蹇当付骊龙藏九渊【贾谊赋袭九渊之神龙】蹇侯奉告请周旋纬萧探手我不眠【左传奉以周旋庄子河上有家贫恃纬萧而食者其子没于渊得千金之珠其父谓其子曰取石来锻之夫千金之珠必在九重之渊而骊龙颌下子能得之必遭其睡也庄子释音纬织也萧荻蒿也织萧以为畚而卖之】

何氏悦亭咏柏

涧底长松天雨寒冈头老柏顔色悦【涧底松见前注文选叹逝赋信松茂而柏悦嗟芝焚而

蕙叹】天生草木臭味同【见前注】同盛同衰见冰雪君莫爱清江百尺船刀锯来谋岁寒节千林无叶草根黄苍髯龙吟送日月【东坡乐府咏松云双龙对起白日苍髯烟雨里杜诗非无江海志萧洒送日月】

次韵答少章闻雁聽鸡二首

平生絕少分甘处【司马迁传与士大夫絕甘分少师古曰自絕旨甘而与人共其多少】身要从师万事忘霜雁叫羣傾半枕【退之诗一一叫羣攘】梦回兄弟彩衣行【礼记父之齿随行兄之齿雁行彩衣用老莱子事见前注】

朝士闻鸡常半途朱门拥被不关渠秦郎五起聽三唱【李白白头吟五起鸡三唱清晨白头吟】残烛贪传未见书【见前注】

伯父祖善耆老好学於所居紫阳溪後小马鞍山为放隐斋远寄诗句意欲庭坚和之幸师友同赋率尔上呈【黄?年谱载山谷伯父诗并序云走伯行年七十有六近筑台于马鞍山□声泉溜足以忘年鲁直九侄为我乞诗朝中诸公要惊山祇突兀出听耳诗云直木皆先伐轮园却□寒时沾病者栗倒着挂时冠人乐观鱼尼山斋夸马鞍朝中乞佳句留与子孙看时山谷所永朝士和篇甚多今张文潜集中有和篇末句云平生未识面试作凹咸看今言师友同赋当是求东坡明年东坡已在杭矣】

樵入千岩静松含万籁寒儿童给行李藜蓀对衣冠【庄子徐无鬼篇逃虚空者藜藿柱乎黽黽之径藿徒吊反藿蓀同音】小檻聊防虎时来即解鞍阿翁吹笛罢怀昔泪相看【晋向秀闻嵇康被诛作思旧赋云邻人有吹笛发声寥亮追思畴苦游宴之好】

题李十八知常轩

身心如一是知常【老子知常曰明】事不惊人味久长【史记淳于髡传齐威王喜隐髡说之以隐曰国中有大鸟三年不飞不鸣王知此鸟何也王曰此鸟不鸣则已一鸣惊人】盖世功名碁一局【幽闲鼓吹云令狐相拟李远为杭州宣宗曰李远曰长日惟消一局碁岂可临郡】藏山文字纸千张【司马迁自序云整齐百家杂语藏之名山副在京师坡诗功名半幅纸儿女浪苦辛】无心海燕窥金屋【汉武故事金屋贮阿娇】有意江鸥傍草堂惊破南柯少时梦【见前注】新晴鼓角报斜阳【杜诗不劳钟鼓报新晴】

次韵奉荅吉邻机宜

点虜乘秋屡合围【礼记天子不合围诸侯不掩羣】上书公独请偏师【冯奉世子明讨羌愿益兵上让之曰大将军出必有偏将军何烦焉】庭中子弟芝兰秀【晋谢玄谢朗为谢安所器因戒子侄曰子弟何预人事譬如芝兰玉树欲使生於阶庭】塞上威名草木知【唐张万福传德宗以万福为濠州刺史召谓曰先帝改尔名正朕谓江淮草木亦知尔威名若从所

改恐贼不知是卿也复赐旧名】千里折冲深寄此【晏子春秋范昭谓晋平公曰齐未可并吾欲试其君晏子知之晋欲犯其乐太师知之于晁辍伐齐谋孔子闻之曰不出樽俎之间而折冲千里之外晏子之谓也文选任彦昇作齐竟陵行状深寄负图李白诗寄深且戎幕望重必台司】三衙虚席看除谁【三衙谓殿前都指挥使侍卫马军柳指挥使侍卫步军都指挥使】与公相见清班在仁祖重来筑旧基

题刘氏所藏展子?感应观音二首【张彦远历代名画记云展子?历北齐周隋为朝散大夫帐内都督触物留情悉皆絶妙尤善台阁人马】

人间犹有展生笔佛事苍茫烟景寒【退之诗萧萧风景寒】常恐花飞蝴蝶散明窗一日百回看【恐岁久化为蝴蝶也杜阳杂编穆宗殿前千叶牡丹始闻宫中夜有黄白蛱蝶万数聚集花间辉光照耀达旦乃去上令张密网于宫中遂得教百皆金玉也後开□厨覩金屑玉屑钱内将有化为蝶者乃觉焉杜诗自今以後知人意一日须来一百回东坡见吴道子画佛碎□诗素丝断续不忍看已作蝴蝶飞联翩】

羣盗挽弓江簸船【杜诗浪簸船应拆】丹青当在普通前【普通梁武帝年号时未有侯景之乱也】谁能与作赤挽板【当是护卫之物赤挽恐是赤栏外集有诗云横溪赤栏桥晏元献类要云台州有赤栏桥在江城临江】老笔犹堪壽百年

李濠州挽词二首

循吏功名两汉中平生风义最雍容鱼游濠上方云乐【见前注】鵬在承尘忽告凶【西京杂记云贾谊在长沙鵬鸟集其承尘而鸣长沙俗以鵬鸟至人家主人死谊作鵬鸟赋齐死生于荣辱以遣忧累焉】挂劔自知吾已许【吴世家季札遇徐徐君好季札劔口弗敢言季札心知之为使上国未献选至徐徐君已死乃解其宝劔系徐君冢木而去曰始吾心已许之岂以死背吾心哉】脱骖不为涕无从【檀弓云孔子之卫过旧馆人之丧入而哭之哀出使子贡脱骖而赙之子贡曰于门人之丧未有所脱骖脱骖于旧馆无乃已重乎夫子曰予向者入而哭之过於一哀而出涕子恶夫涕之无从也小子行之】百年穷達都归尽淮水空围墓上松

礼数最优徐孺子【见前注】风流不减谢宣城【见前注老杜诗裴使君诗礼加徐孺子诗接谢宣城】那知此别成千古未信斯言隔九京【礼记晋献文子曰从先大夫于九京注谓晋卿大夫之墓地在九京京盖字之误】落日松楸陰隧道西风萧瑟送铭旌善人报施今如此陇水长寒呜咽声【史记伯夷传或曰天道无亲常与善人若伯夷叔齐可谓善人者非?积仁洁行而饿死天之报施善人其何如哉乐府有陇头歌古词云陇头流水鸣声幽咽遥望秦川心肝断絶】

寄忠玉提刑【实录元佑五年六月巳未右宣德郎马城提点淮南西路刑狱八月戊戌改两浙提刑山谷有真蹟藁本题云赠送忠玉提刑朝□市骨薪千里作市□收駟骏别渭泾作有

渭泾喜剧部作宜剧部稍哀息作颇哀息眼终青作眼自青紫微禁作太微垣又按黄?年谱载其族伯父仲贲承天塔记云先生初自蜀出峡留荆州待辞免乞郡之命与府帅马城忠玉相从欢甚闻人陈举自台察出为运判先生未尝与之交也承天寺僧智珠造七级浮图乞记于先生一日记成忠玉饭诸部使者于浮图下环视先生书碑先生碑尾但云作记者朝奉郎新知舒州事豫章黄庭坚立石者奉议郎知府事荏平马城而已举与运判李植提举常平林虞相顾遽请于前曰某等愿托名不朽可乎先生不答举憾之知先生昔在河北与赵挺之有怨挺之执政遂以墨本走介献于朝廷谓幸灾谤国先生遂除名羈置宜州忠玉亦以辰州徭贼寇边监察御史席震继而劾之夺官羈置海州遂俱歿于贬所不踰年挺之去位而举因指青虫为龙物奏为祥瑞遂坐欺罔因备录以见忠玉交於山谷坐累而出小人陷君子之深其寓荆州盖建中靖国辛巳也因附见于此】

市骨薪千里【战国策郭隗对 昭王曰古之人君有以千金求千里马者三年不能得涓人言于君曰请求之君遣之三月得千里马马已死买其骨五百金反以报君君大怒曰安用死马而捐五百金涓人对曰死马且买之况生者乎马今至矣于是不能期年千里之马至者三】量珠买娉婷【张平子思玄赋斥西施而弗御兮紫骝裹以服箱司空圆擢英集序当西施之玩镜不宝蛾眉岂伯乐之停车空收骏骨山谷用此意朝野金战乔知之有婢碧玉武承嗣借而不还知之作绿珠怨曰石家金谷重新声明珠十斛买娉婷岭表録异梁氏女有容貌石季伦为交趾采访使以真珠三斛买之即绿珠也刘梦得泰娘歌斗量明珠鸟传意绀幘迎入专城居杜诗唤人看骝裹不嫁惜娉婷】驽骀参逸驾西子泣深屏【杜牧诗西子下姑苏一舸逐鸱夷】吾人材高秀胷次列渭泾【渭泾见前注】严能喜剧部持节按祥刑【□监子兹祥刑】萑蒲稍衰息【左传昭二十年郑子产辛子太叔为政不忍猛而寛郑国多盗取人于萑苻之泽太叔悔之兴徒兵以攻萑苻之盗尽杀之盗少止】郡县或空圉【王褒圣主得贤臣颂故有圉空之隆】读书头愈白见士眼终青【杜诗别来頤并曰相对眼终青三立之诗话云读书头欲白相对眼终青身更万事已头白相对百年终眼青碧镜白头知我老平生青眼为君明故人相见尚青眼新贵如今多白头江山万里将头白骨肉十年终眼青此东坡诗也用青眼对白头非一而工拙有差】今时斤斧地虚次待发劓【庄子刀刃若新发於劓汉贾谊传上疏云屠牛坦一朝解十二牛而芒刃不顿者所排击剥割皆衆理解也至于□髀之所非斤即斧夫仁义忠厚人主之芒刃也权势法制人主之斤斧也今诸侯王皆衆髀髀也释斤斧之用而欲嬰以芒刃臣以为不□则折杜诗遣词必中律利物当发劓】早晚紫微禁占来有使星【唐中书省开元中改曰紫微省禁即省也蔡邕独断云门户有禁故曰禁中孝元皇后父名禁当时避之故曰省中诗意谓省中人占星而知其召归也使星盖後汉李合传合汉中南郑人为幕门候吏和帝分遣使者微服军行观采风謡使者二人到益部投合候舍合问曰二君发京师时寧知朝廷遣二使耶二人惊相视问何以知之□指星示云有二使星向益部分野故知之】

次韵元日

会朝四海登图籍【东都赋春王三朝会同汉京是日也天子受四海之图籍】绛阙清都想盛容【列子周穆王篇王实以清都紫微帝之所居司马子微身居赤城名在绛阙】春色已

知回寸草【孟郊诗谁言寸草心报得三春晖】霜威从此霁寒松【见前注】饮如嚼蜡初忘味【楞严经云於横陈时味如嚼蜡】事与浮云去絶踪【选诗雨絶无还云又云风流云散一别如雨李善曰鸚鵡赋云何今日以雨絶陈琳檄吴将校曰雨絶于天诸人同有此言未详其始】四十九年蘧伯玉圣人门户见重重【庄子则阳篇蘧伯玉行年六十而六十化未尝不始于是之而卒诎之以非也未知今之所谓是之非五十九非也骆宾王帝京篇且论三万六千是寧知四十九年非李白紫微宫感秋四十九年非一若不可复】

题大云仓逵观台二首【池州泝流四十里至北岸蒋家沙又四十里至大云仓按同安志此诗注云大云仓即今枞杨镇去舒州一百四十里又云逵观台在枞阳镇东永利寺按山谷有手书石刻跋云永利禪寺东偏遵微径攀古松登高丘四达而所瞻皆数百里间其地主曰戴器之因名曰逵观台而属器之筑台于其上器之欣然曰敢不诺因为作二诗踰旬台成器之置酒命歌舞者二三时与镇官苏台苑光祖同赏焉余去越三年闻器之以疾不起但增感叹耳山荃荒芜好事者远闻而来或不得一登而去问其故曰更数尉以为台上窥见其室家故键阅而藏其钥余笑曰人家不过有五七妇女亦当在室屋中作女工事岂常锄芸于後园耶州西酺池寺僧伽浮图高三百六十尺下见亲贤宅?见禁中游人以时登未闻官典其钥也岳阳楼下瞰郡官数家游者无虚日特未之思耳余流落夔梓间九年而归见智达长老庄严此院甚有意思而诗以经元符剖击不存台上石刻闻尉公密令弯生碎公後來求故书遗之并记述键闲游人之意冀诸识者能愿之耳崇寧元年五月朔黄庭坚书盖绍圣元年甲戌以责命过归州作此诗至崇寧壬午赴太平经行作此跋自甲戌至壬午十九年戴郎台即戴器之也】

戴郎台上镜面平【同安志独无戴郎台疑是流俗所呼山谷始易名取贾谊赋逵人大观也石□聯句下与镜面平】逵人大观因我名何时燕爵贺新屋【淮南子云大厦成而燕雀相贺汤沐具而虬屈相吊杜诗□上炎天冰雪生高飞燕雀贺新成】唤取竹枝歌月明【刘梦得竹枝词引云余来建平里中儿聯?竹枝吹短笛击鼓以赴节音中黄钟之羽】瘦藤挂到风烟上乞与游人眼豁开不知眼界濶多少白鸟飞尽青天回【多心经无眼界无意识界】

送曹黔南口号【实录绍圣元年十二月甲午黄庭坚谪涪州别驾黔州安置二年四月二十三日黔川见谢表寓开元寺寺有摩园阁黔守曹谱字伯逵山谷初到黔南守待之甚厚与大主簿三十三书云太守曹供备谱济阳之侄通判张旣张景俭孙公休之妻弟皆闽雅桐顾如骨肉】

摩围山色醉今朝试问归程指斗杓荔子陰成棠棣爱【诗甘棠美召伯也蔽芾甘棠勿翦勿伐笺云思其人敬其树今以甘棠为棠棣】竹枝歌是去思謠【山谷尝云竹枝歌本出三巴其減在湖湘耳汉何武传所居无赫赫名去後常见思】阳关一曲悲红袖巫峡千波怨画桡归去天心承雨露双鱼来报旧宾僚

十四弟归洪州赋莫如兄弟四章赠行【十四弟即天民此诗年月不可考意在蜀中作附之庚辰岁】

恼人自作乐休休莫莫莫【司空图集休休亭记谓其才一宜休揣其分二宜休且耄而瞶三宜休因为耐辱居士歌咄诺休休莫莫伎俩虽多性灵恶赖是长教闲处着】相看将白头止有不如昨【乐天诗今既不如昔後当不如今】

北来哺慈乌南归护尔雏【林乌反哺见前注退之诗那暇更护鸡窠雏】昨夜云飞雁相随我不如【退之诗青青水中蒲长在水中居寄语浮萍草相随我不如】志欲收九族【庄子列御寇篇泽及九族本出尧典】别离乃同生【同生谓亲弟兄渊明送从弟诗礼服名羣从恩爱若同生淳化帖王逸少书云吾有七儿一女皆同生】谁能成此意惟有孔方书【言以贫而仕兄弟相别也晋鲁褒传着钱神论云云亲之如兄字曰孔方】大夫无恙时刻意教子弟【庄子刻意篇云刻意尚行离世异俗】归扫松楸下洒我万里涕【退之诗深思罢官去毕命依松楸】

以虎臂杖送李任道二首

走送书堂倚绦纱【後汉马融传常作高堂施绦纱帐前授生徒後列女乐】瘦藤七尺走惊蛇【邵尧夫诗古木参天罗剑戟长藤垂地走龙蛇】晴沙每要交头拄寻徧渔翁野老家

未衰筋力先扶杖【曲礼云老者不以筋力为礼汉贾山传虽老羸癯疾扶杖而往听之】能救衰年十二三【汉高祖纪士卒堕指者十二三注谓十人之中二三堕指今以言十分救得二三分也】八百老彭嗟杖晚可怜矍铄马征南【神仙传彭祖姓錢名铿至殷末已七百六十七岁而不衰论语窃比于我老彭矍铄见後汉马援传】

题王居士所藏王友画桃杏花二首【山谷元符三年五月复宣德郎自戎泝江省具姑于青神尉廨十一月复还戎过嘉州兴至乐山王朴子厚题桃杏花草书超逸今藏于洪雅杨氏戎今为叙州】

凌云一笑见桃花三十年来始到家从此春风春雨後乱随流水到天涯【传灯録福州灵云志勤禅师初在泐山因桃花悟道有偈曰三十年来寻剑客几逢落叶几抽枝自从一见桃花後直到如今更不疑】

凌云见桃万事无我见杏花心亦如从此华山图籍上更添潘阆倒骑驴【潘阆诗高爱三峯挿太虚回头仰望倒骑驴傍人大笑从他笑终拟移家向此居魏野赠阆诗晋贤放志多狂怪若比而今总未如从此华山图籍上又添潘阆倒骑驴】

碾建溪第一奉邀徐天隐奉议并效建除体【与晁无咎赠答诗虽同是建除体而非同时作当是徽宗初即位时作也】

建溪有灵草能蜕诗人骨【北苑供茶录以建溪所产为灵芽陈无已云学诗如学仙时至骨自换】除草开三径为君碾玄月满瓯泛春风诗味生牙舌平斗量珠玉【李白诗吐言贵珠

玉落笔回风霜又诗将欲维风雅岂徒清心魂韦庄读许浑诗千斛明珠量不尽刘梦得诗斗量明珠鸟传意今以比诗句也】以救风雅渴定知胸中有璀璨非外物执虎探虎穴【吴志吕蒙传不探虎穴安得虎子李白诗万里操戈探虎穴三盃拔剑舞龙泉】斩蛟入蛟室【吴越春秋荆有伧飞者得宝剑还沙江蛟夹绕其船□飞拔剑赴江斩蛟杀之文选海赋其垠则有天琛水怪蛟人之室以蛟为蛟借使其字耳】破镜挂西南【见前注】夜阑清兴发危言诸公上【论语?有道危言危行】殊胜弄翰墨成仁冒鼎镬【谓杀身以成仁】闻已归谏列【此语当谓邹志完实录元符三年正月徽宗即位二月己未上谓辅臣曰邹浩敢言旦夕当与召还癸亥除名勒停人邹浩为宣德郎三月辛未宣德郎添差袁州酒税邹浩为右正言】收汝救月弓蛙腹当坼裂【周礼庭氏掌射国中之天鸟若不见其鸟兽则以救日之弓救月之矢夜射之开元遣事长安城中每当月蚀叩士女取监向日击之盖云救月退之月食诗臣有一寸刃可剗凶蟊肠】开云照四海黄道行尧日【晋天文志黄道日之所行杜诗间阖开黄道刘禹锡望赋日转黄道天开碧落】闭门斲车轮出门同轨辙【传灯录潭州鹿苑和尚僧问如何是闭门造车师曰南岳石桥又问如何是出门合辙师曰拄杖头鞋言时政更新不谋于衆而皆合人心也】

再作答徐天隱

建德真乐国【建德之国见前注】万里渺中州【相如大人赋世有大人兮在乎中州】除荡俗氛尽心如九天秋满船载明月【见前注】乃可与同游平生期斯人共挟风雅輶【左传隐十一年颍考叔挟輶以走注輶车辕也杜诗风雅蕙孤騫】定知诗客来夜虹贯斗牛【白虹贯日见邹阳传】执斧修月轮【酉阳杂俎太和中有一人游嵩山迷路见一人布衣□一袱物方眠二人问其所自其人笑曰君知月乃七宝合成乎月势如丸其影日铄其凹处常有八万二千户修之予即一数开襍有斤凿数事言讫不见】链石补天阨【见前注】破的千古下乃可泣曹刘【子建公干也老杜诗破的由来事先锋孰敢争又寄李白云笔落惊风雨诗成泣鬼神】危柱鸣哀箏知音初见求【危柱见前注自喻其诗也时以吏部郎召故云初见求】成功在漏刻【光武纪寻□以自为功在漏刻意气甚逸】尧舜去共殳【共工驩儿也古文尚书驩儿作鵠殳言去章子厚蔡卞也】收此文章戏往作活国谋【文选孙楚与殷浩书爱民活国杜诗活国名公在拜坛羣寇疑又冀公柱石婆论道邦国活】开纳倾万方皇极运九畴【见?范】闭奸有要道新旧随才收【王立之诗话云山谷元佑初诗云人材包新旧王度济寛猛至建中初复有句云闭奸有要道新旧随才收又云不须要出我门下实用人材郎至公】

重贈徐天隱

建极临万邦【洪范皇建其有极当谓改元建中靖国有合前篇新旧随才收之意故尤欣然因再赓韵】稽古陛下圣【书若稽古帝尧退之诗曷不荐贤陛下圣】除书日日下有耳家相庆【书攸徂之民室家相庆】满意见升平【晋五行志哀帝隆和初童謡曰升平不满斗隆和那得久此摘其字】父老扶杖听【汉贾山传云山东吏布诏令民虽老羸癯疾扶杖而往听之】平生所传闻似仁祖德性定鼎百世长【左传王孙满对楚子曰成王定鼎于郊廓

卜世三十卜年七百【囊弓四夷静】【诗载囊弓矢】执事当前朝官冷殊未称【杜诗广文先生官独冷】破?风敲鼓简易不骑乘【史记商鞅传赵良曰五穀大夫劳不坐乘暑不张盖】危颠相扶持【见论语】泉石供嘲咏成乐涧阿中【卫国风考盘在涧考盘在阿毛云考成盘乐也】傲世似未敬收潦下秋船【楚词潦收而水清】期公拜嘉命【左传敢不拜嘉】陆士衡诗匪□伊始惟命之嘉【开元贞观事】杜诗忆昔开元全胜日又云渺然贞观初【身得见全盛闭门长蓬蒿或许老夫病】【三辅决录张仲蔚隐身不仕所居蓬蒿没人文选诗顾念张仲蔚蓬蒿满中园此诗具言朝廷进贤黜奸人心欣快庶几复见盛治如咸平景德间不啻唐之贞观开元也】

以十扇送徐天隐【前篇言官冷此篇言坐客有毡皆用广文事可见同时作】

人贫鹅雁聒邻墙【鹅雁聒墙见前注】公贫琢诗声绕梁【绕梁见前注】坐客有毡吾不爱【杜诗坐客寒无毡】暑榻无扇公自凉党锢诸生尊孺子【徐孺子见前注】建安七人先伟长【建安七人孔融自有传余皆附魏志王粲传後徐干字伟长取同姓也详见新诗凌建安注又按文选典论曰今之文人鲁之孔融广陵陈琳山阳王粲北海徐干陈留阮瑀汝南应瑒东平刘桢斯七子者所学无所遗于词无所假退之诗建安能者七卓犖变风操】遣奴送箠非为好恐有佳客或升堂

戏呈田子平六言【元符三年十二月山谷发戎州明年改建中靖国四月至荆南乞知太平州留荆南待命遂踰冬有戏简田子平诗此诗盖同时作子平荆南人也】

茸割即非茸割肥羊自是肥羊【老杜诗云礼遇宰肥羊愁当置青醪】老夫才堪一筋诸生赞咏甘香却叹佳人纖手晚来应废红妆【诗纖纖女手可以缝裳古诗娥娥红粉收纖纖出素手此言田家庖婢或其内子如老杜所云唤妇出房亲自饌也】荆州衣冠千户厚意独有田郎【三辅决录云田凤为尚书郎容仪端正帝目送之题柱云堂堂乎张京兆田郎今以子平比田凤】

荆州即事药名诗八首【类格云王融为此体文选沈休文诗即事既多美注即此山中之事】

四海无远志一溪甘遂心牵牛避洗耳卧着桂枝陰【药名远志甘遂牵牛子梹耳桂枝世说桓温问谢安远志又名小草何以一物而有二名郝隆曰处则为远志出则为小草蜀志姜维传但有远志不在当归洗耳用许由事】

前湖後湖水初夏半夏凉夜阑乡梦破一雁度衡阳【前胡半夏兰香杜衡】

千里及归鸿半天河影东家人森户外笑拥白头翁【半天河人参白头翁】

天竺黄卷在人中白髮侵客至独扫榻自然同此心【天竺黄人中白自然铜天竺黄卷谓佛

书】

垂空青幕六一一排风开石友常思我预知子能来【空青预知子屈原远游云经营四荒兮周流六汉补注云汉乐歌作六幕谓六合也】

幽涧泉石绿闭门闻啄木运柴胡奴归车前挂生鹿【石绿啄木柴胡车前】

雨如覆盆来平地没牛膝回望无夷陵天南星斗湿【覆盆子中膝茺蒺天南星峡州治夷陵与江陵接境自界首至夷陵七十里言回首不见夷陵也】

使君子百姓请雨不旋复守田意饱满高壁挂龙骨【使君子旋□花半夏一名守田龙骨王荆公诤龙骨长乾挂梁?又脩脩雨龙骨岂得长挂壁前集诗云壁挂苍龙骨意谓得雨感祈不复车水溉田也东南呼水车为龙骨车】

太平州作二首【崇宁元年春自荆南归洪州分宁因往袁州萍乡者其兄元明还至江州与其家□会六月赴太平州九日而罢黄?有家藏山谷真□前一首题云戏作观舞绝句奉呈功甫兄片片梨花雨作细点梨花雨又按张□湖孝祥作高侍郎三大夫墓志侍郎讳卫为太平州判官山谷未为□□文贫甚既入境矣□坐党事免侍郎得堂帖不以告迎候如礼山谷既视叩已乃知之侍郎为治归装甚饬备观此则冷斋夜话载徐师川言东坡欲学长生□中对日者谈命山谷赴官姑熟闻□而俯就其说妄矣】

欧靚腰支柳一涡【白乐天诗杨柳小蛮腰】小梅催拍大梅歌【此皆太平州官妓】舞余片片梨花雨【言其泣下也乐又诗梨花一枝春带雨】奈此当涂风月何【太平治当涂县】

千古人心指下传杨姝烟月过年年不知心向谁边切弹尽松风欲断弦【杨姝善琴古曲有风入松李太白诗松风鸣夜弦吴氏漫录云豫章先生守当涂日会上作木兰花赠故人庾元镇曰庾郎三非常安乐使有万钱无处着徐 小鸭水边花明月清风都占却来颜老尽心如昨万事休休休莫莫尊前健在不饶人欧舞梅歌君更酌自注云欧梅当时二妓也山谷评书云按欲入木弹欲断弦此用笔法也】

送昌上座归成都

昭觉堂中有道人【昭觉寺在成都道人当是圆悟禅师克劲也崇宁初归蜀住昭觉一时丛林之盛无与为比山谷崇宁元年夏罢太平州寓居邓州二年冬谪宜州此诗当在鄂渚作】龙吟虎啸随风云【易云从龙风从虎】雨花经席冷如铁【杜诗布衾多年冷似铁】一滕日转十二轮【法华经化城品世尊转法轮尔时大通智胜如来受十方诸梵天王及十大王子踏□时三转十二行法轮】宝胜蓬蒿荒小院【成都记宝胜院在成都盖大慈寺诸院之数元丰间改作十方昌上座必在此院也】埋没醯罗三只眼【传灯录邠州岩头全豁禅师

曰吾教意如摩醯首罗劈开面门竖亚一只眼笱语摩醯首罗此云大自在又威灵帝魔王按本行经云太子初生西国之法合礼天神其名摩醯首罗极?而有灵抱太子至神所神自离坐下阶先礼太子盖禅家以此僧喻也】个是江南五味禅【广语云有僧辞归宗云诸方学五味禅去宗云我这里有一味禅为甚不学僧云如何是一味禅宗便打】更往参寻莫担板【传灯录赵州从谏传云只是个担板汉又睦州龙兴寺陈尊或见讲僧乃召云座主其僧应诺师云担板汉】

长沙留别【崇宁二年谪宜州三年二月过洞庭历潭衡永柱夏至贬所长沙即潭州也】

折脚铛中同淡粥【传灯录汾州无业禅师曰古得道人得意之後茅茨石室向折脚铛于□煮饭吃过三二十年又婺州招德□禅师问僧你什麼时离庵曰今朝师曰来时折脚铛子分付与阿谁僧无语】曲腰桑下把离杯【太白集中有鲁城北郭曲腰桑下送张子还嵩阳一首】知君不是南迁客魑魅无情须早回【左传文十八年舜臣□流四凶族投诸四裔以御魑魅注魑魅山林异气所生为人害者老杜怀太白诗魑魅喜人过江淹别赋迁客海上流戍陇陰东坡集中有送柳宜师诗折脚铛中煨□粥曲腰桑下饮离杯书生不是南迁客魑魅惊人须早回未知孰是】

赠花光老

浙江衲子静无尘【衲子见传灯录】个个庄严服饰新何似乾明能效古渠知北斗里藏身【传灯录惠清禅师传僧问北斗里藏身意旨如何师曰九九八十一又僧问文殊应真禅师云德山一曲亲亲唱北斗藏身事若何答曰日月同天照何处不分明】题花光老为曾公卷作水边梅【王仲言挥麈後录云崇宁三年黄太史赴宜州贬所是时外祖曾空青坐钓党先徙衡州太史留连极其欢洽相与酬唱如江樾者事之类车游悟溪观中兴碑太史赋诗书姓名于左外祖急止之曰公诗文一出即日传播某方为流人岂可出□公又远涉蔡元长当轴岂可不过为之防也太史从之诗中但言亦有文士相追随盖为外祖设空青□公卷名纡】

梅欒触人意【乐天榴花诗香□拟触坐禅人】冒寒开雪花遥怜水风晚片片点汀沙【冷斋夜话云卫州花光仁老以墨为梅鲁直观之曰如嫩寒春晓行孤山篱落间但欠香耳】

山谷外集诗注卷十七

山谷别集诗注卷上

<集部,别集类,北宋建隆至靖康,山谷别集诗注>

钦定四库全书

山谷别集诗注卷上 宋 黄庭坚 撰

史季温 注

濂溪诗【并序】

舂陵周茂叔【濂溪先生姓周名惇颐字茂叔道州营道人也】人品甚高胷中洒落如光风霁月【光风和也如顔子之春霁月清也如孟子之秋合清和於一体则夫子之元气可识矣李延平愿中尝诵此语以为善形容有道气象】好读书雅意林壑初不为人窘束世故权舆仕籍不卑小官【孟子柳下惠不卑小官】职思其忧【诗蟋蟀无已大康职思其忧】论法常欲与民决狱得情而不喜【论语曾子曰如得其情则哀矜而勿喜】其为少吏【前汉百官表其县百石以下有斗食佐史之秩是为少吏】在江湖郡县盖十五年所至辄可传任司理参军转运使以权利变其狱茂叔争之不能得投告身欲去使者敛手听之【按先生年谱及朱文公事状庆历五年任南安军司理有囚法不当死转运使王逵欲深治之先生力争之不听则置手板归取告身委之而去曰如此尚可仕乎杀人以媚人吾不为也逵感悟囚得不死】赵公说道【赵清献公拚字悦道】号称好贤人有恶茂叔者赵公以使者临之甚威茂叔处之超然其後乃寤曰周茂叔天下士也荐之於朝论之於士大夫终其身【按年谱先生以嘉佑元年金书合州判官六年通判?州事状云先生在合州赵公时为使者人或谗先生赵公临之甚威而先生处之超然赵公疑终不释及守?先生适佐州事赵公熟视其所为乃寤执其手曰几失君矣今日乃知周茂叔也】其为使者进退官吏得罪者自以不冤【按年谱熙宁元年先生为提点广南东路刑狱于定国传定国为廷尉民自以不冤】中岁乞身老於湓城有水发源於莲花峯下洁清绀寒下合於湓江茂叔濯缨而乐之筑屋於其上用其平生所安乐嬾水而成名曰濂溪与之游者曰溪名未足以对茂叔之美【舂陵新志云濂溪在营川门外二十里周元公故居又按何弃营道斋诗序舂陵郭县曰营道三十里而近有村落曰濂溪周氏家焉又按舂陵旧志载章颖云尝以营道古碑大富桥记考之自有所谓濂水又按朱文公濂溪先生事状云按张栻跋先生手帖据先生家谱云濂溪隐居在营道县营乐乡鍾贵里石塘桥西而邵武邹勇言尝至其处溪之源委自为上下保先生故居在下保其地号楼田又按舂陵新志载熙宁中陈令举作庐山记云由江州之南出德化门五里至延寿院旧名罗汉坛又五里至石塘桥有濂溪乃茂叔自名然则舂陵之濂溪乃先生之故居也九江庐山下之濂溪则先生因其溪而名之以识乡国之思耳又如石塘桥恐亦同为寓名此如东坡世居峨眉山之下而因汝州峨眉山以寄意焉邹勇又云近世士大夫又谓先生子求其诗于山谷避其叔父讳遂加以水此尤臆说今山谷诗序谓先生用其平生所安乐嬾水而成名曰濂溪恐非事实故备论之若谓溪名未足以对茂叔之美则亦东坡诗中柳州柳愚溪愚之意也】虽

然茂叔短於取名而惠於求志薄於徼福【春秋左传屈完对齐侯曰君惠徼福于敝邑之社稷】而厚於得民菲於奉身而燕及菑嫠陋於希世而尚友千古【孟子以友天下之善士为未足又尚论古之人】闻茂叔之余风犹足以律贪则此溪之水配茂叔以永久所得多矣茂叔讳惇实避厚陵奉朝请名改惇颐二子寿焘皆好学承家求予作濂溪诗思咏潜德【韩退之答崔立之书发潜德之幽光壽字元翁登元丰五年第终司封员外郎焘字次元登元佑三年第终徽猷阁待制按先生年谱以熙寧六年卒元丰间山谷知太和县壽为吉州司法因同官而游从甚熟是诗必太和所作故有潜德之语云】茂叔虽仕宦三十年而生平之志终在丘壑【按事状云先生襟怀飘洒雅有高趣尤乐佳山水遇适意处或徜徉终日】故余诗词不及世故犹髣髴其音尘

溪毛秀兮水清【左氏传涧溪沼沚之毛诗伐檀河水清且涟猗】可饭羹兮濯纓【汉书翟方进传饭我豆食羹芋魁孟子沧浪之水清兮可以濯我纓】不渔民利兮又何有於名【汉景後元年诏渔夺百姓侵牟万民礼坊记诸侯不下渔色庄子杨朱曰不矜贵何美名】弦琴兮觴酒【舜作五弦之琴以歌南风山涛举嵇康自代康告絶曰浊酒一盃弹琴一曲志愿足矣】写溪声兮延五老以为寿【诗以写我忧欧阳永叔诗携琴写幽泉五老峯在庐山五峯相连论语讖曰仲尼曰尧舜观河洛有五老飞为流星上入于昴故河洛间有河洛峯此峯以其峭拔而效其名焉诗如南山之壽】蟬蛻尘埃兮玉雪自清【史记屈原传蟬蛻于浊秽以浮游尘埃之外韩退之马少监墓志幼子立侧肌肉玉雪可念】听潺湲兮鉴澄明【谢灵运诗乘月弄潺湲宋之问游江南灵隐寺夜月澄明独行廊下】激贪兮敦薄【孟子闻伯夷之风者顽夫廉懦夫有立志闻柳下惠之风者鄙夫寬薄夫敦】非青苹白鸥兮谁与同乐【宋玉风赋风起于青苹之末杜诗白鸥没浩荡谢安传简文帝曰安石既与人同乐不得不与人同忧】津有舟兮荡有莲【韩退之郢州溪堂诗浅有蒲莲深有蒹葭】胜日兮与客就间【晋书卫玠传遇有胜日亲友时请一言】人闻欸音兮不知何处散髮醉【庄子渔父篇孔子至于泽畔方将杖欸而引其船又曰刺船而去延缘苇间孔子待水波定不闻欸音而後敢乘晋书阮孚为安东参军蓬髮饮酒不以王务婴心文选张茂先诗散髮重阴下注引鍾会遗荣赋云散髮抽簪】高荷为盖兮倚芙蓉以当伎【离骚经制芰荷以为衣集芙蓉以为裳青箱襟记曹修己诗荷叶罩芙蓉圆清映嫩红佳人南陌上翠盖立春风东坡诗贪看翠盖拥红妆】霜清水寒兮舟着平沙【韩退之诗山淨江空水见沙唐李遐叔文碧水涟漪浅深见沙】八方同宇兮云月为家【尸子四方上下曰宇荀子富国篇万物同宇而异情淮南子天地之间九州八极注八方之极也班孟坚东都赋总八方而为极张拙颂凡圣含灵共我家】怀连城兮佩明月【用史记蔺相如怀赵璧易秦十五城事文选魏文帝书价越万金贵重连城东坡诗自当出怀璧往取连城价汉书邹阳传明月之珠夜光之璧】鱼鸟亲人兮野老同社而争席【世说简文帝曰鸟兽禽鱼自来相亲韩退之诗愿为同社人鸡豚燕春秋东坡次听上人见寄韵前身本同社注引陶潜鱼庐山远师结白莲社事庄子舍者与之争席矣】白云蒙头兮与南山为伍【东坡留别王子立诗闻道年来丹伏火不愁老去雪蒙头汉书韩信传笑曰生乃与哙等为伍】非夫人攘臂兮谁余敢侮【左氏传非夫人之力不及此又正考父鼎铭曰循墙而走亦莫余敢侮孟子冯妇攘臂下车诗今此下民或敢侮予卒章因言以见先生山水之乐得之于心至于人与我相忘此东坡所谓与造物为徒欤】

牧童【西清诗话云世传山谷七岁作】

骑牛远远过前村【後汉光武纪光武初骑牛杜少陵诗前村山路险】吹笛风斜隔壠闻【马融去京踰年有洛客逆旅吹笛闻之甚悲壮晋王徽之令人谓桓伊曰闻君善吹笛试为我一奏老杜诗愁连吹笛生又吹笛秋山风月清又高楼夜吹笛欧阳公诗夜凉吹笛千山月东坡诗邻人吹笛不堪闻杜诗轻燕受风斜邵康节牧童诗数声牛背笛一曲壠头歌王介甫诗陂水翻沟隔壠分】多少长安名利客【长安前汉所都在国朝为永兴军後人称帝都者皆例呼为长安林和靖诗不知呵止长安客战国策争名者于朝争利者于市盖争名利者必于帝都也白乐天诗皇皇名利客白首千百辈】机关用尽不如君【白乐天诗应须?墨机关外意谓用尽机关以争名利反不若牧童之安逸也丁晋公诗欺天行当吾何有立地机关子太乖邵康节诗争先径路机关恶亦此意也】

送人赴举【西清诗话云鲁直少警悟八岁能作诗送人赴举此已非髫髻语矣】

送君归去明主前【江文通赋春草碧色春水緑波送君南浦伤如之何李白诗送君此时去回首泪成行】若问旧时黄庭坚谪在人间今八年【汉武内传王母曰汝侍郎东方朔昔为太上仙官谪斥使在人间列仙传许碯诗羣仙拍手嫌轻薄谪向人间作酒狂白乐天酬吴七诗不知有何过谪作人间仙湘山野録潘佑诗只因骑折玉龙腰谪向人间三十六诗最多体制每句自三字抵于七字每章自两韵极于百韵未可概举近世诗格必欲合联以成章三句者盖亦罕见周诗则亦有之麟趾甘棠等篇是也山谷此诗盖舍近例而援古法由是推之山谷不特平生句法奇妙早年诗格已高古矣】嗣深尚书弟晬日【山谷叔父讳廉字夷仲终于给事仲幼子叔敖字嗣深丙午生终于户部尚书建炎间山谷之兄大临尝跋此诗云嗣深弟初生骨爽神秀气已万里故山谷有此佳句黄?年谱系此诗于治平四年丁未时山谷初登第】

骨秀已知骐驎子【袁宏三国名臣赞天骨秀朗老杜八哀诗云复见秀骨清桓谭新论曰善相马者薛公得马恶貌而正走其名骐驎子东方朔曰骐驎緑耳天下良马也北齐裴景鸾景鸿并有逸才河东呼景鸾为骐驎子杜少陵诗别养骐驎子称神俊】性仁端是凤凰雏【易林曰凤生五雏龐统传统德公从子也德公谓统为凤雏陆云幼时吴尚书闵鸿见之甚奇之曰此儿若非龙驹当是凤雏老杜入奏行赠窦侍御骐驎之子凤之雏又诗先拂凤凰雏东坡诗凤雏骐驎子曰相高】不腾渥水称神俊【汉书武帝记元鼎四年马生渥洼水中作天马之歌高僧传支遁字道林尝养马人有讥之者曰爱其神俊杜少陵诗可怜九马争神俊又送李校书诗渥洼骐驎儿】应出岐山作瑞符【岐山属凤翔寰宇记载地志云周文王时凤凰鸣于岐山故亦曰凤凰堆春秋元命苞曰凤凰游文王之都老杜凤凰台诗所重王者瑞韩文公岐山诗丹穴五色羽其名为凤凰昔周有盛德此鸟鸣高冈】渐指家人知姓字【李义山娇儿诗文苞未周晬固已知六七四岁知姓名眼不视梨栗子生一岁为晬】试看屏上识之无【唐书白居易始生六七月乳母抱弄于书屏下指之无二字虽百十其试指之不差】乃翁断狱多阴德往往高门待汝车【汉书项羽传曰今不急下吾烹乃翁于公曰少高大门闾令容驷马高盖车吾治狱多阴德子孙必有兴者】

读谢安传【年谱熙寧戊申叶县尉时作】

倾败秦师琰与玄矫情不顾驿书传持危又幸桓温死【论语危而不持颠而不扶】太傅功名亦偶然【晋书谢安传桓温请为司马将发新亭朝士咸送高崧戏之曰卿高卧东山人言安石不肯出将如苍生何苍生今亦将如卿何简文帝疾笃温上疏荐安宜受顾命帝崩温入赴山陵止新亭大陈兵卫将移晋室呼安及王坦之欲于坐害之坦之汗流沾衣倒执手板安从容谓温曰诸侯有道守在四邻明公何须壁後置人耶孝武帝富于春秋政不自己温威振内外安与坦之尽忠匡翼温病笃讽朝廷加九锡使袁宏具草安见辄改之由是历旬不就会温薨锡命遂寝时苻坚强盛□场多虞诸将败退相继安遣弟石及兄子玄随机征讨所在克捷坚後率衆百万次于淮淝京师震恐加安征讨大都督玄入问计安夷然无惧色笑曰已别有旨遂命驾游山墅玄等既破苻坚有驿书至安方对客围秦看书既竟便摄放了无喜色基如故客问之徐答曰小儿辈遂已破贼既罢还内过户限心甚喜不觉屐齿之折其矫情镇物如此後赠太傅安有二子瑶琰按琰传苻坚之役安以琰有军国才用出为辅国将军以精卒八千人与玄破坚】

酌姨母崇德君壽酒【外集有听崇德君鼓琴诗米元章画史云朝议大夫王之才妻南昌县君李氏尚书公择之妹能临松竹木石等山谷之姨母也年谱熙寧辛亥叶县作】

日月行当壽星记【尚书释文尧典云日月所会者谓日月交会于十二次辰曰壽星丑曰星纪晋天文志曰老人一星在弧南一曰南极常以秋分之旦见于丙春分之夕没于丁见则治平主寿昌】仙人初出阊风时【神仙传崑仑一曰玄圃一曰积石瑶房一曰阊风台一曰华盖一曰天柱增城县圃阊风崑仑之山三重也水经注曰崑仑之山三级下曰樊桐一名板桐二曰玄圃一名阊风上曰层城一名天庭东方朔十洲记崑仑山有三角一角正北名阊风颠一角正西名玄圃台一角正东名崑仑宫南都赋崑仑无以侈阊风不能踰杜诗阊风玄圃与蓬壶】欲将何物献壽酒天上千秋桂一枝【欧阳公诗欲以何物招佳客惟有新秋一味凉晋却诜对武帝曰臣举贤良对策为天下第一犹桂林一枝崑山片玉也】

谢五开府番罗袄【熙寧中山谷为宫教五开府者酒余脱浅色番罗袄衣之山谷醉中作此】

叠送香罗浅色衣【杜少陵诗香罗叠雪轻白乐天与元微之诗浅色谷衫轻似雾】着来春色入书帷【汉书董仲舒下帷讲诵】到家慈母惊相问【曾子问外有传内有慈母後汉马皇后纪违慈母之拳拳杜少陵诗家贫仰母慈】为说王孙脱赠时【楚词王孙游兮不归杜诗王孙若个边】

杂吟

城中蛾眉女【毛诗硕人螭首蛾眉】珂佩响珊珊鸚鵡花间弄【唐明皇杂録广南有白鸚鵡养之宫中晓人言号雪衣娘一夕飞上妃子妆台曰梦为鸚鵡所搏妃子授以多心经持诵】

甚悲後妃子携之弄于花间果为鸞鸟所毙葬之号鸞鸟塔】琵琶月下弹【释名曰推手前曰琵琶引手却曰琵琶张籍诗乃出二侍女合弹琵琶箏白乐天遂客湓浦口见舟中夜弹琵琶为作琵琶行东坡诗取琴月下弹】长歌三日绕【苏武诗长歌正激烈沈约诗轻歌易绕弱舞难持唐书薛仁贵传将军三箭定天山将士长歌入汉关杜少陵诗长歌激梁屋又长歌意无极又吾醉亦长歌又乐助长歌逸高适诗长歌达者杯中物李太白诗清风吹歌入空去歌曲自绕行云飞列子韩娥东之齐匱粮过雍门以歌假食既去而余音绕梁欂三日不絕】短舞万人看【陶岳零陵记长沙定王入朝于上前自为短舞曰臣?地狭不足以回旋】未必长如此【陶渊明诗但愿长如此卢照邻诗愿得长如此东坡诗未必长如此】芙蓉不耐寒【西京襍记卓文君脸际常若芙蓉此诗亦见寒山子诗集中恐非山谷作】

海棠【年谱元丰戊午北京作】

海棠院里寻春色【薛能诗独寻春色上高台】日炙嫣红满院香【李太白诗日炙锦嫣王未醉王建牡丹诗且愿风流者唯愁日炙销杜牧诗嫣红半落平池晚李义山诗侧近嫣红伴柔绿老杜诗娉婷一院香】不觉风光都过了东窗浑为读书忙压沙寺梨花【赵舜钦茅斋诗话云大名压沙寺梨花之盛闻于天下鲁直为国子监教授日曾有诗一絕外集十二卷又有次韵晋之五丈赏压沙寺梨花一首年谱系元丰戊午岁】

压沙寺後千株雪【昌黎闻梨花发赠刘师命诗闻道郭西千树雪欲将君去醉何如又雪诗千株照耀开东坡诗普慈寺後千竿竹此句相类】长乐坊前十里香【梁任昉述异记千年松香闻十里之外东坡诗袅袅炉烟十里香】寄语春风莫吹尽夜深留与雪争光【李太白宫词梨花白雪香】

和早秋雨中书怀呈张邓州【年谱元丰己未北京作】

喜闻三径被恩书【按三辅决録蒋诩字元卿嵇康高士传曰蒋元卿还杜陵荆棘塞门舍中有三径不出】五马来歌塞里间【墨客挥犀世谓太守为五马诗曰子子干旌在浚之都素丝组之良马五之郑注谓周礼州长建旗汉太守比州长法御五马古乐府陌上桑曰使君从南来五马立踟蹰南齐柳元伯之子五人皆领郡号五马殷文圭云柳氏亭边参差五马杜诗人生五马贵韩昌黎诗车马仆从塞里间】天上日清消蠨蛸【诗蛸蛸在东莫之敢指注虹也】海滨风静复爰居【国语海鸟曰爰居止於鲁东门外展禽曰今兹海其有灾乎是岁海多大风韩诗风静爰居去左氏臧文仲不知者三其一祀爰居庄子至乐篇昔者海鸟止于鲁郊鲁侯御而觞之于庙杜诗鸛鷖至鲁门】龟逢衔骨方为鹄兰不当门亦见锄【蜀先主云若蜚当门不得不锄李太白诗兰生不当户别是开庭草】已发覆盆瞻睿圣【庄子田子方篇丘之于道也其犹醯鷄与微夫子之发吾覆也吾不知天地之大全也司马迁传戴盆何以望天尚书洪范睿作圣】何因犹着故溪鱼

絕句【年谱元丰己未北京作】

富贵功名茧一盆繰车头绪正纷纷【礼记曰夫人繰三盆手太白诗繰丝忆君头绪多欧阳公诗问其别後学初若茧抽丝】肯?冷淡做生活【摭言曰裴度夜晏联句白乐天曰笙歌鼎沸勿作此冷淡生活东坡诗冷淡谁能用许功又莫笑吟诗淡生活】定是着书扬子云【文选杨修答临淄王牋云修家子云老强着一书悔其少作】

临河道中【临河属开德路由河堤外集中有曹村道中诗云瓜田余蔓有荒垄梨子压枚铺短墙明月风烟如梦寐平生亲旧隔湖湘是也盖经行先曹村後临河故此诗有觉来去家三百里之句指大名也年谱元丰己未作】

村南村北禾黍黄【古诗?衣巾落枣花村南村北响繰车杜诗西岭纡村北白乐夭折臂翁诗村南村北哭声哀东坡食荔支诗南村诸杨北村卢史记郑国渠白渠成人歌之曰郑国在前白渠起後长我禾黍王介甫诗欲收禾黍善先去蒿莱恶】穿林入坞岐路长【列子杨子之邻人亡羊既率其党又请杨子之竖追之杨子曰噫亡一羊何追者之衆邻人曰多岐既反问获羊乎曰亡之矣曰奚亡之曰岐路之中又有岐焉吾不知所之所以反也文选孙子荆诗晨风飘岐路谢眺诗岐路多徘徊】据鞦梦归在亲侧【後汉刘尚击五溪蛮伏波将军马援年六十二据鞦顾盼以示可用老杜诗苏侯据鞦喜乐府饮马长城窟行梦见在我旁忽觉在他乡】弟妹妇女笑两厢【两厢字见诗疏两厢庑也韩诗两厢铺氍毹白乐天诗仙杖环双阙神兵辟两厢】甥侄跳梁暮堂下惟我小女始扶牀【白乐天诗惟弄扶牀女时时强展眉杜牧之诗扶牀乳女午啼饥贺方回词何物系人心三岁扶牀女韩退之卢君夫人暮铭扶牀坐膝嬉戏争欢】屋头扑枣烂盈?【诗豳风八月剥枣河东人以杖击枣谓之扑】嬉戏争欢挽衣裳【昌黎诗少长聚嬉戏不殊同队鱼太白诗儿女歌笑牵人衣又出门妻子强牵衣杜少陵诗短衣数挽不掩脰】觉来去家三百里【陆士衡饮马长城阙行冬来秋未返夫家邈以绵】一园菟丝花气香【淮南子说山训曰千年之松下有茯苓上有兔丝注云茯苓千载松脂也兔丝生其上而无根一名女萝毛诗鵲奔篇葛与女萝施于松柏注云女萝兔丝松萝也杜诗名园花草香】可怜此物无根本【韩昌黎诗浮云柳絮无根本天地□远随飞扬】依草着木浪自芳风烟雨露非无力【白乐天诗云等闲栽树木随分占风烟】年年结子飘路旁【老杜诗卑枝低结子晋史王戎不趣道傍苦李杜诗饥寒今日趣路傍东坡诗全生依路傍南丰诗已觉路傍行似监】不如归种秋栢实【庄子雕胡尝视其良既为秋栢之实矣东坡岁寒知松柏诗永无秋实□】他日随我到冰霜【王介甫诗曾与蒿藜同雨露终随松柏到冰霜杜少陵诗老树饱经霜山谷意谓无草木之依附随即飘零不若慕秋栢之梗介以閱冰霜也】

和范廉【年谱元丰己未解北京教授後作】

一代功名醉斯人尚独醒【史记屈原曰衆人皆醉惟我独醒】风霜寒惨淡松柏後凋零【刘公干诗风声一何盛松枝一何劲冰霜正惨凄终岁常端正岂不罹凝寒松柏有本性老杜诗惨澹风云会鲁论?寒然後知松柏之後凋也】岁晚虚前席【老杜诗岁晚仍分袂汉书文帝徵贾谊入见帝方受厘宣室问鬼神之本夜半前席】天涯作使星【後汉和帝遣使者二人当到益部皆微服单行李合指星云有二使星向益州分野老杜诗喧呼閱使星】百城同

缓带【东汉贾□为冀州刺史百城闻风自然竦震前汉匈奴传父兄缓带稚子咽哺晋羊祜在军不亲戎服常轻裘缓带】列校听横经【汉书韩信传诸校皆贺师古曰诸校诸部也後汉儒林传明帝为功臣子孙四姓末属别立校舍自期门羽林之士悉令通孝经章句韩诗檐际听横经东坡诗春梦犹横经】汲直非刀笔【汉史汲黯传淮南王谋反惮黯曰黯好直諫守节死义至说公孙弘等如发蒙尔张汤深文苛刻黯骂曰天下谓刀笔吏不可为公卿果然必汤也贾捐之传置之争臣则汲直注汲黯方直故世谓汲直】山翁识宁馨【晋书王衍字夷甫总角尝造山涛涛嗟叹良久既去回而送之曰何物老嫗生此宁馨儿】愁思理前语祠下柳陰庭【潘安仁闲居赋柳重阴车结轨】

从舅氏李公择将抵京辅以归江南初自淮之西犹未秋日思归【年谱此诗当是元丰庚申岁山谷自京师改官复往北京挈家归江南作】

归心摇摇若秋带【杜诗归心折大刀王介甫诗不耐归心日日归史记苏秦传齐王曰寡人心摇摇然如旌旌柳子厚诗摇心剧旌旌谢朓辞随王牋归志莫从邈若坠雨翩似秋蒂注秋蒂去于树喻已别王也恐秋带字误】哀操切切如蝉吟【鲍明远芜城赋抽琴命操李善注曰琴有伯夷之操穷则独善其身故谓之操潘安仁秋兴赋蝉嘒嘒以寒吟】百年双鬓欲俱白【杜少陵诗百年双白鬓一别五秋萤】千里一书真万金【李太白诗相思千万里一书直千金杜少陵诗家书抵万金】

翌日阻雨次前韵

愁云垂垂雨淫淫【楚辞严忌哀时夕淫淫而淋雨】野馆重赋思归吟【老杜诗那堪野馆疎琴操曰楚龙丘高出游三年思归故乡望楚而长叹故曰楚引张平子思玄赋情惓惓而思归白居易和思归乐诗云似道思归乐行人掩泣听东坡诗讴吟思归出无计坐想蟋蟀空房语】老农那问客心苦【老农字见鲁论谢灵运诗大江流日夜客心悲未央任彦昇诗客心幸自弭中道遇心期杜诗故国移居见客心高适诗旅馆寒灯独不眠客心何事转凄然灵运诗如何乘苦心矧复值秋晏韩文公河之水诗三年不见兮使我心苦】但喜粟粒如黄金【杜诗园柑长成时三寸如黄金】

五老亭【并序】

知郡大夫改筑射亭与五老峯晤对极为胜赏辄以长句咏叹【东坡作李公择山房藏书记载五老峯在庐山按寰宇记庐山属江州年谱元丰庚申自汴京归江南经行作】

白髮苍髯五老人【欧阳公醉翁亭记苍顔白髮頽然其间者太守醉也东坡诗山中只有苍髯叟数里萧萧管送迎又和海州石室诗手植数松今偃盖苍髯白甲低琼户又郁郁苍髯真道友又中山松醪赋鬱鬱苍髯千岁姿太白诗白髮四老人】德虽不孤世无邻【鲁论德不孤必有邻晋书轅门之德不孤文选刘琨答卢谡诗既孤我德又阙我邻】松风忘味同戴舜【左传文公十八年天下如一同心戴舜】梅雨蒙头非避秦【周处风土记云夏至前雨名

黄梅雨埤雅云今江湘二浙四五月间梅欲黄落则水润土溽柱础皆污蒸郁成雨谓之梅雨东坡诗梅雨翛翛荔子然桃花源记晋太原人武陵人捕鱼缘溪行忘路忽逢桃花夹岸穷源得一山舍船从口入屋舍俨然人见渔父大惊问所从来便邀还家为设酒食白云先世避秦乱率妻子邑人来此绝境不复出不知有汉无论魏晋数日辞去及郡诣太守说遣人随往迷不复得路华山南有川广袤数百里连山洞不知其浅深人有登莲花峯见人烟屋舍疑似仙窟或云秦人避难居此其後裔也东坡诗当时依山来避秦】筑亭风流二千石此老入谒官不嗔一樽相对是宾友【谢惠连雪赋乃置旨酒命宾友韦应物诗宾友仰称叹一生何所求】学得养生通治民【庄子文惠君曰吾闻庖丁之言得养生焉】答余洪范【洪范名卞元丰四年山谷自太和考试举人于南安军时为贑州郡掾归途相见尝和其二绝句有南康郡下参军耳南康即贑之郡名也诗见外集】

倒海弄明月【李太白诗倒海索明月又云回山倒海不作难韩昌黎诗婆娑海水南簸弄明月珠太平广记鬼诗还山弄明月】伐山茹芝英【杨雄太玄赋茹芝英以御饥兮杜诗吾慕汉初老时清犹茹芝】婆娑一世间【登宾戏曰婆娑乎术艺之场班彪北征赋登障隧而遥望兮聊须臾以婆娑晋书陶侃传老子婆娑正坐诸君辈王述亦曰致仕之年不为此公婆娑之事宋玉神女赋婆娑乎人间汉书魏豹传人生一世间如白驹过隙吕后强食张良曰人生一世间如白驹过隙何自苦如此韩诗人生一世间不似张与施】浩荡怀友生【楚辞志浩荡而怀伤张平子思玄赋志浩荡而不嘉诗伐木不如友生宋玉九辩曰廓落兮羈旅而无友生潘安仁笙赋尔乃促中筵携友生李太白诗落帽醉山月空歌怀友生杜甫诗途穷仗友生】佳人貂?褕【张平子四愁诗美人赠我貂?何以报之明月珠注引蔡邕独断曰侍中中常侍加貂蝉说文曰直裾谓之褕褕李白诗披君貂蝉褕对君白玉壶】眉宇秋江晴【枚乘七发曰阳气见于眉宇之间唐元德秀字紫芝房琯见而叹息曰见紫芝眉宇使人名利之心都尽杜诗眉宇真天人东坡诗眉宇秀发如春峦】胷怀府万物【庄子内篇而况官天地府万物而心未尝死者乎】器识谢羣英【江文通别赋阒台之羣英○案此韵与前复】赠我白雪弦此意少人明【张平子四愁诗美人赠我锦绣段何以报之青玉案宋玉云有歌于郢中者阳春白雪国中属而和之者数十人引商刻羽杂以流徵属而和之者不过数人是以曲弥高则和弥寡老杜诗哀弦绕白雪】别怀数弦望相思何时平【後汉律历志舒先速後近一远三谓之弦相与为衡衡分天之中谓之望李陵诗行人难久留各言长相思安知非日月弦望自有时韦应物诗况兹画方永展转何由平】犹忆把樽酒【杜甫诗何时一樽酒重与细论文】夜谈尽传更【东观汉记曰尹敏与班彪相厚每相与谈尝晏暮不食尽即至冥夜彻旦韩诗对食每不饱其言无倦听连延二十日晨坐达五更世说卫玠与谢琨连旦微言】

即来

先去岂长别後來非久亲新坟将旧冢相次似鱼鳞【李郢寒食诗旧坟新壠哭多时汉书刘向传子弟鳞集于朝师古曰言其相次如与鳞韩文公诗府西三百里侯馆同鱼鳞东坡诗城中楼阁似鱼鳞】茂陵谁辨汉【汉武帝葬茂陵在长安此】骊山讎识秦【咸阳骊山始皇所葬也】千里与昨日一种并成尘【陆士卫挽歌诗昔为七尺躯今成灰与尘寒山子诗始忆八尺汉俄成一聚尘】定知今世士还是昔时人乌用取他骨复持埋我身【晋刘伶尝乘

鹿车攜一壺酒使人荷鍤隨之曰死便埋我】

奉答固道【年譜元豐癸亥太和作】

平生湖海漁竿手【杜牧之詩惆悵江湖釣竿手却遮西日向長安老杜詩獨把漁竿終遠去】強學來操制錦刀【左氏鄭子皮欲使尹和為邑子產曰猶未能操刀而使割也子有美錦不使人學制焉大官大邑身之所庇也而使學者制焉其為美錦不亦多乎】末俗相看終眼白【晉阮籍青白眼】古人不見想山高【毛詩高山仰止】未乘春水歸行李【行李字見左傳杜詩行李須相問又行李淹吾舅】恍得閑官去坐曹【韓詩豈有閑官敢推引又云得就閑官即至公漢書薛宣傳曰坐曹治事曾南豐詩坐曹風義動江淮】自是無能欲樂爾【漢書楊惲傳人生行樂爾】煩君錯為嘆賢勞【毛詩北山我從事獨賢東坡詩主人獨賢勞】

奉答聖思講論語長句【年譜元豐癸亥太和作】

簿領文書千筆禿【文選詩沈迷簿領間東坡詩一笑簿領間又云十年簿領催衰白元稹詩滿眼文書堆案過王羲之贊雖禿千兔之翰聚無一毫之筋老杜詩戲拈禿筆掃驂騑太白詩書禿千兔毫韓公毛穎傳後因進見上將有任使拂拭之因免冠謝上見其髮禿梅聖俞詩諸公醉時索筆吟吾兒暗寫千毫兔】公庭囂訟百蟲鳴【曲禮公庭不言婦女李太白詩秋浦舊蕭索公庭人吏稀堯典帝曰吁囂訟可乎謝靈運詩虛館絕爭訟空庭來鳥雀此反其意東坡詩吟詩莫學秋蟲鳴】時從退食須臾頃【毛詩退食自公中庸道不可須臾離】喜听鄰家諷誦聲觀海諸君知浩渺【孟子盡心觀於海者難為水東坡詩江湖涉浩渺歐陽公詩江海淮濟暨漢沔豈不浩渺注而大】學山他日看崇成【揚子學行篇丘陵學山而不至于山】暮堂吏退張燈火【南史韋叡傳張燈達曙杜詩鳧鴈宿張燈韓昌黎詩燈火稍可親】抱取魯論來講評【此蓋以講學為急為政次之】

題學海寺【學海字疑是覺海年譜有題覺海寺詩元豐癸亥太和作】

爐香滔滔水沈肥【滔滔見魯論唐本草注曰沈水香出天竺單于二國木似榉柳重實黑色沈水者是】水邊禪牀竹邊溪【王荊公詩芭蕉一枕西窗雨復似當年水邊牀】一段秋蟬思高柳夕陽原在竹陰西【法眼禪師金剛經四時般若頌曰理極忘情謂如何有喻齊到頭霜夜月任運落前溪果熟兼猿重山長似路迷舉頭殘照在原在住居西杜牧之詩斜陽竹西路歌吹是揚州】

梅花【年譜元豐間太和作】

障羞半面依篁竹【漢書張敞傳自以便面拊馬師古曰便面所以障面劇談傳唐長安唐昌觀玉燄花發元和中女子以白角扇障面直至花所此用徐妃半面妝壽陽公主宮妝二事嚴助傳越處篁竹之間王介甫詩荒茅篁竹間】隨意淡妝窺野塘【東坡詞淡妝濃抹總相宜】

宜】飘泊风尘少滋味【老杜诗即今飘泊干戈际韩昌黎诗今旦胡为却惆怅万片飘泊随东西陆机诗京洛多风尘高过为封丘尉诗宁堪作吏风尘下杜少陵诗薄宦走风尘又□□见滋味】一枝犹傍故人香【荆州记陆凯寄早梅诗江南无所有聊赠一枝春此言虽飘泊风尘而清香不改山谷盖以自况也】

题太和南塔寺壁

熏炉茶鼎暂来同【文选江文通拟古诗云膏炉絶沈燎注云炉是熏炉也】寒日鷓啼柿叶风【艺文类聚载梁庚仲容咏柿诗发荣临层檻翻英揉花药风生树影移露重新枝弱】万事尽还杯酒里【晋书张翰传使我有身後名不如即时一杯酒】百年俱在大槐中【异闻集载淳于棼事云棼梦见入宅南古槐穴中行数十里有大城门楼题曰大槐安国其王以女妻生使为南柯太守在郡二十年发寤呼二客寻古槐下穴有蚁数斛中有小台二大蚁处之即槐安国也又穷一穴直上南枝即有土城小楼即南柯郡也山谷平生薄名利轻富贵之心于是可见】

和答君庸见寄别时絶句【何君庸太和簿可见太和作】

看镜白头知我老【杜甫诗勋业频看镜】平生青眼为君明【晋书院籍常作青白眼青箱杂记范讽诗惟有南山与君眼相逢不改旧时青杜少陵诗别来头竝白相对眼终青东坡诗读书头欲白相对眼终青山谷看镜白头知我老平生青眼为君明其余使白头青眼甚多惟此联与苏黄句法相似】舞姝别後闲珠履【毛诗邶国风静女其姝笺云姝美好之子太白诗魏姝弄鸣丝春申君客三千人皆蹑珠履吴都赋出蹑珠履动以千百老杜诗欲向何门蹑珠履】已报丝虫网玉笙【玉台新咏徐悱赠内诗曰网虫生锦荐文选张景阳诗曰蜘蛛网四屋江淹拟张司空诗曰兰径少行迹玉台生网丝杜少陵诗书籤药里封蛛网】寄刘泗州【寄四州凡二首前篇载外集第十四卷後篇载此元丰甲子岁赴德平镇经途所作】

生天生地常为主此事惟应作者知康济小民归一臂屈伸由我更由谁【书康济小民东坡诗康济此身殊有道十六观行经譬如壮士屈伸臂顷即生西方东坡诗生死犹如臂屈伸邵康节思虑吟不由乎我更由乎谁】

平原郡斋二首【此诗监德州德平镇时作平原属德州外集有平原宴坐诗二首老作儒生不解事江南有田归荷锄北牕风来举书叶犹似劝人勤读书黄落委庭观九州虫声日夜戒衣裘金钱满地无人费一斛明珠薏苡秋与此不同又按蜀本诗刻有山谷真蹟题云平原郡斋】

生平浪学不知株江北江南去荷锄【文选谢灵运诗江南倦历览江北旷周旋杜少陵诗灊东灊西一万家人江南江北春冬花江文通诗虽有荷锄倦渊明诗带月荷锄归老杜诗方春独荷锄又荷锄功易止眷言终荷锄又云细雨荷锄立】牕风文字翻叶叶犹似劝人勤读书

成巢不处避岁鹊【西阳杂俎鹊巢避太岁】得巢不安呼妇鸠【诗鹊巢维鹊有巢维鸠居之欧阳公诗天雨止鸠呼妇归鸣且喜】金钱满地无人费一斛明珠薏苡秋【朝野僉载緑珠怨石家金谷重新声明珠十斛买娉婷】

题邢惇夫扇【邢居实字惇夫河间人邢恕和叔之子早有文称东坡云惇夫自为童子所与交皆诸公长者不待年而卒有呻吟集行于世王直方诗话云秦少游尝以真字题一絶于邢惇夫扇工云月团新碾?花盏饮罢呼儿课楚词风定小轩无落叶青虫相对吐秋丝山谷见之复作小草题此一絶皆所自作诗也少游後见之复云逼我太甚与平原郡斋诗大同小异】

黄叶委庭观九州【太白诗坐来黄叶落四五书序禹别九州】小虫催女献功裘【周礼有司裘春秋考异卹曰立秋促织鸣宋均曰促织蟋蟀也立秋女功急故促之】金钱满地无人费【唐人诗细雨湿衣看不见闲花满地落无声王介甫诗雨後余花满地存】百斛明珠薏苡秋【卢綸晋八王故事曰张方劫晋帝西迁辇真珠百余斛後汉马援传援在交趾常饵薏苡实用能轻身省欲军还载之一车欲以为种及卒人有譖之者以为前所载还皆明珠文犀邢惇夫有和黄鲁直平原郡斋秋还二首云木落天高忆旧居几时归去带经锄黄花烂漫无人折柿叶翻红正好书目送愁云尽日愁寒来着破旧貂裘凭谁说与西风道留取花间点缀秋】

絶句赠初和甫【初虞世字和甫家于卢溪尝为主簿山谷有卢泉诗竝酒渴爱江清五诗兼简和甫年谱元丰甲子德平镇作】

处士孤怀少往还【孟子处士横议荀子古之所谓处士者德盛者也後汉祢衡为黄祖作书记轻重疎蜜各得体祖曰处士正得祖意】平时一刺字多漫【祢衡传陰怀一刺既无所之适至刺字漫灭李义山诗刺字从漫灭东坡诗唱酬往复字应漫】能容着?挥谈拂【晋桓温清谢安为司马温诣安值其理髮久之乃罢使取帻温见留之曰令司马着?进其重安者如此】可见高人礼数寛【杜诗自识将军礼数寛】

次韵清虚同访李园【清虚谓王定国见後注四诗皆元丰乙丑作】

年来高兴满蓴丝【殷仲文诗能使高兴尽杜诗高兴潜有激又高兴激荆衡晋书张翰传齐王冏辟为掾因见秋风起乃思吴中菰菜蓴羹鲈脍曰人生贵得适志何能羈宦数千里以要名爵乎遂命驾东归本草七八月以前曰丝蓴】寒薄春风骀荡时【文选谢朓诗春物方骀荡】稍见燕脂开杏萼【王介甫诗燕脂洗出杏花匀】已闻香雪烂梅枝【王介甫诗遥知不是雪为有暗香来】老逢乐事心犹壮【谢灵运拟邨中集诗序良辰美景赏心乐事四者难并】病得新诗和更迟何日联鑣向金谷【晋石崇有别馆在河阳之金谷裴度居守东洛夜宴半酣度索联句元白有得色度为破题至杨汝士曰昔日兰亭无艳质此时金谷有高人居易知不能加遽裂之曰笙歌鼎沸勿作此冷淡生活韩退之诗即是连鑣向阙时】拟追仙翼到瑶池【列子周穆王驾八骏之乘升崑仑之丘宾于西王母觴于瑶池之上】

次韵清虚

地远城东得得来【贯休诗一瓶一鉢垂垂老千水千山得得来东坡诗知是多情得得来】正如湖畔昔衔盃【汉书司马迁书曰未尝衔杯酒接殷懃之欢刘伶酒德颂衔盃漱醪李太白诗衔盃大道边李适之诗乐圣且衔盃杜少陵诗衔盃乐圣称避贤又生前相遇且衔盃】眼中故旧青常在鬢上光陰綠不回【东坡诗霜蓬已枯不再綠】归去汴桥三鼓月【崔涂诗蝴蝶梦中家万里子规枝上月三更东坡诗令严钟鼓三更月】相思梁苑一枝梅【说苑曰越使诸发执梅一枝以遗梁王梁臣韩子曰乌有以一枝梅遗列国之君者乎梁苑指汴京梁孝王兔园所在】我闲时欲从君醉为备芳醪更满罍

次韵清虚喜子瞻得常州【东坡自元丰二年十二月谪黄州居黄五年至元丰七年八月量移汝州八年得请居常州苏子由为王定国作清虚堂记清虚即定国也】

喜得侵淫动搢绅【史记五帝本纪太史公曰荐绅先生难言之徐黄曰荐绅即搢绅也杜诗东方领搢绅高适诗遑遑随搢绅欧阳公诗风猷蔼搢绅曾子固诗惊传动搢绅】俞音下报谪仙人【唐书李白传贺知章叹曰子谪仙人也山谷尝呼东坡李太白为两谪仙杜甫赠李白诗昔年有狂客号尔谪仙人】惊回汝水间关梦【东坡尝欲居汝颖】乞与江天自在春【老杜诗恣意买江天】罨画初游水欲泮【罨画属常州古称阳羨三湖九溪地理志云今只有六溪其三溪不知其处而六溪之中有荆溪则首受芜湖东至阳羨入海俗呼为罨画溪也邵康节诗罨画溪深方误入张师正倦游录云能罨画乃今之生也毛诗迨冰未泮昌黎联句离思春水泮王介甫诗归期只待春冰泮】浣花何处月还新【浣花溪在成都此言东坡未有还蜀之日】凉州不是人间曲【凉州曲名盖唐以州名曲如伊凉甘梁之类郑棨开元传信记西凉州制新曲曰凉州宁王曰斯曲也宫商而少徵商乱而加暴恐有播越之祸及安史乱始验宁王审音之妙明皇杂录明皇自蜀回乘月登楼命歌凉州凉州即贵妃所制亲御玉笛为倚楼曲因广其曲传于人间东坡诗归来羯鼓打凉州白乐天集载卢贞和元丰坊园柳诗玉皇曾采人间曲应逐歌声入九重】伫见君王按玉宸【唐书礼乐志康崑仑奏琵琶于玉宸殿宋次道东京记後苑有玉宸殿此言东坡非久外者乐天诗借问晨霞子何如朝玉宸】

次韵公秉子由十六夜忆清虚【元丰乙丑作】

九陌无尘夜际天【三辅旧事长安城中八街九陌韩退之诗虽有九陌无尘埃韩偓诗轻寒着背雨凄凄九陌无尘未有泥】两都风物各依然【班固有两都赋国朝以东汴西洛为两都】车驰马逐灯方闹【後汉马后纪车如流水马如游龙】地静人闲月自妍佛馆醉谈怀旧岁斋宫诗思锁今年【汉宣纪神光烛耀斋宫後汉周泽为太常尝卧病斋宫权德舆诗看花诗思发对酒客愁轻杜荀鹤诗牕风从北冷诗思当时轻】但闻公子微行去【博物志王孙公子皆古人相推敬之辞始皇三十一年始为微行咸阳张宴注若微□之所为故曰微行也史记范雎传雎微行□须贾西汉武帝成帝纪竝载微行】门外骅骝立绣鞵【刘向新序骅骝騄骥天下之骏马也杜甫诗马寒防失道雪没锦鞵鞵】

访赵君举【年谱元丰八年腊雪时在馆中作】

朔风吹雪满都城【谢朓诗朔风吹飞雨老杜诗朔风鸣淅淅鲍照效刘公干体云一风吹朔雪千里度龙山左传隐公二年祭仲曰都城过百雉国之害也欧阳公诗曰都城车马喧】晓踏骅骝访玉京【灵枢金景内经曰下离尘境上界玉京史记天上白玉京十二楼五城】相引槽头着春酒【李贺诗小槽酒滴真珠红毛诗曰为此春酒以介眉寿杜诗春酒盃浓琥珀薄】细流三峡夜泉声【杜子美诗词源倒流三峡水又泉声带玉琴李太白诗弹为三峡流泉音又响入百泉去听如三峡流】

和王明之雪【按吴曾漫录云欧阳季默问东坡山谷诗何处好东坡不答但称重黄诗季默云如夜听疎疎还密密晓香整整复斜斜岂是佳耶东坡云正是佳处此诗赋元佑丁卯春雪时在馆中奉呈广平公广平即宋盈祖此篇次前韵】

金母紫皇开寿域【东方朔神异经揖金母拜木公汉书王吉传驱一世之民跻之仁寿之域杜甫诗八荒开寿域杜牧之诗生人但食眠寿域富农桑】炼成天地一炉沙【庄子子黎曰今一以天地为大炉造化为大冶贾谊鹏赋天地为炉今造化为工】千花乱发春无耐万井交光月未斜贫巷有人衣不絮【左传楚子一言而三军之士如挟纊陈平传家贫居陋巷以席为门】北牕惊我眼飞花【华严经如目翳人见室中花翳圆觉经譬如病目见空中花老杜诗岁来还舒满眼花韩文公诗眼知别後自添花陆畅诗天人宁巧剪水作飞花】歌楼处处催沽酒谁念寒生泣白华【毛诗白华孝子之洁白也】

题子瞻墨竹【年谱元佑间馆中作山谷尝有跋云东坡画竹数本笔墨皆挟风霜真神仙中人惜无贺监赏之但有衆人皆欲杀之耳】

眼入毫端写竹真【梁简文帝咏美人看画诗可怜俱是画谁能辨写真杜诗必逢佳士亦写真李後主竹诗传真无好笔写影有横塘东坡诗花心起墨晕春色入毫端又诗老可能为竹写真又诗写真赖有文夫子】枝掀叶举是精神【昌黎竹诗风枝未飘吹露粉先含泪柳诗风枝陈散叶】因知幻物出无象【楞严经云一切浮尘诸幻化相传灯录七佛偈曰身从无相中受生犹如幻出诸形象】问取人间老斲轮【庄子曰齐桓公读书于堂上轮扁斲轮于堂下曰以臣之事观之斲轮徐则甘而不固疾则苦而不入不徐不疾得之于手应之于心口不能言有数存焉于其间古之人与其不可传也死矣然则君之所读者古人之糟粕也】

山谷别集诗注卷上

山谷别集诗注卷下

钦定四库全书

山谷别集诗注卷下 宋 黄庭坚 撰

史季温 注

观秘阁苏子美题壁及中人张侯家墨迹十九纸率同舍钱才翁学士赋之【元佑元年丙寅山谷为校书郎所赋】

仁祖康四海【按国史仁宗庆历四年朋党滋盛参政范仲淹不自安出为陕西河东路宣抚使枢密副使富弼出为河北宣抚使刘巽苏舜钦除名勒停王洙刁约江休复王益柔周延雋章岷吕溱周延逊宋敏求徐绶竝皆斥逐先是杜衍范仲淹富弼等同执政多引用一时闻人欲更张庶事御史中丞王拱宸等不便其所为讽其属鱼周询刘元珣劾奏舜卿等同时斥逐者多知名士上以为过薄而拱宸等方自喜曰吾一举网尽矣欧阳公志苏子美墓曰君讳舜卿字子美开封人好学工为文章官于京师位虽卑数上疏奏论朝廷大事敢道人之所难言范文正公荐君召试得集贤校理自元昊反兵出无功天下殆于久安而困兵事天子奋然用三四大臣欲尽革衆弊以纾民是时范文正公与富弼相多所设施而小人不便顾人主方信用思有以撼动未得其根以君文正公之所荐而宰相杜公壻也乃以事中君坐监进奏院祠神奏用市故纸钱会客为自盗除名君名重天下所会客皆一时贤俊悉坐贬逐然後中君者喜曰吾一举网尽之矣其後三四大臣继罢去君携妻子居苏州买水石作沧浪亭日益读书时发其愤闷于歌诗至其所激往往惊絶又喜行草书皆可爱虽短章醉墨落笔争为人所传】本朝盛文章【孟子曰立乎人之本朝杜诗本朝 树立韩诗国朝盛文章子昂始高蹈】苏郎如虎豹孤啸翰墨场【文选谢宣远咏张子房诗粲粲翰墨场杜诗出游翰墨场柳子厚锋摇翰墨场】风流映海岱【书禹贡海岱及淮惟徐州桓?谓庾亮曰徐宁真海岱清士李太白诗历诋海岱豪结交鲁朱家】俊锋不可当【陈孔璋檄天威不可当岑参诗鼓怒不可当】学书窥法窟【项羽传学书不成去学劒】当代见崔张【崔瑗字子玉善草书王隐谓之草贤张芝字伯英性好书其草急就章字皆一笔而成张伯英自称上比崔杜不足下方罗赵有余崔乃崔瑗张即伯英也】银钩刻琬琰【法书苑索靖草书絶代名曰银钩蚕尾晋书索靖草书状曰草书之为状也宛若银钩漂若惊鸾杜诗龙蛇动篋蟠银钩又诗拜舞银钩落又诗头陀琬琰镌】蚕尾回缣绡【欧阳公诗牧愚老缣绡】擢登羣玉府【穆天子传曰羣玉山先生之所谓策府柳子厚文森然炳然若开羣玉府】台阁自生光【韦应物诗英声久籍籍台阁多故人岑参诗高价振台阁清词出应徐】春风吹晓雨禁直梦沧浪【东坡诗禁林夜直鸣江濞孟子离娄上沧浪之水清兮可以濯我纓】人声市朝远【谢朓诗寂寞市朝变陆士衡诗日中市朝满车马若川流】帘影花光凉【韦应物诗思逐花光乱光一作竹】秋河湔笔研怨句挟风霜【西京杂记淮南王着鸿烈白云字中皆挟风霜韩文公诗频蒙怨句刺弃遗东坡诗怨句写余恨】不甘老天禄【天禄阁汉世以藏秘书扬雄校讐天禄阁天禄兽也因以为名】试欲叫未央【汉有未央宫】小臣胆如斗【礼运大臣法小臣廉左传

僖公四年太子祭于曲沃归胙于公与小臣小臣亦毙成公十年小臣有晨梦负公以登天刘公干诗小臣信顽鲁杜诗亦如小臣媚至尊太白诗小臣拜献南山壽东坡诗小臣愿对紫薇花蜀志姜维传世语曰维死时见剖胆如斗大】侏儒俸一囊【西汉东方朔上书上伟之令待诏公车俸禄薄朔给侏儒曰上欲尽杀若曹上问朔何恐侏儒对曰侏儒长三尺余俸一囊粟钱二百四十朔长九尺余亦俸一囊粟钱二百四十侏儒饱欲死臣朔饥欲死无令但索长安米上大笑因使待诏金马门】请提师十万【韩昌黎诗提师十万余四海钦风棱前汉书樊哙言愿得十万衆横行匈奴中季布曰哙可斩也夫以高帝兵三十万余困于平城哙时亦在其中今哙柰何以十万衆横行匈奴中哉】奉辞问犬羊【书大禹谟奉辞伐罪潘安仁西征赋异奉词以伐罪初垂翅于回谿】归鞍饮月支【汉张骞传匈奴破月支王以其头为饮器】伏背笞中行【汉书贾谊传陛下试以臣为典属国请必系单于之颈而制其命伏中行说而笞其背】人事多乖迂【陶潜答龐参军诗序人事好乖便当语离杜诗人事多错迂东坡诗人事固多乖又诗人事多乖违】南迁浮夜航此时调玉烛日行中道黄柄臣似牛李倾夺谋未臧【按以上五句注文原阙】鲁酒围邯鄲【庄子外篇鲁酒薄而邯鄲围庄子注楚宣王朝诸侯鲁恭公後至而酒薄宣王怒发兵攻鲁梁惠王尝欲击赵而畏楚救楚以鲁为事故梁得围邯鄲许慎注淮南子楚会诸侯鲁赵俱献酒于楚王鲁酒薄而赵酒厚酒吏易鲁薄酒故楚王围邯鄲】老龟祸枯桑【异苑孙权时永康有人入山遇一大龟即束之归龟便言曰游不良时为君所得人甚怪之载出欲上吴王夜泊越里?船于大桑树宵中树呼龟曰劳乎元绪奚事尔耶龟曰我被拘繫方见烹臠虽尽南山之樵不能溃我树曰诸葛元逊博识必致相苦令求如我之徒计将安出龟曰子明无多词祸将及汝树寂而止既至权命煮之焚柴万车语犹如故诸葛恪曰然以老桑乃熟献者仍说龟树共言权命使伐树煮龟立烂白乐天诗老龟烹不烂延祸及枯桑】兼官有郡邸【汉成纪封舅诸吏光禄大夫王崇为安成侯应邵曰诸吏武帝初置皆兼官所加史记诸侯朝天子于天子之所立宅舍曰邸汉文纪至邸议之师古曰郡国朝宿之舍在京师者率名邸邸至也】报赛用岁常招延青云士【伯夷传间巷之人欲砥行立名者非附青云之士乌能施于後世哉刘禹锡武陵集纪云尝所与游皆青云之士韩诗朝为青云士暮作白首囚】共醉椒糈觞【离骚巫咸将夕降兮怀椒糈而要之四民月令云元日进椒柏酒】俗客被白眼傲歌舞红裳【王益柔字胜之与苏子美祠神会为傲歌者】谤书动宸极【史记甘茂传魏文侯使乐羊伐中山返而论功文侯示之谤书一篋诗话载苏子美勾当进奏院因赛神会召馆中同列时洪州李中舍因梅圣俞愿与此会子美答曰食中不设慢罗餠夹坐上安有国舍虞比也李衔之暴扬其事子美坐责圣俞有客至诗云客有十人至共食一鼎珍一客不得食覆鼎伤衆宾盖指李也杜诗声华夹宸极】牢户系桁杨【庄子桁杨接榘音义云械夹颈及胫者】一网收冠盖【左太冲诗冠盖?四术曹子建诗冠盖相追随】九原人走藏【礼记晋献文子曰从先大夫于九京注谓晋卿大夫之墓地在九原京盖字误老杜诗妇女行泣夫走藏】庖丁提刀立【庄子内篇庖丁为文惠君解牛提刀而立四顾为之踌躇善刀而藏之文惠君曰善吾闻庖丁之言得养生焉】滿志无四旁论罪等饕餮【左传文公十八年縉云氏有不才子贪于饮食冒于货贿天下之民以比三凶谓之饕餮舜臣尧流四凶族浑敦穷奇檮杌饕餮投诸四裔以御魑魅东京赋洊饕餮之贪慾善曰杜预左氏传注贪财曰饕贪食曰餮】囚衣御方良【夏官方相氏以戈击四隅馘方良注方良音罔两又如字张平子东京赋斩蜺蛇脑方良注向曰竝恶鬼名综曰方良草泽之神】姑苏麋鹿唾【诗町唾鹿场注鹿迹也唾宅短反伍被諫淮南王曰昔子胥諫吴王吴王不

听乃曰臣今见麋鹿游于姑苏之外宫中生棘荆露沾衣也李太白诗棘生白虎殿鹿走姑苏台白乐天诗姑苏台下草麋鹿暗生麇】风月在书堂永无湔祓期【曹子建应诏诗表永无执珪之望汉书昌邑王贺传曰以湔洒大王退之诗云惧终莫湔洗】山鬼共幽篁【山鬼字见史记秦始皇纪楚词九歌有山鬼鲍明远芜城赋水魅山鬼野鼠城狐风啤雨啸昏见晨趋杜诗山鬼幽忧雪霜逼】万户封侯骨【汉书李广传文帝曰惜广不逢时令当高祖世万户侯岂足道哉後汉班超传相者指超曰生燕颌虎颈飞而食肉此万里侯相也翟方进传从蔡父祖蔡父谓曰小吏有封侯骨】今成狐兔冈【桓子新论雍门周见孟尝君曰臣窃悲千秋万岁後坟墓生荆棘狐兔穴其中张孟阳七哀诗狐兔窟其中芜秽不复扫】迩来四十年【诸葛亮出师表迩来二十有一年矣太白蜀道难迩来四万八千岁欧阳公诗迩来不觉四十年】我亦校书郎【山谷元丰八年四月除校书郎恰四十年】雄文终脍炙【欧阳公祭苏子美云子于文章雄豪放肆孟子曰脍炙哉邵康节诗言味止如甘脍炙】妙墨见垣墙【费誓无敢寇攘踰垣墙】高山仰豪气【毛诗高山仰止豪气见前注】峥嵘乃不亡【吴都赋南北峥嵘注峻险貌李白大鹏赋吐峥嵘之高论郭璞方言注峥嵘高峻也老子曰死而不亡曰壽】张侯开诗卷词意尚轩昂【韩退之听颖师弹琴诗划然变轩昂】草书十纸余雨漏古屋廊【周越法书苑顔鲁公与怀素同学草书于鄢兵曹或问张长史见公孙大娘舞劒始得低昂回翔之状兵曹有之乎怀素以古钗脚对鲁公曰何如屋漏痕杜少陵诗牀牀屋漏无乾处】诚知千里马不服万乘箱【战国策郭隗谓燕昭王曰古人君遣使者賫千金市千里马于他国贾捐之传孝文帝时有献千里马者毛诗皖彼牵牛不以服箱张平子思玄赋繫驂裹以服箱东坡诗空飞不服箱】遂令驾鼓车【後汉循吏传建武十三年有献名马日行千里诏以马驾鼓车老杜诗吾闻驾鼓车不合用骐驎又今日翔麟马先宜驾鼓车东坡诗汗血驾鼓车】此岂用其长事往飞鸟过【文选张景阳诗忽如鸟过目杜少陵诗余生如过鸟乐天诗生犹鸟过目杜牧之诗长空碧杳杳万古一飞鸟】九原色莽苍【庄子逍遥篇适莽苍者三爨而返腹犹果然王介甫诗武昌山川今可想绿水逶迤烟莽苍】敢告大钧手【贾谊赋大钧播物块圯无垠李太白诗存亡任大钧】才难幸扶将【鲁论曰才难不其然乎汉孝景王皇后传女逃匿扶将出拜乐府木兰歌爷娘闻女来出郭相扶将是篇始则美苏公之才中则伸苏公之冤终则叹人才之难谓当爱护诗人箴规美刺之体备矣】

题文路公黄河议後【苏子由遗老传云元丰中河决大吴神宗知故道不可复因导之北流水性已顺至元佑初文潞公吕汲公主回河之议劳民费财竟无益也详见遗老传】

澶渊不作渡河梁【九域志河北东路开德府本曰澶渊即澶州】由是中原府库疮白首丹心一元老【杜少陵诗北阙丹心在毛诗方叔元老】归来高枕梦河湟【史记张仪传大王高枕而卧又楚词故高枕而自适】

题宗室大年画二首【米芾书画史宗室令穰字大年作小轴甚清丽陈後山诗云今代风流数大年是也此诗洪景卢夷坚志所载山谷尝跋大年画云大年学东坡先生作小山丛竹殊有思致但竹石皆觉笔意柔嫩盖以年少喜奇故耳又云荒远闲暇亦有自得意处比之古人但少豪壮及余味耳年谱元佑间馆中作】

水色烟光上下寒【李太白诗山光水色绿如蓝】忘机鸥鸟恣飞还【文选江文通杂体诗曰亹亹玄思清胸中去机巧物我俱忘怀可以狎鸥鸟列子海上有人好鸥鸟至者以百数其父曰吾闻鸥从汝游试来吾从玩之曰诺明旦之海上鸥鸟舞而不下李太白诗白鸥兮飞来长与君相亲】年来频作江湖梦对此身疑在故山【东坡诗江湖来梦寐谢灵运诗故山日月还杜诗故山多药物】

轻鸥白鹭定吾友【杜少陵诗鸥轻故不还东坡赤壁赋侣鱼鰕而友麋鹿韩昌黎诗吾友柳子厚山谷前集诗两用吾友陈师道】翠柏幽篁是可人【韦应物诗独爱此幽篁可人字见蜀志费祎及晋书桓温传】海角逢春知几度【范文正公海陵西溪牡丹诗阳和不择地海角亦逢春忆得上林色相看如故人】卧游到处总伤神【杜诗回首一伤神王荆公诗山林投老一伤神】

题燕邸洋川公养浩堂画二首【此诗洪景卢夷坚志表出之年谱元佑间馆中作按容斋纪异云燕邸莱州洋川公家有古今画十册东坡过之为书籤题其後云高堂素壁无舒卷之劳明窗净几有坐卧之安又按容斋纪异止载萧寺吟双竹及题大年画二篇夷坚志方载後一篇今并録之】

萧寺吟双竹秋醪荐二螯破尘归骑速横日雁行高【昌黎诗归骑得相收欧阳公诗天街绿树腾归骑东坡诗遥知寒食催归骑白乐天诗雁点青天字一行东坡诗碧天无际鴈行高】

拥膝庶残腊【乐天诗度腊都无苦霜霰】攀条惊早春【谢灵运诗攀条摘蕙草文选古诗攀条折其荣将以遗所思李太白诗攀条摘朱实柳子厚诗攀条何所叹欧诗攀条惊雪尽】陈郎浮竹叶着我北归人

题刘法直诗卷【年谱元佑间馆中作】

往日刘随州作诗惊诸公【唐人刘长卿字文房尝为随州刺史有诗集行于世杜甫诗语不惊人死不休】老兵睨前辈【晋谢奕尝逼桓温饮温避之奕遂引一兵帅共饮曰失一老兵得一老兵後汉孔融论盛孝章书曰今少年喜谤前辈】欺诋阮嗣宗【嵇康絶交书阮嗣宗口不论人过吾每师之】才卿望长卿岁数未三百岂其苗裔耶【史记羽岂其苗裔耶何兴之暴也】诗句侵唐格【名贤诗话云黄鲁直自黔南归诗变前体且云要须唐律中作活计乃可言诗此所以有取于法直也】慨然古人风【魏志毛玠传太祖以素屏风素凭几赐玠曰君有古人之风故赐君古人之服】乃作逐客篇【逐客见史记李斯传东坡诗逐客何人着眼看】朝廷重九鼎【史记毛先生一行使赵重九鼎大吕】政欲多此贤虎豹九关严【楚词招魂曰虎豹九关啄害下人】漂零落闲处空余三百篇【诗三百一言以蔽之曰思无邪】不随夜台去【刘禹锡酬乐天诗曰华屋坐来能几日夜台归去便千秋】

送莫郎中致仕归湖州【并引】

世传雪上多高士今莫公其人哉公为刑部郎中一旦浩然思归遂奏乞谢事朝廷深惜其人材重违其高致即以本曹郎致仕考之近岁未有此例也是时公方中年摆落显仕如遗芥考之近岁未见其人也凡朝廷之士大夫至于府史闾巷之人莫不咨嗟叹息曰贤乎哉莫公然余尝观之士风之零替未有如今日之盛也非特士风之尤乃法令致使然尔异日三丞致仕得官一子今则不得也至朝奉郎乃得之及朝奉郎年及格不得也不躬受不得也至则有耄老而不去既去而复来自列其年归过乃父疾亟方请命至已亡哭扶尸以给将命使者不授牒讼纷纷逾时不决古人以致仕为荣交亲毕贺今人以致仕为病子弟交诤呜呼天下士风一至于此由是观之莫公其贤者乎天下之人闻其风者可以兴起矣余虽于公不深独喜而乐道之

雪上多高士【寰宇记云苕霅二溪属湖州霅者四水激射之声盖四水合为一溪也曰苕溪曰前溪曰余不溪曰霅溪东汉有高士传张志和自称烟波钓徒往来苕霅间】君今又乞身【後汉李通传时天下略定通思欲避荣宠以病乞身欧阳永叔诗晚节恩深许乞身东坡诗粗报君恩便乞身】中年谢事客【晋王羲之传谢安曰中年以来伤于哀乐与亲友别辄作数日恶】白日上昇人【神仙传蜀女谢自然师司马承祯後白日上昇洞仙传茅蒙字初成师鬼谷先生乘云驾龙白日昇天邵康节诗灵丹换骨还知否白日昇天似得麼珠囊十六云驰骋龙驾白日登晨西阳杂俎曰白日去曰上解崔居士唐中岳韩尊师碣文曰尝览镜自赞曰我瞳正方可白日昇天】静泛苕溪月闲尝顾渚春【按輿地广记顾渚隶湖州地有进茶品甚?刘梦得试茶歌何况蒙山顾渚春东坡诗千金买断顾渚春】滔滔夜行者【论语滔滔者天下皆是也汉书朱买臣传富贵不归故乡如衣锦夜行】能不愧清尘【楚词闻赤松之清尘谢灵运述祖德诗遥遥播清尘杜诗前後问清尘曾子固诗郎位袭清尘山谷因莫公以起当世之痼疾也】

杂诗【年谱绍圣元年夏山谷与佛印相遇当是此时作】

迷时今日如前日【韩诗外传云昨日何生今日何成】悟後今年似去年随食随衣随事办谁知佛印祖师禅【观佛三昧经云住念佛者心印不坏乎传灯録慧光问达磨曰诸佛印可得闻乎师曰诸佛法印匪从人得又仰山谓香嵩禅师曰汝只得如来禅未得祖师禅东坡诗後來檐卜祖师禅】

明叔惠示二颂【年谱绍圣丁丑谪黔南作其序云明叔惠示二颂云见七佛偈似有警觉乃是见道之端发于此故以二颂为报杨皓字明叔眉州丹棱人官于黔中时山谷迁谪与之游从山谷和杨明叔隅字韵七诗皆谓之颂前集载其五叙州墨妙亭碑刻其二即此是也彭山黄氏旧藏山谷墨蹟七首并録】

山川围宴坐【东方朔外传武帝宴坐朔执戟在殿阶旁唐贯休诺讷罗赞雁荡经行云漠漠龙湫宴坐雨蒙蒙东坡诗持颐宴坐不出门又径山诗结茅宴坐荒山颠又宴坐林间时有虎又幽人宴坐处又宴坐柳生肘山谷题胡逸老致虚庵亦云山围宴坐画图出】日月转庭隅【杜甫诗野月满庭隅东坡诗明月岂肯留庭隅】般若寻常事【般若经须菩提宴坐崑中

帝释散花曰我闻尊者善谈般若须菩提曰我于般若未尝谈着一字帝释曰尊者无说我亦无闻无说无闻是名般若】如来卧起俱【佛书杂说如者来之体来者如之用湛然常自在而如如者谓之如应物而来者谓之来】多闻成外道【楞严经阿难见佛顶礼悲泣恨无始来一向多闻未全道力传灯录外道问佛不问有言不问无言】只是守凡夫【金刚经凡夫者如来说即非凡夫东坡诗要知杯渡是凡夫】欲听虚空教【楞严经第六卷偈迷妄有虚空老杜诗虚空不离禅】须弥作鼓桴【礼运云蕢桴而土鼓疏云桴谓击鼓之物史记司马穰苴援桴而鼓之宝积经须提菩言世尊我若入定正使有人具大神力以百亿四天下为一大鼓取须弥山为一大椎于我定时令一大人住在我前执彼大椎挝击大鼓雪窦後录载盐官齐安和尚示众云虚空为鼓须弥为椎甚麽人打得】

平生讨经论苦行峻廉隅【文选石阙铭人识廉隅家知礼义王子渊洞箫赋故贪饕者听之而廉隅】伪契已无分买山云自如【世说支遁就深公买仰山公曰未闻巢由买山而隐王介甫诗太空云自如】身为廊庙宰【李少卿答苏武书亲戚贪佞之类悉为廊庙宰】梦作种田夫【东坡我是识字耕田夫】欲辨身兼梦还如鼓与桴【前汉李寻传和气可立致犹桴鼓之相应也】

与黔倅张茂宗【按蜀本诗集注云山谷初到黔南守曹谱伯达倅张旣茂宗待之颇厚山谷与大主簿三十三书云太守曹供备谱济阳之侄通判张旣张景俭孙公休之妻弟皆贤雅相头如骨肉年谱元符初元迁戎州作】

静居门巷似乌衣【楞严经云譬如人静居王逸九思静居兮自娱孟东野诗问禅徒静居王介甫诗禅天好静居老杜诗故乡门巷荆棘?世说王导曰元规若来吾角巾还乌衣注引丹阳记曰乌衣起吴时乌衣营处所也江左初立琅邪诸王所住按寰宇记乌衣巷在今建康上元县刘禹锡诗朱雀桥边野草花乌衣巷口夕阳斜】文采风流众所归【杜甫诗文采风流今尚存】别乘来同二千石【晋书庾亮曰别驾旧与刺史别乘同流王化任居刺史之半欧阳公诗玉麈高谈别乘贤】化民曾寄十三徽【乐书曰琴一也?谓伏羲作?谓神农作上圆下方象天地徽十有二象十二律】寒香亭下方遗爱吏隐堂中已息机【李白送贺监诗曾问长生说息机白居易诗功名已息机韩偓诗争敢当年便息机】暂与计司参婉画【文选谢宣远诗曰婉婉幕中画】百城官吏借光辉【杜甫诗拥别借光辉李适之送贺知章诗行路满光辉李谅诗篇章时到借光辉】

次韵任道雪中同游东臯之作【山谷与王观复书云有李仔任道本梓人而寓江津二十余年其人言行有物则参道得其要老成人也集中有答任道诸诗元符二年自黔移戎至江津作】

四海方嗷嗷【诗鸿雁哀鸣嗷嗷搜神记万物焦枯百姓嗷嗷老杜诗万户哀嗷嗷】我奔走独劳【诗我从事独贤】停舟近北渚【楚词帝子降兮北渚陆士龙诗北渚无河梁】扶杖步东臯【前汉贾山至言山东吏布诏令民虽老羸癯疾扶杖而往听之陶渊明归去来词登东臯以舒啸江文通杂拟诗种苗在东臯】霜落瘦石骨【韩昌黎诗巧匠斲山骨河图括地

象曰地以石为骨】水涨腐溪毛【左传隐公三年涧溪沼沚之毛】更有山阴兴【晋书王徽之尝居山阴夜雪初霁忽忆戴逵逵时在剡溪便夜乘小船诣之经宿方至造门不前而返人问其故徽之曰本乘兴而来兴尽而返何必见戴安道耶杜诗山阴野雪兴难乘东坡诗忽起山阴兴】能无秦复陶【左传昭十二年楚子狩于州来雨雪王皮冠秦复陶注秦所遗羽衣也】

戏用题元上人此君轩诗韵奉答周彦起予之作病眼空花句不及律书不成字【诗後题云此诗如元公欲刻之此君轩可听渠摹本也王庠字周彦荣州人山谷前集有寄题荣州祖元大师此君轩诗诗中有公家周彦笔如椽之句荣州嘉佑寺此君轩诗刻又有山谷跋云余既追韵作此诗寄周彦周彦钞本送元师元师得余手墨因为作草草书近时士大夫罕得古法但弄笔左右纏紉遂号为草书尔不知与科斗篆隶同法同意数百年来惟张长史永州狂僧怀素及余三人悟此法尔苏才翁有悟处而不能尽其宗趣其余碌碌尔江安城北滩上作茅亭尉李相如为余开两窗极明暖故能戏弄笔墨可意墨蹟今藏于前忠南刘守子晖家元符二年自黔移戎留江安作】

此道沈霾多历年【尚书君奭篇故殷礼陟配天多历年所孟子万章上历年多施泽于民久】喜君占斗斲龙泉【晋张华传斗牛之间常有紫气雷焕曰此宝剑之精上彻于天当在豫章丰城华即补焕为丰城令焕到县掘狱屋基得一石函中有双剑一曰龙泉一曰太阿】我学渊明贫至骨【杜甫诗已诉徵求贫到骨东坡诗先生年来穷到骨】君岂有意师无弦【陶渊明传不解音律常蓄无弦素琴一张每酒酣即抚弄以寄意李太白诗崔令学陶令北窗常昼眠抱琴时弄月取意任无弦】潇洒侯非贪爵命道人胸中有水镜【东坡诗道人胸中水镜清蜀志庞统传注司马德操为水镜晋书乐广传卫瓘曰此人之水镜也】霜钟堂下明月前【山海经丰山有钟九耳霜降则鸣元以霜钟名其堂】枝枝雪压如悬磬【昌黎喜雪献裴尚书诗欺梅竝压枝左氏室如悬磬野无青草】敝帚不扫舍人门【魏文帝论文曰里语曰家有敝帚享之千金汉书高五王传魏勃常独扫齐相舍人门】如愿不谒青洪君【録异传曰庐陵欧阳明从贾客道经彭泽湖每以船中所有投湖中後忽见一人来候明云是清洪君感君前後有礼故要君必有重遗君勿取独求如愿尔明既见青洪君乃求如愿使逐明去如愿者青洪君婢也明将归所愿辄得】来听道人写风竹【杜甫诗嗜酒爱风竹东坡诗衆宾起舞风竹乱】手弄霜钟看白云平生窃闻公子旧今日谁举贾生秀【汉书贾谊传河南守吴公闻谊秀才召至门下文帝立闻吴公治为天下第一徵为廷尉吴公乃言谊年少通书上召以为博士】未知束帛何当来但有一筇相倚瘦欲截老龙吟夜月无人处为江山说中郎解赏柯亭椽【张鷟高士传蔡邕告吴人曰吾尝经会稽高迁亭见屋东间第十六椽竹可以为笛取用果有异声伏滔长笛赋叙曰蔡邕避难江南宿于柯亭柯亭之馆以竹为椽邕仰而盼之曰良竹也取以为笛奇声独絶历代传之晋书桓伊传伊善音乐尽一时之妙有蔡邕柯亭笛常自吹之王徽之赴召泊舟青溪合人谓伊曰闻君善吹笛试为我一奏伊素闻徽之名便下车踞胡牀为作三调邕尝为中郎将】玉局归时君为传【玉局盖指东坡意欲待东坡之赏音如蔡邕之赏柯亭椽也】

和蒲泰亨四首【泰亨青神人元符庚辰徽宗即位山谷自戎州放还省其姑张祉介卿之母

于青神是诗此时所和墨迹今藏于秘撰杨公家】

我已人间无所用鬓飘霜雪眼生花东坡兄弟来虽晚折箭堪除蚀月蛙【卢仝月蚀诗传闻古老说蚀月虾蟆精东坡送三掾罢官诗月啖虾蟆行复皎】

东坡海上无消息【老杜梦李白诗金瓶落井无消息李义山诗丹丘万里无消息】想见惊帆出浪花【东坡诗惊帆度海风掣回刘禹锡诗无端陌上狂风急惊起鸳鸯出浪花杜甫诗闪闪浪花翻又慢卷浪花浮又正怜日破浪花出东坡诗樽酒那能泛浪花又虎跑泉诗龙作浪花供抚掌又八月十五看潮诗欲识潮头高几许越山浑在浪花中又诗云篙师酣寝浪花中】三十年来世三变【沈约宋书谢灵运传论自汉至魏四百余年词人才子文体三变三变盖指熙丰元佑绍圣也】几人能不变鹑蛙【列子天瑞变若蛙为鹑注事见墨子】

玉座天开旋北斗【谢朓铜雀台诗玉座犹寂寞老杜诗玉座应悲白露团独孤及风后八阵图记若星驰天旋雷动山破时徽庙登极故有玉座天开之句】清班鸟散落余花【白乐天诗早接清班登玉陛东坡珪璋满清班谢朓诗鱼戏新荷动鸟散余花落】有人难立百官上【杜甫诗每于百寮上】不为庙中羔兔蛙【汉书霍光传山曰丞相擅减宗庙羔兔蛙此可罪也师古曰羔兔蛙所以供祭难立百官上指章惇言惇罪不特羔兔蛙耳】

栽竹养松人去尽空闻道士种桃花【刘梦得元和十年自朗州召至京师戏赠看花诸君子诗紫陌红尘拂面来无人不道看花回玄都观里桃千树尽是刘郎去後栽大中二年三月复来游作绝句并引曰予贞元二十一年为尚书屯田员外郎时此观中未有花木是岁出牧连州寻贬朗州司马居十年召至京师人皆言有道士植仙桃满观如烁晨霞遂作诗以志一时之事旋又出牧于今十有四年得为主客郎中重游兹观荡然无复一树惟兔葵燕麦动摇春风耳因再题二十八字诗云百亩庭中半是苔桃花净尽菜花开种桃道士归何处前度刘郎今又来】昨来一夜惊风雨满地残红噪暮蛙【蜀僧远国诗两朝基业都成梦林木苍苍噪暮蛙】

奉谢泰亨送酒

风扫三峨山外雨【东坡峨眉翠扫雨余天】霜摧五柳宅边花【陶潜宅边种五柳自号为五柳先生】非君送君添秋睡可耐东池到晓蛙和东坡送仲天贶王元直六言韵五首【山谷自序云王元直惠示东坡先生与景文老将唱和六言十篇感今怀昔似闻东坡已渡瘴海来归而景文墓木已拱仲天贶之垄亦有宿草犹喜元直尚健能道钱塘旧事故追韵作此五篇只今眼前无景文辈人故诗语及之尤多此诗山谷留青神时所作墨迹今藏秘撰杨公家按东坡诗序云仲天贶王元直自眉山来见予钱塘留半岁既行作绝句五首送之诗见前集刘景文和东坡诗序云季孙惶恐伏蒙判府内翰宠示寄仲天贶王元直诗五首仰同严韵不胜狂妄之罪谁怀二子千里公赋五篇六言月?飞云西去山头归雁双骞小艇辞公晚发高斋记客初来耿耿不忘追路阻修万折千回府下莫非羣隼坐中不见三明远意关河马首静吟笔砚泉声虽到蜀都有日却逢谢傅何年历历林溪胜处想君把酒依然乐事莫如饮酒休官

自是高人红带鳌头寄与是翁瞿铄寻春红带谓王庆源老人也因附于此】

仲子霰霜杀草【春秋僖公二十三年霰霜不杀草汉武纪元光四年夏四月陨霜杀草】风流无地寄言【屈原怀沙愿寄言于浮云兮宋玉九辩愿寄言夫流星兮嵇叔夜琴赋叙吟咏之不足则寄言以广意】王君攀鳞附翼【杨子渊骞篇攀龙鳞附凤翼】礼义端能不骞【左氏礼义不愆何恤于人言骞字当考】

不怨子堂堂去【堂堂乎本论语薛能诗青春背我堂堂去】盖念君得得来【僧贯休诗千水千山得得来】家藏会稽妙墨晚岁喜识方回【山谷自注云郗方回王右军妻弟山谷以王元直东坡妻弟故引此为例】

两公六字语妙【韩诗六字常语一字难】独我一双眼明【贯休古意诗只应天上人见我双眼明杜诗吾与汝曹俱眼明韩昌黎城南联句遥岑出寸碧两目增双明】笔似出林鸟翼【怀素草书飞鸟出林惊蛇入草东坡王逸少帖诗出林飞鸟一扫空】诗如落涧泉声【杜诗蓝水远从千涧落山谷前集寄题此君轩诗响如清夜落涧泉】

老忆夷门老将【指刘景文也】当年许我忘年【文士传称衡与孔融作尔汝交衡年二十余融年五十敬衡秀才而忘年也南史江总传张纘等雅相推重为忘年交】博学似刘子政【汉书刘向字子政通达能属文诏向领校中五经秘书专积思于经术刘歆传父子俱好古博见强志司马迁赞刘向博极羣书】清诗如孟浩然【杜甫解闷诗复忆襄阳孟浩然清思句句尽堪传】

天子文明濬哲【尚书舜典濬哲文明温恭允塞】今年不次用人九原埋此佳士百草无情自春【韦应物金谷园歌百草无情春自绿寒山子诗黄泉无晓日青草自知春或用王胄庭草无人随意绿之义唐崇阳公主诗行路至今空叹息岩花涧草自春秋王荆公破冢诗埋没残碑草自春时徽庙嗣位复用元老大臣故山谷有是诗】

元师自荣州来追送余于泸之江安绵水因复用旧所赋此君轩诗韵赠之竝简元师法弟周彦公【按黄?年谱云此诗山谷跋云旧得东坡所作醉翁操善本尝对元道之元欣然曰往岁从成都通判陈君颀得其谱遂促琴弹之词与声相得也蜀人由是有醉翁操然词中之微旨弦外之余韵俗指尘耳岂易得之建中靖国元年正月辛未江安水次偶住亭书故诗有醉翁之语王周彦此君轩和诗附庠窃观学士九丈题此君轩诗谨次元韵因以求教下愤愧悚之至竹君久要已忘年临风相语叶响泉休学我圆中似璧莫师我直劲如弦劝人达节通天命舒卷若绳明若镜尺无枉已空宿昼圣岂有心犹击磬岁寒来伴老柴门我岂好静为躁君惟有青青四时性笑杀千载空浮云平安为报春依旧?重道人怜特秀忍饥宁可食无肉相对忘形笋黑瘦更有涪翁心似月平生相照何劳说不为煎茶不作椽清风万壑到处传庠拜手顿首启伏蒙学士九文再赐诗章庠僭率继和尚凯采览庠再拜鸣凤览德来纪年要知圣泽如流泉霜钟堂前饱竹实道人娱凤抚舜弦敲门剥啄谁传命淡云磨丹开天镜明朝相约送涪翁夜静林深遶清磬涪翁万里离鬼门竹枝莫恼白使君欲试刚肠置冰炭抱琴远别冲行云】

邂逅东坡应话旧但说海山千万秀道庠问讯今何如自笑依还空鹤瘦我不愧天欺日月何须更扣杯琰说玉局洞天云遶椽渔竿远信烦公传】

岁行辛巳建中年诸公起废自林泉【韩退之别知赋余取友于天下将岁行之两周建中靖国元年岁在辛巳徽宗改元大赦诸老摈斥者皆复起废】王师侧闻陛下圣【列子吾仄闻之试以告汝老杜诗侧闻夜来寇坡诗侧闻长者言又侧闻顿夫子汉书高帝纪大王陛下应劭曰陛下者堂陛陈阶陛之侧羣臣与至尊言不敢指斥故呼陛下者而告之因卑以达尊之意韩诗曷不荐贤陛下圣】抱琴欲奏南风弦【舜弹五弦之琴以歌南风韩昌黎诗欲和薰风琴东坡不须写入薰风弦又欲和南风琴】孤臣蒙恩已三命【孟子孤臣孽子韩昌黎诗孤臣昔放逐柳子厚诗孤臣泪已尽东坡诗刻画愧孤臣又孤臣南游堕黄菅左传昭七年宋正考父鼎铭曰一命而偻再命而伋三命而俯按山谷辞免恩命状臣时于元符三年五月蒙恩自责授涪州别驾复宣义郎监鄂州在城盐税又准告复奉议郎签书定国军节度判官厅公事建中靖国元年又准告复朝奉郎权知舒州所谓三命也】望尧如日开金镜【史记尧纪望之如日洛书曰秦失金镜郑康成曰金镜喻明道也絶交论握金镜闻风烈】但忧衰疾不敢前眼前黑花耳闻磬【老杜诗时因问衰疾王禹传表云蚤年多病眼有黑花晚岁多忧头生白髮东坡云前年黑花生】岂如道人山绕门【东坡野人庐诗刚压青山绕故君】开轩友此岁寒君【老杜诗开轩纳微凉】能来作诗赏劲节家有晓事扬子云【文选杨修答临淄王牋云修家子云老不晓事强着一书悔其少作】箨龙森森新闻旧【卢仝诗箨龙正称冤荆公诗箨龙名为道人留东坡诗斤斧何曾赦箨龙诗人以竹为龙祖出费长房以青竹投葛陂化为龙事东坡诗儿子森森如立竹左传隐公三年石碣谏曰贱妨贵少陵长远间亲新闻旧小加大邵康节诗世态不堪新闻旧】父翁老苍孙子秀【郑康成周礼注孙竹枝根之未生者也韩文公咏笋诗竹亭人不到新笋满前轩成行齐婢仆环立竹儿孙】但知战胜得道肥【韩非子子夏肥或有问之者子夏曰吾战胜曰何为战胜曰吾入见夫子之义则荣之出见富贵又荣之二者战于胷臆而夫子之义胜谢朓观雨诗方同战胜者去剪北山莱陶渊明诗贫富常交战道胜无戚容山谷答王雱书曰想以道义敌纷华之兵战胜久矣】莫问无肉令人瘦【东坡緑筠轩诗可使食无肉不可使居无竹无肉令人瘦无竹令人俗】是师胷中抱明月【东坡赤壁赋抱明月而长终】醉翁不死起自说【欧阳文忠公自号为醉翁】竹影生凉到屋椽【老杜诗发地扶屋椽又卑枝成屋椽】此声可听不可传

木龟亭留题【年谱编在建中靖国初元自蜀至江陵诗後未详地名】

南台一西路木龟坊乃是灵蛙鼃属藏【吴都赋巨鳌鼃属首冠灵山注云作力貌韩昌黎效卢仝月蚀诗寒气鼃属顽无风坡诗不知鼃属舞钧天】从此改名杉蚶蛸【玉篇蚶胡多反蚶蛸蜥蜴蛸薄碑反亦虫也今当从侧音马令南唐书汪台符贻书谓宋齐丘齐丘使人诱台符乘舟饮醉推沈石头城下蚶蛸硯恐木龟名亭如蚶蛸之名蚶也】恐来吞月直须防【卢仝月蚀诗奈何万里光受此吞吐危又云此时怪事发有物吞食来】

题罗公山古柏庵二首【同前注】

尘埃奔走尚飘蓬【文选曹子建诗转蓬离本根飘飘随长风】想听庵头老柏风会向天阶乞衰晚【楚词曰攀天阶而下视】住庵长作主人翁【韩昌黎诗来报主人翁刘禹锡乞那歌曰愿郎千万寿长作主人翁】

千年鹿死尚精神【左氏鹿死不择音】睡足苍龙半屋伸百年妖狐住不得【东坡诗眼看百药走妖狐妖狐莫夸智有余】个中曾卧谪仙人【南史会稽山有人姓蔡不知名时人谓之谪仙李白答湖州迦叶司马问白是何人诗曰青莲居士谪仙人】书东坡画郭功父壁上墨竹【东坡与郭功父唱酬见坡集中黄?年谱戴家藏山谷此诗真蹟题云次韵东坡先生屏间墨竹止此六句惟草木春作草偃风一棊作一壶琼房作琳房并有功甫跋语云东坡作于余家漆屏之上观鲁直之诗可以见其髣髴矣功甫盖太平州人可见在太平作】

郭家髣屏见生竹【髣音休漆亦多黑少也汉书昭阳舍中庭彤朱而殿上髣漆景福殿赋列髣彤之绣桷注桷以髣漆饰之】惜哉不见人如玉【惜哉字本史记宓不齐传文选王仲宣诗惜哉空尔为老杜诗惜哉结实小惜哉功名迹惜哉李蔡不复得惜哉形胜地东坡惜哉此清景惜哉不可致後汉徐穉传郭林宗曰诗不云乎生刍一束其人如玉】?历中原草木春岁晚一棊终玉局【按东坡年谱绍圣元年自定州贬英州再贬惠州再谪昌化军元符三年移廉州又改永州复朝奉郎提举成都府玉局观建中靖国元年五月至常州七月卒】巨鳌首戴蓬莱山【李白怀仙歌巨鳌莫戴三山去吾欲蓬莱顶上行列子归墟中有五山帝使巨鳌十五戴之五山始峙而不动龙伯国之大人一钩连六鳌于是二山流于北极吴都赋巨鳌鼉首冠灵山史记封禅书曰自威宣燕昭使人入海求蓬莱方丈?州此三神山者昔传在海中诸仙人及不死之药皆在曹子建诗灵鳌载方丈神岳俨嵒峩仙人翔其隅玉女戏其阿】今在琼房第几间【此言东坡乃归蓬莱也】

史天休中散挽词【年谱崇宁癸未作按史氏谱系史利用赠银青光禄大夫生九男第二曰祥字天休赠太中大夫三子约纲维故有光禄九男之语】

光禄九男君独秀赋名几与景仁班【范镇字景仁封蜀郡公】淹留州县看恬默出入风流笑险艰【左氏僖公二十八年险阻艰难备尝之矣】遗爱蜀中三郡有【左氏昭公十年子产卒仲尼闻之出涕曰古之遗爱也东坡诗不见镌碑颂遗爱】退身林下十年间【老子曰功成名遂身退天之道也杜诗身退岂待官东坡诗便从洛社休官去犹有闲居二十年又几人林下是真休僧灵彻诗相逢尽道休官去林下何曾见一人白乐天诗一坐十五年林下复春秋】山川英气消磨尽昨日华堂作土山【曹子建诗生存华屋处零落归山丘山谷盖仿此意吴志吕蒙传治土山必历日乃成文选张孟阳七哀诗昔为万乘君今作丘山土】

宋夫人挽词【年谱崇宁癸未作】

往岁涂宫暗碧沙倾城出祖路人嗟【文选孙子荆诗倾城远追送饯我千里道诗烝民仲山甫出祖前汉书临江王荣传荣行祖于江陵北门师古曰祖者送行之祭陆士衡挽歌诗死生各异伦祖载当有时东坡挽姚屯田高人沦丧路人悲】松栳峯下迁华寝【谢惠连七夕诗

留情顾华寝】雪月光中咽晓笳【李义山诗如何雪月光交映】有子今为二千石【前汉百官表郡守秦官掌治其郡秩二千石】同州才数两三家【老杜诗江深竹静两三家又此地两三家退之诗哀猿啼处两三家】儿孙满地廩衣举【邵康节诗儿孙满眼爱无涯周礼司服廩衣服皆掌其陈序】不见归时桃李华【汉书文帝纪六年冬十月桃李华东坡邓忠臣母挽诗慈颜如春风不见桃李实】

赠法轮齐公【法轮即南岳岫嵎峯龙云寺山谷有重书法轮古碑跋云大明本名惠远思大禅师之孙与虞世南李百药岑文本为方外之友三人皆为作碑铭幸岑中书之文仅存又为不解事僧传于石刻败剥之後几不可读矣而法轮寺住持禅师景齐来求予刊定且乞书而刊之师金陵蒋山中人尝入予方外之师晦堂心公之室谓我为同门盖尝参字说于王荆公其人通达辨识欲有所立人不能倾也故欣然为之书法轮寺自晋至唐贞观中虽既废复兴皆号龙云寺中间改号金轮而无文记可寻意武后时所改耳其号法轮则太平兴国五年敕书也崇宁三年二月丙寅修水黄庭坚书即贬宜州经行时也】

法轮法眷有齐公曾探斑斑虎穴中【汉书班氏之先与楚同姓令尹子文之後子文初生弃于梦泽中虎乳之楚人谓虎斑其子以为号东汉班超传不探虎穴安得虎子文选七命曰拉虎摧斑注斑虎文杜少陵寄赞上人诗徘徊虎穴上又虎穴连里闾东坡作王大年哀词曰骥堕地走虎生而斑】不必老夫亲到也自然千里便同风【传灯录玄沙传雪峯曰君子千里同风东坡诗东轩长老未相逢已见黄州一信通何必扬眉资目击须知千里事同风】

与成之书并二诗【并引】

余之窜岭南道出衡阳见主簿君益阳黄成之问宗派乃同四世祖兄也于是出嫂氏子妇相见喟然念高祖父之兄弟未远也而殊乡异井六十岁然後相识亦可悲也盖阳兄弟之叔父晦夫侍御在家着孝友之誉立朝有忠鯁之名不幸五十有四被召而歿于道上将啓手足自力作疏极论濮园事所谓歿犹不忘谏君以德其枝叶必将丰茂有赫赫于世者故作诗遗之

两祖门中种陰德【唐宪宗欲庶几二祖风烈尚书臯陶迈种德陰德见前注】名塞四海世有人诸儿莫断诗礼种解有无双耸搢绅【前汉萧何荐韩信如信国土无双後汉黄香传京师号曰天下无双江夏黄童】

人间卿相何足道胷次诗礼要不忘男儿邂逅起屠钓【毛诗邂逅相遇老杜诗邂逅岂即非良图唐裴度传成汤起伊尹于庖厨文王用吕望于屠钓杜诗贤多隐屠钓】何如林下日月长【杜诗提携日月长】

题周昉画美人琴阮图【高子勉诗序云龙眠李亮功家藏周昉画美人琴阮图兼有宫禁富贵气象旁有竹马小儿欲折檻前柳者亮功官长沙山谷谪宜州过之叹爱弥日大书一时于黄素上丹青有神艺周郎独能兼图画絶世人真态不可添却怜如画者相与落谁手想像犹可言雨重烟笼柳此画後归禁中铁马惊尘流落何许而诗亦世不传独仆旧见之位置犹可

想像病中追和其诗当令善工细图之亮功伯时弟见东坡诗中名寅】

周昉富贵女【画断云周昉画美人子女为古今冠絶】衣饰新旧兼髻重髮根急【东坡诗髻重不嫌黄菊满】妆薄无意添【红嫩妖饶脸薄妆见王荆公诗】琴阮相与娱【唐书元行冲传有人破古冢得铜器似琵琶身正圆行冲曰此阮咸所作器也命易以木弦之其声清亮乐部遂谓之阮咸】听弦不观手敷腴竹马郎【杜诗得我色敷腴】跨马欲折柳【古乐府有折杨柳曲】

信中远来相访且致今岁新茗又枉任道寄佳篇复次韵呈信中兼简任道【成都范寥字信中山谷乙酉家乘载崇宁四年三月十五日范寥来相访五月七日癸卯自此宿南楼范信中同之是诗即此年作时贬宜州】

安坐一柱观【渚宫旧事宋临川王义庆代江夏王镇江陵于罗公洲上立观甚大而惟一柱复斋漫录载博华张物志曰江陵有台甚大而惟有一柱衆梁皆共此柱故土人呼为木履观梁刘孝绰江津寄刘之遴云经过一柱观出入三休台杜子美泊松滋江亭诗云一柱全应近又下峡云船经一柱过留眼共登临送李功曹之荆州云孤城一柱观落日九江流又所思云九江日落醒何处一柱观头眠几回夔府咏怀云音徽一柱观又送弟赴齐州江通一柱观】立遗十年劳玄圭于我厚【书禹贡禹锡玄圭】千里来江皋【谢灵运歌白日丽江皋杜诗江皋已仲春】松风转蟹眼【东坡煎茶诗蟹眼已过鱼眼生飏飏欲作松风鸣】乳花明兔毛【曹邺茶诗碧波霞脚碎香泛乳花轻林和靖诗石碾轻飞瑟瑟尘乳花烹出建溪春宋景文诗瓯泛乳花匀梅圣俞和欧诗兔毛紫盏自相称清泉不必求虾蟆东坡诗忽惊午盏兔毛班蔡君谟北苑试茶诗兔毫紫瓯新蟹眼清泉煮】何如浮大白【说苑曰魏文侯与大夫饮酒使公乘不仁为觴政曰饮不釂者浮以大白东坡诗欲浮大白追余赏又云喜气到君浮白里】一举醉陶陶【刘伯伦酒德颂无思无虑其乐陶陶兀然而醉恍然而悟此诗盖和江津任道雪中游东臯韵】

和柳子玉官舍十首【东坡破琴诗引柳瑾字子玉善作诗及行草洪驹父诗话云山谷父名庶字亚夫能诗其怪石絶句云山鬼水怪着薛荔天禄辟邪眠莓苔鈎帘坐对心语口曾见汉唐池馆来或疑此十首亚夫作今两从之以见山谷诗句得之家传犹杜子美于审言也】心适堂

一屏一榻无俗尘左置枯桐右开易【晋嵇康集序孙登不知何许人无家于汲郡北山土窟放情自适夏则编草为裳冬则披髮自覆好读周易鼓一弦琴常不离左右柳子厚赠吴武陵诗朱弦絙枯桐坡诗梧桐得云和白乐天诗周易休开卦陶琴不上弦皇甫谧高士传陈仲子妻谓曰左琴右书乐在其中矣白乐天诗谁伴寂寥身无弦琴在左】重门不闭谁往还【周易重门击柝以待暴客汉原涉传周阁重门左太冲蜀都赋重门洞开杜少陵诗延客已曛黑张灯啓重门昌黎诗重门限禁扃东坡诗重门休上钥】明月清风是相识【南史谢謏曰入吾室者但有清风对吾饮者惟当明月集仙传黄鹤楼诗黄鹤楼前吹笛时白苹红蓼映江湄衷情欲诉谁能会惟有清风明月知贯休诗是何清风清凛然似相识此即洞门无锁钥俗客

不曾来之意】

思山斋

吴儿心着吴山深【晋书隐逸传贾充令夏统歌小海唱统以足扣船引声清澈风起昼冥衆皆恐充令妓女盛服金翠绕其船三匝统若无所闻充曰此吴儿是木人石心也风俗通南人谓北人为伧父北人谓南人为吴儿杜诗解水乞吴儿李太白诗春气变楚关秋声落吴山东坡诗朝见吴山横暮见吴山从】满目终南不开慰【毛诗终南何有有条有枚毛苌曰终南周之南山中南也在长安之南一名太一地理志扶风武功县东有大山古文以为终南五经要义云终南山长安南山也一名太一汉书曰太一山古文以为中南山潘岳关中记曰其山一名中南言在天之中都之南故曰中南西都赋带以洪河泾渭之川表以太华中南之山杜诗错磨终南翠又云终南在日边】有时蟬蛻书几边【史记屈原传曰蟬蛻于浊秽淮南子蟬饮而不食三十日而蛻班孟坚幽通赋飊凯风而蟬蛻兮张平子思玄赋歟神化而蟬蛻兮夏侯湛东方朔画像赞曰蟬蛻龙变弃俗登仙後汉逸民传论曰蟬蛻于嚣埃之中】梦到五湖千里外【李太白诗西忆故人不可见东风吹梦到长安白居易寄行简诗云渴人多梦饮饥人多梦餐春来梦何处合眼到东川此盖仿其意也又东坡诗云江湖来梦寐家语孔子曰折冲千里之外鲍明远芜城赋直视千里外惟见起黄埃是诗言子玉湖山之兴浓宦游之念薄也】

小池

清泉数斛关幽事【成公子安啸赋坐盘石漱清泉杜诗吾亦沼清泉韩文公诗清泉百丈化为土欧阳公诗暂照白髮临清泉抱朴子葛稚川祖为临汜县有廖氏世年百岁云井水色赤葛濬井得丹砂数斛唐杜甫诗幽事颇相关又幽事供高卧稠叠多幽事】生见镜中鱼往来【沈云卿诗船如天上去鱼似镜中悬东坡诗鸟落鱼动镜】浮萍蚀尽秋月面【论语曰君子之过也如日月之食焉欧阳公五代史诗仲尼日月也薄蚀为之既寒山子诗吾心似秋月碧潭清皎洁】霜为一磨如匣开【庾信镜诗玉匣聊开镜杜少陵诗尘匣原开镜意谓用心既刚断不为利欲所蔽】

新泉

墙根新冽寒泉眼【韩诗墙根菊花好沽酒周易井卦井冽寒泉食毛诗凯风爰有寒泉在浚之下左太冲诗前有寒泉井聊可莹心神李白诗石甃冷苍苔寒泉湛孤月杜少陵有太平寺泉眼诗东坡诗又闻侯氏好泉眼】风廊一股来泠泠【昌黎诗风廊折谈僧庄子列子御风而行泠然善也楚词七谏下泠泠而来风老杜诗泠泠风有余东坡寒衾虚幌风泠泠见芙蓉城诗】灯花夜半知我喜【杜少陵诗灯花何太喜】恰是旧花穿石声【西汉书枚乘传太山之溜穿石】

竹坞

笋随人意疎处生清风如归自来去【王荆公书一絶于壁间云竹里编茅倚石根竹茎疎处见前村闲眠尽日无人到自有清风为扫门盖僧显中诗也毛诗烝民吉甫作颂穆如清风何邵诗穆若洒清风左传邢迁如归卫国忘亡时定鄂州诗白云黄鹤自来去】虽然不与俗子期陰过邻家亦销暑【杜诗色侵书帙晚陰过酒樽凉东坡诗泉井分西邻竹陰借东家盖借竹陰销暑以喻子玉之善政谓其非俗吏伍也】

土榻

榻前鼓吹蛙一部【南史孔珪传门庭内草莱不剪中有蛙鸣曰我以此当两部鼓吹】榻上古木吟风雨【杜少陵诗桤林碍日吟风叶东坡诗长松吟风晚雨细及孤松吟风细泠泠】客来相倚竹根眠【杜少陵诗倾银注瓦惊人眼共醉终同卧竹根东坡诗归卧竹根无远近】免令不解陈登去【三国志陈登字元龙在广陵有威名卒後许汜与刘备并在荆州牧刘表坐共论天下人汜曰陈元龙湖海之士豪气不除昔遭乱过下邳见元龙元龙无客主之意久不相与语自上大牀卧使客卧下床刘备曰君有国士之名今天下大乱帝王失所宜忧国忘家有救世之意乃求田问舍言无可采是元龙所讳也何缘当与君语如我自卧百尺楼上卧君于地何但上下牀之间耶】

怪石

山阿有人着薜荔【楚词若有人兮山之阿披薜荔兮带女萝又贯薜荔之落欒注薜荔香草缘木而生文选嵇康叔夜养生論采薇山阿散髮严岫柳子厚诗密雨斜侵薜荔墙】庭下缚虎眠莓苔【东坡诗丑石半蹲山下虎莓苔草名天台赋践莓苔之滑石柳子厚诗莓苔侵标榜又莓苔插琼英】手磨心语知许事【韩诗手磨袖拂心语口慢肤多汗真相宜南史王融尝遇沈昭畧昭畧谓主人是何年少融殊不平昭畧曰不知许事】曾见汉唐池馆来【此言怪石閱世多也曾慥端伯云世传山鬼水怪着薜荔天禄辟邪眠莓苔此句尝见鲁直手书云山阿有人着薜荔庭下缚虎眠莓苔钩帘坐对心语口曾见汉唐池馆来两本互有不同未知孰是】

茴香

邻家争插红紫归诗人独行嗅芳草【韩诗气寒鼻莫嗅西都赋茂树蔚芳草被堤】丛边幽蠹更不凡【韩诗幽蠹落书棚】蝴蝶纷纷逐花老【蝴蝶字见庄子】

蜜蜂

秋成想见香租入【尧典平秩西成孔安国曰秋西方万物成也老杜诗秋成玄圃外】菊露风胶蜜几脾【李义山柳枝词花房与蜜脾蜂雄蛺蝶雌同时不同类那复更相思欧诗树陰初合苔生晕花欒新成蜜满脾东坡诗蜜脾已满黄蜂静】日日山童扫红叶蜂衙知是主人归【埤雅蜂有两衙应潮钱昭度诗黄蜂衙退海潮上白蚁战酣山雨来】

芭蕉

有底春风能好事解持刀尺剪青天【张衡髑髅赋飞蜂跃景秉尺持刀古诗良工秉刀尺老杜诗寒衣处处催刀尺刘禹锡诗仙人衣裳催刀尺东坡诗封题不敢妄裁剪刀尺自有佳人能】知君新得草书法旋卷碧云供小牋【法书苑陆羽作怀素传曰贫无纸可书常于故里种芭蕉万余株以供挥洒李义山诗芭蕉斜卷牋辛夷低过笔于此可见东坡谓子玉善草书尤信】

山谷别集诗注卷下